



Հարգելի՛ ընթերցող.

ԵՊՀ հայագիտական հետազոտությունների ինստիտուտը, չհետապնդելով որևէ եկամուտ, իր կայքերում ներկայացնելով հայագիտական հրատարակություններ, նպատակ ունի հանրությանն ավելի հասանելի դարձնել այդ ուսումնասիրությունները:

Մենք շնորհակալություն ենք հայտնում հայագիտական աշխատասիրությունների հեղինակներին, հրատարակիչներին:

Մեր կոնտակտները՝

Պաշտոնական կայք՝ <http://www.armin.am>

Էլ. փոստ՝ info@armin.am

ՀԱՅԿԱԿԱՆ
ԲԱՐԵԳՈՐԾԱԿԱՆ ԸՆԴՀԱՆՈՒՐ ՄԻՈՒԹՅԱՆ
ՊԱՏՄՈՒԹՅՈՒՆ



ՀՀ ԳԻՏՈՒԹՅՈՒՆՆԵՐԻ ԱԶԳԱՅԻՆ ԱԿԱԴԵՄԻԱ
ՊԱՏՄՈՒԹՅԱՆ ԻՆՍՏԻՏՈՒՏ

ՀԱՅԿԱԿԱՆ
ԲԱՐԵԳՈՐԾԱԿԱՆ
ԸՆԴՀԱՆՈՒՐ ՄԻՈՒԹՅԱՆ
ՊԱՏՄՈՒԹՅՈՒՆ

ԷԴՈՒԱՐԴ Լ. ՄԵԼՔՈՆՅԱՆ

«ՍՈՒՂՆԻ» ՀՐԱՏԱՐԱԿՉՈՒԹՅՈՒՆ
ԵՐԵՎԱՆ - 2005

ՀՏԴ 941 (479.25)
ԳՍԴ 63.3 (23)
Մ 537

Տպագրվում է
ՀՀ ԳԱԱ Պատմության ինստիտուտի գիտական
խորհրդի հանձնարարականով

ԷԴՈՒՐԴ Լ. ՄԵԼՔՆՅԱՆ
ՀԱՅԿԱԿԱՆ ԲԱՐԵԳՈՐԾԱԿԱՆ ԸՆԴՀԱՆՈՒՐ ՄԻՈՒԹՅԱՆ
ՊԱՏՄՈՒԹՅՈՒՆ

Մ 537

Մելքոնյան Էդ.
«Հայկական Բարեգործական Ընդհանուր Միության
Պատմություն»: - Եր., Մուղնի, 2005, 584 էջ:

*Լուսանկարների մեծ մասը արտատպված է «Միութիւն»,
«Յուշարար - Միութիւն» եւ «AGBU News» ամսագրերից եւ
«Ոսկեմատեան Հայկական Բարեգործական Ընդհանուր
Միութեան. Արժաթեայ Յոբելեան. 1906 - 1931» գրքից:*

*Ք.Քըրքորյան, Ջ. Թյոքմենճյան, Էդ. Սարտիկյան,
Հ. Հովնանյան, Ալ. Մանուկյան խմբակային լուսանկարը
«Alex Manoogian. The Man. The President.
The Humanitarian» (New York, AGBU, published by
R. Manoogian and Louise Simone) կենսագրական
գրքուկից:*

*Ներգաղթողների դիմավորումը, Մ.Նուպար
Ակնարութարանը՝ տրամադրել է Երեւան քաղաքի
պատմության թանգարանը, Ս. Տեր-Գաբրիելյան,
Ա. Խանջյան, Ա. Եսայան: ՀՀ Հասարակական եւ
քաղաքական կազմակերպությունների փաստաթղթերի
կենտրոնական պետական արխիվը, Հ.Գարակոչյանը եւ
Ալ. Իսահակյանը Նուպարաշենում եւ Արամայիս.
Երզնկյան՝ համապատասխանաբար՝ Գ. Կարազոյանը
եւ Ա. Երզնկյանը:*

*Օգտագործվել են նաեւ լուսանկարներ հեղինակի
անձնական արխիվից:*

ԳՍԴ 63.3 (23)

ISBN 99941-33-26-8

© «Մուղնի» հրատարակչություն
© Էդուարդ Լ. Մելքոնյան

Երեւան - 2005

ՀՐԱՏԱՐԱԿՈՒԹԻՒՆ
ԿԱՐԳԻՍ Լ. ՆԱԶԱՐԵԱՆ ՀԻՄՆԱԴԻՄՆԻ
ԹԻՒ 7



ՏԷՐ ԵՒ ՏԻԿԻՆ

ԿԱՐԳԻՍ ԵՒ ԱՐԵԳ ՆԱԶԱՐԵԱՆՆԵՐ

ՍՈՅՆ ՀՐԱՏԱՐԱԿՈՒԹԻՒՆԸ ԿԸ ՆՈՒԻՐԵՆ

Հ.ԲԸ ՄԻՈՒԹԵԱՆ 100 ԱՄԵԱԿԻՆ

ԵՒ

Հ.ԲԸ ՄԻՈՒԹԵԱՆ ՀԻՄՆԱԴԻՐ ՆԱԽԱԳԱՀ

ՊՕՂՈՍ ՆՈՒՊԱՐ ՓԱՇՏԱՅԻՆ

ԵՒ ԱՆՈՐ ՅԱԶՈՐԴՈՂ ԲՈԼՈՐ ՆԱԽԱԳԱՀՆԵՐՈՒՆ

ՈՒ ԻՐԵՆՅ ԳՈՐԾԱԿԻՅՆԵՐՈՒՆ,

ՈՐՈՆՔ Հ.ԲԸ ՄԻՈՒԹԵԱՆ ՊԱՏՄՈՒԹԻՒՆԸ

ԿԵՐՏԵՅԻՆ

Հայկական Բարեգործական Ընդհանուր Միությունը սփյուռքի հնագույն և ճանաչված կազմակերպություններից է: Թեև նրա շուրջ 100-ամյա գործունեության որոշ կողմերին նվիրված են տարբեր հրատարակումներ, այս գիրքը, որքան ինձ հայտնի է, ՀԲԸ Միության ընդհանրական պատմություն գրելու առաջին փորձն է: Եվ ոչ ավելին:

ՀԲԸ Միության պատմությունը այնքան հարուստ է և առանձնահատուկ՝ ժամանակի և տարածության մեջ, որ ներկայացնել մեկ, նույնիսկ ծավալուն գրքով, ըստ իս, անկարելի է: Ավելին, որոշ երկրներում (օրինակ՝ Լիբանանում, Սիրիայում, ԱՄՆ-ում, Ֆրանսիայում) նրա մասնաճյուղերի գործունեության պատմությունը կարիք ունի հատուկ և առանձին ուսումնասիրման: Կար և այլ բնույթի բարդություն՝ անհրաժեշտ պատմական նյութերի բացակայությունը: Այդ իսկ պատճառով որոշ հարցեր քննարկվել են առավելապես Միության այս կամ այն մասնաճյուղի օրինակով, ինչը, անշուշտ, որեւէ չափով չպետք է ընկալվի որպես մնացած մասնաճյուղերի գործունեության անտեսում կամ թերագնահատում: Ենթադրելով, որ աշխատության մեջ կարիք կզգացվի անել լրացումներ ու շտկումներ, կխնդրեի գիտակ ընթերցողներին իրենց դիտողություններն ուղարկել ԳԱԱ Պատմության ինստիտուտի ամունով, հետագայում ավելի ամբողջացված տեսքով ՀԲԸ Միության պատմությունը ունենալու ակնկալությամբ:

Աշխատության համար որպես սկզբնաղբյուր ծառայել են.

ա) ՀԲԸ Միության տարեգրքերը,

բ) «Միութին», «Յուշարար», «Խօսնակ» և «Յուշարար - Միութին»

ամսագրերը,

գ) 1913 և 1935 թթ. ՀԲԸ Միության «Ոսկեմատենաներ» - ը,

դ) Հայաստանի տարբեր արխիվների, ինչպես նաև ՀԲԸ Միության Կենտրոնական Վարչության արխիվի (այժմ՝ Նյու Յորքում) փաստաթղթերը:

Գրքի չորրորդ, հինգերորդ եւ վեցերորդ գլուխների ընդարձակ տարբերակները նախապես տպագրվել են առանձին գրքով՝ «Հայկական Բարեգործական Ընդհանուր Միությունը Խորհրդային Հայաստանում. 1923 - 1937 թթ.» (Երևան, Նոյան Տապան, 1999): Ներկա հրատարակության մեջ այդ հատվածները վերամշակվել եւ լրացվել են:

Իմ երախտագիտությունն եմ հայտնում՝

ՀԲԸ Միության հանգուցյալ ցկյանս նախագահ Ալեք Մանուկյանին, որի հրավերով /միջնորդությամբ Միության Կենտրոնական Վարչության կրթական բաժնի նախկին տնօրեն, դոկտոր Վաչե Ղազարյանի/ մեկնեցի ԱՄՆ՝ Կենտրոնական Վարչության արխիվի նյութերին ծանոթանալու համար,

նախագահ Լուիզ Մանուկյան - Սիմոնին եւ ի դեմս նրա ՀԲԸ Միությանը՝ գրքի պատրաստմանը օժանդակելու համար,

Անվանի պատմաբան, սիյուոքագետ, գիտությունների դոկտոր Կարլեն Դալլաքյանին, որը սիրահոժար համաձայնվեց կարդալ գրքի ձեռագիրը եւ որի դիտողությունները շատ արժեքավոր եղան ինձ համար,

Գիտությունների դոկտորներ Ալբերտ Խառատյանին, Ամատունի Վիրաբյանին, Արմենակ Մանուկյանին, ինչպես նաեւ Հովիկ Թորդեկյանին՝ արած դիտողությունների համար,

Միության Կենտրոնական Վարչության արխիվի նախկին վարիչ Դիանա Աճեմյան-Մխիթարյանին՝ օժանդակության համար:

Հատուկ շնորհակալություն Լիբանանի ՀԲԸ Միության Ծրջանակային Հանձնաժողովի բազմամյա ղեկավար գործիչ պարոն Կարպիս Նազարյանին, գրքի տպագրությունը հովանավորելու համար:

Էդ. Լ. Մ.

19 փետրվար 2005

Բովանդակություն

1. Գիմնադիրները եւ նպատակները	11
2. Արեւմտյան Հայաստանում եւ Կիլիկիայում	43
3. Որբախնամ եւ գաղթախնամ գործունեությունը	81
4. Խորհրդային Հայաստանում	167
5. 1920 - 1930 թթ. ներգաղթը: Գ. Կյուլպենկյանի հրաժարականը	203
6. Ներքաղաքական պայքարը եւ ՀԲԸՄ լուծարումը Հայաստանում	251
7. Երկրորդ Աշխարհամարտի տարիներ: Սեօ ներգաղթը	309
8. Հայ ինքնության պահպանումը սփյուռքում	383
Արեւելքի երկրներ	385
Արեւմուտքի երկրներ	462
Վերջաբան. ՀԲԸ Միությունը Հայաստանի Երրորդ Հանրապետությունում	525
Ծանոթագրություններ	531
Անվանացանկ	561
Summary	579
Резюме	581

«Միայն դասնությունն է ի գորու սովորեցնել մեզ ճիշտ արժեարելու այն բարիքները, որոնց համար մենք շնորհակալության զգացում չունենք լուկ այն դասճառով, որ վարժվել ենք դրանց եւ ստացել առանց դայբարի»:

Փրիդրիխ Շիլլեր

«Ինչունն է կայանում համաշխարհային պատմության ուսումնասիրումը եւ որն է այդ ուսումնասիրման նպատակը»

1

ՀԻՄՆԱԴԻՐՆԵՐԸ ԵՎ ՆՊԱՏԱԿՆԵՐԸ

XX դ. առաջին տարիներին՝ 1906թ. Եգիպտոսում՝ Կահիրեում տեղի հայերի կողմից հիմնվեց մի կազմակերպություն՝ Հայկական Բարեգործական Ընդհանուր Միություն (ՀԲԸՄ), որի նպատակն էր նպաստել թուն Հայաստանում ապրող հայերի մտավոր եւ տնտեսական կացության բարելավմանը: Այսօր, շուրջ մեկ դար անց, այս փաստը ինքնին կարող է առաջացնել հարցեր. որո՞նք էին այդ կազմակերպության ստեղծման շարժառիթները, ինչո՞ւ այն հիմնադրվեց ոչ թե Հայաստանում, այլ Եգիպտոսում:

Ինչու ոչ Հայաստանում

Հայաստան, որպես ինքնիշխան պետություն, գոյություն չունեւր ոչ XX դարի առաջին տասնամյակում, ոչ էլ նախորդ երկար ու ձիգ դարերի ընթացքում: Հայերի բնօրրանը, ազգային տարածքը հանդիսացող Հայաստանը աշխարհագրորեն միշտ էլ գտնվել է երկու խոշոր քաղաքակրթությունների՝ Արեւելքի եւ Արեւմուտքի խաչմերուկում, իսկ հայոց պատմությունը անբաժանելիորեն կապված է եղել (եւ մնում է այդպիսին) այդ երկու քաղաքակրթությունները ներկայացնող երկրների հետ: Տարբեր ժամանակներում դրանք էին, մի կողմից՝ Ասորեստանը, Պարսկաստանը, Արաբական խալիֆայությունը, Օսմանյան կայսրությունը՝ Թուրքիան, մյուս կողմից՝ Հին Հունաստանն ու Հռոմը, Բյուզանդիան, Ռուսական կայսրությունը: Մ. թ. IV դ. Հայաստանը այլեւս անգոր եղավ դիմակայելու հարեւան երկու հզոր պետությունների՝ Պարսկաստանի եւ Հռոմեական Արեւելյան կայսրության՝ ուզմաքաղաքական ճնշմանը, եւ նրա տա-

րածքը 387թ. բաժանվեց այդ երկու կայսրությունների միջև: Դրանով իսկ Հայաստանը, որպես անկախ պետություն, դադարեց գոյություն ունենալուց: VII դ. սկսած Հայաստանի տարածքը ենթարկվեց տարբեր, իրար հաջորդող քոչվոր ժողովուրդների հարձակումներին, որոնք նշանավորվեցին հայերի համատարած հալածանքներով և արտագաղթով: Հայ ժողովրդի հետագա ողջ պատմության համար հատկապես ճակատագրական եղավ թուրք-օսմանների ներխուժումը, որոնք, ի տարբերություն իրենց նախորդների, հաստատվեցին Հայաստանի տարածքում և ձեռնամուխ եղան սեփական պետության ստեղծմանը՝ ի դեմս Օսմանյան կայսրության, որի ժառանգորդն է այսօրվա Թուրքիան:

XIX դ. սկզբին այս աշխարհամասում ի հայտ եկավ նոր ուժ՝ Ռուսական կայսրությունը, որը ելնելով սեփական քաղաքական շահերից՝ ձգտում էր ընդարձակել իր հարավային սահմանները: 1804-1813թթ. և 1826-1828թթ. ռուս-պարսկական պատերազմները ավարտվեցին Ռուսական կայսրության հաղթանակով, որի արդյունքում նրան միացվեց Արևելյան Հայաստանը: Ռուսաստանը շարունակեց իր հարձակողական քաղաքականությունը այս անգամ արդեն Օսմանյան կայսրության դեմ: 1828-1829 և 1877-1878թթ. ռուս-թուրքական պատերազմները նույնպես ավարտվեցին Ռուսաստանի հաղթանակով: Դրանով իսկ, իր վերջնական ձեռնարկումը ստացավ Հայաստանի տարածքի հերթական բաժանումը՝ Արևելյան Հայաստանը ընդգրկվեց Ռուսական կայսրության կազմի մեջ, իսկ Արևմտյանը, որը զբաղեցնում էր Հայաստանի տարածքի հիմնական մասը և ուր բնակվում էր հայերի ճնշող մեծամասնությունը, գրեթե անփոփոխ ձեռով մնաց Օսմանյան կայսրության կազմում: Այս բաժանումը սրահայանվեց մինչև Առաջին Համաշխարհային պատերազմը:

Հայաստանի տարածքի այս վերջին բաժանումը կարելի է նմանեցնել յուրատեսակ մի փորձարարության, որը պատասխան պետք է տար այն հարցին, թե ինչպես կընթանա հայ ժողովրդի պատմությունը միանգամայն հակադիր սոցիալ-մշակութային աշխարհներում՝ ռուս-քրիստոնեական և թուրք-մահմեդական: Չմտնելով մանրամասնությունների մեջ, որոնք այստեղ անտեղի կլինեին, նշեմ միայն հետևյալը: Ռուսաստանի մաս կազմող Արևելյան Հայաստանում է, որ հայերի թվաքանակը մշտապես աճեց, այդ թվում՝ ի հաշիվ Արևմտյան Հայաստանի փախստականների, այստեղ է, որ նրանք զարգացում ապրեցին ամենատարբեր ոլորտներում, վերջապես, այստեղ է, որ հետագայում, արդեն XX դ. նրանք վերականգնեցին իրենց պետականությունը:

«Չի եղել մի դեպք՝ ո՛չ Եվրոպայում, ո՛չ Ասիայում, ո՛չ Աֆրիկայում, երբ թուրքական տիրապետության հաստատումը որեւէ երկրում չբերեր իր

հետ նյութական վիճակի վատթարացում և մշակույթի անկում, և հակառակը՝ չի եղել մի դեպք, երբ թուրքական տիրապետությունից ազատվելը չբերեր իր հետ նյութական բարօրության աճ և մշակութային զարթոնք: Թե Եվրոպայի քրիստոնեական երկրներում և թե Սիրիայի, Արաբիայի և Աֆրիկայի մահմեդական երկրներում օթոման թուրքերը անում էին միայն մեկ բան՝ ավերում էին այն, ինչը զավթված էր իրենց կողմից, դեպքերից և ոչ մեկում նրանք ցույց չտվեցին, որ ընդունակ են խաղաղ զարգացնել այն, ինչը նվաճված է պատերազմով: Այդ ուղղությամբ չէ, որ զարգացել է թուրքերի տաղանդը»:¹ Մեծ Բրիտանիայի արտաքին գործերի նախարար Արթուր Բալֆորի այս խոսքերը, որ հնչեցին 1919թ. Փարիզի հաշտության կոնֆերանսում, հակիրճ, բայց և ճշգրիտ բնութագրումն է Օսմանյան Թուրքիայի քաղաքականության՝ հպատակ ժողովուրդների, այդ թվում նաև հայերի նկատմամբ:

Հայերի պարագայում այդ քաղաքականությունը էլ ավելի դաժան ձեւեր ընդունեց 1878թ. Բեռլինի վեհաժողովից հետո, երբ եվրոպական երկրների պահանջով Օսմանյան կայսրությունը պարտավորվեց «բարենորոգումներ» իրականացնել Արևմտյան Հայաստանի տարածքում: Այդ պահից հայկական գործոնը, Հայկական հարցը սկսեց մեծապես մտահոգել թուրքական իշխանություններին, քանզի հայերի օրեցօր արթնացող ազգային-քաղաքական ինքնագիտակցությունը իրական վտանգ էր ներկայացնում կայսրության համար: Եվ երբ 1890-ականներին տեղի ունեցան հայերի քաղաքական ցույցերը Կ. Պոլսում, թուրքերը օգտագործեցին դրանք՝ որպես առիթ և դիմեցին ցեղասպանության քաղաքականությանը: 1894-1896թթ. թուրքական բանակը և հատուկ պատժիչ ջոկատները (համիդիե) մոտ 300 հազար հայ սպանեցին Արևմտյան Հայաստանի ու Կիլիկիայի տարբեր քաղաքներում և շրջաններում: Կայսրության ողջ տարածքում թուրքական իշխանությունները գրգռեցին հակահայկական տրամադրությունները, հայերին դարձրին օրենքից դուրս մի ժողովուրդ, որին կարելի էր անպատիժ սպանել, հալածել, կողոպտել: Մեծապես տուժել էին հայ ժողովրդի բոլոր սոցիալական խմբերը՝ հայ պաշտոնյաները վտարվում էին աշխատանքից, հայ առևտրականների գործունեությունը խիստ սահմանափակվել էր, հայ հոգեւորականները մնացել էին առանց եկեղեցիների, որոնք կամ այրվել էին, կամ էլ քանդվել, կազմալուծվել էին ազգային կազմակերպությունները: Զգալիորեն խախտվել էր նաև արևմտահայերի ժողովրդագրական նկարագիրը՝ նվազել էր տղամարդկանց թվաքանակը, անօթեան որբերն ու այրի կանայք հաշվվում էին տասնյակ հազարներով: Ստեղծված աննախադեպ դժոխային պայմանների հետևանքը եղավ անելանելիության տրամադրությունների արմատավոր-

րումը հայերի մեջ, նրանցից տասնյակ հազարավորների արտագաղթը երկրից: Արտագաղթողների հիմնական մասը երիտասարդներ էին, որոնք հաստատվեցին Եգիպտոսում, Հունաստանում, Բուլղարիայում, Ռումինիայում, ինչպես նաև Կանադայում և ԱՄՆ-ում:

Հայերի նման վիճակը հայտնի էր բոլոր նրանց, ովքեր այս կամ այն չափով մտահոգված էին նրանց ճակատագրով: Գնալով ակնհայտ էր դառնում Թուրքիայի հայ բնակչության կենսական, ամենօրյա, ամենատարրական կարիքները հոգալու անհրաժեշտությունը: Եվրոպական պետությունները բավարարվում էին լոկ խոստումներով, որոնք, կարծես, ավելի էին գրգռում թուրքերին: Նույնպես ապարդյուն էր օժանդակություն ակնկալել անգամ հայերի հոգեւոր և աշխարհիկ առաջնորդներից: Կ.Պոլսում տեղակայված Հայոց պատրիարքարանը և նրա շուրջ համախմբված Թուրքիայի պետական և ֆինանսատնտեսական կառուցվածքում բարձր դիրքեր գրաված հայերը ձգտում էին հարմարվել եղած պայմաններին և դրանով իսկ առիթ չընձեռել իշխանություններին՝ նոր հալածանքների համար: Իսկ հայ քաղաքական կազմակերպությունների ամբողջ գործունեությունը ուղղված էր մեկ գերխնդրի լուծմանը՝ հայ ժողովրդի ազգային ինքնորոշման ապահովումը, ընդհուպ մինչև անկախ պետության վերստեղծում:

Հայրենաբնակ հայերին օժանդակելու դեր կարող էր ստանձնել հատուկ այդ նպատակով ստեղծված մի նոր կազմակերպություն: Ակնհայտ էր, սակայն, որ այդպիսին չէր կարող ոչ ստեղծվել և ոչ էլ գործել Թուրքիայում: Նման օգնություն անհնար էր իրականացնել նաև Ռուսաստանից, ուր այդ տարիներին հաջողությամբ գործում էին խոշոր հայկական բարեպաշտական կազմակերպություններ (Կովկասի Հայոց բարեգործական միությունը՝ Թիֆլիսում, Բաքվի Հայոց մարդասիրական ընկերությունը և այլն): Անհնար էր՝ նկատի առնելով Թուրքիայի և Ռուսաստանի ավանդական ռազմաքաղաքական առճակատումը:

Եվ ստացվում էր, որ իրականում նման օգնություն հնարավոր էր ակնկալել արտերկրի հայությունից միայն: Ինչպիսի՞ չափանիշների, սակայն, պետք է համապատասխանեին նման երկիրը և տեղի հայությունը: Նախ հարկ է նշել, որ այդ երկիրը տարածքային առումով պետք է հնարավորին չափ մոտ լիներ Թուրքիային, ինչը կոյուրացներ մշտական և արագ հաղորդակցությունը հայրենաբնակ հայության հետ: Կարելի էր նաև, որ երկրի իշխանությունները թույլատրեին նման կազմակերպության հիմնումը և չխոչընդոտեին նրա գործունեությանը: Իսկ դա, իր հերթին, կախում ուներ նույն այդ իշխանությունների և տեղի հայ համայնքի փոխհարաբերություններից: Եվ, վերջապես, տվյալ երկրում պետք է լինե-

ին այնպիսի անհատներ, որոնք իրենց հեղինակությամբ, ֆինանսական կարողություններով ոչ միայն կնախաձեռնեին նոր կազմակերպության հիմնումը, այլև կապահովեին նրա հարատև գործունեությունը: Եթե այս տեսանկյունից քննելու լինենք այդ տարիների հայ գաղթաշխարհը, ապա պարզ կդառնա, որ Եգիպտոսն ու տեղի հայ համայնքն է, որ համապատասխանում էին նշված չափանիշներին և կարող էին դառնալ նոր կազմակերպության ծննդավայրը:

Պողոս Նուպար. Միության հիմնադիր-նախագահը

Թեև հայերը սկսել էին հաստատվել Եգիպտոսում վաղ ժամանակներից, հայ համայնքը իր իսկական իմաստով սկսեց ձևավորվել մոտավորապես X դ., ինչը պայմանավորված էր Փաթիմյանների խալիֆայության (909-1171թթ.) օրոք քրիստոնյաների նկատմամբ հանդուրժողական քաղաքականությամբ: 1517թ., սակայն, Եգիպտոսը նվաճվեց սուլթան Սալիմ I-ի կողմից և դարձավ Օսմանյան կայսրության մարզերից մեկը: Ինչպես և այլ երկրներում, այստեղ նույնպես թուրքական տիրապետության հետևանքները լոկ բացասական էին՝ տնտեսությունը և կենսագործունեության այլ ոլորտները արագորեն սկսեցին անկում ապրել, ազգային խորականության զոհ դարձան թե բնիկ ժողովուրդը և թե ազգային փոքրամասնությունները: Եգիպտոսի համայնքի պատմության նոր փուլը սկսվեց XIX դ. սկզբներին, երբ Եգիպտոսի կառավարիչ հռչակվեց Մուհամեդ Ալին, որի նպատակն էր ազատագրել Եգիպտոսը Օսմանյան կայսրության տիրապետությունից: Մուհամեդ Ալին և նրա հաջորդները սկսեցին իրականացնել բարեփոխումների մի ամբողջ ծրագիր՝ միաժամանակ հնարավորություն ընձեռելով մասնակից դառնալ դրան նաև տեղի քրիստոնյաներին, այդ թվում և հայերին: Հայերի ներդրումը եղավ շոշափելի: Մասնավորապես, նրանք լայն կապեր էին հաստատել մի շարք երկրների՝ Անգլիայի, Ֆրանսիայի, Թուրքիայի, Ռուսաստանի խոշոր առևտրական և ֆինանսական հաստատությունների հետ: Իրենց հերթին, Կ. Պոլսի հայ գործարար մարդիկ այդ շրջանում նույնպես աշխույժ գործունեություն էին ծավալել Եգիպտոսում: Այդ ամենը պայմանավորեց եգիպտահայերի սոցիալական կարգավիճակի բարձրացումը. XIX դ. առաջին կեսից նրանց սկսեցին վստահել տարբեր, այդ թվում՝ ամենաբարձր պաշտոններ պետական հիմնարկություններում: Դրան զուգընթաց աշխուժանում էր տեղի հայերի համայնքային կյանքը, ստեղծվում էին տարբեր կազմակերպություններ, պարբերականներ և այլն: Այսպիսով,

Եզիպտոսը և տեղի հայ համայնքը իրենց հիմնական բնութագրերով համապատասխանում էին վերը նշված չափանիշներին, մնում էր մի բան՝ համապատասխան անհատների առկայությունը:

XIX դ. կեսերին Եզիպտոսում պետական բարձր պաշտոններ զբաղեցնող հայերից էր Պողոս Յուսուֆյանը (1768-1843), որը իր կյանքի վերջին տարիներին երկրի Արտաքին գործերի և առևտրի նախարարն էր (տեսուչը): 1830-ական թթ. նա Արտաքին գործերի նախարարության դիվանատան քարտուղարի պաշտոնով Եզիպտոս է հրավիրում իր քրոջ որդուն՝ Նուպար Նուպարյանին, որը հետագայում դարձավ այդ երկրի ամենահայտնի պետական գործիչներից մեկը և պատմության մեջ մտավ Նուպար փաշա անունով: Նրա գործունեությունը, որպես Եզիպտոսի կառավարության նախագահ, այնչափ նշանակալից էր և բեղմնավոր, որ դարձել է այդ երկրի XIX դ. պատմության անբաժանելի մասը: Ահա այս մարդու որդին էր Պողոս Նուպարը (1851-1930), Հայկական Բարեգործական Ընդհանուր Միության հիմնադիրն ու առաջին նախագահը:

Ինչպես և իր հայրը, Պողոս Նուպարը² ևս կրթություն ստացավ Ֆրանսիայի և Օվեյցարիայի երկրորդական վարժարաններում, ապա ուսումը շարունակեց Փարիզի հայտնի Ecole Centrale-ում՝ ճարտարագետ-մեքենագետ մասնագիտությամբ, որն ավարտելուց հետո որոշ ժամանակ աշխատեց Ֆրանսիայում: Նրա՝ որպես մասնագետի, որակավորման մասին է խոսում այն, որ 1900թ. Փարիզի, իսկ 1906թ. Միլանի միջազգային ցուցահանդեսներում իր ստեղծած «երկրագործական արոր մեքենայի (թրաքթօր)» համար արժանացավ ոսկե մեդալների, ապա հաջորդաբար նրան շնորհվեցին ֆրանսիական Պատվո լեգեոնի ասպետական խաչ և սպայության աստիճան: Այդ նույն տարիներին Պողոս Նուպարը մասնակցեց նաև Երկրագործական միջազգային ինստիտուտի հիմնադրմանը, որը մեծապես նպաստեց այդ բնագավառի զարգացմանը տարբեր երկրներում:

Վերադառնալով Եզիպտոս՝ նա ծառայության անցավ պետական հիմնարկներում և շուրջ յոթ տարի (1891-98թթ.), որպես ընդհանուր տնօրեն, գլխավորեց Եզիպտոսի երկաթուղիները: Այդ տարիներին Եզիպտոսը, ըստ էության, դարձել էր Անգլիայի գաղութը, որի հետևանքով գրեթե բոլոր բնագավառները, հատկապես երկաթուղային, գտնվում էին անգլիացիների հսկողության տակ: Պողոս Նուպարը, ընդվզելով նրանց ու ամեն կարգի միջամտության դեմ, ներկայացրեց իր հրաժարականը: Նույնիսկ Եզիպտոսի խղիվ Աբբաս փաշայի խնդրանքը՝ հետ վերցնել հրաժարականը, չազդեց նրա վրա, դեռ ավելին՝ այդ դեպքից հետո նա այլևս չծառայեց պետական հիմնարկներում: Հետագա տարիներին Պողոս

Նուպարը դրսևորեց ֆինանսիստի և կազմակերպչի իր հմտությունները, որի շնորհիվ էլ ավելի մեծ չափերի հասցրեց հորից ժառանգած հարստությունը: Այսպես, նա հիմնեց Ալեքսանդրիայի տրամվայների և Մենզելեյի հողերի շահագործման ընկերությունները, տարիներ շարունակ որպես ամենամեծ բաժնետեր և տնօրեն գլխավորեց Կահիրեի ջրային ընկերությունը, որի կարելությունը Եզիպտոսի նման մի երկրի համար չափազանց մեծ էր: Բելգիացի հայտնի դրամատեր Անբենի հետ միասին նա հիմնեց Հելիոպոլիս քաղաքի (այն հետագայում ընդգրկվեց Կահիրեի սահմանների մեջ) շահագործման «Օվասիս» ընկերությունը և այնտեղ էլ՝ մի շարք խոշոր և շահութաբեր ընկերություններ: Բացի այդ, նա Եզիպտոսի մի շարք ամենախոշոր բանկերի վարչությունների նախագահն էր կամ անդամը: Չնայած Պողոս Նուպարը հրաժարվել էր ծառայել պետական հիմնարկներում, նրա բերած նպաստը Եզիպտոսի առաջադիմության գործին այնչափ մեծ էր և ակնհայտ, որ մինչև իր կյանքի վերջին օրերը նա վայելեց Եզիպտոսի իշխանությունների վստահությունն ու հարգանքը: Նա պարգևատրվել էր Եզիպտոսի «Նեղոս» և Թուրքիայի «Մեճիտիյե», «Օսմանիյե» ամենաբարձր պատվանշաններով: Հիշատակման է արժանի նաև այն, որ Եզիպտոսի սուլթան Հուսեյն Ա (1914թ., Կահիրեում) և թագավոր Ֆուադ Ա (1928թ., Փարիզում) հյուրընկալվել էին Պողոս Նուպարի բնակարանում, մի բան, որը բացառիկ պատիվ էր անպաշտոն անհատի համար:

Հայտնի է, սակայն, որ նման բնութագրերը (բարձր դիրք, պաշտոն, հարստություն և այլն) միշտ չէ, որ ենթադրում են նույն այդ մարդու գործունեությունը՝ ի նպաստ իր ազգի: Հայերի պատմությունը լեցուն է նման օրինակներով՝ սկսած հայկական ծագում ունեցող բյուզանդական կայսրերից, վերջացած նախկին Խորհրդային Միության ղեկավարության անդամներով: Սա ընդհանրապես բարդ և միաժամանակ շատ հետաքրքիր երևույթ է, որի լուսաբանումը պահանջում է տարբեր գործոնների հաշվառում:

Այդ առումով հատկանշական է հետևյալ հատվածը ՀԲԸ Միության ամենահայտնի գործիչներից մեկի՝ Վահան Մալեզյանի հիշողություններից. «...Նուպարներու ապարանքը մտնելը անելի դժուարին էր հայու մը համար քան Խոտիլին պալատը ու վերջը նոյնպէս տեսայ որ ինչքան Կիւպէնկեան խոյս կուտար հայերու ներկայութենէն և պինդ կը փակէր իր ապարանքի դուռները, միշտ այն մտածումով որ հայ մը անպայման իր դրամին և դիրքին համար կը ցանկայ իրեն մօտենալ»:³ Թվում է, թե ժողովրդի նման պահանջը արդարացի է, սակայն միայն այն դեպքում, երբ ուղղված է տարբեր տեսակի հիմնարկություններին, որոնք ստեղծվում են

հենց այդ նպատակով: Իսկ անհատի դեպքում դա առնվազն իրատեսական չէ, քանի որ անհատի նման պատրաստակամությունը կամ դրա բացակայությունը պայմանավորված է տարբեր, նաեւ անձնական բնույթի գործոններով: Հարկ է նշել նաեւ այն հանգամանքը, որ հարուստ եւ հայտնի հայերը մեզ հետաքրքրող ժամանակաշրջանում, միայն Հայաստանից դուրս, տարբեր երկրներում էին, որը ավելի հավանական էր դարձնում նրանց օտարացումը հարազատ ազգային մշակույթից, եւ այլ մշակույթի եւ արժեքների որդեգրումը: Պետք է նկատի առնել նաեւ, որ նման անհատների հարուստ կամ հայտնի լինելը արդյունք էր եւ է մի գործունեության, որն ընթացում է ասպնջական ժողովրդի, հասարակության միջավայրում, այլ ոչ՝ զուտ հայկական: Իսկ դա իր հերթին նպաստում է ընդունող հասարակության նկատմամբ բարոյական պարտականության զգացումի առաջացմանը: Այդ առումով արդարացի էր ՀԲԸ Միության նախագահներից մեկը՝ Գալուստ Կյուլպենկյանը, երբ «...կ'ըստ յաճախ թէ միայն հայերուն չէ որ պարտի նպաստել, այլ եւ օտարներուն, որոնցմէ միայն շահած է եւ որոնց հետ գործի կապեր ունի»⁴:

Եթե այս ամենի լույսի տակ անդրադառնանք Պողոս Նուպարի ազգային նկարագրին, ապա զարմանալի չէր լինի, եթե այն կրեր զուտ խորհրդանշական բնույթ: Հիշենք, որ նա իր ուսումը ստացել էր Եվրոպայում, որպես գործարար մարդ՝ կապված էր օտարազգիների հետ եւ իր նկարագրով ու ասորելակերպով իսկական եվրոպացի էր: «Անհկա (Պողոս Նուպարը - Էդ.Մ.) բնաւ արեւելցի, քիչ հայ է,- անպատեհութիւն մը թերեւս ազգային տեսակէտէն, վասնզի ատով փաշան անկարող կ'ըլլայ երբեմն թափանցելու մեր մասնաւոր հոգեբանական վիճակներուն,- բայց ինչ որ իր անհատական արժանիքին համար անժխտելի առաւելութիւն մըն է՝ Պողոս փաշա, իմացականօրէն, կատարեալ եվրոպացիի, իմա՝ ֆրանսացիի տիպար մը կը ներկայանայ»⁵:

Կարելոր է թվում նաեւ հետեւյալ փաստը, որը կապված է նրա հոր՝ Նուպար փաշայի հետ: Ինչպես հայտնի է, 1878թ. հունիսին հրավիրվեց Բեռլինի վեհաժողովը (Մեծ Բրիտանիայի, Ռուսաստանի, Ավստրո-Հունգարիայի, Գերմանիայի, Ֆրանսիայի, Իտալիայի, Թուրքիայի մասնակցությամբ)՝ Սան Ստեֆանոյում մինչ այդ կնքված ռուս-թուրքական պայմանագրի վերանայման նպատակով, քանի որ վերջինը, եվրոպական պետությունների կարծիքով, չափազանց ուժեղացրել էր Ռուսաստանի ազդեցությունը Բալկաններում եւ Փոքր Ասիայում: Եվ քանի որ Սան-Ստեֆանոյի պայմանագրի 16-րդ հոդվածը վերաբերում էր Արեւմտյան Հայաստանին, այդ հարցը նույնպես պետք է քննարկման առարկա դառնար Բեռլինում: Այդ իսկ պատճառով Բեռլին մեկնեց նաեւ հայկական պատ-

վիրակությունը՝ Մկրտիչ Խրիմյանի գլխավորությամբ: Ծանապարհին պատվիրակությունը Փարիզում հանդիպում է Նուպար փաշային եւ ծանոթացնում նրան ներկայացվելիք հուշագիր-ծրագրի հետ: Նուպար փաշան իր հերթին քննարկում է այն Բիսմարկի եւ Լորիս-Մելիքովի հետ. «...երբ մեծանուն դիւանագետներ Պիզմարք, Մելիքով եւ Նուպար փաշա տեսած էին այն ձախտող ծրագիրը որ կը գտնուէր պատուիրակներուն ձեռքը, երեքն ալ կրկնած էին թէ այս ծրագիրը պարզապէս երեսակայական է եւ իրենք կ'ուզեն ներկայացնել ուրիշ ծրագիր մը, բայց...»⁶ Թե ինչպես էին զարգացել հետագա դեպքերը, դրա մասին տարիներ անց վերհիշում էր հենց Մ.Խրիմյանը, այդ պահին արդեն Մկրտիչ Ա Ամենայն Հայոց կաթողիկոսը, Նուպար փաշային ուղղած իր նամակում. «...յուշ առնեմ Ձեզ, Վսեմ. Տէր, որ աստի 17 տարի յառաջ ի Փարիզ գտնուեցայ մեր թարգման ա. Չերազին հետ, եւ ես իբրեւ պատգամաւոր Հայոց՝ Ներսէս Պատրիարքի կողմէն, մի Յիշատակագիր մատուցի Ձերդ Վսեմութեան, որ պարունակում էր Հայկական նոր մի խնդիր եւ զոր պիտի մատուցանէի Պերլինի վեհաժողովին:... Դուք ամենայն սիրով ընդունեցիք եւ գրկեցիք այս խնդիր եւ հաճեցայք զայն ուշադրութեան առնել: Ուստի վերծանելով եւ քննելով այդ Յիշատակագիրը, Դուք զայն անյարմար եւ չափազանց գտաք: Ուստի մի այլ նոր Յիշատակագիր կազմեցիք, Ձեր իմաստուն հեռատեսութեամբ չափաւորելով եւ հնարաւոր դարձնելով խնդիրը: Ես այդ նոր չափաւորեալ Յիշատակագիրը յղեցի ի Պոլիս՝ Ներսէս Պատրիարքին: Այլ աւաղ, թէ ինք եւ թէ իր մտերիմ խորհրդակիցներն՝ ամենայն յամառութեամբ պնդեցին որ Յիշատակագիրն անփոփոխ մնայ եւ այնպէս մատուցուի վեհաժողովին: Այս որոշման հետագիրը ես ի Պերլին ստացայ, սաստիկ վիշտ զգացի, այնպէս որ առանձին քաշուելով լացի մի տղու նման, վասն զի քաջ նկատեցի բանին վախճանը:... Ես չեմ կարող մոռնալ այս դէպքը: Եթե Ձերդ Վսեմութիւնը Պերլին գտնուէր եւ Ձեր յօրինած Յիշատակագիրը մատուցէր վեհաժողովին, ես այնպէս կը հաւատամ, որ 61-րդ յօդուածը այնպէս թոյլ, անորոշ կերպով չէր արձանագրուէր, այլ աւելի զօրաւոր, վճռական ու գործնական»⁷:

Իր հերթին, Նուպար փաշան գրում է. «1878թ. Բարիզ կը գտնուէի: Ներսէս Պատրիարքին ուղարկած չորս պատուիրակները եկած էին զիս տեսնելու, խորհուրդ եւ նպաստ խնդրելու համար: Ես իրենց թելադրեցի՝ որ պատուիրակութիւնը ինձի յանձնէին եւ ես բոլոր ծախքերը ու աւելին իսկ ընելու յանձնառու կ'ըլլայի:... Թողուցէք ինձ, որ ջանամ ընդունիլ տալ եւ կիրարկել իմ վարչական համետն ծրագիրս: Անգլիական պատուիրակներ՝ Լորտ Պիքընսֆիլտ եւ Սալըզպըրի, Պիզմարք եւ նոյն իսկ ռուսական պատուիրակները բարեկամներս են: Գործ ունեցած եմ անոնց հետ, լաւ կը

ճանչնան զիս ու կը սիրեն, եւ ես կրնամ ընդունիլ տալ իմ չափաւոր ծրագիրս՝ Հայաստանի վեց նահանգներուն մէջ Դատարանական Բարեկարգութիւն. այսինքն դատաստանական հասասորութիւն հայերուն եւ իսլամներուն միջեւ: Ես իսկ յանձնառու կ'ըլլամ ներմուծել այդ բարեկարգութիւնները: Ասիկա բոլոր մեր պահանջներուն գոհացում կու տայ... Հայ պատուիրակները համոզուեցան, հաճեցան եւ մեկնեցան Պերլին, ուրկէ պիտի հեռագրէին անյապաղ՝ որ ես ալ ճամբայ ելլէի: Սպասեցի հինգ օր, ութ օր: Երկու շաբաթ վերջ նամակ մը ստացայ փոխանակ հեռագրի: Ստորագրողն էր Մինաս Չերազ, քարտուղար հայ պատուիրակութեան: Պարունակութիւնը լակոնական էր եւ այս.- «Ազգը չի ճանչնար Ձեզ իրեն ներկայացուցիչ եւ մենք ենք անոր պատուիրակները Պերլինի Վեհաժողովին»:⁸

Բեռլինի վեհաժողովի կազմակերպիչ պետությունները հայ պատվիրակությանը մասնակից չդարձրին վեհաժողովի նիստերին, նրա կողմից ներկայացված «երեսակայական» ծրագիրը ընդհանրապես չքննարկվեց, իսկ Սան-Ստեֆանոյի պայմանագրի 16-րդ հոդվածը փոխարինվեց 61-րդ հոդվածով, ուր խոսվում էր այսպես կոչված «բարելավումների եւ բարենորոգումների» անհրաժեշտության մասին՝ Օսմանյան կայսրության հայաբնակ մարզերում: Միամտություն կլինեք կարծել, թե Նուպար փաշայի ծրագիրը ի վիճակի էր էական փոփոխություն մտցնել Հայկական հարցի հանդեպ մեծ տերությունների վերաբերմունքի մեջ: Խոսքն առավել իրատեսական ծրագրի մասին է, որն, ի դեպ, տարիներ անց՝ Առաջին Համաշխարհային պատերազմի նախօրեին, դարձավ նույն այդ տերությունների հավանությանը արժանացած «բարենորոգումների» նոր ծրագրի բաղկացուցիչ մասը: Հենց նման ծրագիր չէր կարող ներկայացնել կղերական դիվանագիտությունը:

Հայ եկեղեցին, որ այդ ժամանակ պատմական ճակատագրի բերումով դարձել էր հայ ժողովրդի ազգային-քաղաքական շահերի արտահայտողն ու պաշտպանը, չունեւ նման գործունեության համար անհրաժեշտ գիտելիքներ ու փորձառություն: Այդ պայմաններում Նուպար փաշայի նման հմուտ դիվանագետի, եվրոպական երկրների ամենաբարձրաստիճան դեկավարների հարգանքը եւ բարեկամությունը վայելող մի մարդու մասնակցությունը Բեռլինի վեհաժողովին կարող էր միայն նպաստել հայկական պատվիրակության արդյունավետ գործունեությանը: Սակայն հայ եկեղեցականները հրաժարվեցին նրա ծառայությունից, թերեւս, այն պատճառով, որ մինչ այդ Նուպար փաշան հեռու էր հայ ազգային-քաղաքական կյանքից: Սակայն առնվազն ոչ իրատեսական կամ անլուրջ կլինեք ակնկալել, որ Եգիպտոսի ամենաբարձրաստիճան պետական գործիչը իր մշտական եւ անմիջական մասնակցությունը բերեք մի

գործի, որի կատարման համար չկային ոչ հստակ ծրագիր, ոչ էլ ճանաչված դեկավարություն: Այլ բան էր միջազգային վեհաժողովը, որի մասնակիցները իսկապես օժտված էին ժողովուրդների գոյավիճակը փոփոխելու համար իրական միջոցներով, եւ ուր նա կարող էր կամ համեմատյալ դեպս կջանար կիրարկել դիվանագետի իր ողջ փորձը, իր անձնական ծանոթությունները՝ ի նպաստ հայ ժողովրդի շահերի: Սա մի գերխնդիր էր, որի դրական լուծման դեպքում այն կդառնար Նուպար փաշայի՝ որպես հայ մարդու, աստեղային ժամը: Իսկ թե ինչպիսին էր Նուպար փաշայի վարկն այդ օրերին, վկայում է այն փաստը, որ Բեռլինի վեհաժողովի բացումից մոտ երեք ամիս անց նա գլխավորեց Եգիպտոսի կառավարությունը: Ինչպէս, Նուպար փաշան Բեռլին չգնաց եւ մինչեւ իր կյանքի վերջին օրերը «հոգիին խորքը պահեց այդ մերժման դառնութիւնը»:

Այս դեպքը, որը ինքնին հետաքրքրական է եւ բնութագրում է այդ ժամանակաշրջանի հայ քաղաքական գործելակերպը, ոչ պակաս կարեւորություն է ստանում, եթե հիշենք, որ 1878թ. Նուպար փաշայի որդին՝ Պողոս Նուպարը, արդեն 27-ամյա երիտասարդ էր: Եվ դժվար չէ պատկերացնել, թե ինչ զգացում կունենար՝ տեսնելով նման անվստահություն հոր նկատմամբ: Հայտնի է, որ նման պարագաներում զավակի մեջ կարող է առաջանալ բացասական, ժխտական վերաբերմունք անվստահություն արտահայտած անձի, հաստատության, նույնիսկ ամբողջ ժողովրդի նկատմամբ: Պողոս Նուպարը, սակայն, չդրեց հավասարության նշան առանձին անհատների, կազմակերպությունների (որքան էլ նրանք հեղինակավոր լինեին) եւ ամբողջ մի ժողովրդի միջեւ: (Իսկ թե որքան դյուրին էր դա անել, վկայում է գրող Արշակ Չոպանյանի օրինակը, որն այդ նույն դեպքերի առիթով գրել է. «...որքան ցաւալի սխալ մը գործած է մեր ազգը...», «...հակառակ այն դառնութեան, զոր ազգը իրեն պատճառած էր...», ինչպէս նաեւ՝ «...բայց հայ ժողովուրդին յանցանքը այդ պարագային ոչ այնչափ այդ ծրագիրը, որչափ նոյն իսկ անձնական միջամտութիւնը մերժած ըլլալն է այդ մարդուն...»⁹: Ամբողջ ազգի եւ Կ. Պոլսի Ներսես պատրիարքի ու նրա խորհրդականների նման անտեղի նույնականացումը եւս մեկ մասնավոր օրինակն է քաղաքական մշակույթի բացակայության, որի հետեւանքները ճակատագրական եղան հայ ժողովրդի համար):

Հենց այդ մտայնությամբ էլ Պողոս Նուպարը առաջնորդվեց իր հետագա ողջ կյանքում, դրանով իսկ՝ գիտակցաբար թե ոչ, լավագույնս պատասխանելով իր հոր ընդդիմախոսներին: Իսկ պատասխանների շարքում, անկասկած, ամենակարեւորը եղավ Հայկական Բարեգործական Ընդհանուր Միությունը:

«Այսօր, 15 ապրիլ, 1906, Ս. Զատկի առաջին օրը, ստորագրեալքս համախմբեալ 'ի Գահիրէ, Նորին Վսեմ. Պօղոս Փաշայի ապարանքը, կազմեցինք ընկերութիւն մը «Հայկական Բարեգործական Ընդհանուր Միութիւն» անուամբ, ըստ տրամադրութեան եւ պայմանաց վերոգրեալ կանոնագրին, որը կը կրէ այսօրուան թուականն եւ մեր ստորագրութիւնը:

Ընկերութեան Վարչական առաջին ժողովը բաղկացած է Կանոնագրիս 10-րդ յօդուածին մէջ նշանակուած 10 անդամներէն եւ այսօրուընէ Ընկերութիւնս կազմակերպեալ հռչակուած է:

- | | |
|--------------------------|----------------------------|
| ի Գահիրէ, 15 Ապրիլ, 1906 | |
| Պօղոս Նուպար | Եագուպ Արթին Փաշա |
| Երուանդ Գ. Աղաթօն | Առաքէլ Նուպար |
| Մ. Անդրանիկեան | Տօրդ. Ն. Տաղաւարեան |
| Մ. Մարկոսոֆ | Գրիգոր Եղիայեան |
| Կ. Շէրիտեան | Յ. Յակոբեան» ¹⁰ |

ՀԲԸ Միության հիմնադիր ժողովից երեք օր առաջ, 1906թ. ապրիլի 12-ին Պողոս Նուպարը եւ Յագուպ Արթինը խնդրագիր են ներկայացնում Եգիպտոսի Ներքին գործերի նախարարություն: Տեղեկացնելով Միության հիմնումի մասին եւ նշելով, որ այն զուտ մարդասիրական հաստատություն է եւ «... բացորոշապէս կը մերժէ ունէ քաղաքական հանգամանք ...»,¹¹ նրանք համոզմունք էին հայտնում, որ կառավարությունը կճանաչի նորաստեղծ կազմակերպությունը: Իմանալով խնդրագրի հեղինակների սերտ կապերը Եգիպտոսի վերնախաւի հետ՝ դժվար չէր կոահել, որ ճանաչման հարցը նախապէս արդեն լուծված էր եւ խոսքը զուտ պաշտոնական ձեւակերպման մասին էր: Արդեն մայիսի 7-ին նախարար Մուսթաֆա Ֆեհմին պատասխան անմակով հայտնում էր ՀԲԸ Միության ճանաչման մասին եւ հաջողություն մաղթում Եգիպտոսի կառավարության անունից: Դրանով իսկ օրինականացվեց ՀԲԸ Միության՝ որպէս ինքնուրույն կազմակերպության հիմնումն ու հետագա գործունեությունը Եգիպտոսում: Մուսթաֆա Ֆեհմիից պատասխանը ստանալուն պէս, ՀԲԸ Միության Կենտրոնական Վարչության անունից Պողոս Նուպարը մայիսի 9-ին հատուկ գրությամբ, օրհնության խնդրանքով դիմում է Ամենայն Հայոց կաթողիկոս Մկրտիչ Ա-ին «... վասն յաջողութեան ձեռնարկիս, ի խրախոյս եւ ի քաջալեր մեր եւ մեր աջակցաց»:¹² Ուշագրավ է, որ կաթողիկոսը, իր պատասխան կոնդակում օրհնելով եւ հարատեւություն ու բարգաւաճում մաղթելով նորաստեղծ Միությանը, միաժամանակ հատուկ նշում էր նրա կարեւորությունը նաեւ Ռուսաստանի հայության հա-

մար: Դա, իհարկե, առաջին հերթին պայմանավորված էր մինչ այդ՝ 1905թ. Կովկասում տեղի ունեցած հայերի զանգվածային սպանություններով: Բայց կար եւ ուրիշ պատճառ: Փաստ էր, որ հայ ժողովուրդը բաժանված լինելով երկու պետությունների՝ Ռուսաստանի եւ Թուրքիայի միջեւ, գոյատեւում էր իրարից անջատ, մասնավորապէս, մինչ այդ գոյություն ունեցող բարեգործական կազմակերպություններից յուրաքանչյուրի գործունեությունը սահմանափակված էր համապատասխան պետության տարածքով: Հայտնի էր նաեւ, որ տարբեր երկրներում ապրող հայերի բացարձակ մեծամասնությունը կազմում էին Արեւմտյան Հայաստանից եւ Կիլիկիայից գաղթած հայեր, որոնք, բնականաբար, նվիրատվություններ անելիս նախապատվությունը տալիս էին իրենց հայրենակիցներին, այլ ոչ թե Ռուսաստանի կազմում ապրող հայությանը: Այս առումով կաթողիկոսի կոնդակի հիմնական նպատակն էլ հենց այն էր, որ նորաստեղծ ՀԲԸ Միությունը դառնա իսկապէս համահայկական, տարածի իր գործունեությունը թե Ռուսաստանի եւ թե Թուրքիայի տարածքում: Ըստ էության, այդպիսին էր նաեւ ՀԲԸ Միության հիմնադիրների նպատակը, եւ եթէ այն չիրագործվեց, ապա պատճառները զուտ արտաքին բնույթի էին:

Այսպիսով, այս երկու գրությունների շնորհիվ ՀԲԸ Միությունը ապահովեց մի կողմից՝ իր պաշտոնական ճանաչումը, իսկ մյուս կողմից՝ ամենահեղինակավոր, ողջ հայության կողմից ճանաչված միակ ազգային հիմնարկության՝ Հայ Առաքելական եկեղեցու օժանդակությունը:

Հիմնադիր - Անդամները

«ՀԲԸ Միութեան Կեդրոնական Վարչութեան ամէնէն սրտկառելի դէմքն է - եթէ ոչ ամէնէն տիրականը - Ն. Վ. Եագուպ Արթին Փաշան, որ՝ հիմնարկէքի առաջին օրէն՝ կաթոգին հոգածութեամբ մը քայլ առ քայլ հետեւած է Միութեան աշխատանքին, եւ օրէնքի ու գիտութեան մարդու կրկնակ գերազանց բժախնդրութեամբ մը, հսկած է անոր կանոնագրական ուղղութեան ու հիմնական սկզբունքներուն անթերի ու անխտոր կիրարկումին»:¹³ Սրանք լոկ բառեր չեն. ծանոթանալով Յագուպ Արթինի մասին ժամանակակիցների հազվագյուտ հիշողություններին՝ համոզվում ես, որ նա իսկապէս «...ազնուական հայու տիպարն էր, ...որ շուրջը սրտկառանք կ'ազդէր»,¹⁴ որ նա այդպիսին էր թէ իր ծագումով, դաստիարակությամբ ու կրթությամբ եւ թէ իր բարոյական, մտային ու ազգային հատկանիշներով: Յագուպ Արթինը (Հակոբ Արթին փաշա Չրաքյան) Եգիպտոսի Արտաքին գործերի նախարար Արթին բէ Չրաքյանի որդին, ծնվել էր Կա-

հիրենում, 1842թ.: Փարիզի Միսիոնարյանների Սամուել-Մուրադ վարժարանում հայեցի կրթությունն և դաստիարակությունն ստանալուց հետո նա ուսումը շարունակում է եվրոպական (Ֆրանսիա, Անգլիա, Գերմանիա) համալսարաններում՝ մասնագիտանալով պատմության, գրականության և լեզվաբանության բնագավառներում: 1873թ. Յագուպ Արթինը հրավիրվում է Եգիպտոս և Իսմայիլ փաշայի որոշմամբ դառնում է նրա զավակների՝ իշխան Իբրահիմ Հիլմիի և Մահմուդ Ֆուադի (տարիներ անց Եգիպտոսի սուլթանը) դաստիարակ-հսկիչը, իսկ հետագայում՝ Իսմայիլ փաշայի անձնական քարտուղարը: Սկսած 1880թ. նա բարձր պաշտոններ է զբաղեցնում Եգիպտոսի պետական հիմնարկներում: 1883թ. Յագուպ Արթինը կրթության նախարարության փոխնախարարն էր և այդ պաշտոնը վարեց մոտ 23 տարի: Այն առավել համապատասխանում էր իր գիտելիքներին ու նախասիրություններին և պատահական չէ, որ նրա գործունեությունը այս բնագավառում եղավ շատ արդյունավետ:

Մասնավորապես, նա «...կը կազմակերպէ Եգիպտոսի նախակրթարանները և երկրորդական վարժարանները, ինչպէս նաեւ բարձրագոյն դպրոցներու մակարդակը կը բարելաւէ և կ'ըլլայ հիմնադիր Գահիրէի Արհեստից և Արուեստից վարժարաններուն»:¹⁵ Այսուհանդերձ, իր ամենակարեւոր նախասիրությունը գիտությունն էր, որին նվիրում էր իր բոլոր ազատ ժամերը: «Իր կեանքը իմաստունի մը, յարատեւ ու անխոնջ ուսումնասիրողի մը կեանքն է, որ մեծ մասամբ կ'անցնի իր հոյակապ մատենադարանէն ներս, գիրքերու և ձեռագիրներու մէջ խորասուզուած: ...Կ'ըսեն թէ Նորին Վսեմությունը գիտնականներու ընտանիք մը կազմած է, թէ իր իմաստնասիրայլ կիներն ու դուստրն ամէն օր՝ իրեն հետ երկար ժամեր կը յամենան իր շքեղ գրատան մէջ...»:¹⁶ Նրա հրապարակումները, միջազգային գիտածոողովներում կարդացած զեկուցումները, արեւելագիտական ընկերությունների հիմնադրումն ու ղեկավարումը եվրոպական ճանաչում բերեցին նրան, մասնավորապես, Աբերդինի և Սենտ-Էնդրյու (Շոտլանդիա) համալսարանները շնորհել էին նրան պատվավոր դոկտորի կոչում: Եվ կարելի էր ենթադրել, որ այս ամենից հետո ոչ ժամանակ և ոչ էլ ուժ պետք է մնար ազգային գործունեության համար: Բայց հենց նա էր, որ կազմակերպեց տեղի հայ կաթոլիկների համայնքը, պատրաստեց նրա սահմանադրությունը և ապահովեց ճանաչում՝ կառավարության կողմից: «Յագուպ Արթին Փաշա այն է Եգիպտահայ կաթոլիկ հասարակութեան համար, ինչ որ Պողոս Փաշա Նուպար՝ մեր (հայ առաքելական համայնքի - Էդ.Մ.) մէջ, լուելայն, հասկցուած, ընդունուած, նուիրագործուած Ազգապետ մը»:¹⁷

Տրամաբանական է և օրինաչափ, որ վառ անհատականությամբ օժտված այս մարդիկ, որոնք, ի դեպ, ապրում էին հարեւանությամբ, ոչ միայն հին բարեկամներ էին, և ձեռք ձեռքի տված հիմնեցին ՀԲԸ Միությունը՝ Պողոս Նուպարը, որպես նախագահ, իսկ Յագուպ Արթինը՝ փոխատենապետ: Յագուպ Արթինը մահացավ 1919թ., և նրա հուղարկավորությունը, որին մասնակցեցին Եգիպտոսի սուլթանի ներկայացուցիչը, վարչապետը, նախարարները, դեսպանները, ինչպես նաեւ բազմաթիվ հայ կազմակերպություններ, եւս մեկ ապացույց էր մեծ և համընդհանուր հարգանքի, որ նա վայելեց իր ողջ կյանքի ընթացքում:

ՀԲԸ Միության մյուս փոխատենապետն էր Երվանդ Աղաթոնը: Երվանդ Աղաթոնը, անկասկած, ուրույն տեղ է գրավում «հրաշալի տաանյակում»։ նա ոչ միայն եղավ Միության հիմնադրման նախաձեռնողներից մեկը, մասնակցեց կանոնագրի ստեղծմանը, այլև իր հետագա ողջ կյանքը նվիրաբերեց Միությանը: ՀԲԸ Միության ընդհանուր տնօրեն Վահան Մալեզյանը, որը ընդհանրապես շատ զուսպ է արտահայտվել իր գործընկերների մասին, այսպես է բնութագրել Աղաթոնին «Ոչ ոք, ոչ իսկ Պողոս Նուպար, ունեցաւ Աղաթօնի չափ «օրհնեալ հուրը», որ միշտ կը բռնկէր, որ միշտ կը բոցավառէր Բարեգործականի սիրովը: Արդարեւ, անելի քան հաւատք մը, խոր պաշտամունք ունէր Միութեան համար, և կարելի է առանց չափազանցութեան ըսել թէ երբեմն իր ընտանիքէն անգամ կը նախադասէր Բարեգործականը»:¹⁸

Երվանդ Աղաթոնի հայրը՝ Գրիգոր Աղաթոնը, որին նա կորցրեց 8 տարեկան հասակում, հասարակ հողագործի զավակ էր, որը, սակայն, դարձավ Ազգային Սահմանադրության հեղինակներից մեկը և Օսմանյան կայսրության առաջին քրիստոնյա նախարարը: Հետաքրքրական է, որ Ե.Աղաթոնը 1873-75թթ. հաճախել էր Նուպար-Օսմանագարեան վարժարանը, որի հիմնադիրն էր Պողոս Նուպարի հայրը: Սա առաջին, առայժմ անուղղակի առնչությունն էր այդ ընտանիքի հետ, որը հետագայում Աղաթոնի համար դառնալու էր ամենամեծ սրբություններից մեկը: Հետեւելով հոր օրինակին՝ նա բարձրագույն ուսումը ստանում է Փարիզի Գրիմիոնի երկրագործական վարժարանում, որն ավարտելուց հետո աշխատում է Ֆրանսիայի հարավում (Նիմ)՝ որպես երկրագործ: Վերադառնալով Թուրքիա վարում է տարբեր պաշտոններ, այդ թվում Կ. Պոլսի երկրագործական ընդհանուր քննիչ, Երկրագործական բանկի վարչական խորհրդի անդամ և այլն: 1896թ., երբ Կ. Պոլսում և Օսմանյան կայսրության ամբողջ տարածքում կազմակերպվեցին հայերի զանգվածային սպանությունները, Աղաթոնը հեռանում է երկրից և վերադառնում Փարիզ: Այստեղ նա ծանոթանում է Պողոս Նուպարի հետ, որի հրավերով էլ

գնում է Եգիպտոս, ուր ծավալում է աշխույժ գործունեություն: Տարիներ շարունակ եւ մեծ հաջողությամբ նա վարում է Պողոս Նուպարի, եգիպտահայ այլ խոշոր հողատերերի, ինչպես նաեւ Եգիպտոսի իշխանների ազարակների կառավարչի կամ քննիչի պաշտոնները: Ինքը՝ Աղաթոնը, իր «Կենսագրական նօթերում» այսպես է արժեւորում այդ տարիները. «Եգիպտոսի բազմաթիւ օտարազգի հողագէտներու մէջ միակ հայ հողագէտն էի, որ յաջողեցայ «Եգիպտոսի հողագործներու Միութիւն» (Իւնիօն տը լ'Ակրիքիլիօր տ'Էժիքթ) անուան ներքոյ ընկերակցութիւն մը հաստատել, որուն գործն աստեճապետութիւնը վարեցի ամբողջ 4 տարի եւ որմէ վերջն ալ մինչեւ հիմա կը մնամ անոր պատուակալ նախագահ...», «...մինչեւ իմ Եգիպտոս հաստատուիլս, քիմիական պարարտանիւթերու գործածութիւնը, նոյն իսկ անոր անունն անգամ երկրին մէջ ծանօթ չէր... Հոն կատարած զանազան փորձարկութիւններէս, երկար ու մանրագնին ուսումնասիրութիւններէս ետքն է որ, քիմիական աղբերու գործածութեան օգտակարութեանը համոզուած՝ անոր ընդհանրացման մեծապէս աստարեցի եւ այս կերպով ալ երկրին հարստութեան աճումին լայնօրէն նպաստած եղայ...»:¹⁹

Իր կյանքի այդ ժամանակահատվածում Աղաթոնը այնչափ է նվիրվում իր ընտրած մասնագիտությանը, որ, ըստ էության, անմասն է մնում ազգային գործունեությունից: Միայն Եգիպտոսում, այն էլ որոշ ժամանակ անց նա հետզհետեւ ներգրավվում է այդ ասպարեզը: Թե ինչ ազդակների ազդեցության ներքո էր տեղի ունեցել այդ շրջադարձը, ինքը՝ Աղաթոնը, լուում է: Դժվար չէ ենթադրել, սակայն, որ դրանում մեծ դեր էին խաղացել թե եգիպտահայ համայնքի աշխույժ ազգային գործունեությունը եւ թե Պողոս Նուպարը, որի հետ Աղաթոնի հանդիպումները անհրաժեշտաբար հաճախակի էին: Ինչպես նշվում էր Աղաթոնի 75-ամյակի առիթով հրատարակված կենսագրականում, «Իր ազգային կեանքը կը սկսի գլխաւորաբար Եգիպտոսի մէջ, իբրեւ ազգային երեսփոխան եւ ժողովական, Պօղոս Նուպարի կողքն ի վեր»:²⁰ Բայց, անկասկած, նրա ազգային գործունեության հիմնական ասպարեզը դարձավ ՀԲԸ Միությունը: Նրա ջանքերի շնորհիվ հիմնվեցին Միության մի շարք մասնաճյուղեր Եվրոպայի երկրներում, նրա քարոզչության արդյունք էին Բարեգործականի անունով ձեւակերպված մեծագումար կտակները, այդ թվում նաեւ Երեւանում կառուցված Դարուհի Յակոբեան մայրանոցը: Այդ նույն նպատակին էին ծառայում Աղաթոնի գրած բազմաթիվ հոդվածները, որոնցում նա մատչելի ձեւով պարզաբանում էր Միության նպատակը, խնդիրները, դժվարություններն ու հաջողությունները: Նրա հավատարմությունը ՀԲԸ Միության գործին վերածվեց իսկական ֆանատիզմի, որի դրսևորումն էր

իր հայտարարությունը, թե, «Բարեգործականը չի սիրողը ճշմարիտ հայ չէ»: Բերելով նրա այս խոսքերը Վ. Մալեզյանը շարունակում է. «Չափազանցութիւն անտարակոյս, բայց իրեն համար մոլեռանդ դաւանանք, որուն ինք հաւատարիմ մնաց մինչեւ իր վերջին շունչը, իր ազգասիրութիւնը, իր հայրենասիրութիւնը շփոթելով ՀԲԸ Միութեան հետ, ձուլուելով անոր մէջ, եւ անոր մէջէն միայն ուզելով տեսնել իր ազգը եւ իր հայրենիքը, զոր անշուշտ հոգեւին կը սիրէր, եւ որոնց օգտակար ըլլալու յարմարագոյն միջոցը, ամէնէն գործնական խողովակը կը համարէր սակայն Միութիւնը»:²¹

ՀԲԸ Միության հիմնադիրներից ամենատարեցը Գրիգոր Եղիայանն էր (1833- 1911): Կրթությունը ստանալուց հետո (Կահիրեի Ս. Աստվածածին Եկեղեցու դպրատուն, Համիլթոնի անգլիական վարժարան, Ecole des Langues), նա որոշ ժամանակ աշխատեց որպես փաստաբան եւ այդ ընթացքում «...կարեւոր ծառայութիւններ մատուցած է Ազգային Առաջնորդարանին, զանազան դատերու ստօի, շնորհիւ իր օրէնսգիտական հմտութեան եւ ամենաբարձր յարաբերութեանց՝ զոր մինչեւ վերջ մշակած է եգիպտական արագանիին հետ»:²² Սակայն նրա գործունեության հիմնական ասպարեզը եղավ դիվանագիտությունը: Սկսելով աշխատանքը Ռուսաստանի հյուպատոսարանում որպես թարգմանիչ՝ 1880- ին Գրիգոր Եղիայանը ստանձնում է փոխհյուպատոսի պաշտոնը: Նա հմուտ եւ ճանաչված դիվանագետ էր, դրա վկայություններից է այն, որ նա պարգետատրվել էր Ռուսաստանի, Իտալիայի, Օսմանյան կայսրության, Պարսկաստանի, Եգիպտոսի եւ այլ երկրների պետական շքանշաններով: Իր հեղինակությամբ նա մեծապէս նպաստեց ՀԲԸ Միության հաջող գործունեությանը, հատկապէս տարբեր երկրների հյուպատոսարանների միջոցով Արեւմտյան Հայաստանի բնակչությանը ՀԲԸ Միության նպաստները փոխանցելու գործում: Դրսից դիտողի համար կարծես թե երջանիկ ու հաջողություններով լի կյանք, բայց ահա թե ինչ է գրել Գ. Եղիայանի վերջին տարիների մասին ժամանակակիցը. «Մեր անձնական մէկ տեսակցութեան մէջ կեանքէն ձանձրացած էր, հիւանդ էր եւ բան չէր կարող ուտել, կեանքը դառն էր իրեն համար հակառակ իր ճոխութեան, մանաւանդ իր աչքերը լեցան, երբ յիշեց իր վաղամտիկ աղջիկը: Կը խորհէր նոր կտակ մ'ալ ընել ի նպաստ որբերու ՀԲԸ Միութեան ձեռքով եւ որպէսզի հաստատուն հիմերու վրայ դրուի, Ֆրանսայէն բերել տուած էր ժառանգական խնդիրներու վրայ խօսող գիրքեր, որոնցմով կը զբաղէր»:²³ Սակայն մահը հասավ ավելի շուտ: Նրա մեծագումար կտակի հիմնական մասը հատկացվել էր Կահիրեի Ազգային Առաջնորդարանին, Գալուստեան վարժարանի շրջանավարտներին ի նպաստ՝ եվրոպական համալսարաններում

ուսանելու եւ այլն: Հատուկ գումար էր հատկացվել նաեւ Կահիրեում հայկական եկեղեցի կառուցելու նպատակով, որը իրականացավ 1927թ., երբ տեղի ունեցավ նորակառուց Ս. Գրիգոր Լուսավորիչ եկեղեցու օծումը: Եվ, սակայն, թե Գ. Եղիայանի մահից անմիջապէս հետո եւ թե հետագայում շատերին է հետաքրքրել մեկ հարց. ինչո՞ւ նա, լինելով ՀԲԸ Միության հիմնադիրներից մեկը, չէր կտակել Միությանը որեւէ գումար: Այդ հարցին դեռեւս 1911թ. պատասխանել է Միության հայտնի գործիչներից Վահան Բյուրքնյանը, որի շնորհիվ ի հայտ է գալիս Գ. Եղիայանի անհատականության, նրա՝ որպէս եգիպտահայի ազգային ինքնագիտակցության առանձնահատկությունը: «Անոր համոզումն էր թէ Եգիպտոսի հայը պէտք չէ առատաձեռն ըլլայ օտարերկրեայ հայերուն համար, եւ թէ ամէն քաղաք՝ իր տեղոյն աղքատն ու որբը միայն պէտք է հոգայ... Բարեգործութեան մասին իր ըմբռումները շատ տարբեր էին մերիններէն: Անկէս Եգիպտոսի մըն էր, հայ լեզուին ու հայ մամուլին գրեթէ օտար (թէւս հաճոյքով կը ցուցնէր Վենետիկի վանքէն առած գիրքերը) եւ ուզեց որ Եգիպտոսի հայ ուսանողը միայն օգտուի իր կտակէն, անոր հայութիւնը եկեղեցիէն ժառանգ մնացած էր իրեն եւ ուզեց որ եկեղեցին «պայծառանայ» իր մով, ու եկեղեցին ժառանգէ իր կտակին մեծ մասը»:²⁴

Գ.Եղիայանը միակ դիվանագետը չէր ՀԲԸ Միության հիմնադիրների կազմում: Դիվանագիտական ծառայության բազմամյա փորձ ունեւ նաեւ Կարապետ Շերիտնյանը, որը զգալի դեր խաղաց Միության ինչպէս ստեղծման, այնպէս էլ գործունեության առաջին շրջանում: Կ.Շերիտնյանը, որպէս բազմափորձ դիվանագետ, լավագոյնս տիրապետելով պաշտոնական հաղորդակցման, շփումների մասին եղած գրված եւ չգրված օրենքներին, հավելյալ որակ եւ փայլ էր հաղորդում Միության գործունեությանը: Այս ունակությունը շատ ներդաշնակ էր Կ. Շերիտնյանի անհատականությանը: «Կենցաղագէտ մարդ է ան գերազանցապէս, եւ բառին ազնիւ իմաստով՝ կենցաղասէր մարդն այ, այսինքն անոնցմէ, որոնք ապրելու արուեստը արթիթի պէս գործ կը դնեն, որոնց ապրումին վայելչութիւնը երբեք չիջնար, չի գիջանիր եսական գոեհիկութիւններու, այլ որոնք իրենց եսին պաշտամունքը (le culte du moi) կը մշակեն բարձրօրէն, գեղեցկութիւն, պայծառութիւն փնտռելով ու տարածելով իրենց շուքը»:²⁵ Եվ տրամաբանական էր, որ «դպրութեանց եւ արուեստներու» սիրահար, իր շուրջը գեղեցկություն փնտրող եւ ստեղծող Կ.Շերիտնյանը հոծարական ստանձնեց Բարեգործականի գրադարանասպետի պաշտոնը՝ գրադարանին նվիրելով իր արժեքավոր եւ ընտիր գրքերի անձնական մեծ հավաքածուն:

Որեւէ հիմնարկության գործունեությունը անհրաժեշտաբար թելադրում է համապատասխան վարչական ծառայության գոյությունը: Վառ անհատականությունների (որոնց թվին կարելի է դասել ՀԲԸ Միության վերոհիշյալ հիմնադիրներին) խառնվածքին ընդհանրապէս խորթ է վարչական աշխատանքը, որը թվում է ձանձրալի, միշտ մնում է սովերում եւ շատերին անծանոթ: Սակայն վարչական մեքենայի գործունեությունից է կախված եւ նրանով է պայմանավորված յուրաքանչյուր հիմնարկության արդյունավետ գործառումը: Պողոս Նուպարը ՀԲԸ Միությունը հիմնադրելիս ոչ միայն գիտակցում էր դրա կարեւորությունը, այլեւ, ինչպէս ցույց տվեց հետագա պատմությունը, կատարեց շատ հաջող ընտրություն՝ վստահելով նորաստեղծ կազմակերպության վարչական ծառայության դեկավարումը Մկրտիչ Անդրանիկյանին, իսկ ավելի ուշ՝ Վահան Մալեգյանին:

Մ. Անդրանիկյանի պարագայում, թերեւս, սխալվելը իսկապէս որ դժվար էր: Դեռեւս 1878թ. նա Կ. Պոլսից տեղափոխվել էր Կահիրե՝ Պողոս Նուպարի հրավերով եւ որոշ ժամանակ անց ստանձնել նրա ֆինանսական եւ առևտրական գործերի կառավարչի (վեքի) պաշտոնը: Այդ ընթացքում նա այնչափ բարձր մասնագիտական կարողություններ էր դրսեւորել, որ Պողոս Նուպարը անհրաժեշտ համարեց նրան ընդգրկել ոչ միայն Միության կանոնագրքի խնրագրական, այլեւ հիմնադիրների կազմի մեջ: Բայց ոչ միայն մասնագիտական կարողություններով էր թելադրված այդ ընտրությունը: Կա մի պարադոքս. բարեգործության պարտադիր պայմաններից է մերժելու ունակությունը, քանզի չկա եւ չի եղել որեւէ բարեգործական հաստատություն կամ անհատ, որն ի վիճակի լինէր բավարարել բոլոր խնդրանքները եւ կարիքները: Ահա այս հատկությամբ, որը խիստ կարեւոր էր նորաստեղծ Միության համար, նույնպէս օժտված էր Մ.Անդրանիկյանը: «Ամեն մարդ՝ աւելի կամ նուազ չափով՝ պչրանք մը, *քօքէթըռոհ* մը կը դնէ ինքզինք հաճելի, համակրելի ընծայելու համար իրեն հետ հպումի եկողներուն: Անդրանիկեանի *քօքէթըռոհն* ժխտական հանգամանք մը ունի կարծես: «Չէ» ըսելու ձեւ մը կայ որ դիմացինիդ մէջ կը մեղմացնէ, տանելի, հանդուրժելի կ'ընծայէ մերժումի մը մոտմոքը: «Կը ցաւիմ, սիրելիս, շատ կը ցաւիմ, որ չեմ կրնար»- ի պէս պարապ խօսքերով որքան դիւրին է մարդ մը ճամբու դնել... Բայց Անդրանիկեանի խառնուածքը կը խորշի այս պայմանադրական կեղծիքէն: Իր «ոչ կարեմք»-ը կտրուկ ու վերջնական շեշտ մը ունի, որ վարանումի, տատանումի տեղի չի ձգեր եւ յոյսին բոլոր դռներն ու հորիզոնները կը գոցէ խնդրարկուին առջեւ»:²⁶

Կենտրոնական Վարչական Ժողովում, որը ՀԲԸ Միության գերագույն մարմինն էր, Անդրանիկյանի պարտականությունները շատ լայն էին: Ինչպես ասվեց, վարչական ծառայությունների աշխատանքը, որպես կանոն, անհայտ է մնում թե ժամանակակիցների եւ թե հետագա սերունդների համար, ուստի նորից դիմենք 1913թ. «Ռակեմատեան»-ին: «ՀԲԸ Միութեան Կեդրոնին մէջ եօթը տարիէ ի վեր իր ստանձնած ու խղճի մտօք կատարած դերը - առանց չափազանցելու կրնանք ըսել - կենսական նշանակութիւն ունի այս հաստատութեան համար: Տիար Մ.Անդրանիկեան «Բարեգործական»-ին Կեդրոնական Վարչութեան այն անդամն է որ տարին 365 օր շարունակ գբաղած է Միութեան վարչական գործառնութիւններովը: Միութեան մեծագործութիւններու համբաւումին մէջ իր անունը չի գար յաճախ հնչել ականջներուն: Ժէսթերու եւ փառաբանումներու մարդ չէ ան: Բայց ինքն է որ ժողովներու, հաւաքումներու եւ հանդէսներու պանծալի մթնոլորտէն դուրս, գրասենեակին լոռութեան ու մեկուսացմանը մէջ, օրը օրին, կը դարձնէ Միութեան կնճոռու եւ բազմապահանջ մեքենան:... Եւ այս բոլորը՝ առանց յիստրտանքի, առանց ցուցամոլիկ ծեփծեքման, համեստօրէն, պարզօրէն, այնպիսի անշուք ձեւով մը, որ կը զգաս թէ մարդը ներքին անհուն գոհունակութիւն մը, գերագոյն մխիթարութիւն մը կը գտնէ կոր ցեղին դրականօրէն ծառայելու գիտակցութեանը մէջ»:²⁷

Իր ժողովրդին ծառայելու գիտակցությամբ նույնչափ օժտված էր նաեւ Նազարեթ Տաղավարյանը, որը, սակայն, նախընտրեց այլ գործելակերպ: Ն. Տաղավարյանը միակն էր Միության հիմնադիր անդամներից, որի թելնածությունը առաջարկել էր ոչ թե Պողոս Նուպարը, այլ Երվանդ Աղաթոնը: Կարելի է ասել, որ նա նաեւ միակն էր, որ քաջածանոթ էր արեւմտահայ ազգային կյանքին: Ն. Տաղավարյանը ՀԲԸՄ Կենտրոնական Վարչական Ժողովի առաջին ատենադպիրն ու ընդհանուր քարտուղարն էր եւ չնայած նրան, որ այդ պաշտոնում աշխատեց ընդամենը երկու տարի, այնուամենայնիվ, կարողացավ ամբողջովին դրսևորել իր կազմակերպական ու գիտական ունակությունները: Երբ 1908թ. հուլիսի վեց Օսմանյան սահմանադրությունը եւ կայսրության ազգային փոքրամասնությունները, թվում էր, դարձան հասարակության իրավահավասար անդամներ, Ն. Տաղավարյանը հրաժարվեց իր պաշտոնից եւ մեկնեց Կ. Պոլիս, ուր իր կարելու մասնակցությունը բերեց ազգային եւ պետական կյանքին: Սակայն նա այնտեղ էլ շարունակեց ծառայել Միությանը՝ արդեն որպես Կ. Պոլսի մասնաճյուղի ատենադպիր: Դեպի երկրի հայաշատ շրջանները կատարած իր ուղեորությունների ընթացքում նա հիմնեց ՀԲԸ Միության բազմաթիվ նոր մասնաճյուղեր եւ ապահովեց նրանց մշտա-

կան համագործակցությունը Կենտրոնական Վարչության հետ: 1913թ. Ն.Տաղավարյանին նվիրված հոդվածում գրվել էր. «...Այն սերունդէն է որ եթէ պայքարի ու անձնագոհութեան հերոսներ չի տուաւ ազգին, խաղաղ-զարգացման մեկ քանի արժանավոր ուսուցիչներ արտադրեց եւ ասոնց կարգէն իր տեղն ունի, ապահովաբար, տոքթ. Ն. Տաղավարեանը»:²⁸ Ինչ իմանար հեղինակը, որ ընդամենը երկու տարի անց «խաղաղ - զարգացման ուսուցիչ» Ն.Տաղավարյանը դառնալու էր «անձնագոհութեան հերոս»՝ սպանվելով թուրք ցեղասպանների ձեռքով:

Մկրտիչ Մարկոսօֆը (1848- 1919) ծնվել էր Տրիեստում (Ավստրիա), նրա հայրը՝ Դանիել Մարկոսօֆը, Նուպար փաշայի քեռայրն էր: Մկրտիչ Մարկոսօֆը Ֆրանսիայում ստանալով բարձրագույն կրթություն՝ ճարտարապետ-երկրաչափի մասնագիտությամբ, տեղափոխվում է Եգիպտոս եւ անցնում աշխատանքի Հանրային շինությունների նախարարությունում՝ որպես քննիչ-ճարտարապետ: ՀԲԸ Միության հիմնադրվելուց հետո նա Կենտրոնական Վարչական Ժողովի անդամ էր եւ իր մատուցած ծառայությունների համար առաջիններից մեկը դարձավ Միության պատվո անդամ: Նույն տարիներին՝ 1907-1912թթ. Մ.Մարկոսօֆը նաեւ Կահիրեի Աղքատախնամ ընկերության ատենապետն էր:²⁹

ՀԲԸ Միության հիմնադիրներից ամենաերիտասարդը Պողոս Նուպարի որդին՝ 25-ամյա Առաքել Նուպարն էր, որը եղավ Կենտրոնական Վարչության առաջին գանձապետը: Հովհաննես Հակոբյան՝ Եգիպտոսի Ներքին գործերի նախարարության դիվանատան բարձրաստիճան պաշտոնյա, Կահիրեի հայ համայնքի Ազգային քաղաքական ժողովի անդամ: ՀԲԸ Միության հիմնադիրների ցուցակում այս մարդու անունը միշտ վերջում է նշվում: Հ.Հակոբյանը եղավ միակը հիմնադիրներից, որ կարճ ժամանակ անց հրաժարվեց Կենտրոնական Վարչության անդամի պաշտոնից եւ այլեւս չհամագործակցեց Միության հետ: Ինչո՞վ էր դա բացատրվում՝ Պողոս Նուպարի անհաջող ընտրությամբ, նախարարությունում իր գրաված պաշտոնի ու Միության անդամ լինելու անհամատեղելիությամբ, թե՞ կար մեկ այլ, մեզ անծանոթ պատճառ...

Ահա այս անձերն էին, որ Պողոս Նուպարի գլխավորությամբ հիմնադրեցին Հայկական Բարեգործական Ընդհանուր Միությունը: Նրանք շատ տարբեր էին, տարբեր էին տարիքով, կենսափորձով, գաղափարներով եւ այլ հատկանիշներով: Բայց եւ այնպես, կարելի է նկատել որոշ սկզբունքային բնույթի ընդհանրություններ: Նրանք բոլորը բարձրակարգ մասնագետներ էին՝ ֆինանսիստներ ու գործարար մարդիկ, դիվանագետներ ու գիտնականներ, բժիշկ ու գյուղատնտես, ճարտարապետ: Մասնագիտություններ, որոնք երաշխավորում էին ապահով կյանք՝ որե-

ւէ երկրում ու ազգային միջավայրում: Հիմնադիրների վերոհիշյալ մասնագիտությունները եվրոպական կրթական հաստատություններում (կամ մասնօրինակ տեղական հաստատություններում) ուսանելու արդյունք էին, որի շնորհիվ նրանք ոչ միայն ճանաչել էին զարգացման ավելի բարձր աստիճանի վրա կանգնած ժողովուրդների պատմությունն ու մշակույթը, այլև հղկել իրենց պատկերացումները հայ ժողովրդի զարգացման ցանկալի ուղիների վերաբերյալ: Այդ առումով հատկանշական է և ոչ պատահական, որ հիմնադիրների կազմում բացակայում էին գրողներ, որոնք թե այդ շրջանում և թե հետագայում այնչափ մեծ եռանդով զբաղվեցին ազգային-քաղաքական գործունեությամբ՝ չունենալով դրա համար անհրաժեշտ ունակություններ ու գիտելիքներ:

ՀԲԸ Միության ձեւավորման պահին հիմնադիրներից և ոչ մեկը հայ քաղաքական կազմակերպությունների անդամ չէր (որոշ ժամանակ անց միայն նրանցից ոմանք՝ Ե.Աղաթունը, Մ.Անդրանիկյանը, Ն.Տաղափարյանը կդառնան Սահմանադրական Ռամկավար կուսակցության անդամ): Ընորհիվ դրա ապահովվեց նրանց անաչառ գործունեությունը ի շահ ողջ հայ ժողովրդի:

Հիշատակության է արժանի նաև այն հանգամանքը, որ հիմնադիրներից մի քանիսը, ինչպես, օրինակ, Պողոս Նուպարը, Յագուպ Արթինը, Գեորգ Եղիայանը, վարժ չէին տիրապետում հայերենին: Սակայն նրանց գործունեությունը ՀԲԸ Միության հիմնադրման առաջին իսկ օրից, եւս մեկ ապացույցն է այն դրոթի, որ ազգային փոքրամասնությունների պարագայում մայրենի լեզվին տիրապետելը և ազգային ինքնագիտակցությունն ու գործունեությունը փոխապայմանավորված երեսույթներ չեն:

Ծրագրի հեղինակը թե հեղինակները

Որեւէ կազմակերպության պատմությունը ուսումնասիրելիս ծառանում է, այսպես ասած, հեղինակության հարցը: Հաճախ է պատահում, որ այս հարցը քննելիս փորձում են տարբերակել գաղափարի հեղինակին և այն իրագործողին: Երբ իրական կյանքում ստեղծվում է որոշակի հիմնահարց, որի լուծումը պահանջում է նոր միջոցներ (ներառյալ հատուկ մի կազմակերպության ստեղծում), անհնար է, որ այն գիտակցվի միայն մեկ մարդու կողմից: Սակայն մեկ բան է գիտակցել, խնդիրների լուծումներ առաջարկել, և լրիվ այլ բան՝ այդ ամենի իրականացումը: Դա առանձնահատուկ շնորհ է, որը ոչ բոլորին է տրված և որը առաջնորդների պարտադիր բնութագրերից է:

Այս ընդհանուր երեսույթը բնորոշ եղավ նաև ՀԲԸ Միությանը: Թեև այդ կազմակերպությանը նվիրված բոլոր հրատարակումներում որպես հիմնադիր նշվել և նշվում է Պողոս Նուպարը, սակայն, միաժամանակ նկատելի է նաև հետևյալ միտումը: Հայտնի են հանրաճանաչ հայ քաղաքական և հասարակական գործիչների որոշ գրություններ, որոնց հեղինակները, իսկապես որ լավագույնս գիտակցելով և վերլուծելով հայ իրականության առջև ծառայած խնդիրները, որպես լուծում, նշում էին հատուկ կազմակերպության հիմնադրման անհրաժեշտությունը: Այսպես, Արշակ Չոպանյանը, հայտնի արձակագիր Երվանդ Օտյանի վկայությամբ, «...երեք մեծ գաղափարներու կը հետապնդէր, երեքն ալ իրարմէ օգտակար, իրարմէ ազգաշէն, իրարմէ վսեմ ... Չօպանեանի երրորդ գաղափարն էր Հայ Բարեգործական Ընդհ. Միութիւն մը կազմել, որուն վարիչը պիտի ըլլար, բնականաբար ինք: Ասոր համար բաւական արիւն քրտինք թափեց. ծրագիրը շինեց, վարչական խորհուրդ կազմեց, գնաց եկաւ, մարդիկ համոզեց, բայց, ափսոս, նախախնամութիւնը այնպէս վճռած էր որ իր հղացած գաղափարը Պողոս փաշա Նուպար պիտի իրագործէր, տարիներ ետքը, Եգիպտոսի մէջ»:³⁰ 1904թ. հունվարին քաղաքական գործիչ Արփիար Արփիարյանը Վահան Մալեգյանին հղած նամակում գրում էր. «Կը խորհէի թէ արդեօք աւելի օգտակար պիտի չըլլա՞ր հիմնել «Ազգային Ընկերութիւն» մը, նպատակ ունենալով «Հայոց տնտեսական և մտաւորական զարգացման նպաստել», առանց սակայն, քաղաքական ու յեղափոխական ձեռնարկներու»:³¹ ՀԲԸ Միության գործիչներից Վ. Քյուրքճյանը 1951թ. գրած ինքնակենսագրականում վերհիշում է, որ դեռևս 1905թ. հոկտեմբերին Կահիրեում հրավիրվել էր տասնչորս հոգիանոց մի ժողով, որի նպատակն էր հիմնել Հայկական Միություն: Սակայն դա եղավ վերջին ժողովը, քանի որ Պողոս Նուպարը, ըստ հեղինակի, «հաւանած էր գլուխ կանգնելու Հայկական Բարեգործական Ընդհանուր Միութեան, որ պաշտօնապէս հռչակուեցաւ 1906 ապրիլի 15-ին»:³² «Ապագայ» թերթում տպագրված մի հոդվածում կարդում ենք. «Աղաթուն Պէյ յիշած է թէ ինք և Վսեմ. Պողոս փաշան առաջին համակարծիքները եղած են հիմնելու այս կարեւոր հաստատութիւնը: Կը հաւատամ թէ ճիշդ է, բայց եթէ հանգուցեալ Տոքթ. Տաղաւարեան ողջ ըլլար, ան ալ պիտի ըսէր թէ գաղափարի առաջին յղացումը իրմէ էր, ինչ որ ինձ ըսած էր օր մը»:³³

Նման վկայությունների շարքը կարելի է շարունակել և դժվար չէ նկատել, որ կամա թե ակամա, նշված գրությունները մի տեսակ պասիվ դեր են հատկացնում Պողոս Նուպարին, և այն տպավորությունն է ստեղծում, որ նա ապրիլի 15-ին պարզապես հավանություն է տվել այդ

նոր կազմակերպության ստեղծման գաղափարին եւ ստորագրել հիշյալ փաստաթուղթը:

Հատկանշական է, որ ՀԲԸ Միության հիմնադիրները, բացառությամբ Երվանդ Աղաթոնի, երբեւէ չանդրադարձան Բարեգործականի հիմնադրման պատմությանը: Նրանք, կարծես, վստահել էին այդ պարտականությունը Ե.Աղաթոնին, որը ընդհանրապես ՀԲԸ Միության առաջին ժողովրդականացնողն ու քարոզիչն էր: Եվ հենց նա էլ բազմիցս գրեց հիմնադրման հետ կապված հարցերի մասին, մասնավորապես, վերոհիշյալ հոդվածի կապակցությամբ նույն «Ապագայ» թերթում տպագրելով «Բարեգործականի բանախօսութեան առթիւ» հոդվածը: Եվ, ինչպես արդեն կուսակց ընթերցողը. «...Բարեգործականի առաջին գաղափարը եւ յղացած են», գրում է Աղաթոնը... Ըստ իրեն, առաջին անգամ նման մի կազմակերպության անհրաժեշտության մասին խոսք է գնացել դեռեւս 1901-1902 թթ. Պողոս Նուպարի, Ապահ Պետրոսյանի եւ իր ներկայությամբ: Այդ գրույցից հետո Աղաթոնը եւ Ա.Պետրոսյանը պատրաստում են մի ծրագիր, որը ներկայացվում է Պողոս Նուպարին միայն 1905թ., եւ ահա թե ինչ առիթով: 1905թ. Ռուսական կայսրությունում՝ Ուկրաինայում, տեղի ունեցավ տեղի հրեա բնակչության ջարդը («պոգրոմ»): Հաջորդ օրն իսկ եվրոպական թերթերը տեղեկացրին, որ հրեական միջազգային «Ալիանս Իսրայելիթ» կազմակերպությունը հետագրով 200 հազար ֆրանկ է ուղարկել տուժած հրեաներին: Երբ 1905թ. հունիս ամսին Ռուսական կայսրության մեկ այլ շրջանում՝ Կովկասում գրեթե նույնպիսի ջարդ կազմակերպվեց տեղի թուրքերի (որոնք հետագայում պետք է կոչվեին ադրբեջանցիներ) կողմից հայ բնակչության հանդեպ, նման օգնությունը հասավ շատ ավելի ոչ, քանզի գոյություն չուներ «Ալիանս»-ի նման հայկական հաստատություն եւ հարկ եղավ կազմակերպել հատուկ հանգանակություն: Այս դեպքերից հետո է, որ Ե.Աղաթոնը նորից դիմում է Պողոս Նուպարին, որը համաձայնվում է ձեռնամուխ լինել համահայկական մի կազմակերպության ստեղծման գործին: Նա նախ ցանկանում է ծանոթանալ «Ալիանս»-ի ծրագրին: Ե.Աղաթոնը, օգտվելով առիթից, ներկայացնում է նաեւ տարիներ առաջ պատրաստած ծրագիրը, որը մինչ այդ վերանշակել էր Լեւոն Մկրտչյանը: Եվ ահա թե ինչ է գրում Աղաթոնը. «Պողոս փառապետի հետատես, արգիլելու համար արագային խաչագողներու Բարեգործականին մէջ մտնելը եւ ժողովուրդին տուած դրամները իրացնելը բոլորովին տարբեր ծրագիր մը պատրաստեց (ընդգծումը իմն է-Լ.Մ.) եւ ստեղծեաց խմբագրական լուսնամակամբ մը կազմեց որ բողոքեցաւ էր հանգանցեալ Եւսոպոս Արթին Փաշայէ, Շէրիանեան Կարապետ Կէչէ, Կ. Մկրտչ Անգրաւորիանէ եւ իննէն»³⁴ Որոչ ժամանակ անց Աղա-

թոնի առաջարկությամբ այդ կազմի մեջ ընդգրկվում է նաեւ Ն.Տաղավա-րյանը: Աղաթոնի վկայությունը վստահություն է ներշնչում, թեկուզ հենց այն պատճառով, որ նրա հոդվածը տպագրվեց 1927թ., երբ դեռ ողջ էին Պողոս Նուպարը, Մ.Անդրանիկյանը եւ Լ.Մկրտչյանը:

Այսպիսով, պատկերը հետեւյալն է: Համազգային բարեգործական կազմակերպության անհրաժեշտության գաղափարը դարձել էր համընդհանուր: Տարբեր մարդիկ, տարբեր երկրներում եւ քաղաքներում իրարից անկախ փորձում էին իրականացնել այդ գաղափարը, սակայն դա հաջողվեց միայն 1906թ., Կահիրեում: Անշուշտ, խիստ կարեւոր դեր է խաղացել Ե.Աղաթոնը: Հատկապես գնահատելի են նրա իրատեսությունն ու գիտակցումը, որ նման կազմակերպությունը հաջողություն կունենա, եթե առաջնորդվի ոչ այնքան ազգային-քաղաքական գործունեությամբ արդեն զբաղվող հայտնի մի անձի կողմից, այլ այնպիսի մեկի, որը վստահություն ներշնչի իր անձնական, բարոյական եւ գործնական նկարագրե-րով (ուշագրավ է, որ դրանում նրան համակարծիք էր նաեւ հայտնի քաղաքական գործիչ, հեղափոխական հայացքների տեր Ա.Արփիարյանը): Այդ տարիներին բուռն կերպով ընթացող ազգային-քաղաքական շարժումներին Պողոս Նուպարի անմասնակից լինելը գուցե եղավ պատճառներից մեկը, եթե ոչ գլխավորը, որ ժամանակակիցները փորձում էին գտնել ՀԲԸ Միության «իսկական» հեղինակին: Այս կապակցությամբ նշեմ, որ բնավ պատահական չէ, որ ՀԲԸ Միության հետագա բոլոր նախագահները նույնպես, կարծես, հետեւելով Պողոս Նուպարի օրինակին, հեռու էին կանգնած ազգային-քաղաքական ավանդական գործունեությունից:

Ե.Աղաթոնի վկայության ամենակարեւոր կետերից է այն, ուր նա նշում է, որ Պողոս Նուպարը, հավանություն չտալով ներկայացրած նախագծին, «բողոքովին նոր ծրագիր մը պատրաստեց»: Թվում է, այս վկայությունը վերջնական պատասխան է այն հարցին, թե ինչպիսին էր Պողոս Նուպարի դերը ՀԲԸ Միության հիմնադրման գործում: Հարց է ծագում, սակայն, թե որն էր իր կողմից պատրաստած ծրագրի նորությունը: Այս հարցի պատասխանը կարելի է գտնել ՀԲԸ Միությանը նվիրված հրատարակություններում, որոնք հրատարակվել էին մինչեւ 1940-ական թթ. կեսերը: «ՀԲԸ Միությունը կուգար Ալիանս Իզրայելիթի նախախնամական դերն ստանձնել հայ կեանքի ահագնակարօս իրականութեան մէջ: Իր այս կոչումը այնքան վճռորոշ եւ գերակշիռ էր Միութեան հիմնադիրներում մտքին մէջ, որ անոնք կանխա խորապէս ուսումնասիրած էին Ալիանս Իզրայելիթի կազմն ու գործունեութիւնը, եւ անոր վրայ ձեռած, մշակած՝ Հայկական «Ալիանս»-ին հիմնական կանոնագիրը»³⁵ Պողոս

Նուպարը, ստանձնելով նոր կազմակերպության ստեղծումը, այդ հարցին մոտեցավ ամենայն պատասխանատվությամբ, որպես իսկական պրոֆեսիոնալ, այլ ոչ թե սիրող, դիլետանտ: Իսկ պրոֆեսիոնալ մոտեցումը պահանջում էր նախ ուսումնասիրել արդեն գոյություն ունեցող նմանօրինակ կազմակերպությունների փորձը, ընդօրինակել այն դրականն ու օգտակարը, որը կապահովեր նորաստեղծ Միության հաջող գործունեությունը: Այլ կերպ ասած, նրա նպատակը ոչ թե նորարարություն անելն էր, այլ կենսունակ եւ աշխատող կազմակերպության ստեղծումը: Եվ հենց նման մի կազմակերպության օրինակ էր հրեական «Ալիանս Իսրայելիթ Յունիվերսել»-ը, որը հիմնվել էր դեռ 1860թ., Փարիզում եւ բազմիցս ապացուցել իր օգտակարությունը հրեա ժողովրդի համար, այդ թվում նաեւ 1905թ. վերոնշյալ դեպքերի ժամանակ:³⁶

Դրա հետ մեկտեղ, Պողոս Նուպարը եւ իր գործընկերները չդիմեցին Ալիանսի ծրագրի պարզ ընդօրինակմանը: Այսպես, եթե Ալիանսի նպատակներից էին «...աշխատել ամեն տեղ հրեաներուն ձեռքազատման...», «...օգնել արդիւնաւոր օժանդակութեամբ մը անոնց, որ կը տառապին հրեայ ըլլալուն համար...»³⁷, ապա ՀԲԸ Միության ծրագրում նմանատիպ կետերը բացակայում են: Դրանց փոխարեն խոսվում էր «...հայ ժողովրդեան մտաւոր եւ բարոյական զարգացման...», «...անոնց նիւթական կացութիւնը բարոքելու» մասին: Դրանով իսկ ՀԲԸ Միության հիմնադիրները ձգտում էին մի կողմից չգրգռել թուրքերի թշնամանքը եւ ապահովել Միության գործունեությունը Օսմանյան, ինչպէս նաեւ Ռուսական կայսրությունների տարածքում, իսկ մյուս կողմից որեւէ ընդհանուր եզր չունենալ հայ քաղաքական կազմակերպությունների հետ: Հատկանշական է նաեւ հետեւյալ տարբերությունը: Եթե Ալիանսի ծրագրում խոսվում էր ընդհանրապես հրեա ժողովրդի մասին, անկախ նրանց բնակության վայրից (եւ դա բնական էր, քանզի XIX դ. կեսերին հրեաները դեռ զրկված էին իրենց հայրենիքում ապրելու իրավունքից), ապա Միության նպատակն էր օգնություն ցույց տալ բուն հայրենիքում, այլ ոչ թե տարբեր երկրներում ապրող հայությանը: Սկսած 1940-ական թթ. կեսերից, ՀԲԸ Միությանը նվիրված հրապարակումներում այլեւ չկա հիշատակություն Ալիանսի մասին: Բանն այն է, որ 1947թ. Իսրայել պետության ստեղծումից անմիջապես հետո, նրա եւ հարեան արաբական պետությունների միջեւ սկսվեցին պատերազմական գործողություններ: Հաշվի առնելով, որ Սիրիայում, Եգիպտոսում, Հորդանանում, Լիբանանում եւ այլ արաբական երկրներում 1915թ. ցեղասպանությունից հետո բնակություն էին հաստատել հարյուր հազարավոր հայեր, որոնք վայելում էին տեղական իշխանությունների ընդհանուր առմամբ բարյացակամ վերաբերմունքը, նպա-

տակահարմար համարվեց չհիշատակել ՀԲԸ Միության անուղղակի կապը Ալիանսի հետ: Թվում է անցած տասնամյակների ընթացքում տեղի հայ բնակչության քաղաքացիական դիրքորոշումը, ինչպես նաեւ ՀԲԸ Միության անդամների բազմիցս ապացուցված նվիրվածությունը ասպնջական երկրների շահերին, այլեւս ավելորդ է դարձնում նման զգուշությունը, որի զոհն էր դարձել պատմական ճշմարտությունը:

Միության նպատակները

ՀԲԸ Միության հիմնական նպատակների մասին հստակ ասվում էր կանոնագրի առաջին հոդվածում՝ «Բնագաւառի Հայ ժողովրդեան մտաւոր եւ բարոյական զարգացմանը նպաստել, անոնց նիւթական կացութիւնը բարոքելու օժանդակել եւ այս արդիւնքը յառաջ բերելու ծառայող ռեւէ ձեռնարկ կամ հրատարակութիւն քաջալերել»:³⁸

Հետագա տարիներին Միության հիմնական կանոնագիրը, նրա առանձին հոդվածները ենթարկվեցին որոշ փոփոխությունների, բայց ծրագրային նշանակություն ունեցող այս երեք կետերը մնացին գրեթե անփոփոխ: Միայն թե տարբեր ձեւակերպումներ ունեցավ առաջին կետի այն մասը, ուր նշվում է ՀԲԸ Միության գործունեության հասցեատերը: Դա արտացոլումն էր այն էական ու բազմաբնույթ փոփոխությունների, որոնք տեղի էին ունենում թե՛ Հայաստանում եւ թե՛ գաղթաշխարհում: Այստեղ առաջիմ նշեմ միայն, որ մինչեւ 1915թ. հրատարակած կանոնագրերում, այսինքն, այն տարիներին, երբ դեռ հայ ժողովրդի ճնշող մեծամասնությունը բնակվում էր Արեւմտյան Հայաստանում եւ կիլիկիայում կանոնագրի առաջին կետում օգտագործվել են «բնագաւառ», «Արեւելքի» կամ «ասիաբնակ հայ ժողովուրդ» եւ այլ ձեւակերպումները: Նման ձեւակերպումների նպատակը մեկն էր՝ դյուրացնել Միության՝ որպես կազմակերպության, ճանաչումն ու օրինականացումը իշխանությունների կողմից, չստեղծել ավելորդ խոչընդոտներ նրա ապագա գործունեության համար: Սա կարելի է նկատել որպես առաջին օրինակը ՀԲԸ Միության որդեգրած գործելակերպի, որը կարելի է բնութագրել «գործով, այլ ոչ բանիվ» հայտնի ասացվածքով:

Պարզ էր, սակայն, որ Միության բուն գործունեության համար անհրաժեշտ էր ողջ հայության մշտական եւ հարատեւ օժանդակությունը: Հենց այդ նպատակով էլ 1906թ. մայիսի 1-ին ՀԲԸ Միությունը հրապարակում է «Հրաւեր առ Համօրէն Հայս», ուր առաջին անգամ հրապարակավ հայտարարում էր նորաստեղծ կազմակերպության հիմնադրման եւ

գործունեության հիմնական նպատակների մասին: Եվ որպես այդպիսին այդ փաստաթուղթն ունեցավ պատմական նշանակություն:

«Օտտ մը տարիներէ ի վեր զգայի եղած էր Հայկական Ընդհանուր Միութեան մը պէտքը: Վերջերս մեր Ռուսահայ եղբարց ենթարկուած դառն կացութիւնը մի անգամ եւս հաստատեց թէ Հայ ազգը կը կարօտի մի այնպիսի կազմակերպութեան, որ կարենայ դժբախտ պատահարներու միջոցին նիւթական եւ բարոյական օգնութիւն հասցնել մեր հայրենակցաց, ինչպէս որ ըրաւ հրէական Ալիանս Իսրայէլիի Ընկերութիւնը, Ռուսիոյ Հրէից կոտորածներուն առթիւ դրամական մեծաքանակ նպաստներ դրկելով անոնց:

«Ո՛ւտէ աղէտէ արկածելոց ընծայուած օգնութիւնն այնչափ աւելի օգտակար կ'ըլլայ՝ որչափ աւելի փութով հասնի: Ամէն անգամ որ Հայաստանի մէջ ծագի նոր աղէտ մը, ինչպէս սով կամ երկրաշարժ, համաճարակ կամ հրդեհ, հետաւոր երկիրներ գտնուող հայեր կը յուզուին, կը միանան եւ հանգանակութիւններ կատարելով քիչ կամ շատ դրամ կը դրկեն կարօտելոց. սակայն մինչեւ որ այդ նպաստներն իրենց տեղը հասնին՝ հազարաւոր ընտանիքներ կը մնան անխնամ ու անպատասպար, եւ զոհ կ'երթան ցուրտի, անօթութեան եւ հիւանդութեանց:

«Տխուր ճշմարտութիւն մ'է նաեւ որ Հայրենիքի հողին վրայ ապրող մեր հայրենակիցները դարաւոր դժբախտութեանց հետեւանօք հասած են նիւթական եւ բարոյական չքաւորութեան այնպիսի վիճակի մը՝ որոյ հանդէպ կարելի չէ անտարբեր մնալ իբր հայ եւ իբր մարդ:

«Ուրեմն Հայ ազգը անհրաժեշտ պէտք ունի կազմակերպելով մնալուն մարմնոյ մը որ միշտ պատրաստ գտնուի օգնելու Հայաստանի հայ ժողովրդեան՝ առանց կրօնի խտրութեան. եւ ուրախ եմք ներկայ յայտարարութեամբ ծանուցանելու թէ՛ այս տեսակ մի մարմին հիմնուած է ի Գահիրէ, «ՀԱՅԿԱԿԱՆ՝ ԲԱՐԵԳՈՐԾԱԿԱՆ ԸՆԴՀԱՆՈՒՐ ՄԻՈՒԹԻՒՆ» անուամբ, որու նպատակն է ...մեր Հայաստանի եղբարց անմիջական օգնութեան հասնիլ, ամէն անգամ որ պէտք մը գոյանայ, եւ միանգամայն նպաստել անոնց տնտեսական եւ կրթական ընդհանուր վիճակի բարելաման:

«Ուրեմն Հայկական Բարեգործական Ընդհանուր Միութիւնն զուտ բարեգործական եւ մարդասիրական մի հաստատութիւն է, առանց քաղաքական հանգամանաց, որ ըստ կարելոյն պիտի հետեւի Ալիանս Իսրայէլիի գործունեութեան եղանակին:

«Այսպիսի ազնիւ ու մեծ նպատակի գործադրութիւնը կը պահանջէ դրամական առատ աղբիւրներ: Ուստի հրաւեր կը կարդամք ամէն երկրի

Հայերուն որ փութով անդամակցին Միութեանս եւ իրենց նուէրներով եւ ամասքածիներով նպաստեն կարելոր դրամագլխոյ մը կազմութեան:

«Յուսամք թէ ամէն ճշմարիտ եւ զգայուն հայ, առանց խտրութեան կրօնի եւ սեռի, խանդաւառութեամբ պիտի ողջունէ Միութեանս ծնունդը, պիտի ըմբռնէ անոր նշանակութիւնը, եւ սրբազան պարտականութիւն պիտի համարի անդամակցիլ անոր եւ օժանդակել անոր զարգացմանն ու ծաւալման: Հայկական Բարեգործական Ընդհանուր Միութիւնն մի գործնական ասպացոյց թող լինի որ աշխարհիս մէջ ցրուել հայերն կարող են միաբանիլ ազգային բարօրութեան առաջնորդող մի նպատակի համար»:³⁹

Մեկ այլ փաստաթղթում Միության ղեկավարությունը անհրաժեշտորեն պարզաբանում էր իր ծրագրերը. «ՀԲԸ Միութիւնը, յօգուտ հայրենի հողին հաւատարիմ մնացած հայ ժողովուրդին, կը հիմնէ կամ նպաստով կ'օժտէ վարժարաններ, մատենադարաններ, արհեստանոցներ, աշխատանքի տուններ, հիւանդանոցներ, որբանոցներ եւ ուրիշ նմանօրինակ ազգային հաստատութիւններ ...Կը պաշտպանէ գիւղացիները, անոնց հայթայթելով հող, սերմացու, կենդանի եւ գործիք: Կը քաջալերէ տեղական արհեստագործութեանց զարգացումը, կը տարածէ գիւղատնտեսական արդիական գիտելիքները, կը ստեղծէ աշխատութեան եւ արդիւնաբերութեան նոր միջոցներ...»:⁴⁰

Հայտնի է, որ նույնիսկ ամենամշակված, ամենաիրատես բարեսիրական ծրագրերը հաճախ մատնված են լինում ձախողման՝ անհրաժեշտ դրամական միջոցների բացակայության պատճառով: Առավել եւս ազգային փոքրամասնությունների պարագայում, երբ պետական ֆինանսավորման բացակայության պայմաններում նրանք առանց այն էլ ստիպված են սեփական միջոցներով ապահովել իրենց ազգային զանազան հաստատությունների (դպրոցներ, եկեղեցիներ, լրատվամիջոցներ, ակումբներ եւ այլն) գործունեությունը: Բնական է, որ ՀԲԸ Միության հիմնադիրները, դիմելով ժողովրդին, կոչ էին անում օժանդակել նորաստեղծ կազմակերպությանը իրենց դրամական հատկացումներով: Հակառակ պարագայում, Միության գործունեությունը դատապարտված էր անհաջողության, որքան էլ հարուստ լինեին Պողոս Նուպարը եւ նրա գործընկերները: Դրա հետ մեկտեղ, սակայն, նրանք անհրաժեշտաբար պետք է առաջարկեին նույն այդ միջոցների օգտագործման առավել արդյունավետ ձեւեր: Կանոնագրքում այն զբաղեցնում է ընդամենը մեկ տող՝ «Ընկերութեան դրամագլուխը անձեռնմխելի է: Այս պայմանը հիմնական է»:⁸⁶ տարի անց՝ 1992թ. կանոնագրքում կարդում ենք. «...գլխավոր հիմնադրամը անձեռնմխելի է: Այս պայմանը հիմնական է եւ անփոփոխելի»: Ինչպէս տեսնում ենք, տարիների փորձը ոչ միայն ապացուցել է այդ սկզ-

բունքի գործնական բնույթը, այլ նույնիսկ անհրաժեշտ է դարձրել այն դի-
տել որպես «անփոփոխելի»:

Դրամագլուխը եւ նրա անձեռնմխելի լինելը ինքնանպատակ չէր.
«Անհկա, նախ, իր արտադրած եկամուտով, կ'ապահովէ ձեռնարկուած
գործին յարատեւութիւնը. հակառակ որ երերուն հասոյթները նուազին
կամ դադրին: Երկրորդ, աշխատութեանց համարժեքին ամբարումովը՝
անհկա ի գլուխ կը հանէ այնպիսի վիթխարի ձեռնարկներ որոնց անբա-
ւական են անհատական կորովներ»: Այս տողերը քաղված են արդեն հի-
շատակած հայտնի հրապարակագիր Լեւոն Մկրտիչյանի մի հոդվածից,
որը գրված էր ի պաշտպանություն Միության որդեգրած այդ սկզբունքի:
Նման հոդվածների շարքում այն ոչ առաջինն էր եւ ոչ էլ վերջինը: Բանն
այն է, որ շատ-շատերը՝ անհատներ եւ կազմակերպություններ, Միու-
թյան գոյության առաջին իսկ տարիներից կոչ էին անում եւ նույնիսկ պա-
հանջում, որ նա հրաժարվի իր այդ սկզբունքից եւ եղած «պատրաստի
դրամը» հատկացնի այս կամ այն կարիքներին: Նման մոտեցումը պա-
տահական չէր: Դրամագլխի անձեռնմխելիության սկզբունքը, որ սովոր-
ական երեսույթ էր եվրոպական երկրներում, լրիվ անծանոթ էր հայ կազ-
մակերպություններին, եւ ՀԲԸ Միությունը առաջինն էր, որ կիրառեց այն:
Այդ կապակցությամբ Լ.Մկրտիչյանը նշում էր. «...մենք ազգովին կ'ան-
գիտանանք դրամագլխի տնտեսական նշանակութիւնը ... Արդարեւ,
արեւելեան ըմբռնումով, դրամագլուխը ուրիշ բան չէ բայց եթէ որոշ քա-
նակութեամբ դրամ որ մնալով, կեցած տեղը բան մը չարժէր, այլ ծախ-
սուելով միայն արդիւնք կուտայ: ...Եվ այսպէս, ահա, մենք սովորութիւն
ըրած ենք մեր բոլոր բարեգործական-ազգային հաստատութեանց երե-
րուն, ուստի եւ անապահով հասոյթները ամբողջովին ծախսել եւ անոնց-
մէ գոնէ պզտիկ մաս մը դրամագլուխի վերածելու գաղափարը չենք ու-
նեցած»: «Հետեւանքը սա եղած է, - շարունակում էր Լ.Մկրտիչյանը, - որ
հասոյթները նուազելուն կամ դադրելուն պէս՝ գործն ալ կաղացած կամ
բոլորովին դադրած է: Ահա թէ ինչու այնքան կարճ կեանք ունեցած են
մեր մէջ՝ իրարու յաջորդող բազմաթիւ ընկերութիւններ»:⁴¹

Միության հիմնադիրները, ստեղծելով գլխավոր հիմնադրամ եւ
դարձնելով այն անձեռնմխելի, ոչ միայն ձգտում էին ապահովել կազմա-
կերպության մշտական, հարատեւ գործունեությունը, այլեւ անհրաժեշ-
տության դեպքում անհապաղ եւ գործնական օգնության հասնել հայ
աղետյալներին: Պատմության հետագա ընթացքը ցույց տվեց, թե որքան
արդյունավետ էր խնդրի լուծման նման եղանակը.

ՀԲԸ Միության հայտարարած ծրագիրը ընդգրկում էր կենսագործու-
նեության գրեթե բոլոր կարեւոր ոլորտները՝ տնտեսություն, կրթություն,

առողջապահություն եւ այլն: Բացակայում էր, սակայն, մեկ ոլորտ՝ քա-
ղաքական գործունեությունը, եւ դա բնավ պատահական չէ. «Ընկերու-
թիւնը էապէս մարդասիրական է, ոեւէ քաղաքական հանգամանք չունի:
Այս պայմանը հիմնական է»: Այս դրույթը սկզբունքային, հիմնարար
նշանակություն ունէր Միության հիմնադիրների համար եւ նույն այդ
դրույթին հավատարիմ մնալը կանխորոշեց Միության եզակի դերը տա-
րաբնույթ առնակատումներով լի հայ իրականության մէջ: Ստորեւ, տար-
բեր առիթներով դեռ կլինի անդրադարձ այս դրույթին, իսկ այստեղ ավե-
լացնեմ միայն, որ դրա առկայության եւ կիրառման շնորհիվ է, որ նորա-
ստեղծ կազմակերպությունը կարողացավ արդարացնել իր «ընդհանուր»,
իսկապես համազգային լինելու հավակնությունը, կարողացավ գործնա-
կանում օժանդակել հայ ժողովրդի գոյավիճակի բարելավմանը:

ԱՐԵՎՄՏՅԱՆ ՀԱՅԱՍՏԱՆՈՒՄ

ԵՎ ԿԻԼԻԿԻԱՅՈՒՄ

Որեւէ բարեգործական կազմակերպության կայացման եւ գործունեության երաշխիքը, ինչպէս հայտնի է, բավարար չափով ֆինանսական միջոցների առկայությունն է: Ավելին, նախնական որոշ գումարի կամ հիմնադրամի առկայությունը հաճախ նման կազմակերպությունների ստեղծման նախապայմաններից է: ՀԲԸ Միության հիմնադիրների մոտեցումը եղավ փոքր-ինչ այլ: Թե հիմնադրման փաստաթղթում եւ թե «Հրաւեր առ Համօրէն Հայս» առաջին հայտարարության մեջ չկա եւ ոչ մի ակնարկ նման հիմնադրամի գոյության մասին: Հակառակը այդ հայտարարության մեջ ժողովրդին կոչ էր արվում «ամսաբաժիններով» նպաստել նորաստեղծ կազմակերպությանը: Միության հիմնադիրները նման կոչով դիմելով հանդերձ քաջ գիտակցում էին անձնական օրինակի պարտականությունն ու անհրաժեշտությունը: Հիմնադրումից մեկ տարի անց հրապարակված Միության հաշվետվությունը այդ պարտականության գիտակցման վկայությունն է: 1907թ. մայիսին ՀԲԸ Միությունը 815 անդամ ուներ, որոնցից 418՝ Կահիրեում, 282՝ Ալեքսանդրիայում, 72՝ Եգիպտոսի այլ քաղաքներում եւ միայն 33-ը՝ այլ երկրներում՝ Ֆրանսիա, Ավստրո-Հունգարիա, Ջիբուտի (Ֆրանսիական Սոմալի), Եթովպիա եւ այլուր: Կահիրեի ցուցակում առաջին 23 անդամները Միության հիմնադիրներն էին եւ նրանց ընտանիքի անդամները՝ Պողոս Նուպարի, Ե.Աղաթոնի եւ Մ.Անդրանիկյանի ընտանիքները, նաեւ Յագուպ Արթինը, Ն.Տաղավարյանը, Գր.Եղիայանը, Մ.Մարկոսֆը եւ Կ.Ծերիտոնյանը: Այդ 23 անդամների վճարած գումարը կազմում էր ընդհանուրի ավելի քան կեսը:

Սրանք լուրջ թվեր չեն. տեղի էր ունենում ՀԲԸ Միությանը հատուկ այնպիսի ավանդույթների ձեռավորում, որոնք գործառույթ են ցայսօր: Սկսած հիմնադրման օրվանից, Միության նախագահները և Կենտրոնական Վարչական Ժողովի (Վարչության) անդամները, ամենախոշոր դրամական միջոցներ հատկացնողները եղան և են: Ինչպես 1906թ., այնպես էլ հետագայում, նրանց ընտանիքի անդամները նույնպես, որպես կանոն, դառնում էին Միության անդամներ: Արդեն ասվեց, որ Միության հիմնադիրներից էր Պողոս Նուպարի որդին՝ Առաքելը, նրա մյուս որդին՝ Զարեհ Նուպարը, տարիներ անց ընտրվեց Միության նախագահ: Գալուստ Կյուլպենկյանի նախագահության օրոք Կենտրոնական Վարչության անդամ էր նրա որդին՝ Նուպար Կյուլպենկյանը, Արշակ Գարակյոզյանի օրոք՝ նրա եղբայրը՝ Միհրան Գարակյոզյանը և որդին՝ Զարգ Գարակյոզյանը: Վերջապես, Ալեք Մանուկյանի նախագահության վերջին շրջանում Կենտրոնական Վարչության անդամ էր նրա դուստրը՝ Լուիզ Մանուկյան Սիմոնը, որը ևս փոխարինեց իր հորն այդ պաշտոնում:

Առաջին նվիրատուները: Տյորթ-Յուլի որբանոցը

Միության դրամական միջոցների արագ աճը արդյունք էր նախ և առաջ նվիրատվությունների, որոնք, իրենց հերթին, հետևանք էին վերոնշյալ հիմնական, անձեռնմխելի հիմնադրամի ստեղծման: Բայց ոչ միայն այդ: Գործարար մարդկանց վստահությունը Միության հանդեպ պայմանավորված էր նաև 1910թ. հունվարի 1-ի Ուխտագրով, հանդիսավոր հայտարարությամբ, որում Միության Կենտրոնական Վարչական Ժողովը երդվում էր «...կէտ առ կէտ և կատարեալ խղճմտութեամբ գործադրել կտակարարներուն և նուիրատուներուն կամքն ու բացայայտ տրամադրութիւնները. կը խոստանայ ոչ մէկ գինով թոյլ տալ որ ռեւէ կամայական շեղում մը ըլլայ և կանխորոշ նպատակէն տարբեր ուղղութեամբ գործածուին կտակած և նուիրած գումարները ...»:¹ Առանց չափազանցության, կարելի է ասել, որ այս հայտարարությունը աննախադեպ երեւոյթ էր հայ իրականության մեջ: Առաջին անգամ էր, որ այնպիսի հայտնի և հեղինակավոր մարդիկ, ինչպիսին էին Պողոս Նուպարը, Յագուպ Արթինը, Տիգրան Քելեկյանը և այլք, հրապարակավ երդվում էին ողջ հայությանը, ամեն մի հայի՝ անշեղորեն գործադրել նվիրատուների և կտակարարների ցանկությունը:

Իսկ դրանում կարելի էր համոզվել՝ ծանոթանալով Միության տարեկան տեղեկագրերին, ուր Միության գործունեությունը, այդ թվում բոլոր

դրամական գործառնությունները, ներկայացված են ամենայն մանրամասնությամբ: Դա մարմնավորումն էր Պողոս Նուպարի այն դրույթի, «...որ Միութեան տունը ապակիէ տուն մըն է, ուր ոչինչ պէտք է ծածուկ մնայ - ոչ վարչական գործերուն տեսակէտով, և ոչ ալ գործադրուած նպատակին, որ պէտք է միշտ մնայ այնպէս՝ ինչպէս որոշակի նախագծած է մեր Կանոնագիրը, առանց անկէ հեռանալու»:²

Գործունեության նման եղանակը, որը մինչ այդ անծանոթ էր հայ իրականությանը, մեծապես պայմանավորեց Միության հեղինակությունը հայ ժողովրդի մեջ: Համոզվելով, որ Միությունը իրեն տրամադրած դրամական միջոցներն օգտագործում է հօգուտ ոչ թե առանձին խմբակների կամ անհատների, այլ հայ ժողովրդի կենսական կարիքները բավարարելու նպատակով, հայերը մեծ սրտորաստակամությամբ սկսեցին համագործակցել Միության հետ և նպաստեցին նրա գործունեության ծավալմանը:

Միության գոյության առաջին տարում նվիրատուները թվով 12-ն էին, որոնցից ամենախոշոր նվիրատվությունը կատարել էր, ինչպես և պետք էր ենթադրել, Պողոս Նուպարը: Հաջորդ տարիներին նվիրատուների ցանկը գնալով այն աստիճան ընդլայնվեց (1910թ. տեղեկագրում նշված է 127 ազգանուն), որ ավելի նպատակահարմար էր այն տպագրել «Միութիւն» ամսագրում, իսկ տարեկան տեղեկագրերում՝ հրապարակել միայն ամենախոշոր նվիրատվություններն ու կտակները: Առաջին 2-3 տարիներին, երբ Միությունը դեռ չէր սկսել իրականացնել իր կրթական և այլ ծրագրերը, նվիրատվությունները կատարվում էին առանց օգտագործման եղանակը նշելու: Կարելի է ասել, որ այդ շրջանում նվիրատվությունները ավելի շատ Միության քաջալերման, խրախուսման և քարոզչության յուրահատուկ միջոց էին: Եվ պատահական չէ, որ Միության թե գործիչները և թե բարեկամները նվիրատվություններ էին կատարում ամենատարբեր առիթներով՝ «աղջկան ամուսնութեան առթիւ», «փոխան ծաղկեպսակի», «մկրտութեան առթիւ», «եղբոր յիշատակին» և այլն: Հետագայում, և հատկապես 1908թ. հետո, երբ Միությունը սկսեց իր բազմածավալ գործունեությունը հայրենիքում, սկսեցին տարբերել այսպես կոչված «անորոշ» կամ «ընդհանուր» նպատակով նվիրատվությունները, որոնք օգտագործվում էին Միության Կենտրոնական Վարչության հայեցողությամբ, և «կանխորոշ նպատակի» նվիրատվությունները, որոնք Միությունը պարտավորվում էր օգտագործել ըստ նվիրատուի ցանկության:

Իսկ նվիրատուների ցանկությունները օրինաչափորեն համապատասխանում էին Միության իրագործումներին՝ գյուղական դպրոցների, որբանոցների, գյուղատնտեսական ձեռնարկությունների հիմնում, օգնություն չքավոր գյուղացիներին և այլն: Այլ հարց է, որ նվիրատուները շատ

տարբեր կարողությունների տեր մարդիկ էին՝ ոմանք ի վիճակի էին հատկացնել ընդամենը 1 ամերիկյան դոլար, իսկ մյուսները՝ հարյուրավոր եւ նույնիսկ հազարավոր: Անշուշտ, նվիրատուների քանակը կարելու էր Միության գործունեությունը ապահովելու եւ ընդլայնելու առումով: Սակայն ոչ պակաս կարելու էր նաեւ այն, որ բազմաթիվ հայեր, ապրելով հեռավոր Արգենտինայում ու Կանադայում, ԱՄՆ-ում ու Անգլիայում, Ավստրո-Հունգարիայում եւ Ֆրանսիայում, գիտակցաբար անտեսում էին անձնական պետքերն ու կարիքները եւ Միությանն էին ուղարկում մի քանի դոլար կամ ֆրանկ, համոզված լինելով, որ ՀԲԸ Միությունը հայրենիքի զարգացմանը հավատարմորեն ծառայող ամենակարելու կազմակերպություններից մեկն է, եթե ոչ ամենակարելու: «Պարտք կը սեպենք մասնատրապետ վեր հանելու, - նշվում էր Միության տեղեկագրում, - թե աւելի ազգին խոնարհ դասակարգներուն մէջ է որ մեր Միութեան արմատները կը բուսնին. արդարեւ մեր գործօն անդամներուն մեծագոյն մասը համեստ ազգայիններ են, եւ բաղդատաբար կարելու գոհողութեան բաժինը գոր կը բերեն՝ այնքան աւելի թանկագին է... որքան գիտենք թէ խորին համոզումով է որ Միութեան շարքերուն կ'արձանագրուին»:³

Ինչ վերաբերում է մեծահարուստ հայերին, ապա նրանցից քչերն էին, որ իրենց նվիրատվություններով օժանդակում էին Միության կամ որեւէ այլ բարեգործական կազմակերպության գործունեությանը: Դա կարծես յուրահատուկ «մասնագիտական» հիվանդություն է, որը վեր է ազգությունից եւ ժամանակից: Այս առումով առավել արժանի են հիշատակման այն մեծահարուստ հայերը, որոնք օժանդակեցին Միությանը նրա գործունեության առաջին տարիներին: Այդ մարդիկ շատ տարբեր էին իրենց տարիքով, կրթությամբ, հարստության չափով, նրանցից ոմանք ժառանգ էին, իսկ ոմանք էլ հարստացել էին ինքնաշխատությամբ:

1913թ. տվյալներով ամենամեծ նվիրատվությունը կատարել էր Տիգրան խան Քելեկյանը: Բնիկ կեսարացի, կրթությունը ստանալով Կ.Պոլսի Յակոբ Գուրգէն Հայկական կրթարանում, նա եղբոր հետ սկսում է զբաղվել առևտրով, այնուհետեւ անցնում է արտասահման, ուր շատ չանցած ձեռք է բերում հմուտ եւ հեղինակավոր հնահավաքի համբավ: Դեպի Արեւելքի տարբեր երկրներ կատարած բազմաթիվ ճանապարհորդությունների ընթացքում նա կազմել էր մի շարք հավաքածուներ, որոնց մասին հիացումով էին խոսում ոչ միայն գործընկերները, այլեւ գիտնականները: Հատկապես հայտնի էր Քելեկյանի պարսկական հախճապակու հավաքածուն, որը ցուցադրվում էր Լոնդոնի Սաութ Քենսինկթըրն թանգարանում եւ որի մասին տեղացի արվեստագետներից մեկը գրել էր. «Արեւելեան արուեստին պատմութեան համար անգին յիշատակարան մը

կը ներկայացնէ ան»:⁴ Որպէս հնահավաք նա պարտադրված էր իր կցանքը անցկացնել Փարիզում, Նյու Յորքում ու Կահիրեում: Նա ստանձնել էր նաեւ Պարսկաստանի պատվակալ հյուպատոսի պաշտոնը, եւ երբ Չիկագոյում կազմակերպվեց համաշխարհային ցուցահանդես, Քելեկյանը եղավ Պարսկական բաժնի պատասխանատուն (կոմիսարը), որի համար արժանացավ խանի տիտղոսի: Իսկ Փարիզում «Ծանօթիի իր ախորները կը պարունակեն ազնուազգի ձիեր, որոնք Բարիզի մեծ արշաւներուն մէջ յաճախ մրցանակներ շահելով, իրենց տիրոջ անունը կը պանծացնեն»:⁵

Քելեկյան արվեստագետ-հնահավաքը, դիվանագետը, բարձր խավերի հետ մշտական շփման մէջ գտնվող մարդը երբեք չօտարացավ իր ազգից եւ միշտ ձգտեց հնարավորին չափ օգտակար լինել նրան: «Տիպար մը որուն մէջ կոսանսեմետի գիծեր ժողովուրդի զաւակի յատկանիշներուն կը խառնուին, առանց բան մը կորսնցնելու իրենց հարազատութենէն, կարծես գիրար ամբողջացնելով...»:⁶

Քելեկյանի նման բնութագրումը արդյունք էր այն բազմաթիվ բարեգործությունների, որ նա մեծ պատրաստակամությամբ կատարել էր տարիների ընթացքում, եւ որոնց շարքում ամենակարելուրը դարձավ որբանոց-վարժարանի կառուցումը Տյորթ-Յոլ (Storpe-Boy) հայաբնակ քաղաքում (հայտնի է նաեւ Չորթ-Մարգա/վ/ան անունով), որը գտնվում էր Կիլիկիայում Ամանոսի լեռների ստորոտում, Միջերկրականից մի քանի կիլոմետր հեռու: Այդ քաղաքը հայտնի դարձավ 1909թ., երբ տեղեկանալով Ադանայի եւ այլ վայրերի հայերի զանգվածային սպանությունների մասին, նրա բնակիչները, իրենց միացած Օճագլու եւ Յոզերլի (Ըօզերլի) մերձակա գյուղերի հայության հետ, ի տարբերություն շատ ուրիշների, դիմեցին ինքնապաշտպանության: 13 օր շարունակ հետ մղելով թուրքերի, այդ թվում նաեւ կանոնավոր բանակի բոլոր հարձակումները՝ նրանք, ի վերջո, ստիպեցին թուրքերին հաշտություն կնքել իրենց հետ: Կիլիկիայի հայության համար այդ բացառիկ հաղթանակից հետո Տյորթ-Յոլը «...մինչ այդ բոլորովին աննշան համարուած գիղաքաղաք մը յանկարծ նշանաւոր կը դառնար, մտաւորականներու եւ հարուստ դասակարգերու այցելութիւնները կը բազմապատկուէին, բոլորն ալ տեսնելով եւ կարճ ժամանակ մը ապրելով հոն, սքանչացումով կը սկսէին արտայայտուիլ քաղաքի բնական գեղեցկութեան եւ մանաւանդ տեղւոյն հայութեան ազգային բուռն ոգիի զարթումին մասին»:⁷ Այդ մարդկանց թվում էր նաեւ Տիգրան խան Քելեկյանը, որն էլ որոշում է իր եղբոր՝ Գրիգոր Քելեկյանի հիշատակին Տյորթ-Յոլում կառուցել որբանոց-դպրոց եւ այդ նպատակով մեծագումար նվիրատվություն է կատարում ՀԲԸ Միությանը:

Միության պատմության մեջ սա եղավ առաջին դեպքը, երբ այն ստանձնեց որբանոց-դպրոցի կառուցման գործը՝ տեղի ընտրություն, հատակագծի պատրաստում, շինարարություն և բազմաթիվ այլ հարցեր: Միությունը, չնայած բոլոր դժվարություններին, ձգտեց լավագույնս գոհացում տալ Քելեկյանի փափագին: Որբանոցի կառուցման պատմության մեջ հանդիպում են այնպիսի անուններ, ինչպես, օրինակ, Միության հիմնադիր անդամներ Կ.Շերիտոնյան, որը հատուկ ուղեորվել էր Կիլիկիա՝ հարմարագույն վայրը ընտրելու համար, Մ.Մարկոսոֆ, որը հատկապես հեղինակներից էր: Որբանոց-վարժարանի կառուցումը դեռ չէր սկսվել, բայց արդեն հայտնի էր, որ ծախսերը սպասվածից ավելի շատ են լինելու: Այս հանգամանքը այն աստիճան էր մտահոգել Միության ղեկավարությանը, որ նա 1911թ. տեղեկագրում հատուկ նշում էր. «Այս փորձառությունը մեզի համար դաս մը եղաւ, ուրկէ ներշնչուելով՝ ապագային պիտի մերժենք ուել նուիրատուութիւն որուն հետեւանքով Միութիւնը յանձնառու պիտի ըլլար շէնք մը կառուցանել այնպիսի հետաւոր վայրեր, ուր մեծ դժուարութիւններ կան՝ լուրջ և կարող ճարտարապետներ և կապալառուներ գտնելու»:⁸ Այն տպավորությունն է ստեղծվում, որ այդ տողերի հեղինակը լավ ծանոթ չէր Քելեկյանին կամ համեմայն դեպք, թերագնահատում էր նրա բարեգործության չափերը: Ինչպես, Քելեկյանը, տեղեկանալով առաջ եկած դժվարությունների մասին, կատարեց երկու նոր մեծագույն արձակագրություններ և դրանով իսկ գրեթե ամբողջությամբ ապահովեց կառուցման համար անհրաժեշտ միջոցները: Քելեկյանն որբանոց-վարժարանի բացումը կատարվեց 1912թ. հոկտեմբերին, նրա առաջին աշակերտներն էին Կիլիկիայի տարբեր վայրերից 11-14 տարեկան 95 որբ տղաներ, որոնք պետք է ուսանեին 5 տարի և ստանային «...գործնական կրթութիւն մը, որպէսզի դպրոցական շրջանին լրանալուն՝ կարենան իրենց ծննդավայրին մէջ դիւրաւ շահիլ իրենց ապրուստը»:⁹ Ըստ ավանդույթի, այս դեպքում նույնպես կրթական վարչությունը վստահված էր Միացյալ Հնկերությանը, որը ամառվա ամիսներին կազմակերպեց նաև «ազատ» դասընթացներ տեղի գյուղական վարժարանի ուսուցիչների համար: Եվ այսպիսով, Քելեկյանի հնահավաքության միջոցով վաստակած դրամը սկսեց ծառայել հայերի նոր սերնդի կրթական գործին:

Նվիրատուների շարքում աննախադեպ է Երվանդ Հակոբյանի կյանքն ու հարստանալու եղանակը: Ե.Հակոբյանի կյանքի առաջին շրջանը ընթացել էր շատերի համար սովորական ուղիով: Նա ծնվել էր Կ.Պոլսում, աղքատիկ մի ընտանիքում, աշխատում էր որպես երաժշտության ուսուցիչ Արամեան վարժարանում և դպրապետ՝ Ա.Թագավոր

եկեղեցում: Զգուելով բարեկամի իր խիստ համեստ նյութական վիճակը՝ նա սկսում է զբաղվել դաշնամուրի առևտրով, սակայն «պոլսեցի դաշնակի յաճախորդները գնելը շատ լաւ գիտեն, բայց վճարելը՝ ոչ»:¹⁰ 1890-ականների վերջին, երբ հայերի հալածանքները զանգվածային բնույթ էին ստացել, Հակոբյանը հեռանում է երկրից և գնում Փարիզ: Այստեղ նա ընտրում է իր համար բոլորովին անծանոթ մի ասպարեզ՝ թանկարժեք քարերի առևտուր: Մեծ հաջողությունների չի հասնում, բայց և այնպես, դասվում է նրանց շարքը, որոնք Ե.Աղաթոնի խոսքերով ասած՝ «...գէշ աղէկ ապրուստ մը կը հանեն»: Սխալված չենք լինի, եթե ասենք, որ շատ շատերը կբավարարվեին այդքանով, բայց ոչ Ե.Հակոբյանի նման անհատները, որոնց համար կարծես ճակատագիրը կանխորոշում է կյանքի այլ՝ շրջապատի համար խորթ և անըմբռնելի ուղի:

«Յակոբեան կը մտածէր յաճախ, թէ այդ մարգրիտները տեղէ մը կու գային, և որքան ալ հեռաւոր և վտանգաւոր ըլլար այդ տեղը՝ կ'արժէր որ մարդ խիզախէր բոլոր դժուարութիւններուն և իր կեանքին իսկ գնով փորձէր հասնելու իր նպատակին...»:¹¹ Եվ նա ճանապարհ է ընկնում դեպի Նոր Գվինեա: Եթե հիշենք, որ դարասկզբին այդ կղզիները և այնտեղ ապրող ժողովուրդները գրեթե անծանոթ էին եվրոպացիներին, ապա պարզ կդառնա Հակոբյանի բռնած գործի վտանգավորության աստիճանը և նրա՝ որպես անհատի խիզախությունը: Նոր Գվինեայի ճանապարհին նա լինում է Ծավա կղզում, Հնդկաստանում, Չինաստանում, Մապոնիայում, Ավստրալիայում, իսկ վերադարձին նաև Հարավային Աֆրիկայում՝ Յոհաննեսբուրգում: Եվ գրեթե բոլոր այդ երկրներում նա փնտրում և գտնում է հայերի: Եթե Հնդկաստանում հայերին հանդիպելը ինչ-որ տեղ օրինաչափ էր, նկատի առնելով տեղի հայ համայնքի գոյությունը սկսած XVI դարից, ապա շատ հետաքրքրական է Ծավաիայի, Ծավայի և Հարավային Աֆրիկայի պարագան: Ծավայում հայը արարտի (բուսական այլուր՝ մանկական սնունդ պատրաստելու համար - էր.Մ.) գործարանատեր էր, որի մարմարյա պալատում «...12 սենեակներ փառաւորապէս կահաւորուած են պատահական հայ հիւրեր ընդունելու համար»: Ծավաիայում՝ լուցկու խոշոր գործարանատեր էր («Marten's Bros.»), որը այս երկիր էր փախել Սիբիրից, ուր նրան արքայի էր ոռոսական կառավարությունը: Եվ, վերջապես, Յոհաննեսբուրգում նրան հանդիպած հայը՝ «Մարտիրոս» վայրի կենդանիների մորթու ամենամեծ գործարանի տերն էր: «Պարոն Մարտիրոս գիտը քաֆրերու բանակ մը ունի իր տրամադրութեան տակ, որոնք իրեն կը ծառայեն և իրեն համար վայրի կենդանիներ կ'որսան: Անոնցով շրջապատուած, կատարելապէս արքայական կեանք մը կը վարէ ան իր սեփական գիտին մէջ»:¹²

Հասնելով Ավստրալիա եւ որոշ ժամանակ այնտեղ ապրելուց հետո՝ Հակոբյանը ուղեորվում է Նոր Գվինեա: «Ավստրալիայէն մեկնած ատեն, Ովկիանացի ընկերի մը հետ առագաստանաւ մը կը նստին, որուն մէջ հինգ մարդակերներ կային իբրեւ նաւագ: Առագաստանաւը մտած ատեննին, մարդակերներէն մին Յակոբեանի թելը գգուելով կ'ըսէ իր ընկերներուն. «Այս մարդը պարարտ է եւ ուտելու թաւին մէջ»: «Յակոբեան, որ արդէն բարուերէն սորված է, կը հասկնայ, եւ ամերիկեան տասըհարուածեանը միշտ ձեռքին մէջ՝ վայրենի նաւագներու կուրծքէն բռնած, կը ճամբորդէ հինգ օր, հինգ գիշեր: Երկու ընկերները, փոխն ի փոխ... պահելով այս սպառնական ու զգուշատր դիրքը, կարող կ'ըլլան անվտանգ կատարել այս ճամբորդութիւնը»:¹³ Մարդակերների զոհ դառնալու վտանգը մշտապես ուղեկցեց Հակոբյանին, ամբողջ չորս տարի ինքը եւ ընկերը գիշերեցին նավի վրա: Եվ սա գերզոնությունն չէր, հաշվի առնելով, որ մարդու, մանավանդ սպիտակամորթ օտարականի միւր տեղացիների հարգված ճաշատեսակներից էր: (Ինչպես Հակոբյանին պատմել էր տեղի եվրոպացի փոստապետը, իր 13 նախորդները «սպաննուած եւ կերուած են եղել»): Պուլսեցի Հակոբյանը, չորս տարի ապրելով նման «էկզոտիկ» պայմաններում, անձամբ որսում է խեցիներ, հավաքում եւ Փարիզ ուղարկում մարգարիտներ, այդ ընթացքում ժամանակ գտնելով տեղացիների սովորություններն ու բարքերը ուսումնասիրելու, նրանց երածշտական եղանակները գրի առնելու համար: Ի վերջո, հիվանդանալով դեղին տենդով, ստիպված վերադառնում է Փարիզ, ուր նրան սպասում էր այդչափ ծանր գնով կուտակված հարստությունը: Արդեն Փարիզում նա տեղեկանում է Բարեգործականի, նրա գործունեության մասին եւ շատ չանցած՝ նախ մեծագումար նվիրատվություն է կատարում Սասունի Տալվորիկ գյուղի կրթական եւ երկրագործական կարիքները հոգալու համար, իսկ այնուհետեւ Նոր Գվինեայում ձեռք բերած իր հարստության կեսը կտակում է ՀԲԸ Միությանը:

ՀԲԸ Միությանը նվիրատվություններ էին կատարում ոչ միայն առանձին անհատներ, այլեւ արտերկրի տարբեր ազգային կազմակերպություններ եւ համայնքներ: 1907թ. հուլիսին՝ այսինքն Միության հիմնադրումից ընդամենը մեկ տարի անց, Բիթլիսի, Վանի եւ Մուշի «արկածեալներուն ու կարօտեալներուն» օգնելու նպատակով նվիրատվություններ են ստացվում Կալկաթայի Երիտասարդաց Միությունից, Բոստոնի եւ Ադիս Աբեբայի հայ համայնքներից: Այս նվիրատվությունները, որոնք գալիս էին երեք մայրցամաքներից եւ այնպիսի քաղաքներից, ուր դեռ չէին կազմավորվել Միության մասնաճյուղերը, վկայում էին Միության՝ որ-

պես համազգային բարեգործական կազմակերպության, ստեղծման անհրաժեշտության եւ նրա հեղինակության մասին:

Սպասվածին համաձայն, Միության միջոցների հիմնական աղբյուրը՝ նրա մասնաճյուղերից ստացվող գումարներն էին: Միության այդ տարիների (մինչեւ 1915թ.) տեղեկագրերում զետեղված տվյալները վերլուծելիս, ի հայտ է գալիս հատկանշական մի երեւույթ: Այն է՝ բոլոր մասնաճյուղերից ամենամեծ գումարը (մուտքի տուրք, անդամավճար, նվիրատվություն) ապահովել էին Թուրքիայի տարածքում գործող Միության մասնաճյուղերը եւ հետո միայն համապատասխանաբար՝ Ամերիկայի, Աֆրիկայի եւ Եվրոպայի երկրների մասնաճյուղերը:¹⁴ Այս փաստը ամենակարեւոր եւ համոզիչ ապացույցն է նրա, որ Միությունը այդչափ կարճ ժամանակահատվածում կարողացել էր վստահություն ու հավատ ներշնչել հայրենաբնակ հայ ժողովրդին, այն ժողովրդին, որին ծառայելու նպատակով էլ նա հիմնվել էր:

Առաջին նպաստները: Ընդդեմ արտագաղթի

Խոսելով Միության նպաստների հասցեատերերի մասին՝ հարկ է հատուկ նշել, որ առաջին տարվա նպաստների ընդհանուր գումարի մի մասը Միությունը տրամադրել էր Կովկասի հայերին: Այդ նպաստը, որը ՀԲԸ Միության պատմության մեջ առաջինն էր, ուներ նաեւ խորհրդանշական իմաստ: Ինչպես նշվեց, 1905թ. տեղի ունեցած կովկասահայերի սպանություններն ու հալածանքները, իրենց՝ Միության հիմնադիրների վկայությամբ, Միության հիմնադրման շարժառիթներից էին: Միեւնույն ժամանակ, այդ նպաստով ՀԲԸ Միությունը հաստատում էր իր համահայկական լինելու պարագան կամ այդպիսին լինելու ձգտումը՝ դրանով իսկ իրականացնելով Մկրտիչ Ա կաթողիկոսի վերոհիշյալ պատգամը:

Իսկ առաջին տարվա նպաստների հիմնական մասը հատկացվել էր հայրենիքի այն շրջաններին, որոնք զոհ էին դարձել բնական աղետների՝ երկրաշարժ, երաշտ (Բաղեշ, Վան, Մուշ, Ակն), ինչպես նաեւ որբանոցների (Մուշ, Վան): Գրեթե նույնն է պատկերը եւ հաջորդ տարի, միայն թե ավելանում են հասցեները եւ, ամենակարեւորը, առավել ընդարձակ է դառնում օգնությունը հայ գյուղացիությանը. հնարավոր է դառնում որոշ գումար հատկացնել՝ ջրաղացներ ու անասուններ գնելու: Անդրադառնալով այդ հարցին՝ Պողոս Նուպարը նշում էր. «... Հայաստանի գրեթե ամէն կողմերու՝ մանաւանդ յ'Արեւելեան գաւառները տիրող սղութիւնն ու սովն

հարկադրեց զմեզ աւելի հացագին հասցնել քան օժանդակել երկրագործ դասակարգին եւ վարժարանաց որք մեր գլխատր նպատակներն են»:¹⁵

ՀԲԸ Միության հիմնական խնդիրներից էր՝ հայ գյուղացուն հաղորդակից դարձնել ժամանակի գյուղատնտեսական գործնական գիտելիքներին, բարձրացնել նրա աշխատանքի արդյունավետությունը: Այսպես, որոշվել էր Մուշի շրջան գործուղել մասնագետ-գյուղատնտես՝ այնտեղ հողագործությունը արդիական եղանակով զարգացնելու նպատակով, որով պետք է բարելավվեր հայ գյուղացու կենսամակարդակը եւ որպես հետեւանք՝ որոշ չափով վերացվեր երկրից նրա արտագաղթելու դրդապատճառներից մեկը: Սակայն այդ նպատակի իրագործումը սկզբից եւեթ հանդիպեց մեծ դժվարությունների, որոնք երկակի էին: Որքան էլ Միության հիմնադիրները գիտակցում էին արեւմտահայերի տնտեսական ծանր վիճակը, այնուամենայնիվ, իրական պատկերը սպասվածից շատ ավելի ահավոր էր: «Առաջին վայրկեանէն՝ ինքզինքնիս գտանք այնպիսի ահաւոր թշուառութեան մը առջեւ, այնքան բազմապահանջ պէտքերու առջեւ, որ մեր բոլոր բարի կամեցողութիւնը եւ յարատեւ ջանադրութիւնը չի զօրեցին փափաքուածին չափ օգնութիւն հասցնելու մեր մշտափալած եւ բազմաչարչար հայրենակիցներուն»:¹⁶

Հարկ է նշել, որ Միության ղեկավարները երբեք չցանկացան սահմանափակել իրենց գործունեությունը աղքատասիրությամբ, արդարացիորեն դիտելով այն ժողովրդի առաջընթաց զարգացման առումով անարդյունավետ եւ անհետանկար: Ուշադրության է արժանի Միության մտնեցումը հողագործ համայնքներին օժանդակելու հարցին. այն պետք է իրականացվեր ոչ թե դրամական նպաստներ տրամադրելով, քանի որ դա «...պարկեշտ մշակը յաճախ ծուլութեան կը վարժեցնէ եւ ընդհանրապէս ձրիակերութիւնը կը քաջալերէ, այլ փոխառութեան ձեւին տակ, ինչ որ աշխատութեան եռանդը արծարծելու եւ պարտաճանաչութեան զգացումը զարգացնելու պիտի ծառայէ»:¹⁷ Որոշ ժամանակ անց, երբ կուտակած դրամական միջոցները հնարավոր դարձրին նպաստների հատկացումը գյուղատնտեսական եւ արհեստագործական տարբեր ձեռնարկներին, Միությունը անմիջապէս փորձեց օգտվել առիթից: Սակայն այս դեպքում էլ ի հայտ եկան խոչընդոտներ, որոնք, ինչպես վկայում են Միության հրատարակումները, անսպասելի եղան իրենց համար:

1913թ. ապրիլ ամսին ՀԲԸ Միությունը հրատարակում է հատուկ մի հայտարարություն՝ ուղղված «նպաստախնդիր մարմիններուն»: Վերլուծելով Միությանն ուղղված թվով 152 խնդրանքները՝ հայտարարությունում ցավով նշվում էր, որ դրանցից միայն 12-ն են վերաբերում հողագործական եւ արհեստագործական նպաստներին: Բնավ չհամակերպվե-

լով նման կացության հետ՝ Միության ղեկավարությունը նշում էր. «Պէտք է վերջապէս լաւ ըմբռնել թէ՛ Միութեան տրամադրելի վարկերն առայժմ պիտի հատկացուին գերընտրապէս հողագործ ու արհեստատր համայնքներուն անհրաժեշտ կարիքներուն, պայմանաւ որ այս մասին գործնական ծրագիրներ ներկայացուին Կեդրոնական Ժողովին...»:¹⁸ Այնուամենայնիվ, հայտարարությունը մնաց անհետեւանք, եւ մեկ տարի անց, այդ հարցը նորից դարձավ քննարկման առարկա՝ արդեն Միության ընդհանուր ժողովում: Նշելով որպէս օրինակ Դիարբեքիը եւ Հանճը, ուր հիշյալ նպատակով ուղարկված նպաստները կամ բնավ չէին օգտագործվել, կամ էլ տրամադրվել էին լրիվ այլ նպատակների, Միության ղեկավարները ստիպված էին խոստովանել. «Այս երկու պարագաները յիշատակեցինք՝ ձեզի աւելի որոշ գաղափար մը տալու համար այն շուարումին զոր զգացինք մեր երկրագործական եւ ճարտարագործական նպաստներու նկատմամբ»: Ինչպե՞ս բացատրել այս երեւոյթը: Ըստ Միության ղեկավարների՝ դրա պատճառը հետեւյալն էր. «Ասոր մէջ կը գտնենք սա ապացոյցը թէ՛ մեր մէջ անհաստական ձեռնարկութեան ոգին շատ աւելի ակնյայտ է քան համազգային նախաձեռնութեան ոգին, մասնաորոպէս հաւաքական ձեռնարկութեանց տեսակետով, բացի սակայն կրթական ձեռնարկներէն»:¹⁹

Հայտնի երեւոյթ է, որ այն ազգերը (կամ ազգային խմբերը), որոնք երկար ժամանակ գործառուծ են որպէս ազգային փոքրամասնություն, այն էլ տոտալիտար պետություններում, ժամանակի ընթացքում բացասական վերաբերմունք են դրսեւորում հավաքական գործունեության հանդէպ: Այս ընդհանուր բնույթի բացատրության հետ մեկտեղ, հարկ է նշել մեկ այլ հանգամանք եւս: XIX դ. վերջին քառորդում եւ 1909թ. Ադամայում կատարված զանգվածային սպանությունների, տեղահանումների հետեւանքով ավելացել էր Արեւմտյան Հայաստանի եւ Կիլիկիայի հայերի արտագաղթը: Նման պայմաններում բացառվում էին գյուղատնտեսական եւ արհեստագործական ծրագրերի որդեգրումն ու իրականացումը, քանզի այդ վերջինների դրական արդյունքները պետք է զգացվէին միայն տարիներ անց:

Այդ տարիներին հայերի արտագաղթի աննախադէպ աճը դարձել էր հայ իրականության ամենատագնապալի երեւոյթներից մեկը: Միության ակնավոր գործիչ Միք. Նաթանյանը գրում էր. «Վերջերս լոկ Քէսասի եւ Ճիսրի վիճակները ըրած այցելութեամբս կրցայ հաստատել, արդարեւ, որ միայն Քէսասէն (մոտ 800 տուն) 7-800 երիտասարդներ այժմ Ամերիկա կը գտնուին եւ այս թիւը ամէն օր կ'աւելանայ: Գացողներէն դարձող չկայ այժմ: Քէսասի շրջակայ գիւղերը, եւ անդին՝ Եագու-

պիե, Ղընիե, Արամօ, Արֆալու, Ղընեմիա ու Սուէտիոյ գիւղերը այլեւս կ'ամայանան արտագաղթի պատճառաւ: Գիւղերու մէջ աշխատութեան եւ գործի ընդունակ մարդ եւ երիտասարդ չի մնար այլեւս...»:20 Երբ գաղթում էին ժողովրդի «երիտասարդ, ստեղծագործ եւ ծնող» անդամները, երբ նրանք ոչ միայն մտադիր չէին այլեւս վերադառնալ, այլեւ քաջակերում էին իրենց ազգականների արտագաղթը եւս եւ երբ «... իրենց պարապը լեցնող չէլլար», այս պայմաններում անխուսափելիորեն վտանգվում էր ողջ ժողովրդի հետագա գոյությունը. «Ամուսնութիւնքը կը պակսին, ընտանիքը կը հիւծի եւ ... ազգը կը սպառի...»:21 Տարիներ անց՝ 1915թ. հայերի ցեղասպանությունից եւ բռնագաղթից հետո, հայերի այդ արտագաղթը հնարավոր էր գնահատել այլ կերպ: Չնայած օտարության մէջ կրած բոլոր զրկանքներին եւ դժվարություններին, նրանք, այնուամենայնիվ, ոչ միայն պահպանեցին իրենց կյանքը, այլեւ սովեցին նոր սերունդներ: Բայց այդ տարիներին ազգային կազմակերպություններն ու գործիչները ջանում էին ամեն կերպ կասեցնել հայերի արտագաղթը հայրենիքից:

1913թ. հուլիսին ՀԲԸ Միության կենտրոնական վարչական ժողովը «Արտագաղթին դէմ» վերնագրով հատուկ շրջաբերական ուղղեց իր մասնաճյուղերին: Այստեղ նշեմ, որ Միության փաստաթղթերից (կոչեր, շրջաբերականներ եւ այլն) մի քանիսը, ինչպես վերոհիշյալ «Հրաւեր առ Համօրէն Հայս» կոչը, խիստ այժմեական են: Այն աստիճանի այժմեական, որ աննշան խմբագրումից հետո կարող են հրատարակվել այսօր: Այդ փաստաթղթերի շարքին է պատկանում նաեւ «Արտագաղթին դէմ» շրջաբերականը:

«...Երկրին անապահով վիճակը, մէկ կողմէն, եւ տնտեսական ահաւոր տագնապը, միւս կողմէն, ստեղծած են այնպիսի ծանրակշիռ եւ դժուարակնճիռ կացութիւն մը, որ մեր տարաբախտ հայրենակիցներէն շատեր, կորովագուրկ, բոլորովին վհատած, կուրօրէն կը խուճապին տարաշխարհ, յուսալով գտնել այլուր բարօրութիւնը գոր իրենց հայրերուն բնագաւառին մէջ այլեւս անկարելի դարձեր է իրենց գտնել»: Երեւոյթի մասն հաստատումից հետո Միությունը ամենայն հստակությամբ եւ վճռականությամբ պարզում է իր դիրքորոշումն ընթացող արտագաղթի հանդէպ: «Հայկական Բարեգ. Ընդհ. Միութիւնը, որուն գլխաւոր ձգտումն է հայրենի հողին հաւատարիմ պահել հայ ժողովուրդը, եւ որուն բուն նպատակն է՝ բնագաւառին մէջ իսկ սատարել Հայութեան մտաւորական ու տնտեսական բարելաւմին, իր սիրտէն վիրաւորուած՝ արտագաղթի այս նոր խուճապին առջեւ, խորապէս կ'ըմբռնէ այդ հոսանքին վտանգը,

եւ պարտաւոր կը զգայ ազգովին ուխտադրուած պայքարին մասնակցի ամենամեծ չափով:

«Կեդր. Վարչ. Ժողովը, գիտակից իր պաշտօնին ծանրութեանը, եւ իր ազգանուէր կոչումին մէջ իսկ անհունապէս վրդովուած, այս կնճուկից վայրկեանին՝ թախանձագին կը հրաւիրէ Միութեան բոլոր Մասնաժողովները, եւ անոնց շուրջ այնքան անձնուիրաբար բոլորուած հազարաւոր անդամները, որպէսզի գերմարդկային ճիգեր թափելով առաջը առնեն այս մեծ աղէտին, համոզուած թէ՛ բնութեան եւ բռնութեան միւս բոլոր աղէտներէն շատ ակելի ծանրօրէն եւ գահավիժօրէն ազգային գոյութիւնը վտանգելու բնոյթը ունի արտագաղթը:

«Պէտք է մեր տառապակոծ եւ յուսակտուր հայրենակիցները համոզել թէ՛ վայրկեանը երբեք այս աստիճանի բախտորոշ չէ եղած, եւ Հայուն պարտականութիւնը երբեք այնքան մեծ՝ հայրենիքի հողին կասչելու, նոյնիսկ յուսահատօրէն:

«Այս ցեղը ակելի ահաւոր շրջաններու կուրծք տուած, ակելի քանդիչ փոթորիկներու դիմագրաւած է: Այս ցեղը դարերէ ի վեր վերապրած է արիւններու եւ ակերներու մէջէն, եւ հիմա որ չարիքին զօրութիւնները անբաղդատելիօրէն նուազած են, հիմա որ առաւելապէս «քաղաքական» եւ «տնտեսական» պատճառներ միայն կը բնորոշեն անոր դասալքութիւնը հայրենիքէն, չենք հասկնար թէ ինչո՞ւ անոր կը պակսի այսպէս իր ճակատագիրը քիչ մըն ալ տանելու, կրելու կորովը, մինչեւ որ իրեն համար ալ բարօրութեան արդար իրաւունքը վերջապէս իրականութիւն դառնայ իր երկրին մէջ:

«Կեցուցէ՛ք արտագաղթի այս ազգակործան հեղեղը, հայրենակիցներ: Ձեր բոլոր կամքերովը, ձեր բոլոր լանջքերովը, ձեր բոլոր ճակատներովը ծառայեք այդ աղէտին դէմ, եւ ըրէք որ անոր թափը կտտրի, թէ՛ ներսէն դուրս արգելափակելով հոսանքը, եւ թէ՛ դուրսէն ներս անոր դէմ հանելով ետ դարձողներու շարան շարան կարաւաններ...»:22

ՀԲԸ Միությունը չսահմանափակվեց կոչերով, շրջաբերականներով, դիմեց որոշ գործնական քայլերի՝ դրամական նպաստներ հատկացրեց Հայաստանի եւ Կիլիկիայի գյուղացիներին (1913թ. հատկացված «հողագործական նպաստների» ընդհանուր գումարի մի մասը նշանակված է որպէս «վարկ արտագաղթին դէմ»), հիմնեց նոր արհեստանոցներ եւ գյուղական ձեռնարկություններ եւ այլն: Ուշադրության է արժանի, որ Միությունը, ի հակակշիռ ընթացող արտագաղթի, փորձեց կազմակերպել այլ երկրներից՝ մասնավորապէս, Ռումիկիայից, Բուլղարիայից հայ գյուղացիության ներգաղթը Արեւմտյան Հայաստան,²³ դրանով իսկ սկիզբ դնելով իր հետագա գործունեությանը այդ ասպարեզում:

Միության ղեկավարությունը, անկասկած, քաջ գիտակցում էր, որ սեփական ուժերով անկարող է կասեցնել արտագաղթի հոսքը, որ այդ նպատակով հատկացված նպաստները կունենան աննշան ներգործություն: Բայց եւ այնպէս, նա չէր կարող նաեւ բավարարվել դիտողի դերով, քանի որ արտագաղթը հարցականի տակ էր դնում, ամեն բանից զատ, նաեւ Միության ընթացող եւ ապագա գործունեությունը: Եվ այդ ամենը տեղի էր ունենում այն պահին, երբ Միությունը, ավարտելով ձեւավորման առաջին շրջանը, դարձել էր հայ իրականության ամենախոշոր եւ գործունյա կազմակերպություններից մեկը, որի մշտապես աճող թե՛ անդամների քանակը եւ թե՛ դրամական միջոցները (1906- 1915թթ. ընթացքում ՀԲԸ Միությունն իր որդեգրած նպատակների իրագործման համար գոյացրել էր մոտ կես միլիոն ամերիկյան դոլարին համարժեք գումար²⁴) առավել հնարավոր էին դարձնում նրա նպատակների հաջորդական իրագործումը հայրենիքում:

Միության գոյության առաջին երկու տարում, բացի վերը նշածներից, կար եւս մեկ հանգամանք, որը մեծապէս դժվարացնում էր նրա գործունեությունը: Դա նրա մի տեսակ ընդհատակյա գործունեությունն էր հայրենիքում: Ուստի դժվար չէ պատկերացնել, թե ինչպիսի ակնկալիքներով ընդունեց նա 1908թ. Թուրքիայում սահմանադրություն հռչակելու լուրը:

1908թ. սահմանադրությունը եւ հայերի արձագանքը

1908թ. Օսմանյան սահմանադրության հեղինակն էր «Երիտասարդ թուրքեր» կամ «Իթթիհատ վե թերաքքը» կուսակցությունը, որը եւ պարտադրեց նրա ընդունումն ու հռչակումը սուլթան Աբդուլ Համիդի կողմից: «Երիտասարդ թուրքեր» կազմակերպության կորիզը կազմող զինվորականները, իրականացնելով սահմանադրության ընդունումը, առաջնորդվում էին մեկ նպատակով՝ փրկել փլուզվող կայսրությունը, կանխել նրա հնարավոր կործանումը: Հաստատելով սահմանադրական միապետություն, հռչակելով «Ազատություն, արդարություն, հավասարություն, եղբայրություն» կարգախոսները՝ նրանք մտադիր էին դրանով իսկ վերականգնել կայսրության վարկը եվրոպական երկրների մեջ, առաջացնել վստահություն նոր վարչակարգի հանդեպ, կանխել նրանց քաղաքական, ռազմական եւ այլ միջամտությունները կայսրության ներքին գործերին: Երկրորդ նպատակն էր՝ երկրում ստեղծել կայուն վիճակ, համախմբել տարբեր ժողովուրդներին: Եվ հենց այս վերջին նպատակին հասնելու իրենց առաջարկած միջոցը խիստ բնութագրական էր այդ շարժման հա-

մար: Ժողովուրդների համախմբման հիմնական, եթե ոչ միակ միջոցը նրանք համարեցին ոչ թե տնտեսական, սոցիալ-քաղաքական բարենորոգումների որոշակի ծրագրի մշակումն ու իրագործումը, այլ առաջ քաշեցին «օսմանցի» ժողովրդի գաղափարը («օսմանըլլըք»): Ըստ իրենց, օսմանցի ժողովուրդը Օսմանյան կայսրության տարածքում ապրող բոլոր ժողովուրդներն էին, որոնց թույլատրվում էր պաշտել իրենց կրոնը, սակայն լինելով օսմանցի, պետության քաղաքացիներ, այլեւս պետք է հրաժարվեին սեփական, ինքնիշխան պետություն հիմնելու նպատակից: Եվ քանի որ օսմանցին կամ օսմանականը նույն թուրքը կամ թուրքականն էր, նշանակում էր, որ երիտթուրքերի առաջարկած համախմբումը կրում էր խիստ ազգայնական բնույթ եւ ոչ թուրք ժողովուրդների թրքացման նոր, ավելի ճկուն միջոց էր: Եվ բնավ պատահական չէր, որ հետապնդելով այս երկու հիմնական նպատակները՝ երիտթուրքերը չառաջարկեցին ժողովրդին, այս դեպքում առաջին հերթին թուրք ժողովրդին՝ տնտեսական, սոցիալական կամ քաղաքական բարեփոխումների եւ ոչ մի ծրագիր: Երկրում ամեն ինչ մնաց իր տեղում՝ թե կառույցները եւ թե մարդիկ: Սահմանադրության շնորհիվ, սակայն, հնարավոր դարձավ ոչ թուրք ժողովուրդների եւ առաջին հերթին քրիստոնյաների, մշակութային եւ տնտեսական առավել արագ զարգացումը: Մի բան, որը երիտթուրքերը երբեք չէին ցանկանում եւ որը հարցականի տակ էր դնում թուրք ժողովրդի գերիշխող կարգավիճակը: Կարելի է ասել, որ այս դեպքում նրանք, կամա թե ակամա, հանդես եկան որպես սադրիչ, խթանեցին ազգային փոքրամասնությունների աննախադեպ աշխույժ եւ բազմապիսի գործունեությունը, որը հետագայում իրենք իսկ պետք է ճնշեին ամենահանցավոր եղանակով:

Դա, սակայն, դեռ առջեւում էր, իսկ սահմանադրության հռչակումից անմիջապես հետո երկրում, եւ հատկապես ոչ թուրք ժողովուրդների մեջ, տիրում էր անսովոր մի ոգեւորություն: «Երբ բանտերում դուռերը բացուեցան եւ վերագտան իրենց ազատութիւնը քաղաքական բանտարկեալները, երբ բոլոր քաղաքացիներուն համար ազատ ճամփորդութեան իրաւունքը հաստատուեցաւ, երբ գրաքննութիւնը ջնջուեցաւ եւ թերթերը ազատօրէն սկսան արտայայտուիլ, երբ արտասահման ապաստանող փախստականներուն իրաւունք տրուեցաւ երկիր վերադառնալու, երբ քաղաքական կուսակցութիւններուն հրապարակային գործունեութեան ապարէզ բացուեցաւ, երբ առեւտրի կաշկանդումները ջնջուեցան, երբ դպրոցներուն վրայ պետական հսկողութիւնը եւ ազգային լեզուի եւ պատմութեան ուսուցման արգելքները վերացան, երբ հաւաքոյթներու, հան-

դեւաներու, ժողովներու գումարումը դարձաւ ազատ, նոր աշխարհ եկած զգացողութիւնը ունեցան հայերը»:²⁵

«Հրապարակային գործունէութեան ասպարէզ» էր բացվել ոչ միայն քաղաքական կուսակցությունների, այլև բոլոր կազմակերպությունների, այդ թվում նաև ՀԲԸ Միության համար: Եվ հենց այդ օրերին էր, որ Միության հիմնադիրներից Ն.Տաղավարյանը, հրաժարվելով Կենտրոնական Վարչական Ժողովի աստեճադարի իր պաշտոնից, մեկնեց Կ. Պոլիս՝ ազգային-քաղաքական գործունէությամբ զբաղվելու նպատակով: Ինչպես նշվել էր, նա նախ հիմնեց Կ. Պոլսի մասնաճյուղը, իսկ 1910 եւ 1911թթ. կատարած շրջագայությունների ընթացքում նախաձեռնեց բազմաթիվ այլ մասնաճյուղերի ստեղծումը տարբեր հայաբնակ վայրերում: Այսպիսով, ՀԲԸ Միությունը իր հիմնադրումից երեք տարի անց վերջապես մուտք գործեց հայրենիք, եւ արդեն 1910թ. Օսմանյան կայսրության տարածքում գործում էր Միության 28 մասնաճյուղ: Հետագա տարիների ընթացքում հիմնադրվեցին նորանոր մասնաճյուղեր, եւ Առաջին Համաշխարհային պատերազմի նախօրեին հաշվվում էին արդեն 59 մասնաճյուղեր, որոնք գործում էին Արեւմտյան Հայաստանում, Կիլիկիայում եւ Օսմանյան կայսրության այլ շրջաններում:

ՀԲԸ Միությունը դեռ չէր հասցրել կազմակերպել եւ ոչ մի մասնաճյուղ, դեռ միայն պատրաստվում էր մուտք գործել հայրենիք, երբ 1909թ. ապրիլին, այսինքն՝ Սահմանադրության հռչակումից ընդամենը ութ ամիս անց, Կիլիկիայում՝ Ադանա քաղաքում եւ նրա շրջակա գյուղերում կազմակերպվեց հայ բնակչության կոտորած: Մի քանի օրվա ընթացքում սպանվեց շուրջ 30.000 հայ, կրակի տրվեցին մի քանի տասնյակ եկեղեցիներ եւ դպրոցներ, հազարավոր տներ, վաճառատներ եւ այլ շինություններ, իսկ որք մնացած երեխաները հաշվվում էին 10 հազարից ավելի²⁶: Զոհերը կլինեին շատ ավելի, եթե չմիջամտեին եվրոպական երկրների դեսպանները, որոնց ճնշման տակ իշխանությունները ստիպված եղան վերջ տալ զանգվածային սպանություններին: Առաջին անգամ չէր, որ թուրքական իշխանությունները կազմակերպում էին հայերի սպանություններ. 1894-1896թթ. նույնպիսի ճակատագրի արժանացան հարյուր հազարավոր հայեր, եւ այդ իմաստով չէ, որ կարենորվում էին 1909թ. դեպքերը: Առաջին (եւ ինչպես հայտնի է՝ ոչ վերջին) անգամ էր, որ հայերի սպանությունը կազմակերպվեց եւ իրագործվեց նոր վարչակարգի կողմից, որը խոստացել, եւ թվում էր, սկսել էր հաստատել երկրում ազատություն, արդարություն եւ հավասարություն: Հայ ժողովուրդը նորից տազնապի մէջ էր: Տազնապի եւ անորոշության, քանզի նրա քաղաքական առաջնորդները՝ ի դեմս ՀՀ Դաշնակցության, Սահմանադրության

հռչակման պահից դարձել էին նոր իշխանությունների դաշնակիցը: Առայժմ չքննարկենք այն հարցը, թե արդար էր մամն քաղաքականությունը, գոյություն ուներ այլընտրանք, թե ոչ: Փաստ է, սակայն, որ կուսակցությունները, հրաժարվելով թուրքական իշխանությունների դեմ պայքարից, մի կողմ դնելով անկախ պետություն ստեղծելու իրենց հիմնանպատակը եւ միեւնոյն ժամանակ, ըստ էության, զրկված լինելով երկրի ղեկավարմանը մասնակցելու հնարավորությունից, մրցման մեջ մտան միմյանց հետ՝ համուճ իրենց ազդեցության ոլորտների ընդլայնման, տրամադրելով այդ նպատակին իրենց մարդկային եւ նյութական ողջ ուժերը:

Հայ եկեղեցու ամենահայտնի գործիչներից Բաբկեն Կյուլեսերյանը (1930-1936թթ. Մեծի Տանն Կիլիկիո աթոռակից կաթողիկոս) 1909թ. Արմաշի դարբվանքից գրած իր մի նամակում այսպես էր բնութագրում այդ օրերի իրականությունը. «...իրական կեանքը հայութեան նոր դժբախտութեան մը պատկերն է: Կուսակցությունները զիրար գլելու համար կ'աշխատին հիմայ, յետին գիւղի մը հանգիստը վրդոված է, եւ ազգին բոլոր կենսական գործերը լքուած են: ...Տենդոտ բրոքականտ մը կայ իրաքանչիւրին իր գաղափարն ու ծրագիրը մշակելու եւ ժողովրդականացնելու համար չէ, այդ չափով գոհ պիտի ըլլայինք, այլ նաեւ զիրար վարկաբեկելու, թե՛ սկզբունքի եւ թե՛ անձերու կողմէն: Այս տենդոտ, ըսեմ նաեւ կեղտոտ գործունէութեան հետեւանքով այսօր անբարոյացած է յետին գիւղացին իսկ եւ ազգին գործերը ամլութեան դատապարտուած են»:²⁷

Այսպիսով, հայ ժողովուրդը մեկ անգամ եւս ենթարկվեց կենտրոնախույս ուժերի ազդեցությանը, որոնք այս դեպքում շատ ավելի հզոր էին, քանզի գործում էին անկաշկանդ, իշխանությունների արգելքներից ազատ: Եվ նորից ՀԲԸ Միությունը այս ընդհանուր մթնոլորտում ի հայտ եկավ որպես կենտրոնաձիգ ուժ, որի շուրջ համախմբվեցին ժողովրդի ամենատարբեր խավերի ներկայացուցիչները: Համախմբվում էին նրանք, ովքեր հոգնել էին ներհայկական տարբեր խմբավորումների հավակնոտ մրցակցությունից, ովքեր անհեռանկար եւ անարդյունավետ էին համարում (որպես ասպացույց՝ նույն Ադանայի դեպքերը) նրանց որդեգրած գործելակերպը: Ստեղծված պայմաններում Միությունը 1909թ. կրկին վերահաստատեց իր սկզբունքային հիմնադրույթը՝ «Ընկերութիւնը էապէս մարդասիրական է. ոեւէ քաղաքական հանգամանք չունի»: Ավելին, կուսակցությունների հարձակողական գործելակերպը անհրաժեշտ դարձրեց Միության կանոնագրում ամրագրել նաեւ հետեւյալ դրույթը. «...քաղա-

քական քովիթի մը պատկանող ունեւ անձ չի կրնար անդամակցիլ՝ ոչ Կե-
դրոնական Վարչական Ժողովի եւ ոչ ալ տեղական Ժողովներուն»։²⁸

Առաջին հայացքից այս կետը հակասում էր կանոնագրքի մեկ այլ՝ 3-
րդ հոդվածին, ուր ասվում էր, որ Միությանը «...կարող է անդամակցել,
առանց սեռի կամ դասանանքի խտրութեան, ամեն հայ որ յանձն կ'առնէ
յարգել ներկայ կանոնագիրքը եւ կանոնադրապէս հատուցանել իր ան-
դամավճարը»։ Դժվար չէ նկատել, սակայն, որ ըստ 10-րդ հոդվածի, քա-
ղաքական կուսակցությունների անդամներին չէր թույլատրվում ոչ թե
անդամակցել Միությանը, այլ միայն ընդգրկվել նրա ղեկավար մարմին-
ների կազմում։ Հակառակ պարագայում, ինչպես արդարացիորեն ենթա-
դրում էին Միության ղեկավարները, այն կվերածվեր գաղափարական,
քարոզչական եւ միջկուսակցական հակամարտության մի նոր ասպարե-
զի։ Կարելի էր նաեւ, որ Միության գործունեության ծավալմանը եւ հե-
ղինակության բարձրացմանը զուգընթաց, գնալով ակնհայտ էր դառնում
ազգային կուսակցություններից յուրաքանչյուրի ձգտումը՝ իր հսկողության
տակ վերցնել Միությունը։ Նման պայմաններում Միությունը, ջանալով
իրեն հավասար հետապնդության վրա պահել բոլոր կուսակցություններից,
նորից ու նորից հայտարարում էր, որ ինքը «...ոչ միայն չի հետապնդեր
քաղաքական նպատակ մը, այլ եւ երբե՛ք չի ժխտեր կամ չի նախընտրեր
այս կամ այն խմբակցութիւնը», որ «...ո՛չ մէկ հայ անհատ, ոչ մէկ խմբա-
կցութիւն պիտի սակարկէ Միութեան իր համակրութիւնը, ցորքան, հաւա-
տարիմ իր հիմնական սկզբունքին, Միութիւնը ո՛չ մէկ վարդապետական
կամ կուսակցական հաւաստումի կամ ժխտումի կը ձգտի, եւ, միայն հե-
տապնդելով իր ազգաշէն նպատակը, կը գոչաւանայ ամէն տեսակ գաղ-
տնի հնարքներէ կամ հրապարակային պայքարներէ»։²⁹ Վերջապէս մի
հանգամանք եւս. «գեղափոխական»ներուն վարչական պաշտօններ տա-
լով կասկածելի չդարձնել Միութիւնը, քանի որ ան հարկադրաբար պիտի
ըլլար գործել գլխաւորաբար այն երկիրներու մէջ ուր Սոցիալը - Զարդ կը
տիրապետէին»։³⁰ (Առաջ անցնելով, նշեմ, որ 1921թ. կանոնագրի այս կե-
տը չնշվեց՝ «նկատի առնելով որ ազգին քաղաքական սրբանցները այժմ
բոլորովին փոխուած են»։³¹ Այդուհանդերձ, Միությունը վերահաստատում
էր իր սկզբունքային դիրքորոշումը. «Կուսակցականը երբ կ'աշխատի Մի-
ութեան դրօշին տակ, պէտք է գործէ միայն եւ միայն իբրեւ Միութեան
անդամ կամ գործիչ։ ... Կուսակցութիւնները անոր սահմաններէն դուրս
միայն կրնան գործել։ Մէկ խօսքով, մենք իրատեան չունինք սրահանջելու
Միութեան անդամներէն կամ գործիչներէն որ դատրին կուսակցական լը-
յալէ, բայց միշտ պիտի սրահանջենք անոնցմէ որ Միութեան դասէն ենք
անկուսակցական ըլլան»։³²)

Եվ պատահական չէ, որ Միության տարբեր մասնաճյուղերի ղեկա-
վար գործիչները հիմնականում եղան իրականության հրամայականները
գիտակցող մասնագետներ, գործարար մարդիկ, որոնց խորթ էր քաղա-
քական ամբոխավարության գործելակերպը։ Իսկ որ նման կողմնորոշման
տեր մարդկանց թվաքանակը գնալով աճում էր, այդ մասին էին վկայում
կարճ ժամանակամիջոցում Միության մի քանի տասնյակ մասնաճյուղե-
րի հիմնադրումն ու արդյունավետ գործունեությունը Թուրքիայի հայկա-
կան տարածքներում։ Եվ դա այն պայմաններում, երբ ամենուրեք հնգերի
կողքին ստեղծվում էին բազմապիսի նոր ազգային կազմակերպություն-
ներ, որոնցից որեւէ մեկին, այդ թվում նաեւ ՀԲԸ Միությանը անդամակ-
ցելը ենթադրում էր որոշակի դրամական պարտավորություններ։ Ի դեպ,
հետսահմանադրական խանդավառ մթնոլորտում մտադրություն կար
պաշտոնապես վավերացնել Միության գործունեությունը երկրում։ Տեղե-
կանալով դրան՝ հայտնի գրող եւ հրապարակախոս, «Հայկական Բարե-
գործական Ընդհանուր Միութեան Ոսկեմատեանը. 1906-1913» արժեքա-
վոր գրքի հիմնական հեղինակ Սուրեն Պարթեւյանը Վահան Մալեգյանին
Իզմիրից հղած նամակում գրում էր. «Լեւոն Մկրտիչեանի հետ ... այն եզ-
րակացութեան եկանք թէ ամէնէն վտանգաւոր բանը պիտի ըլլար այդ-
պիսի դիմում մը թուրք կառավարութեան մօտ։ Թուրքերուն հոգեբանու-
թիւնը գիտցող մը մտքէն պիտի չանցնէր այդպիսի ձախող քայլ մը առ-
նել։ Թուրքերը յախտեան կրնան անտես առնել եւ թոյլատրել Բարեգոր-
ծականին գործունեութիւնը Թուրքիոյ մէջ, բայց երբ իրենց դիմում ըլլայ
արտօնութեան համար՝ այն ատեն կրնան կասկածի երթալ, իրենց ան-
տարբերութենէն սթափիլ եւ ամէն տեսակ արգելք ցուցունել Բարեգոր-
ծականի առջեւ...»։³³

Դպրոցաշինություն. Վանի Վարժապետանոց

ՀԲԸ Միությունը Արեւմտյան Հայաստանում, Կիլիկիայում եւ Թուր-
քիայի այլ հայաքանակ վայրերում գործեց ընդամենը հինգ տարի՝ մինչեւ
1915թ. կեսերը։ Միության այդ հինգ տարիների գործունեությունը քննե-
լիս, անկասկած, առաջին հերթին անհրաժեշտ է նշել նրա նվաճումները
ազգային կրթության ասպարեզում։

Օսմանյան կայսրությունը, լինելով ամենախոշոր կայսրություններից
մեկը, միեւնոյն ժամանակ դասվում էր ամենաբետամնաց երկրների
շարքը։ Հետամնացության առավել ցայտուն դրսևորումն էր թուրք ժողո-
վրդի կրթական չափազանց ցածր մակարդակը։ Թուրքական իշխանու-

թյունների նման, մեղմ ասած, անուշադրությունը հարազատ թուրք ժողովրդի հանդեպ, ազգային փոքրամասնությունների պարագայում ընդունեց արգելիչ քաղաքականության ձեւ, որի նպատակն էր զրկել նրանց ազգային կրթությունից եւ դրանով իսկ արագացնել նրանց լեզվամշակութային ձուլումը: Իր հերթին, արեւմտահայության հիմնական զանգվածը, ապրելով մշտական չքավորության պայմաններում, ի վիճակի չէր անհրաժեշտ դրամական միջոցներ տրամադրել ազգային դպրոցների հիմնադրման եւ պահպանման համար:

Պետք է ընդունել, որ թուրք իշխանությունները, այս դեպքում, հիմնականում հասան իրենց նպատակին: Ծիշտ է, կայսրության մայրաքաղաքում՝ Կ. Պոլսում, XX դ. սկզբներին գործում էին մի քանի տասնյակ հայ վարժարաններ, սակայն Կ. Պոլսի հայկական համայնքը երբեք չէր եղել եւ չէր էլ կարող ծառայել որպէս արեւմտահայության զարգացման աստիճանի ցուցանիշ: Ըստ որոշ տվյալների, այդ նույն ժամանակահատվածում Թուրքիայի տարածքում գործող հայկական դպրոցներում սովորում էր ընդամենը 82 հազար աշակերտ, ընդամենը, քանզի արեւմտահայության ընդհանուր թվաքանակը կազմում էր շուրջ 2,5 մլն մարդ: Ազգային վարժարանների բացակայությունը, մյուս կողմից էլ թուրքերի եւ քրդերի հարեւանությունը ժամանակի ընթացքում հանգեցրին նրան, որ գյուղական վայրերում մեծ թվով հայեր այլեւս չէին տիրապետում հայերենին եւ դարձել էին թրքախոս կամ քրդախոս:

Ազգային կրթության նման տագնապալի վիճակը հայտնի էր բոլորին, բայց հազվագյուտ կազմակերպություններ միայն ձեռնամուխ եղան գործնական քայլերի: Այդ կազմակերպություններից էր նաեւ ՀԲԸ Միությունը: Արդեն 1907թ. Միությունը առաջին նպաստը հատկացրեց հայ վարժարաններին՝ վանի Կեդրոնական վարժարանին եւ Բալուի Արթիկյան գյուղի դպրոցին: Գործող վարժարաններին օգնելով հանդերձ, այնուամենայնիվ, նրա նպատակը նոր դպրոցների հիմնումն էր, որի իրականացումը հնարավոր դարձավ 1908թ. հետո միայն:

Միության համար դպրոցաշինության ծրագրի իրականացումը կապված էր որոշակի դժվարությունների հետ՝ նկատի առնելով թե անհրաժեշտ փորձառության եւ թե մասնագետների պակասը: Ի վիճակի՞ էր արդյոք Միությունը սեփական ուժերով կյանքի կոչել այդ ծրագիրը. հարցը չունեցավ իր պատասխանը, քանզի մինչ այդ տեղի ունեցավ կարեւոր մի իրադարձություն՝ սկիզբ դրվեց ՀԲԸ Միության համագործակցությանը Միացյալ Ընկերության հետ:

Միացյալ Ընկերության կազմավորումը Կ. Պոլսում 1880թ. արդյունք էր երեք կրթասիրական՝ Արարատյան, Կիլիկյան եւ Դպրոցասիրաց-

Արեւելյան կազմակերպությունների միացման: Ահա թե ինչպէս է գնահատվել Միացյալ Ընկերության գործունեությունը ՀԲԸ Միության կողմից. «Իր գոյութեան ...առաջին շրջանին Միացեալը կ'ունենայ 46 վարժարաններ: Ասոնք, բացի մէկ երկուքէն, գիղական նախակրթարաններ էին, յաճախ միակ ուսուցիչով մը, եւ այն աստիճան փոքրիկ պիտոճեով մը որ անգլիացի թղթակիցներ,- անշուշտ, ո՛չ առանց հեզնութեան,- կը գրէին իրենց թերթերուն թէ՛ կրթութիւնը ոչ մէկ երկրի մէջ այնքան աժան է որքան այս հայ գիղերուն մէջ: Բայց այդ կրթական յարկերուն կատարած դերը, նոյն իսկ իր համեստ համեմատութեան մէջ, բարիք ըլլալէ չէր դադրեր, մանաւանդ այն կարգի գիղերու մէջ որոնց ժողովուրդը լոկ անուճով ու կրօնքով միայն հայ էր, մեծագոյն մասամբ քրդերէն կը խօսէր: Ազգային փրկութեան գործ մըն էր Միացեալին ըրածը: Միւս կողմէ, հայախօս ուստաններու մէջ, կրթական ճշմարիտ լեղաշրջութիւն մը կը կատարէր, պապեճական Սաղմոսին, ժամագիրքին ու Նարեկին տեղ՝ որ, իրենցմէ անբաժան ճպտոհն հետ, ուսուցման միակ առարկաներն էին խեղճ տղոց համար, նոր գրութեամբ դասագիրքեր տարածելով, նոր ու օգտակար ծանօթութեանց ուսումը ընդհանրացնելով: Իր ուսուցիչները հեղինակութիւններ չէին, բայց շատ լայն ժողովրդականութիւն կը վայելէին, իբր բարիքի առաքեալներ, եւ նոյնիսկ կուսակալներ, գայմագամներ մեծ կարեւորութիւն կ'ընծայէին Ընկերութեան ներկայացուցիչներուն»:³⁴ Միացյալ Ընկերության գործունեությունը խափանվեց 1890-ականների վերջին: Նախ նրա մի շարք աշխատակիցներ արքայազն թուրքական իշխանությունների կողմից, ապա այն ստիպված եղավ փակել իր վարժարանների մեծ մասը դրամական միջոցների բացակայության պատճառով: Ի դեպ, գուցե եւ Միացյալը չհայտնվեր նման կացության մեջ, եթե ժամանակին ստեղծած լիներ անձեռնմխելի հիմնադրամ, սակայն, ինչպէս նշվել էր, այդ գաղափարը դեռ անձանոթ էր հայ կազմակերպություններին: 1908թ. Միացյալն ուներ ընդամենը հինգ վարժարան, սակայն, քաղաքական նոր պայմաններում նա անմիջապես նոր թափով վերսկսեց իր գործունեությունը, հասցրեց վարժարանների թիվը մինչեւ 50-ի, բայց դրամական միջոցների հայթայթումը մնում էր անլուծելի խնդիր:

1910թ. Միացյալը որոշում է համագործակցության մեջ մտնել ՀԲԸ Միության հետ, եւ այդ նպատակով կահիրե է մեկնում նրա գործիչներից Հովհաննես Հակոբյանը, որն այդ ժամանակ ամերիկյան «New York Evening Post» թերթի թղթակիցն էր Կ. Պոլսում: «Ձեր բոլոր առաջարկներն ամբողջութեամբ ընդունեցինք: Ունի՞ք ուրիշ առաջարկներ այլ»:- Պողոս Նուպարի այս խոսքերով ավարտվում են բանակցությունները եւ սկսվում

է երկու ազգային կազմակերպությունների համագործակցությունը: Որո՞նք էին Միացյալի առաջարկները: «Նախ միջոց հայթայթել Ադերդի, Միֆարդիհի եւ Հայնէի քրդախոս հայ շրջաններու մէջ վարժարաններ հաստատելու, եւ ապա Վանի մէջ բանալու վարժապետանոց մը մեր ուղղութեան եւ մեր ծրագիրներուն համապատասխան ուսուցիչներ պատրաստելու համար»:³⁵ Կնքված համաձայնությունը նշանակալից երեւոյթ եղավ հայ իրականության մէջ: Այդ օրերին, երբ ազգային կազմակերպություններն իրենց ինքնահաստատումը դիտում էին ոչ թե որպէս որոշ նպատակների իրագործման միջոց, այլ լոկ որպէս ինքնանպատակ, ՀԲԸ Միության եւ Միացյալի համագործակցությունը յուրատեսակ եւ շատերի համար գուցե եւ անցանկալի հիշեցումն էր այն հանրածանոթ, բայց եւ մոռացության տրված դրույթի, որ որեւէ ազգային կազմակերպության առաջին եւ վերջին նպատակը մեկն է՝ տվյալ ազգի շահերի պաշտպանությունը, նրա այս կամ այն կարիքների բավարարումը եւ որին կարելի է հասնել նույն այդ կազմակերպությունների համատեղ ջանքերով: Իսկ որ այդ դրույթի գիտակցումն այնքան էլ դյուրին չէր, վկայում է նույնիսկ ՀԲԸ Միության հիմնադիր անդամներ Մ.Անդրանիկյանի եւ Ե.Աղաթոնի օրինակը, որոնք նախապէս ծանոթանալով Միացյալի ծրագրին՝ առաջ էին քաշում հետեւյալ առարկությունը. «Միութիւնը տակաւին նոր ասպարեզ կ'իջնայ գործելու հայ ժողովուրդի մէջ եւ չի կրնար իր հասոյթներուն մեծագոյն մասը կեդրոնացնել Միացեալի կրթական ձեռնարկներուն շուրջ: Միութիւնը պարտաւորուած է իր եկամտները տնտեսել, որպէսզի կարենայ քիչ մը ամէն տեղ օգնութեան հասնիլ եւ իր անունն ու գործը ծանօթացնել ամէն անկիւնները»:³⁶ Ըստ հայտնի ասացվածքի, մարդկանց թերությունները հաճախ շարունակությունն են նրանց արժանիքների: Մ.Անդրանիկյանի եւ Ե.Աղաթոնի նման դիրքորոշումը նրանց՝ ՀԲԸ Միությանը խելահեղության հասնող ավիրվածության հետեւանք էր, որը տվյալ դեպքում հավասարակշռվեց Միության մյուս ղեկավարների իրապաշտութամբ: Իսկ իրապաշտությունը նշանակում էր այն բանի գիտակցում, որ հայ գյուղացու կրթական մակարդակի բարձրացումն ու նրա ազգային-մշակութային ինքնության պահպանման խնդիրն այդ երկու կազմակերպություններից եւ ոչ մեկն ի վիճակի չէր լուծել սեփական միջոցներով: Դա հնարավոր էր միայն համախմբելով մի կողմից՝ Միացյալի դպրոցաշինության փորձը (ներառյալ փորձառու ուսուցիչները) եւ մյուս կողմից՝ Միության դրամական միջոցները: ՀԲԸ Միության պատմության մէջ դա առաջին համագործակցությունն էր ազգային կազմակերպության հետ, որի դրական արդյունքները խթանեցին նման գործելակերպի որդեգրումը՝ դարձնելով այն Միությանը բնորոշ ավանդույթներից մեկը:

1911թ. ապրիլին կայացած Միության հերթական ընդհանուր ժողովի տեղեկագրում արդեն հատուկ բաժին էր հատկացված կրթական ասպարեզում նրա գործունեության արդյունքներին: «Հեռաւոր գիւղերու մէջ, ուր մեր հայրենակիցները կ'ապրին բացարձակ տգէտութեան մէջ»,³⁷ գործում էր 21 նախնական դպրոց, որոնցից 5-ը՝ Հայկական Կիլիկիայում: ՀԲԸ Միության հիմնադիր ղեկավարները, որոնք ծրագիրը եւ գործելակերպը մշակելիս հետեւել էին Ալիանս Իսրայելիթի օրինակին, հասկանալի հարստութամբ նշում էին հետեւյալ փաստը. «1866-ին, այսինքն առաջին դպրոցին բացումէն հինգ տարի վերջ, Ալիանսը 3 վարժարան ունէր, 1868-ին՝ 7, 1872թ.՝ 17, եւ 1877-ին, այսինքն 15 տարի վերջ, իր վարժարաններուն թիւը կը հասնէր 30-ի: Ինչպէս կը տեսնենք, մեր յառաջադիմութիւնը աւելի արագ է, ինչ որ կը քաջալերէ մեզ վստահութեամբ նկատելու Միութեան ասպագան»:³⁸

Ըստ կնքված համաձայնության, բոլոր դպրոցների տեսչությունը՝ ներառյալ հատուկ մշակած ուսումնական ծրագրերը, ասպահովում էր Միացյալ Ընկերությունը, իսկ անհրաժեշտ դրամական միջոցները տրամադրում էր Միությունը, բայց ոչ ամբողջովին: Միջոցների որոշ, ոչ հիմնական մասը պետք է ասպահովեր տվյալ գյուղի բնակչությունը: Նպատակը ոչ թե դրամի տնտեսումն էր, այլ առաջին հերթին բնակչությանը մասնակից դարձնելը դպրոցաշինության գործին, առաջացնել եւ ձեւավորել նրա մէջ պատասխանատվության եւ պարտավորվածության զգացում սեփական դպրոցի հանդէպ:

Այդ հարցի կարեւորությունը հատուկ նշում էր Միքայել Նաթանյանը, որը քննել էր կրթական գործի վիճակը Հայաստանում եւ Կիլիկիայում: Խոսելով գավառի հայության մասին՝ նա գրում է. «...որքան զօրեղ է անոնց մէջ յաճախ *պահանջումի* գոռոց, անչափ, եւ երբեմն իսկ անպատկառ ոգին, նույնքան եւ աւելի կը պակսի փոխադարձ պարտաւորութեան զգացումը: Այդպիսիներէն շատերն այն անփոփոխ հաւատքը ստեղծած են արդարեւ թէ, ազգը պարտաւոր է եղեր գիրենք թէ՛ պահպանել, թէ՛ կերակրել եւ թէ՛ կրթել ...ձրի: Բայց ինչո՞ւ: Եվ յետոյ այդպիսիներուն երբեք միտքերուն չէ եկած անգամ մըն ալ ինքնիրեննուն հարցնել թէ.- ո՞վ է այդ ազգը կոչուածնին, ի՞նչ են իրենք ուրեմն եւ երբէ՞ն ի վեր իրենք այդ «ազգէն» ջնկուած են»: Նման «պահանջատիրութեան» հետեւանք էր նաեւ այն, «... որ այդ միեւնոյն հայը, հայրը, ծնօղը յօժարական կը վճարէ սակայն իր տղուն դպրոցական վարձքը կամ իր հասարակական տուրքը, երբ օտար վարժարանը դրկէ գաւակը»: Մ.Նաթանյանը տալիս է նման հոգեբանության հետեւյալ ճշգրիտ ձեւակերպումը.

«...պահանջել իրաւունք մը որ չունին, եւ մոռնալ, անտեսել ու արհամարհանօք մերժել պարտքը, որ կը դիզուի...»:³⁹

Առաջին Համաշխարհային պատերազմի նախօրեին Օսմանյան կայսրության տարածքում Արեւմտյան Հայաստանում եւ Կիլիկիայում գործում էր ՀԲԸ Միության 41 հայ ազգային վարժարան, չհաշված Տիրոս-Յոլի որբանոց-դպրոցը, որի մասին խոսվեց վերը: Վարժարանների աշակերտության թվաքանակը շատ տարբեր էր եւ կախում ուներ տվյալ գյուղի բնակչության թվաքանակից: Հայաստանի տարածքում ամենախոշորներն էին Սիդրի, Հազրոյի վարժարանները, ուր ուսանում էր համապատասխանաբար՝ 253 եւ 100 աշակերտ, իսկ Կիլիկիայում՝ Վահկայի, Օար-Տերեի, Կապանի, Ալպիսթանի վարժարանները՝ յուրաքանչյուրն ավելի քան 90 աշակերտով: Մնացած վարժարաններում աշակերտների միջին թվաքանակը հասնում էր 40-50-ի: Իհարկէ, այսօրվա չափանիշներով այդ վարժարանները թվում են շատ փոքր, սակայն հարկ է նորից շեշտել, որ դրանք գործում էին հեռավոր եւ խուլ գյուղերում, ուր տիրում էր անգրագիտությունը եւ ուր հայերը, որպէս կանոն, այլեւ չտիրապետելով հայերենին, կանգնած էին ազգամշակութային վերջնական ձուլման վտանգի առջեւ: Միք.Նաթանյանն այդ տարիներին այսպէս էր գնահատում Կիլիկիայում տիրող իրավիճակը. «Կիլիկիոյ մէջ, ըստ տեղին, հայերը առանց ամենափոքր խղճահարութեան եւ գիտակցութեան՝ կը խօսին թուրքերէն կամ արաբերէն: Կարգ մը գիւղական համայնքներն անգամ, ուր պահած են իրենց լեզուն, սոյն եւս այնքան այլափոխուած է որ գրեթէ բնաւ նմանութիւն չունի մայր լեզուին հետ, թուրքերէն եւ արաբերէն աղաւաղուած բառերու խճողումին պատճառաւ: ... Հոս հայ լեզուին արդէն անզէտ մերայինք՝ դիւրաւ կ'ընտելանան օտարներուն օտարտտի բարբերուն եւս: Անոնց համար հայ լեզուի տեղ թուրքերէն ըլլայ, արաբերէն ըլլայ թէ ուրիշը, այլեւս երկրորդական կարեւորութիւն մը կ'ստանայ, այնքան դիւրին ըլլալով իրենց համար, դժբախտաբար, ամեն գինով հայութեան ուրացումը եւ նոյնիսկ անոր դէմ արհամարհանքի կամ անտարբերութեան զգացումը»: Իրական վիճակի նման անաչառ գնահատումից հետո Միք.Նաթանյանը հատուկ նշում է նորաստեղծ ազգային դպրոցների կարեւորությունը. «... թերեւս նորէն դպրոցին կը մնայ մեծագոյն եւ օգտակարագոյն դերը - չի մոռնալով յիշատակել նաեւ կիրթ եւ նուիրուած հայ եկեղեցականներուն ընկած դերը - կուելու այս վտանգին դէմ, որ աւելի մահաոխի է հոս՝ քան այլուր»:⁴⁰

Կրթական ասպարեզում Միության ամենախոշոր իրագործումը եղավ Վանի վարժապետանոցի հիմնումը: Փորձառու, ձեռնհաս ուսուցիչների պակասն ինչպէս Հայաստանում, այնպէս էլ հատկապէս Կիլիկիա-

յում, զգացվում էր վաղուց, դա առավել նկատի դարձավ, երբ Միությունը եւ Միացյալ Ընկերությունը սկսեցին հիմնել գյուղական դպրոցներ: «Մենք չունինք, գրեթէ բնաւ չունինք, դաստիարակներ, ուսուցիչներ, բարին իսկական իմաստով,- ասվում էր «Միութիւն» ամսագրի համարներից մեկում: - Եվ որքան ատեն որ ասիկա իրողութիւն մը ըլլայ, աշխարհի ամէնէն հրաշալի ծրագիրը անկարող է բան մը ընելու»:⁴¹

Միությունը՝ ի դէմս մի շարք հեղինակավոր գործիչների, որոնց թվին էր պատկանում եւ հողվածի հեղինակ Միքայել Կյուրճյանը, դպրոցը դիտում էր որպէս հայ ժողովրդի նոր սերնդի ոչ միայն կրթական, այլեւ բարոյական մակարդակի բարձրացման ամենակարեւոր միջոցը: Սակայն, ինչպէս գրում էր նույն հեղինակը, «ուսուցչութիւնը մեր մէջ տեսակ մը ապաստարան է, ուր կեանքի մէջ չի յաջողացներ, *նաթեճէր* կուգան իրենց ոչնչութիւնը, իրենց ապիկարութիւնը բուծանելու, ապրեցնելու ազգին ծախքովը, չարաչար օգտուելով նախնական կամ երկրորդական վարժարաններու մէջ իրենց սորուած եւ յաճախ չի սորուած ... հմտութիւնը»:⁴² Սակայն հարցի արմատական լուծումը նա պատկերացնում էր յուրովի. «Միութեան ծախքով առնուազն յիսուն երիտասարդներ ուսուցչութեան պատրաստուին Եվրոպայի եւ Ամերիկայի համալսարաններում մէջ», իսկ մինչ նրանք կավարտեին իրենց ուսումը, Միությունը «... կարող է գեթ երեք չորս վարժապետանոցներ հաստատել անմիջապէս Մայր երկրին մէջ ...»:⁴³ Այդ առիթով «Միութիւն» ամսագիրը հարկադրված էր անել հետեւյալ դիտողությունը՝ «Գեղեցիկ թելադրանք, բայց Միութեան ներկայ միջոցները բնաւ թոյլատու չեն անոր գործադրութեան: Հարկ պիտի ըլլար Միութեան տարեկան հիմնական եկամուտը ամբողջապէս յատկացնել այդ գործին»:⁴⁴

Որակյալ հայ ուսուցիչներ անշուշտ կային՝ օրինակ, Կ.Պոլսում կամ Իզմիրում, բայց անհրատեսական էր սպասել, որ նրանք կհամաձայնվեին աշխատելու գնալ Արեւմտյան Հայաստանի եւ Կիլիկիայի հեռավոր գյուղերը: Փորձը վկայում էր, որ ազգային վարժարանների համար ուսուցիչներ անհրաժեշտ էր պատրաստել հենց տեղում՝ բուն Հայաստանի քաղաքներից մեկում, ուր հնարավոր կլինէր մշտապէս համալրել վարժապետանոցի ուսուցչական կազմը եւ ուր ապագա ուսուցիչները, հաղորդակից դառնալով քաղաքային կյանքին, հնարավորություն կստանային բարձրացնել իրենց զարգացման ընդհանուր մակարդակը: Այդ բոլոր պահանջներին համապատասխանում էր Վան քաղաքը:

Գյուղական դպրոցների համեմատ վարժապետանոցի հիմնումը պահանջում էր դրամական մեծ միջոցներ՝ հատուկ շենքի կառուցում եւ կահավորում, ուսուցիչների վարձատրություն եւ այլն: ՀԲԸ Միությունը, հաշ-

վի առնելով թե իր բազմամասնական ծրագրերը եւ թե հնարավորությունները, ի վիճակի չէր ապահովել պահանջվող միջոցներն ամբողջությամբ: Այնուամենայնիվ, նա ստանձնեց ծախսերի հիմնական մասը՝ դրանով իսկ քաջակերելով եւ խթանելով այլ կազմակերպությունների եւ անհատ մարդկանց մասնակցությունն ազգօգուտ այդ ձեռնարկին: Վերջինների շարքում առաջինն ու գլխավորը եղան Վանի բնակիչները, որոնք մեծ ոգևորությամբ ընդունեցին իրենց քաղաքում վարժապետանոց հիմնելու լուրը եւ քաղաքապետ, Միության տեղական մասնածողովի ատենապետ Պետրոս Գափամանյանի գլխավորությամբ պարտավորվեցին սեփական միջոցներով կառուցել հատուկ մի շենք, որի շինարարությունը ավարտվեց 1913թ. նոյեմբերին: Իսկ մինչ այդ Վարժապետանոցը, ժամանակավորապես տեղավորվելով մեկ այլ շենքում, իր առաջին ուսումնական տարին սկսեց 1911թ. նոյեմբերին, երեսուն աշակերտներով: Երկու տարի անց Վարժապետանոցի երեք կարգի դասարաններում սովորում էր արդեն ավելի քան 60 աշակերտ: Վանի Վարժապետանոցը շատ շուտով դասվեց Արեւմտյան Հայաստանի տարածքում գործող ամենակարեւոր ուսումնական հաստատությունների շարքը: Եվ պատահական չէր, որ Ֆրանսիական Ալիանս Ֆրանսեզ կազմակերպությունը եւ Ռուսաստանի դեսպանությունը որոշեցին Վարժապետանոցին հատկացնել դրամական վարկ, առաջինը՝ ֆրանսերենի եւ երկրորդը՝ ռուսերենի ուսուցման համար:

Ընդհանրապես, Վարժապետանոցի ուսումնական ծրագրի հարցը առաջին իսկ օրից ՀԲԸ Միության ուշադրության կենտրոնում էր: 1911թ. ընդհանուր ժողովում հատուկ նշվում էր. «Ուսումնական ծրագիրը, որ Կ. Պոլսի մէջ մասնագետներու լանձնախումբի մը կողմէ պատրաստուեցաւ, հիմնուած է լուրջ եւ գործնական դաստիարակութեան մը վրայ, եւ բարեբախտաբար զերծ կացուցուած է խել մը խրթին եւ վերացական միջոցներէ՝ որ աւելի կը խճողեն տարրական ուսուցումը, փոխանակ անհկա ընելու միանգամայն դիրատար եւ օգտակար»:⁴⁵ Ավելի ուշ հրատարակված Վարժապետանոցի հայտագրում հստակ ձեւակերպված էր նրա նպատակը. «1. Երկրորդական կրթութիւն, նկատի ունենալով երկրին պետական կրթական օրէնքն ու պահանջները, 2. Տեսական ու գործնական մանկավարժութիւն, 3. Գիւղատնտեսական կրթութիւն, նկատի ունենալով երկրին մշակման եւ երկրագործական պահանջքները»:⁴⁶ Այլ կերպ ասած, Վանի Վարժապետանոցը, պատրաստելով երկու տարբեր մասնագետներ՝ ուսուցիչներ եւ գյուղատնտեսներ, դրանով իսկ սկսեց իրագործել Միության ամենակարեւոր նպատակը՝ օժանդակել հայ ժողովրդի մտավոր եւ տնտեսական զարգացմանը:

Հանուն ազգային նոր գոյակերպի

Նույն այդ տարիներին Միությունը հանդես եկավ մեկ այլ, ոմանց համար անսպասելի դերում: Բանն այն էր, որ նրա առաջնորդները, կարեւորելով բոլոր տեսակի, այդ թվում՝ իրենց իսկ կողմից իրագործվող ծրագրերը, միեւնույն ժամանակ եկել էին այն համոզման, որ հայրենաբնակ հայության առաջընթաց զարգացումը մեծապես պայմանավորված է ժողովրդի բարոյահոգեբանական առողջացումով, նրանով, թե կկարողանա արդյոք ժողովուրդը հաղթահարել, ազատվել իր նկարագրի այն բացասական հատկություններից, որոնք կիսաստրկական գոյավիճակի արդյունք էին վերջին մի քանի դարերի ընթացքում:

Ազգային գոյակերպի ինքնավերլուծության դժվարին, բայց եւ անհրաժեշտ օրինակներից էր Միք.Կյուրճյանի «Ինչ որ ունինք եւ ինչ որ կը պակսի մեզի» հոդվածը: «Ինչպէս կ'ըլլայ - հարց էր տալիս հեղինակը, - որ մտաւորական արտակարգ ձիրքերով օժտուած լինելով հանդերձ, մեծամասնութեամբ չյաջողածներու ժողովուրդ մըն ենք, ինչպէս որ ազգային-քաղաքական տեսակէտով գրեթէ միշտ ձախողած ազգութիւն մը եղած ենք»: Եվ ահա թե ինչպիսին է նրա պատասխանը. «Պատճառը ուրիշ բան չէ բայց եթէ մեր նկարագրի տկարութիւնը կամ չգոյութիւնը, մեր կամքին հիւանդութիւնը, անարիւնութիւնը, մեր կենսական կորովին աղքատութիւնը: ... Ի մեզ՝ մտաւորականին եւ բարոյականին միջեւ ներդաշնակութիւն, համերաշխութիւն չի կայ. առաջինը գերակշիռ է երկրորդի վրայ. աւելի ճիշտ պիտի ըլլայ ըսել թէ կ'իշխէ միահեծան: Միտքով զարգացած անհատներ շատ ունինք բայց միեւնույն ատեն նկարագրով կամ բարոյապէս զարգացած անհատներ շատ քիչ... Ասոր համար է որ հաւաքական, ընկերակցական կեանքի այնքան անյարմար ենք... Մեր խելացիութիւնը արդարեւ մեզի շատ շատ կրնայ տալ. լանձնապատասխանութիւն մը, ծայրահեղ հաւատք մը մեր կարծիքներուն ճշտութեանը, մեր անսխալականութեանը վրա, ինչ որ մեզ անկարող կը դարձնէ կարգապահ համերաշխ գործունէութեան եւ կը մղէ մեզ աւելի «գործ արելու»: Եթէ ունենայինք *նկարագրի ուժ, բարոյական զգացում*, պիտի գիտնայինք թէ ամէնէն գեղեցիկ յաղթանակները անոնք են գորս մարդ կը տանի ինքզինքին վրայ, իր անձնական գաղափարներուն, համակրութիւններուն եւ հակակրութիւններուն վրայ՝ ի սէր հասարակաց շահու մը, հանրային ձեռնարկի մը...»:⁴⁷

Սա միակ հոդվածը չէր տվյալ հարցի շուրջ. նույն 1912թ. ՀԲԸՄ-ի նորաստեղծ «Միութիւն» ամսագրի բազմաթիվ հոդվածներում սոցիալ-հոգեբանական, քաղաքագիտական, բարոյագիտական վերլուծության էր

ենթարկվում հայ ժողովրդի ու անհատի նկարագիրը: Ահա այդօրինակ հողավածներից մի քանիսի վերնագրերը. «Դեպի ազնուացում», «Ես-ի ըմբռնումը», «Հայուն միտքը», «Մեր նկարագիրը», «Գաւառի ցաւերէն» եւ այլն: Միության ուշադրությունը մնան հարցերի հանդէպ պատահական չէր. դրա անհրաժեշտությունը գիտակցում էին շատերը՝ թե՛ անհատներ եւ թե՛ որոշ ազգային կազմակերպություններ: Սակայն չափազանցություն չի լինի, եթէ ասենք, որ ՀԲԸ Միությունն այն քչերից էր, որ ոչ միայն խոսեց ու գրեց, այլեւ գործեց: Առաջին անգամ է, որ ազգային կազմակերպությունը հայտարարում էր, թէ «... իր կազմին ու գործելակերպին մէջ, չընդունիր ո՞ւրեք խտիր, ըլլա՛յ սեռի, ըլլա՛յ կրօնքի, ըլլա՛յ համոզումի: Ամէն հայ, առանց բացառութեան, կրնայ անդամ ըլլալ այն մեծ ընտանիքին, որ Հայկ. Բարեգ. Ընդհ. Միութիւն կը կոչուի, ո՛ր դասակարգին կամ կուսակցութեան ալ պատկանի: Միութիւնը մէկ պայման ունի՝ հայ ըլլալ»:48

Ժողովրդին միաբանելու, նրա ողջ ներուժը համազգային նպատակներին ծառայեցնելու սկզբունքի իրականացման օրինակ կարող է ծառայել Միության դիրքորոշումը հայ եկեղեցիների հանդէպ: XX դ. սկզբին, երբ հիմնադրվեց Միությունը, Հայ Առաքելական եկեղեցու կողքին գործում էին նաեւ Հայ Կաթոլիկ եւ Հայ Ավետարանական (թողոքական) եկեղեցիները:

Հայոց պատմության ամենակարեւոր թվականներից է 301թ., երբ Հայաստանում քրիստոնեությունը հռչակվեց պետական կրօն: Եթէ ընդունման պահին քրիստոնեությունը կոչված էր պաշտպանել հայերի ազգամշակութային անբողջականությունն ու յուրահատկությունը պարսկական մշակույթի կողմից սպառնացող հնարավոր ձուլումից, ապա հետագայում՝ պետականության կործանումից հետո, նա դարձավ ըստ էության ամենաազդու ազգապաշտպան միջոցը ընդհանրապէս: «...Հայոց ազգային եկեղեցին եղած է այն միակ յողակապը, որ Հայկայ սերունդին ցրուած մնացորդները կրցած է իրարմէ անքակտելի պահել, եւ իբրեւ մէկ ազգ պահպանել, ... եկեղեցւոյ շնորհիւ է, որ Հայութիւնը մնացած է իբր հատուկ եւ ինքնուրոյն մարմին մը, որ դարերու այլալուծեանց եւ արկածներու բռնութեանց ներքեւ ալ, ինքն իր մէջ շարունակելով միշտ նոյն մնացած է»:49 Մաղաքիա արք. Օրմանյանի այս խոսքերը ճշմարտացիորեն արտացոլում են Հայ Առաքելական եկեղեցու բախտորոշ դերը երկար դարերի ընթացքում, որի արդյունքում էլ հայերի ազգային ինքնագիտակցության մեջ հայ լինելը նույնացվեց Հայ Առաքելական եկեղեցուն պատկանելու հետ: Նման պայմաններում բնական է, որ դավանափոխությունը նույնիսկ քրիստոնեության համակարգում սկսեց դիտվել որպէս

ազգային շահերին, ազգամշակութային ավանդությանը հակառակ մի երեսույթ:

Հայ Առաքելական եկեղեցու հակադրությունը Հայ Կաթոլիկ եւ Ավետարանական եկեղեցիներին առավել հստակորեն դրսևորվեց XIX դ. առաջին կեսին, երբ Օսմանյան կառավարությունը կազմավորեց կաթոլիկների եւ ավետարանականների՝ բոլորովին անջատ եւ անկախ համայնքներ (միլլեթ): «Այս երկու անջատուած մասերը՝ քաթոլիք եւ փոթեւթեան հասարակութիւնները, թէպէտ հիմնապէս հաւատոյ դաւանութեան տեսակէտէն կազմուած էին առանց ցեղի կամ ազգի տարբերութեան, բայց երկուքն ալ մեծամասնութեամբ հայերէ կազմուած եղան, անջատուած հայ հասարակութիւններ ըլլալու չափ», - նշում է Մ. Օրմանյանը եւ այնուհետեւ այսպէս է արժեւորում նրանց դերը. «Մենք չենք վարանիր յայտարարել, որ եթէ այդ անջատումները մէկ կողմէ հայութիւնը տկարացուցին, անոր մէջ ներհակ շահեր ստեղծելով եւ միութեան ոյժը կտորտելով, միւս կողմէն անուղղակի կերպով Արեւմտեան աշխարհի հետ յարաբերութիւններն ընդարձակելու առիթ ընծայեցին, երբ տակաւին այդ յարաբերութիւնները շատցնելու միջոցները նուազ էին»:50

XX դ. սկզբներին հայ առաքելական, կաթոլիկ եւ ավետարանական համայնքները շարունակում էին գործել որպէս ինքնուրույն, իրարից անջատ միավորներ: Եվ չնայած հայ կաթոլիկ եւ ավետարանական համայնքների ընդհանուր թվաքանակը չնչին էր առաքելականի համեմատ, այնուամենայնիվ, եկեղեցական մնան պառակտումն ու փոխադարձ անհանդուրժողականությունը (իր ամենածայրահեղ դրսևորումներով) եւս մեկ լուրջ խոչընդոտ էր հավաքական ազգային գործունեության համար: Չպետք է մոռանալ, սակայն, որ արդեն XIX դ. երկրորդ քառորդին նշված անհանդուրժողականությունն ազգային կյանքում դեմ առավ բացասման մի այնպիսի լուրջ գործոնի, որպիսին էր դավանական հակասություններից վեր կանգնած համագործակցության գաղափարախոսությունը: Այն իր արտացոլումը գտավ, թեւէ ոչ տեսական ժամանակով, Կ.Պոլսի «Համազգայաց» ընկերության (1846-1852) գործունեության մեջ, երբ նշված նպատակի համար համախմբվել էին հայադավաններն ու հայ կաթոլիկները (այս փաստի վրա հեղինակի ուշադրությունն է հրավիրել պատմաբան Ալբերտ Խառատյանը):

Այս տեսակետից խորհրդանշական իմաստ էր ստանում այն, որ ՀԲԸ Միության հիմնադիրներից մեկը եղավ Յագոպ Արթինը՝ Կահիրեի հայ կաթոլիկ համայնքի առաջնորդը: Հետագա տարիների ընթացքում հայ եկեղեցական համայնքների համագործակցությունը եւ գործոն մասնակցությունը Միության գործունեությանը դարձավ իրականություն: 1912թ.

Ե. Աղաթոնը, հասկանալի հպարտությամբ ընդգծելով հայ իրականության համար այդ աննախադեպ երևույթը, նշում էր, որ Միությունը «...իր 100-ի մոտ մեծ ու փոքր մասնաժողովներում մէջ ունի կաթոլիկ եւ բողոքական վարիչներ: Գահիրէի Կեդր. Վարչ. Ժողովին երկրորդ ատենապետն է Վսեմ. Եագուպ Արթին փաշա, ինչպէս խորհրդականներէն մին է Տիար Տիրան Փիլիպոսեան, որ մեր գաղութին ականատր կաթոլիկներէն են. Հայէպի մասնաժողովին ատենապետն է Տոքթ.Օմարոնեան, Խարբերդի մասնաժողովին ատենապետն է Բրոֆ. Նիկ.Թէնէքէնեան, Սոֆիայի մասնաժողովին ատենապետն է Պատ.Օսովէրտեան, պատուական բողոքական հայեր: Վիեննայի մասնաժողովին ատենապետն է Գեր. Հ.Գաբրիէլ վրդ. Մէնէվիշեան, որ Միութեան վանքին էն նշանաւորներէն է: Այս թուարկումը երկար պիտի ըլլար, բայց յիշենք վերջապէս Կ. Պոլսի Մասնաժողովին գանձապետ Տ. Արտաշէս Հիւրմիզ, պատուական կաթոլիկ հայ մը եւ խորհրդականներէն Տ. Վահան Մատթէոսեան, սիրուած բողոքական հայ մը»:⁵¹

Այլադավան հայերի հանդէպ խտրականությունը մերժելու, նրանց բոլորին, առաջին հերթին՝ որպէս հայ ազգի զավակներ ճանաչելու սկզբունքի դրսեւորումն եղան ՀԲԸ Միության նպաստները կաթոլիկ եւ ավետարանական հաստատություններին: Այսպէս, 1912-1913թթ. ընթացքում նպաստներ էին հատկացվել Քեսաբի, Պիրենիքի հայ ավետարանական վարժարաններին, Քիլիսի, Պելլանի, Մերտիսի, Մարաշի հայ կաթոլիկ վարժարաններին, Վիեննայի Միութեան միաբանության Կարինի վարժարանին եւ այլն:⁵²

Հարկ է նշել, որ նշված ժամանակաշրջանում թե հայ կաթոլիկները եւ թե հայ ավետարանականները հանուն ինքնահաստատման ձգտում էին առավելագույն ընդօրինակել իրենց օտարազգի համադավանների հոգեւոր եւ աշխարհիկ արժեքները, ինչը, բնականաբար, խիստ բացասական էր ընկալվում հայերի բացարձակ մեծամասնության կողմից: ՀԲԸ Միության գործիչները քաջ գիտակցում էին այդ ամենը եւ իրենց մի շարք հրապարակումներով ձգտում էին «եղբայրութեան եւ համերաշխութեան զգացումներ» հաստատել երեք հարանվանությունների միջեւ: Այդ շարքի հոդվածներից ծրագրային նշանակություն եւ իմաստ ունեն էր Աղաթոնի վերոհիշյալ հոդվածը, ուր նա, դիմելով հայ առաքելականներին, գրում էր. «...սիրեցէք ձեր հայ կաթոլիկ եւ բողոքական եղբայրները, նոյն իսկ, եթէ անոնք ձեզմէ հեռու փախչին՝ դուք անոնց մօտեցէք. մի՛ մոռնաք որ միեւնոյն ազգին զուակներն էք»: Եվ շարունակում էր. «Լաւ գիտեմ որ կան քաղաքներ ուր հայ կաթոլիկը հայութիւնը չընդունիր, «Ես Լատին եմ, Հայ չեմ» կ'ըսէ. աստիկա սոգիտութեան հետեւանք է... այն կաթոլիկը որ իր

ազգային լեզուն կը խօսի եւ կը գրէ, միշտ հայ կաթոլիկ կը մնայ. բայց այն հայ կաթոլիկը որ հայերէն չի գիտեր, փոխանակ մինչեւ վերջը, որդոց որդի, հայ կաթոլիկ մնալու, իր պատկանած փարախէն կը բաժնուի շուտով եւ կ'օտարանայ, կը լատինանայ: Ո՞վ չի գիտեր Սուրիոյ լատինացած հայ կաթոլիկներու ցաւալի վախճանը. անոնք ամբողջ հայութեան համար կորսուած են»: Այնուհետեւ դիմում էր ավետարանականներին. «Իսկ դուք, մեր պատուական հայ բողոքական եղբայրները, դուք ձեր պապենական լեզուն կսիրէք ... բայց աստիկա բաւ չէ, սիրեցէք նաեւ ձեր լուսատրչական (առաքելական-էդ.Մ.) եւ կաթոլիկ եղբայրները, մոտեցէք անոնց... Ժողովարանէն դուրս հայու խտիր պէտք չէ գոյութիւն ունենայ: Մի մոռնաք որ ամէն բանէ առաջ հայ էք»:⁵³

Բնական է, որ Միության ձգտումը՝ որակապէս նոր փոխհարաբերություններ հաստատել հայ եկեղեցիների միջեւ եւ դրանով իսկ ապահովել ընդհանրապէս ողջ հայ ժողովրդի միասնականությունը, կապված էր մեծ եւ բազմաթիվ դժվարությունների հետ, որոնց հաղթահարումը ժամանակ էր պահանջում: Իսկ այն մի քանի տարիները (մինչեւ 1915թ.), որ հայերը շարունակեցին ապրել իրենց հայրենիքում, բնավ բավարար չէին այդ գաղափարների իրականացման համար: Ինչ վերաբերում է սփյուռքի հայությանը, ապա, ինչպէս դա ցույց կտրվի հետագա էջերում, բարեկամական եւ գործնական հարաբերությունները երեք հայ հարանվանությունների միջեւ, ի վերջո, դարձան հայ համայնքների բնութագրական հատկանիշներից մեկը:

ՀԲԸ Միությունը, իր առջեւ դնելով հայ մարդու նոր նկարագրի կերտման, խտրականության մերժման, հայ ժողովրդի մտավոր եւ նյութական կարողությունների համախմբման նպատակները, հանդես էր գալիս ոչ միայն որպէս զուտ բարեգործական կազմակերպություն, այլ նաեւ որպէս ռահվիրա՝ հայ ժողովրդի հոգեւոր նկարագրի առողջացման, բարելավման գործում: Իսկ թե որքանով արդյունավետ կլինէր Միության նման գործունեությունը՝ դա մեծ չափով կախում ուներ նրա տեղական մասնաճյուղերից:

Մասնաճյուղերն էին, որ, առաջնորդվելով «Միութիւնը զօրութիւն է» նշանաբանով, ամեն մի տվյալ վայրի, քաղաքի կամ երկրի հայության համար պէտք է ծառայէին որպէս օրինակ նման համազգային վարքագծի, համազգային մտածելակերպի: «Մասնաճիւղերը այն կազմն են որով Միութիւնը կապուած է հայ զանգուածին,-նշվում էր «Ոսկեմատեան»-ում,-անոնց միջոցաւ է որ ամէն անդամ կը զօդուի ընդհանուր ընկերակցութեան եւ, իր չափով, կ'օժանդակէ անոր բարձրագոյն իտէալներուն իրականացման... Ամէն մասնաճիւղ ազգային կորիզ մը եղած է, եւ անոր

մէջ իւրաքանչիւր անդամ՝ միութիւն (unite)՝ մը ընդհանուր միութեան (union) համար, օղակ մը որով զօդուած է նոյն իտեււները եւ նոյն սկզբունքները ունեցող իր հայրենակիցներուն, աշխարհի որ կողմն ալ գտնուին»:⁵⁴

Եվ հասկանալի է, թե որքան կարեւոր էին մասնաճյուղերի առաջնորդների եւ անդամների ճիշտ ընտրությունը, նրանց՝ Միության գաղափարներին նվիրվածության աստիճանը, նրանց անձնական նկարագիրն ու գործնական կարողությունները: Գիտակցելով հարցի կարեւորությունը՝ Միության ղեկավարությունը ձգտում էր մշտական կապի մէջ լինել մասնաճյուղերի հետ, ճիշտ ուղղություն տալ նրանց աշխատանքին, հաղորդակից դարձնել Միության գաղափարներին ու նպատակներին: Դա դժվար գործ էր՝ հաշվի առնելով թե տեղական մասնաճյուղերի օրեցօր աճող քանակը եւ թե նրանց գործառույթը հեռավոր վայրերում: Այդ առումով շատ կարեւոր եղավ ՀԲԸ Միության կենտրոնական վարչության որոշումը «Միութիւն» վերնագրով պաշտոնաթերթի հրատարակման մասին: «Միութիւն» ամսագրի առաջին համարը հրատարակվեց 1912թ. հունվարին, կահիրեում: Անդրանիկ համարի առաջաբանում Պողոս Նուպարը հատուկ նշում էր. «Միութիւնը» ...պիտի ըլլայ նաեւ տեղեկութեանց միջնորդ մը, Հայկական Միութեան անդամներուն ծանօթացնելու համար մեր ընկերութեան գլխաւոր գործողութիւնները. անիկա պիտի հրատարակէ անդամագրական ցուցակները, հաշուեկշիռները եւ այլն: Մէկ խօսքով, այս թերթը պիտի ըլլայ տեսակ մը միութեան գիծ՝ կեդր. վարչ. ժողովին եւ Միութեան անդամներուն միջեւ, որ այսպէսով մօտէն իրազեկ պիտի ըլլան իրենց ընկերակցութիւնը շահագրգռող բոլոր կարեւոր գործողութեանց: Հարկ է արդարեւ որ անոնք կանոնադրապէս իմանան ինչ որ պիտի կատարուի, մանաւանդ՝ գիտնան թէ մեր տրամադրութեան ներքեւ դրուած բոլոր հասոյթները ինչպէս կը գործածուին եւ վերջապէս՝ մեզի վստահած վարչութեան մասին տեղեկութիւն ստանան օրը օրին»:⁵⁵

Այս ձեւով է, որ նորաստեղծ ամսագիրը պետք է նպաստեր Միության ինքնահաստատմանը, խթաներ նոր մասնաճյուղերի ստեղծումը, նոր անդամների հավաքագրումը, նրանց բոլորի հավատարիմ եւ անշահախնդիր ծառայությունը Միության նպատակներին: Սակայն Միությունը, մտադիր չլինելով, ինչպէս նշվեց, սահմանափակվել լոկ բարեգործական գործունեությամբ, համապատասխան ձեւով էր պատկերացնում նաեւ իր ամսագրի անելիքները: «Գրագէտը շինարար ճշմարտութիւններն ու ստեղծագործ գեղեցկութիւնները պիտի տարփողէ հոս,- ասվում էր ամսագրի առաջին համարում,- հրապարագիրը հայ կեանքի խաղաղ

(! - էդ.Մ.) զարգացման երեւոյթները պիտի վերլուծէ եւ ընկերային-բարոյական բնաշրջանը պիտի ուսումնասիրէ, գիտնականը՝ տնտեսական, գիւղատնտեսական, առողջապահական ու այլ պիտանի գիտելիքներ պիտի սորվեցնէ ուսումնագործի շինականին... եւ ամենքը մէկ պիտի կազմեն հոգեցունց համերգը հայ մտքի եւ կեանքի վերածնութեան»: «Գրագէտների» համար այս ոգեւորիչ խոսքերից հետո հետեւում էր, սակայն, այժմեական հնչող զգուշացումը. «Գրական տիւրքանթիզմը մշակելու չէ որ պիտի ձգտին հոս բոլոր անոնք որ իրենց գրիչն ի սպաս պիտի դնեն «Միութիւն»-ին»:⁵⁶

Ահա նման կարեւոր եւ միեւնոյն ժամանակ տարբեր նպատակների պետք է ծառայէր «Միութիւն» պաշտոնաթերթը: Եվ սկսած առաջին իսկ համարից, ամսագիրը ապահովեց ՀԲԸ Միության կենտրոնի մշտական կապը անդամների հետ՝ տպագրելով բազմաթիւ պաշտոնական փաստաթղթեր (արձանագրություններ, շրջաբերականներ եւ այլն), անդամների, նվիրատուների ու բարերարների, մասնաժողովների վարչությունների ցուցակներ, նամակներ ու նմանատիպ այլ նյութեր:

Ծատ ավելի դժվար էր երկրորդ նպատակի իրագործումը եւ պետք է ենթադրել, որ ժամանակակիցներից քչերն էին հավատում, որ ամսագիրը կկարողանա պատշաճ մակարդակով քննարկել վերոնշյալ հարցերը: Բայց, ինչպէս այդ նույն առիթով գրել էր Պողոս Նուպարը, տաղանդները «...փառք Աստուծոյ, մեր ազգին մէջ չեն պակսիր»:⁵⁷ Ազգային նկարագրի տարբեր կողմերի վերլուծությանը նվիրված հոդվածների մասին արդեն խոսվեց, նշեմ միայն նրանց արդիական լինելը նույնիսկ այսօրվա ընթերցողի համար: Դրա հետ մեկտեղ, ամսագիրը, ինչպէս եւ խոստացվել էր, համարից համար տպագրում էր հատուկ հոդվածներ «Առողջապահական նօթեր», «Հողատնտեսական բաժին», «Մանկավարժին սիւնակը» խորագրերով: Այս հոդվածներում, որ նույնպէս գրված էին մասնագետների կողմից, գործնական տեղեկություններ եւ խորհուրդներ էին տրվում հատկապէս հայ գյուղացուն՝ նրա կենցաղը առողջացնելու, աշխատանքը առավել արդյունավետ դարձնելու նպատակով: Հարկ է նշել, որ այդ հոդվածները կարեւոր են այսօրվա պատմաբանի համար եւս: Նրանց շնորհիւ հնարավոր է դառնում բացահայտել XX դ. սկզբների արեւմտահայ գյուղացու առօրյա կյանքը, մասնավորապէս, ամենատարածված հիվանդությունները, օգտագործվող դեղամիջոցները, հողագործության եւ անասնապահության զարգացման աստիճանը եւ նման այլ հարցեր:

«Բարենորոգումների» հեռանկարը

1914թ. ապրիլին լրացավ ՀԲԸ Միության գոյության ութերորդ տարին: Նույն թվականի մայիսի 14-ին Կահիրեում հրավիրվեց հերթական Ընդհանուր Ժողովը, ուր ելույթ ունեցավ նախագահ Պողոս Նուպարը: Ժողովը ընթացավ խանդավառ մթնոլորտում՝ ՀԲԸ Միությունը դարձել էր հայկական ամենախոշոր բարեգործական կազմակերպությունը: Նա ուներ 142 մասնաճյուղ, որոնցից 59-ը գործում էին Օսմանյան կայսրության տարածքում (հիմնականում Արևմտյան Հայաստանում և Կիլիկիայում), 54-ը՝ ԱՄՆ-ում և Արգենտինայում, 25-ը՝ Եվրոպայում (Ֆրանսիա, Անգլիա, Իտալիա, Ռումինիա, Բուլղարիա, Գերմանիա, Օվեցարիա և այլն), 4-ը՝ Աֆրիկայում (Եգիպտոս, Եթովպիա և այլն), իսկ Միության անդամների թիվը կազմում էր 8533 մարդ: 1914թ. սկզբներին Միությունը ուներ 41 սեփական կրթական հաստատություն. Վանի Վարժապետանոցը, Տյորո-Յոլի Քելեկեան որբանոց-վարժարանը, Մյուֆարդինի Կեդրոնական բարձրագույն նախակրթարանը (հիմնվել էր 1913թ.) և 38 նախնական վարժարան, որոնցից 27-ը՝ Արևմտյան Հայաստանում և 11-ը՝ Կիլիկիայում: Միությունը իր դրամական միջոցների մշտական հավելմանը զուգընթաց, տարեցտարի ավելի խոշոր գումարներ էր հատկացնում տարբեր՝ կրթական, հողագործական, առողջապահական և այլ ծրագրերի իրագործման համար: Ըստ 1914-1915թթ. տեղեկագրի, սկսած 1906թ. և մինչև 1915թ. վերջը, Միությունը «...իբրև նպաստ գործածած է շուրջ մեկ միլիոն և 140.000 ֆրանք»:⁵⁸

ՀԲԸ Միությունը սերտորեն համագործակցում էր մի շարք ազգային կազմակերպությունների հետ՝ Միացյալ Ընկերություն, Դարոցասեր Տիկնանց Ընկերություն, Ազգանվեր Հայուհյաց Ընկերություն, Կահիրեի Միացյալ Որբախնամ Ընկերություն, Փարիզի Ուսումնասիրաց Ընկերություն, Պրովիդենսի Տաղմիսարի Ուսումնասիրաց Ընկերություն և այլն: Հայ Առաքելական, Կաթոլիկ և Ավետարանական եկեղեցիները ոչ միայն խրախուսում և օժանդակում էին Միության գործունեությունը, այլև հաճախ նախաձեռնում էին նոր մասնաճյուղերի կազմակերպումը, ինչպես Արևմտյան Հայաստանի և Կիլիկիայի գյուղական վայրերում, այնպես էլ արտերկրում: Միության հեղինակության մասին էր վկայում նաև օտարերկրյա նմանատիպ միությունների և դեսպանությունների կողմից ցույց տրվող նյութական և բարոյական օժանդակությունը:

Ժողովականների խանդավառությունն ու ոգեւորությունը ուներ ևս մեկ, այդ օրերին գուցե ևս առավել կարեւոր պատճառ: Դա 1914թ. հունվարի 26-ին (փետրվարի 8-ին) Ռուսաստանի և Թուրքիայի ներկայա-

ցուցիչների կողմից ստորագրված բարենորոգումների ծրագիրն էր, որը պետք է իրականացվեր Արևմտյան Հայաստանի 6 նահանգներում:

1912-1913թթ. Բալկանյան պատերազմներում պարտություն կրած Օսմանյան կայսրությունը ստիպված եղավ վերջնականապես և գրեթե ամբողջովին հետ քաշվել Եվրոպայից: Եվրոպայի մեծ պետությունների համար այլևս ակնհայտ էր Օսմանյան կայսրության հետագա քայքայումը: Բայց թե երբ և ինչպես կկատարվեր այդ քայքայումը, թե ազատագրված երկրները նրանցից որի ազդեցության տակ պետք է գտնվեին, այս և նման այլ հարցերի լուծումը կախում ուներ նույն այդ պետությունների քաղաքական և տնտեսական շահերից ու նպատակներից: Ռուսական կայսրությունը նույնպես ձգտում էր առավել մեծ օգուտ քաղել ստեղծված իրավիճակից: Հայտնի էր, որ Ռուսաստանի քաղաքականության գլխավոր նպատակներից էին Կ.Պոլիսը և Մեծ նեղուցները: Եթե սա հիմնադրապես էր, ապա այն իրագործելու միջոցներից մեկը, գուցե ևս ամենահարմարը Հայկական հարցն էր, որը դարձել էր Ռուսական կայսրության արեւելյան քաղաքականության կարեւոր խաղաքարտը, որը և նորից հրապարակ հանվեց 1912-1913թթ.: Արտաքուստ նախաձեռնող կողմը հայերն էին, որոնք Գեորգ Ե կաթողիկոսի և Կովկասի փոխարքա Ի.Վրոնցով-Դաշկովի միջոցով 1912թ. դեկտեմբերին դիմեցին Նիկոլայ II կայսրին, որպեսզի նա իր հովանավորության տակ առներ Թուրքիայի բազմատանջ հայ ժողովրդին: Միաժամանակ, եվրոպական երկրների աջակցությունը նույնպես ապահովելու նպատակով որոշվեց հատուկ մի պատվիրակություն ուղարկել Փարիզ, որը կաթողիկոսի առաջարկով գլխավորեց Պողոս Նուպարը:

Պողոս Նուպարի ընտրությունը, որպես Ազգային պատվիրակության նախագահի, պայմանավորված էր մի շարք հանգամանքներով: Լեւոն Չորմիսյանը այդ առիթով գրում էր. «Նախ իր հօր՝ Նուպար փաշայի անուան միջազգային համբաւը և հեղինակութիւնը, իբրև Եգիպտոսի վարչապետի: Ունեցած պատկառելի հարստութիւնը, որուն մէկ մասը ի պահանջել հարկին կրնար տրամադրել իրեն վստահուած պաշտօնին յաջող իրագործման: Երկրորդ՝ իբրև հիմնադիր և նախագահ Հայկական Բարեգործական Ընդհանուր Միութեան, որուն 1906-էն ի վեր կատարած բարեսիրական ձեռնարկները և իբրև անձեռնմխելի գումար պահած դրամագլուխը, հայ իրականութեան մէջ ամէնէն արդիւնատու կազմակերպութիւնը դարձուցած էին: Վերջապէս Եվրոպական - մասնատրաբար ֆրանսական և անգլիական - ելեմտական, տնտեսական, քաղաքական և մտատրական շրջանակներու հետ ունեցած ծանօթութիւնները և յարաբերութիւնները, որոնք կրնային մեծ չափով դիրացնել իր աշխա-

տանքները: Չուներ նաև անյարմարությունը թրքահպատակ կամ ուսահպատակ ըլլալու, հետեւաբար այդ երկու պետություններում հանդէպ այլ ազատ դիրք մը ճշդելու եւ այդ կերպով Եվրոպացիներու կողմէ իր անձին վրայ կասկածանք չհրաւիրելու առաւելությունը կը ներկայացներ: Պողոս Նուպար ճարտարագետ եղած է եւ վկայուած Բարիզի Ecole Central բարձրագոյն վարժարանէն եւ շինարարական ուշագրաւ ձեռնարկներ կատարած է Գահիրէի, Աղեքսանդրիոյ եւ ընդհանրապէս Եգիպտոսի մէջ: Միաժամանակ մտաւորական լայն եւ բազմակողմանի զարգացում ունեցած է, քաջահմուտ ֆրանսերէն եւ անգլերէն լեզուներու: Հիւրասիրած է, օրերով եւ շաբաթներով, Եգիպտոս այցելող քաղաքական դէմքեր, գրագետներ, որոնցմէ արժէ յիշել Բիէր Լօթին եւ Ժօրժ Քլեմանսօն: Այս վերջինն եւ Բուանքաւտի ու Վիքթօր Պէրաուի, ինչպէս նաև այլ անձնատրություններու հետ ունեցած լաւ յարաբերությունները դիւրացուցած են իր դիւանագիտական դիմումները»:⁵⁹

Իսկ ինչո՞վ էր պայմանավորված Պողոս Նուպարի համաձայնությունը՝ գլխավորել Ազգային պատվիրակությունը: Այս հարցը պատահական չէ, հաշվի առնելով, որ նա արդեն երկար տարիներ գիտակցաբար եւ հետեւողականորեն հեռու էր պահում իրեն՝ մի կողմ մնալով քաղաքական գործունեությունից: Անշուշտ, նա քաջ գիտակցում էր իր այն արժանիքներն ու կարողությունները, որոնք եւ պայմանավորել էին կաթողիկոսի ընտրությունը, անժխտելի էր նաև ազգին ծառայելու պատրաստակամությունը, որի ապացույցն էր ՀԲԸ Միության ստեղծումն ու գործունեությունը: Բայց կար եւս մեկ՝ անձնական բնույթի շարժառիթ: Ինչպէս վերը նշվել էր, ժամանակին մերժվել էր իր հոր՝ Նուպար փաշայի առաջարկը՝ գլխավորել Բելիլիի վեհաժողովին մասնակցող հայկական պատվիրակությունը: Եվ ահա՝ 35 տարի անց նման մի պատվիրակություն գլխավորելու առաջարկ էր արվում արդեն իրեն: Դրանով իսկ, հաջողության դէպքում Պողոս Նուպարի առաքելությունը, ամեն բանից զատ, կունենար որոշակիորեն անձնավորված խորհրդանշական իմաստ:

Կաթողիկոսի կոնդակը Պողոս Նուպարը ստացավ Փարիզում, որը եւ դարձավ Ազգային պատվիրակության կենտրոնատեղին: Նա անմիջապէս ձեռնամուխ եղավ պատվիրակության կազմակերպմանը, որին անդամակցեց իր հրավերով Միության եւս մեկ հիմնադիր անդամ՝ Յագուպ Արթինը: Պողոս Նուպարը բազմաթիվ հանդիպումներ ունեցավ տարբեր երկրների պետական գործիչների, ինչպէս նաև ֆրանսիական եւ անգլիական ազդեցիկ թերթերի խմբագիրների, անվանի գիտնականների եւ գրողների հետ: 1913թ. փետրվար եւ մարտ ամիսներին նա, որպէս պատվիրակության նախագահ, երկու ընդարձակ շրջաբերականներ ուղղեց

տարբեր երկրների դիվանագիտական ծառայություններին, որոնցում հիմնավորում էր բարենորոգումների ծրագրի իրագործման կենսական անհրաժեշտությունը թե հայ ժողովրդի եւ թե հենց իսկ եվրոպական պետությունների համար, հիշեցնելով, որ «...Պայքանեան պատերազմը ծագեցաւ Պելիլիի դաշնագրին Մակեդոնիոյ մասին արձանագրած 23-րդ յօդուածին անգործադրելի մնալուն հետեւանքով»:⁶⁰ Միեւնույն ժամանակ, գիտակցելով, որ եվրոպական պետությունները որոշակի վերապահություններ են մտնելում բարենորոգումների իրագործմանը, քանի որ դա կարող էր հանգեցնել հայկական շրջանների անջատմանը Թուրքիայից եւ միացմանը Ռուսաստանին, նա նույն 1913թ. հունիսին արտասանած իր մի ճառում վստահեցնում էր. «Մեր Ասիոյ հայրենակիցներուն բախտը կապուած է կայսրութեան բախտին հետ: Հայերը կ'ուզեն Օսմանցի մնալ, պայմանաւ որ յարգուի իրենց կեանքը, չբռնաբարուին իրենց կիներն ու աղջիկները, թալանի չտրուին եւ յափշտակուին իրենց ինչքը եւ կարեւան ապրիլ եւ աշխատիլ խաղաղութեան մէջ...»:⁶¹

Պողոս Նուպարի այս խոսքերը, կարծես, ուղղված էին նաև թուրքական իշխանություններին, որոնք խիստ անհանգստացած էին իրենց պարտադրած բարենորոգումների ծրագրով: Ռուսական ազդեցիկ «Նովոյե վրեմյա» թերթը դեռ 1913թ. մայիսին գրում էր, թե որքան ավելի տերությունները կանդեն բարենորոգումների կատարման վրա, այնքան ավելի իր հայրենիքի համար բարիք ցանկացող յուրաքանչյուր թուրք ավելի կճնշի եւ կկործանի հայերին:⁶²

Դեպքերի հետագա ընթացքը կանխելու, Թուրքիայի մէջ վստահություն առաջացնելու նպատակ ունեին նաև Պողոս Նուպարի հետեւյալ արտահայտությունները. «...Բարենորոգումներու գործադրութիւնը Հայկական նահանգներուն մէջ հարկատրապէս պիտի ստեղծէ իրաց նոր կացութիւն մը. թե՛ խղճալի եւ խոռվայոյզ վիճակին որ կը տիրէ այժմ, պիտի յաջորդէ ապահովութեան եւ ներքին հանդարտութեան թուական մը, թե՛ զեղծումները ու անարդարութիւնները վերջ պիտի գտնեն եւ Հայերը պիտի կրնան խաղաղութեամբ աշխատիլ եւ իրենց աշխատանքին պտուղը վայելել: ...Մեր հայրենակիցները՝ բոլոր օսմանցիներուն հետ համերաշխաբար՝ պիտի աշխատին բնական հարստութեանց զարգացումին եւ երկրին բարգաւաճումին, ու ատով իսկ ընդարձակ սահմանի մը մէջ պիտի աջակցին Պետութեան (այսինքն՝ Թուրքիայի- Էդ.Մ.) զօրացումին եւ վերականգնումին»:⁶³

1914թ. մայիսին կայացած ՀԲԸ Միության ընդհանուր ժողովում իր արտասանած ճառում նա ասում էր. «...Պետութեան վերականգնումին եւ ամրապնդումին համար մեր բարենորոգումներուն կարեւորութեանը գի-



Պողոս Լուսաթ



Ավրոիչ Մարկուտ



Տազարեք Տաղակարյան



Երվանդ Աղաթոն



Յազույա Արիին



Կարապետ Շերիտճյան



Գրիգոր Երիայան



Վազբել Լուպար



Վահան Մավեպան



Մկրտիչ Վնորանիկյան



Վանքի տեղական մասնաժողով, 1913թ.



Կենտրոնական Վարչական ժողով, 1925թ.
Ս շարք. Գ.Սինապյան, Գ.Լորրադունցյան, Պողոս Լուպար, Տ.Քելեկյան,
Ս.Պապաճանյան, Ա.Ճևլահիրճյան:
Բ շարք. Զարեհ Լուպար, Ա.Ավանյան, Լ.Կյունուշկերտյան, Տ.Կամսարական, (ձախից
եւ աջից Մ.Ջեքիմյան - հաշվակալ, Լ.Բաշալյան - ընդ. քարտուղար)
Բացակա են. եր. Աղաթոն, Տ.Փիլիպոսյան, Պ.Էսմերյան



Եզիպտոսի Երջանակային հանձնաժողով, Գ.Նասիխյան, Ջ.Չաբրը, Ա.Մարգարյան,
Պ.Սերովբյան, Գ.Ամիրջյան, Ա.Յյուրմյուզ, Տ.Յաճնյան



Կենտրոնական Հանդիմոնարանի տիկնանց հանձնախումբ (նստած, կենտրոնում
տիկին Նելզիգ Առաքել Նուպար), 1918թ., Կահիրե



Տյուրք-Յուլի որբանոց



Վանի վարժապետանոց



Գայուստ Կոյակենցյան



Զարեհ Նուպար



Միւլթյան կենտրոնատեղին եւ Նուպարեան Մատենադարանը, Փարիզ



Արշակ Գարապետյան



Կրթարշակատուներ, Բուենոս Այրես



Հալեպի տեղական մասնաժողով (կենտրոնում ատենապետ՝ Արմեն Մազլումյան)



Երվակայի կայսրի հայկական նվազախուժը (Արարատյան որբանոցի նախկին ֆանֆարի խումբը)



Ազատագրված որբերը Հալեպի Աշխատավոր սաների կայանում, 1920-ական թթ.



Երիտասարդաց լիգա, Ֆրեզնո, 1929թ



Դարձանատուն, Լիպազմա, 1920-ական թթ.



Որանոց, Սերսին, 1921 (կենտրոնում ավագ տեսուչ՝ Մարգարիտ Ծիզմենյան, Մամբրե Թ. Վարդ. Սիրունյան, Վերժին Աճեմյան)



Զորավար Անդրանիկի պատվարությունը Փարիզում
(կենտրոնում՝ Գրիգոր Նուբարյան)



Ներգաղթողների դիմապարտեր, Երևան, 1946թ.



Դարուկի Յակոբեան ծննդատուն, Երևան



Աղասի Խանջյան



Արամայիս Երզնկյան



Չայկազ Գարակոյզյանը եւ Ավետիք Իսահակյանը Նուպարաշենում



Սահակ Տեր-Գաբրիելյան



Արսեն Եսայան



Մարի Եուպար Ալմարուժարան, Երևան



Ալեք Մանուկյան



Բարեգործականի Տուն, Երևան



Ամենայն Հայոց Կաթողիկոս Վազգեն Ա., Մարի
և Ալեք Մանուկյանները



Ալեք Մանուկյանը և որդին
Ռիչարդ Մանուկյանը



Ա.Սանուկյան - Ս.Տեմիրճեան վարժարան, Կանդաղ Պարկ



Տեմիրճեան Կեդրոն, Բեյրութ



Մելգոնեան Կրթական Դասատուություն, Նիկոսիա



Մեղա եւ Սարգիս Տեմիրճեաններ



Գ.Յազուպեան Կեդրոն, Գամիշլի



Լեւոն Կ.Նազարեան Վարժարան, Բեյրութ



Նուպարեան-Մանուկեան վարժարան, Սոնտեվիդո



Կիրակնորյա դպրոց, Սոնտեվիդո



Միամեան բաժնետիրախումբ, Հալեպ



ՀԲԸՄ Կեդրոն, Կորդովա



Պողոս Գ Կարմիրեան վարժարան, Բեյրութ



Դարուիի-Յովակիմեան վարժարան, Բեյրութ



Ժիրայր Դանիելյան, Կարախա Նազարյան, Ուոմեն Կոլեժոյան



Մ.Սանուկեան վարժարան, Բուենոս Այրես



Փարեն եւ Ռեջինա Պազարեան վարժարան, Սան Պաուլո



Արարատ արուակը եւ 1915թ. ցեղասպանութեան զոհերի հուշարձանը, Բուենոս Այրես



Քլոբ Քլոբոլյան, Աննա Մանուկյան, Էդվարդ Մարտիրոսյան, Տորո Յոլքոնեյան, Դրաշ Դովնանյան



Առաջին պարահանդես, Սան Պաուլո



Համահայկական 2-րդ Մարզական խաղեր, 2001թ., Երևան



«Նուսե-ի» խմբագիր Անո Զանգալանի (նրկրորդ շարք, աջից նրբորոշ) մեծագույնը



Արմեն Քելպեր - Ալ. Մանուկյան վարժարան, Սունրեալ



Նուպար ամառային ճամբար, Նյու Յորքի նահանգ



ՀՀ Դեսպանատունը, Կահիրե



Թով և Ալբերտ Պոլաճյան



ՀԻԸՄ - ՀԵԸ սկաուտները, Գալեպ



Մ.Սանուկեան Վարժարան, Թեհրան



Երևանի ՆԱԲԱՐ-ի գլխավոր գրասենյակը




Լուիզ Մանուկյան Սիմոն



Պեդր Սերակյան



ՆԱԲԱՐ-ի նոր համալիրի բացումը, 2003թ., Հայեա (Սիրիայի Հրջան, Խանն, ատենապետ Պետրոս Պոլադյան, Հակոբ Տեմիրճյան, դոկտ. Զավեն Եվսյան)



ՆԱԲԱՐ-ի նոր համալիրը, Հայեա



Երիտասարդ պրոֆեսիոնալների 2002թ. հավաքը, Սան Ֆրանցիսկո



Focus - 2003 հավաքը, Մոմբեալ (ձախից աստիճանը) ԶԲԸՄ Կենտրոնական
Վարչության ժողովրդի տնօրեն Անիթա Անտրյան



Ասլաթ Եղևյա Նուրա Նուրախանյան, Բարդուղ



Ռիտա Բալյանը Ամստերդամի դատախազների ուսանողների հետ, Նյու Յորք




ԶԲԸՄ կրթաթղթակառու Լ.Սելբրոնյանը (Չայաստան), Բեննին համալսարան, Պեկին



Ալ Մանուկյան շարքարյա դպրոց, Փարիզ



Հայաստանի ֆիլիարմոնիկ նվագախումբը, ղիրիժոր Լորիս Եգնավորյան



Սուրբ Հակոբ, Գյումրի



Բարեգործական ճաշարան, Երևան

Գեղարվեստի զարգացմանը նպաստող միջոցառումներից մեկը էլ հայտնվեց 1994 թվականին՝ Հայաստանի Գեղարվեստի կենտրոնի ստեղծումը։ Կենտրոնի գործունեության շնորհիվ հայաստանյայցի արվեստագետները կարողացան ավելի արագ և արդյունավետ կապեր հաստատել հայաստանյայցի արվեստագետների հետ։ Կենտրոնի գործունեության շնորհիվ հայաստանյայցի արվեստագետները կարողացան ավելի արագ և արդյունավետ կապեր հաստատել հայաստանյայցի արվեստագետների հետ։

3

**ՈՐԲԱՆՆԱՄ ԵՎ ԳԱՂԹԱՆԱՄ
ԳՈՐԾՈՒՆԵՈՒԹՅՈՒՆԸ**

Մեր օրերի հայաստանյայցի արվեստագետները կարողացան ավելի արագ և արդյունավետ կապեր հաստատել հայաստանյայցի արվեստագետների հետ։ Կենտրոնի գործունեության շնորհիվ հայաստանյայցի արվեստագետները կարողացան ավելի արագ և արդյունավետ կապեր հաստատել հայաստանյայցի արվեստագետների հետ։

XX դարի կարևորագույն իրադարձություններից էին Առաջին և երկրորդ Համաշխարհային պատերազմները, որոնց տեղի ունեցան ընդամենը 21 տարի շրջանում։ Այդ երկու պատերազմների ընթացքում էլ տեղի ունեցան ցեղասպանություններ, որոնց զոհ դարձան պետականությունից զուրկ ժողովուրդներ։ Առաջին Համաշխարհային պատերազմի ընթացքում զոհը Թուրքիայի տարածքում ապրող հայ ժողովուրդն էր։

ԿՈՎԿԱՍԻ ԳԱԳՔԱԿԱՆՆԵՐԸ, ԿՄԱՆՎՈՐԱԿԱՆ ԶՈՒԿԱՏՈՆԵՐԸ

Հայերի մասին առաջին տպագրավայր լուրերը եկան Լովկասից, որ 1914թ. նոյեմբերին սկսվել էին ուսումնական գործողությունները Ռուսաստանի և Թուրքիայի միջև։ Ռուսական բանակի շարունակական հարձակումների ու նահանջների և թուրքական զորքերի կողմից խաղաղ հայ քնակության սպանությունների հետևանքով տասնյակ հազարավոր հայեր առանձնաձև շրջաններից սկսեցին խոճապարհաբար գաղթել դեպի Ռուսաստան։ Արևելյան Հայաստան։ Այդ դեպքերի ակնառեսն էր Տեր-տեղյանը տարիներ անց վերհիշում էր. «Ձմեռայ այդ ամառը օրերին, երբ մարդ չէր համարձակում տնից և քուրտու տակից դուրս գալ, երբ լառ հագնված զինուորներն անգամ դժարանում էին բուլեին դիմանալ, հայ ժողովուրդը խելակորոյս թողեց տուն ու տեղ, լծկան, ոչխար, եգ, սնունդաբլիթ և իր ոտաբորիկ ու սկուր բալիկների ձեռքը բռնած, բնաւոր թոշումի պես բռնեց գաղթի անծնապարտ ճամբան... Դեպի ո՞ր, ի՞նքը չգիտեր... Գի-

տեր միայն մի քան, որ պիտի փախչէր, թէկուզ մահուան գնով, կեանքի մի հասարակ ապահովութիւն ձեռք բերելու համար... Դժոխային տեսարան էր ներկայացնում գաղթի ճամբան... Երբ ոռու գօրքերի Սարիղամիշում շրջափակելու վտանգը կանխեց, մեր գօրքը նորէն հրաման ստացաւ շարժել դէպի առաջ: Ծամբին դէպի Ղարաքիլիսա մի ահաւոր տեսարան բացեց մեր առաջ: Ամբողջ ճանապարհը ծածկած էր մարդկանց սեւացած դիակներով, որոնք աչքները չուած դէպի երկինք, կարծես թէ անէծք եւ նզովք էին մրմնջում աշխարհին... Այդ մահասարսուտ պատկերը տեսնելուց յետոյ միայն ես հասկացայ թէ ինչո՞ւ երբ Հայաստան էինք մտնում, հայ ժողովուրդը սգաւորի պէս մեզ դիմաւորեց եւ ինչու չէր ուրախանում երբ մենք թնդացնում էինք օդը մեր հայրենաճրճէր գետով եւ ուռաներով...»:¹

Խիստ ծանր էր վիճակը եւ այն վայրերում, ուր ապաստանել էին գաղթականները: Իգդիրից ստացված հեռագրում ասվում էր. «Փախստականների եւ գաղթականների դրութիւնը անտանելի է դառնում: Ամէն օր գալիս են հազարներով, բոքիկ, մերկ ու քաղցած: Օգնութիւն չկայ, անապաստան եւ առանց հացի կտորի՝ դժբախտները մեռնում են փողոցներում: Մահը անողոք հնձում է իր մանգաղով մեծ թուղ մարդկանց, մահաւանդ երեխաների: Օգնեցէք, մարդ եւ դրամ ուղարկեցէք, օգնեցէք»:²

Իրավիճակը այնչափ աղետալի էր, որ Թիֆլիսում գաղթականներից օգնության նպատակով հիմնված Հայկական Կենտրոնական Նպաստից հանձնաժողովը ստիպված էր դիմել ՀԲԸ Միությանը: Նրա հեռագրում ասվում էր. «Թուրքիոյ պատերազմին հետեւանքով, շուրջ հարիւր հազար հայեր փախչելով Կովկաս գաղթած են: Կացութիւնը ծայր աստիճան ողբալի է: Ճուրտէն եւ անտաղութենէ բազմաթիւ մեռելներ կան: Մեր ժողովուրդն ազատելու համար առատաձեռն նպաստի պէտք կայ: Յանուն այդ մարտիրոսներուն, կը խնդրենք որ հանգանակութիւն մը կազմակերպէք...»:³

Այս հեռագիրը ստանալուն պէս, Միությունը 1914թ. դեկտեմբերին հրապարակեց «Ստիպողական կոչ արտասահմանի հայութեան ուղղեալ», ուր տեղեկացնելով ստեղծված տագնապալի իրավիճակի մասին՝ համոզում էր հայտնում, որ «...կարելի չէ իսկ երեսակալել թէ՛ պիտի գտնուի հայ մը, որ իր արեւակիցներուն դառն վիճակը ամոքելու քաղցր մխիթարութեամբ, զլանայ իր զոհողութեան բաժինը ներկայ ճգնաժամուն մէջ: Այդ վստահութեամբ է անշուշտ որ մեր Կովկասահայ անձնուէր հայրենակիցները, որ այս պատերազմին սկիզբէն ի վեր ոչ մէկ ծառայութիւն եւ օգնութիւն խնայեցին, այլ ընդհակառակը սիրայօժար նուիրուեցան ազգային դատին պաշտպանութեան, աղերսագին կոչում կ'ընեն, առաջին

անգամ ըլլալով, արտասահմանի հայութեան մարդասիրական զգացումներուն»:⁴ Իր հերթին, ՀԲԸ Միության Կենտրոնական Վարչական Ժողովը Պողոս Նուպարի եւ Յագոպ Արթինի նախագահությամբ անմիջապէս կազմակերպեց «Ընդհանուր հանգանակութիւն ի նպաստ Կովկասի գաղթականներուն», միեւնոյն ժամանակ հրահանգելով, որ այդ նպատակով հատուկ հանձնախմբեր կազմակերպեն նաեւ Միության բոլոր մասնաճյուղերը:

Դրա շնորհիվ մի քանի ամսվա ընթացքում հնարավոր եղավ Ամենայն Հայոց կաթողիկոսի հասցեով ուղարկել մոտ 60.000 ամեր. դոլարին համարժեք գումար: «Նկատի առնելով գաղթականներուն բաղդատաբար մեծկակ թիւը, աւելի քան 200.000 եւ անոնց ամենազգի պէտքերը, մանաւանդ ձմեռան եղանակին, - նշվում էր Միության տարեգրքում, - գրեթէ կաթիլ մը ջուր էր ատիկա, բայց մենք ուզեցինք մեր պարտականութիւնը կատարել, մեր միջոցներուն ներած չափով»:⁵

Կովկասի գաղթականներին ի նպաստ հանգանակությունը, որպէս այդպիսին, առաջինն էր ՀԲԸ Միության պատմության մէջ: Առաջին անգամ էր, որ Միությունը դիմում էր իր բոլոր մասնաճյուղերին եւ անհատ անդամներին Հայաստանի ժողովրդին օգնություն հասցնելու նպատակով: Հատկանշական է, որ թէ այդ հանգանակության եւ թէ Միության առաջին նպաստի (1906թ.) հասցեատերը երկու դեպքում էլ Կովկասի հայությունն էր: Մինչդեռ, ՀԲԸ Միությունը դեռեւս չէր հիմնել եւ որեւէ մասնաճյուղ Կովկասում, թեւ նրա ղեկավարությունը քաջ գիտակցում էր դրա կարեւորությունն ու անհրաժեշտությունը: Այդ անշտապությունը կամ, ինչպէս գրված էր 1935թ. «Ռեկեմատեան»-ում, «...գաղափարի քիչ քիչ հասուննալը...» պայմանավորված էր երկու հիմնական պատճառներով: Մեկն այն էր, որ Կովկասում տարիներ շարունակ հաջողությամբ գործում էին մի քանի բարեգործական կազմակերպություններ, որոնցից ամենակարեւորներն էին Բաքվի Մարդասիրականը եւ հատկապէս 1881թ. Թիֆլիսում հիմնված Կովկասի Հայոց Բարեգործական ընկերությունը: Տարբեր հայաբնակ քաղաքներում եւ գյուղական վայրերում գործում էին նրա շուրջ 50 մասնաճյուղերը, որբանոցը, դպրոցները, գյուղական գրադարան-ընթերցարանները եւ դեղարանները, աշակերտական ձրի ճաշարանը, տարբեր հիմնադրամները եւ այլն: Ինչպէս եւ ՀԲԸ Միության դեպքում, Կովկասի Բարեգործականի հիմնադիրներն ու ղեկավարներն էին ազգասեր մեծահարուստներ, մտավորականներ՝ Ալեքսանդր Մանթաշյանը, Ալեքսանդր Մելիք-Ազարյանը, Գաբրիել Սունդուկյանը եւ այլք: ՀԲԸ Միության իսկ գնահատականով՝ «...Ընկերու-

թեան գործունէութիւնը շատ բարերար-յաճախ նախախնամական եղած է Կովկասի մէջ, եւ որոշ չափով նաեւ թրքահայ տարրին»:⁶

Նման խոշոր բարեգործական կազմակերպությունների գոյության, իսկ մյուս կողմից՝ նորաստեղծ ՀԲԸ Միության սահմանափակ հնարավորությունների պատճառով էր, որ Կովկասում Միության մասնաճյուղեր հիմնելու առաջին քայլը արվեց միայն 1912թ. ամռանը, երբ Կովկասում ՀԲԸ Միության ներկայացուցիչ, «Մշակ» թերթի խմբագիր Համբարձում Առաքելյանը եւ Թիֆլիսում բնակվող մի քանի արեւմտահայեր դիմում են Կովկասի փոխարքա կոմս Վորոնցով-Դաշկովիին՝ Միության մասնաճյուղեր հիմնելու հարցով: Ստանալով նրա սկզբունքային համաձայնությունը՝ նախաձեռնող խումբը ձեռնամուխ է լինում երկար ժամանակ պահանջող պաշտոնական ձեւակերպումներին: Վերջապէս, 1914թ. Թիֆլիս է ժամանում Կովկասում լիազոր-արտփիրակ նշանակված Միության հիմնադիրներից Կ.Պոլսի մասնաճյուղի ատենադպիր Ն.Տաղավարյանը: Նա հարցի վերջնական լուծումից հետո պետք է հիմներ մասնաճյուղեր եւ հսկեր տրամադրված նպաստների բաշխմանը: Հունիսի 30-ին կոմս Վորոնցով-Դաշկովը ընդունում է Ն.Տաղավարյանին, որն էլ նրան է հանձնում Միության նախագահ Պողոս Նուպարի անունը: Հուլիսի 18-ին Ն.Տաղավարյանին ընդունում է նաեւ Գեորգ Ե Հայոց կաթողիկոսը, որը, շնորհակալություն հայտնելով հօգուտ Երեւանի աղետյալներին Միության կողմից տրամադրած 30 հազար ռուբլու համար, նաեւ պատրաստակամություն է հայտնում հատուկ կոնդակով դիմել Ռուսաստանի հայությանը՝ կոչ անելով նրանց սատարել ՀԲԸ Միությանը: Միության ղեկավարությունը մեծ հույսեր էր կապում Ն.Տաղավարյանի առաքելության հետ: «Թուրքիոյ հայաբնակ նահանգներուն Բարենորոգմանց ծրագիրը ընդունուած էր, խաղաղութեան, երջանկութեան ու բարգաւաճման նոր հորիզոններ կը բացուէին մեր ժողովուրդին առջեւ, եւ Միութիւնը արդարացի կերպով կ'ակնկալէր որ Կովկասի հայութիւնը իր լայն աջակցութիւնը բերէր՝ իրագործելու համար իր շինարարական ծրագիրները հայրենի հողին վրայ: «Տարակոյս չունիմ թէ,- կ'ըսէր Միութեան Հիմնադիր-Նախագահին բաց անակը,- Կովկասահայը՝ որ միշտ իր ուշադրութեան առարկայ ըրած է Հայաստանի տառապակոծ ժողովուրդին խղճալի վիճակը - ամէն առթիւ ազնուօրէն ցոյց տուած է իր ազգասիրութիւնը, պիտի չի զլանայ իր վեհանձն օժանդակութիւնը, որպէսզի կարենանք Միութիւնը ծառայեցնել իր ազգային բարձր նպատակին»:⁷ Սակայն սկսվեց Համաշխարհային պատերազմը, եւ Կովկասի փոխարքան հայտնեց Ն.Տաղավարյանին, որ Ռուսաստանի կառավարությունը, սկզբունքորեն համաձայն

լինելով Միության առաջարկներին, այնուամենայնիվ, նպատակահարմար է գտնում այն իրագործել պատերազմի ավարտից հետո միայն:

Միության կողմից կազմակերպված՝ Կովկասի գաղթականների և նպաստ հանգանակությունը անսպասելիորեն փակված հայտարարվեց 1915թ. մարտ ամսին: Այս առիթով «Միութիւն» պաշտոնաթերթում հրատարակվեց Պողոս Նուպարի շրջաբերականը, ուր նա, հայտնելով Միության երախտագիտությունը արդեն հավաքված գումարի համար, գրում էր. «Բայց այս գեղեցիկ արդիւնքին առջեւ, որոշուեցաւ փակել Միութեան կողմէ բացուած սոյն հանգանակութիւնը, նկատի առնելով որ ներկայ ծանր իրադարձութիւնները... պիտի հարկադրեն, ինչպէս պետք է նախատեսել, նորանոր գոհողութիւններ եւս. մանաւանդ որ բազմաթիւ նուիրատուներ, ինծի դրկելով իրենց նպաստները, ցաւ յայտնած էին որ բացուած հանգանակութիւնը միայն Կովկասի գաղթականներուն սահմանափակուած է, եւ այդ առթիւ՝ աւելի ընդհանրական հանգամանք ունեցող հանգանակութիւն մը բանալու գաղափարը կը թելադրէին ինծի»:⁸

Այս փաստաթուղթը ուշագրավ է մի քանի առումներով: Նախ, ո՞ւմ նկատի ուներ Պողոս Նուպարը, խոսելով «ցաւ յայտնած... բազմաթիւ նուիրատուների» մասին, որոնց կարծիքը այդչափ կարեւոր էր դիտվել իր կողմից: Այդ հարցի պատասխանը կարելի է գտնել ՀԲԸ Միության Ամերիկայի Ծրջանակային մասնաժողովի 1915թ. հունվարի կոչում, որը ուղղված էր տեղական՝ ամերիկյան մասնաճյուղերին: Այդ կոչում, համաձայնություն հայտնելով Կովկասի գաղթականների օգնության անհրաժեշտությանը, միեւնոյն ժամանակ նշվում էր. «...մենք չենք անտեսել ժամանակի բացառիկ պայմանները, որոնք ազգային շրջանակին մէջ նոր շարժումներու ծնունդ տուած են: Եվ սակայն, միեւնոյն առեւ, չենք կրնար, իբրեւ ՀԲԸ Միութեան պաշտօնական մարմին մը, անտարբեր մնալ մեր ազգակիցներու ծայրագոյն կարօտութեան առջեւ: ՀԲԸ Միութիւնը մարդասիրական կազմակերպութիւն մըն է, քաղաքական հանգամանք չունի, հետեւաբար անոր անդամները, թէեւ կրնան *անհատապէս* համակրիլ եւ նպաստիլ այս կամ այն քաղաքական ձեռնարկի՝ *հատաքապէս* (ընդգծումը՝ բնագրում - Էդ.Մ.) կը պարտին հաւատարիմ մնալ Միութեան բուն նպատակին...»:⁹

Ակամա հարց է ծագում, թե ինչ առիթով է հիշվում, որ Միությունը քաղաքական հանգամանք չունի եւ քաղաքական որ ձեռնարկին է վերաբերում խոսքը: Դրա պատասխանը հետագա տողերում է. «Մեր Կովկասի ազգակիցները վերջերս հիմնեցին երկու կեդրոնական մարմին. մեկը՝ կամատր գունդեր կազմելու, եւ միւսը՝ կարօտեալներուն օգնելու համար: Քաղաքական արդի պայմանները Ամերիկայի հայերուն վրայ ուրիշ

ինչ զոհողություններ ալ պարտադրեն՝ պատճառ չկայ որ մեր Թուրքիոյ եղբայրներն ու քոյրերը իրենց թշուառութեան մէջ լքուին, եւ ՀԲԸ Միութեան պէս համազգային կազմակերպութիւն մը իր բուն դէրին ու պաշտօնին մէջ թերանայ»։¹⁰

Ինչպէս հայտնի է, դեռեւս 1914թ. կեսերին ռուսական իշխանութիւններ ռուղակի եւ անուղղակի ցուցումների համաձայն որոշվել էր ստեղծել հայկական կամավորական զինվորական ջոկատներ, որոնք ռուսական բանակի կազմում պետք է կռվեին թուրքական բանակի դեմ: Հայ քաղաքական եւ հասարակական բոլոր ուժերը խիստ կարեւորում էին նման ջոկատների կազմավորումը, որոնց առկայությունը պետք է որ ապահովեր Անտանտի, նախ եւ առաջ Ռուսաստանի օժանդակությունը հայերի ազգային-պետական ինքնորոշման գործում: Դրանից մեկ տարի առաջ Պողոս Նուպարը Ֆրանսիայում Ռուսաստանի դեսպան Ա.Իզվոլսկուն հավաստիացնում էր. «...հայերը հույսը դնում են Ռուսաստանի հզոր օժանդակության վրա եւ հաստատապէս մտադիր են ամեն ինչում հետեւել ռուսական կառավարության ցուցումներին»։¹¹

Կամավորական ջոկատների ստեղծումը կապված էր բազմաթիվ դժվարությունների հետ. առաջին հերթին այն պահանջում էր դրամական մեծ միջոցներ եւ բնական է, որ Միության կողմից ձեռնարկված հանգանակության որոշ մասը հատկացվում էր նաեւ այդ նպատակին: ՀԲԸ Միության Ամերիկայի Շրջանակային մասնաժողովի կոչում հենց այս կամավորական ջոկատներին օժանդակելն էր դիտվում որպէս Միության կանոնագրին հակառակ քաղաքական գործունեություն: Դժգոհության հիմքում այն մտավայելությունն էր, որ օգնելով պատերազմական գոտուց կովկաս անցած գաղթածներին եւ հատկապէս ֆինանսավորելով կամավորական ջոկատները, Միությունը կամա թե ակամա անտեսում էր արեւմտահայերի հիմնական զանգվածի կարիքներն ու պետքերը: Առավել եւս, որ թե գաղթականներին եւ թե ջոկատներին օժանդակելու համար արդեն հիմնվել ու գործում էին հատուկ կազմակերպություններ: Միության Ամերիկայի մասնաժողովի նման միանշանակ դիրքորոշման համար կար եւ մեկ այլ պատճառ: Մի հայտնի չափով Սահմանադրական Ռամկավար եւ վերակազմվալ Հնչակյան կուսակցությունների անդամներից կամ համակիրներից քաղկացած Միության Ամերիկայի մասնաժողովի համար դժվար էր հաշտվել այն մտքի հետ, որ իրենց հանգանակած գումարները տնօրինելու էր կամավորական շարժման հիմնական կազմակերպիչ Դաշնակցությունը: Արդեն 1914թ. վերջին քաղաքական այդ երկու ուժերի միջեւ հակամարտության՝ նոր առիթ դարձավ կամավորական ջոկատներին ի նպատակ հանգանակվող գումարների բաշխման

եղանակի հարցը:¹² Պատահական չէ, որ Արշակ Չոպանյանը Ամերիկայի վերակազմվալ Հնչակյան կուսակցությանը ուղղած նամակում հատուկ շեշտում էր. «Ամենակարեւոր խնդիրը, որ մեր առջեւ կը պարզուի, հիմնական սուրբ պատերազմն է: Սուրբ պատերազմը, մենք բոլորս անով պէտք է հետաքրքրուինք: Միւս խնդիրները կարող ենք յետոյ կարգաւորել»։¹³

Պողոս Նուպարը ստիպված էր ընդունել, որ Ամերիկայի մասնաժողովի նման դիրքորոշումը ձեւական առումով հիմնավորված էր կանոնագրի կետերից մեկով, որի համաձայն Միությունը չէր կարող զբաղվել որեւէ քաղաքական գործունեությամբ, առավել եւս, նկատի առնելով Ամերիկայի մասնաժողովի ֆինանսական ներուժի բացառիկ կարեւորությունը: Այլ հարց է, թե որքանով էր նա համաձայն «քաղաքականություն» հասկացության նման մեկնաբանությանը: Հենց նշված հանգանակության կազմակերպման փաստն իսկ վկայում էր, որ հայերի համար բախտորոշ պատերազմի պայմաններում նրա պատկերացումները քաղաքականության, Միության գործունեության բնույթի մասին լրիվ այլ էին: Նա, անկասկած, համամիտ կլինէր այդ հարցում Բաբկեն եպ. Կյուլեսերյանի հետ, որը գրում էր. «Քաղաքական՝ չի նշանակել յեղափոխութիւն, կուսակցութիւն կամ դիւանագիտութիւն:

«Պէտք չէ բառերու հետ խաղալ: Բարեգործականը... ծնաւ մեր ազգին քաղաքական պէտքերէն եւ չի մոռնա՞նք որ հայրենիքի հողին պաշտպանութիւնը ձեռնարկ մըն է ազգասիրական, հայրենասիրական, քաղաքական... Բարեգործականը չի կրնար քարացած մնալ իր կանոնագրութեան բառերուն եւ բանաձեւերուն մէջ:

«Բարեգործականը մեր ազգային կեանքի այսօրուան պէտքերուն ալ պիտի ծառայէ, ինչպէս ծառայեց երէկ. պէտքեր, որոնք քաղաքական են:

«Հայ ժողովուրդին պահպանութիւնը քաղաքական գործ մըն է, որուն նուիրուած են բոլոր հայեր:

«Հայուն կրթական գործը քաղաքական է, վասն զի հայ քաղաքացին պիտի պատրաստենք հայու ազգային-քաղաքական կեանքին յարմար կրթութեամբ եւ դաստիարակութեամբ մը:

«Հայուն տնտեսական կեանքը քաղաքական է, վասնզի անկէ կախուած է Հայաստանի տնտեսագիտական յաջողութիւն...:

«Պէտք չէ՛ շփոթել քաղաքական գործերը դիւանագիտական գործերու հետ, յեղափոխական կամ կուսակցական գործերու հետ...:

Բարեգործականը, նոյնիսկ իր նպատակով եւ ցարդ իր յառաջ բերած արդեամբք, ազգին մատուցած է քաղաքական ծառայութիւն մը, եւ պիտի մատուցանէ, բայց չի միջամտեր դիւանագիտական գործերու»։¹⁴

Բարեկեն եպ. Կյուլեսերյանի այս վերջին դիտողության մեջ՝ ցանկության դեպքում կարելի է տեսնել ակնարկ Պողոս Նուպարի՝ որպես Ազգային պատվիրակության նախագահի, հասցեին: Սակայն դեռևս 1913թ., երբ Պողոս Նուպարը Հայոց կաթողիկոսի հրավերով նոր էր ստանձնել այդ պաշտոնը, տեսնելով տարբեր շահարկումները կամ «թիրիմացութիւնները», հանդես եկավ հատուկ հայտարարությամբ, որում նշում էր, որ Ազգային պատվիրակությունը բոլորովին անկախ է ՀԲԸ Միության «կազմէն եւ նպատակէն», եւ որ թե իր եւ թե Միության ուրիշ վարիչ-անդամների «...մասնակցութիւնը այդ Պատգամատրութեան՝ տեղի կ'ունենայ սոսկ անհատական պատասխանատուութեան տակ»:¹⁵

Պողոս Նուպարը 1915թ. մարտի 15-ի վերոնշյալ շրջաբերականը հրապարակելիս, պատրաստվում էր նորից մեկնել Փարիզ, ուր, որպես Ազգային պատվիրակության նախագահ, պետք է ներկայացներ եւ պաշտպաներ հայ ժողովրդի քաղաքական շահերը Անտանտի պետությունների առջև: Բնական է, որ նման պայմաններում նա չէր կարող ընդհանրապես հրաժարվել հանգանակության գաղափարից, որն ի դեմս իրեն, հայ ժողովրդի կողմից ստանձնած պարտավորությունների կատարման եզակի հնարավորություններից էր: Ուստի եւ նույն այդ շրջաբերականով նա հայտարարեց նոր՝ «Ազգային շահերու պաշտպանութեան» կամ «Ազգային հանգանակութեան» մասին: «Երբեք մեր պատմութեան մեջգրում էր Պողոս Նուպարը, - ասկէ աւելի նպաստաւոր պատեհութիւն մը ներկայացած չէ, եւ երբեք մեր ազգային ցանկութիւնները իրենց իրականացումին աւելի մօտ չեն գտնուած: Բայց անհրաժեշտ է ասոր համար որ ամէն մասնաւոր նախաձեռնութիւններ կեդրոնացուին Ազգային Ծահերու Պաշտպանութեան համար, որպէսզի կարելի ըլլայ անոնք համերաշխել ու այսպէտով ապահովել գործողութեանց միութիւնը»: Եվ ամենաուշագրավը՝ այս նոր հանգանակությունը ձեռնարկվում էր «...Հայկական Ընդհանուր Միութենէն դուրս, որովհետեւ հետապնդուելիք նպատակը այս բարեգործական ընկերութեան գործունէութեան սահմաններէն դուրս կը մնայ, այնպէս, ինչպէս որ իր Հիմնական կանոնագրին մէջ նախագծուած է»:¹⁶

Իր այս քայլով Պողոս Նուպարը, այնուամենայնիվ, փորձում էր միաժամանակ հանդես գալ երկու՝ ՀԲԸ Միության եւ Ազգային պատվիրակության նախագահների դերերում: Նա թե բավարարեց Միության որոշ շրջանակների պահանջները եւ թե շարունակեց հանգանակությունը, ավելին՝ հույս ուներ, որ այս նոր հանգանակությանը կարող էին մասնակցել ոչ միայն Միության անդամները, թեկուզեւ որպես անհատներ, այլեւ ողջ՝ հայությունը: Սակայն հայ իրականության համար ավանդական դարձած կազմակերպությունների փոխադարձ անվստահության ու հա-

կակրանքի պայմաններում միասնական, համախմբված գործելու փորձերը դատապարտված էին անհաջողության:

1915թ. մարտին, նույն կահիրեում հրատարակվող «Յուսաբեր» թերթը ոչ միայն հրաժարվեց տպագրել Պողոս Նուպարի շրջաբերականը, այլեւ մեղադրեց նրան, որ, փակված հայտարարելով ի նպաստ Կովկասի գաղթականների հանգանակությունը, նա իբր չի ցանկանում օժանդակել կամավորական շարժմանը, իսկ իր նոր՝ Ազգային հանգանակությամբ, ձգտում է անհնարին դարձնել որեւէ այլ հանգանակության կազմակերպումը: (Ծակատագրի ծաղրով 1910թ. «Լուսաբեր» անունով այդ թերթի հիմնադիրներից էր Սահմանադրական Ռամկավար կուսակցության հայտնի գործիչ, ԱՄՆ-ում ՀԲԸ Միության առաջին մասնաճյուղի հիմնադիր վահան Քյուրքճյանը: 1912թ. վերանվանվելուց եւ նոր հրատարակիչ ունենալուց հետո այն անցավ Դաշնակցության ձեռքը): Մեղադրանքները այնչափ ծանր էին եւ հնչեցին այնքան լարված մթնոլորտում, որ Պողոս Նուպարը՝ հակառակ մամանտիպ ելույթները անտեսելու իր սովորության, ստիպված էր հանդես գալ հատուկ շրջաբերականով: «...Ներկայիս դառնօրէն յուսախաբ եղայ տեսնելով որ Եգիպտոսի մեր հայրենակիցներուն միջեւ բաժանումներ գոյութիւն ունին, եւ թէ՛ ներկայ հանգանակութեան հակառակորդներէն ոմանք, անհասկանալի ընդդիմութեան ոգիով մը, մինչեւ իսկ արգելք հանդիսացած են որ Եգիպտոսի մէջ լոյս տեսնող հայ միակ լրագիրին մէջ հրապարակուի այն կոչը, զոր 15 մարտին ուղղեցի, միակ լրագիրին մէջ հրապարակուի այն կոչը, զոր 15 մարտին ուղղեցի, մեր Ազգային Ծահերուն Պաշտպանութեան յատուկ Հանգանակութեան ձեռնարկումին առթիւ: Ինձի հաւաստուեցաւ մինչեւ իսկ որ ջանք կըլլայ երկ/ընդ/դիմութիւն մը ստեղծելու, պնդելով որ հակառակ եմ օգնութեան ձեռք երկնցնելու անոնց որ կը կռուին Ռուսական բանակին կողքին ի վեր, Թուրքիոյ իրենց եղբայրներուն փրկութեան համար: Չեմ գիտեր թէ ինչ բանի վրայ կը հիմնուին ինձի այդպիսի մտածումներ վերագրելու համար, զոր ազդուապէս կը մերժեմ: Շրջաբերականիս մէջ չկայ բառ մը որ այդպիսի մեկնութեան մը թոյլատրել իրենք: Եթէ անոր մէջ յատուկ յիշատակութիւն մը չըրի մեր կամաւորներուն նկատմամբ, պատճառը այն է որ չէի ուզեր կոչիս ուրեւ մասնաւոր բնոյթ մը տալ, եւ որովհետեւ Ազգային Հանգանակութիւն մը պէտք է որ կարենայ յատկացուիլ ազգային ամէն տեսակ շահերու պաշտպանութեան գործին, առանց ուրեւ մասնաւորումի եւ խտրութեան»:¹⁷

Մինչ արտասահմանում հայ քաղաքական եւ այլ կազմակերպությունները զբաղված էին մամաօրինակ գործողություններով, Թուրքիայի ողջ տարածքով մեկ մեծ թափ էին առնում հայերի ցեղասպանությունն ու բռնազաղթը: 1915թ. հուլիսից հայտնի են դառնում սպանված հայ քա-

դաքական, մշակութային եւ եկեղեցական գործիչների անունները, որոնց մեջ զգալի թիվ էին կազմում նաեւ Միության տեղական մասնաճյուղերի ղեկավարներն ու անդամները: Առաջին նահատակների թվում էր նաեւ ՀԲԸ Միության հիմնադիր անդամ Նազարեթ Տաղավարյանը, որը, ինչպէս նշվել էր, 1908թ. Թուրքիա մեկնելուց հետո Կ.Պոլսում Միության մասնաճյուղի տնտեսադպիրն էր, միեւնույն ժամանակ, որպէս Թուրքիայի խորհրդարանի պատգամավոր, հետեւողականորեն պաշտպանում էր արեւմտահայերի շահերը: Ն.Տաղավարյանը մեծ թվով այլ մտավորականների հետ նահատակվեց Սեւերեկի մոտակայքում Դիարբեքիի նահապարհին, ուր նրանք իբր պետք է կանգնեին զինվորական դատարանի առջեւ: Ն.Տաղավարյանը, «...կասկածելով որ Միութեան ի նպաստ ունեցած գործունէութեանը համար պիտի դատեն զինքը, Հալէպի մէջ, ուր պահ մը կանգ առած էին, Միութեան Կանոնագիր մը եւ Տեղեկագիրներ ձեռք բերած էր, դատավարութեան ընթացքին անոր մարդասիրական եւ օգտակար նպատակը բացատրելու դիտումով...»:¹⁸

Պորտ Սայիդի վրանավանը

1915թ. սեպտեմբերին հայտնի դարձան Կիլիկիայի՝ մինչ այդ շատերին գրեթէ անհայտ Սուեդիայի շրջանում տեղի ունեցած որքան բաղձալի, նույնքան էլ անհավատալի դեպքերը: Տեղի վեց՝ Յողուն Օլուք, Հաճի Հապիպլի, Պիթիաս, Քեպուսիլե, Խըտըր-Պեկ եւ Վազըֆ գյուղերի բնակիչների մեծ մասը՝ մոտ 5000 հոգի, չենթարկվելով տեղահանության մասին թուրք իշխանությունների հրամաններին, բարձրանում են Մուսա լեռ եւ դիմում ինքնապաշտպանության: Երկու շաբաթ՝ օգոստոսի 7-21-ը, թուրքական կանոնավոր բանակը մի քանի անգամ փորձեց գրավել մուսալեռցիների դիրքերը, բայց, ի վերջո, ստիպված եղավ նահանջել: Այնուամենայնիվ, գիտակցելով, որ անհնար է երկար ժամանակ դիմագրավել թուրքական զորքին, մուսալեռցիները երկու մեծ պաստառ են սփռել ծովափնյա բլուրներից մեկի վրա, նրանց վրա խաչեր գծելով ու գրելով. «Քրիստոնյաները վտանգի մեջ են»: Սեպտեմբերի 5-ին պաստառները նշմարում են ֆրանսիական մարտանավից, որի հրամանատարը, տեղեկանալով հայերի դրության մասին, խոստանում է օգնություն հասցնել նրանց: Չորս օր անց թուրքերը վերջին անգամ եւ նորից ասպարդյուն փորձում են գրավել հայերի դիրքերը, իսկ արդեն սեպտեմբերի 13-15-ին տեղ հասած ֆրանսիական մարտանավերը, վերցնելով բոլոր մուսալեռ-

ցիներին, շարժվեցին դեպի Եգիպտոս՝ Պորտ Սայիդից քիչ հեռու՝ Լազարեթա կոչվող վայրը:

Այս վայրի ընտրությունը պատահական չէր. պատերազմից առաջ այն նախատեսված էր կարանտին անցնող ճամփորդների համար, ուստի այստեղ կար գործող հիվանդանոց՝ բժիշկների ու պաշտոնյաների համար իր հարակից շենքերով: Մուսալեռցիների տեղավորման գործը առաջին իսկ օրից ղեկավարեցին տեղի անգլիական զինվորական իշխանությունները, որոնց ջանքերի շնորհիվ կարճ ժամանակում այդ անապատային վայրում առաջացավ մի ամբողջ վրանավան: Ուշագրավ է, որ անգլիացիները վրանավանի կառուցվածքը համապատասխանեցրել էին գաղթականների նախկին բնակավայրերին: «Գնդապետ Բիլլըրսըն (Major Pearson), իր հրամանին տակ ունեցած քանի մը անգլիացի զինուորներու օգնութեամբ, մէկ օրէն միւսը հրաշք կը գործէր, այսօր քէմք-ը գիւղերու կը վերածէր, ու հետեւեալ օրը՝ գիւղերը զանազան բաժանումներու (section)՝ իւրաքանչիւրը 25-ական վրանով: A. եւ B. սէքսիօն-ները, օրինակի համար, Պիթիաս գիւղը կը ներկայացնէին, C. D. E. սէքսիօն-ները՝ Հաճի Հապիպլին ու այսպէս բաժանումները կը հասնէին մինչեւ S. գիւղը, Վազըֆ, Եօղուն Օլուք, Խըտըր Պեկ ու Քեպուսիլե գիւղերը իրենց որոշ տեղերը ունենալով ...Սուէտիոյ գիւղերը այժմ հոս փոխադրուած էին. պզտիկները խումբ խումբ կը խաղային իրենց գիւղերու սահմանները գծող լայն արահետներուն վրայ»:¹⁹ Պորտ Սայիդի վրանաքաղաքի մուսալեռցի բնակիչները թվով 4058 էին, այդ թվում, 4 տարեկանից ցածր՝ 427 երեխա, 4-ից մինչեւ 11-14 տարեկան՝ 508 աղջիկ եւ 628 տղա, եւ 14 տարեկանից բարձր՝ 1441 կին ու 1054 տղամարդ:²⁰

ՀԲԸ Միությունը, իմանալով մուսալեռցիների ժամանման մասին, նախ ցանկացավ կազմակերպել նրանց բժշկական խնամքի գործը, սակայն պարզվեց, որ այդ նպատակով Ալեքսանդրիայից եւ Կահիրեից արդեն Պորտ Սայիդ էին մեկնել Եգիպտոսի Հայ Կարմիր Խաչի կամավորները: Ի վերջո, Միության Կենտրոնական Վարչական Ժողովը որոշում է կազմակերպել մուսալեռցի երեխաների կրթական գործը եւ ասպահովել նրանց զգեստներով: Հոկտեմբերի 20-ին Պորտ Սայիդի մոտակա անապատային դաշտում, ուր հիմնվել էր մուսալեռցիների վրանային ավանը, տեղի ունեցավ Սիսուան վարժարանի հանդիսավոր բացումը, իր 25 վրան-դասարաններով եւ 1200 աշակերտներով:

Սիսուանը եղավ առաջին վարժարանը, որ ՀԲԸ Միությունը հիմնեց Հայաստանի եւ Կիլիկիայի սահմաններից դուրս, եւ որը գործեց Պորտ Սայիդի վրանավանում չորս տարի՝ մինչեւ 1919 նոյեմբերը: Այդ տարիների ընթացքում նրա աշակերտության ընդհանուր թվաքանակը կազմեց

10-19 տարեկան ավելի քան 1300 երեխա, իսկ մանկապարտեզ հաճախողներինը՝ 5-10 տարեկան շուրջ 1100 երեխա: Վարժարանում «երկսեռ աշակերտությունը տեղատրուած էր անգլիական կառավարութեան կողմէ տրամադրուած 25-ի չափ խոշոր վրաններու մէջ: Առանց նստարանի, յատակը երբեմն պարզ փսիայներով ծածկուած, երբեմն ալ առանց փսիայի, մէն մի վրան-վարժարանի մէջ ծալապատիկ կը նստէին 40-50-ի չափ առոյգ, մտացի փոքրիկներ»:²¹ Դասավանդվող հիմնական առարկաներն էին հայերեն, ազգային պատմություն ու աշխարհագրություն, իսկ բարձր դասարաններում՝ նաեւ անգլերեն եւ ֆրանսերեն: Արդէն նշվել էր, որ Կիլիկիայի մի շարք վայրերում հայերենը մոռացության էր տրվել, այդպէս էլ վրանավանի երեխաներից շատերը «...կը խօսէին անհասկնալի կործալեզու գաւառաբարբառ մը՝ թուրքերէնի ու արաբերէնի խառնուրդով»:²² Այդ երեխաների համար վարժարանում կազմակերպվեցին հատուկ դասարաններ, եւ շատ չանցած նրանք սկսեցին խոսել եւ գրել մաքուր հայերենով: Գաղթականացի պաշտոնյաներից մեկը վկայում էր. «Եթէ յետադարձ ակնարկ մը նետենք ու ուշի ուշով քննենք «Սիսուան»-ի չորս տարուայ կեսերը, այն ատեն պիտի տեսնենք որ գաղթավայրի վարժարանը կրցած է իր վրայ դրուած յոյսերը - եթէ ոչ բոլորովին գէթ կիսովին - իրականացնել, սորուեցնելով մեր տարագիր փոքրիկներուն հայ լեզուն: Ամէն անոնք որոնք այցելած են այս ժողովուրդին հոս ժամանած ատեն եւ կամ անկէ յետոյ, անոնք չեն մոռցած այն պատկերը զոր կը ցուցադրէին հալածական այս բեկորները: Սուէտացի մանկտին այսօր կը վերադառնայ իր հայրենիքը, բաւական ծանօթացած ըլլալով իր մայրենի լեզուին...»:²³ Վարժարանի կարեւոր առանձնահատկություններից էր այն մեծ ուշադրությունը, որ հատկացվում էր երեխաների ֆիզիկական, մարզական դաստիարակությանը, ինչի ապացույցներից էին Արտավազը, Ծանթը, Սիսուան ֆուտբոլային թիմերը:

Նշված առարկաներից բացի, վարժարանում գործում էին բարոյագիտական դասեր, լրագիտական ընթերցումներ, փողային նվագախումբ, կազմակերպվում էին ազգային եւ դպրոցական հանդեսներ, որոնց շնորհիվ «...երբեմն կոուազան ու այլամերժ բնագոյներուն տեղ անոնք որդեգրած են քաղքենի բարեկրթութիւն մը, որ դիւրավ յայտ կը բերէ ցեղին թաքուն ընդունակութիւնները եւ տոհմային դաստիարակութեան բարեբար ազդեցութիւնը»:²⁴ Վարժարանի տնօրինությունը սաների համար կազմակերպեց նաեւ հատուկ արհեստանոց՝ առաջնադասության, կոշակակարության, դերձակության ու երկրաչափության ճյուղերով, իսկ աղջիկների համար՝ ձեռագործի, կար ու ձեփ, առունիկ տնտեսության դասեր: Այս ձեռնարկների դերը դժվար է թերագնահատել, քանզի ձեռք բերած

մասնագիտությունների շնորհիվ է, որ մի քանի տարի անց այդ երեխաները, հայտնվելով աշխարհի տարբեր երկրներում, կարողացան սեփական ուժերով հայթայթել օրվա ապրուստը:

1917թ. հուլիսին անգլիական սպաների օժանդակությամբ եւ գլխավորությամբ հիմնվեց վարժարանի «հայ-արիներու Սիսուան Պոլ-Սքաուր» կազմակերպությունը, որի շարքերում ընդգրկվել էր շուրջ 210 աշակերտ: Մուսալեռցի այս տղաները, ինչպէս եւ ընդհանրապէս գաղթականացի չափահաս երիտասարդները, որոշ ժամանակ անց կազմեցին Արեւելյան (Հայկական) Լեգեոնի կորիզը: Հայկական Լեգեոնի ստեղծումը արդյունք էր այն բազմաթիվ բանակցությունների, որ տեղի ունեցան Ազգային պատվիրակության եւ Ֆրանսիայի ու Անգլիայի կառավարությունների ներկայացուցիչների միջեւ: Այստեղ արժե վերհիշել երկու կողմերի ստորագրած բանաձեւի հիմնական կետերը, որոնք հասկանալի են դարձնում թե հայ երիտասարդության գործուն մասնակցությունը եւ հավաքագրվելը Լեգեոնի շարքերը եւ թե այն դառն հիասթափությունը, որ ապրեցին նրանք եւ ողջ հայությունը, երբ 1921թ. վերջին ազատագրված Կիլիկիան հանձնվեց Թուրքիային. «Ա. Արեւելեան Լեգեոնի կազմութիւնով հայ զինուորները պիտի մասնակցին զինուորական գործողութեանց եւ Դաշնակիցներու յաղթանակին մէջ պիտի ունենան գործոն բաժին, ի փոխարէն պիտի ստանան որոշ երաշխիք Կիլիկիոյ ազատագրութեան եւ Հայոց ազգային բաղձանքներու իրականացման համար, Բ. Հայ Լեգեոնականներ միայն թուրքին դէմ պիտի կռուին Պաղէտիսիտեան ճակատին վրայ ու եթէ հարկ ըլլայ Հայկական Լեգեոնը կորիզը պիտի կազմէ ապագայ հայ բանակին Կիլիկիոյ եւ գրաւուած ուրիշ հայկական հողամասերու մէջ»:²⁵

Եվ երբ սկսվեց Արեւելյան Լեգեոնի կազմավորումը, Պորտ Սայդոսում հաստատված մոտ 600 հայ երիտասարդներ, այդ թվում նաեւ Սիսուան վարժարանի արիները, անմիջապէս համալրեցին նրա շարքերը: «Իրենց տունն ու տեղը, լեռներն ու դաշտերը, այգիներն ու պարտէզները, դպրոցներն ու եկեղեցիները թշնամիին ձեռքը թողուցած Սուէտացիները չէին կրնար հաշտուիլ այդ անբարոյական բռնաբարումին հետ: Չէին կրնար հաւատալ որ ռճրագործը յափտեանս անպատիժ կրնար մնայ: Չէին ուզէր, սակայն որ այդ պատիժը ուրիշին ձեռքով մատուցուէր: Իրենք պէտք է ըլլային հայ ցեղի դահիճներուն դահիճները: Վրէժը ուրիշ կերպով բաւարար ու բնական հատուցում չէր գտներ: Սպասեր էին անոնք առաջին պատեհութեան կրկին անգամ կրկէս իջնելու իրենց թշնամիին դէմ... Պէտք էր պատրաստուէին իբր զինուոր կռուելու, ու այդ պատեհութեան առիթը չուշացաւ»:²⁶ 1918թ. սեպտեմբերի 19-ին տեղի ունեցավ Արարա-

յի (Պաղեստին) ճակատամարտը, որի ընթացքում դաշնակիցների բանակի մաս կազմող Արևելյան Լեզեոնի մուսալեոցի, ինչպես նաև ամերիկահայ, եգիպտահայ եւ այլ մարտիկները ջախջախիչ արարության մասնեցին թուրքական բանակին: Այս հաղթանակից հետո է, որ Արևելյան Լեզեոնը կոչվեց նաև Հայկական Լեզեոն եւ այդ անվան տակ շարունակեց իր հաղթանակների շարքը արդեն Կիլիկիայի տարածքում:

Մինչ այդ, 1918թ. մայիս-հունիս ամիսներից՝ դաշնակիցների գործերի կողմից գրավված Հորդանանի, Միջագետքի, Սիրիայի տարածքներից Պորտ Սալիդի վրանաքաղաք սկսեցին տեղափոխվել հազարավոր հայ տարագիրներ, ինչի արդյունքում այստեղ ապաստանածների քանակը հասավ շուրջ 9000-ի, այդ թվում մինչև 12 տարեկան մոտ 2000 երեխա: «Կիլիկեցի ու այլ գաղթականներու, մեծ մասով թրքախօս եւ արաբախօս գաւակներու յաւելումով,- նշվում էր վարժարանի տնօրեն Մ.Ժամկոչյանի տեղեկագրում,- ընդհանուր աշակերտութեան թիւը բարձրացաւ 2345, մեջը չլլայով որբերը...»:27 Վարժարանը, որը 1917 թվականից տեղավորված էր նորակառույց եղեգնապատ շենքերում, այնուամենայնիվ, ի վիճակի չէր ընդունել այդչափ մեծ թվով երեխաներ, ուստի եւ Կրթական հանձնախումբը ստիպված եղավ լրացուցիչ առաքել խոշոր վրաններ:

Երեխաների մեջ մեծ թիվ էին կազմում որբերը, որոնց խնամքը կազմակերպելու նպատակով ՀԲԸ Միությունը հիմնեց հատուկ որբանոց: 1919թ. սկզբներին որբանոցում կար շուրջ 400 երեխա, որոնցից 90-ը դարձան Սիսուան Պոյ-Սքաութի անդամ, իսկ նրանցից չափահասները սկսեցին հաճախել վարժարանի արհեստանոցը: Անդրադառնալով որբանոցի գործունեությանը՝ վրանավանի պաշտոնյաներից Մ.Սալբին գրում էր. «...անուրանալի էր որ Որբանոցը իր օգտակարությունը ունեցաւ, եւ այդքան ծախքերէ վերջ տարբեր տեսակ ալ կարելի չէր որ ըլլար: Առաջին եօթը ամիսներու անկերպարան վիճակէն, աշակերտական ըմբոստություններէն, տակնուվրայություններէն վերջ, հետզհետէ աւելի կարգի կանոնի մտաւ: Համակրելի երիտասարդ վարդապետը՝ Մամբրէ Սիրունեան... կարգուեցաւ մնայուն տեսուչ, եւ տիկին Մաքրուհի Նետուրեան իբր տեսչուհի, որ գաղթավայրէն քիչ անգամ բաժնուեցաւ: Ուսուցչական պարտանանաչ երիտասարդներու խումբ մը զօրավիզ եղան տեսուչին եւ իրենց կարելին ըրին որբերուն օգտակար ըլլալու համար... Անոնք ոչ դրամ խնայեցին եւ ոչ ալ դժուարություններու առջին կեցան նպատակին հասնելու համար... Բայց երբեք չկրցան հասցնել բաղձացուած բարձրութեան: Ապերախտ գետնի մը վրայ կը գործէին, աւազի վրայ կայուն եւ բարգաւաճ բուրաստան մը չէր կրնար դալարիլ»:28

ՀԲԸ Միության հիմնած երկրորդ նոր հաստատությունը՝ Պորտ Սալիդի այրիանոցն էր, ուր տեղավորվեցին Բաղդադից եւ այլ վայրերից փոխադրված թվով շուրջ 90 հայ այրիներ ու աղջիկներ՝ «...շատերը իրենց թուրք դահիճներուն կամ արաբ պաշտպաններուն ձեռքէն խլուած...»:29

Պորտ Սալիդի գաղթակայանում գործող Սիսուան վարժարանը, որբանոցը եւ այրիանոցը եղան ՀԲԸ Միության արտերկրում հիմնադրած առաջին հաստատությունները, որոնց գործունեության ապահովումը կապված էր մեծ դժվարությունների հետ: Դժվարությունները, անշուշտ, անպակաս էին նաև նախորդ տարիներին, երբ Միությունը տարբեր ձեռնարկներ էր իրականացնում Հայաստանում եւ Կիլիկիայում, ուր, սակայն, տեղի հայ բնակչությունը, եւ առաջին հերթին Միության մասնաճյուղերը, մեծապես օժանդակում էին հաստատությունների ստեղծմանն ու գործունեությանը: Հակառակ դրա, վերոհիշյալ երեք հաստատությունները հիմնվեցին օտար երկրում, հայ բնակչությունից զուրկ, անապաստում տեղավորված գաղթակայանում: Միությունը պետք է հոգար ոչ միայն դասագրքերի, գրեական պիտույքների համար, ոչ միայն պետք է գտներ որակյալ տեսուչներ ու ուսուցիչներ, այլև պարտավոր էր հայթայթել երեխաներին ամենաանհրաժեշտ իրեր: Անապատի պայմաններում չափազանց դժվար էր պատրաստել նույնիսկ հասարակ մի գրասեղան՝ համապատասխան որակի փայտ չլինելու պատճառով: Բայց ամենաբարդը գաղթակայանում ապաստանածների հագուստի հարցն էր, ինչի մասին էր վկայում Կահիրեում հատուկ՝ Հանդերձարանի Տիկնանց Կենտրոնական Հանձնախումբի ստեղծման փաստը: Հանձնախումբի ատենապետուհի տիկ. Նելզիգ Առաքել Նուպարը հայությանը ուղղած իր անդրանիկ կոչում գրում էր. «Ձմեռ է եւ հազարաւոր աղէտեալներ, մեր եղբայրները, մեր քույրերը, ծերեր ու հիւանդներ, հարսեր եւ որբեր, մե՛րկ են, գրեթէ բոլորովին մերկ... Մարդկային զգացումը եւ ազգին պատիւը կը պահանջեն որ անոնք հագուեցնենք»:30 Արձագանքելով այդ կոչին՝ եգիպտահայ կազմակերպություններն ու անհատ մարդիկ սկսեցին մեծ քանակով հագուստ եւ տարբեր տեսակի կերպասեղեն ուղարկել Հանձնախումբի հասցեով: Սակայն կերպասեղենը դեռևս հագուստ չէր, եւ Հանձնախումբը իր հերթին հիմնեց կարի աշխատանոցներ, ուր կարվում էին տարբեր տեսակի հագուստներ երեխաների եւ մեծերի համար: Եվ չնայած մեծ թվով եգիպտահայ կանայք ձեռնամուխ եղան այդ աշխատանքին, այնուամենայնիվ, կար անող մարդկանց պակասը միշտ զգացնել էր տալիս իրեն: Այդ տարիների «Միություն» ամսագրի տարբեր համարներում կարելի էր հանդիպել «Գունէ կարեցէք» վերնագրով այսպիսի հայտարարություններ. «Հանդերձարանի Տիկնանց Կեդր. Ծանձնախումբը կը ծանուցանէ թէ

ներկայիս պետքերը ծայրաստիճան բազմապատկուած, որով եւ աշխատութիւնները տարապայման շատցած ըլլալուն, Կեդր. Հանդերձարանի աշխատանոցը այսուհետեւ ամբողջ օրը բաց պիտի ըլլայ, եւ թախանձագին կը խնդրէ որ, ի սեր նոր ազատագրուած մեր հազարաւոր սիրելի տարագրեալներուն եւ որբերուն, սրտցաւ հայուհիներ դիմեն եւ կարի գործերով զբաղին»։³¹

Պատերազմը մտնելուն էր ավարտին: Անտանտի գորքերը շարունակում էին իրենց հաղթական գործողությունները Օսմանյան Թուրքիայի տարածքում: Ազատագրված շրջաններից նորանոր տեղեկություններ էին հասնում վերապրած հայ տարագիրների մասին, որոնց օգնության հասնելու համար հարկավոր էին թե մեծ միջոցներ եւ թե անձնվեր գործիչներ: Այսպես, Մեդյալ ծովի (Պաղեստին) շրջակայքում գտնվող Թաֆիլե բնակավայրը գրավելուց հետո հայտնի դարձավ այնտեղ գտնվող մի խումբ հայերի մասին. «Տասը հազարոց կարաւանէ մը – մեծ մասամբ Կիրիւնցի եւ մնացեալը Մարաշցի, Հանընցի, Տէօրթ–Եօլցի, Կեսարացի եւ Մէրտինցի – հազու 2.800 հոգի ամիսներու տառապանքներէ վերջ յաջողեր են Թաֆիլե խրի, 1915 Հոկտեմբերին, եւ ասոնցմէ ալ միմիայն 900 հոգի ողջ մնացեր է»: «Միութիւն» ամսագիրը մեջբերում էր «անհրաւարտալի եւ աներեւակայելի դրուագներ» այդ խմբի պատվիրակի պատմածից. «Հայ երիտասարդ կեանքի մը գինը հացի փշրանք մը միայն կ'արժէ, որուն սիրոյն քանի՛ քանիներ արար տուներու առջեւ «խուպուս», այսինքն հաց աղաղակելով, անտուաղ իրենց վերջին շունչը աւանդեցին: Եվ քանի՛ քանի կոյսեր գարիէ չոր հացի մը պետքէն մղուած գազաններու քմահաճոյքին տակ փճացան: Ու քանիներ ալ, սովամահ, իրենց սրտին պտուղները, իրենց ամենասիրելիներն անգամ հացի փոխարէն զոհեցին... Ծատեր, աւա՛ղ, անոր կարօտով իրենց ինքնութիւնը իսկ ուրացան: ...Հրէշները արգիլեցին մեզ պարտէզները երթալէ իսկ, բնութեան բոյսերէն եւ անարժէք խոտերէն ալ մեզ զրկելու համար: ...Ի՞նչպէս պատմենք ձեզի, դիակները անթաղ քանի՛ օրեր փողոցներու մէջ փտտեցան եւ գանկեր, տակաւին մազի խոպոպիկները ճակտին վրայ, կենդանիներու սմբակներու տակ փշրուեցան: Անջատուած սրունգներ եւ բազուկներ գազաններուն խնջոյքը եւ շուններուն պարը եղան, ...շատեր իրենց մեռելին հետ 3-4 օր պտկեցան, գայն թաղող մը չի գտնելով ...»: Տեղեկանալով այս խմբի մասին՝ ՀԲԸ Միության «...Կեդր. Հանդերձարանի Տիկիները, աշխատակցութեամբ Գնմանց եւ Առաքմանց Յանձնախումբի ժրաջան անդամներուն, 11 հակ բողոքովին նոր ճերմակեղէն ու կերպասներ ճամբայ հանեցին: Նոյնպէս Եգիպտահայ Նպաստամատոյց Յանձնաժողովը 6000 քիօյի չափ զանազան անհրաժեշտ ուտեստեղէններ դրկեց Թաֆիլէի

տարագրեալներուն համար, ՀԲԸ Միութեան միջոցաւ»։³² Նույն այդ օրերին է, որ ՀԲԸ Միության փոխատենապետ Յագուպ Արթինը, լինելով ծանր հիվանդ, իր վերջին շրջաբերականում, խոսելով ազատագրված որբերի մասին, գրում էր. «Այդ բեկորներով է որ Հայաստանը պիտի վերականգնի: Եթէ անոնք կրցան ճողոպրիլ թուրքին ճիրաններէն, թոյլ չի տանք, որ մեր աչքին առջեւ, մեր դռան մօտը, մեր ձեռքին մէջ՝ անոնք գոհն ըլլան թշուառութեան, իրականին մէջ՝ ըլլան զոհերը մեր անտարբերութեան, ճիշտ այն վայրկեանին որ Հայաստանի պետութիւնը կը դարբանուի, հայրենի հողին մէջ եւ թէ Համաժողովի սեղանին վրայ»։³³

Որբերի եւ կանանց ազատագրում

1918թ. մարտին կայացավ ՀԲԸ Միության հերթական ընդհանուր ժողովը: Միության կենտրոնական վարչական ժողովի ներկայացրած հաշվետվության մէջ ասվում էր. «Որքան մեծ եղած ըլլայ մեր ազգային դժբախտութիւնը, կը պահենք միշտ սա համոզումը թէ խաղաղութիւնը ձեռք պիտի բերուի Քաղաքակրթութեան յաղթանակովը եւ թէ, այն ժողովուրդներուն մէջէն որ վերջապէս պիտի տիրանան իրենց դարաւոր իրաւունքներուն, մեր ազգը պիտի կոչուի գրաւելու իր տեղը ազատ ժողովուրդներու նոր ընկերութեան մէջ»։³⁴ Եվ դեպքերի ընթացքը կարծես արդարացում էր այդ սպասումները: 1918թ. հոկտեմբերի 30-ին Թուրքիան ճանաչեց իր պարտությունը եւ Մուդրոսում ընդունեց անգլիացիների կողմից ներկայացված զինադադարի պայմանները: Արդեն հայտնի էր, որ 1919թ. հունվարին Փարիզում պետք է հրավիրվեր հաղթող երկրների համաժողովը՝ պատերազմում պարտված երկրների հետ հաշտության պայմանագրերի նախապատրաստման եւ կնքման համար: Հայերը բոլոր հիմքերը ունեին հուսալու, որ այս անգամ կիրականացվի իրենց դարավոր իղձը՝ ազգային տարածքի վրա ինքնիշխան պետականության վերականգնումը:

Իսկ մինչ այդ, հայության հիմնական խնդիրն էր վերադարձը հայրենիքի ազատագրված շրջանները: Հայրենիք էր վերադառնում նաեւ ՀԲԸ Միությունը: Վերադառնում էր որպէս մի կազմակերպություն, որը նախ եւ առաջ պարտավոր էր հոգալ իր խնամքի տակ գտնվող որբ երեխաների ու գաղթականների առողջության, կրթության եւ դաստիարակության համար: Իր գործունեության սկզբնական նպատակների այդ հարկադրված փոփոխմամբ Միությունը առավել մեծ պատասխանատվություն

էր ստանձնել ողջ հայության առջեւ, քանզի նրա հաջող գործունեություն-
նից էր մեծապես կախված ազգի հարատեւումը:

1915 եւ հետագա տարիներին, բռնագաղթի ու տեղահանության
ժամանակ մեծ թվով հայ երեխաներ եւ երիտասարդ կանայք ու աղջիկ-
ներ առեւանգվել էին թուրքերի, քրդերի ու արաբների կողմից: Կանայք եւ
աղջիկները դարձան վաճառքի կամ փոխանակման առարկա, համալրե-
ցին հարեւները, ծառայեցին իրենց տերերին: Նրանց ողբերգական ճա-
կատագրի մասին այսպես է գրել Լեւոն Չորմիսյանը. «Այդ կիներուն եթէ
ոչ ամբողջութիւնը, բայց ջախջախիչ մեծամասնութիւնը իրենց ներքին
ասրումներուն մէջ, մինչեւ վերջ պահած են իրենց ազգութեան, կրօնքին,
ծագումին հանդէպ հաւատարմութիւնը, երբեք չեն մոռցած իրենց անցեա-
լը, ծնողքը, ծննդավայրը, ընտանեկան եւ ազգային բարքերն ու սովորու-
թիւնները: Անոնք ենթարկուած են սակայն ոչ միայն բռնադատեալ աշ-
խատանքի, ծեծերու, հարուածներու, այլատեսակ բռնութիւններու ճնշու-
մին, բայց մանաւանդ բարոյական սարսափի մը: Սպաննուելու վախին
տակ ասքած են ամէն օր, մանաւանդ փախուստի փորձի մը պահուն: Անոնց
բոլորին մօտ կազմուած է այն համոզումը որ աշխարհի վրայ այ-
լեւս հայ չէ մնացած, բոլորը սպաննուած են եւ իրենք ալ պիտի սպան-
նուին, երբ փախուստի դիմեն»:³⁵

Այլ էր հայ երեխաների պարագան: 1915թ. վերջերին ցեղասպանու-
թյան զլխավոր կազմակերպիչներից մեկի՝ Թուրքիայի ներքին գործերի
նախարար Թալեաթի մի կարգադրությունը վերաբերում էր հայ որբերին.
«Հավաքեցեք եւ պատսպարեցեք միայն փոքրահասակ որբերին, որոնք
չեն կարող հիշել իրենց ծնողների կրած սարսափները: Մյուսներին ու-
ղարկեք քարավանների հետ»:³⁶ Պետք է ընդունել, որ Թալեաթի հաշ-
վարկը ճիշտ էր: Այդ տարիքում, երբ երեխայի մեջ դեռ չի ձեւավորվել
ազգային ինքնագիտակցությունը, «մենք-նրանք» հակադրությունը իր
տարբեր դրսեւորումներով, հայտնվելով այլ ազգային-մշակութային մի-
ջավայրում, նա բավական արագ եւ դյուրությամբ է ընկալում եւ որդեգ-
րում շրջապատի հիմնական հատկանիշները: Այլ կերպ ասած, տվյալ
դեպքում տեղի էր ունենում պետության կողմից կազմակերպված հայ
երեխաների հարկադրական, ստիպողական թրջացում:³⁷ Դրանից զատ,
թուրքերը, ընդհանրապես մահմեդականները, հայ երեխաներ որդեգրելիս,
ըստ ամենայնի, առաջնորդվում էին շարիաթի այն հայտնի դրույթով, որ
մահմեդականացնելով այլակրոն երեխաներին, իրենք կարծանանան
աստծո ողորմածությանը եւ մեծագույն վարձատրությանը անդենականի
մեջ: Երկու դեպքում էլ արդյունքը նույն էր. «...թրջական շովենիզմը քա-
ջալերիչ եւ եղեմաբոյր քարոզներէն գինովցած ամէն ճիգ թափեր է ջնջե-

լու համար Հայութիւնը ոչ միայն ֆիզիքապէս, այլ բարոյապէս. դրոշմե-
լով անոր հոգիին վրայ մահմեդականութեան կնիքը: Մեր աչքերուն առ-
ջեւ ունինք որբեր, որոնք իրենց մատաղ հասակին մէջ խլուած իրենց հայ-
րենական բոյնէն տարամերժօրէն ինկեր են Թուրք խուժանին գիրկը, աս-
րեր են անոնց հետ, սներ ու քներ են, եւ այդ շրջանին անզգայաբար ստա-
ցեր են թրջութեան ոչ միայն արտաքին կեղծութիւնը, այլ եւ ներքին աղ-
տեղութիւններն ալ, հարէմական կեանքի պոռնկացած ամբողջ խայտա-
ռակութիւնները»:³⁸

Չինադարարի առաջին իսկ օրից տասնյակ հազարավոր հայ որբերի
եւ կանանց ազատագրումը դարձել էր ողջ հայության ամենահիմնական
եւ ամենակարեւոր նպատակներից մեկը: «...Հարիւր հազարաւոր որբերու
եւ կիներու ազատագրումը, զինադարարի հոշակումին առաջին օրերուն
իսկ հրամայողական բարոյական պարտադրութիւն մը ճանչուած էր բոլոր
Հայերուն կողմէ: Ոչ միայն զոհեր կը նկատուէին անոնք եւ հետեւաբար
անոնց ազատագրութիւնը կը դատնար մարդկային, ազգային եւ կրօնա-
կան պարտականութիւն մը, այլ անոնց միջոցաւ անարգուած, անպա-
տուած կը տեսնէին հայութիւնը իր ամբողջութեան մէջ, հետեւաբար պար-
տադրանքը կը ստեղծուէր այդ անարգանքը սրբելու ազգութեան ճակա-
տէն: Այս զգացումները կը տիրապետէին Հայերուն եւ իւրաքանչիւր Հայ,
ինչ պայմաններու եւ դիրքի մէջ ալ գտնուէր, իր շրջապատին մէջ կ'աշխա-
տէր եւ կը գործէր անոնց ազդեցութեան տակ: Թուրքի մը, արաբի մը, քիւր-
տի մը քովէն հայ որբ մը կամ կին մը փախցնելը պարտականութիւն կը
համարուէր, իւրաքանչիւր Հայու: Պէտք չունէին հրամանի կամ հրահանգի
սպասելու, այդ պարտականութիւնը կատարելու համար»:³⁹

Հայ որբերի եւ կանանց ազատագրմամբ զբաղվում էին ինչպես
առանձին փոքրաթիվ ջոկատներ, այնպես էլ անհատներ, որոնք միսիո-
ներների, բեղվիների դիմակի տակ շրջում էին հեռավոր գյուղերում եւ
հայտնաբերելով իրենց ազգակիցներին՝ ազատագրում եւ փոխադրում
էին նրանց հայաշատ կենտրոններ: Քանի որ ազատագրման հիմնական
միջոցներից էր թուրք, քուրդ կամ արաբ տերերի դրամական վարձատրու-
թյունն ու կաշառքը, տարբեր երկրներում կազմակերպվում էին հատուկ
հանգանակություններ անհրաժեշտ միջոցներ՝ փրկագին ասպահովելու
համար: ՀԲԸ Միությունը, որի համար «միշտ սրտին գործ մը եղաւ...
անապատին խորքերը բռնագրաւած կամ թափառական որբերուն ազա-
տագրումի, եւ միաժամանակ դեռատի հայուհիներու հարէմներէ ձերբա-
զատումի կենսական ծրագիրը», 1919թ. հիմնեց Ազատագրումի հիմնա-
դրամը եւ քաջալերեց «...Ազապա-Քերէքի շրջանին մէջ Տ. Յովհ.Գըլը-
ճեանի, Հորանի շրջանին մէջ Տ. Լեւոն Եօթնեղբայրեանի խումբին, ինչ-

պէս եւ Տէր Զօրի կողմերը Տ. Ռուբէն Հէրեանի այս ուղղութեամբ կատարած ազգօգուտ աշխատանքները»:⁴⁰ Միությանն անխափան Պողոս Նուպարը, իր հերթին, նույն այդ նպատակին ծառայեցրեց իր անձնական կապերը եւ հեղինակությունը: Հ.Թովուզյանը իր մենագրությունում գրում էր. «Դժվար է ասել, թե ինչպիսին կլինէր որբահավաքի ընթացքը, եթե Հիջազի գահակալ Հուսեյն իբն Ալիին եւ նրա որդի Էմիր Ֆեյսալը մարդասիրաբար չմիջամտեին գործին: 1918թ. սկզբներին Հիջազի գահակալը, ընդառաջելով Պողոս Նուպար փառաբանի դիմումին, օգնության ձեռք մեկնեց հայ ժողովրդի դժբախտացած զավակներին: Մասնի եւ Ակաբայի կատավարիչներին կարգադրվեց հայերին հանձնել «մեծ ու փոքր, ամուսնացած եւ ամուրի աղջիկներն ու մանչերը»: Իսկ 1919թ. հունվարին Փարիզում Պողոս Նուպարի հետ ունեցած տեսակցությունից հետո «...Էմիր Ֆեյսալը կարգադրել էր... պարզել, թե «Ո՞ր արաբներուն եւ աշիրեթներուն քով հայ կիներ կամ աղջիկներ կամ որբեր կը գտնուին», որպէսզի «շուտով այդ հայերը, առնուելով արաբներու քովէն, յանձնուին հայերու կազմած ազգային ներկայացուցչական մարմնին»:⁴¹ Բայց եւ այնպէս, չնայած բոլոր ջանքերին հնարավոր եղավ ազատագրել նրանց միայն փոքր մասին:

Հենց այդ դժբախտների համար էր նախատեսված Հայկաի Ապաստարան-Աշխատանոցը, որը նախապես հիմնել էր տեղի Հայ Առաքելական եկեղեցու առաջնորդարանը եւ որին ՀԲԸ Միությունը սատարում էր ամսական նպաստով: 1919թ. վերջին Միության Հայկաի մասնաճյուղը ստանձնեց կանանց Ապաստարան-Աշխատանոցի ողջ մատակարարումն ու պատասխանատվությունը՝ Հայ Օրիորդաց միությանը վստահելով ներքին հսկողությունն ու աշխատանքների կազմակերպումը: Այս հաստատության նպատակն էր ծառայել որպէս «...հանգրուան մը հաւաքուած որբերուն եւ անտիրական կիներու եւ աղջիկներու, որ ատեն մը հոն մնալէ յետոյ, մաքրուած, առողջացած եւ կազդուութեամբ, աստիճանաբար պիտի դրկուէին իրենց վայրերը, անոք անչափահասները՝ Միութեան որբանոցները, ազգական ունեցող մեծերը՝ իրենց պարագաներուն, իսկ բոլորովին անտէրները՝ Աշխատանոցի բաժնին մէջ իրենց հարմար գործով մը պիտի զբաղուէին: Այս գեղեցիկ կարգադրութիւնը դժբախտաբար իր սկզբնավորութեան շրջանին մէջ իսկ հարկ եղաւ իր նուազագոյն աստիճանին վերածել, այն պատճառաւ որ որբահաւաքութեան գործը յանկարծ կասեցաւ, Տէր Զօրի եւ այլ վայրերու քաղաքական վիճակին յոռեգոյն դրութեան հետեւանքով»:⁴²

Թե՛ն տարագրության զոհերի ազատագրումը դարձել էր գրեթե անհնարին, այնուամենայնիվ հաջորդ մի քանի տարիներին եւս որոշ թվով

հայ կանայք եւ աղջիկներ կարողացան դիմել փախուստի: Ոմանք արագ գտնում էին իրենց ազգականներին եւ միանում նրանց, մյուսները ստիպված ապաստանում էին հատուկ այդ նպատակով հիմնված հաստատություններում, այդ թվում նաեւ Հայկաի Ապաստարանում: 1918- 1921թթ. այնտեղ ընդունվել էին 161 հոգի, որոնցից 100-ը որոշ ժամանակ անց ուղարկվեցին իրենց ազգականների մոտ: Հետագա տարիներին ապաստարանում ապրում էր մոտ 50 հոգի, իսկ նրա գործունեության վերջին՝ 1927թ. 39 հոգի: Հայկաի Ապաստարանում նրանք զբաղվում էին ձեռագործով, գորգերի, գուլպայի պատրաստությամբ՝ կատարած աշխատանքի դիմաց ստանալով որոշ օրավարձ: Հաշվի առնելով նրանց կրած ֆիզիկական եւ հոգեկան բոլոր տառապանքները՝ խիստ կարեւոր էր Հայ Օրիորդաց միության անդամների հոգատար վերաբերմունքը: «Նկատելի է, որ Ապաստարանն նոր մտած աղջիկները կամ կիները ընդհանուր առմամբ վատույթ, հիւանդոտ, երբեմն գէշ ախտերով վարակուած արգահատելի վիճակ մը կը ներկայացնեն: Սակայն կարճ ժամանակ մը վերջ անոնք բոլորովին կը բարեփոխուին, շնորհիւ իրենց ստացած մայրական խնամքին եւ բարոյաբժշկական դարմանումին»:⁴³ Թե՛ն ապաստարանում եղած ժամանակ եւ թե՛ հետագայում նրանք միշտ էլ խուսափեցին խոսել եւ պատմել իրենց ապրած տառապանքների մասին եւ ձգտեցին ընդմիշտ ջնջել բոլոր տեսակի հիշողությունները այդ տարիների մասին... 1918- 1921թթ. ընթացքում ապաստարանում «...3 թուրք-հայ նորածիններ մեռած են»:

Նույն նպատակին էր ծառայում նաեւ ՀԲԸ Միության՝ Ադանայի Մերմերլի թաղում 1919թ. հիմնած Այրիանոց-Արհեստանոցը, ուր աշխատեցին եւ իրենց ապրուստը ապահովեցին մոտ 350 այրիներ եւ աղջիկներ:⁴⁴ Ամերիկյան Նպաստամատուց (Near East Relief) բարեսիրական կազմակերպության օգնությամբ այստեղ կազմակերպվեց գեղակերտ գորգերի, կարպետների, ինչպէս նաեւ խիստ անհրաժեշտ գուլպաների արտադրություն: Հատկանշական է, որ այստեղ մեծ վարպետությամբ պատրաստվել էին «Պողոս Նուպար», «Ջորավար Անդրանիկ», «Ներգաղթ» եւ «Լլուղ Ջորջ» անվանաձոն գորգեր: Այս անվանումները յուրահատուկ խորհրդանիշներ էին այն արժեքների, որոնք այդ օրերին, պատմական այդ ժամանակահատվածում տիրում էին ժողովրդի մտայնության մէջ: Եվ եթե Պողոս Նուպարը խորհրդանիշն էր ՀԲԸ Միության, Ջորավար Անդրանիկը՝ հայ ազատագրական պայքարի, ներգաղթը՝ Հայրենիքի, ապա Անգլիայի վարչապետի անունը խորհրդանշում էր այն հավատը, որ հայերը շարունակում էին տածել Արեւմուտքի նկատմամբ եւ որը պետք է վերանար ընդամենը մի քանի ամիս անց՝ Կիլիկիան թողնելուց հետո:

Կիլիկիա, վերադարձ եւ վերջին ելքը

Ջիմադարարից անմիջապես հետո մեծ թվով գաղթական հայեր շտապեցին վերադառնալ հայրենիք, հատկապես Կիլիկիայի ազատագրված շրջանները: Համաձայն որոշ տվյալների, մինչև 1919թ. վերջերը Կիլիկիա՝ Ադանա, Տյորթ-Յոլ, Մերսին, Հաճըն եւ այլ վայրեր վերադարձածների թիվը հասնում էր շուրջ 150.000-ի:⁴⁵ Նկատի առնելով դրա հետեւանքով ստեղծված ծանր վիճակը, ապրուստի համար ամենատարրական պայմանների եւ առաջին հերթին սննդամթերքի, հագուստի եւ աշխատանքի բացակայությունը՝ ՀԲԸ Միությունը իր բոլոր ուժերը եւ կարողությունները ի սպաս դրեց Կիլիկիայում բնականոն կյանքի հաստատման գործին: Այդ առումով շատ կարեւոր դեր խաղաց Միության տեղի մասնաճյուղերի վերակազմավորումը:

Արդեն 1919թ. գարնանը Միությունը Ադանա առաքեց մոտ 90 հակազանազան զգեստ, դեղորայք, երկրագործական ու արհեստագործական տարբեր սարքավորումներ ու գործիքներ, ինչպես նաեւ 2000 եգիպտական ոսկի: Կիլիկիայի ազատագրման առաջին իսկ օրերից Մերսին նավահանգստային քաղաքը դարձավ գաղթականության ամենակարեւոր կենտրոնը: Սկսած 1919թ. առաջին ամիսներից, ամեն շաբաթ շուրջ 1000 գաղթական էր գալիս Մերսին, որպեսզի այստեղից շարունակեւր ճանապարհը դեպի հայրենի վայրերը: Այդ նավահանգիստը «... իրերու բերմունքով եւ Եգիպտոսի մերձատրոթեան պատճառաւ կոչուած էր շատ մեծ դեր մը խաղալու: Կեդրոնին գլխաւոր մտահոգութիւնը Կիլիկիա համախմբուող տարագիրներու օգնութեան եւ որբերու պատսպարութեան ծանր գործն էր, եւ Մերսին պիտի ըլլար այդ գործին շտեմարանը, անկէ պիտի ճիւղաւորուէին Միութեան օգնութիւնները դէպի Կիլիկեան ուրիշ կեդրոններ»:⁴⁶

Շուրջ հինգ տարիների գաղթական կյանքը անխուսափելիորեն ծանր էր անդրադարձել հայրենիք վերադարձող հայերի առողջական վիճակի վրա: Եթե հիվանդ երեխաներին անհրաժեշտ բժշկական օգնություն էր ցույց տրվում որբանոցներում ու վարժարաններում, ապա մեծահասակները գրեթե լրիվ զրկված էին այդ հնարավորությունից: Ստեղծված իրավիճակում անհետաձգելի էր դարձել հիվանդանոցների եւ դարմանատների կազմակերպումը Կիլիկիայում, որը եւ սկսեցին իրականացնել ազգային եւ արտասահմանյան որոշ կազմակերպություններ, այդ թվում նաեւ ՀԲԸ Միությունը: Իր առաջին հիվանդանոցը Միությունը բացեց հենց Մերսինում՝ 1919թ. մայիսին: Մերսինի հիվանդանոցում՝ նրա ավելի քան երկու տարվա գոյության ընթացքում, բուժում ստացան մոտ 550 մարդ, իսկ դարմանատան ծառայություններից օգտվողների թիվը շուրջ 6400 էր,

այդ թվում, բացի հայերից նաեւ հույներ, հրեաներ: Այս հիվանդանոցում ծնվեց 29 երեխա, որոնք ազատագրված Կիլիկիայում ծնված առաջին հայ երեխաներից էին:

1919թ. նոյեմբերին Մերսին տեղափոխվեց Պորտ Սայիդի որբանոցը իր ողջ կազմով: 1921թ. սկզբին Մերսինի երկուտ որբանոցը հաշվում էր 404 երեխա, որոնք ուսում էին ստանում բարձրագույն նախակրթարանի ծրագրով: Ծարունակելով ավանդույթը՝ այստեղ նույնպես հիմնվեցին մանկապարտեզ, նախակրթարան, 120 հոգուց բաղկացած բոյ-սքաութների կազմակերպություն, ինչպես նաեւ արհեստանոց՝ կոշկակարության եւ աստղձագործության ճյուղերով: Որբանոցի տեսուչը Միությունը ուղղած իր տեղեկագրում հասկանալի հպարտությամբ գրում էր. «Իւրաքանչիւր սան ունի երկու ձեռք զգեստ, իսկ սանուհիները երեք. ամէնն ալ ունին երկուական ձեռք ճերմակեղէն, կօշիկ, գուլպայ, թաշկինակ, անձեռոց եւ այլն, իսկ անջատաբար Պոյ-Սքաութները համազգեստ են»:⁴⁷

Պորտ Սայիդից Միությունը հայրենիք տեղափոխեց նաեւ Սիսուան վարժարանը, որի սաները հիմնականում Սուեդիայի վերոհիշյալ 6 գյուղերի մուսալեոցի երեխաներն էին: Եվ քանի որ այդ բոլոր գյուղերը գտնվում էին ազատագրված շրջանում՝ Ալեքսանդրետի սանջակում, որոշվեց նախկին մեկ մեծ դպրոցի փոխարեն «Սիսուան վարժարաններ» ընդհանուր անվան տակ բացել մեկական դպրոց ամեն մի գյուղում: Ընդհիվ դրա Քեպուսիյե, Հաճի Հասիպի, Պիթիաս, Յողուն Օլուզ, Խըտըր Պեկ, եւ Վազըֆ հայկական գյուղերը առաջին անգամ ունեցան սեփական ազգային վարժարաններ, որոնցում 1921թ. ուսանում էր 679 աշակերտ:

Իսկ Ալեքսանդրետում, որի հայ բնակչությունը զիմադարարից հետո բազմապատկվել էր հատկապես գաղթականների հաշվին, Միության «առաջին անմիջական գործերը եղան զանոնք սնուցանել, հագուեցնել, դարմանել, խնամել, ինքնաբաւ դարձնել... Բոլոր նպաստընկալները Միութեան կողմէ դրկուած նոյն միակերպ հագուստը կը կրէին, այնպէս որ քաղաք մտնող մը միակ ակնարկով մը կրնար հասկնալ այն մեծ դերը գոր Միութիւնը կը կատարէր զարհուրանքէն ճողոպրած թշուառ ժողովորդին վերածնութեան գործին մէջ»:⁴⁸ Առաջ անցնելով նշեմ, որ Միության նմանօրինակ գործունեությունը առավել ընդլայնվեց 1922թ., երբ այստեղ հաստատվեց Կիլիկիայի՝ թուրքերին հանձնած շրջաններից հեռացած շուրջ 15.000 հայ: ՀԲԸ Միությունը նախ՝ 1922թ. փետրվարին, հիմնեց Նուպարեան վարժարանը, որի կառուցման համար օգտագործվեցին Տյորթ-Յոլի հաստատություններից այստեղ փոխադրված փայտեղենը եւ ուրիշ այլ նյութեր: Այդ դպրոցի աշակերտների թիվը տարեկան կազմում էր մոտ 300 հոգի: Նույն թվականին Միությունը Ալեքսանդրետում հիմնեց

նաեւ դարմանատուն, որի առաջնային խնդիրն էր մալարիայով հիվանդացած բազմաթիվ մարդկանց բուժումը:

Խորհրդանշական իմաստ ունեցավ Քէլէկեան որբանոցի վերաբացումը Տյորթ-Յոլում՝ 1919թ. հուլիսին: Այդ գյուղաքաղաքի 15.000-անոց հայ բնակչությունից վերապրել էին միայն 3000-ը, որոնք էլ իրենց միացած այլ գավառների մոտ 1000 գաղթականների հետ վերադարձան հայրենի օջախներ: Տյորթ-Յոլ վերադարձածների թվում էր նաեւ Միհասա Խապրիկը, որը շատ տարիներ անց վերհիշում էր. «Քէլէկեան որբանոցի այքառու շէնքը, արդիական կառուցածքով, մեր առջեւն էր: Ներսը մարդկային ոչ մէկ հետք նշմարելի էր: Մեր առած տեղեկութիւններուն համաձայն, թուրքերը զայն վերածած էին զհնուորական զօրանոցի եւ հայերուն վերադարձը իմանալով, շէնքը լքած ու փախած էին»:⁴⁹ Սկզբնական շրջանում որբանոցում տեղավորվեցին տարբեր գյուղերից եւ քաղաքներից որբ մնացած ավելի քան 200 երեխաներ, որոնք մեծերի հետ միասին մասնակցեցին որբանոցի շինությունների ու պարտեզների վերականգնմանը: Տյորթ-Յոլի շրջանում պատերազմական գործողությունները չէին դադարում, եւ երեխաները ապրում էին մի տեսակ կիսազինվորական կյանքով. «Թշնամիին զնդակներու սուլոցին արդէն վարժուած են մեր ականջները: Որբանոցին մէջ ամէն ոք իր պարտականութիւնը կը կատարէ, առանց ազդուելու դուրսի անցուդարձէն՝ որոնք այնքան մօտիկ են մեզի...»:⁵⁰ Հակառակ Տյորթ-Յոլում տիրող անապահով վիճակին, այստեղ վերադարձած հայերի, այդ թվում նաեւ որբերի թվաքանակը այնքան մեծ էր, որ Միությունը նույն 1919թ. վերջերին ստիպված եղավ բացել եւս մէկ՝ Սիսուան որբանոց, որ պատասպարեց շուրջ 300 երեխաների: «Կրթական մարզին մէջ,- նշում էր Մ.Խապրիկը,- Քէլէկեան եւ Սիսուան որբանոցները կը շարունակէին իրենց սովորական ընթացքը. մասնավորապէս այդ վերջինը, որ կառուցուած էր քաղաքին կեդրոնը ՀԲԸ Միութեան միջոցաւ, իր մէջ հաւաքուած երկու հարիւրի մօտ որբերուն կը ճամբէր լաւ դաստիարակութիւն մը»:⁵¹

1919թ. հուլիսին Միությունը Տյորթ-Յոլում նույնպէս հիմնեց հիվանդանոց եւ դարմանատուն, որոնք միակ բժշկական հաստատություններն էին գյուղաքաղաքում: Միջնել 1921թ. վերջը հիվանդանոցում բուժում էր ստացել ավելի քան 700, իսկ դարմանատնում՝ մոտ 25.000 մարդ:

Այդ նույն օրերին, երբ հայությունը վերադառնում էր ազատագրված շրջանները, դժվարին պայմաններում փորձում վերաշինել իր հայրենիքը, այն հույսով, եթե ոչ համոզմամբ, որ այլեւս ուրիշ շատ ժողովուրդների նման պետք է ապրի ազատ կյանքով, այդ նույն ժամանակ Եվրոսայի մեծ պետությունները վերանայում էին իրենց ազդեցության ոլորտները,

նազմաքաղաքական նպատակներն ու շահերը, որոնք հերթական անգամ հակասեցին Կիլիկիայում ազգային-քաղաքական ինքնորոշում ձեռք բերելու հայերի ձգտմանը: Միեւնույն ժամանակ թուրքերը՝ Աթաթուրքի գլխավորությամբ, համախմբելով եւ վերադասավորելով իրենց նազմական ուժերը եւ զինելով ողջ բնակչությանը, ոչ միայն պահանջեցին ֆրանսիական բանակի հեռացումը Կիլիկիայից, այլև նազմական գործողություններ ծավալեցին թե նրանց եւ թե հայրենադարձ հայերի դէմ: Երբ 1920թ. հունվարին թուրքերը կազմակերպեցին Մարաշի հայության կոտորածը եւ այն էլ ֆրանսիական զինվորական իշխանությունների ներկայությամբ, նրանք համոզվեցին, որ հաջողությամբ կարող են ավարտին հասցնել հայերի բնաջնջման գործը:

1920թ. մարտին քեմալականների հերթական զոհը դարձան Հաճընի հայերը, որոնք իրենց ծննդավայրն էին վերադարձել 1919թ. օգոստոսին: Ինչպէս եւ ամենուրեք, տեղի բնակչությունը, այդ թվում նաեւ շուրջ 1200 որբ երեխաներ, նույնպէս հայտնվել էին խիստ ծանր վիճակում: ՀԲԸ Միության կենտրոնական վարչության որոշումով տեղի վերակազմավորված մասնաճյուղը ձեռնամուխ եղավ հիվանդանոց եւ որբանոց հիմնելուն, որոնց բացումը դեկտեմբերի 14-ին կատարեց առաջնորդ Պետրոս Եպիսկոպոս Սարաճյանը: Միությունը ծրագրել էր հիմնել նաեւ նոր որբանոց եւ այրիների համար՝ աշխատանոց, սակայն, 1920թ. առաջին իսկ օրերից իրադրությունը կտրուկ փոխվեց՝ քեմալական զորքերը շրջապատեցին Հաճընը: Ի պատասխան հաճընցիների դիմումներին, Կիլիկիայի ֆրանսիական իշխանությունները պատասխանեցին, որ իրենք ի վիճակի չեն օգնելու: Հաճընցիները դիմեցին ինքնապաշտպանության եւ շուրջ ութ ամիս հերոսաբար դիմադրեցին թուրքական բանակին: Բայց ուժերը խիստ անհավասար էին, եւ հոկտեմբերի 15-ին թուրքերը գրավեցին քաղաքը:

«...1920 Հոկտեմբեր 15-ին, ութը ամսուան հերոսական ինքնապաշտպանութենէ մը ետք, որ անմոռաց պիտի մնայ մեր ազգային տարեգրութեանց մէջ, քաղաքը կ'իյնայ, եւ աւելի քան 10.000 բնիկներ ու բազմաթիւ եկուոր գաղթականներ, որոնց հետ նաեւ Միութեան որբերը իրենց պաշտօնեաներով, ինչպէս նաեւ Հիւանդանոցին պաշտօնեութիւնը կը նահատակուին զարհուրելի պայմաններու մէջ: Միութեան տարաբախտ ծերունի բարեկամը, Յակոբ աղա Քըրքեաշարեան, առաջին զոհերէն մէկը կ'ըլլայ: Որբանոցին Տեսուչ Տ. Լեւոն Փափագեան կը նախընտրէ իր կինն ու աղջիկը սպաննել քան թողուլ Թուրքերուն ձեռքը, եւ ինք իսկ, ուժասպառ, իր խնդրանքով կը սպաննուի պաշտօնակցի մը՝ Տ. Գ. Պաղտիկեանի կողմէ, որ նույնպէս զոհ պիտի երթար սպանդին:

«Թուրքերը, նույն ատեն քաղաքը հրկիզելով, բոցերուն մէջ կը նետեն որբերը, որոնց ածխացած դիակները կը տեսնեն փախստական կիներ: Որբերէն չափահասները, պաշարման վերջին ատենները արիաբար կը կռուէին Հաճընի այրերուն կողքին: Ծատերը կը ծառայէն իբր սուրհանդակ, եւ մաս մըն ալ զանազան դիրքերու միջեւ պարէնի ու ռազմամթերքի փոխադրութեան վտանգատր գործը կը ստանձնեն: Միութեան Մասնաժողովը, այդ ահատոր թուկէին, լոկ Որբանոցին վրայ կը խորհի: Բոլոր անդամներն ալ անոր շուրջ կը սպաննուին: ...Ահռելի սպանդէն կ'ազատուին միայն 350 հոգի, որ քաղքէն դուրս յարձակելով կը յաջողին խզել պաշարման գիծը եւ երկար չարչարանքներէ վերջ Ատանա կը ժամանեն իրենց միացած 9 որբերու հետ...»:⁵²

Վերլուծելով Ֆրանսիայի քաղաքականությունը այդ տարածաշրջանում, 1916-1922թթ. Մեծ Բրիտանիայի վարչապետ Դեյվիդ Լլոյդ Ջորջը գրում էր. «Հայերի ոչնչացման եւ ստրկացման արդյունքում միայն Կիլիկիան վերջին տարիներին դարձավ թուրքական: Ֆրանսիացիները, անտեսելով ամեն բան, կսոչում էին Կիլիկիայի նկատմամբ՝ Սալքս-Պիկոյի չարաբաստիկ համաձայնագրով տրված իրենց իրավունքներից: Սակայն նրանց բուռն սերը այդ անհանգիստ, թանկ եւ անկեանտաբեր ձեռք բերվածքի հանդեպ աստիճանաբար սառչում էր: Ի վերջո, իրենք հրաժարվեցին նրանից, համարելով այն բացարձակ անշահավետ: Որքան անախորժություններից կարելի էր խուսափել, եթե դա արվեր ավելի շուտ. ֆրանսիացիներին պարտության մատնելը բարձրացրեց Քեմալի վարկը, խրախուսեց ազգայնականների նոր հարձակումները օկուպացված այլ տարածքների վրա, ցրեց վախը մեծ պատերազմում հաղթողների անխորտակելի հզորության հանդեպ... Ֆրանսիական եւ ոչ մի կառավարություն բավականաչափ քաջություն չունեցավ, որպեսզի կամ ընդհանրապես հրաժարվի Կիլիկիայից, կամ էլ պաշտպանի այն»:⁵³

Այդ առումով հատկանշական է հետևյալ դրվագը ՀԲԸ Միության Տյորթ-Յոլի Սիսուան որբանոցի տեսուչ Հմայակ Գրանյանի հիշողություններից: «Տէօրթ-Եօլի ութ հազար հայերուն մէջ, դեղի համար, միայն մեկ թուրք կար, դատարանին նախագահը... «բարի» մարդ մըն էր, տէօրթեուցիներէ սիրուած: ...Որբանոցին շինութեան սկսուելէ քանի մը ամիս ետք, օր մը ինձի այցելութեան եկաւ... Քաղաքավարական քանի մը խօսքերէ յետոյ՝ զիս մեկ կողմ քաշեց եւ ականջիս փսփսաց. «Տղաս, գիտես որ ես հայերը շատ կը սիրեմ, քեզի հանդէպ ալ համակրութիւնս հայրական է: Այդ դրամը զոր դուք այս հողին մէջ կը թաղէք եւ անոր վրայ որբանոց կը բարձրացնէք՝ որբի, եթիմի դրամ է, մի՛ ծախսէք, մեղք է: Դուք

հոս պիտի չմնաք, նորէն մուհանիր պիտի ըլլաք եւ որբանոցը թուրք մետրեսէ կամ եթիմխանէ պիտի ըլլայ: Ասկէ ատելին չեմ կրնար ըսել...»:⁵⁴

Իհարկէ, միայն այս թուրքը չէ, որ կանխագում էր ապագա դեպքերի ընթացքը: Դեռեւս 1920թ. մայիսին, այդ տարիներին որբախնամ գործունեությամբ անձնվիրաբար զբաղվող հանրաճանաչ գրող Զապել Եսայանին ուղղված իր նամակում Վահան Մալեգյանը գրում էր. «Ամէն պարագայի մէջ ստեղծուած կացութիւնը մտահոգիչ է, ոչ միայն որբերուն ներկայ այլեւ ապագայ վիճակին տեսակէտով, քանի որ Կիլիկիա թրքական հողամաս հոչակուած ըլլալով, կարելի չէ ազգին սաները վստահիլ մեր դահիճներուն: Հետեւաբար քիչ օրէն անոնց փոխադրութեան հարցը պիտի ցցուի մեր առջեւ շատ ատելի լուրջ ձեւով մը»:⁵⁵

Եվ ահա, շուրջ մեկ ու կես տարի անց, այդ օրը եկավ: 1921թ. հոկտեմբերին կնքված թուրք-ֆրանսիական պայմանագրով ֆրանսիական զորքերը մինչեւ տարվա վերջը պետք է դուրս բերվեին Կիլիկիայից: Պայմանագիրը մեծ խուճապ առաջացրեց քրիստոնյա բնակչության մեջ, որը հապճեպ սկսեց հեռանալ Կիլիկիայից: ՀԲԸ Միությունը, խիստ մտահոգված լինելով իր որբանոցների ճակատագրով, դիմեց Կիլիկիայի ֆրանսիական իշխանություններին, որոնք թելադրեցին չտեղափոխել հաստատությունները, քանի որ ...Թուրքիան խոստացել էր հարգել ազգային փոքրամասնությունների իրավունքները: Ի վերջո, ՀԲԸ Միության նախագահ Պողոս Նուպարի անձնական դիմումների շնորհիվ հնարավոր եղավ ապահովել ֆրանսիացիների համաձայնությունն ու օժանդակությունը: «Քանի որ հակառակ ֆրանսիական կառավարութեան կողմէ եղած ջանքերուն եւ ձեզի համար ձեռք բերուած երաշխատրութեանց, կը պնդէք ձեր որբանոցները այլուր փոխադրելու մասին,- գրում էր Պողոս Նուպարին ֆրանսիական լիազոր Ֆ.Պույիոն,- ձեզ կը հաւաստեմ թէ Տէօրթ-Եօլի եւ Մերսինի ֆրանսիական իշխանութեանց կողմէ այս մասին մինչեւ 31 դեկտեմբեր 1921թ. ձեզի ամէն դիւրութիւն պիտի ընծայուի: Հաճեցէք սկսել այդ իշխանութեանց հետ յարաբերութեան մէջ մտնել»:⁵⁶

Միությունը ստիպուած էր արագ կազմակերպել իր հաստատությունների տեղափոխումը Կիլիկիայից: Հմայակ Գրանյանը վերհիշում է. «Դեկտեմբերի 31-ի առաւօտ, Միքայէլ Նաթանեանի հետ, Սիսուան եւ Քէլէկեան որբանոցներու բանալիները, կահ-կարասիներու ցուցակները եւ զոյգ շէնքերու ֆիզիքական նկարագրութիւնը... տարինք ֆրանսացի կառավարիչ՝ գնդապետ Քլեմանսին յանձնեցինք եւ արցունքոտ աչքերով վերադարձանք որբերուն, առաջնորդելու համար երկաթուղագծին կայարանը եւ անկէ Իսկենտերուն, վերջին անգամ ալ, մօտ հազար բերնով, երգելով.

Ցանկամ տեսնել, զիմ Կիլիկիա...

Աշխարհ ո՞ր ի՛նձ ետո՛ւր արե՛ւ»:⁵⁷

Այս երեխաները արդեն երկրորդ անգամ էր, որ պարտադրուած հե-
ռանում էին իրենց հայրենիքից, այս անգամ արդեն վերջնականապէս:

Բայց Միության ղեկավարությունը կարծես հրաժարվում էր հաշտվել
այդ մտքի հետ: «Միություն» ամսագրի նույն 1921թ. սեպտեմբեր-հոկտեմ-
բերի համարում տպագրված էր «Միությունը կ'օգնէ երկրին մէջ միայն»
վերնագրով յուրահատուկ հայտարարությունը: Հիշեցնելով, որ Միության
նպատակն է օգնել հայրենի հողին հավատարիմ մնացող ժողովրդին,
վրդովմունք էր հայտնվում՝ նպաստ հատկացնելու խնդրանքով Եգիպտոս
գաղթածներից ստացված դիմումների առիթով: «Միանգամ ընդմիշտ կը
յայտարարենք թէ երկրէն դուրս ՀԲԸ Միությունը աղքատախնամ կամ
գաղթախնամ մարմին մը չէ...»:⁵⁸

Բեյրութ եւ Չալեպ: Քէլէկեան-Սիսուան որբանոց

Կիլիկիայից իր հաստատությունները տեղափոխելիս, Միության ղե-
կավարությունը ստիպված էր հաշվի առնել մի շարք հանգամանքներ:
Բնական է, որ որբանոցները պետք էր փոխադրել մերձակա երկրներից
մեկը, ուր երաշխավորված կլինեին երեխաների անվտանգությունն ու որ-
բանոցների կանոնավոր գործունեությունը: Ըստ նախնական որոշման՝
որբանոցները պետք է տեղափոխվեին Կիպրոս, սակայն համապատաս-
խան շենքերի բացակայության պատճառով նպատակահարմար համար-
վեց դրանց փոխադրումը Լիբանանի Չմմառ եւ Աշխուտ վայրերը: Ծատ
շուտով, սակայն, պարզ դարձավ, որ «...այս վայրերը, իրենց բարձր դիր-
քին ու քաղաքէն (Բեյրութից - Էդ.Մ.) հեռադրութեան, ինչպէս եւ շենքե-
րու անբաւականութեան եւ ջորի սակաւութեան պատճառաւ հեռի էին
մեր որբանոցներուն վերջնական եւ քաղձացուած հանգրուանը ըլլալէ»:⁵⁹
Ի վերջո Միության որբանոցները փոխադրվեցին Բեյրութ:

Բեյրութում ՀԲԸ Միության մասնաճյուղը հիմնվել էր 1910թ. ու թեւե
այդ ժամանակ Բեյրութում բնակվում էր ընդամենը 50-55 հայ ընտանիք,
այնուամենայնիվ, մասնաճյուղի առաջին անդամների թիվը հասավ 40-
ի: Պատերազմի պատճառով կազմալուծված մասնաճյուղը վերսկսեց իր
գործունեությունը 1918թ.: Հետագա երեք տարիների ընթացքում համե-
մատաբար համեստ դեր էր վերապահված նրան, քանզի այստեղ
ապաստանած հայությունը շտապում էր վերադառնալ ազատագրված
հայրենիք: Իրադրությունը կտրուկ փոխվեց 1922թ. առաջին իսկ ամիսնե-

րին, երբ Բեյրութ սկսեցին գալ մեծ թվով հայեր Կիլիկիայից: Նույն այդ
օրերին՝ 1922թ. փետրվարին Միության տեղական մասնաժողովի ատե-
նապետ է ընտրվում հայ համայնքի ամենահարգված եւ հայտնի դեմքե-
րից մեկը՝ Օննիկ Մազլումյանը (Պարոն): «Մասնաժողովը...- կարդում
ենք «Ոսկեմատեան»-ում,- շատ մեծ օժանդակություն մը ընծայած է Կի-
լիկիոյ գաղթականներուն, ոչ միայն Պէյրութ խոնուած տարագիրներու
նպաստի գործին գլուխ կանգնելով եւ ընդհանուր թշուառութիւնը ամոքե-
լու աշխատելով, այլ նաեւ Պէյրութ դուրս միւս տարագիրներուն համար
Միութեան Կեդրոնին կողմէ առաքուած մեծաքանակ պարէնը, հագուստ-
ները, ելլն բաժնելու, եւ ժողովուրդին ուրիշ կարգի պէտքերը հոգալու
ծանր գործերը կատարելով»:⁶⁰

Բեյրութի մասնաժողովի ջանքերով քաղաքի Էշրեֆիյե թաղում
վարձվեց ընդարձակ՝ հրեաների կողմից հատկապէս վարժարանի համար
կառուցված շենքը: Ծենքի հարմարությունները հնարավոր դարձրին Մեր-
սինի եւ Տյորթ-Յոլի երեք որբանոցների վերակազմավորումը եւ վերածու-
մը երկուսի. Քէլէկեան որբանոց՝ տղաների նախակրթարան եւ Սիսուան
որբանոց՝ աղջիկների նախակրթարան: Բացի այդ, նույն շենքում սկսեց
գործել նաեւ երկսեռ մանկապարտեզ:

1922թ. վերջին Բեյրութի Քէլէկեան - Սիսուան որբանոցը ուներ 581
սան-սանուհիներ, որոնց սեռատարիքային կազմը հետևյալն էր.⁶¹

	Տարիք		
	տղաներ	աղջիկներ	ընդամենը
մինչեւ 6	8	1	9
6-8	37	15	52
8-10	52	30	82
10-12	90	45	135
12-14	99	71	170
14-ից բարձր	107	26	133
Ընդամենը	393	188	581

Քէլէկեան-Սիսուան որբանոցը եղավ ՀԲԸ Միության ամենախոշոր
որբախնամ հաստատությունը. 1922-1930թթ. նրա երկսեռ սաների քա-
նակը տարեկան կազմում էր միջինը 350-400 հոգի եւ միայն նրա գոյու-
թյան վերջին երկու տարիներին այս քանակը սկսեց նվազել՝ 1931թ. 234
եւ 1932թ. 90 սան: Որբանոցից երեխաների հեռանալու պատճառները
տարբեր էին՝ շրջանավարտներ, ամուսնացած սանուհիներ, ազգական-
ների հանձնվածներ, այլ հաստատություններ, հատկապէս մեծահա-

սակների պարագայում Միության աշխատանքներ տեղափոխվողներ եւ այլն: Որբանոցներից հեռացողներին փոխարինում էին նորերը: Առաջին զանգվածային համալրումը տեղի ունեցավ 1926թ., երբ Միությունը Երուսաղեմի Արարատեան եւ Վասպուրական որբանոցները փակելուց հետո, այնտեղ մնացած 298 երեխաներին (139 տղա եւ 159 աղջիկ) տեղափոխեց Քէլէկեան-Սիսուան որբանոց: 1928թ. Լիբանանի Ճունիե քաղաքում Եգիպտոսի Որբախնամ Ընկերության հիմնած որբանոցի նյութական անձկության պատճառով նրա սանուհիները հայտնվել էին խնձալի վիճակում: ՀԲԸ Միության Կենտրոնական Վարչությունը, հաշվի առնելով Եգիպտոսի Միության Ծրջանային Վարչության առաջարկությունը, որոշում է ստանձնել այդ որբանոցի 64 որբուհիների եւ 1 որբի խնամատարությունը եւ նույն թվականի մայիսին տեղափոխում է նրանց Քէլէկեան-Սիսուան որբանոց:⁶² Մինչ այդ, 1927թ. Միությունը Ազգային պատվիրակության եւ Ամերիկյան Նպաստամատույցի հանձնարարությամբ ստանձնել էր նաեւ Կեսարիայում մնացած 53 որբերի հոգատարությունը, որոնք 1928թ. նույնպես դարձան Քէլէկեան-Սիսուան որբանոցի սաներ:⁶³ Այդչափ կարճ ժամանակահատվածում ավելի քան հարյուր որբերի ընդունման պատճառով հաստատությունում առաջ եկավ խճողում, եւ Միությունը ստիպված եղավ վարձել եւս մեկ շենք:

Որոշ ժամանակ անց հայտնի դարձավ, որ Կեսարիայում հավաքվել է որբերի 61 հոգիանոց մի նոր խումբ, որի մասին Ամերիկյան Նպաստամատույցի ներկայացուցիչ տիկին Ա.Դուայթը հետեւյալ տեղեկություններն էր հայտնում Միությանը. «Կեսարիոյ մէջ զանազան վայրերէ հաւաքուած խնդրոյ մի» որբերուն թիւն է 61, որոնց 35-ը մանչ եւ 26-ը աղջիկ: Ատոնցմէ 26-ը 6-9 տարեկան են, 33-ը 10-15, եւ երկուքն ալ 17 եւ 19 տարեկան: Ուրջ միայն անձնող որբեր են, տարագրութենէ առաջ ծնած. մնացեալները, մասամբ ծնողք ունին կամ գոնէ մայր մը, որ սակայն լքած են իրենց զավակները: Կեսարիոյ որբանոցը դրկելով, այդ ծնողքներէն կամ մայրերէն շատեր կրկնամուսնացած են, ոմանք թորքերու հետ եւ ոմանք ալ չքատր են եւ իրենց զաւակներով չեն կրնար զբաղուիլ»:⁶⁴

Նրանցով պետք է զբաղվեր ՀԲԸ Միությունը, որն իր մասին որոշ դառնությամբ գրում էր. «...միակ կամ առաջին կազմակերպութիւնը ...որուն կը դառնան իսկոյն բոլոր ակնարկները նմանօրինակ տագնապներու առթիւ...», եւ շարունակում. «...բայց անգամ մը եւս հարկ կը տեսնենք աւելցնել թէ ներելի չէ սակայն անպատճառ Միութենէն սրբաւել ամէն օգնութիւն, երբ կան ազգային բարենպաստակ բազմաթիւ ընկերութիւններ ալ որ ունին տրամադրելի հիմնադրամներ եւ կը գոյացնեն բաւարար հասոյթներ»:⁶⁵ Բայց եւ այնպէս, Միությունը, ինչպէս եւ սպասվում

էր, ստանձնեց նաեւ Կեսարիայի որբերի երկրորդ խմբի խնամքը: Պողոս Նուպարի, Տիգրան խան Քելէկյանի, Պատրիկ Կյուլպենկյանի նվիրատվությունների շնորհիվ այդ երեխաները 1929թ. մայիսին նույնպէս տեղափովեցին Քէլէկեան-Սիսուան որբանոց: Սակայն քիչ անց, 1930թ. կեսերին Միությունը սկսեց «թախանձագին» դիմումներ ստանալ Կեսարիայի որբերի եւս մեկ՝ արդեն երրորդ խումբը պատասպարելու խնդրանքներով: Այս երեխաների տեղավորման հետ կապված հարցերի կարգավորումը եղավ Գալուստ Կյուլպենկյանի՝ որպէս Միության նորընտիր նախագահի, գործունեության առաջին քայլերից մեկը: Նրա՝ այդ ժամանակվա ամենահարուստ եւ ամենաազդեցիկ մարդկանցից մեկի առաջին իսկ դիմումը բավական եղավ, որպէսզի ֆրանսիական իշխանությունները, որոնք մինչ այդ ամիսներ շարունակ հրաժարվում էին վիզաներ տալ որբ երեխաներին, անմիջապէս լուծեն այդ հարցը: Նա նաեւ հանձն առավ Կեսարիայի որբերի երրորդ խմբի ընդունման, տեղավորման, խնամքի եւ այլ նպատակների համար տարեկան հատկացնել 600 անգլ. ոսկի:⁶⁶

Այսպիսով, 1926 եւ 1928- 1931թթ. Ճունիեյից, Կեսարիայի եւ Միության Երուսաղեմի երկու որբանոցներից Միության Բելյուրթի Քէլէկեան-Սիսուան որբանոց ընդունվեցին կամ տեղափոխվեցին շուրջ 500 որբ երեխա: Բացի այդ, յուրաքանչյուր տարի որոշ թվով որբեր գալիս կամ տեղափոխվում էին այլ վայրերից:

Որբանոցներում տեղավորված երեխաները այդպէս էլ մեծացան ծնողական սիրո, ընտանեկան հարկի անձկալի կարոտով, որոնք այնքան անհրաժեշտ էին, հաշվի առնելով նրանց հոգեկան վիճակը: ԱՄՆ-ի Բլարկ համալսարանի պրոֆեսոր, հոգեբան Հ.Պողոսյանը այդ նույն տարիներին հրատարակած «Հայ ցեղը եւ հալածանքները հոգեբանութեան լոյսին տակ» իր գրքում գրում էր. «Ջարդերու թէ՛ ֆիզիքական եւ թէ՛ մտային ազդեցութիւնները միայն ջարդի ընթացքին չեն, այլ անկէ ետքն ալ կը շարունակեն: Ջարդերու իւրաքանչիւր տեսարանն ու անոնց ազդեցութիւնները ենթակային ջղային դրութեան վրայ բան մը կ'աւելցնեն եւ ժամանակ մը յետոյ կուտակուելով, իրարու վրայ բարդուելով, ահաւոր վնասի մը, հոգեկան սոսկալի երեւոյթի մը պատճառ կը դառնան: Այդ սոսկալի վտանգները, ահեղ տեսարանները, սիրելիներուն չարչարանքներն ու մահը, նեղութիւնները, խուժանային ահուելի ծայները, հրացանաձգութիւնները, հրդեհները, թալանն ու կողոպուտը, եւն, եւն, անոնք ամբողջը կը կուտակուին եւ սոսկալի կերպով կը շարունակեն իրենց յետագա ազդեցութիւնները»:⁶⁷

Նման դաժան բախտի տեր երեխաները մեր օրերում գտնվում են հոգեբանների հատուկ խնամքի տակ, իսկ այն տարիներին նրանց դաստի-

արակներն ու ուսուցիչները հաճախ նույնպիսի ճակատագրի տեր մարդիկ էին, որոնք, այնուամենայնիվ, արեցին ամեն հնարավորը՝ իրենց առաջնային խնդիրը համարելով տարբեր սեռի ու տարիքի, գրագիտության եւ զարգացման տարբեր աստիճանի եւ ողբերգական ճակատագրի տեր հարյուրավոր որբ երեխաների բարոյահոգեբանական եւ աշխատանքային դաստիարակումն ու ուսուցումը:

Այդ գործում որբանոցներին մեծապես օժանդակում էին ՀԲԸ Միության կենտրոնական վարչության, համապատասխան մասնաճյուղերի աշխատակիցները, ինչպես նաեւ հայ եկեղեցու սպասավորները, որոնք իրենց հաճախակի այցելություններով նոր լիցք էին հաղորդում երեխաներին, մեկ անգամ եւս հաստատում նրանց՝ որպես հայ ժողովրդի ապագան կերտողների առաքելությունը: 1922թ. դեկտեմբերին Բեյրութ ժամանած Բաբկեն եպ. Կյուլեսերյանը, որը նաեւ ՀԲԸ Միության ԱՄՆ-ի շրջանակի եռանդուն գործիչներից էր, պատարագեց Քելեկեան-Սիսուան որբանոցի մատուտում: «Սրբազանը,- գրում էր ականատեսը,- մասնաւորապէս ծանրացաւ հաւատքի կատարելութեան վրայ եւ դիտել տուաւ որբերուն որ վաղուան կեանքին նկատմամբ հաւատք ունենան եւ որբանոցը ներկայացուց իբրեւ ընտանեկան յարկ մը, որուն յուրաքանչիւր անդամը սարսի ճանչնալ իր անհատական, ընկերական եւ մանաւանդ ազգին հանդէպ ունեցած պարտականութիւնները եւ ըստ այնմ պատրաստուիլ: Այս յարկը, ըսաւ Սրբազանը, ազգին սրտին ամենամօտիկ յարկն է, ուր կը պատասխարուիք դուք, ըլլալով ազգին մասնաւոր հոգածութեան եւ գուրգուրանքին առարկան, ուստի պարտաւոր էք արժեցնել ձեր վրայ դրուած յոյսերը, որովհետեւ ազգը այլեւս գործնական եւ շինարար ձեռքերու կը կարօտի, եւ դուք պէտք է ըլլաք այդ կենսունակ ձեռքերը վերաշինելու համար մեր վաղուան հայրենական տունը»:⁶⁸

Երեխաների բազմակողմանի զարգացման նպատակով որբանոցում, կրթական ծրագրից բացի, գործում էին նաեւ կրոնագիտության եւ բարոյագիտության դասընթացներ, սկստական կազմակերպությունը, փողային նվագախումբը եւ այլն: Ծվեցարացի հայտնի հոգեւորական եւ միսիոներ Էնտրնի Կրաֆտ-Բոննարի խոսքերով, «Բարեգործականին հովանաւորութիւնը վայելող Քելեկեան-Սիսուան որբանոցը ոչ միայն Բարեգործականի այլ բոլոր հայութեան պատուաբեր հաստատութիւն մըն է: Ես երբեք չէի խորհէր թէ այսքան բազմաձախ եւ կանոնաւոր որբանոց մը կրնար գոյութիւն ունենալ հայ ազգին ներկայ տագնապալի օրերուն»:⁶⁹

Սիյուտքում գործող բազմապիսի կազմակերպությունների մեջ որբանոցները եղան այն հաստատությունները, որոնց գործունեության բնականոն, ոչ պարտադրված ավարտը կարող էր միայն ուրախություն պատ-

ճառել հայ ժողովրդին եւ նրա բարեկամներին: Որեւէ որբանոցի փակումը նշանակում էր, թե սաները դարձել էին չափահաս եւ այդուհետ կարող են ապրել ինքնուրույն կյանքով, կազմել մի նոր հայ ընտանիք, եւ թե՛ նոր որբեր այլեւս չկային, որ վերջապես ավարտվում էր հայ ժողովրդի որբախնամ գործունեությունը: Եվ ահա, հիմնադրումից 13 տարի անց՝ 1932թ. հոկտեմբերին, իր դռները վերջնականապես փակեց նաեւ ՀԲԸ Միության հնագույն որբախնամ հաստատությունը՝ Բեյրութի Քելեկեան-Սիսուան երկսեռ որբանոցը:⁷⁰

Այդ տարիներին հատկապես կարեւոր եւ նշանակալից էր ՀԲԸ Միության գործունեությունը Հալեպում, որը հայ գաղթականության հիմնական կենտրոնն էր: Դեռեւս ցեղասպանության ժամանակ Հալեպ եւ նրա շրջաններն էին բերվում արքայազն հայերը՝ անապատ քշվելուց առաջ: «1915թ. մայիսին,- նշում էր պատմաբան Հովհ. Թոփուզյանը,- այնտեղ հասան զեյթունցիների առաջին քարավանները: Այնուհետեւ, ավելի քան երկու ամիս շարունակվեց Կիլիկիայի լեռնաշխարհի հայության հոսանքը: Օգոստոսին Հալեպ մտան արեւելյան նահանգների հայության բեկորները: 1915- 1916թթ. ավելի քան 350.000 հայեր հանգրվանել էին Հալեպում եւ այստեղ միաժամանակ մնալուց հետո քշվել անապատ»:⁷¹ Անգլիական զորքերի Հալեպ մտնելուն պես այստեղ են սկսում գալ հազարավոր հայ տարագիրներ Տեր Զորից, Դամասկոսից եւ այլ շրջաններից: «...Մէկ քանի շաբթուան ընթացքին քաղաքը կը խճողուի մոտ 80.000 տարագիրներով, որոնց ստուար մեծամասնութիւնը գրգռեակներու մէջ, բոկոտն, յաճախ կիսամերկ, անօթի եւ անապաւէն, առանց հաշուելու հիւանդներն ու անկարները: Որբերու հոծ խումբեր խառնուած էին թշուառներու այս սրտակեղեք բազմութեան: Ծատերը այս վերապրողներէն, որոնց մեծամասնութիւնը երբեմն բոլորովին բարեկեցիկ վիճակ մը ունեցած էր, այլեւս մոռցած էին օճառի, սանրի, գուլարայի, կօշիկի գործածութիւնը»:⁷² Ուշագրավ է գաղթականների հոգեկան վիճակի՝ «Ոսկեմատեանի» բնութագիրը. «Թշուառութիւնը լոկ նիւթական չէր, այլ մանաւանդ բարոյական: Արհաւիրքի այդ տարիներուն գոլումը շատ քան քանդած էր եղերաբախտ վերապրողներուն մէջ, եղծած էր անոնց հոգին: Այլեւս ոչ յոյս ունէին, ոչ հաւատք, ոչ իսկ փափաք՝ այդ գրեթէ անասնական դրութենէն խուսափելու եւ վերածնելու, վերադառնալու իրենց երբեմնի կենցաղին: Հսկայ ջանքեր, առատ միջոցներ, բայց մանաւանդ անձնուէր եւ յամսո աշխատութեան պէտք կար պատմութեան մեծագոյն աղէտներէն մէկէն ճողոպրած այդ խլեակներով նոր ժողովուրդ մը դարբնելու համար»:⁷³

Այս պայմաններում 1919թ. հունվարին Հալեպում՝ իր գործունեությունը սկսեց ՀԲԸ Միության վերակազմված մասնաժողովը Օճնիկ եւ

Արմեն Մազումյան եղբայրների գլխավորությամբ, որոնք «...տարագրության տարիներում նախախնամական դեր մը խաղացին Հալեպի եւ Լիբանանի մէջ, անհամար տարագիրներ ստոյգ մահէ մը փրկելով, եւ մասնաւոր գուրգուրանք մը ու պաշտպանութիւն մը ցոյց տալով հոսանքէն քշուած մտաւորականներու հանդէպ»:⁷⁴ Մասնատողովի գործունեությանն առաջին քայլերից էին՝ Միության կենտրոնից ստացված մեծ քանակությամբ հագուստի, կոշիկի, օճառի եւ նման այլ անհրաժեշտ իրերի հատկացումը նախկին թրքական գորանոցում ապաստանած հազարավոր վերապրողներին, արհեստավորներին գործիքներով եւ հումքով ապահովելը, իրենց ծննդավայրը վերադարձող գեղեցիկներին դրամական նպաստներ հատկացնելը եւ այլն: Այս եւ նման այլ օգնությունը, սակայն, անբավարար էր տիրող իրավիճակում, ուստի ՀԲԸ Միությունը ձեռնամուխ եղավ մնայուն հաստատություններ ստեղծելուն:

Մուրթուսի զինադադարից անմիջապես հետո ՀԲԸ Միությունը, կանխատեսելով վերապրողներին պահանջվող օգնության բնույթն ու աննախադեպ ծավալը, 1918թ. հիմնեց «Հայ աղէտնակներու հիմնադրամը, ...ուրիշ կը հոգացուին ընդհանուր նպաստները՝ բացի որբախնամ գործէն, որուն համար անջատ հիմնադրամ մը կազմուած է»:⁷⁵ Այս հիմնադրամի շնորհիվ 1921թ. Միությունը Հալեպում հիմնեց Գաղթատուն, ուր պատասպարել էին հատկապէս անտերունջ կանայք եւ երեխաներ: Նախապէս ենթադրվում էր, որ Գաղթատունը կլինի առժամյա մի ձեռնարկ, սակայն անօգնական գաղթականների թվաքանակի մշտական աճը ստիպեց վերանայել այդ որոշումը: Այստեղ հիմնականում բնակվում էին այն գաղթականները, որոնք, թեւ աշխատում էին, սակայն ի վիճակի չէին վարձել առանձին սենյակ կամ բնակարան: Գաղթատունը նրանք միայն նվազագույն վարձ էին վճարում, իսկ հիվանդանալու դեպքում անվճար օգտվում էին բժշկական օգնությունից: 1922թ. Գաղթատան երկու ընդարձակ շենքերում, որոնք գտնվում էին քաղաքի Պահսիթա եւ Վեքիլիյե թաղերում, բնակվում էր շուրջ 500 հայ գաղթական: Հետագայում՝ գաղթականների ընդհանուր տնտեսական վիճակի աստիճանաբար բարելավման հետեւանքով, գաղթատան բնակիչների թիվը սկսեց նվազել եւ հնարավոր եղավ ամփոփել միայն մեկ շենքում: Գաղթատան առկայությունը վերստին կարելուովեց 1929թ., երբ Թուրքիայից Հալեպ հասան գաղթականների նոր խմբեր, որոնք եւ դարձան գաղթատան հիմնական բնակիչները: Հալեպի Գաղթատունը փակվեց 1931թ. ապրիլին՝ «...հոն պատասպարուած ամէնէն չքաւոր գաղթականներուն վարձագին մը վճարելով: Այդպիսիները խմբովին իրենց տրամադրուած նիթական օժանդակութեամբ սենեակներ վարձեցին եւ տեղաւորուեցան»:⁷⁶

Արդեն խոսվեց, թե որքան ողբերգական եղավ փախցված կամ «որդեգրված» հայ երեխաների նակատագիրը, որոնք իրենց փոքր տարիքի պատճառով, տարիների ընթացքում հեշտությամբ ընտելացան նոր միջավայրին եւ այդպէս էլ մեծացան ու ապրեցին որպէս թուրք, քուրդ կամ արաբ: Բայց ոչ բոլորը: «Ժամանակէ մը ի վեր, ամեն շաբաթ, ...երեք չորս հոգի կը ներկայանան որբահաւաք մարմնին, որուն կեդրոնն է այժմ Հալեպ: Վերջին չորս ամսուան ընթացքին ներկայացողներուն թիւը հասած է 40-ի: Անոնք ընդհանրապէս 18-էն 26 տարեկան երիտասարդներ են եւ տարագրութեան շրջանի պատանիներ որ մեծցած են եւ որոնցմէ ոմանք, մոռցած ըլլալով հանդերձ մայրենի լեզուն եւ մինչեւ իսկ իրենց անունը կամ ծնողքը, քիչ շատ պահած են իրենց ազգային գիտակցութիւնը եւ ոեւէ պատեմ առիթէ մը օգտուելով վերադարձած են հայութեան ծոցը»:

Այս տողերը գրվել են... 1929թ., այսինքն, սկսած 1915թ. այդ երեխաները, երբ ընդամենը 4-12 տարեկան էին, հետագա 14 տարիների ընթացքում, մոռանալով իրենց անունն իսկ, այնուամենայնիվ, պահպանել էին ամենահիմնականը՝ իրենց ազգային «եսը», ազգային ինքնագիտակցությունը: Եվ պահպանել էին ոչ թե, ինչպէս գրված է հոդվածում՝ «քիչ շատ», այլ այնչափ ուժեղ, որ անտեսելով բոլոր վտանգները՝ մտադրվել էին ամեն գնով գտնել եւ միանալ իրենց հայրենակիցներին: Որք երեխաների հավատարմությունը իրենց ազգի հանդէպ, նրանց վճռականությունը՝ իրենց ազգային ինքնությունը պահպանելու հարցում նշվել է, եւ շատ անգամ զարմանքով, օտարների կողմից:

Ամերիկյան Նպաստամատուցի նախագահ Ջեյմս Բարտընն իր գրքում հենց նման զգացումներով է նկարագրում հետեւյալ դեպքը: Այդ տարիներին հեռավոր Ավստրալիայում նույնպէս եղան մարդիկ, որոնք Մերձավոր Արեւելքի երկրներում զբաղվեցին բարեգործությամբ: Նրանցից էր տիկին Գլենվիլը, որը եկել էր Սիրիա սննդամթերքով բեռնված մարտիկ, որոնք հանդէպին մի հարուստ ավստրալուհու հանձնարարականով՝ գտնել տեղում մի խելացի որբ պատանի՝ նրա ուսման (ներառյալ քոլեջը եւ հետագա մասնագիտացումը) հետ կապված ծախսերը ստանձնելու նպատակով: Միայն թե մեկ պայմանով՝ ընտրված պատանին պետք է վերցնէր կնոջ մահացած ամուսնու անունը: Տիկին Գլենվիլի ընտրությունը ի վերջո ընկնում է Ամերիկյան Նպաստամատուցի որբանոցներից մեկի սան՝ Վարդան անունով մի հայ պատանու վրա: Այս տղան, սակայն, ուշադրությամբ լսելով նրան, լուռ հեռանում է, իսկ կինը հիասթափություն է ապրում՝ կարծելով, թե նա մտադիր չէ շարունակել ուսումը: Բայց հաջորդ օրը Վարդանը հանդիպում է այդ կնոջը եւ պատմում հետեւյալը. «Ես շատ հուզված էի ավստրալացի տիկնոջ նման առաջարկությունից եւ

չկարողացա բառեր գտնել զգացմունքներս արտահայտելու համար: Հիմա ես մի քիչ կարատմեմ ձեզ իմ կյանքի մասին: Հինգ-վեց տարի առաջ ես իմ ծնողների, եղբայրների ու քույրերի հետ երջանիկ ապրում էի Թուրքիայի Խարբեթո գահանգի գյուղերից մեկում: Ես ընդամենը 8 տարեկան էի: Մենք հաճախում էինք գյուղի եկեղեցին, որի քահանան մեր ընտանիքի մոտիկ բարեկամն էր: Մի անգամ ես հարցրի մորս, թե որտեղից է իմ անունը: Նա պատմեց, որ երբ ես շատ փոքր էի, ինձ տարան եկեղեցի, ուր եւ մկրտեցին՝ տալով ինձ Վարդան անունը: Մի օր էլ մեր գյուղում մեծ հուզումներ սկսվեցին: Ժողովուրդը խուճապահար այստեղ-այնտեղ էր վազում: Ընչեք էին լսվում, թե քոչերը հարձակվել են: Նրանք շուտով գրոհեցին գյուղը: Մեր տունը այրվեց: Իմ հայրը եւ մայրը սպանվեցին: Իմ քույրը, եղբայրս եւ ես կարողացանք փախչել, բայց կորցրինք միմյանց: Ես թաքնվել էի գյուղի մոտակա սարերում: Ես տեսա, որ գյուղի բոլոր տները, եկեղեցին այրվում էին, իսկ մեր տունը արդեն քանդվել էր: Ես հեռացա եւ ամիսներ շարունակ չգիտեի, թե ինչ էի անում, ուր էի գնում: Հիմա, տարիներ անց, ես այստեղ եմ, այս որբանոցի դպրոցում: Ես կորցրել եմ ամեն ինչ՝ հորս, մորս, քույրերիս, եղբայրներիս, տունս, եկեղեցին, մեր գյուղը, այն ամենը, ինչ հիշեցնում էր ինձ իմ անցած երջանիկ կյանքը, բացի իմ Վարդան անունից: Սա իմ միակ կապն է անցյալի հետ՝ իմ մորս, իմ տանս հետ: Ես չեմ կարող հրաժարվել իմ անունից: Սա այն վերջին բանն է, որ կապում է ինձ այդ բոլոր հիշողությունների հետ»:⁷⁷

Նահր էլ Օմար - Երուսաղեմ - Ադիս - Աբեբա

ՀԲԸ Միության որբանոցների շարքում իրենց ստեղծման հանգամանքներով առանձնահատուկ էին Երուսաղեմի որբանոցները: Դեռեւս 1921թ. կեսերին հայտնի դարձավ, որ Միջագետքի (Իրաք) բրիտանական իշխանությունները որոշում են կայացրել փակել Նահր էլ Օմարում գտնվող հայերի գաղթականացումը: Գաղթականացումն ապաստանածների մեծ մասը վասալականացի հայեր էին, որոնք 1918թ., խույս տալով թուրքական զորքերի հարձակումներից, փորձեցին անցնել Արևելյան Հայաստան, սակայն ճանապարհների փակ լինելու պատճառով անցան Պարսկաստան: Մինչ այդ, թուրքական զորքերը գրավել էին նաև Պարսկաստանից դեպի Արևելյան Հայաստան տանող ճանապարհները, ուստի նրանք տեղի՝ հիմնականում Ուրմիայի, Խոյի եւ Սալմաստի հայերի հետ գաղթեցին դեպի հարավ՝ ապավինելով անգլիական իշխանությունների խոստումներին, թե շուտով իրենց կտեղափոխեն Հայաստան: Իրականում

անգլիական զինվորական իշխանությունների նպատակն այլ էր՝ հայերին, ինչպես եւ քրիստոնյա այլ գաղթականներին դարձնելով մշտական բնակիչներ՝ մի կողմից աշխատեցնել տեղի հարուստ նավթահանքերում, իսկ մյուս կողմից՝ համալրելով նրանցով իրենց զորքերը, ամրապնդել այդ տարածաշրջանում: 1920թ. աշնանը հայ գաղթականների հիմնական մասը տեղափոխվեց նավթով հարուստ Բասրայի նահանգի Նահր էլ Օմար ավանը, ուր հիմնվել էր գաղթականացումը:⁷⁸ Հայ գաղթականները, հասկանալով, որ անգլիական իշխանությունների ծրագրի իրականացումը հարցականի տակ է դնում իրենց Հայաստան վերադառնալը եւ չի ապահովում իրենց կյանքի անվտանգությունը Միջագետքում, մերժեցին այդ ծրագիրը եւ հիշեցրեցին իրենց տրված խոստումները: Անգլիական իշխանությունները, իրենց հերթին, դիմեցին տարբեր պատժամիջոցների, իսկ 1921թ. գարնանը ներկայացրին յուրահատուկ մի վերջնագիր. հայ գաղթականներին այլևս օգնություն չէր տրվելու, եւ Հայաստան մեկնելու համար անհրաժեշտ միջոցները նրանք պետք է հայթայթեին ինքնուրույն, այսինքն, պետք է համաձայնվեին ապրել եւ աշխատել այդ երկրում շուրջ 10 տարի: Հայտնվելով նման կացության մեջ՝ գաղթականները 1921թ. ամռանը կապ հաստատեցին Խորհրդային Հայաստանի պաշտոնական ներկայացուցիչների հետ՝ խնդրելով տեղափոխել իրենց հայրենիք: Նույն թվականի հոկտեմբերին Հայաստանի արտաքին գործերի ժողովմիսարիտը Մեծ Բրիտանիայի արտաքին գործերի նախարարությանը հղած նոտայում նշում էր, որ անգլիական կառավարությունը կարող եւ պարտավոր է հրաժարվել հայերին Միջագետքում մշտապես բնակեցնելու քաղաքականությունից՝ վերսկսելով միաժամանակ նրանց օգնության գործը: Որպես հարցի այլընտրանքային լուծում առաջարկվում էր «...միջոցներ ձեռք առնել նրանց տեղափոխելու Պուլսի վրայով դեպի Բաթում, որպեսզի Հայաստանի կառավարությունը հնարավորություն ունենա տեղափոխել նրանց իր սահմաններում»:⁷⁹

Հարցի դրական լուծման առումով կարևոր դեր խաղացին նաև արտասահմանում գործող հայկական կազմակերպությունները՝ Ազգային պատվիրակությունը, ՀԲԸ Միությունը եւ այլն, որոնք կոչ էին անում բրիտանական կառավարությանը՝ չդադարեցնել օգնությունը հայ գաղթականներին: 1921թ. հուլիսի վերջերին Լոնդոնում՝ Մեծ Բրիտանիայի գաղթային նախարարությունում, հրավիրվեց Նահր էլ Օմարի գաղթականներին նվիրված խորհրդակցություն, որին մասնակցեց նաև Ազգային պատվիրակությունը ի դեմս ՀԲԸ Միության Գործադիր Ժողովի ատենապետ Առաքել Նուպարի: Թեև խորհրդակցության ընթացքում որեւէ որոշում չկայացվեց, ի վերջո, բրիտանական իշխանությունները նախընտրե-

ցին հայ գաղթականներին նավերով տեղափոխել Բաթում: 1921թ. դեկտեմբերին շուրջ 3000 գաղթականներ հասան Բաթում, իսկ այնուհետև՝ Հայաստան: Այս խմբի ներգաղթը նշանավորեց հայ ժողովրդի արդի պատմության յուրահատուկ էջերից մեկի՝ հայրենադարձության սկիզբը, որը կարճ եւ երկար ընդմիջումներով, իր մութ եւ լուսավոր կողմերով շարունակվեց հետագա շուրջ վեց տասնամյակների ընթացքում:

Այն պահին, երբ հայտնի դարձավ Միջագետքի բրիտանական իշխանությունների նշված որոշման մասին, սփյուռքի հայությունը, ազգային բոլոր կազմակերպությունները առավել մտահոգված էին Նահր էլ Օմարում գտնվող որբերի ճակատագրով:

Նախապես որոշված էր, որ նրանք մեծահասակների հետ նույնպես պետք է ներգաղթեին Խորհրդային Հայաստան: Սակայն երեխաների մեջ սկսված կարմրախտի պատճառով նրանց մեկնումը հետաձգվեց: Բայց մինչ այդ որբերին Հայաստան տեղափոխելու հետ իրենց անհամաձայնությունն էին արդեն հայտնել արտասահմանի հայության մի շարք հայտնի ազգային գործիչներ: «Եգիպտահայոց Առաջնորդը՝ Թորոս Եպիսկոպոս Գուշակեանը, Նահր էլ Օմարի որբերու Բաթում փոխադրելու լուրը առնել է վերջ, հանգստությունը կորսնցուցած էր, քաջ գիտնալով որ այս մատաղ սերունդը այս եղանակին այս դրությամբ մեջ Հայաստան ուղարկելը հետո է խելօքութենէ»:⁸⁰ Նման դիրքորոշման հիմքում այն արդարացի մտավախությունն էր, որ Իրաքի շոգ անապատային կլիմայից հետո երեխաների անմիջապես փոխադրումը Հայաստան, ձմեռվա ամեցուցուրտ ամիսներին, անխուսափելիորեն վտանգելու էր նրանց առանց այն էլ քայքայված առողջությունը: Մյուս կողմից, որբերի փոխադրումը Հայաստան դիտվում էր անկարելի, նկատի առնելով այնտեղ տիրող համատարած ճգնաժամը, մասնավորապես, համաճարակ հիվանդությունները, սովը եւ այլն:

Եվ նորից թե հայ եւ թե օտար շահագրգիռ կազմակերպությունների եւ անձերի հայացքները ուղղվեցին դեպի ՀԲԸ Միությունը՝ որպես միակ կազմակերպություն, որ ի վիճակի էր ստանձնել այդ բարդ եւ պատասխանատու խնդրի լուծումը: Միության համար (որն այդ պահին արդեն ուներ սեփական որբախնամ հաստատություններ եւ օժանդակում էր նմանատիպ այլ հաստատություններին) Միջագետքի որբերի խնդիրը, որոնց քանակը գերազանցում էր Միության բոլոր որբանոցների սաների քանակը, դժվար լուծելի էր:

1921թ. նոյեմբերի 8-ին ՀԲԸ Միության կենտրոնական Վարչական Ժողովը՝ ատենապետ Պողոս Նուպարի եւ ատենադպիր Գրիգոր Սինապյանի ստորագրությամբ շրջաբերականով դիմեց իր բոլոր մասնաճյու-

ղերին ու անդամներին, որն ամբողջությամբ նվիրված էր Նահր էլ Օմարի որբերի ճակատագրին: «Առանց վճռական եւ անմիջական օգնության,- ասված էր շրջաբերականում,- մեր որբերը *սովահար լինելու վտանգին ենթակայ են*: Այս իսկ է ողբալի ճշմարտությունը իր բովանդակ մերկութեան մեջ: Նահր էլ Օմարի ութը հարիւր որբերուն, եթե ձեռք չերկարենք, դեպի ստոյգ մահ պիտի դիմեն: Վայրկեանը իսկապէս ծանրակշիռ է եւ չենք գիտեր թե վաղը ինչ չսպասուած ու չի նախատեսուած դէպքեր մեզի մտածել պիտի տան մեր միւս որբերուն վիճակին ու ասպագային համար ալ»: Եվ ահա շրջաբերականի բուն նպատակը. «Ներկայ շրջաբերականը երբ ստանաք, հաճեցէք առանց թույլ մը կորսնցնելու ժողովի հրաւիրել Միութեան բոլոր անդամներն ու համակիրները, նոյնիսկ օտար բարեկամներ, ու կարելին, նոյնիսկ *անկարելին ըրէք* (ընդգծումները՝ բնագրից-Էդ.Մ.), ձեր մէջ որբերուն պաշտպաններ գտնելու համար: Ամէն խնայողութիւն ընելով տարեկան առնուազն քսան եւ հինգ անգլ. ոսկի մէկ որբ պիտի ապրեցնէ, այսինքն Հայաստանի ասպագա քաղաքացի մը պիտի փրկէ... Դիմեցէք հայ մայրերուն եւ հայրերուն, անապատի աւագներուն մէջ անշիրիմ հանգչող մեր պաշտելի նահատակներուն անունով, անոնց սրբազան մասունքներն են որ պիտի կորսուին իսպառ, եթե գերագոյն ճիգով մը չի փութանք իրենց օգնութեան»:⁸¹

Այս շրջաբերականը նմանատիպ այլ շրջաբերականներից առանձնանում էր նրանով, որ Միությունը առաջին անգամ պարտադրված էր հատուկ հանգանակության կոչ անել որոշակի թվով եւ որոշակի վայրում գտնվող հայ որբերին օգնելու նպատակով: Ինչպես նշվում էր փաստաթղթում, «Կեդր. Վարչ. Ժողովը իր կազմութեան օրէն իսկ ինքզինքը այս ահաւոր կացութեան առջեւ կը գտնէ, եւ իր առաջին կոչը կ'ուղղէ արտասահմանի մեր բոլոր մասնաճիւղերուն եւ հանութ հայրենակիցներուն»: Ավանդույթի համաձայն, առաջին արձագանքողները եղան Միության, նրա մասնաճյուղերի ղեկավարները (Պողոս Նուպար, Առաքել Նուպար, Ե.Աղաթոն, Տիգրան խան Քելեկյան, Տ.Կյումուշկերտան, Կատարինե Ա.Լիմոնճեյի՝ Յաղուպ Արթինի դուստրը, Նոյեմի Գափամաճյան՝ Պողոս Նուպարի քույրը եւ այլք)՝ օրինակ ծառայելով Միության բոլոր անդամներին: Այս նույն հանգանակության ընթացքում առաջին անգամ հայտնի է դառնում Նյու Յորքի մասնաճյուղի եռանդուն անդամներ Միհրան եւ Արշակ Գարակյոզյան եղբայրների անունը, որոնք երեք տարի ժամկետով ստանձնեցին 150 որբի հոգսը, այդ նպատակին հատկացնելով 54.000 դոլար: «Հարկ կա՞յ ստորագծել ջբեղութիւնը այս վեհանձն արարքին, զոր անկեղծ հաճույքով կը յիշատակեմ հոս»,- ասում էր Պողոս Նուպարը

1922թ. ընդհանուր ժողովում՝ բնավ չենթադրելով, որ եղբայրներից մեկը՝ Արշակը, շուրջ քսան տարի անց գլխավորելու է ՀԲԸ Միությունը:

Մինչ այդ Ազգային պատվիրակության խնդրանքով Եգիպտոսի Հայ Առաքելական թեմի առաջնորդ եւ Միության պատվո անդամ Թորոզոս Գուշակյանը Երուսաղեմի Հայոց Պատրիարքի հետ քննել էր այդ քաղաքում որբերին տեղավորելու հնարավորությունները: Պաղեստինի անգլիական իշխանությունները, ի վերջո, համաձայնվեցին այդ առաջարկին, սակայն մնում էր չլուծված երկրորդ, ոչ պակաս կարեւոր՝ անհրաժեշտ միջոցների խնդիրը: Անգլիական իշխանություններն իրենց համաձայնությունը պայմանավորեցին Ամերիկյան Նպաստամատույցի կամ ՀԲԸ Միության պարտավորությամբ՝ ստանձնել որբերի բնակարանի, սննդի, հագուստի եւ այլնի հետ կապված անխտիր բոլոր ծախսերը. «...այն բացարձակ պայմանաւ որ այդ որբերը ունէ կերպով բեռ չըլլան Պաղեստինի կառավարութեան վրայ»:⁸² Դեռեւս Լոնդոնի վերոհիշյալ խորհրդածողովում Առաքել Նուսարը, անդրադառնալով Նահր էլ Օմարի որբերի հարցին, հայտարարել էր, որ «...թէեւ ՀԲԸ Միութիւնը արդեն քանի մը որբանոցներու բեռ ունի, բայց ի հարկին պիտի փորձէ նոր ճիգ մը եւս ընել եւ առ առաւել 400 որբի հոգատարութիւնը ստանձնել, եթէ, ինչպէս հաւաստիք տրուած է Նիւ Յորքէն, Նիր Իսթ Բըլիֆը տրամադրէ իր լայն օժանդակութիւնը եւ որբերը կարելի ըլլայ Երուսաղէմ փոխադրել պետական ծախքով»:⁸³

Ամերիկյան Նպաստամատույցը իր հերթին հրաժարվեց ստանձնել բոլոր ծախսերը, ապա սկսվեցին երկար բանակցություններ նրա եւ Միության միջեւ, որոնք, ի վերջո, պսակվեցին հաջողությամբ: Ամերիկյան բարեսիրական կազմակերպությունը ստանձնում էր անհրաժեշտ ծախսերի կեսը այն պայմանով, որ ՀԲԸ Միությունը իր վրա վերցնի կազմակերպական ողջ աշխատանքը (ընդունում, տեղավորում, դաստիարակում եւ այլն), ինչպես նաեւ ծախսերի մյուս կեսը: Այն փաստը, որ Պաղեստինի անգլիական իշխանությունները ամերիկյան հանրաճանաչ եւ խոշոր Նիր Իսթ Բըլիֆ բարեսիրական կազմակերպության կողքին որպէս երաշխավոր ցանկանում էին տեսնել ՀԲԸ Միությունը, անշուշտ, պատվաբեր էր եւ վկայում էր նրա մեծ հեղինակության մասին: Նման գնահատումը նաեւ խիստ պարտավորիչ էր, եւ Միությունը պետք է ձգտեր արդարացնել թե հայրենակիցների եւ թե օտարների հույսերը:

Վերջապես, 1921թ. դեկտեմբերին Վահան Մալեգյանը հեռագրով արդեն հայտնում էր. «Նիր Իսթ եւ Բարեգործական կը վստահեցնեն Նահր էլ Օմարի որբանոցը խնամել Երուսաղէմի վանքին մէջ, յայտնեցէք որբանոցի մեկնման թուականը»:⁸⁴

Մեծ դժվարությունների հետ էր կապված նաեւ որբերի տեղավորումը Երուսաղեմում: Երուսաղեմի Հայոց պատրիարք Եղիշե արքեպիսկոպոս Դուրյանի ջանքերի շնորհիվ որբերի բնակության համար հատկացվեցին Ա. Հակոբյանց վանքի Պահջէ (Պարտեզ) եւ Չամ (Սոճուտ) թաղերը: Երեխաների փոխադրության, ընդունելության եւ տեղավորման հարցերով առաջին իսկ օրերից զբաղվում էին Միության Գործադիր ժողովը, կրթական եւ Որբախնամ Կենտրոնական հանձնախմբերը, սակայն անհրաժեշտ նկատվեց հենց տեղում՝ Երուսաղեմում, ստեղծել հատուկ խնամակալություն, որը կազմակերպելու եւ համակարգելու էր ողջ աշխատանքը: «...Կեդրոնի Գնմանց Յանձնախմբի ժրջան անդամները եւ Կեդր. Մթերանոցի պաշտօնէութիւնը ամէն ջանք ըրին Երուսաղէմ հասցնելու մեծաքանակ իրեղէններ, հագուստ, ճերմակեղէն, անկողին, սպաս, պարէն եւն: Բանի մը շաբաթուան մէջ յաջորդաբար փոխադրուեցան 210 հակ եւ սնտուկ, ընդամէնը 2385 եգ.ուկի արժէքով: Տեղույն վրայ եւս խնամակալութիւնը, իրեն աջակից ունենալով Գնման մասնախումբը եւ Տիկնանց Հանդերձարանը, յաջողեցաւ ժամանակին լրացնել անհրաժեշտ գնումները եւ նախնական կարգադրութիւնները, այնպէս որ երբ որբերը Երուսաղէմ հասան, գրեթէ ամեն ինչ պատրաստ էր, գեթ պատասխարումի եւ պարենատրումի տեսակէտով»:⁸⁵

Այդ տարիներին հայերի հոգեվիճակի, որբերի ճակատագրի նկատմամբ յուրահատուկ վերաբերմունքի դրսևորումներից էր հետևյալ դեպքը, որ տեղի ունեցավ Միջագետքից նրանց մեկնելու պահին: «...816 որբերուն հետ շոգենաւ մտած էին երկու որբունիներ եւս, Տոպանեան քոյրերը, օր. Մաննիկ եւ Ատրիճէ: Բայց ասոնց ճակատագիրը այլապէս տնօրինուած էր: Միջագետքի Տարագրելոց Նպաստամատույց Մարմնի անխոնջ ատենապետը տ. Մարտիրոս Գույումճեան, որ բոլորանուէր տրամադրուած էր այդ շրջանի որբախնամ գործին, ու իր գործակիցը տ. Ստեփան Փափագեան (նոյն Մարմնոյ ատենադպիրը), որ օրերով զբաղուած էին որբերուն ուղեւորութեան յարակից բոլոր խնդիրներով եւ մինչեւ շոգենաւ առաջնորդած էին իրենք, անակնկալ որոշում մը կուտան վերջին պահուն, կնութեան առնելով երկու քոյրերը, իբրեւ կենդանի յիշատակը այդ դժբախտ էակներուն հանդէպ իրենց տածած սրտցաւ խանդաղատանքին: Որբերուն ընկերակցող քահանան, Տէր Յովհաննէս Սիմոնեան, նոյնհետայն կը կատարէ կրկին պսակի խորհուրդը, սրտառուչ արարողութեամբ մը, եւ նաւապետը, փոխարկուելով հանդիսապետի, շոգենաւը խրախնամքի գեղեցիկ ոգևորութեամբ մը կը լեցնէ»:⁸⁶

Երեխաները, այդ թվում նաեւ իրենց միացած ՀԲԸ Միության Մոսուլի փակման ենթակա որբանոցի 47 որբերը, Երուսաղեմ հասան 1922թ.

փետրվարին, ուր նրանց դիմավորեցին Հայոց պատրիարքը, Միության մասնաճյուղի եւ Խճամակալության պատվիրակները, ինչպես նաեւ մեծ թվով տեղացի հայեր: Նահր էլ Օմարից ժամանած որբերի թվում էր նաեւ Նոյեմզար Վարդանյանը, որն իր հուշագրություններում այսպես է նկարագրել իրենց մուտքը Երուսաղեմ. «Բազմութիւն. այլազան տարազով մարդիկ ու կիներ: Բայց ամէնէն աւելի մեր ուշադրութիւնը գրաւեցին խումբ մը սեւազգեստ մարդիկ՝ մանաւանդ իրենց սրածայր գլխարկներով եւ մօրուքներով: Կրօնական տեսած ըլլալս չէի յիշեր ես: Անոնք Ս. Յակոբայ Միաբանութեան բարձրաստիճան կղերականներն էին՝ եկած դիմաւորելու մեզ՝ մեր ցեղին խեղճ բեկորները: Անջնջելի պիտի մնայ միտքիս մէջ՝ վաճառ մտնելու մեր պահը: Երկինքը ամպամած էր արդեն, եւ երբ հասանք՝ սկսաւ մեղմօրէն անձրեւելու. բակին մէջ հաւաքուած էին տեղացի հայեր. բոլորն ալ աչքերը թաց էին, եւ շատեր կու լային: Ես ալ լացի՝ որովհետեւ ամէն մարդ կու լար՝ հակառակ որ ուրախ էի հոն գտնուելուս համար ... Ահա մեզի մօտեցան ճերմակ գոգնոցներ հագած կիներ ու մարդիկ. սափրիչներն էին, եւ իրենց պարտականութիւնն էր մեզ ազատել մեր ոջիղներէն ու անիծներէն, ապա՝ լոգցնել ու մաքրել ...: Յետոյ մեզի տուին նոր-նոր հագուստներ, աղուոր ուտելիք, եւ տարին ննջարաններ: Մեր ուրախ աղմուկը լեցուցած էր մթնոլորտը. ի՛նչ զսպանակաւոր մահճակալներ էին ատոնք՝ ներքնակով, բարձով ու վերմակով...: Չէինք կրնար հաւատալ որ այդ բոլորը մեզի համար էին. ու կը ցատքէինք, կը պրոնայինք, կը վազվզէինք. կարծես դժոխքէն անցած որբերը չէինք...: Առաւօտուն՝ առատ նախաճաշ, ապա՝ ճաշ ու ընթրիք, եւ այսպէս՝ ամէն օր...: Փոխուած էր աշխարհ...»: ⁸⁷

Հետաքրքրական են նաեւ ժամանակակից առաջին տպավորությունները այդ երեխաներից. «Օտտ ուրախալի է, որ որբերը կայտատ են, ճամբորդութեան տաղտուկները չեն ազդած իրենց առողջութեան. պէտք է խոստովանիլ թե որբերը, մեծ մասամբ Հայաստանցի, եւ անաղարտ պահած են իրենց բնագաւառի հայրենական չարքաշութիւնը. աչքի կը գարնէ մանաւանդ իրենց կարգապահ ոգին. խեղճ տղաքը գոհ էին որ վերջապէս հասած էին իրենց հանգրուանը, ուր ՀԲԸ Միութեան հոգատար հովանին պիտի վայելէին այսուհետեւ»: ⁸⁸ «Հայաստանցի» երեխաների հիշատակումը պատահական չէր. Երուսաղեմ տեղափոխված 816 որբերից 582-ը Վանից էին, իսկ 103-ը Կարինից՝ (Էրզրումից):

Նորաստեղծ Արարատեան որբանոցի գործունեության առաջին մի քանի ամիսներից հետո պարզ դարձավ, որ եղած տարածքները հարմար չեն. «...կարելի չեղաւ ննջարաններու, դասարաններու, ճաշարաններու եւն. բաժանումները կատարել առողջապահական եւ կրթական պահանջ-

ներու համաձայն»: ⁸⁹ Բացի այդ, քաղաքում վարձու բնակարանների բացակայության պատճառով որբանոցի ուսուցիչներն ու այլ աշխատողները իրենց ընտանիքներով ստիպված էին նույնպես բնակվել որբանոցում: Միության Գործադիր Ժողովը, նկատի առնելով նման կացությունը, որբանոցի խնամակալությանը հրահանգեց վարձակալել հունական Խաչավանքը, ուր եւ 1922թ. հուլիսին Արարատեան որբանոցից տեղափոխվեցին բոլոր՝ 300-ից ավելի որբուհիները եւ արդեն գործող երկսեռ մանկապարտեզը: Այս նոր, Երուսաղեմում Միության երկրորդ որբանոցը կոչվեց Վասպուրական: Նոյեմզար Վարդանյանը վերհիշում էր. «Շուտով աղջիկներու որբանոցը փոխադրեցին քաղաքէն հեռու՝ յունական պարիսպաւոր անտիկ վանք մը. անունը «Խաչավանք» էր կարծես, որովհետեւ կը կարծուէր որ Յիսուսի խաչափայտը առնուած էր այդ տեղէն: Այս վանքը ունէր երկու փոքր եկեղեցի, հսկայ ճաշարան մը՝ երեք շարք մարմար-քարէ սեղաններով, եւ այլ յարմարութիւններ: ...Այս վանքէն ներս՝ մեր կեանքը ստացաւ նոր ուղղութիւն: Վասպուրական որբանոցը եղաւ մեր դրախտը, եւ մենք իրապէս երջանիկ էինք: Դպրոցը իրական դպրոց էր եւ տեղի կ'ունենային կանոնաւոր դասաւանդութիւններ՝ պատրաստուած ուսուցիչներու կողմէ: Այլեւս երեխաներ չէինք. մեր դասարանին դուռին վրայ գրուած էր «Գ.Դասարան»: Ծեծը արգիլուած էր, մեզ կը տանէին տեսարժան վայրեր, եկեղեցի, պտոյտի: Որպէս դպիր երգած ենք Բեթղեհէմի մէջ»: ⁹⁰ Մեկ տարի անց՝ 1923թ. Վասպուրական աղջիկների որբանոցում պատասպարված երեխաների թիվը կազմում էր 353, որոնցից 259-ը սանուհիներն էին, իսկ 94-ը՝ մանկապարտեզ հաճախող տղաներ: Որբանոցի նման կազմը անհրաժեշտ էր դարձրել նաեւ հատուկ «հիվանդարան-դարմանատան» հիմնումը, որը տնօրինում էր Ծվեյցարիայից հրավիրված փորձառու հիվանդապահուհի (եւս երկու հիվանդապահուհիներ՝ Ծվեյցարիայից, աշխատում էին Միության Բելրուֆի որբանոցներում):

Նույն 1923թ. Արարատեան տղաների որբանոցի սաների թիվը կազմում էր 434, որոնցից 40-ը դարձան Ս. Հակոբյանց վանքի ժառանգավորաց վարժարանի աշակերտներ: Այս որբանոցը թե օտար եւ թե հայկական միջավայրում հանրաճանաչ դարձավ հատկապես իր, այսպես կոչված, ֆանֆառի խմբի (փողային նվագախմբի) շնորհիվ: Նվագախումբը հայտնի էր իր կատարողական բարձր արվեստով եւ հաճախ հրավիրվում էր մասնակցելու տարբեր հանդիսությունների: Այսպես, 1923թ. օգոստոսին Երուսաղեմի որբանոցները այցելության եկած Ամերիկյան Նպաստամատուցի ընդհանուր քարտուղար Ջ.Վիքրին եւ պաշտոնական այլ անձինք խնդրեցին, որ նվագախումբը եւ սքաութները՝ «...լաջորդ օրը երկաթուղիի կայարանը գտնուին, ողջերթի համակրական

ցոյց մը ընելու համար ամերիկացի զբօսաշրջիկներուն, որպէսզի անոնք հայ որբերու մասին լաւ տպաւորութիւն մը տանին իրենց հետ, ինչ որ մեծապէս օգտակար կրնայ ըլլալ ապագային համար: ...Հստ այնմ, յաջորդ օրը, որոշեալ ժամուն, սան եւ սանուհիները կայարան գտնուեցան: Մի քանի սաներ «Bon voyage», «Armenia thanks America» վերտառութիւններով դրօշակներ կը կրէին: Ահա այս կերպով համակրական ցոյցերու մէջ ճամբու դրուեցան ամերիկացի զբօսաշրջիկները որոնք մեծ խանդավառութեամբ եւ անվերջ կերպով կը ծափահարէին»:⁹¹

Արարատեան որբանոցի ֆանֆառի խմբի հետ է կապված մի պատմություն, որը որբ երեխաների համար իրականություն է դարձնում իրենց ծանոթ հեքիաթները բարի թագավորների մասին: 1923թ. Ս. Զատիկի օրերին Երուսաղեմ է այցելում Եթովպիայի (Հաբեշտան) գահաժառանգ իշխանուհին: Նա այցելում է Ա.Հակոբյանց վանք՝ Հայոց Պատրիարքին շնորհավորելու նպատակով: Հանդիսավոր ընդունելության ժամանակ նկատելով զգեստավորված երեխաներին՝ նա «...շրջան մը ըրաւ աշակերտաց մէջ, արտասուաթոր աչքերով: Ծառ զգացուած ըլլալ կը թուէր ան,- նշում է ականատեսը,- որովհետեւ կերելի թէ առիթը չէր ունեցած այսքան որբերու հաւաքոյթ» մը տեսնելու, մանաւանդ սեւազգեստ որբուհիներ»:⁹² Այդ «սեւազգեստ որբուհիներից» էր նաեւ Նոյեմվար Վարդանյանը, որի հիշողության մեջ ընդմիշտ դրոշմվել էր այդ արտասովոր հանդիպումը. «Օր մը, պատմութեան մեր ուսուցիչը՝ պրն. Վահանը, մեզի ըսաւ. «Վաղը մանչերու բաժինը պիտի երթանք, մեզ պիտի այցելէ Հապէշներու թագուհին՝ իր հետեւորդներով. թէ թագուհին եւ թէ իր հետեւորդները սեւ են... , չըլլայ որ խնդաք»: Ես բնաւ սեւ մարդ չէի տեսած, եւ անհամբեր էի: Թաշորո օրը գացինք Արարատեան որբանոցը: Անակնկալը միայն թագուհին չէր. այն կտորը որմէ վերարկու պիտի կարուէր մեզի համար՝ որպէս գորգ փոռած էր գետին որպէս յարգանք հիւրերուն: Ամէն բան պատրաստ էր, բայց թագուհին կ'ուշանար: Մեր ուսուցիչը նորէն յիշեցուց որ պէտք չէ խնդայինք: Եվ ահա, ճիշդ այդ պահուն ներս մտան շատ փայլուն հագուստներով գիրուկ մարդիկ՝ իրենց ձեռքի խոշոր գաւազանները գետին խփելով. անոնց ետեւին կու գար կին մը, որուն գլուխին վերեւ բռնած էին հովանոց մը՝ որուն եզերքներէն ոսկի շարոցներ կախուած էին. բոլորն ալ սեւ էին: Զարմացած, բայց առանց խնդալու՝ կը հետեւէի հիւրերուն շարժումներուն: Մենք ալ հագած էինք մեր սեւ պաշտօնական հագուստները: Մեր ծափահարութիւնը պահիկ մը միայն տեսեց, թագուհին, երբ տեսաւ մեզ, չկրցաւ իր յուզումը զսպել եւ սկսաւ բարձրաձայն լալու: Ծուռով զինք հիւրանոց տարին: Ես զարմացած էի եւ յուսախաբ. զարմացած էի որ անծանօթ սեւ թագուհի մը կու լար մեզի համար,

ուրեմն՝ կը գթար մեզի եւ կը սիրէր մեզ... , իսկ յուսախաբ էի որ հանդիսութիւնը աւարտած էր՝ տակաւին չսկսած...»:⁹³

Միության որբանոցների ղեկավարության հետ ունեցած զրույցի ժամանակ իշխանուհին, ծանոթանալով որբանոցների հիմնադրման հանգամանքներին, նվիրատվություն է անում արհեստավոր սաներին գործիքներ գնելու համար, ինչպես նաեւ խոստանում ի նպաստ հայ որբերի շարժում սկսել իր երկրում: Որոշ ժամանակ անց Երուսաղեմ է այցելում նրա ամուսինը՝ գահաժառանգ իշխան Բաս Թաֆարի Մաքունենը, որը տարիներ անց Հայլե Սելասիյե անվամբ պետք է հռչակվեր Եթովպիայի կայսր՝ դառնալով Աֆրիկայի ամենահայտնի պետական գործիչներից մեկը: Երուսաղեմում իշխանը, ինչպես եւ իր կինը, այցելում է նաեւ Հայոց պատրիարքարան, ուր նրան դիմավորողների թվում էր նաեւ Արարատեան որբանոցի ֆանֆառի խումբը: Իշխանը, լսելով խմբի նվագը, ցանկություն է հայտնում նվագող 40 տղաներին իրենց երաժշտական ուսուցչի եւ տեսչի հետ միասին տանել Եթովպիա: Եվ քանի որ նրանք պետք է դառնային իր անձնական եւ կառավարության պաշտոնական նվագախումբը, ապա իշխանը պարտավորվեց հոգալ նրանց ճանապարհածախսը, իսկ Եթովպիայում ապահովել նրանց թոշակով, բնակարանով, հագուստով եւ այլն: Դժվար չէ պատկերացնել, թե ինչպիսի զգացմունքներ ապրեց որբանոցի ղեկավարությունը՝ ստանալով այդօրինակ անսպասելի առաջարկություն, որը երաշխավորում էր մի քանի տասնյակ որբերի ապահով կյանքը այդ դժվար տարիներին:

1924թ. սեպտեմբերին ֆանֆառի խումբը արդեն Եթովպիայի մայրաքաղաք Ադիս Աբեբայում էր, ուր նրան դիմավորեցին պաշտոնական անձինք եւ տեղի հայ համայնքի ներկայացուցիչները: Նվագախմբի անդամներից էր նաեւ Նոյեմվար Վարդանյանի եղբայրը՝ Հովհաննես Մալխասյանը, որն իր հուշերում այսպես է նկարագրում այդ օրը. «1924թ. սեպտեմբերի 6-ին կառախումբով հասանք Եթովպիայ: Եթովպական օրացույցով Նոր Տարի է այդ օրը եւ ամէն կողմ տօնի տրամադրութիւն կար: Երգ, պար, խարոկներով խումբ երիտասարդներ կը վազէին դուռէ դուռ, կ'երգէին եւ նուէր մը ստանալէ յետոյ կերթային յաջորդ դռան: ...Բոլոր հայութիւնը մեզի դիմաւորելու եկած էր կայարան: Զեւակերպութիւններէ յետոյ միակ հայը որ «քամիոն» ունէր, մեզ իր «քամիոնով» պիտի տանէր մեր նոր բնակարանը, որը գահընկէց իշխան Լիճ Եասուի հիւրանոցներէն մէկն էր: Կայարանը վարի քաղաքը կը գտնուի, իսկ մեր շէնքը վերի քաղաքը: Քամիոնը դժուարութիւն ունեցաւ այդ զատիվերը մագլցելու եւ ի վերջոյ տեղ մը եկաւ որ ստիպուեցանք իջնել եւ օգնել, որ հրելով վեր ելլայ: Երեւակայեցէք զարմացած հապէշներուն նայուածքներէ-

րը, որոնք այսքան մեծ թիւով սպիտակամորթ չէին տեսած միատեղ, անոնք ալ քամիոնը հրելու ծիծաղելի վիճակի մը մէջ»:⁹⁴ Ժամանման հաջորդ օրը նվագախմբի անդամներին ընդունեց գահաժառանգ իշխանը, որը, ողջունելով նրանց, ասաց. «Դուք իմ գաւակներս էք, երբեք բանի մը վրայ մի մտածէք, ձեզ գաւակներու պէս պիտի նայիմ»:⁹⁵

Իշխանի կարգադրությամբ նվագախմբի տղաները հետեւեցին նաեւ որոշ արհեստների, որի շնորհիվ էլ տարիներ անց, երբ ֆանֆառի խումբը՝ որպէս այդպիսին, դադարեցրեց գոյությունը, նրանք առանց դժվարությունների ապահովեցին իրենց եւ իրենց ընտանիքների բարեկեցիկ կյանքը: Նրանք եղան ոչ միայն լավ երաժիշտներ, այլեւ իրենց նոր հայրենիքի հավատարիմ քաղաքացիներ: «Եթովպա-իտալական պատերազմի միջոցին, մեր 40 տղաքը,- վերհիշում էր Հ.Մալխասյանը,- որոնցմէ շատերը քամիոնի տէր եղած էին, եթովպական բանակի մատակարարման մէջ խոշոր գործ տարին, նույնիսկ զոհեր տալով: Իտալացիները այս գիտէին եւ 1935-1940թթ. իրենց տիրապետութեան շրջանին մեզի լաւ աչքով չնայեցան: Ծառերը ստիպուեցան Ծիպութի փախիլ, որը ֆրանսիական քօլօնի էր: Ուրիշներ արքայի ենթարկուեցան կղզիի մը վրայ: Իսկ անոնք, որ ինձ նման ուղղակի մասնակցութիւն չէին ունեցած, աշխատանքի իրաւունք չստացան եւ դժուար կեանք մը ունեցանք»: Նման նվիրվածությունը աննկատ չմնաց. Երկրորդ համաշխարհային պատերազմի ավարտից հետո Եթովպիայի կայսրը «...բոլոր Եթովպիա գտնուող 40 տղոց խումբին մնացեալներուն նուիրած էր 500 ք.մ. հող իւրաքանչիւրին՝ տուն մը շինելու համար»:⁹⁶ Նրանք եղան նաեւ լավ հայրենասերներ եւ մնացին միշտ երախտապարտ ՀԲԸ Միությանը: 1925թ. Նոր տարվա առիթով ֆանֆառի խումբը Ադիս Աբեբայում կազմակերպեց երաժշտական մի երեկոյթ, որի ողջ հասույթը ուղարկվեց Միության Գործադիր Ժողովին՝ «...տակաւին որբանոցներու մէջ մնացող իրենց եղբայրակիցներու օգտին գործածելու համար»:⁹⁷

Երուսաղեմի Արարատեան եւ Վասպուրական որբանոցները գործեցին շուրջ չորս եւ կես տարի՝ մինչեւ 1926թ. մայիս: Միության կենտրոնական Վարչական Ժողովը, հաշվի առնելով, որ որբուհիների մի մասի ամուսնության, ինչպէս նաեւ կիսորսի Մելգոնեան վարժարան եւ այլ հաստատություններ շուրջ 100 որբերի փոխադրման պատճառով որբանոցների սաների թիվը նկատելիորեն նվազել էր, որոշում է փակել այդ երկու որբանոցները, իսկ մնացած սաներին տեղափոխել Բելյուրո՝ Քէլէկեան-Սիսուան որբանոց: Նման որոշումը հիմնավորված էր նաեւ զուտ տնտեսական առումով, քանզի Երուսաղեմը համեմատաբար թանկ քաղաք էր. «Մինչ Պէլյուրոյի մէջ միջին հաշուով որբ գլուխ տարեկան 18-19

եգ.ուկի կը ծախսենք, Երուսաղեմի մէջ կը ծախսէինք 22-26 եգ.ուկի: Բաց աստի, Երուսաղեմի մէջ մեր տրամադրութեան տակ ունեցած շէնքերը որբանոցի անհարմար ըլլալով, արգելք կը հանդիսանային մեր յիշեալ երկու որբանոցներուն կանոնաւոր եւ բարուրք գործունէութեանը»:⁹⁸ Երուսաղեմի Արարատեան եւ Վասպուրական որբանոցները իրենց գործունէության վերջին տարում ունեին 372 սան-սանուհիներ:⁹⁹

Չափահաս որբերի խնդիրը

1923թ. «Միութիւն» ամսագիրը գրում էր. «ՀԲԸ Միութեան որբերը մեծնալու վրայ են: Անոնք հետզհետէ չափահասութեան տարիքը կը թեւակոխեն եւ պէտք է հրաժեշտ տան այլեւս զիրենք պատասպարող եւ կրթող հաստատութիւններէն, իրենց տեղը տալու համար աւելի փոքրասի իրենց եղբայրներուն եւ քոյրերուն»:¹⁰⁰ Ընդհանրապէս, հայ որբերի, ինչպէս նաեւ որբանոցներում պատասպարված երեխաների թվաքանակի վերաբերյալ ստույգ, ճշգրիտ տվյալներ չկան: Որոշ տեղեկությունների համաձայն, 1923թ. տարբեր երկրներում գործող ավելի քան 20 որբանոցներում հայ սաների թիվը հասնում էր շուրջ 25-27.000-ի: 1920-ական թթ. կեսերին որբերի քանակը Խորհրդային Հայաստանում հասնում էր 60.000-ի, ներառյալ Ամերիկյան Նպաստամատուցի (Հայաստանում հայտնի էր որպէս Ամերկոմ) որբանոցների շուրջ 20.000 սաները:¹⁰¹

Այն հարցը, թե ինչպիսին է լինելու որբանոցներում պատասպարված երեխաների հետագա ճակատագիրը, թե հրաժեշտ տալով որբանոցների՝ կկարողանա՞ն արդյոք ապրել ինքնուրույն կյանքով, ապահովել իրենց գոյությունը, Միության ղեկավարության առջեւ ծառայած որբանոցների հիմնադրման առաջին իսկ օրից: Այդ տարիներին նշված խնդրի կարեւորությունն ու նշանակությունը հայերի համար չէր կարելի համեմատել ուրիշ շատ ժողովուրդների համանման խնդիրների հետ: Հայտնի է, որ որբ երեխաների քանակը բնականոն զարգացող որբեր երկրում լինում է չնչին եւ նրանց խնամքը, ուսուցումն ու նման այլ հարցեր ստանձնում է նախ եւ առաջ պետությունը՝ նպատակ ունենալով աճեցնել եւ դաստիարակել հասարակության լիիրավ անդամներ: Հայ որբերի պարագան սկզբունքորեն տարբեր էր: Նրանք գրկվել էին ոչ միայն ծնողներից, այլեւ հայրենիքից եւ հայտնվել տարբեր երկրներում, որոնցից եւ ոչ մեկը ի վիճակի չէր եւ ոչ էլ մտադիր էր զբաղվել հայ որբերով, առավել եւս՝ ապագայում մասնագիտություն, կրթություն, աշխատանք ապահովելու եւ նման այլ հարցերի լուծման առումով: Ավելին, նույն այդ երկրներ-

որը՝ Սիրիա-Լիբանան, Եգիպտոս, Պաղեստին, գտնվելով սոցիալ-տնտեսական զարգացման ցածր աստիճանի վրա, դժվարությամբ էին ապահովում սեփական ժողովուրդների գոյության տարրական պայմանները, իսկ Հունաստանը ստիպված էր նախ եւ առաջ զբաղվել այն բազմաբազար հույն գաղթականների ճակատագրով, որոնց հաջողվել էր փախչել Օսմանյան կայսրությունից: (Որք երեխաներին Խորհրդային Հայաստան տեղափոխելու կարելիության մասին՝ 4-րդ գլխում):

Այդ հրատապ դարձած խնդրի լուծման համար Միությունն իր բոլոր որբանոցներում ձեռնամուխ եղավ հատուկ ծրագրի իրականացմանը, որի նպատակը սաներին որոշակի արհեստ սովորեցնելն էր, «...որպեսզի... ի վիճակի ըլլան ճարել իրենց պատատիկը, որբանոցն հրաժեշտ առնել վերջ»:¹⁰²

ՀԲԸ Միությունը, նկատի առնելով թե որբանոցների չափահաս սաների թվի մշտական աճը եւ թե արդեն գործող կամ հիմնվելիք յուրաքանչյուր որբանոցին կից արհեստանոց կազմակերպելու հետ կապված դժվարություններն ու ծախսերը, նպատակահարմար գտավ հատուկ արհեստանոց-որբանոցների հիմնումը: Արդեն 1921թ. սեպտեմբերին Հայկապոլիսում հիմնվեց Կիլիկեան Արհեստանոց-Որբանոցը, որը համարվեց Միության որբանոցների չափահաս սաներով: Սկզբնական շրջանում այստեղ հաստատվեցին կոշկակարության եւ ատաղձագործության, իսկ հետագայում՝ նաեւ դերձակության ճյուղերը: Բացի այդ մասնագիտություններից, Արհեստանոց-Որբանոցի սաները հնարավորություն ունեին Հայկապոլիսում արհեստավորների մոտ ձեռք բերել այլ մասնագիտություններ եւս: Կիլիկեան Արհեստանոց-Որբանոցը գործեց մինչեւ 1926թ., երբ փակվեց չափահաս որբերի թվի նվազման պատճառով: Գոյության հինգ տարիների ընթացքում այդ հաստատությունում տարբեր արհեստների հետեւեցին ՀԲԸ Միության Մերսինի, Տյորո-Ցոլի, Երուսաղեմի, Բեյրութի որբանոցների 298 չափահաս որբեր: «Ասոնք կը դասատորուին հետեւեալ կերպով՝ ըստ իրենց հետեւած արհեստին,- կոշկակար 84, ատաղձագործ 71, դերձակ 36, շօֆէօր 25, կահագործ 12, երկաթագործ 21, թօռնոճի (փականագործ - Էդ.Մ.) 3, փորագրիչ 6, սափրիչ 2, լուսանկարիչ 4, ոսկերիչ 3, գրաշար 4, խաղախորդ (կաշեգործ - Էդ.Մ.) 1, քարակույտ 6, կազմարար 1, երկրաչափ 1, պղնձագործ 1, լամբարագործ 2 եւ անտերական պաշտօնեալ 1»: Միության 1925թ. տեղեկագրում հասկանալի հպարտությամբ նշվում էր. «Այս արհեստանոցը մեր որբերուն վերջին կայանն էր, ուրկէ անոնք կ'անցնէին գործի աշխարհը՝ տիրացած արհեստի մը: Անվերապահօրէն կրնանք ըսել թէ Կիլիկեան Որբանոց-Արհեստանոցը, այս տեսակէտով իր դերը լիովին կատարած է»:¹⁰³

Այդպիսին էր նաեւ որբանոցների սաների գնահատականը, ինչի ապացույցն էր Երուսաղեմի որբանոցի շրջանավարտներից Ե.Ներսիսյանի՝ 1923թ. Միության ղեկավարությանն ուղղված նամակը, որը «Միութիւն» ամսագիրը հրատարակել էր «...այնպէս, ինչպէս գրուած է, առանց փոփոխութեան»։ «Այս խնդրանքովս կուգամ ձեզի խնդրելու որ այս եղաւ մօտաորապէս 7-8 տարի որ ես հայկական որբանոցի մէջն եմ. ես անօթի էի հաց տուիք, մերկ էի հագուստ տուիք, միտքս մութ էր լուսաորեցիք, մանուկ էի պատանի ըրիք: Ուրեմն շատ եւ շատ երախտապարտ եմ համայն ազգին որ մինչեւ հիմա ինձի այս կատարելութեան հասցուցիք. այլեւս կը տեսնեմ որ բազուկներս զօրացած են եւ հասակս երկարեր է, ու ինքզինքս հոս ըլլալս տեսնելով ամօթ կը զգամ: Ուրեմն երթամ աշխատիմ, քրտինք թափեմ արդիւնք ստանամ եւ այդ արդիւնքից բաժին հանեմ անոնց որոնք կարօտեալ են օգնութեան...»:¹⁰⁴ Հայտնի չէ, թե վերը թվարկած արհեստներից որն էր նախընտրել այս նամակի հեղինակը, եւ դա այնքան էլ կարեւոր չէ: Կարեւորն այն է, որ նա, ինչպէս եւ իր հազարավոր հասակակիցներ, դարձան ձեւավորվող հայ սփյուռքի սոցիալական կառուցվածքի ամենախոշոր՝ արհեստավորների խավի ներկայացուցիչը: Եվ այդ խավն էր, որ դարձավ սփյուռքի տնտեսական եւ ֆինանսական հենքը, նրա շնորհիվ էր, որ աշխարհի տարբեր երկրներում հիմնվեցին բազմաթիվ մշակութային, կրթական, կրօնական եւ այլ ազգային հաստատություններ: Այդ խավի ներկայացուցիչներն էին, որ անցնելով ցեղասպանության եւ բռնագաղթի արհավիրքներով, մեծանալով որբանոցներում, միշտ վառ պահեցին սերը դեպի հայրենիքը, իրենց հայրենասիրությունը փոխանցեցին իրենց՝ օտարության մեջ մեծացած զավակներին, եւ այդ ամենի շնորհիվ ապահովեցին հայ սփյուռքի գոյատևումը ժամանակի եւ տարածության մեջ:

Այն բանից հետո, երբ 1923թ. Ամերիկյան Նպաստամատույցը հայտնեց իր հաստատություններից չափահաս որբերի արձակման մասին, սփյուռքի հայությունը, ազգային բոլոր կազմակերպությունները հայտնվեցին մի նոր, չափազանց բարդ կացության մեջ: Սալոնիկում հրատարակվող «Նոր Ալիք» թերթը բերում էր Ամերիկյան Նպաստամատույցի 1925թ. մարտին հրատարակած տեղեկագրի տվյալները, որոնց համաձայն 1924թ. վերջին Հունաստանի որբանոցներից՝ որպէս տասնհինգ տարին լրացած չափահասներ, արձակվել էին 12.212 հայ որբեր:¹⁰⁵ Ինչպիսի՞ն էր լինելու նրանց հետագա ճակատագիրը:

Ստեղծված իրավիճակում ՀԲԸ Միության Ամերիկայի Կենտրոնական հանձնաժողովը 1924թ. հունվարին հայտարարեց «Ինքնօգնութեան հանգանակություն ի նպաստ լքուած հայ որբերու» բացման մասին: Հար-

ցի հրատարակության մասին էր վկայում նրա անցկացման չափազանց կարճ ժամկետը՝ մինչև նույն թվականի մարտի 31-ը, իսկ նպատակների մասին ասված էր հետեւյալը. «...անոր արդիւնքը ամբողջութեամբ պիտի գործածուի պատասպարելու եւ դատարարելու այն որբերը որոնք անտէր եւ անպաշտպան կը թափառին Յունաստանի, Պաղեստինի եւ Սիրիոյ մէջ, որոնց մէջ են նաեւ այն 12 տարեկան վեր եղող որբերը, որ օրէ օր հազարներով կ'արձակուին Նիր Իսթ Բըլիֆի որբանոցներէն եւ կը յանձնուին իրենց բախտին: Հանգանակութիւնը կատարելու համար շրջաբերականով հրահանգ տրուած է ՀԲԸ Միութեան Ամերիկայի բոլոր մասնաճիւղերու վարչութեանց եւ աջակցութեան համար դիմում կատարուած է եկեղեցիներու եւ քաղաքական կուսակցութեանց կեդրոնական մարմիններուն, որոնցմէ ստացուած պատասխանները եղած են խիստ քաջալերական: Այս գործը համազգային է եւ կը կատարուի ահաւոր կացութեան մը հետեւանքով օտարացման եւ կորստեան մատնուած հայու սերունդը փրկելու եւ այնպիսի վիճակի մը մէջ դնելու, որ անոնք կարենան ինքնօգնութեամբ ինքզինքնին ապրեցնել եւ հայ ազգին համար օգտակար ընտանիքներ եւ քաղաքացիներ կազմել:

«ՀԲԸ Միութիւնն իր արդեն իսկ ունեցած խիստ ծանր բեռան վրայ կ'աւելցնէ սոյն հսկայ սիրելի գործն եւս՝ այն վստահութեամբ որ՝ զայն յաջողութեամբ կատարելու իր բուն ջանքին մէջ ինք մինակ չի թողուիր, այլ այդ գերազանցօրէն հայրենասիրական գործին շուրջ միահաղոյն կը բոլորուին Ազգին բոլոր անդամները նկատելով զայն բուն իսկ իրենց գործը»: Կոչի վերջում ասվում էր. «Զգացումէն աւելի այս անգամ հայ ժողովուրդին *բանականութիւնն* է որ պէտք է գործի, որու հանդէպ կը պարզուի սա պարզ ու ցուրտ իրականութիւնը: Կամ պէտք է փրկուի մեր սերունդը եւ կամ թէ կորսուի ընդմիջտ...»:¹⁰⁶

Ինքնօգնութեան հանգանակութեամբ հավաքված 43 հազ. դուարով հնարավոր եղավ հիմնել երկու նոր հաստատություն՝ 1924թ. վերջին բացվեց Աշխատավոր Սաների կայանը Հալեպում, իսկ 1925թ. փետրվարին՝ Պատասպարան-Աշխատանոցը Բեյրութում: Հալեպի Աշխատավոր Սաների կայանը բաղկացած էր երկու շենքից՝ աղջիկների ու տղաների համար, որոնց ընդհանուր թիվն առաջին տարվա ընթացքում կազմեց 130 հոգի: Բեյրութի Պատասպարան-Աշխատանոցը նախատեսված էր միայն որբուհիների համար: Նրա գործունեության առաջին տարին այստեղ կար 80 որբուհի, որոնցից 12-ը հանձնվեցին իրենց ազգականներին, 9 որբուհի ամուսնացան հայ երիտասարդների հետ, եւս 14 որբուհիներ տրվեցին տեղի հայ ընտանիքներին՝ որպէս տան աղջիկ: Միության այդ երկու հաստատությունների առջև դրված էր երկու հիմնական խնդիր. «...Նիր

Իսթ Եթեալ որբ եւ որբուհիներուն պիտի տան գիշերելու օթեւան մը եւ սնունդ, մինչեւ որ անոնք ինքնաբաւ ըլլան եւ կարենան իրենց սեփական աշխատութեամբ ինքզինքնին հոգալ...»:¹⁰⁷ Այդ նպատակով տղաները Հալեպի արհեստավորների մոտ սովորեցին տարբեր արհեստներ եւ ժամանակի ընթացքում ձեռք բերեցին դերձակի, կոշկակարի, երկաթագործի, ատաղձագործի, շաքարագործի եւ այլ մասնագիտություններ: Աղջիկները, իրենց հերթին, մասնագիտանում էին դերձակության, ձեռագործի, շապկագործության եւ այլ ճյուղերում: Հարկ է նշել նաեւ, որ ինքնուրույնության եւ ինքնաբավության վարժվելու նպատակով այդ չափահաս որբերը պարտավոր էին իրենց վաստակած դրամի մի մասով փոխհատուցել պատասպարանի ծախսերը, իսկ մնացածը պահ տալ Միությանը՝ մինչև իրենց վերջնական մեկնումը հաստատությունից:

Երկրորդ հիմնական նպատակը, որին պէտք է ծառայեին այդ հաստատությունները՝ սաների համախմբումն էր «...հայկական ազգային յարկի մը տակ, հեռի կորսուելու կամ օտարանալու վտանգներէն, պատեհ առթիւ Հայաստան փոխադրուելու համար»:¹⁰⁸ Այս նպատակի հատուկ շեշտումը բացատրվում էր նրանով, որ Միջին Արեւելքի երկրներում գործող ամերիկյան եւ այլ որբանոցները իրենց բոլոր անժխտելի առավելություններով հանդերձ, այնուամենայնիվ, չէին նախատեսում կամ չէին նպաստում երեխաների ազգային ինքնության, ինքնագիտակցության զարգացմանը: Այդ հարցը առավել հրատապ դարձավ, երբ Հալեպի Մանչերու կայանը (այդպէս կոչվեց 1926 թվականին՝ աղջիկների բաժանմունքը փակվելուց հետո) սկսեց համալրվել ազատագրված ավելի քան 100 չափահաս՝ հիմնականում 22-26 տարեկան որբերով, որոնք տարիներ շարունակ, կտրված լինելով իրենց հայրենակիցներից, ապրել էին բացառապէս թուրքերի եւ արաբների շրջապատում: Այդ տղաների համար անհրաժեշտ եղավ կազմակերպել դասընթացներ, որպէսզի նրանք սովորեն հայերէն գրել-կարդալ եւ այդ ճանապարհով վերականգնեն իրենց գրեթէ կորցրած ազգային ինքնությունը: Պարզվեց, սակայն, որ օտարումը այնքան խորն էր, որ «...անոնցմէ շատեր ալ, պէտք է ըսել ցաւ ի սիրտ, չի կրցան այս նոր կեանքին վարժուիլ, արաբականին հետ այլեւս բոլորովին շաղախուած ըլլալով, ու դարձեալ վերադարձան անապատները, ու անոնցմէ ոմանք ամուսնութիւններ ալ կնքած էին արաբ կիներու հետ»:¹⁰⁹

1931թ., երբ Հալեպի Մանչերու կայանում մնացած վերջին որբերը պատրաստվում էին սկսել իրենց ինքնուրույն կյանքը, Միությունը որոշում կայացրեց նրա փակման մասին: Ինքնօգնութեան հանգանակութեան մյուս ձեռնարկը՝ Բեյրութի Պատասպարան-Աշխատանոցը փակվեց ավելի վաղ՝

1929թ., նրա վերջին 24 սանուհիները փոխադրվեցին Բելյուրի Սիսուան որբանոց:

1923թ. սովյակներով Երուսաղեմի Արարատեան որբանոցի 111 եւ Բելյուրի որբանոցի 45 չափահաս սաներ այդ քաղաքների հայ եւ օտար արհեստավորների մոտ մասնագիտանում էին դերձակության, երկաթագործության, աստաղագործության, կոշկակարության, հախճապակեգործության եւ այլ արհեստներում: Միության նման նախաձեռնությունը կարեւորվում էր նաեւ այն հանգամանքով, որ չափահաս որբերի մէջ «...կայ որոշ թիւ մը որ տարագրութեան երեսէն, դժբախտութիւնն ունեցած է ուսման մէջ տկար մնալու: Այսպիսիք՝ բացահայտ է թէ, դպրոցի կապել գրկանք մը պիտի ըլլար, որովհետեւ քիչ ժամանակի մէջ ոչ միայն չի պիտի կարենային հիմնական կրթութիւն մը ստանալ, այլեւ չափահաս երիտասարդներ ըլլալով, կարելի չի պիտի ըլլար, անհրաժեշտ արհեստ մը սորվեցնել անոնց ապագային»: Որպէս Միության այս «գեղեցիկ գաղափարի» օրինակ, «Արեւ» թերթը նշում էր Երուսաղեմի Արարատեան որբանոցին կից գործող կոշկագործության արհեստանոցը. «Քառասուն արհեստատր սաներ յանձնուած են արհեստապէտ Անդրանիկ Պալայեանի, որ իր շուրջ ունի տասն եւ երեք վարպետներ (գալֆա): Հազիւ երեք ամսուան գոյութիւն ունեցող արհեստանոցը, կրցած է կարեւոր դիրք մը գրաւել քաղաքիս մէջ, ոչ միայն իր մաքուր, տոկուն եւ ճաշակատր գործերով, այլեւ աժանութեամբ: Սկսնակ աշակերտներ՝ քիչ ժամանակի մէջ շատ կը դիրացնեն իրենց վարպետներուն աշխատութիւնը, այնպէս որ արհեստանոցը օրական 60-70 զոյգ կոշիկ կը հայթայթէ: Ըստ արհեստապետին հաւաստիքներուն այս թիւը կրկնապատկելու հաւանականութիւն կայ քիչ ժամանակի մէջ»:¹¹⁰

Չափահաս որբուհիների համար նույնպէս անհրաժեշտ պայմաններ էին ստեղծվել որոշակի մասնագիտություններ ստանալու համար: Արհեստանոց-կարատուն էր գործում Երուսաղեմի Վասպուրական որբանոցում, ուր «...39 չափահաս սանուհիները ամբողջ օրը կը զբաղին արհեստագործութեամբ, փոխն ի փոխ աշխատելով կարատան, շապկագործարանի մէջ եւ ձեռագործի, նոյն ատեն մասնակցելով Որբանոցի ներքին առտնին աշխատութեանց»:¹¹¹ Նմանատիպ կարատուն էր հիմնվել նաեւ Բելյուրի Սիսուան աղջիկների որբանոցում, ուր «...պիտի ձեռուին ու կարուին, սանուհիներու կողմէ, որբանոցներու բոլոր հագուստեղէնը: Բաց աստի սանուհիները, մասնագետ-վարպետի մը առաջնորդութեամբ, մեքենայով գուլպա հիւսել կը սորվին, որբանոցին արդէն ունեցած երկու գուլպայի մեքենաներուն վրայ»:¹¹² Եվ որբան էլ՝ կարեւոր եւ անհրաժեշտ լինէր արհեստներ սովորելը, որբանոցների սաների մէջ քիչ թիվ չէին

կազմում երեխաները, որոնք, այնուամենայնիվ, կգերադասեին ստանալ լիարժեք կրթություն: Նոյեմբար Վարդանյանը, որը Երուսաղեմի որբանոցների փակումից հետո տեղափոխվել էր Բելյուրի Սիսուան որբանոցը, վերհիշում էր. «Կը բնակէիք փայտաշէն հսկայ կայաններու մէջ, որոնք կը ծառայէին որպէս ննջարան, ճաշարան եւ ամէն ինչ: Ու մենք թէեւ նախապէս խանդավառուած էիք Պէլյուրով՝ կորսնցուցիք մեր խանդավառութիւնը, երբ փոխանակ ուսումնական դասաւանդութիւններու հետեւելու՝ սկսանք ձեռագործի այլազան տեսակներ սորվելու: Ամէն պարագայի, մենք՝ նորեկներս, շուտով տիրեցիք ձեռագործի արհեստին, եւ հաւասարեցանք մեզմէ առաջ հոն գտնուողներուն: Դուրսէն ապաստանքներ կու գային եւ մենք կ'արտադրէիք ուզուած ապրանքը»:¹¹³

Թե որբան հաջող էր ընթանում որբանոցներում սանուհիների դաստիարակությունն ու կրթությունը, արհեստների ձեռքբերումը, խոսում է այն փաստը, որ նրանցից շատերը ամուսնանում էին Երուսաղեմի եւ Բելյուրի հայ երիտասարդների հետ: «Եվ ամէն հայ ընտանիք կ'աշխատի իր զակի նշանածի ընտրութիւնը որբանոցէն ընել, այնպէս որ գրեթէ ամեն օր խնդրարկուներու թիւը անպակաս է»,- ոգեւորությամբ գրում էր Բելյուրից ԱՄՆ ուղարկած թղթակցություններից մեկի հեղինակը եւ եզրակացնում. «Ուրախ ենք, որ Բարեգործականը մէկ կողմէ գիտակից ձեռնհաս սաներ կը հասցնէ, իսկ միւս կողմէ լաւ մայրիկներ եւ տանտիկիներ»:¹¹⁴ Որբան էլ ուրախալի լինեին նման ամուսնությունները Միության համար, այն մտադիր չէր բավարարվել զուտ դիտողի դերով: Նախ, երիտասարդների խնդրանքը սանուհիների հետ ամուսնանալու վերաբերյալ՝ բավարարվում էր մանրակրկիտ քննությունից հետո միայն: Դրա հետ մեկտեղ, Միության կենտրոնական Վարչական Ժողովի որոշմամբ, որբուհիների ամուսնությունը դյուրացնելու նպատակով, յուրաքանչյուր ամուսնացող սանուհուն հատկացվում էր «դրամօժիտ»՝ 30 անգլ. ոսկի: Այդ նույն նպատակով ստեղծվեց նաեւ «Որբ ընդ որբուհի» ամուսնության հիմնադրամը, որի շնորհիվ հնարավոր դարձավ բազմաթիվ հայ ընտանիքների ստեղծումը:

Հունաստանում

Հունաստանում հայ բնակչությունը զգալիորեն աճել էր դեռ 1912-1913թթ. Բալկանյան պատերազմներից հետո, երբ Օսմանյան Թուրքիայից Հունաստանին անցան Սալոնիկը, Տրաման, Գալապոս, Քսանտի եւ այլ հայաշատ քաղաքներ: 1921-1922թթ. Կիլիկիայից հեռացող ոչ մեծ

թվով հայեր ապաստանել էին այստեղ: 1922թ. սեպտեմբեր ամսին, երբ քեմալականները պատրաստվում էին գրավել Իզմիրը (Ջմյուռնիա), ինչին հետեւելու էր քրիստոնյա ողջ բնակչության ոչնչացումը, սկսվեց Իզմիրի եւ շրջակա վայրերի հայության զանգվածային խուճապահար գաղթը Հունաստան: Տասնյակ հազարավոր հայ փախստականներ «...կը հասնէին յոյն տարագիրներու աւելի հոծ խումբերու հետ, անոնց նման կարօտ ամէն բանի, հիւանդներով, անկարներով, նոր այրիացած անոք կիներով, որբերով, շատերը առանց հագուստի, առանց ճերմակեղէնի, գրեթէ բոլորն ալ առանց անհրաժեշտ կարասիներու, ոմանք նոյն իսկ բոկոտն»:¹⁵ Այն բանից հետո, երբ Արեւելյան Թրակիան վերադարձվեց Թուրքիային, հայ գաղթականների նոր ալիք՝ ավելի քան 30.000 մարդ, անցավ Սալոնիկ, Գավալա, Քսանտի եւ այլ քաղաքներ:

Այս ամեցի արդյունքում Հունաստանը դարձել էր հայ գաղթականների կուտակման հիմնական կենտրոններից մեկը: Հունական պաշտոնական տվյալների համաձայն, այստեղ հաստատված հայերի թիվը 1924թ. կազմում էր շուրջ 55 հազար մարդ,¹⁶ այլ տվյալների համաձայն՝ նրանց թիվը հասնում էր 100- 120 հազարի, որոնցից մոտ 50.000-ը հաստատվել էին Հին Հունաստանում եւ կղզիներում:¹⁷ Գաղթականների հիմնական զանգվածը ապրում էր, զրկված լինելով անհրաժեշտ ամենատարրական պայմաններից:

Ահա թե ինչպես էր նկարագրում Աթենքի արվարձաններից մեկում Ֆիքս կամ Տուրդուտի վայրում ապաստանած ավելի քան 8.000 հայ գաղթականների կյանքը տեղի Ազգային վարժարանի տնօրեն Մ.Աղայանը: «Հողաշէն խեղճուկ տնակներու եւ պատառոտուն վրաններու կոյտ մը կանգնած է հիմայ հոն՝ այդ ընդարձակ տարածութեան վրայ, գորատեն մը խոզերու գոմեր կը գրաւէին, որուն համար Տոմուզ-Տամը (խոզանոց) ալ կը կոչուի: Ներկայիս ես մարդկային խոզանոց մը պիտի ըսէի, եթէ խորհի օտարականի մը թոռիկ տպաւորութեան մը ներքեւ եւ կամ լոեցնէի արժանապատւութեան ձայնս՝ թիսած այն գիտակցութենէն գորունիմ ցեղիս անսպառ կենսունակութեան մասին, որը անհումօրէն կը խոշորցնէ զինքը իմ ազգիս՝ իր խեղճութեան եւ տառապանքին մրորին մէջ իսկ... «Ի Արմենիքի սինիքիս» - հայոց թաղ - կը մըմնջեն ամէն անոնք որոնք բոպէ մը կ'անդրադառնան դէպի հոն: Ինչ հեզմանք... «հայոց թաղը»: Թաղամասի կենտրոնում «համեստ ու փայտաշէն տնակներ» են, կան եկեղեցի ու դպրոց՝ «միեւնոյն յարկին տակ, տախտակաշէն, ուր կ'ուսանին եւ կ'աղօթեն յաջորդաբար» 500 երկսեռ աշակերտներ: ...Մանուկներու ստոճար մաս մը կը մնայ առանց վարժարանի, օրն ի բուն թափառելով փողոցները բոկոտն, գլխաբաց, փոշիներու եւ ցեխերու մէջ տա-

պլտկելով: Ու այս կեանքը անոնց մէջ կը մեղցնէ ամէն յատկութիւն, կը խաթարէ անոնց բարոյականը ու կը դատապարտէ զիրենք ապագայի մը՝ ցաւերով լեցուն»:

Թաղամասի բնակչության «...կարեւոր թիւ մը կը կազմեն անտէր, անտիրական մնացած ընտանիքները, որոնց մէջմէկ անկիւն նետուած կը տուայտին ամենայետին թշուառութեան մէջ»: Հողվածի հեղինակը նկարագրում է նման ընտանիքների ամբողջ մի շարք: Խարխուլ տնակներից մեկում անհնար է լինում «...տակումի, ահաբեկումի ծեստ մը զսպել՝ տեսնելով անբանացած դէմք մը, որ կը ցցուի մեր առջեւ: Մարդկային ամէն ինչ մեռած է հիւծած դէմքին վրայ: Ըսին թէ կոտորածներէ յիմարացած մըն է, ութը հոգիէ բաղկացած ընտանիքի մը նեցուկ ըլլալու կոչուած այդ մարդը՝ այսօր անպէտ առարկայի չափ իսկ արժէք չունի իրեններում: Անոր կինը ու 60-ամեայ մայրը չարաչար աշխատանքով հազիւ կը բաւարարեն իրենց բազմանդամ ընտանիքին՝ մերթ Եպաստաւորուելով նաեւ Ռըլիֆէն եւ Բարեգործականէն ... Այլապէս ցաւալի է կացութիւնը երկու Սիվրիհիսարցի քոյրերու, մին այրի է մեկ որբով, իսկ միւսը՝ ամուրի, թոքախտաւոր, միեւնոյն վրանին տակ, զուրկ ամէնէն անհրաժեշտ պիտուքներէ: Ասոնց ալ Բարեգործականը կը նպաստէ եւ կը տեղեկանամ թէ փոքրիկ դրամագլուխ մը տրամադրեր է, որպէսզի ձեռագործով կարենան գէթ իրենց ապրուստին մեկ մասը ապահովել»:¹⁸

Հայ Ազգային պատվիրակության մասնավոր քննիչ Սեդրակ Քերյանը 1923- 1924թթ. Հունաստան կատարած այցելությունների արդյունքում ներկայացրած զեկուցագրում հատուկ նշում էր Միության օգնությունը այդ եւ ուրիշ այլ կարոտյալներին. «ՀԲԸ Միությունը խնամատարական գործ կը կատարէ Հին Հունաստանի ամենաթշուառ կայաններէն Լիբազմայի եւ Նէօ Ֆալեոսի մէջ: Լիբազմայի մէջ փոքրիկներուն կաթ կը հայթայթէ եւ օրական 200 տրախմի կը բաժնէ կարօտներուն: Նէօ Ֆալեոսի մէջ, լոկ դրամ կը բաժնէ, Մակեդոնիոյ շրջանին մէջ ալ ՀԲԸ Միությունը Սելանիկի մէջ ամէն օր կանոնաւոր կերպով օրական 70- 100 տրախմի կը բաժնէ կարօտներուն»:¹⁹

Մ.Աղայանի հողվածում հատուկ կարեւորվում է ՀԲԸ Միության կողմից գաղթական կանանց աշխատանքով ապահովելը. «Թշուառութեան այս սրտամորմոք կացութեան մէջ՝ նախախնամական դեր մը կը կատարէ Հայ Բարեգործական Միությունը՝ իր գթօտ բազուկը տարածելով, որբեւայրիներուն եւ որբուհիներուն գործ հայթայթելով եւ մասամբ թեթեւցնելով այդ եղկելիներուն դառն վիճակը: Հոս՝ Աթենքի հինգ արտարձաններուն՝ Ֆիքսի, Ամարուսի, Լիբազմայի, Գոգիհիոյ եւ Սիւնկուի մէջ կ'աշխատեցնէ շուրջ 350 գործաւորուհիներ: Անոնց արտադրած

նրբահիւս ասեղնագործությունները Բարեգործականին օժանդակող մեղուաչան Տիկիներ կը սպառեն զբօսաշրջիկներու եւ մարտանաւերու սպաներու մօտ: Ամսական 25-30.000 տրախմի՝ բարեգործելու այս ամէնէն բանաւոր եւ բարոյացուցիչ ձեւին տակ՝ նպաստներ կը տրուին կարեկցութեան արժանի այդ թշուառներուն: Պատի՛ւ անոնց»:¹²⁰

Խոսքը վերաբերում է ՀԲԸ Միության Աթենքի Աշխատանոցին: Այն հիմնվել էր 1923թ. Միության Աթենքի Տիկնանց հանձնախմբի նախաձեռնությամբ, բայց ենթարկվում էր տեղական ազգային իշխանություններին: 1924թ. սեպտեմբերից Աշխատանոցը ամբողջությամբ փոխանցվեց Միությանը եւ անընդմեջ գործեց շուրջ 15 տարի: Աշխատանոցի գործունեությունը ապահովելու նպատակով Միությունը ստեղծեց հատուկ հիմնադրամ՝ 300 անգլ. ոսկիով, որին եւս 200 ոսկի նվիրեց Միության փոխնախագահ Տիգրան խան Քելեկյանը: Ընդամենը մի քանի տարի անց Աշխատանոցը ոչ միայն դարձավ ինքնաբավ, այլեւ կարողացավ վերադարձնել նշված գումարների մեծ մասը, ինչը եզակի դեպք էր ՀԲԸ Միության հաստատությունների պատմության մէջ: Աթենքի Աշխատանոցի շնորհիվ հարյուրավոր հայ կանայք, մեծ մասամբ իզմիրցի, իրենց ձեռագործ եւ կարի աշխատանքների դիմաց համապատասխան օրավարձ ստանալով, ի վիճակի եղան «...պատուաւորապէս ապրելու եւ ապրեցնելու իրենց պարագաները»:

Ավելի վաղ՝ 1923թ. մայիս ամսին, սկսեց գործել ՀԲԸ Միության Աշխատանոցը Սալոնիկում: Այս աշխատանոցը, թեւէ զիջում էր Աթենքի աշխատանոցին իր աշխատավորուհիների թվով, գործում էր նույն սկզբունքով, եւ այստեղ նույնպէս մի քանի հարյուր անոք հայուհիներ, զբաղվելով ձեռագործությամբ, ապահովեցին իրենց եւ իրենց ընտանիքների օրապահիկը: Ա.Քերյանը իր գեկուցագրում նշում էր. «ՀԲԸ Միությունը այստեղ (Սալոնիկում - Էդ.Մ.) բացած է ձեռագործի աշխատանոց մը ուր 50 աղջիկներ կ'աշխատին 2 ուսուցչուհիի հսկողութեան տակ: Նոյնիսկ բոլորովին անվարժ աղջիկ մը, աշխատանոց մտածին պէս կը ստանայ 12 տրախմի շաքարական: Աշխատող աղջիկները ձեռագործի վարժուելէն ետք, կը վարձատրուին իրենց տուած արդիւնքին համեմատութեամբ: Աղջիկ մը միջին հաշուով կրնայ շաքարական մինչեւ 50 տրախմի շահիլ»:¹²¹ Աշխատավորուհիների թվի խիստ նվազելու պատճառով Սալոնիկի Աշխատանոցը փակվեց 1927թ. վերջին:

1925թ. Միության Սալոնիկի մասնաժողովը ստանձնեց տեղի Ազգային Խնամատարության որբանոցի ղեկավարումն ու մատակարարումը, ուր պատասպարել էին 23 որբեր եւ անվճար ուսանում էին եւս 40 գաղ-

թական աղքատ տղաներ: 1926թ. հոգածության կարիք ունեցող որբերը տեղափոխվեցին Բեյրութի Քելեկեան-Միսում որբանոց:

Դեռեւս 1922թ. Միության Կենտրոնական Վարչական Ժողովը Հունաստան գործուղեց իր հայտնի գործիչներից Մ.Նաթանյանին՝ այդ երկրում ապաստանած գաղթականների, այդ թվում նաեւ Իզմիրի աղետից փրկվածների կյանքի պայմաններն ու առաջնահերթ կարիքները պարզելու նպատակով: Մ.Նաթանյանի կազմած տեղեկագրերում, որոնք կարելի էր խաղացին Միության վերոնշված ծրագրերի մշակման գործում, հատուկ շեշտվում էր գաղթականների մէջ բազմաթիվ հիվանդությունների տարածման փաստը, որոնց զոհերն էին դառնում հատկապէս երեխաներն ու կանայք: Հաշվի առնելով հարցի կարեւորությունը՝ 1923թ. Աթենքում, իսկ քիչ անց նաեւ Միտիլիում, Պիրեյում, Սալոնիկում սկսեցին գործել Միության դարմանատները: Դրանց անհրաժեշտության մասին էր վկայում այն, որ, օրինակ, Աթենքի եւ Պիրեյի դարմանատներ դիմող հիվանդների թիվը ընդամենը չորս ամսվա ընթացքում եղել էր 10.000-ից ավելի:¹²² Հետագա տարիներին նույնպէս դարմանատներում բուժվողների քանակը հասնում էր մի քանի հազարի: Դարմանատներից յուրաքանչյուրում աշխատում էին մեկական բժիշկ ու հիվանդապահուհի, ինչպէս նաեւ շրջիկ հիվանդապահուհի, որը մշտապէս այցելում էր անկողնային հիվանդներին: Թոքախտով հիվանդներին, որոնք մեծամասնություն էին կազմում, անվճար տրվում էր դեղորայք, պարեն, իսկ երեխաներին՝ նաեւ կաթ, ձմռանը՝ ձկան յուղ եւ այլն: Միտիլիում դարմանատունը գործեց մինչեւ 1928թ., իսկ Աթենքում եւ Պիրեյում՝ մինչեւ 1931թ., երբ, մի կողմից, Հայաստան արտագաղթելու հետեւանքով զգալիորեն նվազեց չքավոր գաղթականների քանակը, իսկ մյուս կողմից, հունական կառավարությունը եւ արտասահմանյան մարդասիրական կազմակերպությունները սկսեցին անվճար բժշկական օգնություն ցույց տալ նաեւ հայ գաղթականներին:

1923թ. Ամերիկյան Նպաստամատուցող Գավալայի մոտակայքում հիմնեց որբանոց-կայաններ, որտեղ որոշ ժամանակ մնալուց հետո հայ որբերը «... որպէս հոգեզաւակ կը յանձնուին յոյն ընտանիքներում... Այս որբերուն ապազգայնացուցիչ կացութիւնը հայ մամուլի մէջ մեծ աղմուկ կը յարուցանէ, ուստի Փարիզի մէջ Հայ Ազգային Պատվիրակութիւնը հայ ժողովուրդի մեծ բանաստեղծ Վահան Թեքէեանին կը նշանակէ իր լիազօր ներկայացուցիչը՝ զբաղելու Յունաստանի, Սուրիոյ, Եգիպտոսի եւ Ջուրիցերիոյ մէջ գաղթականներու եւ մասնաւորապէս որբերու կացութեան բարոքելու աշխատանքով»:¹²³ Վ.Թեքէեանի պատրաստած տեղեկագրերը հաստատեցին հատկապէս Հունաստանում գտնվող Ամերիկյան

Նպաստամատուցի հաստատություններում հայ երեխաների ազգային դաստիարակության և կրթության մտահոգիչ վիճակը: Այսպես, 1923-1924թթ. ուսումնական տարվա համար ընդունվել էր, այսպես կոչված, «Խառն դաստիարակության կրթական ծրագիր», համաձայն որի, Ամերիկյան Նպաստամատուցի որբանոցներում դասավանդությունը տարվելու էր միայն հունարեն:¹²⁴ Խնդրի լուծման նպատակով հրավիրված խորհրդակցությունների արդյունքում, որի մասնակիցներն էին նաև Հայ Ազգային պատվիրակությունը և ՀԲԸ Միությունը, ամերիկյան կազմակերպությունը իր համաձայնությունը սովեց Ազգային պատվիրակության կողմից ներկայացված հայ որբերի կրթության ծրագրին, որի հեղինակներն էին Ն.Ադոնցը, Հ.Թոփճյանը, Ա.Չոպանյանը, Տ.Բեկզադյանը, Դավիթ Բեկը:¹²⁵ Շատ շուտով պարզ դարձավ, սակայն, որ Ամերիկյան Նպաստամատուցը մտադիր չէ փոխել իր կրթական քաղաքականությունը, ինչը, բնականաբար, բողոքի նոր ալիք առաջացրեց հայկական ամենատարբեր շրջանակներում: Նյու Յորքում հրատարակվող «Հայաստանի կոչմակ» թերթը իր խմբագրականներից մեկում գրում էր. «Անշուշտ, մենք իրաւունք չունինք պահանջելու որ Սուրիոյ և Յունաստանի չափահաս որբերն անպատճառ մշտականօրէն պահուին Բիլիֆի խնամքին ներքէ: Բայց, անվիճելի է նուիրական իրաւունքի մը ուժով անգամ մըն ալ կը բողոքենք Բիլիֆի կրթական ծրագրերուն հակահայ ուղղութեան դէմ»: Հիշեցնելով դեռևս 1923թ. ձեռք բերած համաձայնությունները, թերթը գրում էր. «Եվ սակայն...ահա կը մոռցուին հանդիսատի խոստումները, և մեր որբերը կը խառնուին լոյներու և արաբներու հետ, և անոնց կը տրուի այն տեսակ կրթութիւն մը որ ազգային լեզուն ու գիտակցութիւնը պահպանելէ շահ հետո է: Աթէնքի «Նոր Օր» էն կիմանանք որ տեղւոյն Ազգ. վարչութեան անդամներէն ներկայացուցիչ մը Սիրայի որբանոցն այցելելով՝ կը հարցնէ թէ ինչո՞ւ մանկապարտէզի հայ փոքրիկներուն տոհմային կրթութիւն չը տրուիր: Տճօրէնը, Մր. Հուայթ, ընդունելով հանդերձ «դիտողութեան իրաւացիութիւնը» կը յայտարարէ թէ «մեզի համար տոհմային կրթութիւնը այնքան ալ կարեւոր չէ», և կը յարէ,- «մենք որբանոցներուն ներքին քաղաքականութիւնը կը վարենք Կեդրոնի հրահանգներուն համաձայն»:¹²⁶

Եգիպտոսում

Վերը նշված որբանոց-կայանների որբերին, նկատի առնելով Ամերիկյան Նպաստամատուցի որոշումը իր հաստատությունների մոտավոր

լուծարման վերաբերյալ, նպատակահարմար նկատվեց տեղափոխել Եգիպտոս: Դա պայմանավորված էր մի կողմից՝ Եգիպտոսի կառավարության համաձայնությամբ՝ ընդունել թվով շուրջ 2.500 որբ երեխա, իսկ մյուս կողմից՝ Կահիրեում և Ալեքսանդրիայում կազմակերպված հայ համայնքների գոյությամբ:

Կահիրեում և Ալեքսանդրիայում տեղի հայ Ազգային իշխանության օժանդակությամբ և հսկողությամբ որբերը տեղավորվեցին հիմնականում հայ ընտանիքներում՝ «...իբրեւ տան աղջիկ կամ սպասուհի»: «Սկզբնական շրջանին բաւականին վայելեցին աղջիկները հայ տուներու մէջ, բայց, քանի մը տարի անցնելէ յետոյ,- նշվում էր ՀԲԸ Միության 1928թ. տեղեկագրում,- երկուստեք անհամաձայնութիւններ ծայր տալով դժուարացուցին այս որբուհիներուն հոգատարութեան ծանր գործը»: Ստեղծված իրավիճակում Ազգային իշխանությունները դիմում են ՀԲԸ Միությանը, որն էլ «...հարկ տեսաւ այդ որբուհիները եւս իր պաշտպանութեան ներքէ առնել, անոնց համար կայան մը կազմակերպելով: Ասոնց հոգատարութիւնը յանձնուեցաւ Տիկնանց Խնամակալութեան...»: Ահա այսպիսի պարագաներում Միությունը Եգիպտոսում հիմնեց Աղջկանց կայաններ (Որբուհիներու տուն, Girl's Home), նախ Կահիրեում՝ 1928թ. մայիսին, ապա նաև Ալեքսանդրիայում՝ 1929թ. սեպտեմբերին և որոնք գործեցին համապատասխանաբար՝ մինչև 1935 և 1933թթ., երբ «...որբուհիները այլևս չափահաս ըլլալով, ի վիճակի եղած էին հոգալու իրենց պատասպարումի ծախքերը»:¹²⁷

Անհամաձայնության պատճառներից մեկը ֆինանսական բնույթի էր, ինչի մասին նույն տեղեկագրում գրված է հետևյալը. «...ազգային իշխանութեան կողմէ Միութեանս յանձնուեցան 302 որբուհիներ, որ ընդհանրապէս ձրիաբար կամ 60 եգիպ. դրուշ ամսականով տեղաւորուած էին հայ ընտանիքներու մէջ: Այս դրութիւնը շարունակելով շատ դժուար պիտի ըլլար որբուհիները փոքր դրամազուլիսի տէր ընել ու ամուսնացնել: Ուստի և որոշուեցաւ հայ ընտանիքներէն ուզել աղջիկներուն կատարած աշխատութեան համապատասխան վարձք մը: Այս որոշումին գործարարութիւնը բնականաբար շատ մը դժուարութիւններու հանդիպեցաւ սակայն, հնարատր դարձուց ի վերջոյ որբուհիներուն մեծամասնութեան լաւագոյն պայմաններով տեղաւորումը օտարներու քով, որ ոչ միայն լաւ վճարում կընեն, այլ և ամէն հոգածութիւն ցոյց կուտան իրենց յանձնուած որբուհիներուն մասին»:¹²⁸ Հարցի լուծման նման եղանակը բավական համոզիչ էր. 1928թ. մայիսին, երբ որբուհիները հանձնվեցին Միությանը, նրանցից 185-ը աշխատում էին անվճար, 46-ը ստանում էին 50-60 դրուշ, 19-ը անգործ էին: Իսկ արդեն 1929թ. տվյալներով 270 որբուհիներ-

րից 66-ը ստանում էին 300-500, 51-ը՝ 150-250 դրուշ, 110-ը աշխատում էին անվճար եւ 16-ը անգործ էին: Հարկ է նշել նաեւ, որ աղջիկների տեղավորումը եւ վարձատրումը այդուհետ կատարվում էր համաձայն պայմանագրերի, իսկ նրանց վաստակած գումարները դրվում էին բանկ՝ 3.5 տոկոսով, ինչի շնորհիվ ստեղծվում էին որոշակի ֆինանսական նախադրյալներ նրանց ապագա կյանքի, մասնավորապէս, ամուսնության համար:

Անհամաձայնության համար կային, սակայն, եւ այլ բնույթի պատճառներ: Խոսքը հայ որբ երեխաների հոգեբանական նկարագրի մասին է, մի երեսույթ, որը մինչ օրս գրեթէ չի լուսաբանված մասնագիտական գրականության մեջ: Կասկածից վեր է, որ ցեղասպանության եւ բռնագաղթի ողբերգության միջով անցած, ծնողներին ու հարազատներին կորցրած, օտարության մեջ, լավագույն դեպքում՝ որբանոցներում մեծացած երեխաները չէին կարող չտարբերվել այդ ամենին անծանոթ իրենց հասակակիցներից: Կասկածից վեր է նաեւ, որ կյանքի նման դաժան պայմանները որոշակիորեն ազդեցին այդ երեխաների հոգեբանական բնութագրի, նրանց բնավորության, խառնվածքի, ձեւավորվող համոզմունքների ու դիրքորոշումների վրա: Ընդունելով հանդերձ, որ կյանքի նման պայմանները մեծի մասամբ ունեցան բացասական հետեւանքներ՝ երեխաների մի զգալի մասին պատճառելով հոգեկան ցնցումներ, հոգեբանական այլ խախտումներ, այնուամենայնիվ, անժխտելի է նաեւ այն, որ կյանքի նման ոչ ջերմոցային պայմանները ունեցան եւ այլ բնույթի հետեւանքներ: Այդ երեխաների մեջ նկատելի էր սեփական արժանապատվության, ինքնուրույնության, սոցիալ-մշակութային հարմարվածության, պրագմատիզմի եւ նման այլ հատկանիշների առավել զարգացում: Հոգեբանական այդպիսի բնութագիրը հատկապէս նկատելի էր ամերիկյան որբանոցների սաների շրջանում, ուր նրանք դաստիարակվում էին ամերիկյան ոգով, որի կարեւոր հատկանիշներից է անհատապաշտությունը: Այդ պատանիները եւ հատկապէս աղջիկները որոշակիորեն տարբերվում էին Արեւելքի ավանդապահ երկրներում ապրող իրենց հասակակիցներից: Եվ այդ՝ սոցիալ-մշակութային բնույթի տարբերությունները ունենում էին յուրահատուկ դրսեւորումներ:

Ջեյմս Բարտոնը, իր գրքում խոսելով Եգիպտոս փոխադրված աղջիկների մասին, հատուկ նշում է այն փաստը, որ նրանցից 113-ը կահիրեում ու Ալեքսանդրիայում ամուսնացան տեղացի հայ երիտասարդների հետ եւ կազմեցին ամուր եւ երջանիկ ընտանիքներ: Նա իրավացիորեն կարելու է այդ փաստը, քանզի Արեւելքի երկրներում անօժիտ աղջիկների, այն էլ որբուհիների ամուսնությունը դժվարին մի գործ էր, ինչպէս

միշտ: Ավելին, այդ աղջիկների բարի համբավը այնքան մեծ է եղել, որ բարեկեցիկ հայ ծնողներ սկսել են բողոքել Հայ եկեղեցու առաջնորդին՝ տեղացի հայ երիտասարդների կողմից իրենց դուստրերին անուշադրության մատնելու, անտեսելու համար:¹²⁹ Որբանոցի սանուհիների յուրահատուկ հոգեբանական կերտվածքի մասին է վկայում նաեւ հետեւյալ դեպքը, որը տեղի էր ունեցել այս անգամ Հունաստանում՝ մինչ նրանց Եգիպտոս տեղափոխվելը: Նույն հեղինակը, նախ, հատուկ նշում է որբուհիների մեջ ձեւավորված այն հստակ համոզմունքը, որ ամուսնությունը պետք է հիմնված լինի փոխադարձ մտերմության եւ զգացմունքների վրա, ինչը, սակայն, շատ հաճախ հակասում էր իրենց շրջապատող մարդկանց՝ թե հայերի եւ թե հույների պատկերացումներին: Որպէս օրինակ, նա բերում է հետեւյալ վկայությունը. «Երկու քույրեր որբանոցից գնացին ապրելու իրենց ազգականի մոտ: Նրանք ապրում էին երջանիկ կյանքով, մինչեւ որ այդ մարդը որոշեց ամուսնանալ քույրերից մեկի հետ: Նրանք մերժեցին այդ առաջարկությունը՝ ասելով. «Մենք ցանկանում ենք աշխատել եւ ապրել մեր ուզած ձեւով»:¹³⁰

Ֆրանսիայում

Սիրիայում եւ Հունաստանում որբանոցներից արձակված չափահաս հայ որբերի մի մասը Ամերիկյան Նպաստամատուցը փոխադրեց Ֆրանսիա: 1923-1924թթ. այստեղ եկան 600, իսկ 1926թ. եւս 300 նախկին սան, որոնք հիմնականում տեղավորվեցին զավառներում, ուր զբաղվեցին գյուղատնտեսությամբ, իսկ որոշ մասն էլ աշխատեց տարբեր գործարաններում: Նրանց կեցության եւ աշխատանքի հետ կապված ամենատարբեր հարցերը լուծելու նպատակով Ամերիկյան Նպաստամատուցի հովանավորությամբ եւ աջակցությամբ Փարիզում սկսեց գործել ականավոր ֆրանսիացիներից բաղկացած «Որբերի պաշտպանության կոմիտե» (Comite de Protection des Enfants Immigres): 1927թ., Ամերիկյան Նպաստամատուցը, որը պատրաստվում էր ինքնալուծարման, դիմեց ՀԲԸ Միությանը՝ խնդրելով ստանձնել նշված կոմիտեի նյութական օժանդակությունը: Միությունը համաձայնվեց ֆինանսավորել կոմիտեի գործունեությունը, ավելին՝ Միության «Բրոքսկանտի Թանձնաժողովի» անդամ Արշակ Չոպանյանը դարձավ նույն այդ կոմիտեի փոխնախագահ: «Որբերի պաշտպանության կոմիտեի» արդյունավետ գործունեությանը մեծապէս նպաստեց նրա քարտուղար, Հայաստանի Առաջին Հանրապետության խորհրդարանի նախկին անդամ տիկին Պ. Բարսե-

դյանը, որը հայ որբերի համար «...մայրիկի դերը կը կատարէ»:¹³¹ Իր «Հայ որբերը Ֆրանսայի մէջ» հոդվածում մանրամասն նկարագրելով որբերի ընդհանուր վիճակը՝ նա եզրակացնում էր. «Մեր կարծիքն է որ տղաք հողագործութեան մէջ շատ աւելի լաւ են առողջական, նիւթական եւ բարոյական տեսակէտներով: Կան տղաք որ անհամբերութեամբ սպասեցին ինքնութեան թուղթերը ստանալու օրուան, որպէսզի գործարաններու մէջ աշխատէին, սակայն խնայած դրամնին վատնելէ վերջ, կրկին դիմեցին գրասենեակ՝ հողագործութեան մէջ աշխատելու համար»:¹³² Պ.Բարսեղյանի բերած փաստերը գալիս էին հերքելու հայկական որոշ շրջանակներում տարածված այն կարծիքը, թե այդ որբերը, իբր, մատնված են անտերության, ցանկանում են հեռանալ Ֆրանսիայից, եւ որ նրանք դատապարտված են ապագայնացման: Այս վերջին կետի առիթով «Ֆրանսահայ տարեգիրքը» գրում էր. «Առիթէն օգտուելով, ի վեր հանենք սա իրողութիւնը թէ մենք հայերս որքան անտարբեր ենք այս տղաքը իրենց լեզուին ու գրականութեան հաղորդ պահելու գործին մէջ: Գանգատ ու տրտունջ բերնէ չձգող «ազգասէր»ները, «որբերը Ֆրանսայի մէջ պիտի կորսուին» պօսացողները մատը մատին չդրին՝ հայերէն գիրք եւ թերթ դրկելու համար այդ որբերուն: Բացառութիւն ըլլալով յիշենք Բարեգործական Միութիւնը որ հայերէն գրքեր գնելու համար գումար մը նուիրեց, եւ Ա.Չօպանեանը, որ իր բոլոր երկերը դրկեց: Մնացեալը խօսք, խօսք, խօսք, բողոք ու գանգատ, ողբ ու տրտունջ: Երբեք չի՞ պիտի փոխուինք»:¹³³

«Որբերի Կիրակի»

Այդ տարիների ՀԲԸ Միության գործունեության կարեւոր բնութագրերից էր համագործակցությունը արտասահմանյան տարբեր բարեսիրական կազմակերպությունների, մասնավորապես Ամերիկյան Նպաստամատուց կազմակերպության հետ, որը մեծ դեր խաղաց հայ որբերի փրկության եւ խնամատարության գործում: Այդ կազմակերպության ստեղծումը անմիջականորեն կապված է Թուրքիայում ԱՄՆ-ի դեսպան Հենրի Մորգենթաուի անվան հետ: 1915թ. սեպտեմբերին ԱՄՆ-ի Պետական դեսպարտամենտ հղած իր մի հետագրում նա կոչ էր անում կազմել հատուկ մի հանձնախումբ՝ հայ ժողովրդի գոնէ մի մասը փրկելու նպատակով դրամահավաք սկսել ԱՄՆ-ում: «Թուրքիայում հայ ցեղի (race) ոչնչացումը կը յառաջանայ արագօրէն»,¹³⁴ - գրում էր դեսպանը: Հ:Մորգենթաուի հաղորդումը փոխանցվեց Ամերիկյան միսիոներական մասնախմբի քարտուղար Ջեյմս Բարտոնին, որը իր հերթին, դիմելով մե-

ծահարուստ բարերար Քլիվլենտ Դաջին, գրում էր. «Հայերը չունեն որեւէ մեկը, որ խոսի իրենց համար, եւ կասկածից վեր է, որ ճիշտ ժամանակն է, որ հնչի քրիստոնյաների ձայնը»:¹³⁵ Մոտ մեկ ամիս անց՝ 1915թ. հոկտեմբերին, այս երկու անձերի նախաձեռնությամբ հիմնվեց «Հայ նպաստի հանձնախումբը» (Armenian Relief Committee): Եվս մեկ ամիս անց նպատակահարմար համարվեց այդ կազմակերպության միավորումը մինչ այդ եւ նույն նպատակով ստեղծված երկու այլ՝ «Սիրիայի եւ Պաղեստինի նպաստի հանձնախումբ» եւ «Պարսկական պատերազմի նպաստի հիմնադրամ» կազմակերպությունների հետ: Նորաստեղծ ոչ քաղաքական եւ ոչ պետական բարեսիրական կազմակերպությունը նախ կոչվեց «Հայ եւ Սիրիայի նպաստի ամերիկյան հանձնախումբ», իսկ որոշ ժամանակ անց, ԱՄՆ-ի Կոնգրեսի որոշմամբ՝ «Մերձավոր Արեւելքի ամերիկյան նպաստամատուց» (American Near East Relief): Հետագա շուրջ 15 տարիների ընթացքում Ամերիկյան Նպաստամատուցը իր գործունեությունը ծավալեց ամբողջ այդ տարածաշրջանում՝ որբանոցներ, հիվանդանոցներ եւ նման այլ հաստատություններ հիմնելով Թուրքիայում, Սիրիայում եւ Լիբանանում, Հունաստանում, Եգիպտոսում, Պարսկաստանում, Պաղեստինում, ինչպես նաեւ Կովկասում եւ հատկապես Հայաստանում: Այդ տարիներին Ամերիկյան Նպաստամատուցի կողմից հատկացված ամենատարբեր տեսակի նպաստների ընդհանուր արժեքը կազմեց շուրջ 83 մլն դոլար: Այդչափ խոշոր գումարների հայթայթումը հնարավոր դարձավ շնորհիվ այն մշտական, նպատակասլաց եւ համատարած քարոզչական աշխատանքի, որն Ամերիկյան Նպաստամատուցն իրականացրեց նախ եւ առաջ ԱՄՆ-ում, այնուհետեւ, բազմաթիվ այլ երկրներում:

Նման միջոցառումների շարքում հատկապես արդյունավետ եղավ «Որբերի Կիրակի» կամ «Ոսկեղեն պատվիրանքը» (Golden Rule, Golden Rule Sunday) նվիրատվություն միջոցառումը: 1923թ. սեպտեմբերին Ժնևում կայացած Ամերիկյան Նպաստամատուցի հերթական նստաշրջանում, որին մասնակցում էին նաեւ ՀԲԸ Միության ներկայացուցիչները, Գլխավոր քարտուղար Չարլզ Վիքրիի նախաձեռնությամբ, որոշվեց այդ միջոցառումը իրականացնել յուրաքանչյուր տարվա դեկտեմբերի առաջին կիրակի օրը: «Այդ նպատակով, - տեղեկացնում էր «Միութիւն» ամսագիրը, - Ամերիկեան Նպաստամատուց մարմինը, Նիո Իսթ Բըլիֆը, կ'առաջարկէ Ամերիկայի բոլոր դիտակեցիկ ընտանիքներուն, որ այդ օրուան սովորականէն ընդհանրապէս աւելի ճոխ սեղանէն կամովին զրկեն իրենք զիրենք, որբերուն առօրեայ համեստ կերակուրը ուտեն, եւ այդ կերպով գոյացած զգալի խնայողութիւնը յատկացնեն որբերուն...

Առաջադրուած նպատակը կրկին է, նախ, բնականաբար, կարելոր հասոյթ մը ձեռք բերել ի նպաստ որբերուն, եւ, երկրորդ, ստիպել որ բախտին շնորհները վայելող մարդիկ իրենք իրենց խղճին խորը իշնեն այդ օրը, մտածեն մարդասիրական, եղբայրական գերագոյն զգացումներուն վրայ եւ այսպէս ավելի խորապէս համոզուին իրենց պարտականութեանցը: Ամերիկացիները Ոսկեղէն Պատուիրանքի ճաշ կ'անուանեն ասիկա՝ հիմնուելով Աւետարանի աստուածային խրատին վրայ. ըրէ ուրիշներուն ինչ որ կ'ուզես քեզի ընեն: Եթէ ամէն մարդ պահ մը ընդունի այս ոսկեղէն պատուիրանքը, շատ արցունքներ կը չորցուին, շատ ցաւեր կը դարմանուին, շատ կեանքներ կը փրկուին»: ¹³⁶

ՀԲԸ Միութիւնը անշուշտ, չէր կարող չարձագանքել Ամերիկյան Նպաստամատուցի այդ ձեռնարկին, ավելի՛ն՝ որպէս հայկական խոշորագոյն բարեսիրական կազմակերպություն, այն պարտավորված էր ասպահովել այդ գաղափարի իրագործումը հենց հայության մէջ: Ծատ շուտով ՀԲԸ Միության նախագահ Պողոս Նուպարի ստորագրությամբ հրատարակվեց «Կոչ ընդհանուր հայութեան», որը որոշ փոփոխություններով հրատարակվեց նաեւ հետագա տարիների սեպտեմբեր-հոկտեմբեր ամիսներին.

«Բարեգործական Ընդհանուր Միութիւնը շատ ազնիւ եւ նպատակաշարմար կը գտնէ Նիր Իսթ Բելիլիֆի մէջտեղ դրած սկզբունքը, եւ այսու կը հրաւիրէ իր բոլոր մասնաճիւղերը եւ ընդհանուր Հայութիւնը ի գործ դնել զայն, իրեն պատշաճ դատած եղանակով:

«Դեկտեմբեր 2-ի կիրակի՛ն որբերու յատուկ համեստ ճաշ մը ընելը եւ ատկից գոյացած խնայողութիւնը որբերու նուիրելը կրնայ ըլլալ որ հաւանութիւն չգտնէ ամէնուն քով: Բայց դիւրին է այդ կիրակի՛ն որբերուն յատկացնելու ուրիշ զանազան եղանակներ գտնել եւ գործ դնել:

«Այդ օրը ուր որ հայ եկեղեցի մը կամ ժողովարան մը կայ, կարելի է մասնավոր պնակ մը պտտցնել ի նպաստ որբերուն: Նոյն օրը երիտասարդներ եւ օրիորդներ կրնան փողոցներու մէջ ծախել ժապաւէններ եւ խաւաքարտներ որոնք կրեն ՀԱՅ ՈՐԲԵՐՈՒ ԿԻՐԱԿԻ վերատուրթիւնը: Կրնան նմանապէս տունէ տուն պտտիլ եւ հանգանակութիւն ընել: ...Ամերիկացիները մեր որբերուն օրական հացը ասպահովելու համար, կոչում կ'ընեն իրենց հայրենակիցներուն որ զոհողութիւն մ'ընեն, զրկանք մը պարտադրեն իրենք իրենց, եւ այսպիսով ստոյգ կորուստէ մը փրկեն իրենց օտար եկող ցեղի մը անբախտ զաւակները:

«Մենք ալ պէտք է ցոյց տանք թէ գիտենք մեր պարտականութիւնները կատարել մեր որբերուն նկատմամբ: Կը խնդրենք ուրեմն մեր լուսաւորչական, կաթոլիկ եւ բողոքական ազգակիցներէն, որ սոյն դեկտեմբերի

2-ի կիրակի՛ն նուիրական օր մը նկատելով ըլլայ եկեղեցիներու մէջ, ըլլայ դուրսը ամէն կերպով աշխատին հայ որբերուն ի նպաստ: Գլխաւոր գաղութներէն դուրս, ուր մէկ քանի հայեր կան, նոյնիսկ մէկ հայ, պէտք է մասնակցին այդ կիրակիին: Թող չ'ըսուի թէ փոքր շրջանակներու մէջ յուսացուած արդիւնքը այնքան աննշան պիտի ըլլայ որ չ'արժեր ատոր համար աշխատիլ: Պէտքեր այնքան մեծ են որ ամենայնէն լուծման անգամ՝ կ'ԱՐԺԷ: Նոյնիսկ մէկ որբի ասպրուտին օժանդակելը սրտի գոհունակութիւն մըն է, խղճի պարտք մը»: ¹³⁷

Ոսկեղէն պատվիրանքը կարճ ժամանակում ունեցավ միջազգային տարածում եւ արդեն 1927թ. նշվում էր աշխարհի ավելի քան հիսուն երկրներում, իսկ հավաքած գումարները կազմում էին տարեկան ավելի քան 4 մլն դոլար: Նման հաջողությունը մեծապէս պայմանավորված էր լայնածավալ քարոզչական աշխատանքով, որի շնորհիվ ոչ միայն ԱՄՆ-ի շուրջ 900 քաղաքներ հանձն էին առել գործադրել Ոսկեղէն պատվիրանքը, այլեւ հազարավոր մարդիկ այնպիսի երկրներից, ուր մինչ այդ հազիվ թէ լսած լինեին Հայաստանի մասին: Մարդասիրության եւ բարեսիրության մասն օրինակներից էին Չիլի, որի «...տղաքը Որբերու Կիրակիին կամովին կը հրաժարին իրենց անուշեղէնէն, ...որպէսզի Հայաստանի ամերիկեան որբանոցներու որբերը կարենան իրենց հանապազօրեայ հացը ուտել», կամ Ծապոնիան, որի «Ազգային Ժողովի նախագահ իշխան Թօկազավա կարելոր գումար մը նուիրեց Մերձավոր Արեւելքի որբերուն համար...»: ¹³⁸ Ծապոնիայի հետ կապված եւս մեկ դէպք՝ իր 1927թ. կոչում հիշատակում էր Պողոս Նուպարը. «Պ.Վիքրի, ներկա տարուան յուլիսին Թօքիօ գտնուած միջոցին, այցելած է ճաքոնցի աղջկանց վարժարան մը, որուն սանուհիները «կնքամայրն» են եւ բոլոր ծախքերը կը հոգան հայ որբուհիի մը, Մարի Մաճարեան, որ կը գտնուի ամերիկեան որբանոցին մէջ եւ 1760 թիւը կը կրէ: Ծաքոնցի աղջիկները խնդրած են պ. Վիքրիէ որ իրենց քրոջական բարեւները հաղորդէ իրենց սանուհիին, եւ անոր տուած են ճաքոնական սիրուն հովահար մը իբր իրենց նուէրը իրենց հետաւոր պաշտպանեալին»: ¹³⁹

Որբերու Կիրակիի վերաբերյալ Պողոս Նուպարի կոչերը լայն արձագանք ունեցան նաեւ հայ սփյուռքում, հատկապէս այն երկրներում եւ քաղաքներում, ուր գործում էին Միության մասնաճյուղերը: Դամասկոսում, Հալեպում, Բեյրութում, Երուսաղեմում, Ալեքսանդրիայում, Հայֆայում, ինչպէս նաեւ եվրոպական մի շարք հայաշատ քաղաքներում դեռեւս 1923թ. կազմակերպվեցին հատուկ հանդեսներ, որոնց ընթացքում հանգանակված գումարները ուղարկվեցին Միության Կենտրոնական Վարչության հասցեով: Առավել կազմակերպված բնույթ ունեցան նման հան-

գանակությունները ԱՄՆ-ում: Տեղի հայազգի բնակիչները իրենց պարտավորված էին զգում սատար կանգնել Որբերու Կիրակիին, որի նախաձեռնողը ամերիկյան կազմակերպությունն էր: 1924թ. Միությունը ԱՄՆ-ում հատուկ այդ նպատակով ստեղծեց Կենտրոնական հանձնախումբ՝ հայտնի բարերար Միհրան Գարակոչյանի ատենապետությամբ: Հանձնախումբը, առաջին իսկ օրից գործակցելով Ամերիկյան Նպաստամատուցի հետ, ապահովեց թե Միության անդամների եւ թե ընդհանրապես ամերիկահայերի մասնակցությունը որբախնամ այդ գործին:

Հետագա տարիներին, սակայն, պարզ դարձավ, որ սփյուռքահայերի վերաբերմունքը այդ միջոցառման հանդեպ միանշանակ չէ: Միության 1928թ. ընդհանուր ժողովում հատուկ նշվում էր. «...Անցեալ տարի եւս 4 դեկտ. կատարուեցաւ Որբերու Կիրակի-ի հանգանակութիւնը, դժբախտաբար ոչ բաղձացուած փոյթեռանդութեամբ»:¹⁴⁰ Միության անդամների նման կեցվածքը պատահական չէր եւ պայմանավորված էր Նպաստամատուցի կողմից Որբերու Կիրակիի հանգանակության նպատակների որոշակի խմբագրմամբ, եթե չասենք փոփոխությամբ: Երվանդ Աղաթոնը 1926թ. հոկտեմբերին Վ.Քյուրքճյանին գրած նամակում իրեն հատուկ ոճով բացատրում է առաջ եկած անհամաձայնության պատճառները. «Near East Relief-ի ժողովին մէջ պ.Վիքրի իր նոր բրոկրամը պարզեց ըսելով թէ պէտք էր Ռուսիոյ, Բոլոնիոյ, Չեխոսլովաքիոյ, Աւստրիոյ որբերուն ալ օգնել: Պ. Բաշալեան եւ ես հակառակեցանք, եւ ըսինք, - «Դուք, պ.Վիքրի, դրամ չկայ ըսելով ձեր Հայ որբանոցները կը զոցէք, եւ հիմա կ'ելնէք ամբողջ Եվրոպիոյ որբերը հոգայու: Այդ որբերն իրենց կատավարութիւններն ունին, որ կրնան փոխառութիւն ընելով որբերը պահել, մինչդեռ մենք տակաւին չունինք այդ միջոցը: Դուք գործ մը սկսեցիք հայ որբերը պաշտպանելու. շարունակեցէք այդ գործը: Երբ, մի քանի տարիէն հայ որբերը ալ ձեզ պէտք չունենան, եւ հայ որբ չի գտնուի՝ այն ատեն Եվրոպիոյ որբերուն կրնաք նայիլ»: ...Պ.Բաշալեան աւելցուց թէ «դուք իրաւունք չունիք այդ բանն ընելու, զի հակառակ է ձեր կանոնագրին, եւ Արեւելքի որբերու համար է ձեր լնկերութիւնը, ոչ թէ Արեւմուտքի որբերուն. նախ պէտք է մեծ ժողով մը ընէք եւ ձեր կանոնագիրը փոխէք»: Ժողովէն վերջը Վիքրի ըսաւ Բաշալեանին, «իրաւունք ունիք, բայց մի վախճաք, հայ որբերը երեսի վրայ չի պիտի թողունք հիմա»: Եթէ Վիքրի իր առջի գաղափարը առաջ տանիլ կ'ուզէ՝ մի քաշուիք, ձայն բարձրացուցէք: Ռիլիֆի տնօրէններուն քա՞նի անգամ աղաչեցինք մեր որբերու ազգային լեզուին եւ կրթութեան մասին: «Այո» ըսին բայց բան մը չըրին»: Ե.Աղաթոնը, եզրակացնելով, հստակ ձեւակերպում է իր՝ դիրքորոշումը, որի հետ համաձայն եղան շատերը. «Երբ Հալեայի, Պէրոյի քեմբերուն

մէջ գտնուած 37.000 հայ գաղթականներ անօթի եւ հիւանդ կը մեռնին՝ հայոց հաւաքելիք դրամէն անոր (այսինքն՝ Եվրոպայի որբերին - Էդ.Մ.) բաժին հանել սխալ է»:¹⁴¹

Ուշագրավ է նաեւ այն, որ սփյուռքում այդ հանգանակությունների հիմնական մասը բաժին էր ընկնում Արեւելքի երկրների եւ առաջին հերթին՝ Միության Եգիպտոսի մասնաճյուղի վրա, մինչդեռ ամերիկահայերը գնալով դրսեւորում էին անսովոր պասիվություն: Եվ պատահական չէր, որ 1931թ. ընդհանուր ժողովը հույս էր հայտնում, որ «... յառաջիկայ դեկտեմբերին Ամերիկային մէջ եւս մեր բարեկամները կը կազմակերպեն Որբերու Կիրակիի նուիրահաւաքութիւնը որ մեր որբախնամ գործին կարեւորագոյն հասոյթը կը կազմէ»:¹⁴² 1932թ. այդ միջոցառումը սկսեց կոչվել Մշակութի կիրակի, իսկ նրա արդյունքը պետք է հատկացվեր որբ եւ չքավոր երեխաների ազգային դաստիարակությանն ու կրթությանը, ինչպես նաեւ աղքատիկ վարժարաններին օժանդակելուն: Բայց ԱՄՆ-ի մասնաճյուղերի վերաբերմունքը մնաց անփոփոխ:

Ամերիկահայերի նման դիրքորոշումը անսովոր էր, քանի որ նրանք ոչ միայն հայտնի էին իրենց մեծագումար հանգանակություններով, այլ նաեւ որպես նույն այդ հանգանակությունների նախաձեռնողներ: Ավելին, Առաջին համաշխարհային պատերազմից հետո ընկած ժամանակահատվածում ամերիկահայությունը եղավ ձեւավորվող սփյուռքի ամենակարեւոր բաղկացուցիչ մասերից մեկը՝ մեծապես պայմանավորելով նրա կենսագործունեության հիմնական կերպերն ու ձեւերը: Նույնպիսի կարեւոր դեր ու նշանակություն ունեցան նաեւ ՀԲԸ Միության ԱՄՆ-ի մասնաճյուղերը: «Միութեան Ամերիկեան շրջանակը, իր ավելի քան 130 մասնաճյուղերով, որոնցմէ ոմանք իրենց կարեւորութեամբ եւ արդիւնքով կը գերազանցէին զանազան շրջաններու հաւաքական կարեւորութիւնն ու արդիւնքը,- նշվում էր «Ռսկեմատեան»-ում,- տակաւ առ տակաւ դարձաւ մեր կազմակերպութեան ողնայարը...»:¹⁴³

Միության մասնաճյուղերը ԱՄՆ-ում

ՀԲԸ Միության առաջին մասնաճյուղը ԱՄՆ-ում հիմնվեց 1908թ. աշնանը Բոստոնում, այսինքն՝ Միության հիմնադրումից ընդամենը մեկ ու կես տարի անց, հայտնի գործիչ Վահան Քյուրքճյանի ջանքերի շնորհիվ: Այս փաստը առավել հետաքրքրական է դառնում, եթե նկատի ունենանք, որ Կահիրեի շատ ավելի մոտ գտնվող եվրոպական քաղաքներում մասնաճյուղեր ստեղծվեցին ավելի ուշ, Մարսելում՝ 1910թ., Փարիզում եւ

Լոնդոնում՝ 1911թ. եւ այլն: Առավել կարեւոր են, սակայն, ԱՄՆ-ում Միության մասնաճյուղերի հիմնադրման հետ կապված հետեւյալ հանգամանքները: Դեռեւս Առաջին Աշխարհամարտից առաջ շուրջ 60 հազարի հասնող ամերիկահայությունը համախմբված էր ազգային համայնքներում, որոնց կարեւոր եւ որոշիչ տարրերն էին Հայ Առաքելական ու Ավետարանական եկեղեցիները, ինչպես նաեւ ազգային կուսակցությունները, հայրենակցական միությունները՝ յուրաքանչյուրն իր օժանդակ մարմիններով:¹⁴⁴ Այդ տարիներին բավական մեծ էր ազգային կուսակցությունների հեղինակությունն ու դերը, քանզի նրանցում էին տեսնում այն ուժը, որը կարող էր եւ պետք է ազատագրեր Արեւմտյան Հայաստանն ու Կիլիկիան, ուր ապրում էին ամերիկահայերի հարազատներն ու բարեկամները եւ ուր նրանք մտադիր էին վերադառնալ:

Հատկապես ՀՀ Դաշնակցություն եւ ՄԻ Հնչակյան կուսակցությունները, ԱՄՆ-ում ժխտական վերաբերմունք ունեին ՀԲԸ Միության հանդեպ: Այսպես, Դաշնակցության Բոստոնում հրատարակվող «Հայրենիք» պաշտոնաթերթը ամերիկահայերին կոչ էր անում հեռու մնալ, չհավատալ այդ «կեղծ», «հակազգային» կազմակերպությանը:¹⁴⁵

Ամերիկահայության մեջ, սակայն, կար մի զանգված՝ Հայ Ավետարանական եկեղեցու հետեւորդները, որոնք ավանդականորեն հեռու էին հայ քաղաքական կազմակերպություններից եւ որոնց համար Միության բարեսիրական համազգային ծրագրերն ու նպատակները նախընտրելի էին կուսակցությունների գաղափարներից ու գործելակերպից: «Ոսկեմատեան»-ը այսպես է գնահատել նրանց դերը ԱՄՆ-ում Միության հիմնադրման եւ տարածման գործում. «Այս պատուական հովիտները Միութեան ճշմարիտ ուսուցիչները դարձան Ամերիկայի մէկ ծայրէն մյուսը, շատ քաղաքներու մէջ իրենք ստանձնեցին ամէն նախաձեռնութիւն՝ մասնաճիւղերու կազմութեան համար, եւ իրենք եղան մեծագոյն աշխատատեղերը, խանդավառողները, քարոզիչները, մէկ խօսքով բոլորակազմողները, ամէն անգամ որ Կեդրոնը, մեծ աղէտներու կամ ազգային կարեւոր պէտքերու առթիւ, իր կազմակերպութիւններէն նոր ու աւելի մեծ զոհողութիւններ ակնկալելու հարկին տակ գտնուեցաւ: Անոնք տրամադրեցին իրենց եկեղեցիներն ու ժողովասարահները Միութեան մասնաճիւղերուն գումարմանց եւ հանդէսներուն, եւ լաւագոյն բեմասացները հանդիսացան Միութեան, որ շնորհիւ իր հմայքին, իր հիմնադիրները տոգորող անխտրական ոգիին եւ իր առաջադրութեանց էապէս համազգային բնութիւն, կրցաւ յանկուցանել անոնք եւ անոնցմով կազմել իր լաւագոյն լէգէոնները»:¹⁴⁶

Ծատ շուտով Միության գաղափարների ամենատեսադրույն կողմնակիցն ու սատարողը դարձավ ԱՄՆ-ի Հայ Առաքելական եկեղեցին, ինչի շնորհիվ էլ մեծ թվով հայեր ներգրավվեցին նրա աշխատանքներում եւ արագորեն սկսեցին հիմնել մասնաճյուղեր երկրի տարբեր քաղաքներում: Այդ տարիներին ամերիկահայ իրականության յուրահատուկ բնութագրերից են դառնում Հայ Առաքելական եւ Ավետարանական եկեղեցիների համախմբումը Միության շուրջ, նրանց համատեղ գործունեությունը վերջինի ծրագրերի իրագործման նպատակով: Այդ իմաստով հատկանշական է հետեւյալ դեպքը, որ տեղի է ունեցել 1917թ. մայիսին, Նյու Յորքում Միության Ամերիկայի մասնաճյուղերի հիմնադրող խորհրդակցական համաժողովի ընթացքում: «Մինչդեռ պատգամավորները կը շտապէին նիստը փակելու ժամը 11-ին, որպէսզի կարենան եկեղեցի երթալ, իրենցմէ մէկը դիտել կուտայ թէ ժողովին մէջ եպիսկոպոսներ ալ կան, պատուելիներ ալ, թող այս սրահին մէջ կատարեն կիրակնօրեայ պաշտամունքը, որպէսզի ժամանակ չի կորսուի եւ կարելի ըլլայ շարունակել նիստը: Միաձայն հաւանութեամբ կ'ընդունուի այս առաջարկը, եւ Գեր. Բաբլէն Եպիսկ. Կիլիկերեան, Արեւմտեան Գեր. Մուշեղ Եպիսկ. եւ Վեր. Հ. Խաղեանի հետ կը պատրաստէ ժամակարգ մը, որուն համեմատ կը կատարուի կիրակնօրեայ պաշտամունքը: Ամէն մարդ գոհ կը մնայ ճշմարտապէս հոգեշէն եղբայրակցութեան այս մթնոլորտին մէջ աղօթելով, մինչդեռ պաշտամունքը փոխն ի փոխ կը կատարէին Արեւմտեան Հայաստանի եւ հայ բողոքական եկեղեցականները»:¹⁴⁷

1909 եւ հաջորդ տարիներին Միության նոր մասնաճյուղեր հիմնվեցին նաեւ Բրիթեյնում, Ուստրում, Պրովիդենսում, Բրակթընում, Բաթաքեյթում: Առավել կարեւոր էր, սակայն, 1910թ. Նյու Յորքի մասնաճյուղի հիմնումը, որին թե այդ շրջանում եւ թե հետագայում մեծ դեր էր վերապահված Միության պատմության մեջ: Այս մասնաճյուղի հիմնադիրներից եւ առաջին ղեկավարներից էին հայտնի բարերարներ Միհրան եւ Արշակ Գարակոչյանները, որոնցից վերջինը տարիներ անց ստանձնելու էր Միության նախագահի պաշտոնը: 1910թ. փետրվարին Միությունը մուտք գործեց նաեւ ԱՄՆ-ի արեւմտյան շրջան՝ մասնաճյուղ հիմնելով Կալիֆորնիայի հայերի այդ տարիների կենտրոն՝ Ֆրեզոնում:¹⁴⁸ 1912թ. Միության մասնաճյուղերի թիվը ԱՄՆ-ում կազմում էր 39, 1916թ.՝ 60, իսկ 1930թ. տվյալներով հասել էր 130-ի, որոնցից 23 մասնաճյուղ՝ Կալիֆորնիայում: ՀԲԸ Միության կենտրոնական վարչական Ժողովը, հաշվի առնելով մասնաճյուղերի այդչափ մեծ քանակը եւ նրանց գործունեությունը համակարգելու անհրաժեշտությունը, 1921թ. որոշեց ստեղծել ԱՄՆ-ի շրջանակ՝ որպէս առանձին ու ինքնավար միավոր, իսկ 1923թ.

ԱՄՆ-ի մասնաճյուղերը սկսեցին անսիջապես ղեկավարվել Միության Ամերիկայի Շրջանային Հանձնաժողովի կողմից: Այդ տարիներին սկիզբ դրվեց ԱՄՆ-ում Միության հրատարակչական գործին: 1909թ. Միության անդամները իրենց անձնական միջոցներով Բոստոնում սկսեցին հրատարակել «Հայ» ամսագիրը, իսկ 1914թ. լույս տեսավ ՀԲԸ Միության «Յուշարար» պաշտոնաթերթի առաջին համարը:

Դեռևս մինչ Առաջին Համաշխարհային պատերազմը ամերիկահայերի ազգային հոգեբանության բնորոշ հատկանիշներից էր «մեղքի» զգացումը հայրենիքում ապրող իրենց հարազատների ու բարեկամների, ընդհանրապես հայրենակիցների հանդեպ: Որքան էլ ծանր ու դժվար լինեին Ամերիկա ներգաղթած հայերին այդչափ տարբեր եւ խորթ սոցիալ-տնտեսական եւ մշակութային միջավայրը, այնուամենայնիվ, այն անհամեմատելի էր արեւմտահայության վիճակի հետ: Եվ քանի դեռ կար այդ «մեղքի» զգացումը կամ բարդույթը, պետք է լինեին նաեւ նույն այդ «մեղքը» քավելու միջոցներ: Այդ միջոցներից էր՝ վաստակած դրամի մի մասի առաքումը Հայրենիք՝ իրենց ազգականներին: Անհատական բնույթի օգնության կողքին մեծ տարածում ստացավ նաեւ հայրենակցական միությունների հիմնումը, որոնց նպատակն էր օգնել իրենց հարազատ գյուղերի, քաղաքների բնակչությանն ընդհանրապես: Եվ եթե նման հոգեբանությունը եւ գործելակերպը բնորոշ էր ամերիկահայերին Առաջին Աշխարհամարտին նախորդած համեմատաբար խաղաղ տարիներին, ապա բնական է, որ դրանք էլ ավելի արմատացան, երբ 1915թ. Ամերիկա հասան ազգային ողբերգության մասին լուրերը: Ամերիկահայերի արձագանքը եղավ համընդհանուր, բայց այդ ընդհանուրի մեջ յուրաքանչյուր անհատ, յուրաքանչյուր ազգային կազմակերպություն դրսևտրեց իրեն բնորոշ հատկությունն ու կարողությունը:

1915թ. վերջերին Բաբկեն եպ. Կյուլեներյանի նախաձեռնությամբ «Կրկնապատիկի» կոչ ուղղվեց ԱՄՆ-ում ՀԲԸ Միության բոլոր անդամներին. կրկնապատկելով անդամավճարները՝ ստանձնել Թուրքիայում Միության նահատակված անդամների վճարումները եւ այդպիսով հավերժացնել նրանց հիշատակը: Միության բոլոր մասնաճյուղերի աշխույժ աշխատանքի արդյունքում նրանց անդամների ճնշող մասը ոչ միայն կրկնապատկեց, այլեւ եռապատկեց ու քառապատկեց իր անդամավճարները: Դրա հետ մեկտեղ, նպատակ դրվեց Միության յուրաքանչյուր նահատակված անդամի փոխարեն նոր անդամ արձանագրել ԱՄՆ-ում: Ծարժման արդյունք եղան, այսպես կոչված, անդամագրական մրցումները, որոնք սկիզբ առան 1917թ.: Ժամանակակիցների վկայությամբ, անդամագրական մրցումների «...առթիւ կը դրկուին մասնատր շրջաբերա-

կաններ, լրագրական ծանուցումներ կ'ըլլան, Միութեան գործունէութիւնը եւ ապագայ առաջադրութիւնները պատկերացնող թոռուցիկներ կը ցրուին, ամերիկահայ եկեղեցականներ կը քարոզեն ՀԲԸ Միութեան մասին որ իր մէջ կը բիրեղացնէ բարի Սամարացիին առաքինութիւնը, ծանօթ հրապարակագիրներ իրենց գրչով կ'օժանդակեն այս շարժման, առեմախօսներ իրարու հետ կը մրցին հրապարակային գումարմանց համար...»: Այս ամենը «...անօրինակ խանդավառութիւն, ոգեւորութիւն, ազնիւ զգացումներու պոռթկում առաջ կը բերէին այդ մեծ գաղութին մէջ, շատ տեղեր կատարեալ «սիօր»-ի մը երեւոյթը ստանալով»:¹⁴⁹ Մրցաշարի արդյունքները տպավորիչ էին՝ կարճ ժամանակում ԱՄՆ-ում հիմնվեց 10 նոր մասնաճյուղ, արձանագրվեցին 2.500 նոր անդամ, իսկ անդամավճարները բազմապատկվեցին: Եվ եթե 1909թ. ամերիկյան մասնաճյուղերի տարեկան հասույթները կազմում էին ընդամենը 2.340 դոլար, ապա չորս տարի անց այդ գումարը տասնապատկվեց, իսկ եւս վեց տարի անց՝ 1920թ. կազմեց մոտ 220 հազ. դոլար:

Առաջին Աշխարհամարտին հաջորդող տարիներին ամերիկյան մասնաճյուղերը մեծ դեր ունեցան ՀԲԸ Միության որբախնամ ծրագրերի իրականացման գործում՝ ապահովելով անհրաժեշտ ֆինանսական միջոցների հիմնական մասը: Այդ նպատակով կազմակերպված բազմաթիվ միջոցառումների շարքում հիշատակման արժանի են հատկապես մեծագումար հանգանակությունները, որոնց մասնակիցներն էին ինչպես Միության մասնաճյուղերը, այնպես էլ նրանց հետ համագործակցող ազգային այլ կազմակերպություններ՝ եկեղեցիները, հայրենակցական միությունները եւ այլն: Նման հանգանակություններից ամենակարեւորներն էին Ռուբեն Հեյլանի հանգանակությունը (1921-1923թթ., 21.500 դոլ.), Որբերի ազատագրման եւ պաշտպանության՝ Ինքնօգնության հանգանակությունը (1924թ., 21.500 դոլ.), Ամերիկյան Նպաստամատուցի լուծարված որբանոցների սաներին օգնության (1923-1930թթ., 23.400 դոլ.), Հունաստանից գաղթականներին Հայաստան տեղափոխելու (1925թ., 76.700 դոլ.), Լեհիստանի երկրաշարժից տուժածների (1926-1927թթ., 54.600 դոլ.), Սիրիայում ապաստանած գաղթականների (1929թ., 15.000 դոլ.), Խորհրդային Հայաստանում Նուպարաշեն ավանի կառուցման (1928-1931թթ. 125.000 դոլ.) նպատակներով կազմակերպված հանգանակությունները: Հարկ է նշել նաեւ, որ 1919-1920թթ. ձմռանը Միությունը մեծապես նպաստեց զորավար Անդրանիկի գլխավորած Փրկության հանգանակության հաջող անցկացմանը ամերիկահայ համայնքներում, որի արդյունքում գոյացած ավելի քան կես միլիոն դոլարից 120.000-ը

տրամադրվեց Միությանը՝ Կիլիկիայում նրա հաստատությունների եւ այլ ձեռնարկների համար:

1920-ական թվականների կեսերից սկսած, նույն այդ մասնաճյուղերի գործունեության մեջ ավելի ու ավելի նկատելի են դառնում մի տեսակ հոգնածության, անփութության, նույնիսկ անտարբերության նշաններ: Առաջին հայացքից տարօրինակ այս երևույթը ուներ, սակայն, իր առարկայական պատճառները: Նախ, դա յուրատեսակ դրսևորումն էր այն սուր ազգային-հոգեբանական ճգնաժամի, որում հայտնվեց ողջ սփյուռքահայությունը 1923թ. Լոզանի խորհրդածողովից հետո: Լոզանի խորհրդածողովը, հայ ժողովրդի նորագույն պատմության մեջ նրա խաղացած ճակատագրական դերը բազմիցս վերլուծվել են գրականության մեջ,¹⁵⁰ ուստի այստեղ, դիտարկվող նյութի առիթով նշեն միայն հետևյալը: Խորհրդածողովի (մասնակիցներն էին Մեծ Բրիտանիան, Ֆրանսիան, Իտալիան, Հունաստանը, Ռումինիան, Ծապոնիան, Հարավսլավիան, Թուրքիան եւ որպես դիտորդ ԱՄՆ-ը) հիմնական նպատակն էր կարգավորել Մերձավոր Արևելքում պատերազմից հետո առաջացած մի շարք տարածքային-քաղաքական բնույթի հարցեր: Հայաստանի Առաջին Հանրապետության պատվիրակությունը՝ Ավետիս Ահարոնյանի եւ Ազգային պատվիրակությունը՝ Գաբրիել Նորատունկյանի գլխավորությամբ, խորհրդածողովին ներկայացրեցին համատեղ հուշագիր, որում առաջարկվում էին Հայկական հարցի երեք հնարավոր լուծում եւ որոնք, ըստ իրենց, դաշնակիցները պետք է պարտադրեին պատերազմում պարտված Թուրքիային:¹⁵¹ Դրանք էին. ա) Հայկական Ազգային Տան ստեղծումը ԱՄՆ-ի նախագահ Վուդրո Վիլսոնի գծած տարածքում, բ) Երեսնի Հանրապետության (Խորհրդային Հայաստանի - Էդ.Մ.) ընդարձակումը՝ նրան կցելով Արևմտյան Հայաստանի մի մասը, գ) Ազգային Տան ստեղծումը Կիլիկիայում: Հայերի սպասումները խորհրդածողովից մեծ էին, սակայն նրա ընթացքը գնալով հարցականի տակ էր դնում բոլոր հույսերը: Եվ այնուամենայնիվ, Լոզանում կնքված պայմանագիրը գերազանցեց ամենահռետեսական սպասումները՝ նրանում հիշատակություն անգամ չկար ոչ Հայաստանի եւ ոչ էլ հայերի մասին, բռնագաղթած ժողովրդին այդպես էլ թույլ չտրվեց վերադառնալ հայրենիք: Դեյվիդ Լլոյդ Ջորջը իր հուշագրություններում, բնութագրելով Լոզանի պայմանագիրը որպես «...մի երկար եւ տխուր պատմություն... ազգերի եւ նրանց պետական գործիչների կարճատեսության, էսամության, փոքրգության եւ նեպոտիզմի խառնուրդ»¹⁵², որպես «...արևմտյան քաղաքակրթության պատմության ամենանվաստացուցիչ իրադարձություններից մեկը»,¹⁵³ մեջբերում է անում «Դեյլի տելեգրաֆ» օրաթերթում 1923թ. հրատարակած իր իսկ

հոդվածից. «Այդ խորհրդածողովի փաստաթղթերը՝ դա զիջումների ու կապիտուլյացիաների ապշեցուցիչ մի շարք է...Դաշնակիցները հանուն խաղաղության ոչնչի հանգեցրին իրենց իրավունքները: Նրանք դրժեցին նաեւ՝ եւ դա արդեն շատ ավելի լուրջ գործ է, որի համար, հավանաբար, ոչ հեռու ապագայում պետք է պատասխան տան, փոքրաթիվ ժողովուրդներին տված իրենց խոստումները, որոնք չեն դադարում խոստումներ մնալ այն պատճառով, որ փոքրաթիվ ժողովուրդները չեն կարող հետապնդել դրանց կատարումը: Եվրոպական պատգամավորները Լոզանում եւ կոնցեսիոներների գործակալները Անկարայում (երկու դեպքում էլ Արևմտաքի ներկայացուցիչներ) խաղացին մի դեր, որը հավասար չափով անվայել է իրենց կողմից արվող չար գործի ինչպես ձեւի, այնպես էլ էության առումով»:¹⁵⁴

Խոսելով Լոզանից հետո արտերկրի հայության (որոնք քիչ անց իրենք իրենց պետք է անվանեին «սփյուռքահայություն») մեջ տիրող տրամադրությունների մասին՝ «մակեմատեան»-ը դրանք բնութագրում էր որպես «...քաղաքական հիասթափություններ, մասնատրաբար թրքահայոց դատին ստացած ողբալի վախճանը՝ քիրաւոր զոհերէ եւ անհաշուելի զոհողութիւններէ ու կորուստներէ ետք, երբեմնի հայրենի բույներուն կործանումը, վերադարձի անկարելիութիւնը, նուիրական ու սիրական վայրերէ եւ յիշատակներէ վերջնականապէս անջատման դառն ու սպանիչ բռնադատութիւնը»:¹⁵⁵

Հիասթափությունը, սակայն, Լոզանի միակ հետեւանքը չէր: Օտարության մեջ հայտնված հայությունը այդուհետ պարտադրված էր ապրել ասպնջական երկրներում: «Անոնք ի սկզբան անելի իբր պանդուխտ, իբր հիւր կը մնային Ամերիկայի մէջ, մաս մը դրամ անելցնելով իրենց հայրենիքը վերադառնալու, իրենց պապենական օջախները վերականգնելու, շէնցնելու մտադրութեամբ: Բայց այս բոլոր յուսախաբութիւններէն վերջ, հետզհետէ կը սկսէին արմատանալ երկրին մէջ, իրենց բոյնը վերջնականապէս հաստատել, հող եւ բնակարան կը գնէին, ամերիկեան քաղաքացիութեան կը կապուէին, տեղական կարիքներով կը հետաքրքրուէին առաւելապէս, եւ դուրս իրերը ու հեռաւոր կարօտութիւնները փոքր չափու մը միայն կը խօսէին այլեւս իրենց սիրտին»: Սակայն կար եւս մեկ պատճառ, դա 1929-1933թթ. տնտեսական ճգնաժամն էր, որի զոհը դարձան Արևմտաքի բոլոր երկրները: Դրա ազդեցությունը հատկապես աղետալի եղավ ԱՄՆ-ում: Մեծ դեպրեսիան» (այսպես անվանվեց ամերիկացիների կողմից) գերարտադրության ամենախոր ճգնաժամի արդյունք էր, որը ընդգրկեց ֆինանսական համակարգը, արդյունաբերությունը, գյուղատնտեսությունը եւ տնտեսության այլ ոլորտները: Երկրի ազգային

եկամուտը, որը 1929թ. կազմում էր 86,8 միլիարդ դոլար, 1933թ. կրճատվեց ավելի քան երկու անգամ՝ 40,3 միլիարդ դոլար: Արդյունաբերական արտադրության անկումը, տասնյակ հազարավոր գործարանների, հանքահորերի փակումը, ֆերմերների զանգվածային սնանկացումը, այս ամենը հասցրեց գործազրկության վիթխարի աճի: Պաշտոնական տվյալներով 1933թ. ԱՄՆ-ում գործազուրկների թվաքանակը կազմում էր երկրի բանվորական ուժի ընդհանուր թվի 24,9%-ը:¹⁵⁶ Ժողովրդի մի զգալի հատվածի աղքատացմանը մեծապես նպաստեց նաև բանկային համակարգի քայքայումը, որի արդյունքում միլիոնավոր մանր ավանդատուներ զրկվեցին իրենց խնայողություններից և համալրեցին աղքատների շարքերը: Տնտեսական հանընդհանուր այս ճգնաժամի զոհերից դարձան, բնականաբար, նաև տեղի հայերը: Մեծ դեպրեսիայի հետևանքները հատկապես ծանր էին ցեղասպանություն և բռնագաղթ ապրած ներգաղթողների համար, որոնք նոր-նոր էին սկսել հարմարվել այդ երկրի պայմաններին: Ծգնաժամից ոչ պակաս տուժեցին նաև ավելի վաղ շրջանում ներգաղթած, տնտեսապես արդեն ինքնահաստատված հայերը: Դրա օրինակներից էր Կալիֆորնիայի հայությունը. «...այգեպաններու տնտեսական տագնապի տասնուհինգ տարիներու ընթացքին (1922-1937) չամիչի և երկրագործական արտադրություններու գներուն անկումը, և ընդհանրապես Ամերիկայի մէջ գործերուն թոյլ վիճակը, հիմէն խախտեց Գալիֆորնիոյ հայութեան տնտեսական կեանքը և անոր հետ կապակցուած բոլոր բարի ծրագիրները: Ահա այս իսկ պատճառաւ շատեր իրենց կալուածները կորսնցնելով ցրուեցան ուրիշ քաղաքներու մէջ և նահանգի այլեւայլ վայրերը, իրենց օրուան ապրուստը ձեռք բերելու գէթ գործ մը ճարելու համար»:¹⁵⁷ Այս ամենը անխուսափելիորեն բացասաբար անդրադարձավ ամերիկահայ բոլոր ազգային կազմակերպությունների, այդ թվում նաև ՀԲԸ Միության գործունեության վրա: Այդ առումով հատկանշական է նույն Կալիֆորնիայում ճշված տարիներին Միության ամենամյա բարեգործական վաճառքներից (Annual Bazaars) գոյացած գումարների չափը: Եթե 1928թ. այն կազմում էր 2.542 դոլար, ապա հետագա տարիներին մշտապես նվազում է՝ 1933-ին՝ ընդամենը 914 դոլար, և միայն 1946 թվականից հասույթը գերազանցեց 1928թ. ցուցանիշը:¹⁵⁸

Սկսած 20-ականների կեսերից, ՀԲԸ Միության մասնաճյուղերի և անդամների թիվը ԱՄՆ-ում «...կը նուազին հետզհետէ. տարեվճարները ժամանակին գանձելու և անդամակցությունները հաստատուն պահելու ջանքերը, որոնց համար խնամեալ ծրագիրներ ալ գծուած էին, չեն պակուիր բաղձացուած չափով: Բնակավայրի տեղափոխություններ, անձնա-

կան դիմումներու դժուարություններ, բայց մանաւանդ դառն ու ընկճող հիասթափությունները, որոնց ազգը ենթարկուեցաւ, ու վերջ ի վերջոյ տնտեսական պայմաններու վատթարացումը կը դժուարացնեն գործերու կանոնաւոր և հետեւողական ընթացքը»:¹⁵⁹

* * *

Այսպիսին էր ՀԲԸ Միության որբախնամ գործունեությունը, որը թե ժամանակակիցների և թե հետագա սերունդների, ինչպես հայերի, այնպես էլ օտարների կողմից գնահատվեց որպես մարդասիրության և հայրենասիրության գաղափարների միաժամանակ ծառայելու համոզիչ օրինակներից մեկը: Իհարկե, հատկապես ժամանակակիցների կողմից եղան նաև այլ կարծիքներ և գնահատականներ, որոնք, սակայն, չդիմացան ժամանակի փորձությանը: Միությունն ինքը, իր քննադատների հանդեպ ի սկզբանե որդեգրել էր որոշակի, հայ իրականության համար աննախադեպ սկզբունքներ, որոնք ժամանակ առ ժամանակ ստիպված էր հիշեցնել իր իսկ անդամներին: Այսպես, նրա ղեկավարությունը, 1919թ. մասնաճյուղերին հղած իր մի գրությամբ հիշեցնելով, որ «ՀԲԸ Միությունը կուսակցական կուուադաշտ մը չէ, այլ ընդարձակ աշխատանոց մը, ուրկէ պայքարը իսպառ վտարուած է...», հատուկ ճշում էր. «Կեդ. ժողովս միշտ հաւատարիմ մնացած է Միութեանս այս վարիչ սկզբունքին, թոյլ չտալով ինքզինքնին ու իր բոլոր գործակիցներուն որ փոխադարձաբար հրապարակը աղմկեն արդարացումներով և հերքումներով: Լրագրական բանավեճերը, մանաւանդ բարեգործական ընկերակցութեան մը կողմէ, ոչ միայն ամուլ ժամավաճառութիւն մըն են, այլև գուցէ անխուսափելի ինքնասպանութիւն՝ որուն յամառաբար կը մղեն մեր հակառակորդները, մեզ ընդքարշ ածելու համար վեճերու մէջ որոնց մենաշնորհն ունին և որ արգելք են ռեւէ լուրջ գործի...Խօսքին դէմ գործ, պայքարին դէմ արդիւնք, ահա՛ ամէնէն ջախջախիչ հերքումը...Եվ ճիշտ այդ պատճառով է որ մեր հակառակորդները, որ իրենցմէ դուրս ամէն ինչ ազգավնաս կը համարին, այնքան աւելի ուժգնապէս կը զարնեն, որքան խորապէս գիտեն թէ ուժեղ կազմակերպութեան մը դէմ կ'ուղղուի հարուածը...»:¹⁶⁰ Այնուամենայնիվ, Միությունը անակնկալի եկավ, երբ «ապերասան և ապերախտ գտնուեցան» նաև որբանոցների սաները: «Միութիւն» ամսագրում այդ հարցին նվիրված հատուկ հոդվածը ավարտվում էր հետևյալ տողերով. «Յաջորդաբար հիմնուած բազմաթիւ Որբանոցներուն և Կայաններուն մէջէն յիշելով զխաւորաբար Քէլէկեան, Սիսուան, Արաւտեան, Վասպուրական, Կիլիկեան Որբանոցները, Մերսինի, Հաճընի և

Մոսուլի Որբանոցները, Կիլիկիոյ, Սուրիոյ եւ Եգիպտոսի Կայանները, ինչպէս նաեւ Միութեանն որբախուզական եւ որբախնամ այլ բազմաթիւ ձեռնարկները, ատոնց ամէնքին համար 1918-1930 ծախսած ենք 253.120 անգլ. ոսկի պատկառելի գումար մը: Այս թուանշանները այնքան պերճախօս են, որ ռեւէ բացատրութիւն աւելորդ կը դառնայ: Բայց անոնք կը թելադրեն հարցում մը: Ատոր փոխարէն, ՀԲԸ Միութեան շնորհիւ փրկուած, մեծցուած, պատուպարուած եւ դաստիարակուած, գործի տէր եղած եւ տուն տեղ կազմած, բազմահազար երկսեռ որբերը ի՞նչ տուին իրենց պաշտպան Միութեան, ի՞նչ ըրին անոր համար, ի՞նչպէս ծառայեցին եւ սատարեցին անոր բարձր նպատակներուն...: Անոնց պարտքի ժամը հնչած է, վաղուց»:¹⁶¹

Գաղթախնամ ծրագրեր

1920-1930-ականներին ՀԲԸ Միությունը, ինչպէս նշվեց վերը, գործուն մասնակցություն բերեց նաեւ տարբեր երկրներում ապաստանած հայ գաղթականների տեղավորման, վերաբնակեցման գործին: 1920թ. կեսերին Հալեպի տարբեր, ինչպէս ընդունված էր անվանել, քեմպերում (ճամբարներում), որոնք գտնվում էին Մելդան, Սուլեյմանիե, Համիդիե եւ այլ թաղերում, ապրում էր շուրջ 35-36 հազ., իսկ Բեյրութի նմանատիպ քեմպերում՝ ավելի քան 20 հազ. հայ գաղթական: Կյանքն այդ քեմպերում գրեթե չէր տարբերվում արդեն հիշատակված Աթենքի նմանատիպ ճամբարներից. «...վարակիչ հիւանդությունները եւ ժանտախտը յաճախ կ'այցելէին իրենց, տանելով հազարաւոր կեանքեր: ...Շատեր անօթութենէ եւ ցուրտէ կը մեռնէին»: «Սիրիական մամուլ» թերթը գրում էր. «Քաղաքիս քեմպեն ցաւալի եւ կսկըծալի լուրեր կը հասնին մեզի, կը խօսուի տասնեակներով, հազարաւորներով երեխաների մահուան մասին, իբրեւ հետեւանք միջազգային կարօտութեան եւ անպատասպարութեան ծնունդ եղող հիւանդություններու»:¹⁶² Քեմպերի ապագա գոյության հարցը՝ թե՛ տարբեր պատճառներով, շատերի համար մտահոգության առարկա էր դարձել: Միջազգային, այդ թվում բարեսիրական կազմակերպությունները մտահոգված էին այնտեղ ստեղծված թշվառ պայմաններով, հակասահտարական վիճակով, քեմպերով զբաղեցված տարածքների տերերը ցանկանում էին ազատվել նրանցից, վերջապէս, քաղաքապետարանները ձգտում էին ճամբարները դուրս հանել քաղաքի սահմաններից: 1925թ. վերջերից ֆրանսիական իշխանությունները (1920 թ. Սան Ռեմոյի կոնֆերանսի որոշմամբ Ֆրանսիան Սիրիայի եւ Լիբանանի մանդատատերն էր)

սկսեցին մշակել հատուկ ծրագրեր՝ հայ գաղթականներին վերաբնակեցնելու վերաբերյալ: Ինչպէս նշում էր այդ հարցին նվիրված իր հոդվածներին մեկում Թոմաս Գրինշիլդսը, «...իշխանութիւններուն հետաքրքրութիւնը ինչ ալ ըլլար, անոնց արարքին գլխաւոր դրդապատճառն էր գոհացում տալ հողատերերուն գաղթականները հետացնելու պահանջին: Նոյնն էր պարագան հետագային քաղաքապետութեան հրահանգով կատարուած բոլոր քանդումներուն»:¹⁶³

Իշխանությունները, ձգտելով ամեն գնով արագացնել քեմպերի վերացումը, չէին զլանում դիմել նույնիսկ այնպիսի միջոցների, ինչպէս, օրինակ, դրանց հրկիզումն էր: Հատկապէս հիշարժան էր ժանտախտի դեմ պայքարի պատրվակով Բեյրութի քեմպի հրկիզումը 1933թ. հունվարին, որի հետեւանքով շուրջ 3.500 գաղթականներ մնացին անօթեւան, այրվեցին եկեղեցին եւ այլ շինություններ:¹⁶⁴ Այս դեպքում նույնպէս Միությունը, ինչպէս եւ ազգային այլ կազմակերպություններ, ոչ միայն զգալի դրամական միջոցներ հատկացրեցին տեղի Ազգային խնամատարությանը, այլեւ բոլորովին չքավոր կանանց, ծերերին եւ երեխաներին տրամադրեցին Քէլէկեան որբանոցի շենքը նրա ողջ գույքով, սպիտակեղենով եւ այլն: Վերաբնակեցումը, բնակելի նոր շենքերի կառուցումը նշված քաղաքներում եւ թե՛ հայկական գյուղերի հիմնումը, պահանջում էր զգալի միջոցներ, որոնց հայթայթումը, սակայն, հենց սկզբից էլ դարձավ դժվար լուծելի խնդիր, եւ արդյունքում՝ որոշ գաղթականներ պահպանվեցին ընդհուպ մինչեւ 1970-ական թվականները:¹⁶⁵

Սկզբնական շրջանում քեմպերում ապրող գաղթականներին մտադիր էին բնակեցնել գյուղական տարբեր՝ գերազանցապէս արաբական եւ թրքական բնակչությամբ վայրերում: Բայց թե՛ գաղթականները եւ թե՛ հայկական կազմակերպությունները դեմ էին այդ ծրագրին: Եվ իշխանությունները ստիպված էին դադարեցնել այն: Համաձայն նոր ծրագրի, «...Ազգերի Լիգայի, տեղական իշխանությունների եւ հայ բարեգործական հիմնարկների տրամադրած միջոցներով» սկսվեց գաղթականների համար տների կառուցում Հալեպի եւ Բեյրութի արվարձաններում, որի արդյունքում առաջացան Նոր Սիւ, Նոր Ադանա, Նոր Մարաշ եւ այլ՝ հիմնականում հայերով բնակեցված թաղեր:¹⁶⁶

Բեյրութում, ձեռնամուխ լինելով քեմպերի քանդմանը, իշխանությունները միեւնոյն ժամանակ արգելում էին փայտե տների կառուցումը: Այս ամենի հետեւանքով «...բազմաթիւ չքատուր ընտանիքներ խոնուած են իրարու վրայ, շատերն ալ բացօդեայ կ'ապրին: Այս աննախանձելի վիճակը կը սաստկացնէ տիրող թշուառութիւնը եւ պատճառ կ'ըլլայ բազմատեսակ հիւանդութեանց. գլխաւորաբար մալարիան աւերներ կը գոր-

ծէ»:¹⁶⁷ ՀԲԸ Միության Կենտրոնական Վարչությունը, ելնելով ստեղծված իրավիճակից, անմիջապես գումար հատկացրեց Բեյրութում առժամյա դարմանատուն եւ ապաստարան հիմնելու, ինչպես նաեւ չքավոր եւ հիվանդ գաղթականներին ձրի դեղ եւ ապուր տրամադրելու համար: Որոշվեց նաեւ «...գէթ մասնաւոր շրջանակի մը մէջ հանգանակութիւն մը կատարել, աւելի մեծ չափով օգնութիւն հասցնելու համար», որի առաջին նվիրատուն դարձավ ՀԲԸ Միության նորընտիր նախագահ Գալուստ Կյուլպենկյանը: Միությունը իր մասնակցությունը բերեց նաեւ քեմպերի գաղթականների տեղավորման վերաբերյալ Նանսենյան միջազգային օֆիսի մշակած ծրագրի իրականացմանը, տրամադրելով մոտ 7.000 անգլիական ֆունտ ստեռլինգ: Բացի այդ, գաղթական անտուն ընտանիքների համար Միությունը Բեյրութի մոտ կառուցեց Բարեշեն թաղամասը՝ ի նշանավորումն ՀԲԸ Միության 25-ամյակի: Միության 1932թ. տեղեկագրում կարդում ենք. «...Բարեշենը արդեն կառուցուած է 95 բնակարաններով, եւ կը ներկայացնէ գեղեցիկ շրջանակ մը, քարուկիր կանոնաւոր շէնքերով: Այդ թաղամասի հրապարակը կը կանգնի նաեւ աղբիւր-իշատակարան մը, ուր արձանագրուած է Միութեան անունը եւ Յոբելեանի թուականը»:¹⁶⁸ Եվս մեկ, ավելի մեծ թաղամաս՝ Կյուլլապաշենը, Միությունը կառուցեց Նոր Մարաշի հարեւանությանը ամերիկահայ հայտնի բարերար Կիլլասի Կիլպենկեան հիմնարկության տրամադրած միջոցներով:

Ավելի վաղ՝ 1926թ. Միությունը սկսեց դրամական օժանդակություն ցույց տալ Մամլթէյնի (Բեյրութ) «սանաթօրիօս»-ին, որը հիմնել եւ ղեկավարում էր Բեյրութի երեք հարանվանությունների կողմից կազմված վարչությունը: Ինչպես նշվեց, այդ տարիներին հայ գաղթականների միջավայրում թոքախտը ամենատարածված հիվանդություններից էր, որից մահանում էին մեծ թվով երեխաներ ու ծերեր: «Մամլթէյնի Սանաթօրիօսին մէջ ցարդ պատասպարուած եւ խնամուած են 650 թոքախտաւորներ, կարդում ենք Միության տեղեկագրում,- որոնց կէսը մեռած, եւ կէսն ալ մասամբ կամ ամբողջովին բուժուած է. այդ ալ մեծ արդիւնք մըն է, երբ նկատի առնենք քաղքին տաք կլիմայի եւ խոնաւութեան հակաառողջապահիկ աննպաստ պայմանները: Հիւանդները այդ Հաստատութեան մէջ պատասպարելով, գոնէ կը դադրին վարակումի վտանգ մը ըլլալէ իրենց ընտանիքի անդամներուն, որ յանախ խրճիթի մը կամ աղտոտ խուցի մը մէջ խճողուած կապրին»:¹⁶⁹ Ակնհայտ էր նաեւ, որ Բեյրութի պայմաններում նման հիվանդանոցի գործունեությունը աննպատակահարմար էր եւ անարդյունավետ, որ այն անհրաժեշտ էր տեղափոխել Լիբանանի բարձրադիր շրջանները, ինչը, սակայն, պահանջում էր զգալի դրամական մի-

ջոցներ: ՀԲԸ Միությունը, գիտակցելով հարցի կարեւորությունը, թե ինքը տրամադրեց անհրաժեշտ գումարի մի զգալի մասը, թե ապահովեց մեծագումար նվիրատվություններ եւ փոխատվություններ Նանսենյան գրասենյակի կողմից, իսկ Միության վարիչ-պատվիրակ Վ.Մալեզյանը, 1935թ. տեսակցելով Բեյրութում երկրի Առողջապահության ընդհանուր տնօրենի (նախարարի) հետ, ձեռք բերեց նոր շենքի կառուցման իրավունքը: 1938թ. վերջապես տեղի ունեցավ հիվանդանոցի նորակառույց շենքի բացումը Ազունիե բարձունքին, «...օդատուն եւ գեղահայեաց շրջավայրի մը մէջ, ուր երիտասարդ հիւանդներ լաւագոյն խնամք կը վայելեն քան Մամլթէյն»:¹⁷⁰

Միության գաղթախնամ գործունեության ուշագրավ էջերից է նրա մասնակցությունը գաղթականների համար նոր գյուղերի հիմնադրման եւ կայացման գործում: Առաջին նման փորձը տեղի ունեցավ 1927-1928թթ., երբ Ազգերի Լիգան նախաձեռնեց հայկական գյուղերի հաստատումը Սիրիայի Ալեքսանդրետի սանջակի Շեպել Մուսայի շրջանում: Այդ ծրագրի ֆինանսավորումը ստանձնեցին Ամերիկյան Նպաստամատուցը եւ Անգլիական հայանպաստ կոմիտեն: ՀԲԸ Միությունը այդ ծրագրերը խթանելու եւ հնարավորին չափ արագ իրագործելու նպատակով, իր հերթին, 1927թ. որոշում է կայացնում «...10% աւելցնել բոլոր այն գումարներուն վրայ գոր, նուիրատուութեան կամ փոխատուութեան ձեւին տակ, Անգլիոյ հայանպաստ մարմինները պիտի տրամադրէին այս նպատակով: Ըստ այնմ, անցեալ տարեշրջանին 500 անգլ. ոսկի վճարեցինք, այդ մարմիններուն կողմէ յատկացուած 5.000 ոսկին փոխարէնը»,¹⁷¹ իսկ հաջորդ տարի, այդ վճարումներից զատ, ՀԲԸ Միությունը Ազգերի Լիգայի Գաղթականների Բարձր Կոմիտարիատին նույն նպատակով հատկացրեց եւս 1.255 ոսկի: Այդ որոշումը բարձր գնահատվեց Աշխատանքի միջազգային բյուրոյի (Ժնեւ) կողմից, որը ՀԲԸ Միությանը հղած իր ուղերձում գրում էր. «Հայ կազմակերպութեանց առատաձեռնութիւնը Էսկան տարրը կը կազմէ Սուրիոյ եւ Լիբանանի հայերուն տեղաւորման համար եղած կոչերուն արդիւնաւորման, եւ Բարեգործական Ընդհանուր Միութեան Կեդր. Վարչութեան որոշումը անշուշտ խրախուսումը պիտի ըլլայ անգլիական կազմակերպութեանց փոյթեռանդ կերպով յատաչ տարած հանգանակութեան»:¹⁷²

Նշված գյուղերից երկուսում՝ Հայաշենում եւ Նորաշենում, որոնք գտնվում էին Հալեպից դեպի արեւմուտք՝ Ռեհանիե բնակավայրի հարեւանությանը, Հալեպի թեմի առաջնորդարանի տվյալներով, 1932թ. արդեն բնակվում էր համապատասխանաբար՝ 220 եւ 236 հայ:¹⁷³ Միությունը, ըստ ժամանակակցի, «մասնաւոր ուշադրութիւն դարձուցած էր» այդ

երկու գյուղերին, առաջին իսկ օրերից օժանդակեց այդտեղ հաստատված գաղթականներին՝ հիմնական ուշադրությունը դարձնելով նախ եւ առաջ հայկական վարժարանների հիմնադրմանը եւ բնակչության առողջական վիճակին: Այս վերջինը հատկապես կարեւոր էր, քանի որ շրջակայքում գտնվող ճահիճների պատճառով բնակչության մեջ մեծ տարածում ունեւ ջերմախտը, ինչն էլ, ի վերջո, պատճառ դարձավ, որ նրանք «... մալարիայէ սաստիկ հիւժած, լքեցին վայրը ճարահատ: Այդպէս ալ պատմութեան անցաւ հայ գաղթականութիւնը զետեղելու պլանը այստեղ, չնայած ՀԲԸՄ-ի գործադրած ջանքերուն»:¹⁷⁴

Ուշադրության արժանի է նաեւ 1929թ. Թուրքիայի արեւելյան շրջաններից գաղթած, հիմնականում քրդախոս հայերի մի մասի տեղավորման նպատակով թուրք-սիրիական սահմանից 50 կմ հեռավորությամբ Գամիշլի եւ Հասիչիե բնակավայրերի շրջանում Սահակաշէն եւ Մեսրոպաշէն գյուղերի հիմնումը: Հատկանշական է, որ այդ եւ մի քանի այլ հայկական գյուղերի հիմնումը սահմանամերձ գոտում լրջորեն անհանգստացրեց թուրքական իշխանություններին: Կ.Պոլսում հրատարակվող «Վաքըթ» թերթը իր խմբագրականներից մեկում գրում էր. «Ֆրանսայի ներկայացուցիչը կը մոլորեցնէ Ազգ. Լիգայի ներկայացուցիչները, Սուրիա հայերու տեղատրումը արդարացնելով որպէս մարդասիրական արարք. մինչդեռ, դիտարորեալ անոնց կարեւոր մասը կը հաստատու Թուրքիոյ սահմանին երկայնքով: ...Անոնց ներկայութիւնը այստեղ, կը վտանգէ մեր սահմանը. արդե՞օք կը մտադրեն երկրորդ Հայաստան մը ստեղծել մեր հարավային սահմանի վրայ...»¹⁷⁵ Ֆրանսիական իշխանությունների նպատակները, իհարկե, այլ էին: Անդրադառնալով այդ հարցին՝ Հ.Թոփուզյանը նշում էր, որ նրանք, հայերին սահմանի մոտ բնակեցնելով, մի կողմից ձգտում էին զիջումներ կորզել քեմալական Թուրքիայի հետ ընթացող իրենց բանակցություններում, մյուս կողմից՝ «հնարավորություն էին ձեռք բերում ցանկացած ժամանակ ազգամիջյան ընդհարումներ հրահրելու եւ, քրիստոնյաներին պաշտպանելու պատրվակով, ճնշելու արաբ ժողովրդի ազգային-ազատագրական պայքարը»:¹⁷⁶

1931-1932թթ. տվյալներով Սահակաշէն եւ Մեսրոպաշէն գյուղերում բնակվում էր մոտ 130 ընտանիք: Հալեպում հատուկ այդ նպատակով ստեղծված Խճամակալության հսկողությամբ գյուղերում կառուցվել էր 130-ից ավելի տուն, սկզբնական շրջանի համար գյուղացիներին տրվել էին սնունդ, լծկան, երկրագործական գործիքներ, սերմացու, ընտանի կենդանիներ եւ այլն: Սակայն իրար հաջորդող երաշտները, ոռոգելու ջրի բացակայությունն ու այդ հարցի լուծման անհաջող փորձերը եւ, վերջապես, ոչ քրիստոնյա շրջապատն ու խունապ առաջացնող լուրերը հարեւան

Թուրքիայից, հասցրին նրան, որ այդ գյուղերի բնակիչները իրենց ողջ ունեցվածքով սկսեցին տեղափոխվել Գամիշլի եւ այլ վայրեր: «Եփրատ» օրաթերթը 1932թ. հուլիսյան համարներից մեկում գրում էր. «Գամիշլիէն երկար նամակ մը ստացանք, ուր տխուր գոյներով կը նկարագրուի վերի եւ վարի Թել-Պրակ նորահաստատ գիւղերու վիճակը... Սահակաշէն եւ Մեսրոպաշէն գիւղերը, որոնց համար ծախսուեցաւ 8.000 օսմ. ոսկի, դարձած են Սահակաշէն ու Մեսրոպաշէն... բուերու բոյն: Ի զուր անցած է ամէն ջանք գիւղացիները տարհամոզելու, որ տեղանքը չլքեն»:¹⁷⁷

Ալեքսանդրետի գաղթականները

1930-ականների վերջին սփյուռքի ընդհանուր վիճակի աստիճանական կայունացմանը զուգընթաց, որոշակի փոփոխությունների էր ենթարկվում նաեւ Միության գործունեությունը: Ամենակարեւորը որբախճամ տարբեր հաստատությունների փակումն էր, ինչի շնորհիվ հնարավորություն էր ստեղծվում՝ գաղթականներին օգնություն ցույց տալով հանդերձ, ձեռնամուխ լինել սփյուռքահայության ազգամշակութային ինքնության պահպանման խնդրի լուծմանը: Սակայն 1939թ. տեղի ունեցած դեպքերը մեկ անգամ եւս ստիպեցին Միությանը՝ հետաձգել այդ ծրագրերը: Այդ դեպքերն էին՝ նախ Ալեքսանդրետի սանջակի հայության պարտադրված արտագաղթը եւ ապա Երկրորդ Համաշխարհային պատերազմի սկիզբը:

Միջերկրականի հյուսիսարեւելյան ծովեզերքում գտնվող Ալեքսանդրետի (այժմ՝ Իսկենդերուն) սանջակը ընդգրկում էր Սիրիայի Հալեպի նահանգի չորս կազաները (գավառները), նրա տարածքում էր գտնվում Մուսա լեռը, որի շրջակա վեց գյուղերի հայ բնակչությունը 1915թ. հերոսամարտից հետո, ինչպես արդեն նշվել է, հայտնվեց Պորտ Սայդի վրանավանում, իսկ զինադադարից հետո վերադարձավ հայրենիք: Հետագայում Ալեքսանդրետի սանջակի բնակչությունը քանակապես անց է հաշիվ 1922թ. Կիլիկիայից եւ 1929-1930թթ. Թուրքիայի ներքին գավառներից այստեղ գաղթած հայերի: 1936թ. տվյալներով Ալեքսանդրետի սանջակում հայերը՝ շուրջ 25.000 մարդ, քանակով զիջում էին միայն թուրքերին եւ ալավի արաբներին:

Ֆրանսիական զինվորական իշխանությունների վարած քաղաքականության հետեւանքով այս երկրամասը, ինչպես մինչ այդ Կիլիկիան, աստիճանաբար սկսեց անցնել թուրքական տարրի հսկողության տակ: Անտեսելով Սիրիայի ժողովրդի եւ կառավարության բողոքները 1938թ. հուլիսին Ալեքսանդրետի սանջակը դրվեց Ֆրանսիայի եւ Թուրքիայի հա-

մատեղ վերահսկողության ներքո, եւ Ֆրանսիայի համաձայնությամբ թուրքական զորքեր մտցվեցին սանջակ: Վերջապես «1939թ. հունիսի 23-ին ստորագրվեց ֆրանս-թուրքական համաձայնագիրը, որով Ալեքսանդրեանի սանջակը պաշտոնապես կցվում էր Թուրքիային: Ինչպես նշել է գերագույն կոմիսար Գաբրիել Պյուն, դա այն «գինն» էր, որը վճարվեց, որպեսզի Թուրքիան անցնի անգլո-ֆրանսիական դաշնակիցների կողմը»:¹⁷⁸ Գիտակցելով իրենց սպառնացող մահացու վտանգը՝ սանջակի բնակչության հիմնական՝ ոչ թուրքական մասը սկսեց շտապ արտագաղթել հարեւան երկրներ: 1939թ. օգոստոսին Ալեքսանդրեանի սանջակում հայ բնակչություն այլևս չկար. ժողովուրդն ամբողջովին գաղթել էր Սիրիա, Լիբանան եւ այլուր: Այդ դեպքերի ականատես Քեանո Բրիջմենը գրում էր. «Մուսա դադի ժողովուրդը իրենից հետո թողեց նախնիների գերեզմանները, բայց մինչ այդ նրանք Մուսա դադի գագաթից տեղափոխեցին 1915թ. բռնագաղթի դեմ մղած հերոսամարտի հուշարձանը եւ զոհվածների անյունները»:¹⁷⁹

Նոր աշխարհամարտի նախաշեմին Ֆրանսիան ոչ միայն ձգտում էր (ինչպես ցույց տվեց դեպքերի հետագա ընթացքը՝ ապարդյուն) այդպիսով իրեն դաշնակից դարձնել Թուրքիային, այլեւ՝ նվազագույնի հասցնել այդ քաղաքականության՝ իր իսկ համար անցանկալի հետեւանքները: Այսպես է բացատրվում Ֆրանսիայի կառավարության անմիջական մասնակցությունը ինչպես Ալեքսանդրեանի սանջակի հայ բնակչության արտագաղթի կազմակերպմանը, այնպես էլ նրանց տեղավորմանը Սիրիայում եւ Լիբանանում, մինչեւ իսկ այդ նպատակով հողատարածքներ գնելով: Թե որքան երկար կտեւեր այդ օժանդակությունը եւ ինչ չափերի կհասներ, կարելի է միայն ենթադրություններ անել, քանի որ արդեն սեպտեմբեր ամսին սկսվեց Երկրորդ Համաշխարհային պատերազմը եւ Ֆրանսիան դադարեցրեց իր օժանդակությունը հայ գաղթականներին: Այդ ժամանակից սանջակի գաղթականների տեղավորման հետ կապված բոլոր հարցերի լուծումը դարձավ հիմնականում սփյուռքահայության խնդիրը:

Սանջակի ողջ տարածքից խուճապահար գաղթած, իրենց ունեցվածքը լքած հայերի բազմահազարանոց զանգվածը անմիջապես հայտնվեց ծանր վիճակում: Արձագանքելով Անթիլիասի կաթողիկոսության եւ Հայ Կաթոլիկ եկեղեցու պատրիարքարանի օգնության կոչերին՝ ՀԲԸ Միությունը նախ նրանց հասցեով շտապ ուղարկեց իր առաջին նպաստը՝ 1.300 ֆունտ ստեռլինգ, ապա ձեռնարկեց «Համազգային հանգանակություն», որի առաջին նվիրաբերողները եղան Նուպարյան ընտանիքի անդամները՝ հանգուցյալ Պողոս Նուպարի որդիներ Առաքելն ու Վահրամը եւ քույրը՝ Նոյեմի Գափամամյանը, ինչպես նաեւ իրենց առատաձեռնու-

թյամբ հայտնի Արշակ եւ Միհրան Գարակոչյան եղբայրները՝ Նյու Յորքից: Իսկ արդեն 1939թ. հունիսի 9-ին ՀԲԸ Միության կենտրոնական Վարչության հրահանգով տեղում ստեղծվեց Նպաստից կենտրոնական հանձնախումբը, որը պետք է զբաղվեր Լիբանանում եւ Սիրիայում ապաստանած գաղթականներով ընդհանրապես, եւ հատկապես՝ Ալեքսանդրեանի սանջակի գաղթականների տնտեսական, կենցաղային, կրթական, առողջապահական եւ այլ խնդիրներով:

Սանջակի գաղթականների մի որոշ մասը ժամանակի ընթացքում հաստատվեց Սիրիայի տարբեր բնակավայրերում, իսկ հիմնական մասը համախմբված էր Լիբանանում՝ Այնճարի, Ռաս էլ Այնի եւ Բեյրութի շրջանում:

Բեյրութից մոտ 50 կմ հեռավորության վրա գտնվող Այնճարում, Դամասկոսի ճանապարհին, տեղավորվեցին շուրջ 5.200 մարդ: Ուշագրավ է, որ բնակավայրը նախագծող ֆրանսիացիները, ինչպես եւ անգլիացիները Պորտ Սայդի վրանավանի դեպքում, այն բաժանեցին վեց հիմնական մասերի, որոնք հատկացվեցին Մուսա լեռան վեց գյուղերի նախկին բնակիչներին: Պատահական չէ, որ հայերը Այնճարը կոչում էին նաեւ «Նոր Մուսա լեռ»: Այստեղ ՀԲԸ Միության Նպաստից հանձնախումբը իրականացրեց հետեւյալ հիմնական աշխատանքները. «Լճացած ջուրերն ու ճահիճները չորցնելու համար 45 քմ երկարությամբ ջրանցքներ բացար, գետին եզերքը 500 մ էրթ երկարությամբ թունբեր կանգնեց, 1013 տուններ եւ 500-ի մօտ ախոռներ կանոնաւոր հակաճեխման ենթարկեց եւ մալարիան երեք տարուան ընթացքին գրեթէ արմատախիլ ըրաւ Այնճարէն»:¹⁸⁰ Բնակելի տները ջրով ապահովելու նպատակով հանձնախումբը տեղադրեց շարժիչ եւ խողովակներ, հոգաց հիվանդանոց-մայրանոցի կահավորման, բժշկական սպասարկման, բժիշկների, դեղորայքի, սննդի եւ այլ ծախսերը, ինչպես նաեւ գաղթականներին տրամադրեց հագուստ, դեղորայք, անհատական նպաստներ եւ այլն:

Ռաս էլ Այնի գաղթակայանում ՀԲԸ Միությունը հիմնեց Նուպարյան վան թաղը իր 50 տներով, որոնք հատկացվեցին առավել անապահով ընտանիքներին, իսկ Բեյրութի արվարձաններից մեկում՝ Անդր-Նահրի շրջանում մասնակցեց 250 տնակների կառուցմանը: Միությունը հողագործությամբ զբաղվող գաղթականներին տրամադրեց սերմացու ցորեն, գարի, ոսպ, սիսեռ եւ այլն, «անոնց հայթայթեց նաեւ երկրագործական գործիքներ եւ լծկան ու կաթնատու կենդանիներ, օրինակ՝ միայն Այնճարի համար 50 եզ, 110 կով, նոյնքան այծ եւ ոչխար, եւ այլն»:¹⁸¹

Այդ երեք գաղթակայաններում ամենամտահոգիչ հարցերից էր մալարիայի (ջերմախտի) մեծ տարածումը, որի հիմնական պատճառը, ինչպես նշվեց, ճահիճներն էին, եւ որը հաղթահարելու նպատակով ձեռ-

նարկվեց հատուկ հակազերմախտային արշավ, որը ղեկավարում էին ՀԲԸ Միության Նպաստից հանձնախմբի անդամներ, Բելյուրթի Ամերիկյան համալսարանի պրոֆեսորներ Յ.Ենիգոսյանը և Տ.Պերպերյանը: Մի քանի տարիների ընթացքում ՀԲԸ Միության, Գարակոչյան հիմնարկության, Մերձավոր Արևելքի հիմնադրամի (Near East Foundation), ինչպես նաև շվեյցարացի մարդասեր, դոկտոր Կյունցլերի և Բելյուրթի Ամերիկյան համալսարանի նախագահ, դոկտոր Բայարդ Դաշի համատեղ գործողությունների շնորհիվ (ճահիճների չորացում, հիվանդանոցների և դարմանատների հիմնում, մշտական բժշկական հսկողություն և այլն) հնարավոր դարձավ լուծել այդ խնդիրը: Եթե 1942թ. ջերմախտի պատճառով մահացել էր 90 մարդ, ապա հաջորդ՝ 1943թ. գրանցվել էր միայն 3 նման դեպք:¹⁸²

Թեև Միության տրամադրության տակ եղած միջոցները անհնարին դարձրին սեփական նոր դպրոցների հիմնումը գաղթականների համար, այնուամենայնիվ, այն տարեցտարի դրամական նպաստներ հատկացրեց գործող վարժարաններին, մասնակցեց նրանց կահավորման և վերանորոգման աշխատանքներին, կրթաթոշակներ նշանակեց մի քանի համալսարանական ուսանողների, ինչպես նաև ֆինանսապես օժանդակեց ուսուցիչներին և եկեղեցականներին: ՀԲԸ Միության Նպաստից հանձնախումբը այդ տարիներին մեծապես օգնեց նաև Սիրիայի ու Լիբանանի այլ վայրերում՝ Հալեպում, Դամասկոսում, Հոմսում, Լաթաքիայում, Տրիպոլիում, Բեքաայի շրջանում հաստատված հայությանը:¹⁸³

* * *

1922թ. նոյեմբերի 10-ին Փարիզում կայացավ ՀԲԸ Միության հերթական ընդհանուր ժողովը, որի ատենապետն էր Պողոս Նուպարը: Վերջին անգամ նա նախագահել էր ժողովին պատերազմից առաջ՝ 1914թ. մայիսին, և թե ինքը, թե ժողովն ու ընդհանրապես հայ ժողովուրդը, ոգետրված և խանդավառ էին բարենորոգումների ծրագրի մոտալուտ իրականացման հույսով: Հետագա ութ տարիների ընթացքում շուրջ 1.5 մլն հայ զոհ դարձավ Թուրքիայի իրականացրած ցեղասպանության քաղաքականության, հարյուր հազարավոր հայեր դարձան գաղթական և ապաստան գտան հեռու և մոտիկ երկրներում, իսկ Հայաստանի տարածքի մեծագույն մասում, ինչպես նաև Կիլիկիայում հայ բնակչություն այլևս գոյություն չուներ: Եվ դժվար չէ պատկերացնել թե՛ այն հուսահատ մթնոլորտը, որ տիրում էր 1922թ. ժողովում և թե՛ Պողոս Նուպարի հոգեվիճակը:

Պողոս Նուպարը ասում էր իր՝ որպես ազգային-քաղաքական գործչի, անհատ մարդու ամենատղբերգական օրերը, որի անկեղծ խոստովանությունն էին նրա հետևյալ խոսքերը. «...այժմ, որ ուժասպառ, ընկճուած՝ մեր ազգին անլուր աղէտներէն և դատապարտուած բացարձակ հանգիստի մը, ստիպուեցայ քաշուիլ ոչ միայն Ազգ. Պատուիրակութենէն, այլ նաև բոլոր այն ընկերակցութիւններէն՝ որոնց կը մասնակցէի, և երբ հարկադրուեցայ նոյնիսկ թողուլ բոլոր անձնական զբաղումներս, ուզեցի գէթ մնալ ձեր ժողովին մէջ, ձեզի հետ կարենալ աշխատելու և մասամբ ամոքելու համար ճակատագիրը հազարաւոր զոհերուն՝ պատերազմին և անոր հետեւանքներուն, որ մեր աչքերուն առջեւ օրէ օր տակաւին կ'աճին իրենց ամբողջ ահաւորութեան մէջ»:¹⁸⁴ Իսկապես որ դաժան ճակատագիր էր՝ ստանձնել ազգային շահերի պաշտպանի և հետապնդողի առաքելութիւնը, դրան նվիրել շուրջ տասը տարի, վարել բազմաթիվ բանակցություններ եվրոպական պետական գործիչների հետ, ստանալ նրանց երաշխիքները հայերի ազգային քաղաքական իրավունքների իրականացման վերաբերյալ, ստորագրել ազգօգուտ փաստաթղթեր և այդ ամենի շնորհիվ, իր իսկ բառերով ասած, «...իրաւունք ունէիք վստահութեամբ նայելու ապագային վրայ, և խորհելու թէ մեր զոհողութիւնները պարսպ չէին գացած, և թէ մեր ճիգերը զուր տեղը չէին վատնուած», և ի վերջո խոստովանել. «Ասիկա երազ մը եղաւ լոկ՝ գոր եկաւ ցրուել մահաշքօրէն ամենադառն յուսախաբութիւնը: Մեզի կը մնայ անկէ ամենադաժան տառապանքներու յիշատակը միայն՝ որուն տակ ոեւէ ժողովուրդ ճնշուած ըլլայ երբեք»:¹⁸⁵

Պողոս Նուպարի՝ որպես ազգային գործչի եզակիությունն ու առանձնահատկությունն այն էր, որ նրա մեջ միաժամանակ համակցվում էին քաղաքական գործիչն ու բարեգործը: Միության Ընդհանուր ժողովում նրա արտասանած ճառի առաջին մասը գրել էր Պողոս Նուպար քաղաքական գործիչը, որը ստիպված եղավ արիաբար ճանաչել իր պարտությունը: Ըճառի հաջորդ մասի հեղինակը եւս Պողոս Նուպարն էր՝ ՀԲԸ Միության նախագահը: Այս դեպքում նա ուներ բոլոր հիմքերը հպարտությամբ խոսելու Միության ազգին մատուցած բացառիկ ծառայությունների մասին և նաև վստահեցնել իր գործընկերներին. «...մեր անզօրութիւնը պէտք չէ որ յուսալքում պատճառէ մեզի և դուք կրնաք ապահով ըլլալ որ մեր Ընկերակցութիւնը մինչեւ վերջը պիտի կատարէ իր պարտականութիւնը, գէթ մեղմելու համար կարելիութեան սահմանին մէջ, ամէնէն կարօտեալներու տառապանքները»:¹⁸⁶

ՀԲԸ Միության հետագա տարիների գործունեությունը անժխտելի ապացույցն էր այդ խոսքերի ճշմարտության:

ԽՈՐՀՐԴԱՅԻՆ ՀԱՅԱՍՏԱՆՈՒՄ

Արտասահմանում եւ հատկապես Եվրոպայի երկրներում ապրող հայությունը քաջատեղյակ էր 1917թ. բոլշեիկյան հեղափոխությունից հետո Ռուսաստանում կատարվող իրադարձություններին: Փարիզ, Բեռլին, Պրագա, Եվրոպական այլ քաղաքներ գաղթած տասնյակ հազարավոր ռուս ազնվականներ, մտավորականներ, սպաներ եւ այլք ականատեսներն էին կարմիր տեռորի, այսպես կոչված, «հակահեղափոխական տարրերի» ոչնչացման քաղաքականության: Արտասահմանի հայությունը հայտնի էր նաեւ, թե՛ ճակատագրական ինչ հետեւանքներ ունեցավ խորհրդային իշխանությունների կողմից ռուսական զորքերի շտապ դուրսբերումը Կովկասյան ռազմաճակատից, հայտնի էին այն սերտ կապերը, որ հաստատվել էին Խորհրդային Ռուսաստանի եւ քեմալական Թուրքիայի միջեւ, որ առաջինների ռազմական եւ ֆինանսական օգնությամբ էր մեծապես պայմանավորված թուրքական զորքերի հաղթանակը թուրք-հունական պատերազմում, որ հանուն իր քաղաքական նպատակների իրագործման Խորհրդային Ռուսաստանը պատրաստ էր բավարարել Թուրքիայի շատ եւ շատ պահանջներ, ինչի օրինակներն էին Կարսի հանձնումը Թուրքիային, Նախիջևանը եւ Ղարաբաղը՝ նորաստեղծ Խորհրդային Ադրբեջանին եւ այլն: Այս ամենի հետ մեկտեղ, սակայն, հայտնի էր նաեւ բոլշեիկների իշխանությունը տապալելու տարբեր երկրների եւ ներքին ընդդիմության բոլոր փորձերի անհաջողությունը, այն, որ խորհրդային կարգերը աստիճանաբար հաստատվում էին նախկին Ռուսական կայսրության գրեթե ողջ տարածքում, այդ թվում 1920թ. նոյեմբերին նաեւ Հայաստանում: Արեւմուտքի երկրները, որոնց համար սկզբունքորեն անհամատեղելի, անընդունելի էին բոլշեիկյան իշխանության գաղափարաբանությունն ու քաղաքականությունը, այնուամենայնիվ,

ստիպված եղան ոչ միայն հաշտվել Խորհրդային Ռուսաստանի, Խորհրդային Միության գոյության հետ, այլև ճանաչել եւ հարաբերություններ հաստատել նրա հետ: Սփյուռքահայ բոլոր կազմակերպություններն ու նրանց համակրող զանգվածները նույնպես կանգնել էին երկրնտրանքի առջեւ՝ ճանաչելով Հայաստանի նոր բոլշեւիկյան իշխանությունները, թե՞ ոչ: Այս հարցը դարձավ առանցքային եւ կանխորոշեց ու պայմանավորեց սփյուռքահայության փոխհարաբերությունները Խորհրդային Հայաստանի հետ հետագա յոթ տասնամյակների ընթացքում:¹ ՀԲԸ Միությունը նույնպես պետք է տար այդ դժվարին հարցի պատասխանը:

**Որբերի տեղափոխումը:
Հայաստանում ՀԲԸՍ գործելու թուլյատրումը**

Պողոս Նուպարի եւ նրա գործընկերների համար, անշուշտ, խորթ էին Հայաստանում հաստատված նոր կարգերը, բայց որպես իրապաշտ մարդիկ, նրանք գիտակցում էին, որ ստեղծված իրավիճակում, հատկապես 1923թ. Լոզանի կոնֆերանսից հետո, հայկական տարածքներից հայաբնակ մնացած միակ հատվածը Խորհրդային Հայաստանն է, որի ապահով գոյությունը հնարավոր է Խորհրդային Միության կազմում միայն: Սակայն այդ իրողության գիտակցումը եւ դրանից բխող Խորհրդային Հայաստանի հետ հարաբերվելու պատրաստակամությունը դեռ բավական չէին, անհրաժեշտ էր Հայաստանի իշխանությունների համաձայնությունը: Խորհրդային կարգերի հաստատման առաջին իսկ օրերից հայ կոմունիստները, հետեւելով Ռուսաստանում արդեն իրագործվող դասակարգային պայքարի սկզբունքներին, ոչ միայն արգելեցին հայ ազգային կուսակցությունների գործունեությունը երկրում, այլև պայքար ծավալեցին նրանց եւ նրանց հովանու տակ գործող բոլոր տեսակի կազմակերպությունների դեմ նաեւ սփյուռքում: Հայաստանի իշխանությունների տեսակետից, սակայն, ՀԲԸ Միությունը որոշ չափով առանձնանում էր արտասահմանում գործող այլ ճանաչված եւ խոշոր կազմակերպություններից: Նախ, Միությունն այն «առավելությունն» ուներ, որ, ըստ էության, այդպես էլ չհամագործակցեց Հայաստանի Առաջին Հանրապետության օրոք իշխող ՀՀ Դաշնակցության հետ: Թեեւ Միության ղեկավար մարմիններում կային Ռամկավար-Ազատական կուսակցության որոշ թվով անդամներ, այնուամենայնիվ, այն ներկայանում էր որպես անկախ, զուտ բարեգործական եւ ոչ քաղաքական կազմակերպություն: Կարելի էր հանգամանք էր նաեւ այն, որ ՀԲԸ Միությունը սփյուռքի ամենահեղինակա-

վոր եւ ֆինանսական որոշակի կարողություններ ունեցող կազմակերպություններից էր: Ամեն դեպքում, սակայն, հարաբերություններ հաստատելու գործում որպես նախաձեռնող կողմ պետք է հանդես գար ՀԲԸ Միությունը:

1921թ. օգոստոսի 30-ին ՀԲԸ Միության Կենտրոնական Վարչական Ժողովը հրապարակեց «ՀԲԸ Միությունը Հայաստանի մէջ» հատուկ հայտարարություն: «Կեդր. Վարչ. Ժողովս, յատաչ երթալով պաշտօնական եւ այլ շրջանակներէ իրեն ուղղուած կոչերուն,– ասվում էր հայտարարության մեջ,– օգնութիւն կազմակերպելու համար Հայկ. Հանրապետութեան սահմաններուն մէջ եւս, սիրայօժար ընդունած է ՀԲԸ Միութեան գործունեութիւնը տարածել նաեւ Հայաստանի մէջ, ուր, ինչպէս յայտնի է, ժողովուրդը սովի եւ թշուառութեան մատնուած է:

«Այդ առթիւ Կեդր. Ժողովը ձեռնարկած է բանակցութեանց, որոնց ելքին պիտի սպասէ գործի սկսելու եւ Միութեան վեհ նպատակները Հայաստանի մէջ գործադրելու համար:

«Բայց այժմէն իսկ Կեդր. Ժողովը պարտք կը սեպէ վեր հանել թե՛ ինք սոյն կարելոր որոշումը տուած է հակառակ որ Միութեան ներկայ միջոցները թոյլ չեն տար նորանոր յանձնառութեանց, քանի որ արդէն, մասնաւորապէս Կիլիկիոյ մէջ, զանազան հաստատութեանց բեռը ստանձնած է, սակայն եւ այնպէս այն հաւատքը ունի որ, ժողովուրդը այս որոշումին բացառիկ կարելորութիւնը գնահատելով, իր կարգին պիտի փութայ իրեն գորավիզ կանգնել»:²

Այս որոշման իրագործումը դժվարանում էր թե երկու կողմերի միջեւ հարաբերությունների բացակայությամբ եւ թե Միության սահմանափակ ֆինանսական կարողություններով: Այդ էր պատճառը, որ Կենտրոնական Վարչական Ժողովը ստիպված էր գնել. «Դժբախտաբար հանգամանքները թոյլ չի տուին կազմակերպուած գործ տեսնել եւ հազիվ անգամ մը կարելի եղաւ Կ.Պոլսի մասնաժողովին եւ Նիր Իսթ Ռըլիֆի միջոցաւ նպաստ մը դրկել Հայաստանի սովեալներուն, Ե.Ո. (եգիպտական ոսկի – էդ.Մ.) 1270 արծողութեամբ..., 14 հակ գապօթ (277 ծրար), 28 հակ եւ սնտուկ զանազան նոր հանդերձեղէն (բուրդ շապիկ, գուլպայ, կոշիկ, եւն.) եւ 350 պարկ ալիւր: Աւելորդ է ըսել թէ նպաստաւոր պատենթութիւններէն պիտի գիտնանք օգտուիլ աւելի լայն չափով Հայաստանի տարաբախտ ժողովուրդին օգնելու համար»:³ Մի քանի ամիս անց՝ 1922թ. գարնանը Միությունը իր երկրորդ նպաստն է հատկացնում Հայաստանին՝ 1000 անգլիական ոսկու չափով՝ սերմնացու եւ դեղորայք գնելու եւ Հայաստան տեղափոխելու համար:⁴

ՀԲԸ Միության համար այդ օրերին դեռևս հայտնի չէր՝ թույլ կտրվի արդյոք իրեն գործել Խորհրդային Հայաստանում եւ եթե այդ, ապա ինչ չափով եւ ինչ պայմաններով, պարզ չէր նաեւ նրա անդամների ու կողմնակիցների վերաբերմունքը այդ համագործակցության հանդեպ: Այդ տարիների քաղաքական հայտնի գործիչ Ա.Թերզիպաշյանը այսպես է նկարագրում 1923թ. Փարիզում կայացած իր մի գրույցը Պողոս Նուպարի հետ. «Փաշան անմիջապես խօսակցութիւնը տարաւ տեղեկագրին, զոր Հայաստանէն Պոլիս վերադարձիս, 1923-ի սկիզբները, ես դրկած էի Բարեգործականին Կեդր.Վարչութեան: Այդ տեղեկագրովը ես առաջարկած էի Հայաստան փոխադրել Սուրիա, Պաղեստին, Յունաստան գտնուող որբերը: Հայաստանի կառավարութեան՝ զանոնք ընդունելու յօժարութեանը հետ, ես իմ տեղեկագրին մէջ թուած էի կարգ մը առաւելութիւններ, մասնաւորապէս սննդեղէններու գիներուն եւ շանժի տարբերութիւններուն շուրջ, որոնք՝ գրեթէ, կէս առ կէսի կ'իջեցնէին Բարեգործականի որբախնամ գործին յատկացուցած պիտուէն: Յետոյ երբ, բերանացի ատելցուցի թէ՛ Հայաստանի մէջ հայ որբերը ատելի տիպիքիին ներքեւ պիտի մեծնային, Փաշան աշխուժով մը՝

- Բայց այդ տիպիքին տակ, հայ որբերը բոլորն ալ բոլշեիկ կը դառնան:

- Ատիկա չեմ երաշխաւորեր - պատասխանեցի:
 - Բոլշեիկները թոյլ պիտի տա՞ն որ հայ որբերը սորվին իրենց լեզուն, պատմութիւնը, կրօնը: Ծարունակեց հարցնել Փաշան:

- Լեզուն, պատմութիւնը, այո, բայց ոչ կրօնքը, պատմութիւնն ալ ոչ մեր հասկցած ձեւովը: Եվ ասիկա անշուշտ անյարմարութիւն մըն է:

- Ատոնք կ'ըսէք եւ կ'առաջարկէք:

- Որպէս անյարմարութեանց փոքրագոյնը:

Փաշան ծնոտը ձեռքին մէջ, ցուցամատը ճակտին, ինքզինքը պահ մը Խորհրդածութեան տուաւ, յետոյ, յանկարծ՝

- Ես ալ կը կարծեմ թէ որբերու աստանդական վիճակին ներկայացուցած անյարմարութեանց քով ատիկա փոքրագոյնն է:

Յետոյ քննադատով մը.

- Պայմանաւ որ դուք ալ բոլշեիկ դարձած չըլլաք:

Ու իր այս կատակին վրայ լիաթոք խնդաց ան»:⁵

Պողոս Նուպարը արագ հաղթահարեց հայ որբերի՝ բոլշեիկ դառնալու վերաբերյալ մտավախությունները, կամ էլ իսկապէս համարեց այդ ամենը «անյարմարութեանց փոքրագոյնը», քանզի նույն 1923թ. գարնանը որբերի տեղափոխման հարցը քննարկվեց Լիճնի տոնավաճառում Խորհրդային Հայաստանի ներկայացուցիչ Ա. Պիրալովի հետ, որը Հայաս-

տանի Ժողկոմխորհին (Ժողովրդական կոմիսարների խորհրդին) ներկայացրած զեկույցում գրում էր. «Որբանոցների տեղափոխումը Սիրիայից Հայաստան առաջ է քաշվել Եգիպտոսի Բարեգործական Միության (խոսքը ՀԲԸ Միության մասին է, որի կենտրոնատեղին այդ տարիներին դեռ Կահիրեում էր - Էդ.Մ.) կողմից, նկատի առնելով ֆրանս-թուրքական հարաբերությունների սրվելը՝ Ադաթուն բեյը (Երվանդ Ադաթուն - Էդ.Մ.) անհրաժեշտ էր համարում որբերի տեղափոխումը կազմակերպել անմիջապես, բայց ես բացատրեցի, որ բնակարանային սուր ճգնաժամի հետեւանքով ներկա պահին դա բացարձակապէս անհնար է, մինչեւ որ Միությունը իր հաշվին չկառուցի տներ 1300 որբերի տեղավորման համար եւ չփոխանցի Հայաստան անհրաժեշտ գումարներ ընթացիկ ծախսերի համար, քանի որ, ըստ իս, ներկա պայմաններում հազիվ թէ հնարավոր է Հայաստանի կառավարությունը ծանրաբեռնել մման ծախսերով»:⁶

1923թ. ամռանը որբերի տեղափոխման եւ տեղավորման հետ կապված հարցերը Հայաստանի կառավարության հետ քննարկեցին Միության պատվիրակներ Լ.Բաշալյանն ու Գ.Ասատուրը, իսկ աշնանը, երբ Միությունը հրավիրված էր Երեւան՝ մասնակցելու Հայաստանի Օգնության Կոմիտեի (ՀՕԿ) 3-րդ համագումարի աշխատանքներին, նաեւ նրա ներկայացուցիչ Ե.Կարիկյանը: Ե.Կարիկյանն անձամբ այն տեսակետն ուներ, որ սփյուռքը եւ, մասնավորապէս, ՀԲԸ Միությունը պետք է իր ողջ ֆինանսական ներուժը ծառայեցնի Հայաստանի բազմաթիվ կենսական խնդիրների լուծմանը եւ հենց այդ ոգով էլ վարեց բանակցությունները:

1923թ. հոկտեմբերի 30-ին Հայաստանի Լուսավորության ժողովրդական կոմիսար (Ժողկոմ) Աս.Մոավյանին ուղղած մամակում Ե.Կարիկյանը կառավարությանն առաջարկում էր ՀԲԸ Միությանը հողամաս տրամադրել Եղվարդի եւ Դավմայի շրջանում՝ մշակելու եւ այնտեղ տեղափոխված որբերին հաստատելու նպատակով: Պատասխան մամակում Աս.Մոավյանը գրում էր, որ Հայաստանի կառավարությունը, «ընդառաջ գնալով Ձեր առաջարկներին, որ նպատակ ունի մեր որբության թշվառ բանակի մի հատվածը ապահովելու եւ նրա տնտեսական ապագան կայուն հիմքերու վրա դնելու, արտոնում է ՀԲԸ Միությանը ունենալու յուր գործունեությունը ՀՍԽՀ սահմաններում սույն գրության կցված 22 հողվածներից բաղկացած հիմունքներով»:⁷ Այդ «22 հողվածներից բաղկացած հիմունքները» կրում էին Լուսավորության ժողկոմ Աս.Մոավյանի եւ Հողագործության ժողկոմ Ար.Երզնկյանի 1923թ. հոկտեմբերի ստորագրությունները եւ վերաբերում էին Միությունից ակնկալվող գործունեությանը՝ հողերի մշակում, ջրանցքների շինարարություն եւ նորոգում, որբանոցների կառուցում, որբերի կրթություն եւ աշխատանքով ապահովում

եւ այլն: Ամենակարեւորը, սակայն, առաջին հոդվածն էր. «Հայաստանի Սոցիալիստական Խորհրդային Հանրապետության Ժողովրդական Կոմիսարների Խորհուրդը արտոնում է Հայ (այդպես է բնագրում-Էդ.Մ.) Բարեգործական Ընդհանուր Միությանը Խորհրդային Հայաստանի սահմաններում յուր հանրօգուտ գործունեությունը տարածել երկրի վերաշինության եւ ժողովրդի տնտեսական, ֆիզիկական ու կուլտուրական զարգացման օժանդակելու նպատակով»:⁸

Ահա այս հոդվածի շնորհիվ էր, որ Միությունը դարձավ սփյուռքի միակ ավանդական կազմակերպությունը, որին թույլատրվեց գործել Խորհրդային Հայաստանում հետագա տասնչորս տարիների ընթացքում: 1923թ. դեկտեմբերին որբերի տեղափոխման մասին հրապարակավ խոսեց արդեն Հայաստանի Ժողկոմխորհի նախագահ Ս.Լուկաշինը (Սրապիոնյան): Խորհրդային Հայաստանի բանվորների, գյուղացիների ու կարմիրբանակայինների խորհուրդների 3-րդ համագումարում արտասահման ճանաչում նա ամենայն հստակությամբ շարադրեց այն պայմանները, որոնք պարտադիր էին Հայաստանի հետ համագործակցել ցանկացող սփյուռքահայ բոլոր կազմակերպությունների, այդ թվում նաեւ ՀԲԸ Միության համար. «Այն բոլոր արտասահմանյան հայկական կազմակերպությունները, որ կամենում են գործոն մասնակցություն ունենալ երկրի շինարարության գործին՝ խնդրեն, ճանապարհը բաց է նրանց համար, սակայն պայմանով, որ ոչ մի փորձ չլինի նրանց կողմից խառնվել քաղաքական գործի, կամ այդպիսին հարուցել, որովհետեւ նրանց համար քաղաքական հարցերում մենք ոչ մի զիջում չունենք եւ այդ մասին չենք էլ խոսի: Ոչ միայն քաղաքական հարցերի մասին չենք խոսի, այլեւ ընդհանրապես չենք խոսի որեւէ քաղաքական կազմակերպության հետ, որովհետեւ մենք նրանց չենք ճանաչում: Չենք ճանաչում ոչ մի ազգային դելեգացիա, նրա նախագահին կամ փոխնախագահին. նրանք մեզ հետ կարող են գործ ունենալ եւ պատասխանի սպասել միայն այն դեպքում, եթե կխոսեն որպես արտասահմանյան բարեգործական հաստատություններ կամ նրանց ներկայացուցիչ անհատ քաղաքացիներ»: Կառավարության նախագահը, այնուհետեւ, հստակ նշում էր ՀԲԸ Միությունը՝ որպես հնարավոր գործընկերոջ. «Մեր երկրում կա որբերի հսկա բազմություն՝ մինչեւ 30.000, որից մոտ 25.000-ը պահում են օտարերկրյա հասարակական կազմակերպությունները: Մենք թեւ ցանկանում ենք ընդունել եւ մեր գաղափարներով դաստիարակել արտասահմանում մնացած մանուկներին, բայց ֆինանսական հնարավորություն չունենք այդ անելու համար: Մենք որոշակի հայտնել ենք, որ եթե գաղութները հանձն առնեն որոշ ժամանակ ապահովել որբերի ապրուստը երկրի ներսում, ապա մենք հանձն կառնենք

բնակարան, հող եւ այլն տրամադրելու: Այս ուղղությամբ Եգիպտոսի բարեգործական ընկերության հետ (կառավարության նախագահը նկատի ունի ՀԲԸ Միությունը - Էդ.Մ.) որոշ համաձայնության եկել ենք»:⁹

Նման զգուշացումները Միության պարագայում ավելորդ էին. Պողոս Նուպարը, որը մինչ այդ էլ միշտ խուսափում էր ներագային քաղաքական գործունեությունից, առավել եւս մտադիր չէր զբաղվել դրանով Խորհրդային Հայաստանի պայմաններում: Ստեղծված իրավիճակում նրա համար էականն ու կարեւորը տարբեր երկրներում ապաստանած հայ գաղթականների, հատկապես երիտասարդ սերնդի ճակատագիրն էր:

1923թ. դեկտեմբերի վերջին, ելույթ ունենալով ՀԲԸ Միության հերթական ընդհանուր ժողովում, Պողոս Նուպարը հատուկ անդրադարձավ որբերի հարցին. «Կարելի չէր անշուշտ չափահաս եղող որբերը մեկ օրէն միւսը դուրս հանել մեր Որբանոցներէն: Այս տեսակ լքում մը զանոնք ենթակայ պիտի ընէր բարոյական եւ նիւթական բազմադիմի վտանգներու: Միւս կողմէ, ընդունելի չէ որ անոնք շարունակեն պատսպարուիլ որոշ տարիքէ մը անդին, ինչ որ զիրենք ծոյլ եւ անպատասխանատու կեանքի մը պիտի վարժեցնէր: Այս պարագաներուն մէջ չափազանց դժուար կը դառնար արդարեւ աստիճանաբար հաշուեյարդար ընելու գործը մեր Որբանոցներուն գորս չի պիտի կրնայինք պահել անսահմանօրէն: Այս նպատակաւ է որ մեր Որբանոցներուն մէջ ամէն բանէ առաջ տղոց կը տրուի արհեստագիտական կրթութիւն մը որպէսզի դուրս ելլելէ յետոյ կարենան իրենց աշխատութեամբը ապահովել իրենց ապրուստը: Էականը որբանոցէն մեկնող տղոց գործ գտնելն է, ինչ որ դժբախտաբար հետզհետէ դժուարանալու վրայ է, մատուցումը խնդրանքէն շատ ատելի ըլլալուն մանաւանդ այն վայրերուն մէջ ուր կը գտնուին մեր որբերը եւ ուր բնականաբար նախապատուութիւն կը տրուի տեղացի տղոց: Միւս կողմէ, Միութիւնը չէր կրնար զանոնք քաջալերել գաղթելու օտար երկիրներ, ուր մեծ դժուարութեանց պիտի հանդիպէին, եւ վրայ պիտի տային վերջ ի վերջոյ իրենց ազգութիւնն ալ»: Ստեղծված իրավիճակի նման սթափ եւ իրատեսական գնահատումից հետո Պողոս Նուպարը առաջարկում է հարցի այնպիսի մի լուծում, որը սկզբունքային նշանակություն ունեցավ ՀԲԸ Միության եւ Խորհրդային Հայաստանի միջեւ հարաբերություններ հաստատելու համար: «Կեդր. Ժողովը համախորհուրդ է որ, ազգային բաղձանքներու ամէնէն ատելի համապատասխան եղող լուծումը, ինչ որ մեզի կը թելադրէ նաեւ մեր հայրենասիրական զգացումը, կը կայանայ 17 տարեկան եղած բոլոր որբերը Հայաստան փոխադրելուն մէջ, ուրտեղ անոնք յուսալի է որ աշխատանք գտնեն,- գլխատրաբար հողային մշակութեան եւ փոքր ճարտարարուեստի ճիւղերուն մէջ,- եւ իրենց ապրուս-

տը ճարեն, հոն հաստատելով իրենց ընտանեկան բոյնը եւ միեւնոյն աստե՛ն օգտակար ըլլալով երկրին: Այս կերպով անոնց օտար երկիրները ցրու- մին առաջքը պիտի առնուէր մասամբ եւ մեր հայրենիքին մէջ բնակող հայերու թիւն ալ նոյն համեմատութեամբ պիտի ստուարանար, ինչ որ մեր ազգային ապագային տեսակէտով մեծագոյն բարիքը պիտի ըլլար»:¹⁰

1924թ. հունվարին ՀՕԿ-ի Գլխավոր վարչության նախագահ Ար.Երզնկյանի եւ պատասխանատու քարտուղար Ժ.Միրզախի (Միրզա- խանյան) ստորագրությամբ շրջաբերական ուղարկվեց սփյուռքահայ տարբեր համայնքներ, ուր պարզաբանվում էին ՀՕԿ-ի մինչ այդ կայա- ցած համագումարի որոշումները: Նշելով, որ «ՀՕԿ-ը պետք է լծվի միայն Հայաստանի վերաշինության աշխատանքներին», որ «առաջադրված բո- յոր հարցերը ՀՕԿ-ը կատարելու է աստիճանաբար եւ անպայման ար- տասահմանի հայ գաղութների օժանդակությամբ», շրջաբերականի վեր- ջում ասվում էր. «Վարչությունն խնդրում է Ձեզ լարել Ձեր բոլոր ուժերը օժանդակելու մեզ՝ առաջադրված բոլոր հարցերը արագորեն լուծելու եւ այս կերպով իր կողմից եւս օգնելու այն աշխատանքին, որը տարվում է Հայաստանի գյուղացիությունը տնտեսական նեղ պայմաններից ազա- տելու համար»:¹¹ (ՀԲԸ Միության եւ ՀՕԿ-ի փոխհարաբերությունների մասին տե՛ս ստորեւ):

Արձագանքելով այդ կոչին՝ ՀԲԸ Միությունը հրապարակեց «Շրջա- բերական Վսեմ. Պողոս Նուպար Փաշայի Հայաստանի օգնութեան հան- գանակութեան մասին ուղղուած ՀԲԸ Միութեան տեղական մասնաժո- դովներուն»: Նշելով, որ Միությունը խորապես հետաքրքրված է Հայաս- տանի կառավարության ծրագրած ազգային ձեռնարկներով, Միության նախագահը գնահատում էր այն որպէս «վերին աստիճանի հայրենասի- րական եւ մարդասիրական գործ, որուն պարտաւոր ենք ընծայել մեր ան- վերապահ օժանդակութիւնը»: Այս շրջաբերականը կարելորվում է հատ- կապես նրանով, որ այստեղ հստակ ձեւով դրվում է բոլոր գաղթական հայերին Հայաստան տեղափոխելու հարցը: «Արդարեւ, մեր բոլոր ջանքե- րը պէտք է ձգտին ժողովելու եւ կեդրոնացնելու այս երկրամասին մէջ եւ որ այսօր կը կազմէ ամբողջ Հայաստանը - աշխարհի ամէն կողմը ցրուած եւ տարագրուած հայերը, կարելի եղածին չլսի մեծ թիւով. բայց նոյնչափ եւս կարելոր է, - ասվում էր շրջաբերականում,- այս երկիրը պատրաստել եւ ի վիճակի ընել զանոնք ընդունելու, կանխապէս հոգա- լով այն բոլոր անհրաժեշտ միջոցները, որ գիրենք պիտի պաշտպանէին համաճարակներու վտանգներու դէմ: Ասիկա յոյժ էական կէտ մըն է, որովհետեւ այն ժողովուրդը, որուն Հայաստանի մէջ հետզհետէ բազմա- նալում պատճառ կ'ըլլանք, պէտք է որ հոն ապրի առողջապահական լաւ

պայմաններու մէջ, այնտեղ գտնելով իր գործունէութեան համար նպաս- տաւոր դաշտ մը եւ իր ապրուստը ապահովող աշխատանք մը, որով մի- եւնոյն աստե՛ն պիտի կրնայ նպաստել երկրին ընդհանուր բարգաւաճու- մին»:¹² Հայաստանի իշխանությունների առաջարկությունը՝ օժանդակել երկրի գյուղատնտեսության զարգացմանը, համընկնում էր Պողոս Նու- պարի այն գաղափարին, որ «երկրագործութեան զարգացումովն է որ մանաւանդ պիտի յաջողինք մեր որբերուն համար ստեղծել գործի աւ- պարեզներ, եւ միւս կողմէ, որպէսզի անոնց Հայաստան փոխադրուիլն ալ կառավարութեան վրայ բեռ չըլլայ: Ահա թե ինչո՛ւ համար կը ջանանք Հայաստանի մէջ մշակութեան յարմար հողեր գտնել, որպէսզի անոնց մէջ հաստատուելով մեր որբերը կարենան հողագործութեամբ իրենց հացը ապահովել: Այս կերպով կը հուսանք Երեւանի կառավարութեան օժան- դակութիւնը ձեռք բերել, որ, տարակոյս չիկա թէ սիրով պիտի ուզէ ընդու- նել մեր որբերը»:¹³ ՀԲԸ Միության նախագահը այս դեպքում նույնպէս հարազատ մնաց իր սկզբունքին՝ «Ոչ թե խոսքով, այլ գործով»: 1923թ. դեկտեմբերին Ար.Երզնկյանին հասցեագրած նամակում նա գրում էր. «Անցեալ նոյեմբեր ամսոյն վերջը ուղղած հեռագիրս կը հաստատիմ, որով կը յայտնէի թէ Lloyds ... National Provincial Foreign Bank Limited-ի (London) միջոցաւ առաքած էի հազար (1000) անգլ. ոսկի, ի նպաստ գիւ- ղատնտեսական ֆոնտին»:¹⁴

Հայաստանի կառավարության ծրագրերի մեծ թարձր գնահատու- մը եւ նրանց օժանդակելու պատրաստակամությունը չխանգարեց, սա- կայն, Միության ղեկավարներին զուսպ եւ իրապաշտ վերաբերմունք ցու- ցաբերել կառավարության առաջարկություններին: 1924թ. մարտի 3-ին Պողոս Նուպարը, հիշատակելով Աս.Մոսվյանի վերոնշյալ նամակը, Ե.Կարիկյանին գրում է երկու նամակ:

Առաջինը վերաբերում էր Միությանը հողամաս հատկացնելու հար- ցին. «Այդ նամակով Դուք բարեհաճած էք մեզ տեղեկացնել, թէ կառա- վարութիւնը յօժար է Հայաստանում 10.000 տեսիաթին հողամաս տրա- մադրիլ Բարեգործական Ընկերութեանս, որպէսզի իր որբերուն մաս մը այնտեղ հաստատուին ու ընտանիք կազմին: Կեդր. Վարչ. Ժողովս կը փութայ ընդունիլ զանոնք («հիմունքները» - Էդ.Մ.) սկզբունքով եւ իր մեծ գիծերուն մէջ: Վերջնական հիմունքները միաձայնութեամբ պիտի կայա- ցուին, երբ տեղւոյն վրայ կատարուելիք ուսումնասիրութենէ մը վերջ, գոր- ծադրման ծրագիրը պատրաստուի: Հետեալբար Կեդր.Վարչ. Ժողովս որոշեց տեքնիկական միսիա մը առաքել Հայաստան, տեղւոյն վրայ կա- տարեալ ուսումնասիրութիւն մը եւ նախահաշիւներով (devis)՝ գործադր- ման վերջնական ծրագիր մը պատրաստելու համար: ...Յիրաւի, անհրա-

ծեշտ է, որ Միության, յետ քննարկման, համոզուի որ իրեն տրամադրուած հողամասին շահագործման ընդհանուր ծախսը չի պիտի խլէ անցնի իր տրամադրելի միջոցները եւ պիտի կրնայ ի գլուխ հանել իր ստանձնելիք յանձնարարութիւնները...»:¹⁵

Պողոս Նուպարի մարտի 3-ի երկրորդ նամակը նվիրված էր որբերի տեղափոխման հարցին. «Պր. Ե.Կարիկեան հաղորդեց մեզի Ձեր 3 նոյեմբեր 1923 թուակիր նամակին պարունակութիւնը, որով կը յայտնէիք իրեն թէ ՀՍԽՀ կառավարութիւնը տրամադիր է ընդունել 2000 հայ որբեր, 16 տարեկան կամ անելի, պայմանաւ որ յուրաքանչիւրին համար 100 (հարիւր) տոլար վճարուի, անոնց տարուան մը սնունդը ապահովելու համար: ՀԲԸ Միութեան Կեդր. Վարչ. Ժողովը երախտագիտութեամբ կ'ընդունի Ձեր այդ առաջարկին, քանզի հայրենասիրական ոգով մը շերմապէս կը փափագի որ այս հայերը ընդմիջտ չեն կորսուած մայր-հայրենիքին համար եւ գէթ անոնցմէ մաս մը կարենան, մտնելով ՀՍԽՀ կառավարութեան սահմաններուն մէջ, հոն հաստատուիլ, աշխատիլ, հիմնել իրենց ընտանիքը եւ պահիլ իրենց հայ քաղաքացիի հանգամանքը: Ձեռնադրուած ենք արդէն պետք եղած տրամադրութիւններուն, մօտերս դրկելու համար 150-200 որբ, ամենաչափահասներուն, ըստ կայացուած համաձայնութեան, ձեզի պիտի վճարինք 100 տոլար դրկուած յուրաքանչիւր որբի համար»:¹⁶

ՀԲԸ Միության անդամները, նրա ղեկավարությունը քաջ գիտակցում էին թե ինչ մեծ պատասխանատվություն են վերցնում իրենց վրա՝ վճարելով Հայաստան տեղափոխել իրենց որբանոցների սաներին: Խորհրդային Հայաստանում տիրող սովն ու համաճարակ հիվանդությունները, տասնյակ հազարավոր անտուն գաղթականների ու գործազուրկների առկայությունը արդեն իսկ բավական էին, որպեսզի հարցականի տակ դրվեր այդ որոշումը:

Ինչպես հայտնի է, Առաջին Համաշխարհային պատերազմի տարիներին հարյուր հազարավոր հայ գաղթականներ ստիպված եղան լքել իրենց տները եւ գաղթել Արեւելյան Հայաստան: Հայաստանի Առաջին Հանրապետության տարիներին երկրում ամենամոտավոր հաշվարկներով կար ավելի քան 50.000 որբ եւ անօթեւան երեխա, որոնց հետ կապված բազմաթիվ հարցերի լուծման համար կառավարությունը ստիպված էր ստեղծել Պետական որբանոցային վարչություն: Երկրում խորհրդային կարգերի հաստատումը որեւէ լուրջ ազդեցություն չունեցավ այդ երեխաների ընդհանուր վիճակի վրա: Պետական որբանոցների շենքերի մեծ մասը խարխուլ էր եւ պիտանի չէր բնակության համար, նրանց մեծ մասում մեկ մահճակալի վրա քնում էին երկու երեխա, մի ափսեից ճաշում էին

երկու-երեք սան, վառարաններ չիցնելու պատճառով հիվանդանում էին հարյուրավոր երեխաներ, սովի պատճառով հաճախ տեղի էին ունենում զանգվածային փախուստներ եւ այլն:

Հայաստանի Լուսժողկոմատի 1925թ. պաշտոնական տեղեկանքներից մեկում, նշելով, որ երկրի բնակչության ընդհանուր թվաքանակի շուրջ 6%-ը կազմում են որբերը, այնուհետեւ նկարագրվում էր որբանոցներում տիրող կացությունը. «Լուսժողկոմի մանկատներում երեխաների վիճակը խիստ անախտանքային է: Ծինությունների մեծ մասը չի համապատասխանում անհրաժեշտ պայմաններին: Երեխաների միայն 50%-ն ունի մահճակալ, այն էլ երկհարկանի, իսկ մնացածը քնում են հատակին: Անկողիներ բաղկացած է չոր խոտ լցրած ներքնակից ու բարձից: Անկողնու սպիտակեղեն չկա ընդհանրապես: Սեռյակներում վառարանները չեն գործում, ինչի պատճառով երեխաները հաճախ հիվանդանում են, իսկ գիշերները, որպեսզի տաքանան, չորս-հինգ հոգով միասին են քնում: Հագուստի եւ սպիտակեղենի մասին խոսելն իսկ ավելորդ է ...լիովին առողջ են երեխաների 25%-ը»:¹⁷ Լուսժողկոմատի Մանկատնային բաժնի 1924թ. զեկուցման մեջ նշվում էր, որ Երեւանի, Աշտարակի, Նոր Բայազետի եւ Էջմիածնի որբանոցների 2091 սան-սանուհիները «հունվար-փետրվար ամիսների ընթացքում զրկված են եղել իրենց առանց այդ էլ թույլ սննդի 78,9%-ից... Պարզ է, որ սաների երեսներին գույն չպետք է լինի եւ աչքերում՝ փայլ, կրթական կյանքը պետք է զգալի դանդաղեր, հիվանդությունները պետք է ծավալվեին»:¹⁸ Խիստ մտահոգիչ էր նաեւ այդ երեխաների ապագան, քանի որ մանկատներում չստանալով որեւէ մասնագիտություն՝ նրանք պատրաստ չէին հետագայում վարել ինքնուրույն կյանք: Լուսժողկոմատի տեղեկանքում հատուկ շեշտվում էր, որ նման պայմաններում «մենք ենթարկվում ենք մեծ վտանգի՝ երկրում ստեղծել ավագակների եւ հանցագործների մի զանգված, եւ երեխաներին գցել անառակության եւ պոռնկության գիրկը»:¹⁹

Իր իսկ Պողոս Նուպարի խոսքերով՝ «Անշուշտ կը գիտակցինք այն բոլոր դժուարութիւններուն որ կան հարիւրաւոր որբերու Հայաստանի մէջ յարմարագոյն եղանակաւ տեղաւորումին համար եւ կը բաժնենք այն մտահոգութիւնները զոր Պատ. Կեդր. Ժողովը ունի՝ իր տարիներով խնամած եւ դաստիարակած որբերուն ապագայ բարօրութիւնը հաստատուն հիմերու վրայ դնելու նկատմամբ»:²⁰ Այդ իսկ պատճառով երկարատեւ բանակցություններ սկսվեցին Միության ղեկավարության եւ Խորհրդային Հայաստանի իշխանությունների միջեւ, որոնց ընթացքում երկու կողմերն էլ ձգտում էին լավագույնս լուծել որբերի տեղափոխման, Հայաստանում նրանց ապրելու եւ աշխատելու հետ կապված հարցերը: Հարկ է նշել, որ

Հայաստանի իշխանությունները, չնայած եղած բոլոր դժվարություններին, ընդհանուր առմամբ մեծ շահագրգռվածություն էին ցուցաբերում որբերին երկիր արագ տեղափոխելու գործում: 1924թ. հոկտեմբերի 20-ի նիստում Հայաստանի Կոմկուսի կենտրոնի նախագահությունը Միության որբանոցների սաների ընդունումն ու տեղավորումը կազմակերպելու համար ստեղծեց հատուկ հանձնաժողով, որը գլխավորեց Հայաստանի Կոմերիտմիության կենտրոնի քարտուղար Գ.Գումեդյանը (Մելիք-Դադայան): Իշխանությունների մասն վերաբերմունքը, իհարկե, կարելի է ես պետք է բացատրել նրանց՝ ազգային շահերի առումով այդ գործի մեծ նշանակության գիտակցմամբ, բայց ոչ միայն այդ: Կարելուր հանգամանք էր նաև այն, որ սփյուռքի ամենախոշոր և հեղինակավոր կազմակերպություններից մեկի՝ ՀԲԸ Միության հետ համագործակցությունը, այն էլ որբ երեխաներին Հայաստան տեղափոխելու հարցում, ինքնին ուներ քարոզչական մեծ իմաստ, այն կարող էր մեծապես նպաստել բոլշևիկյան իշխանությունների վարկի բարձրացմանը: Կարելի է ասել, որ սա առաջին դրսևորումներից էր այն յուրահատուկ երևույթի, որ բնորոշ եղավ հայ իրականության համար, այն է՝ ազգային և քաղաքական-գաղափարախոսական շահերի համընկնում, ինչից Խորհրդային Հայաստանի իշխանությունները երբեմն հաջողությամբ պետք է օգտվեին հետագա տասնամյակների ընթացքում:

1924թ. հոկտեմբերի 26-ին Միության որբանոցների 250 սաներ Պաղեստինի Ցաֆֆա քաղաքից սովետական «Կերչ» նավով ուղևորվեցին դեպի Բաթում, որտեղից էլ գնացքներով տեղափոխվեցին Հայաստան: Այդ 250 որբերից 158-ը Երուսաղեմի Արարատեան որբանոցից էին, 81-ը՝ Հալեպի Կիլիկեան Արհեստանոց-Որբանոցից և 11-ը՝ Բելյուրի Քելեկեան-Սիսուան որբանոցից: Որբերից 194-ը 15-17, իսկ 56-ը՝ 18-20 տարեկան էին, որբանոցներում նրանք արդեն ձեռք էին բերել տարբեր մասնագիտություններ (կոշկակարներ, աստղձագործներ, դերձակներ, երկաթագործներ, գրաշարներ և այլն), ինչի շնորհիվ էլ երաշխավորվում էր նրանց ինքնուրույն կյանքը Հայաստանում: Տեղափոխության բոլոր ծախսերը իր վրա վերցնելուց զատ, Միությունը յուրաքանչյուր որբի համար Հայաստանի կառավարությանը վճարեց 100-ական դոլար «իբր փոխարինություն առաջին տարուան անոնց հոգացման ծախսերուն»:²¹ Բացի այդ, «արհեստաւոր որբերը իրենց հետ Հայաստան կը տանին նաեւ մեյմէկ փոքր գումար եւս, զոր աւելցուցած են իրենց ստացած շաբաթականներէն և որ պահ կը մնար Միութեան քով»: Միությունը կարծես նախատեսել էր ամեն հնարավորը իր սաների բարեհաջող տեղափոխման և հաստատման համար. «երկու մասնաւոր պաշտօնեաներէ կատ, որոնք իբրեւ հսկիչ

կ'ընկերանան որբերուն, անոնց հետ կը ճամբորդէ նաեւ բժիշկ մը... առ այս դեղօրէից բաւականաչափ պաշար մը միասին տրուած է: Որբերուն հագուստեղէնի պէտքերը լիովին հոգացուած են: Անոնք իրենց հետ կը տանին անկողիներ, ծածկոցներ, ամենօրեայ և պահեստի ձմեռուան հագուստ, կօշիկ, ճերմակեղէն եւն, եւն: Ուտելիքը պիտի պատրաստուի նաեւ մէջ, որուն համար հարկ եղած պաշարը միասին առնուած է»:²² Որբերը իրենց հետ տանում էին նաև, որպես նվեր Հայաստանին, ճարտարապետներ Գ.Ասատուրի, Լ.Ուրախյանի և Հ.Տաֆայի տրամադրած 69 հատոր գիտական և ճարտարապետական մենագրություններ:

Հասնելով Հայաստան՝ այդ տղաները պետք է որ վերհիշէին Ամերիկյան Նպաստամատույցի Ընդհանուր քարտուղար Չ.Վիքրիի խոսքերը, որով նա դիմել էր իրենց 1923թ. Երուսաղեմի Միության որբանոց այցի ժամանակ: «Չորս տարի է,- ասել էր նա,- որ յաջողաբար կայցելեմ Հայաստան և ուրախ եմ յատնելու թէ ամէն տարի նախորդին վրայ աւելի լաւ կը գտնեմ: Հայաստան յառաջադիմելու ամէն յարմարութիւններ ունի, բնական հարստութիւններ շատ են, անոր հարկաւոր են աշխատանք և խաղաղութիւն. այս երկու պայմաններու լրացումով ան երջանիկ երկիր մը պիտի դառնայ, այնպէս որ այսուհետեւ փոխանակ Ամերիկայի մէջ գործ փնտնելու ձեր երկիրը պիտի երթաք, որպէսզի հոն գործէք և շէնցնէք: Թերեւս հիմա՛յ անմիջապէս կարելի չէ Հայաստան տանիլ ձեզ, բայց դուք աշխատեցէք ձեր նկարագիրը շինել և առողջ նկարագրով օր մը ձեր հայրենիքը վերադառնալ»:²³

Հայաստանի Լուսժողկոմատի մանկատանային բաժնի 1925թ. տեղեկագրի մէջ առաջին անգամ խոսվում է հայրենիք տեղափոխված որբերի մասին. «Անցյալ նոյեմբեր 15-ին Ցաֆֆայից Բաթումի վրայով Երեւան հասան 250 որբ սան 15-20 տարեկան: Արտասահմանում նրանք ապրելիս են եղել Երուսաղեմում, Հալեպում, Բելյուրում: Սրանց մեծ մասը արհեստավորներ կամ արհեստավորների բանվորներ են: Սրանցից 60 հոգի գործուղված են... Կենտրոնական դպրոց-արհեստանոցում արհեստագիտություն սովորելու համար, 4-ը՝ Սարդարապատի շրջանում ստանձնել են մեքենավարի պաշտոն, 24-ը՝ ուղարկված են Վաղարշապատի Մանկոմմունան գյուղատնտեսությամբ զբաղվելու: Մնացածների դասավորումը դեռ շարունակվում է»:²⁴

Միության որբանոցների սաների այս տեղափոխումը Խորհրդային Հայաստան չունեի իր նախադեպը, այն չունեցավ նաև շարունակություն: Միության մասն դիրքորոշումը չի կարելի բացատրել Հայաստանում երեխաներին բոլշևիկյան ոգով դաստիարակելու վտանգով, քանզի պատճառները շատ ավելի լուրջ էին: Նույնիսկ եթե Պողոս Նուպարը և

Միության մյուս ղեկավարները մինչ այդ ծանոթ չէին բազմաթիվ, այդ թվում նաև արտասահմանցի ականատեսների վկայություններին՝ Խորհրդային Հայաստանում տիրող վիճակի մասին, ապա որբերի տեղափոխումից հետո նրանք չէին կարող չտեղեկանալ դրան, ինչից հետո որբերեխաների փոխադրումը Հայաստան դարձավ անկարելի:

Նոր Եվդոկիա

Որբերի տեղափոխումից հետո Միության եւ Հայաստանի համագործակցությունը լայն չափեր ընդունեց: Արդեն հաջորդ՝ 1925թ. հունվարին երկարատեւ բանակցություններից հետո Փարիզ ժամանած Խորհրդային Հայաստանի կառավարության ներկայացուցիչ Ար.Երզնկյանի եւ ՀԲԸ Միության նախագահ Պողոս Նուպարի, գանձապետ Լ.Կյումուշկերտանի եւ Ընդհանուր քարտուղար Գ.Սինապյանի միջեւ կնքվեցին երեք պայմանագրեր, որոնցից մեկը՝ Հայաստանում որբանոց հիմնելու մասին, տարբեր պատճառներով չիրականացավ:

«Պայմանագրերին Հայաստանի մէջ Մէօթէմէտեան կտակով Նոր Եվդոկիա գիւղին հաստատման մասին» այսպես էր կոչվում Խորհրդային Հայաստանի եւ ՀԲԸ Միության միջեւ կնքված երկրորդ պայմանագիրը.

«Յօդուած 1. Բարեգործական Միութիւնը Հայաստանի Կառավարութեան տրամադրութեան ներքեւ է դնում 2600 եգիպտ. ոսկու մի գումար, յատկացուելու համար Հայաստանում մի գիւղի հաստատման: ...Նոր գիւղը պէտք է «Նոր Եվդոկիա» անունը կրէ, համաձայն նուիրատուի ժառանգորդների ցանկութեան:

Յօդուած 2. Գիւղը պիտի հաստատուի Էվջիլարում, ուր պետական ֆոնտի հողերից հողամասեր են տրվելու Հայաստանում գտնուող Եվդոկիացի հայ գաղթականներուն:

Յօդուած 3. Ի սկզբան յիշեալ հողամասերում պիտի հաստատուեն այնքան ընտանիք որ ներէ յիշեալ 2600 եգիպտ. ոսկու գումարը, իրաքանչիւր ընտանիքի համար կառուցանելով մի տնակ եւ իրաքանչիւրին տալով լծկան, հողագործական գործիք, սերմնցու, ելն.:

Յօդուած 4. Մէօթէմէտեան կտակի տարեկան հասոյթները, վարչական ծախքերին համար Միութեան հասնող 10 առ հարիւր գելչից լետոյ, տարեց տարի պիտի յատկացուեն Նոր Եվդոկիա գիւղի ընդարձակման եւ բարգաւաճման: Առաջին առթիւ, այդ հասոյթներից Նոր Եվդոկիայում

պէտք է կառուցվի մի դպրոց որ պէտք է կրէ «Մէօթէմէտեան Դպրոց» անունը...

Յօդուած 7. Ներկայ Պայմանագրութեան գործադրութեան հոգը, այն է գիւղացիներու ընտրութիւնը եւ տեղաւորումը, հողերի բաժանումը, գիւղի յատկագծումը, տնակների կառուցման համար իրաքանչիւր տնատերի սահմանուելիք գումարը, իրաքանչիւր տնատերի յատկացուելիք գիւղական ինվէնտարի չափը, ծախսուած կամ տրուած գումարների հատուցումը ելն., Միութեան կողմէ յանձնուած է Հայաստանի Օգնութեան Կոմիտէին (ՀՕԿ), որ պէտք է յիշեալ գործերի մասին համաձայնի Հայաստանի Կառավարութեան եւ Գերագոյն Տեքնիքական Բաժնի հետ»:²⁵

1925թ. վերջին Նոր Եվդոկիա գյուղում արդեն ապրում էր բնիկ Թոքատցի (Եվդոկիա) գաղթականների 20 ընտանիք: Ծառ շուտով, սակայն, պարզ դարձավ, որ գյուղին հատկացված վայրը թե կլիմայի եւ թե հողի որակի առումով գրեթե անհարթահարելի դժվարություններ եւ անհարմարություններ էր առաջացնում գյուղացիների համար, ինչի պատճառով էլ նրանք ստիպված եղան Միության միջոցով դիմել Հայաստանի իշխանություններին գյուղի տեղափոխման խնդրանքով: Ի վերջո, 1929թ. կեսերին որոշվեց Նոր Եվդոկիա գյուղը փոխադրել Էջմիածնից 4 կմ հեռավորությամբ «չարմարագոյն շոջավայր մը, Էջմիածնէն դէպի Արարատ տանող ճանապարհին վրայ, 150-160 հեկտար արդէն մշակուած բարեբեր հողի մը վրայ: Այժմէն ձեռնարկուած է նախնական աշխատութեանց եւ յատկագիծներու պատրաստութեան: Ներկա պայմաններուն մէջ, Նոր Եվդոկիոյ տնտեսական բարօրութիւնը ապահովուած կրնայ նկատուիլ, թէ որ Թոքատցի ունետրները շահագրգռուին այս գիւղին ճակատագրով»:²⁶

Նոր Եվդոկիա գյուղի տեղափոխությունը, բնականաբար, պահանջում էր հավելյալ եւ չնախատեսված ծախսեր, հատկապես հաշվի առնելով նրա բնակիչների մշտական աճը՝ ի հաշիվ նոր գաղթած թոքատցիների: Միության կողմից հատկացվող Մէթեմէտեան հիմնադրամի հասոյթները այլևս բավարար չէին, եւ նա արդարացիորեն ակնկալում էր սխյուռքում ապրող ունետր թոքատցիների ֆինանսական օժանդակությունը: Օգնությունը, սակայն, ուշանում էր: «Թէեւ ցաւալի է որ մեր Թոքատցի հայրենակիցները եւ Թոքատի Հայրենակցականը խոյ կը մնան Նոր Եվդոկիոյ մասին ուղղուած սրտաշարժ կոչերուն, բայց ամէն ջանք ի գործ դնենք գոհացում տալու Միութեանս անդրանիկ աւանին բնակչութեան»:²⁷ Եվ այդ ջանքերը տալիս էին իրենց շոջափելի արդյունքները: Գյուղի շինարարական հանձնաժողովը 1934թ. Միությանը հասցեագրած իր տեղեկագրում նշում էր. «Սրանով պատիւ ունինք յայտնելու որ Նոր Եվդոկիան, որ շինուել է, ինչպես ծրագրուած էր, այսինքն 11 գեղեցիկ

տներ, լայն փողոցներ, բերուել է էլեկտրական լուսատրություն, ոռոգման քանակներ, ձգուած են գեղեցիկ այգիներ, տների մօտ պուրակներ, բանջարանոցներ, փորուած են մաքուր եւ սառը ջուր ունենալու համար ջրհան մեքենաներով ջրհորներ, մի խօսքով, դժուարին, բայց Նոր Եվրոկիայի բնակիչների համար շինուած է գողտրիկ ասան իր կուլտուրական յարմարություններով, որտեղ բնակուում են այժմ ներգաղթող 130 հոգի...»:²⁸

Նոր Եվրոկիայի՝ Խորհրդային Հայաստանում ՀԲԸ Միության հիմնած առաջին ավանի մասին, որը, ի դեպ, ընդհանրապես առաջին գաղութահայ ավանն էր, վերջին տեղեկությունը վերաբերում է 1937թ.: Հաշված օրեր էին մնացել մինչեւ խորհրդային իշխանությունների կողմից Միության գործունեությունը երկրում արգելելուն, իսկ նա մշակում էր նոր ծրագրեր եւ հպարտությամբ տեղեկացնում էր կատարածի մասին. «Ներկայիս Միութեանս կողմէ Հայաստանի մէջ կառուցուած Նոր Եվրոկիա ասանին մէջ կ'ապրին 135 Թոքատցիներ 35 բնակարաններուն մէջ: Նոր Եվրոկիոյ բնակչութեան տնտեսական վիճակը զգալիապէս բարելաւուած է, իրեն տրամադրուած ըլլալով 11 հեկտար այգի եւ 6 հեկտար պտղատու ծառեր. այսօր ասանը ունի 40 հեկտար վարելահող: Միութեան Մ'էօթէ-մէտեան հիմնադրամի եկամուտէն վճարուած 69 անգլ. ոսկիով եւս մեծ գում մը պիտի շինուի: Նոր Եվրոկիոյ համար անմիջական պահանջ կայ բնակարանի, մանաւանդ, նկատի ունենալով յառաջիկայ ներգաղթը, որով արտասահմանի Թոքատցիներէ կ'ակնկալուի որ իրենց օժանդակութիւնը չի զլանան: Նիւ Եորքի Թոքատի Կրթ. Ընկերութեան տրամադրած 1000 տոլարով եւ Կառավարութեան թանկագին ընծայաբերութեան շնորհիւ (5000 ոտրլի), ապահովեցինք նաեւ մանկապարտէզի եւ մտրի մը կառուցումը: Իսկ նոյն Ընկերութեան կողմէ վերջերս նուիրուած 600 տոլարով եւս պիտի կառուցուի համայնքային յատուկ ընդհանուր մթերանոց մը»:²⁹

Դարուհի Յակոբեան մայրանոց

Խորհրդային Հայաստանի եւ ՀԲԸ Միության միջեւ 1925թ. հունվարին կնքված երրորդ պայմանագիրն էր «Պայմանագրութիւն Հայաստանի մէջ Դ.Յակոբեան կտակով մայրանոցի մը հաստատման մասին», որի հիմնական հոդվածներն էին.

«Յօդուած 1. Բարեգործական Միութիւնը, համաձայնութեամբ Դարուհի Ակոբեան ֆոնտի նուիրատու հանգուցեալ Թագուր Փաշա Ակոբեանի եւ Տիկին Երանուհի Ակոբեանի ժառանգորդ Լեւոն Պէլ Ակոբեանի եւ այս վերջնոյն հաւատարմատար Ե.Աղաթօն Պէլի, յանձն կ'առնէ յիշեալ

ֆօնտէն 7.110 անգլ. ոսկի գումար մը յատկացնել Երեւանի մէջ Մայրութեան Տուն մը կառուցանելու եւ մանկաբարձուհիներ պատրաստելու նպատակով այդ Տան մէջ դասընթացքներ կազմակերպելու համար: Ծէնքերու կառուցման համար հարկ եղած հողամասը ձրիաբար եւ ընդմիջտ պիտի շնորհուի Հայաստանի Ս.Խ.Հանրապետութեան Կառավարութեան կողմէ:

Յօդուած 2. Հայկական Կառավարութիւնը յօժար է ստանձնել այդ Մայրութեան Տան եւ Մանկաբարձական Դասընթացքներու վարժարանին կառուցման գործը

Յօդուած 3. Եթէ յիշեալ Մայրութեան Տան կառուցման ծախքը նախատեսուած 7.110 անգլ. ոսկիէն աւելի ըլլա, այդ աւելին Հայկական Կառավարութեան կողմէ պիտի հոգացուի...

Յօդուած 5. Մայրութեան Տան բոլոր ծախքերը, ինչպէս կահաւորում եւ սարուածք, դեղօրայք, սնունդ, լուսացք, լուսատրութիւն, ջեռուցում, ուսուցչական մարմին, պաշտօնէութիւն եւ ծառայողներ, Հայկական կառավարութեան վրայ են: Մանկաբարձուհիներու դասընթացքներու ծախքերը միայն որոնք տարեկան 800 անգլ. ոսկի որոշուած են, Դարուհի Ակոբեան Հիմնարկութեան կը վերաբերին...»:³⁰

Դարուհի Յակոբեան մայրանոցի (ճարտարապետ Ա.Թամանյան) հանդիսավոր բացումը տեղի ունեցավ 1929թ. մարտի 10-ին, մասնակցությամբ Խորհրդային Հայաստանի Ժողկոմխորհի նախագահի տեղակալ Ա.Մոսվյանի, Առողջապահության ժողկոմ Մ.Գարդաշյանի եւ պաշտօնական այլ անձանց: ՀԲԸ Միությունը ներկայացնում էր Հայաստանում 1928 թվականից նրա ներկայացուցիչ Հ.Գարակոչյանը: Դարուհի Յակոբեան մայրանոցը առաջին իսկ օրերից դարձավ Հայաստանի ամենախոշոր եւ ամենակարեւոր բժշկական հիմնարկներից մեկը: Այն բաղկացած էր երեք հիմնական բաժանմունքներից՝ մանկաբարձական, զինեկոլոգիական եւ հետծննդյան, որոնք տարեկան սպասարկում էին միջին հաշվով մոտ 5.000 այցելու, ավելի մեծ թիվ էին կազմում խորհրդակցության (կոնսուլտացիոն) ծառայության դիմածները: Հիվանդանոցին կից գործում էին նաեւ «մանկաբարձական տեխնիկումը» եւ «պրոֆտեխնիկական դպրոցը», որոնց շրջանավարտները (տարեկան շուրջ 40) աշխատեցին ինչպէս Դ.Յակոբեան մայրանոցում, այնպէս էլ Հայաստանի այլ հիվանդանոցներում: Չափազանց կարեւոր էին նաեւ հիվանդանոցում ամիսը 6 անգամ կազմակերպվող դասընթացները «...լղութեան, ծննդաբերութեան եւ յետծննդեան շրջանի առողջապահութեան... նորածիններու խնամքին եւ հիւանդութեանց, արհեստական վիժումներու հետեւանքներուն, հակաբեղմնաւորման միջոցներուն...»³¹ եւ այլ հարցերի մասին: Նկատի առնելով այդ

տարիներին բնակչության հիմնական զանգվածի ընդհանուր զարգացման մակարդակը՝ մեծ նախընթացների դերը շատ մեծ էր:

Հիվանդանոցի առաջին տնօրենն էր պրոֆեսոր Գ.Արեշյանը, որը մասնագիտական կրթությունը ստանալով Կիեի (Ուկրաինա) համալսարանում, որպես մանկաբարձ-գինեկոլոգ աշխատել էր Կիեի եւ Թիֆլիսի հիվանդանոցներում: 1923թ. Երեւանի պետական համալսարանի բժշկական ֆակուլտետում (հետագայում՝ Բժշկական ինստիտուտ) նա հիմնեց մանկաբարձության եւ գինեկոլոգիայի ամբիոնը, որը ղեկավարեց մինչեւ 1957թ.: Դ.Յակոբեան մայրանոցում պրոֆեսոր Գ.Արեշյանը իր շուրջը հավաքեց մի շարք տաղանդավոր մասնագետներ, այդ թվում իր օգնականներ Աշոտ Ահարոնյանին (Ահարոնով) եւ Պարթեւ Մարգարյանին: Պրոֆեսոր Ա.Ահարոնովը, որը նույնպես ավարտել էր Կիեի համալսարանը, հետագայում դարձավ ոչ միայն Խորհրդային Հայաստանի, այլեւ Խորհրդային Միության ամենաակնավոր մասնագետներից մեկը: Իսկ պրոֆեսոր Պ.Մարգարյանը 1937թ. Երեւանում կազմակերպեց եւ մինչեւ 1950թ. ղեկավարեց քաղաքային ծննդատունը, ապա 1949- 1973թթ. Մանկաբարձության եւ գինեկոլոգիայի գիտահետազոտական ինստիտուտի տնօրենն էր: Այսպիսով, Հայաստանի երեք ամենահեղինակավոր եւ վաստակաշատ մանկաբարձ-գինեկոլոգների՝ որպես մասնագետների, կայացումը ուղղակիորեն կապված է Դարուհի Յակոբեան մայրանոցի հետ: 1937թ. հետո հիվանդանոցը այլևս չէր կոչվում Դ.Յակոբեանի անունով:

Մարի Նուպար Ակնաբուժարան

Երեւանի Աբովյան փողոցում գտնվող այդ հիվանդանոցի հարեանությունը այսօր էլ ուշադրություն է գրավում Մարի Նուպար Ակնաբուժարանի շենքը, որը կառուցվեց Պողոս Նուպարի նվիրատվությամբ ի հիշատակ իր ողբացյալ կնոջ: Ակնաբուժարանի կառուցումը ավարտվեց եւ պաշտոնապես Հայաստանի կառավարությանը հանձնվեց 1929թ. նոյեմբերի 20-ին: Այդ առիթով Պողոս Նուպարը հատուկ ուղերձով դիմեց Հայաստանի կառավարության նախագահին. «Կը խնդրեմ ներողամիտ ըլլալ որ առողջական վիճակիս եւ յառաջացած տարիքիս պատճառաւ կարող չեղայ ներկայ գտնուիլ Ակնաբուժական Գլխնիքիս բացումին, միչդեռ երջանիկ պիտի համարէի ինքզինքս անձամբ յանձնելով ան Կառավարութեան, իբրեւ համեստ օժանդակութիւն մը իմ կողմէս Հայաստանի վերաշինութեան գործին՝ որուն լծուած էք արիաբար: Մասնաւորապէս պարտք կը սեպեմ իմ խորին շնորհակալութիւնս յայտնել ձեզի՝ Կառավարութեան

կողմէ ընծայուած աջակցութեան համար, որուն շնորհիւ իմ նուիրատուութեանս տեսականութիւնը ապահովուած է»:³² Խորհրդային Հայաստանի կառավարության պատասխան ուղերձում մասնավորապես նշվում էր. «Կառավարությունը գնահատում է ոչ միայն այն աջակցությունը որ Դուք տալիս էք Խ.Հայաստանի վերաշինության գործին՝ ակնաբուժական կլինիկայի կառուցումով, այլ եւ այն որ Դուք մօտիկ հետաքրքրութիւն էք ցոյց տալիս նրա ապագայ ճակատագրի վերաբերմամբ»:³³

Մարի Նուպար Ակնաբուժարանին նույնպես մեծ եւ կարեւոր դեր էր վերապահված Հայաստանի բժշկական հաստատությունների համակարգում, մի կողմից՝ հաշվի առնելով այդ տարիներին երկրում աչքի տարբեր հիվանդությունների, հատկապես տրաքոմայի խիստ տարածված լինելու հանգամանքը, իսկ մյուս կողմից՝ մասնագիտացված հիվանդանոցների բացակայությունը: Իր գործունեության առաջին՝ 1930թ. ընթացքում Ակնաբուժարանում «...աչքի 11.090 դարմանումներ եղած են (որոնց 4.559 թրաքոմա), եւ կատարուած են 983 գործողութիւններ: Մնայում հիւանդներուն թիւը եղած է 306, որուն 250-ը հայ (16-ը միայն մինչեւ 15 տարեկան երեխաներ), ինչ որ ցոյց կուտայ թէ մանուկները շատ աւելի նուազ ենթակայ են աչքի հիւանդութեանց»:³⁴ 1930-ականների ընթացքում Մարի Նուպար Ակնաբուժարանը, զուտ բժշկական գործունեությանը զուգահեռ, հաջողությամբ ծավալեց նաեւ գիտական հետազոտություններ, ինչի շնորհիվ էլ դարձավ Խորհրդային Միության առաջատար կենտրոններից մեկը: Այդ առումով հատկապես հիշատակման է արժանի պրոֆեսոր Բ.Մելիք-Մուսյանի գործունեությունը, որը սկսած 1933թ. Ակնաբուժարանի առաջատար մասնագետներից էր, իսկ հետագայում նաեւ նրա տնօրենը: 1937թ. Ակնաբուժարանը նույնպես դադարեց կոչվել Մարի Նուպարի անունով, եւ միայն ավելի քան կես դար հետո վերականգնվեց նրա սկզբնական անվանումը:

Ա.Սարգիս պաստյորյան կայան

Դեռեւս 1924թ. Փարիզում գտնվող Ար.Երզնկյանի հետ Միության ղեկավարությունը համաձայնության եկավ վերգինե Սարգիս նվիրաբերած 1000 անգլ. ոսկիով Հայաստանում նոր գյուղ հիմնելու վերաբերյալ: Սակայն արդեն Երեւանում պարզ դարձավ, որ այդ գումարը բավական չէ, ուստի եւ սկսեց քննարկվել Նալբանդ գյուղում բուժկայան կառուցելու տարբերակը: Բայց, ի վերջո, կողմերի համաձայնությամբ որոշվեց ի հիշատակ նվիրատուի հանգուցյալ ամուսնու, Երեւանում հիմնել Ավետ

Սարգիս պաստյորյան կայանը (սփյուռքում հայտնի էր որպես «կատաղաբուժարան»), որը սկսեց գործել 1930թ.:

Չնայած Հայաստանում այդ տարիներին ճարակում էր կատաղախտը, որի տարածողները հազարավոր թափառական շներն էին, այնուամենայնիվ, երկրում չկար որեւէ մասնագիտացված բժշկական ծառայություն: Նույնիսկ Ավետ Սարգիս կայանի գործունեության առաջին շրջանում կատաղաբուժական պատվաստը ստացվում էր Թիֆլիսից: 1931թ. մարտին կայանը, պահելով Ավետ Սարգիս անվանումը, փոխադրվեց Սանիտարահիգիենիկ ինստիտուտի նոր շենքը, ուր կային գրեթե բոլոր հարմարությունները լայնածավալ գործունեության համար: Նույն թվականի նոյեմբերին կայանը առաջին անգամ Հայաստանում սկսեց պատրաստել անհրաժեշտ քանակությամբ պատվաստ: Ավետ Սարգիս պաստյորյան կայանի մասնաճյուղերը բացվեցին նաև Ղարաքիլիսայում և Լենինականում (այժմ վանաձոր և Գյումրի):

ՀԲԸ Միությունը, հիմնելով նշված առողջապահական հիմնարկությունները, մշտապես հոգում էր նրանց տարբեր կարիքները, մասնավորապես, ապահովում էր նորագույն վիրաբուժական և բժշկական սարքավորումներով, դեղամիջոցներով և այլն: 1933թ. Առողջապահության ժողկոմատը այսպես էր գնահատում նրա գործունեությունը. «Ծնորհակալությամբ ստացանք Դարուհի Յակոբեանի անվան Մայրանոցին նվիրված գործիքներն ու իրերը: Սա առաջին անգամը չէ որ Փարիզի Հայկական Բարեգործական Ընկերությունը զգայուն և ուշադիր վերաբերմունք է ցույց տալիս Խորհրդային Հայաստանի կուլտուրական ձեռնարկներին... դուք հատուկ ուշադրություն եք դարձնում և չեք խնայում ձեր միջոցները նպաստելու մեր առողջապահական հիմնարկների սարքավորման և բարգավաճման... Մարի Նուպար Ակնաբուժարանի գիտական դրվածքն ու տեխնիկական նորագույն միջոցառումները լավագույն երաշխիքն են աչքի հիվանդությունների հաջող բուժման, որի համար դուք չեք զլանում անելու հարկավորը»:³⁵

Բարեգործականի Տուն

Այդ տարիներին Երեւանի ամենագեղեցիկ և ամենաաշխույժ Աբովյան փողոցի վրա, բացի վերը նշած երկու հիվանդանոցներից, մի քանի տարի անց կառուցվեց նաև Բարեգործականի Տուն բնակելի շենքը (ճարտարապետ Ս.Սաֆարյան), որը դարձավ քաղաքի ժամանակակից ճարտարապետության լավագույն նմուշներից մեկը: Այդ կառույցի պատ-

մությունը սկիզբ է առնում 1930թ. հոկտեմբերին, երբ ՀԲԸ Միության վարիչ-պատվիրակ Վ.Մալեզյանին հասցեագրած մի նամակում Հայաստանի Կարմիր Խաչի նախագահ Ա.Կամսարականը և Խորհրդային Միության Կարմիր Խաչերի միութենական գործադիր կոմիտեի ներկայացուցիչ Կ.Միքայելյանը, ցավ հայտնելով, որ «գաղութահայության տված տուրքը հայրենի վերաշինության այն չէ, ինչ որ կարելի էր սպասել նրանից», այնուհետև անում էին հետևյալ առաջարկությունը: «Այդ հանգամանքը առիթ տվեց մեզ դիմելու արտասահմանի մի շարք հաստատությունների, որպեսզի վերջիններս Հայաստանի խորհրդայնացման 10-ամյակի առթիվ և Կարմիր Խաչի 10-ամյակի առթիվ... մի որեւէ խոշոր ձեռնարկությամբ հավերժացնեն այդ տոները և հայտնաբերեն իրենց մասնակցությունը երկրի վերակառուցման գործում: Ի թիվս այդ հաստատությունների, հարգելի պ. Մալեզյան, Ձեր միջոցով մենք որոշել ենք դիմել և Հայ Բարեգործական Ընդհանուր Միությանը, որպեսզի նա ևս իր վրա վերցնի մի որեւէ շենքի կառուցման ծախսերը: Մեր կարծիքով, - ասվում էր նամակում, - նա կարող կլիներ շինել ՀՕԿ-ի օրինակով մի տուն մեր մտավորականների համար, որոնք այնքան մեծ կարիք ունեն բնակարանի»:³⁶

Այս նամակը Փարիզ հասավ այն պահին, երբ Պողոս Նուպարի մահից հետո նրա որդիները ի հիշատակ իրենց հոր, որոշ գումար էին հատկացրել Միությանը որեւէ հայանպաստ ձեռնարկի համար: Միության Կենտրոնական Վարչությունը նորընտիր նախագահ Գ.Կյուլպենկյանի զլխավորությամբ որոշեցին օգտվել ստեղծված հնարավորությունից և Փարիզում մինչ այդ Պողոս Նուպարի նվիրատվությամբ կառուցված Ուսանողական Տան օրինակով, նույնպիսի մի տուն կառուցել նաև Երեւանում: Հայաստանի կառավարության հետ բավական արագ ընթացող բանակցությունների արդյունքը եղավ «Համաձայնագիր Երեւանի Բարեգործականի Տան կառուցման» վերնագրով փաստաթուղթը, որը ստորագրվեց նախ 1931թ. մարտին՝ Փարիզում Միության նախագահ Գ.Կյուլպենկյանի, Լ.Կյումուշկերտանի և վարիչ-պատվիրակ Վ.Մալեզյանի, ապա նույն տարվա ապրիլին Երեւանում Լուսավորության ժողկոմ Ա.Եղիազարյանի կողմից: Համաձայնագրի հիմնական կետերն էին.

«Յօդուած 1. Հանգուցեալ Պողոս Նուպար Փաշայի ժառանգորդները ՀԲԸ Միութեան նուիրած են 4000 անգլ. ոսկի, որպէսզի սոյն գումարը յատկացուի Հայոց համար հանրային օգտակարութիւն ունեցող ձեռնարկի մը: Ժառանգորդներէն մին, Զարեհ Պէլ Նուպար, այս նուիրատութեան վրայ անձնապէս աւելցուցած է 3000 անգլ. ոսկի գումար մը...

Յօդուած 2. Միութեան կեդրոնական Վարչական ժողովը խորհրդակցել է վերջ այս երկու գումարներուն յարմարագոյն գործածութեան մասին

և համաձայնելով Պողոս Նուպարի ժառանգորդներուն եւ անձնապէս Զարեհ Պէլ Նուպարի հետ, կ'որոշէ, ՀԲԸ Միութեան քսանըփինգամեայ յոբելեանին առթիւ եւ որպէս մեծարանք մը Հայաստանի, յատկացնել Տունի մը շինութեան որ Երեւանի Համալսարանին մաս պիտի կազմէ եւ պիտի յատկացուի Համալսարանին հայ բրոֆէսէօրներուն, եւ կարելիութեան սահմանին մէջ, ուրիշ հայ գիտնականներու...

Յօդուած 3. Կառավարութիւնը այս նուիրատուութիւնը ...կ'ընդունի եւ, Երեւանի Աքովեան պողոտային վրայ, երկուստէք համաձայնաբար ընդունուած յատկագիծի մը համաձայն, յանձն կ'առնէ կառուցանել շէնք մը վերոյիշեալ նպատակին գործածուելու համար: Սոյն շէնքը պիտի կրէ «Բարեգործականի Տուն, Հիմնարկութիւն Նուպար» անունը:...

Յօդուած 4. Ոչ Միութիւնը, ոչ ալ Նուիրատուները եւ փոխատուն, կառուցուած շէնքին մատակարարութեան եւ նորոգութեան ծախքերուն յառաջիկային մասնակցելու պարտաւոր պիտի չըլլան: Ընդհակառակը Կառավարութիւնը միայն կը ստանձնէ շէնքին վարչութիւնը:

Յօդուած 5. Կառավարութիւնը կառուցուած շէնքին մէջ Միութեան իբր պաշտօնատեղի ծառայելու համար յարկաբաժին մը եւ Միութեան ներկայացուցիչներուն համար եւս բնակատեղի մը պիտի յատկացնէ ձրիաբար»:³⁷

Երեսնում Միության ներկայացուցիչ Հ.Գարակոչյանը Վ.Մալեգյանին հասցեագրած 1936թ. հունվարի 30-ի թվակիր նամակում հայտնում էր, որ «Բարեգործականի Տունը գրեթէ վերջացած է եւ մանր մունր պակասները լրացուելու վրայ են: Ծէնքը բացի ներքնայարկից, հինգ յարկանի է եւ պարունակում է ընդամենը 20 բնակարան ...եւ չորս նկարչական աշխատանոց տրամադրուած նկարիչների»:³⁸ Կառավարության հատուկ որոշումով այդ՝ Երեւանի ամենաարդիական բնակելի շէնքերից մեկի առաջին բնակիչներն էին գրողներ Ստ.Զորյանը, Զ.Եսայանը, Վ.Թոթովենցը, նկարիչներ Փ.Թերլեմեզյանը, Ս.Առաքելյանը, ճարտարապետներ Գ.Քոչարը եւ Մ.Մազմանյանը, Հայաստանի պատկերասրահի հիմնադիր եւ տնօրեն Ռ.Դրամբյանը, կոմպոզիտոր Հ.Ստեփանյանը, պրոֆեսորներ Գ.Ղափանցյանը, Ա.Տերտերյանը, Հ.Քեչեկը եւ այլք: Բնակարան հատկացվեց նաեւ Հ.Գարակոչյանին, բայց Միության գրասենյակի հարցը մնաց չլուծված: 1936թ. նոյեմբերին Վ.Մալեգյանը, տեղեկանալով Հ.Գարակոչյանից, որ Միությանը գրասենյակ է հատկացվել ՀՕԿ-ի շենքում, գրում էր. «Կը փափագիմք որ Համաձայնագրին 5-րդ յօդուածը յարգուի, որովհետեւ մեզի համար հանելի չէ հարկատու ըլլալ եւ կերպով մը եմթարկուիլ ՀՕԿ-ին, որքան ալ ձեզի գրասենեակ մը տրամադրած ըլլալուն համար շնորհապարտ ըլլանք»:³⁹ Հետագա շուրջ երկու տարվա

ընթացքում Վ.Մալեգյանը շարունակեց իր անհամաձայնությունը հայտնել իշխանությունների այդ որոշմանը, բայց ապարդյուն: Անհետեւանք մնաց նաեւ նրա խնդրանքը՝ հարգել պայմանավորվածությունը շենքի վրա «Բարեգործականի Տուն. Նուպարեան Հիմնարկ» արձանագրությամբ հուշատախտակ տեղադրելու վերաբերյալ:

Գիտակրթական ծրագրեր

1928թ. Արշակ Չոպանյանը իր հոդվածներից մեկում, շեշտելով Հայաստանի Պետական համալսարանի բացառիկ կարեւորությունը հայ ժողովրդի մտավոր եւ հոգեւոր զարգացման համար, միաժամանակ նշում էր. «Արտասահմանի հայ ազգասերներուն համար, ներելի չէ սակայն այդ ոգեւորիչ իրողութեան հաստատմամբ ուրախանալով ամէն պարտականութիւն կատարած նկատել, ոչ ալ մանաւանդ շատանալ ի վեր հանելով եւ քննադատելով այդ հիմնարկութեան թերութիւնները, որոնց ոմանք եթէ յիշմին արդիւնք են, մեծ մասը արդիւնք են աղքատութեան: Պէտք է մասնակցիլ այդ հիմնարկութեան զարգացման, զօրացման գործին, պէտք է անոր պակասները նկատել՝ զանոնք լրացնել ջանալու համար»: Ա. Չոպանյանի այս յուրատեսակ կոչը բնավ ուղղված չէր Միությանը, հակառակը՝ համալսարանին ի նպաստ Միության «արդէն իսկ ըրածը (պէտք է) մատնանիշ ընել մղելու համար մեր արտասահմանեան ազգասերները որպէսզի անոնց օրինակին հետեւին»:⁴⁰

ՀԲԸ Միության առաջին խոշոր ձեռնարկը գիտակրթական ոլորտում անմիջականորեն կապված էր Կարապետ եւ Գրիգոր Մելգոնյանների աննախադեպ նվիրատվության հետ, որը 1925թ. դեկտեմբերին Կ.Պոլսի պատրիարքարանի կողմից փոխանցվեց ՀԲԸ Միությանը (այս մասին տես ստորեւ՝ 8-րդ գլխում):

ՀԲԸ Միության ջանքերի շնորհիվ որոշվեց նաեւ տարեկան 3000 եգիպտ. ոսկի տրամադրել Հայաստանի համալսարանին պայմանով, որ «միմիայն եւ բացառապէս գործածուի հայկական գրականութեան եւ պատմութեան ամպիոններու հաստատման եւ պահպանումին, կամ ընդհանրապէս յատկացուի հայկական ուսումնասիրութեանը»:⁴¹ Տեղեկանալով այդ մասին, Պետական Համալսարանի ռեկտոր Հ.Հովհաննիսյանը եւ Վարչության քարտուղար Ռ.Տոնյանը բարերար Կ.Մելգոնյանին հասցեագրած նամակում գրում էին. «Յարգելի քաղաքացի Մելգոնեան, Պարիզի Հայոց Բարեգործական Ընդհանուր Միութիւնը յայտնում է ՀՍԽՀ Պետական համալսարանի Վարչութեան, որ Դուք կարգադրել էք տրա-

մադրելու մեզ տարեկան 3000 եգիպտ. ոսկի Համալսարանի կարիքների համար: Խորհրդային Հայաստանի կառավարությունը յատուկ որոշումով թոյլատրել է Պետ. Համալսարանի Վարչությունը՝ ստանալու Մելգոնեան կտակից տարեկան 3000 եգիպտ. ոսկին եւ տնօրինելու համաձայն Ձեր ցանկություն: ՀՄԽՀ Պետ. համալսարանի Վարչությունը յայտնում է Ձեզ, յարգելի քաղաքացի, իր խորին շնորհակալությունը մեր Համալսարանին մատուցած այդ շօշափելի օժանդակության համար եւ կարող է հաւաստիացնել, որ լայն չափերով կիրագործի մեր ժողովրդի հոգեւոր կուլտուրայի ուսումնասիրությունը Համալսարանիս աշխատանքներով՝ Ձեր տրամադրած միջոցներով»:⁴²

Սկսած 1930թ. Մելգոնյան ֆոնդի Գործադիր հանձնաժողովը ձեռնամուխ եղավ հայագիտական աշխատությունների հրատարակմանը: Հ.Աճառյանի «Հայերեն արմատական բառարանը» յոթ հատորով, Հ.Մանանդյանի «Վշիռները եւ չափերը հնագույն հայ աղբյուրներում» եւ «Մանր հետազոտություններ», Մ.Աբելյանի «Հայոց լեզվի տեսություն», Եր.Ծաֆազի «Հին Երեւանը» եւ «Դիվան Միքայել Նալբանդյանի», Եր.Լալայանի «Դամբարանների պեղումներ Խորհրդային Հայաստանում», Թ.Թորամանյանի «Ծինանյութերն ու նրանց գործածության կերպը Հին Հայաստանում», Սպ.Մելիքյանի «Կոմիտասի ստեղծագործության անալիզը», Խ.Սամվելյանի «Հին Հայաստանի կուլտուրան», Լ.Մելիքսեթ-Բեկի «Վրաց աղբյուրները Հայաստանի եւ հայերի մասին» երկու հատորով, Իվ.Ջավախիշվիլու «Նյութեր Հայաստանի սոցիալական պատմության համար» եւ այլ՝ ընդհանուր թվով մոտ 30 գիտական մեծաթեք մենագրություններ հրատարակվեցին Մելգոնյան ֆոնդի միջոցներով: Այդ աշխատությունների հրատարակումը շատ մեծ դեր խաղաց Հայաստանում հայագիտական մտքի՝ պատմության, հնագիտության, լեզվաբանության, ընդհանրապես հայ գիտության զարգացման, ինչպես նաեւ երիտասարդ մասնագետների պատրաստման գործում:

Նույն այդ նպատակով ֆինանսավորվում էին Պետհամալսարանի եւ Մանկավարժական ինստիտուտի հայագիտական ամբիոնները, ինչպես նաեւ ասպիրանտների պատրաստումը: Այսպես, 1933թ. Մելգոնյան ֆոնդի ասպիրանտներն էին Մկրտիչ Մկրյանը (հայ գրականություն), Հմայակ Հարությունյանն ու Սերոբ Պողոսյանը (Հայաստանի պատմություն), որոնք տարիներ անց դառնալու էին անվանի գիտնականներ եւ դասախոսներ:

Այս ամենի հետ մեկտեղ, Մելգոնյան ֆոնդի Գործադիր հանձնաժողովը կառավարության մասնակցությամբ ձեռնամուխ եղավ «Մատենադարանի» Հանրային գրադարանի եւ տպարանի շինարարությանը

(ճարտարապետ՝ Ա.Թամանյան): ՀԲԸ Միության միջոցով տպարանի համար արտասահմանից ստացվեցին տպագրական, կազմարարական եւ այլ մեքենաներ, ինչպես նաեւ տարբեր լեզուներով տպագրական տառեր, ինչը խիստ անհրաժեշտ էր հատկապես գիտական աշխատություններ տպագրելու համար: Տպարանի բացումը տեղի ունեցավ 1936թ. մայիսին, «սակայն փորձառու եւ ձեռնհաս պաշտօնէություն պակասի պատճառով տպարանը չէ կրցած իր արտադրության լիույի չափը տալ»:⁴³ Ինչ վերաբերում է գրադարանի շենքի կառուցմանը, ապա նույն 1936թ. «շինարարության մարզին մէջ կատարուած աշխատանքը բաղդատաբար գոհացուցիչ է: Մատենադարանի շենքին աջ թեւին, ուր կը գտնուի տպարանը, երեք հարկերը մինչեւ կտուր աւարտեցան: Ջուզընթացաբար կատարուեցան կարգ մը ուրիշ աշխատանքներ, այն է կուլուրի, ջրմուղ, ջեռուցում, երկաթ-շաղախի ծածկեր, եւն.»:⁴⁴ 1937թ. փետրվարին, երբ կառավարության որոշումով Մելգոնյան ֆոնդով ստացվող միջոցների տնօրինումը Գործադիր հանձնաժողովից փոխանցվում էր Պետհամալսարանին, այդ կապակցությամբ ներկայացված փաստաթղթերում նշվում էր, որ գրադարանի շենքը պատրաստ է 60% -ով եւ որ անցած չորս տարիների ընթացքում շինարարության համար Մելգոնյան ֆոնդը տրամադրել է 1.369.650, իսկ կառավարությունը՝ 1.219.873 ռուբլի:⁴⁵ Հայաստանի իշխանությունների 1937թ. դեկտեմբերի 8-ի որոշումով Մելգոնյան ֆոնդի գործունեությունը երկրում արգելվեց:

ՀԲԸ Միությունը Հայաստանում իր գործունեության ողջ ընթացքում մշտապես օժանդակում էր Պետհամալսարանին, հատկապես կարեւոր էին նրա ուղարկած նորագույն տարբեր սարքավորումները, նյութերը եւ այլն: Ահա բազմաթիվ օրինակներից մեկը: 1925-1928թթ. Փարիզ էր գործուղվել Պետհամալսարանի ֆիզիկայի դասախոս Հ.Անժուրը (Չեքոստարյան), ուր նա աշխատում էր Մ.Կյուրիի լաբորատորիայում: Տեղեկանալով Հ.Անժուրից նրա ղեկավարած լաբորատորիայի կարիքների մասին, Միության Կենտրոնական Վարչությունը 1927թ. 45.000 ֆրանկ հատկացրեց նորագույն գործիքներ եւ սարքավորումներ գնելու նպատակով:⁴⁶ Արդեն Երեւանից Հ.Անժուրը իր շնորհակալական նամակում գրում էր. «Պատիւ ունիմ Ձեզ միաժամանակ յայտնելու, որ Հայաստանի Պետական Համալսարանի ֆիզիկական աշխատանոցին ձեր կողմից սիրալիկ կերպով նուիրուած ելեքտրականութեան եւ րատիոյի գործիքները այսօր շատ մեծ նշանակութիւն ունեցան իրենց օգտակարութեամբ մեր աշխատանքների համար: Ձեր նուիրած րատիո ասպարատը մեզ հնարաւորութիւն է տալիս երբեմն լսելու եւ լսեցնելու ուսանողութեան լայն խաւերին Բարիզի, Թուլուզի, Վիեննայի, Պերլինի եւ այլ եվրոպական րատիո կայանների

հաղորդումները: Ձեր նուիրած րատիօյի մասերից մենք փորձում ենք հաւաքել զանազան տեսակի ընդունիչներ, եւ այդպէսով հնարաւորութիւն են ստանում ուսանողները վարժութիւն ձեռք բերելու րատիօյի ընդունիչներ սարքելու հարցում»:⁴⁷

Նամակի բովանդակությունը ճիշտ արժեւորելու համար հարկ է նկատի առնել, որ Խորհրդային Հայաստանում «...1927թ. գործել է 65 ռադիօընդունիչ (21՝ քաղաքներում) ...Ունկնդիրների շրջանակը մեծացնելու նպատակով ռադիօկայանը միացվել է թատրոնին, կոնսերվատորիային, բանվորական ակումբներին, մշակույթի տներին, բանակի տանը, հասարակական վայրերում տեղադրվել են բարձրախոսներ: ...1929-ին շահագործման է հանձնվել Աթարբեկյանի անվ. «ԻՎ-21» ռադիօկայանը, որի շնորհիվ լսելի են դարձել Թբիլիսիից, Բաքվից տրվող հաղորդումները»:⁴⁸

Վերը նշվեց, որ Մելգոնյան հիմնադրամի հատկացումները Երեւանի Պետհամալսարանին հնարավոր եղան Միության ջանքերի շնորհիվ: Միության եւ նրա նախագահ Պողոս Նուպարի մասն մոտեցումը Հայաստանում որակյալ մասնագետների պատրաստման խնդրին պատահական չէր: Դեռեւս 1924թ. դեկտեմբերին Հայաստանի կառավարությանը հասցեագրած նամակում Պողոս Նուպարը հայտնում էր. «Ես որոշել եմ մեր Բարեգործական Միությանը նվիրաբերել 12.500 ոսկի ռուբլի, հանձնարարելով դրա տարեկան եկամուտը հատկացնել Երեւանի համալսարանին բացարձակապէս որպէս թոշակ առավել արժանի ուսանողներին՝ ուսման առաջադիմությունը խրախուսելու նպատակով»: Պողոս Նուպարը հայտնում էր նաեւ, որ ամեն տարի իր մրցանակակիրներից մեկը պետք է ուղարկվի Եվրոպա, ուր մեկ տարվա ընթացքում կկատարելագործի գիտելիքները որեւէ համալսարանում»:⁴⁹ Նամակին կցված էր «Պողոս Նուպարի համալսարանական մրցանակների կանոնադրութիւնը», ուր նրան հատուկ բժախնդրությամբ պարգաբանվում էին հատկապէս Եվրոպա մեկնելու հետ կապված բոլոր, այդ թվում նաեւ ֆինանսական հարցերը:

Պողոս Նուպարի այս հիմնադրամը իր առաջին եկամուտը՝ 120 անգլ. ոսկի, տվեց 1926թ., որն էլ հանձնվեց Պետհամալսարանին: Մրցանակները առաջին անգամ շնորհվեցին 1933թ., իսկ հաղթողների թվում էին համալսարանի շրջանավարտներ Էզրաս Հասարայանը, Աբգար Հովհաննիսյանը եւ Գագիկ Դավթյանը՝ հետագայում անվանի գիտնականներ, ակադեմիկոսներ: Եվ թվում էր, թէ Միության նախագահի ձեռնարկման հաջող իրագործումը այդուհետ ապահովված է: Բայց, ահա թե ինչ է պարզվում ավելի քան տասը տարի անց՝ 1937թ. մարտին Հայաստանի ժողկոմխորհի նախագահ Ա.Գուլոյանին ուղղած Միության վարիչ-պատ-

վիրակ Վ.Մալեզյանի նամակից. «1924-ին մեր ողբացեալ Հիմնադիր-Նախագահը Պողոս Նուպար Փաշա մասնատր հիմնադրամ մը յանձնած է մեր Միութեան, տարեկան եկամուտը որպէս Նուպարեան մրցանակ յատկացուելու համար Երեւանի համալսարանի յաջողագոյն շրջանաւարտներուն, այն պայմանաւ որ այդ գումարը գործածուի ուղեւորութեան ծախքերուն եւ այն առաւելութեամբ նաեւ որ առաջին մրցանակի պսակաւորը Պրիւսէլի Նուպարեան Սաներու Հիմնարկութեան ստանա պուրս մը, տարի մը Եվրոպայի մէջ իր մասնագիտութիւնը կատարելագործելու համար:

«Ցավալի է արդարեւ որ ցարդ հնար չեղաւ գործադրել Հիմնադրին կամքը եւ առաջին երկու տարիները դրկուած գումարը (անգլ.ոսկի 217,16) լրի չի գործածուեցաւ իր բուն նպատակին, իսկ յաջորդ տարիներու եկամուտները դիգուած մնացին մեր մօտ: Այդ հանգամանքներուն մէջ, Կեդր. Վարչական Ժողովը հարկադրուած է այդ հիմնադրամին կանոնադրութեան մէջ մտցնել հետեւեալ յաւելուածը, որպէսզի կարող ըլլայ ժամանակին այդ հիմնադրամը ծառայեցնել համապատասխան նպատակին իսկ առանց հետաձգումի»: Առաջարկվող հավելվածը այսպիսին էր. «Ամէն տարուան ընթացքին, երբ Երեւանի Պետ. Համալսարանը կամ անոր կողմէ նշանակուած Հաստատութիւնը մինչեւ 31 Յուլիս չի հաղորդէ համալսարանական մրցանակներուն պսակաւորները կամ առաջարկէ Հիմնադրին կամքին անհամապատասխան յատկացում մը, տրամադրելի տարեկան գուտ եկամուտը, որ պէտք էր յատկացուէր այդ տարեշրջանին, պիտի յանձնուի Նուպարեան Սաներու Հիմնարկութեան»:⁵⁰ Երկու ամիս անց, Փարիզում ստացվում է պատասխան նամակը Հայաստանի ժողկոմխորհի գործերի կառավարչի տեղակալի ստորագրությամբ. «Ընկ. Ա.Գուլոյանի հանձնարարությամբ հայտնվում է հետեւյալը՝ կրթական գործը մեզ մոտ՝ Խորհրդային Սոց. Հանրապետությունների Միության մեջ այժմ դրված է չափազանց բարձր մակարդակի վրա, հետեւապէս նպատակահարմար ենք համարում Նուպարյան մրցանակի ողջ գումարը հատկացնել Երեւանի Պետ. Համալսարանին, վերջինիս հայեցողությամբ մրցանակի արժանացած ուսանողներին պարգեւատրելու, իսկ հարկ եղած դեպքում արտասահման գործուղելու: Վերոհիշյալի հիման վրա, Վարչութեանը կողմից առաջադրված հավելվածը ընդունելի համարել չենք կարող»:⁵¹ Թե երկու կողմերը ինչպէս կլուծեին այս թնջուկը, կարելի է միայն ենթադրել, քանի որ շատ քիչ ժամանակ էր մնացել մինչեւ դեկտեմբեր ամիսը:

Այս ամենի հետ մեկտեղ, հետեւելով գյուղական վայրերում դպրոցներ հիմնելու ավանդույթին, Միությունը մասն նախաձեռնությամբ

հանդես եկավ նաև Հայաստանում: Այսպես, Լուսավորության ժողկոմիսարիատը 1928թ. հուլիսի նամակով Երևանում Միության ներկայացուցիչ Հայկազ Գարակոչյանին հայտնում էր, որ Միության տրամադրած միջոցներով Էջմիածնի շրջանի Ագարակ, Բլդեր և Ծիրազալա գյուղերում կառուցվում են դպրոցներ: Երկու տարի անց՝ 1930թ. բացվեց նաև «Սերեան Մեղուաբուծական Վարժարանը»:⁵²

Միությանը մեղադրում են

Ինչպես նշվեց, ՀԲԸ Միությունը եղավ առաջին սփյուռքահայ կազմակերպությունը, որին 1923թ. թույլատրվեց գործունեություն ծավալել Խորհրդային Հայաստանում: Միության տասնչորսամյա գործունեությունը Հայաստանում ուներ այն յուրահատկությունը, որ այն այդպես էլ չհիմնեց և ոչ մի մասնաճյուղ: Դա պայմանավորված էր երկու հիմնական պատճառներով: Նախ, համաձայն Միության կանոնադրության, մասնաճյուղի գոյության դեպքում նրա անդամները պարտավոր էին վճարել անդամավճարներ, որի մի մասը պետք է դրվեր Միության կենտրոնական Վարչության տրամադրության տակ: Հայաստանի պարագայում՝ «կատի առնելով՝ նրա բնակչության խիստ ցածր կենսամակարդակը, նման պայմանի կիրառումը դառնում էր անհիմաստ և անհնար: Կար է մեկ այլ՝ քաղաքական պատճառ: Կասկածից վեր էր, որ Հայաստանի իշխանությունները երբեք չէին հանդուրժի, որ Խորհրդային Միության քաղաքացիները անդամագրվեին արտասահմանյան, թեկուզ և հայկական, բայց իրենց իսկ որակմամբ՝ «բորժուական» կազմակերպությանը: Մյուս կողմից, եթե նույնիսկ դա հնարավոր լիներ, ապա նույն այդ մասնաճյուղերը պարտադրաբար կդառնային գործիք իշխող կոմունիստական կուսակցության ձեռքին, նրա գաղափարների կրողն ու տարածողը: Մի բան, որին արդեն չէր կարող համաձայնվել Միությունը:

Սկսած 1924թ., Միությունը Հայաստանում կառուցում էր հիվանդանոցներ, դպրոցներ, ավաններ, բնակելի շենք, ձեռնամուխ էր եղել Նուպարաշենի աննախադեպ շինարարությանը, օժանդակում էր ներգաղթի աշխատանքներին, և այս ամենի հետ մեկտեղ, շարունակում էր իր գործունեությունը տարբեր երկրներում: Հալեպում, Բեյրութում, Աթենքում, Սալոնիկում, Երուսաղեմում, Կահիրեում և այլ քաղաքներում գործում էին հատկապես գաղթականների ու որբերի համար նրա հիմնած բազմաթիվ որբանոցներ, պատասպարաններ, աշխատանոցներ, դարմանատներ և այլ հաստատություններ: Վստահ կարելի է ասել, որ 20-30-ական թվական-

ներին Միության գործունեությունը սփյուռքում և Հայաստանում անօրինակ էր թե իր ծավալով և թե իր կարեւորությամբ: Եվ չնայած այդ ամենին, նույն այդ տարիներին, ինչպես և նախորդ շրջանում, Միությունը մշտապես քննադատվում էր տարբեր շրջանակների, կազմակերպությունների ու առանձին անհատների կողմից: Երվանդ Աղաթոնը 1932թ. իր հոդվածներից մեկում գրում էր. «Փոխանակ ներողամիտ ոգիով խրախուսելու աշխատողները, փոխանակ ուժ տալու Բարեգործականին, վայել է անդադար հարուստել և սեւցնել, ազգային ամենէն անմեղ և օգտակար ծառայութիւնը անգամ անհանդուրժելի դարձնելու աստիճան: Ծատ դժուար բան չէ հաստատութիւն մը քանդելը. չքանդուած հաստատութիւններէն ի՞նչ մնաց. բայց միթէ մենք հայերս քուրդին և թուրքին պէս մէկ տարիէն շինուած տուն մը մէկ օրէն հիմնապատա՞կ ընելու ենք, ճիշդ ինչպէս կ'ընեն Պոլսոյ տուն փլցնող այլազգի գործավորները: ...Դիւրի՞ն է արդեօք նոր և անելի զօրաւոր ու օգտակար Բարեգործական մը շինելը, և քանդելէ վերջ ո՞ր հայն է որ նոր Բարեգործականի մը դրամ պիտի տայ, տեսնելէ վերջ որ հայուն ձեռքովն է որ նախորդ Բարեգործականը քանդուած է: Կը հարցնեմ ձեզի, դիւրի՞ն է կրկին գտնել Նուպարներ, Եագուպ փաշաներ, Մելգոնեաններ, Գարակէօզեաններ, Կիլպէնկեաններ, Յակոբեաններ, Քէլէկեաններ, եւն. եւն... Քանդելէ առաջ, նախ կազմեցէք այսօրուան Բարեգործականէն անելի պատկառելի և վստահելի Միութիւն մը, որպէսզի ձեր խօսքէն վերջ ձեր գործին մէջ տեսնենք ձեզ»:⁵³

Ե.Աղաթոնի այս խոսքերը արդարացված էին հատկապես Միության Հայաստանյան գործունեության պարագայում, երբ այլընտրանք պարզապես չկար:

Միության քննադատությունը ուղղվում էր մի քանի կետերի վրա: Նախ, Միությունից պահանջում էին, որպեսզի այն իր տրամադրության տակ եղած բոլոր կտակներն ու նվիրատվությունները օգտագործի Հայաստանի կարիքների համար: «Միութիւն» պաշտոնաթերթը այդ առիթով գրում էր. «... ո՞ր վարիչն է որ, անգոստելով Միութեան յանձնառութիւնը և պատասխանատուութիւնը, պիտի համարձակէր անարգել կտակարարին կամ նուիրատուին անխորտակելի կամքը և ժխտել նպաստընկալ իրաւատէրին անբռնաբարելի իրաւունքը:

«Պետք է վերջապէս ընդունիլ թէ Միութեան նման ընկերակցութիւն մը որ, օրինապահութեան վրայ հիմնուած է և այդ պատճառաւ անվերապահ վստահութիւն կը ներշնչէ, ունիցէ ճնշումի տակ ինքզինքնին թոյլ պիտի չիտայ բացայայտ օրինազանցութիւն մը գործել, անձեռնմխելիութեան պայմանով իրեն վստահուած հիմնադրամի մը ըստ կամս ծախսելով կամ կանխորոշուած եկամուտները տարբեր նպատակի մը յատկաց-

նելով. այսպիսի շեղում մը գեղծարարություն պիտի ըլլար, որ ամէն քաղաքակիրթ երկրի մէջ խստօրէն կը պատժուի»:⁵⁴

Միությունը մեղադրվում էր նաեւ նրանում, թէ իբր նա իր տրամադրության տակ ունի կտակներ՝ հօգուտ Հայաստանի, որոնք, սակայն, չի օգտագործում ըստ նպատակի: Մինչդէռ, իրականում տեղի էր ունենում հակառակը: Վերոհիշյալ Դարուհի Յակոբեան, Գրիգոր Մ'օթեմէտեան, Երուանդ Յակոբեան հիմնադրամների նպատակակետը ի սկզբանէ Խորհրդային Հայաստանը չէր, եւ միայն ՀԲԸ Միության ջանքերի շնորհիվ՝ որոշակի իրավաբանական դժվարություններ հաղթահարելուց հետո հնարավոր դարձավ դրանց տեղափոխումը Հայաստան:

Միությանը ներկայացվող մեղադրանքներից էր նաեւ այն, որ իր հիմնական դրամագլխի հաշվին չէր գնում Հայաստանում հիմնած Երկրագործական բանկի արժեթղթերը եւ շարունակում էր հավատարիմ մնալ հիմնական դրամագլխի անձեռնմխելիության սկզբունքին: Կտակների ու նվիրատվությունների օրինակով, այս վերջին դեպքում նույնպէս Միության կանոնադրության ամենակարեւոր դրույթներից մեկից հրաժարումը արդարացվում էր Հայաստանին օժանդակելու անհրաժեշտությամբ: Ի տարբերություն այլոց, Ե.Կարիկյանի նման ոգով գրված հոդվածները արժանացան Պողոս Նուպարի պատասխանին: Հարկ է նշել, որ Միության նախագահը սովորաբար, որպէս կանոն, անուշադրության էր մատնում բոլոր տեսակի մեղադրանքները, սակայն այս դեպքը բացառություն էր, նկատի առնելով Ե.Կարիկյանի մատուցած ծառայությունները:

Ահա մի հատված վերջինիւ ուղղված Պողոս Նուպարի 1925թ. մարտի 4-ի նամակից. «Գալով Միութեան հիմնական դրամագլուխի մասին ձեր գրածին, բացորոշ է որ դուք անոր ելմտական վարչութեան մասին ըմբռնումի եղանակ մը ունիք որ մերինը չէ: Ոչ միայն այն դրամագլուխը անձեռնմխելի է, այլ եւ Կեդր. Ժողովը պարտաւոր է անով գնել այն արժեթղթերը միայն որոնք դասաւորուած (գլասսէ) են, արդէն շահաբաժին վճարած են, սեղանաւորական հրապարակին վրայ ընդունուած են ու վաճառելի են դիւրաւ: Արդ, անվիճելի է որ Հայաստանի Երկրագործական Դրամատան բաժնեթուղթերը, որոնց չարձանագրուելնուս համար գմեզ կը մեղադրէք, պատուական արժեթուղթեր ըլլալով հանդերձ, ըստ մեզ, տակաւին վերոյիշեալ պայմանները չեն լրացներ:

«Եթէ Միութեան վարիչները, սկիզբէն ի վեր ու հանապազ, սրտագին հոգածութիւնը ունեցած չըլլային մատակարարելու հիմնական դրամագլուխը, ճշգրտօրէն հարգելով կանոնագրութեան տրամադրութիւնները, համաձայն գուտ ֆինանսական սկզբանց, ինչպէս ճիշտ Ֆինանսական Ընկերութեան մը Վարչական Ժողովը, Միութիւնը բնաւ չպիտի

կրնար հասնիլ բարգաւաճման ներկայ աստիճանին եւ գուցէ գոյութիւն իսկ չպիտի ունենար: Ան չպիտի կրցած ըլլար վստահութիւն ներշնչելու մեր հայրենակիցներուն, 19 տարուան գոյութեան մը միջոցին ահագին գումարներ հաւաքելու աստիճան, գումարներ որոնք այսօր կ'անցնին 300.000 ոսկին, բաշխուած իբր ամէն տեսակ օգնութիւն ու նպաստ: Ան չպիտի կրնար, պատերազմէն ի վեր, խնամել հազարաւոր որբեր, ան այսօր չպիտի եղած ըլլար Հայկական միակ Ընկերակցութիւնը որ կը գործէ ամէն տեղ ուր Հայեր կը գտնուին եւ որ, կրնանք յուսալ, պիտի կրնայ տակաւին օգտակար գործ կատարել Հայ ազգին համար»:⁵⁵

Անգոտելով բոլոր քննադատություններն ու խոչընդոտները, ՀԲԸ Միությունը շարունակում էր իր գործունեությունը Խորհրդային Հայաստանում: Դժվար չէ նկատել, որ այն հիմնականում ընթանում էր առողջապահական եւ գիտակրթական ուղղություններով: Խիստ կարեւոր էր նաեւ Միության բազմապիսի օժանդակությունը ներգաղթի կազմակերպման գործում: Ոգեւորված այդչափ հաջող համագործակցությամբ, կողմերը ձեռնամուխ եղան մի նոր, անհամեմատ ավելի մեծ ու դժվարին ծրագրի իրականացմանը՝ ներգաղթածների համար ամբողջ մի ավանդի կառուցմանը:

Նուպարաշեն

1926թ. Ֆիլադելֆիայում կայացած ՀԲԸ Միության ԱՄՆ-ի մասնաճյուղերի խորհրդակցական համաժողովում որոշում է կայացվում Միության 25-ամյակի առիթով եւ ի պատիվ նախագահ Պողոս Նուպարի, հետագա հինգ տարիների ընթացքում հատուկ հանգանակության միջոցով գոյացնել 250 հազար դոլարի գումար: Տեղեկացնելով Պողոս Նուպարին այդ որոշման մասին՝ համաժողովի մասնակիցները խնդրում են նրան հայտնել իր կարծիքը նշված գումարի օգտագործման կերպի վերաբերյալ: Կարելի է ենթադրել, որ շատ-շատերի համար նախագահի պատասխանը թվում էր ակնհայտ՝ նշված գումարը հատկացնել Միության արդեն գործող հաստատություններին (որբանոցներ, գաղթակայաններ եւ այլն) կամ էլ հիմնել նորերը: Պողոս Նուպարը, սակայն, գաղթականության ապագայի հարցի իրական եւ արմատական լուծումը այդ ժամանակ արդեն համարում էր նրանց տեղափոխումը Հայաստան: Զանգվածային ներգաղթը կապված էր, սակայն, բազմաթիվ եւ բազմաբնույթ դժվարությունների, այդ թվում նաեւ բնակարանների բացակայության հետ, ինչի մասին բազմիցս նշում էին Հայաստանի իշխանությունները: Անցած տա-

րիների փորձը վկայում էր, որ սփյուռքահայությունը տարբեր՝ տնտեսական եւ քաղաքական պատճառներով կամ ի վիճակի չէր, կամ էլ պարզապէս նպատակահարմար չէր համարում ֆինանսավորել բնակարանային շինարարությունը Հայաստանում, կարծելով, որ եղած միջոցները նախ եւ առաջ պետք է ծառայեցնել տարբեր երկրներում համայնքային կառույցներին, ընդհանրապէս գաղթականության կարիքները հոգալուն: Մյուս կողմից, Բարեգործականի սեփական միջոցները անբավարար էին նման խոշոր ծրագիրը ինքնուրույն իրագործելու համար: Այդ պայմաններում, Պողոս Նուպարը, տեղեկանալով «հոբելյանական» հանգանակության մասին, որոշում է դրանից գոյացած գումարը ամբողջությամբ տրամադրել Հայաստանում հատուկ մի ավանդի կառուցմանը, ուր պետք է բնակվեին ներգաղթած հայերը: Միեւնույն ժամանակ, ցանկանալով քաջալերել հանգանակության բոլոր հնարավոր մասնակիցներին, նա հայտարարեց, որ եթե մինչեւ 1931թ. ապրիլի 30-ը հանգանակվի 250 հազար դոլար, ապա նա իր կողմից կտրամադրի եւս 100 հազար դոլար: Միության անդամներն ու բարեկամները, մեծ խանդավառությամբ ընդունելով նախագահի առաջարկությունը եւ ցանկանալով հավերժացնել նրա անունն ու գործը, կառուցվելիք ավանդ որոշեցին կոչել Նուպարաշեն:

Հանգանակության սկիզբը շատ տպավորիչ էր եւ խոստումնալի: «Միություն» ամսագիրը 1928թ. առաջին համարներից մեկում պատմում էր Նյու Յորքում Նուպարաշենի հանգանակության պաշտոնական բացման մասին. «...Ներկաները խանդավառությամբ մասնակցած են հանգանակության եւ առաջին առթիւ գոյացած է շուրջ 102.000 տոլար: Կարեւորագոյն գումար արձանագրուողները եղած են՝ Գարակեօզեան եւ Կիւպենկեան հարազատները, 20.000-ական տոլար ...Տիգրան Խան Քէլեկեան՝ 6.250 եւ տ. Լեւոն Պապայեան՝ 2.500 տոլարով»:56 Նույնպիսի մի հավաքի ընթացքում Չիկագոյում հանգանակվել էր 25 հազար դոլար:

Ամերիկահայերի այս նախաձեռնությունը մեծ արձագանք ունեցավ ոչ միայն սփյուռքում, այլեւ օտարների մէջ: 1929թ. ապրիլի 5-ի ուղերձում Ֆրիտոֆ Նանսենը գրում էր. «Մեծ հաճությամբ կ'իմանամ թէ Ամերիկայի Հայերուն մէջ շարժում մը կայ գաղթականներու տեղաւորման համար Հայաստանի մէջ գիւղաքաղաք մը կառուցանելու եւ զայն Նուպարաշեն անուանելու, ի պատիւ Պօղոս Նուպարի, մեծանուն հայ հայրենասերին եւ մարդասէրին: Հարկ չկայ ըսելու թէ ամենաջերմ կերպով կը համակրիմ այս ձեռնարկին: Չորս տարիէ ի վեր ես կ'աշխատիմ Ազգերու Ընկերութիւնը շահագրգռելու Հայաստանի հողերուն բարելաւման խնդրով, ինչ որ լաւագոյն լուծուիւմ պիտի ըլլայ գաղթականներու հարցին: Իմ ջանքերուս արդիւնքը ինչ որ ալ ըլլայ, վստահ եմ թէ Հայերուն անձնուիրութիւ-

նը իրենց պատմական հայրենիքին, ինչպէս նաեւ տառապեալ ազգակիցներու վիճակին բարոքման եւ Երեւանի կորովի փոքրիկ Հանրապետութեան վերաշինութեան համար, անոնց ցոյց տուած քաջասրտութիւնը, հաստատականութիւնը եւ զոհողութիւնը հիացում պիտի պատճառեն քաղաքակիրթ աշխարհին»:57

Այդչափ հաջող մեկնարկած հանգանակությունը չունեցավ, սակայն, նույնպիսի շարունակություն՝ նախատեսված գումարը հավաքվում էր չափազանց դանդաղ եւ դժվարությամբ: Դրա հիմնական պատճառը նույն այդ տարիներին ԱՄՆ-ում սկիզբ առած տնտեսական մեծ ճգնաժամն էր, որի զոհերը դարձան նաեւ մեծ թվով ամերիկահայեր: Համաձայն «Միություն» ամսագրի տվյալների, 1929թ. վերջերին հավաքված գումարը կազմում էր ընդամենը 153 հազար դոլար: Հանգանակության նման ընթացքը հարցականի տակ էր դնում ավանդի կառուցման ծրագիրը ընդհանրապես: Հայաստանի իշխանությունները թեեւ տվել էին սկզբունքային համաձայնությունը, այնուամենայնիվ, ուղղակի կամ անուղակի ձեռով ձգձգում էին դրա իրականացումը: Այդ առիթով Վ.Համազասպանը գրում էր. «Խորհրդային հայրենիքում շատ դժվար էր հայ խոշոր բուրժուազիայի դեմ ծավալված գաղափարական պայքարի պայմաններում հայ կապիտալիստի անունով ավանդ կառուցել: ...Հայաստանի կառավարությունը, չհրաժարվելով հանգանակած գումարներից, հողամասեր է առաջարկում Եղվարդի մոտակայքում, Մեծամորի շրջանում, Սարդարապատում, երկար ու բարակ վիճարկում ավանդի անվանակոչության հարցի շուրջ, նույնիսկ առաջարկում, որ ավանդի անունը թողնեն որոշելու նրա բնակիչներին, որին, առանց հապաղելու, համաձայնվում է Պողոս Նուպարը, միայն թե իր կենդանության օրոք կառուցված տեսնի ավանդ: Նուպարաշենին հողամաս է տրամադրվում ոչ թե Սարդարապատում, որը առաջարկել էր ակադեմիկոս Ալ.Թամանյանը, այլ Երեւանին մերձ Նորագավիթ շրջանում»:58

Պողոս Նուպարը, կանխագալով իր կյանքի մոտալուտ ավարտը, ձգտում էր անել հնարավոր այն ամենը, ինչը կնպաստեր Նուպարաշենի արագ կառուցմանը: Եվ դժվար չէ պատկերացնել այն հիասթափությունը, որ ապրեց նա, իմանալով հանգանակության ոչ հաջող, դանդաղ ընթացքի մասին: Ա.Թերզիպաչյանը պատմում է մի դեպքի մասին, որը տեղի էր ունեցել 1930թ. մայիսին, այսինքն, Պողոս Նուպարի մահից մոտ մեկ ամիս առաջ. «Փաշան՝ Մալեգեանի եւ Հէքիմեանի (նրա անձնական քարտուղարը - Էդ.Մ.) կը յայտնէ թէ՛ որովհետեւ գաղութահայութիւնը չկրցավ 300.000 տոլարի (պետք է լինի 250.000 - Էդ.Մ.) հանգանակութիւնը գումար հանել, որոշած է ջնջել իր պայմանաւոր նուիրատուութիւնը... Մա-

լեզեան՝ լուրջ եւ յամառ, իր համոզկեր լեզուովը՝ անոր բանավարութեանը կը դիմէ, Հէքիմեան իր մտերմիկ եւ ընտանի ժպիտովը անոր զգացումներուն: Զուր կ'անցնին ե՛ր մէկը ե՛ւ միւսը: Փաշան կը մնայ անդդողելի եւ գրութեամբ մը նոյն օրը Բարեգործականին կը հաղորդէ իր որոշումը:

«Բայց կը թուի թէ Մալեզեանի խոսքերէն եւ Հէքիմեանի ժպիտէն մէկ մէկ բան մնացեր էին Փաշայի մէջ, վասնզի, յաջորդ օրը, ան՝ յանկարծ կը կանչէ Հէքիմեանը եւ կը հրամայէ անոր գրել երկու մամակներ - մէկը գուիցերիական Լոմպար Օտիէ պանքային՝ հաղորդելով որ քովը գտնուող իր 208.000 տոլարը փոխանցէ ՀԲ Ընդհ. Միութեան, մյուսը՝ ՀԲ Ընդհ. Միութեան, յայտնող թէ՛ Լոմպար Օտիէ պանքային կողմէն իրեն փոխանցուելիք 208.000 տոլարին 100.000 յատկացնէ Նուպարաշէնի ֆոնդին»:⁵⁹

Նոյն 1930թ. ապրիլին եւ մայիսին՝ Երեւանում եւ Փարիզում Խորհրդային Հայաստանի կառավարության՝ ի դեմս ՀՕԿ-ի նախագահ Ս.Խանոյանի եւ ՀԲԸ Միության Կենտրոնական Վարչական Ժողովի՝ ի դեմս Պ.Էսմերյանի (փոխատենապետ), Լ.Կյումուշկերտսանի (գանձապետ) եւ Վ.Մալեզյանի (վարիչ-պատվիրակ) միջեւ վերջապես ստորագրվեց «Համաձայնագիր Նուպարաշէն տիպար ավանի կառուցման մասին»⁶⁰, որին հետեւեց Միության առաջին 50.000 դոլարի մասնավճարը: Իսկ արդեն ամռանը Երեւանի հարավային սահմանների մոտ սկսվեցին շինարարական աշխատանքները, որոնք ղեկավարում էր այդ նպատակով ստեղծված հատուկ հանձնախումբը՝ նախագծի հեղինակ, ակադեմիկոս Ա. Թամանյանի գլխավորությամբ:

Հաջորդ վեց տարիների ընթացքում Նուպարաշէնին, նրա կառուցման հետ կապված բոլոր հարցերին առանձնահատուկ կարեւորություն էր տրվում Միության ղեկավարության եւ շարքայինների կողմից: Ավելին, այն բանից հետո, երբ հայրենակցական միություններին առաջարկվեց մասնակցել ավանի առանձին թաղամասերի կառուցմանը, ուր պետք է բնակվեին Արեւմտյան Հայաստանի համապատասխան բնակավայրերից բռնագաղթածները, Նուպարաշէնը հայտնվեց շատ ավելի մեծ զանգվածի ուշադրության կենտրոնում: Պատահական չէ, որ սկսած 1930թ. Միության տարեկան հաշվետվություններում եւ այլ հրատարակումներում մեծ տեղ էր հատկացվում Նուպարաշէնի հետ կապված տարբեր հարցերին: Ծանոթանալով այդ նյութերին՝ կարելի է տեսնել, թե ինչպես խանդավառությունը եւ ավանի արագ կառուցման հետ կապված հույսերը հետզհետե փոխարինվում էին իրավիճակի սթափ եւ զուսպ գնահատականներով:

1931թ. հուլիսին կայացած հերթական Ընդհանուր Ժողովում նշվում էր. «Նախապատրաստական աշխատությունները, շինուածանիքներու

ապսպրանքներն ու մթերումները, եւ մանաւանդ յատկագիծներու պատրաստութիւնը լրացած ըլլալով, ներկայ շինարարական եղանակին շինութեանց գործին ձեռնարկուած է փութաջանօրէն, այնպէս որ այս ամսու 100- 120 բնակարաններ կառուցուած կ'ըլլան, եւ հաւանօրէն Յունաստանէն եւ ուրիշ տեղերէ ալ մաս մը աշխատաւոր գաղթականներ հոն կը փոխադրուին, անմիջապէս գործի լծուելու եւ կամաց կամաց Նուպարաշէնի մէջ տեղաւորուելու համար»:⁶¹ Մեկ տարի անց, 1932թ. սեպտեմբերին Միության կողմից ներկայացված հաշվետվությունից պարզվում է հետեւյալ պատկերը. «Դժբախտաբար անցեալ տարուան շինարարական եղանակին ալ մեր ակնկալութիւնները չիրականացան, հակառակ մեր յաճախակի դիմումներուն... Հագիւ թէ վերակազմուած յանձնաժողովը Նուպարաշէնի շինութեանց սկսած էր նոր թափով մը, Զանգեզուրի շրջանին երկրաշարժը իր աղէտալի հետեւանքներով կառավարութիւնը յանկարծ դրաւ նոր եւ անակնունդի ստիպողականութեանց առջեւ. անհրաժեշտ էր ամենէն առաջ հազարաւոր աղէտեալներու համար բնակարաններ կառուցանել, որով եւ բոլոր ուշադրութիւնները այդ ուղղութեամբ կեդրոնացան»: Եվ որպէս դրա հետեւանք՝ նախատեսված 100-120 բնակարանների փոխարեն «քսան բնակարաններ ամբողջովին եւ ութը կիսաշէն կառուցուեցան, նաեւ հիմերը դրուեցան բազմաթիւ շէնքերու, կարելի չէր աւ շօշափելի գործնական արդիւնք մը ձեռք բերել»:⁶²

Նուպարաշէնը կառուցվում էր դանդաղ եւ ոչ միայն վերը նշած պատճառներով: Մի կողմից, այդ նույն տարիներին Հայաստանում մի շարք խոշոր արդյունաբերական ձեռնարկությունների, մեծ թվով բնակելի շէնքերի կառուցումը, մյուս կողմից՝ որակյալ աշխատուծի ու շինանյութերի մշտական պակասը եւ ուրիշ այլ հանգամանքներ մեծ չափով դժվարացնում էին ավանի կառուցումը: Կային եւ այլ պատճառներ, բայց այդ մասին ստորեւ՝ գրքի 6-րդ մասում:

1920-1930թթ. ՆԵՐԳԱՂԹԸ. Գ.ԿՅՈՒԼՊԵՆԿՅԱՆԻ ՀՐԱԺԱՐԱԿԱՆԸ

1924թ. ՀԲԸ Միության իրականացրած՝ 250 որբերի տեղափոխումը Խորհրդային Հայաստան մեծ ոգեւորություն առաջացրեց գաղթականության շրջանում: Սիրիայում, Պաղեստինում, Հունաստանում եւ այլ երկրներում ապաստանած հայերի մի զգալի մասը, հուսահատված իր ծայրաստիճան ծանր վիճակից, պատրաստ էր անմիջապես մեկնել Խորհրդային Հայաստան: Այդ պատրաստակամությունը, սակայն հակասում էր Հայաստանի իշխանությունների իրական հնարավորություններին եւ ամենակարեւորը՝ դասակարգային գաղափարախոսության վրա հիմնված ներգաղթի քաղաքականությանը:

Հայաստանի իշխանությունների դիրքորոշումը

1923թ. դեկտեմբերի 4-ին, ելույթ ունենալով Խորհրդային Հայաստանի բանվորների, գյուղացիների եւ կարմիրբանակայիների խորհուրդների 3-րդ համագումարում, Անդրկովկասյան հանրապետությունների ֆեդերացիայի (Անդրֆեդերացիա) ժողկոմի փոխնախագահ, Հայաստանի Ժողկոմխորհի նախկին նախագահ Ալ.Մյասնիկյանը ձեւակերպեց Հայաստան ներգաղթելու հիմնական նախապայմանը: Նկատի առնելով դրա կարեւորությունը՝ Ալ.Մյասնիկյանի ճառի համապատասխան հատվածը արտատպվեց սփյուռքահայ մամուլում, մասնավորապես Նյու Յորքի «Հայաստանի կոչնակ» թերթում. «Մեզ կը մեղադրեն թէ Խորհրդային Հայաստանը չի մտածում գաղթականների մասին. դա շատ հեշտ է պրո-

վոգացիայի համար: Իհարկէ մենք գաղթականութեան համար չենք մտածում այնպէս, ինչպէս մտածում էր Դաշնակցութիւնը: Մի րոպէում մենք բոլոր գաղթականութիւնը չենք կարող Հայաստան փոխադրել... Խորհրդային Հայաստանը այդ գաղթականութեան կ'ըսէ. Եթէ կ'ուզես երջանիկ ըլլալ եւ բախտդ կապել այս երկրի աշխատատրութեան հետ, նախ պիտի փոխես քաղաքական ուղղութիւնդ, պիտի հեռանաս Դաշնակցութենէն եւ միանաս Խ. Հայաստանի աշխատավորութեան: Մենք կ'օգնենք ձեզի, կուտանք կրթութիւն, դու յառաջացիր համայնավարական գաղափարներով եւ կը յաջողիս»:՝ Մոտ մէկ տարի անց, Փարիզում տված իր մի հարցազրույցում Հայաստանի Երկրագործության ժողկոմիսար Ար.Երզնկյանը նույնպէս շեշտում էր, որ ներգաղթի հիմնական նախապայմանը քաղաքական եւ գաղափարական հուսալիությունն է. «Հայաստանի դռները բաց են այն բոլոր հայերուն համար, որ կ'ուզեն Հայաստան երթալ՝ աշխատելու, եւ ոչ թէ փոխիք ընելու: Հայ ժողովուրդը եւ Խ.Հայաստան պէտք ունին բացարձակ խաղաղութեան, եւ ո՛չ թէ կուսակցական մարտնչումներու, քաղաքական ներքին թագում կոխներու: Այսպիսիներուն համար փակ են Հայաստանին դռները, եւ եթէ ներս սպրդին երկրին ներքին խաղաղութիւնը խանգարողներ, մենք... այդպիսիները կը դրկենք ուրիշ տեղեր»:՝

Խորհրդային իշխանությունների նման դիրքորոշումը կարելի է համարել բնական. ՀՀ Դաշնակցությունը՝ իրենց հիմնական քաղաքական հակառակորդը, շարունակում էր ժողովրդականություն վայելել Հայաստանում, ինչին մեծապէս նպաստեց հենց իսկ բոլշեիկյան իշխանությունների սանձազերծած կարմիր տեռորի քաղաքականությունը: Դրա ասացույցն էր 1921թ. փետրվարի 18-ի ժողովրդական ասպետությունը, որից հետո բոլշեիկները վերստին տիրացան իշխանությանը ասորիլ ամսին ռուսական բանակի օգնությամբ միայն: Ձգտելով վերջնականապէս ամրապնդել իրենց իշխանությունը երկրում, արգելելով ազգային քաղաքական կուսակցությունների գործունեությունը եւ հետապնդելով նրանց անդամներին ու կողմնակիցներին, նրանք բնավ էլ մտադիր չէին Հայաստան ներգաղթելու հնարավորություն տալ բոլոր նրանց, որոնք այս կամ այն չափով առնչություն էին ունեցել նույն այդ կուսակցությունների հետ, լինէր դա Հայաստանում եւ կամ սփյուռքում: Հատկանշական է այդ առումով, որ Հայաստան ներգաղթել ցանկացողները նախապէս պէտք է լրացնէին հատուկ հարցաթերթիկներ, որտեղ կային եւ այսպիսի հարցեր. «Ի՞նչ կուսակցության եք պատկանում», «Որտե՞ղ եք եղել եւ ինչո՞վ էք զբաղվել 1914թ. մինչեւ 1931թ.» եւ այլն:

Քաղաքական եւ գաղափարական նման գտումից գատ Հայաստան ներգաղթելու գործում կար եւ մէկ այլ՝ տնտեսական խոչընդոտ: Ար.Երզնկյանը իր վերը հիշատակած հարցազրույցում ասում էր. «Հայ գաղթականութիւնները ներս ընդունելու համար Հայաստանին հիմնական պայմանները նպաստաւոր չեն: Երկիրը, փոքրիկ եւ աղքատիկ, չի կրնար գաղթականներու կարաւաններ ներս ընդունիլ, առանց ապահովելու այդ նորեկներուն համար, հող, բնակարան եւ ապրուստի նախնական միջոցներ: Այդ պատճառաւ, Հայաստանին ամէնէն առաջին եւ կենսական պէտքերէն մէկն է ճահիճներու չորացումը, որպէսզի տեղ բացուի նորեկներուն: Իսկ նորեկներ եթէ ունին ինքնապահ ըլլալու չափ ապահով միջոցներ, որպէսզի տնտեսական ներքին տագնապ չստեղծուի, կառավարութիւնը կ'ընդունի զանոնք եւ կարելի եղած դիրքութիւնները կ'ընծայէ անոնց, որպէսզի տեղատրուին»:՝ Այլ.Մյասնիկյանը, ելնելով երկրի տնտեսական ծանր վիճակից, առաջարկում էր. «Կ'ընդունինք գաղթականները, միայն թէ անոնք պէտք է գան իրենց միջոցներով: Այնքան արտասահմանեան ֆոնտեր կան, թող անոնց հատկացնեն, փոխադրութեան ծախքերը հոգալու համար»:՝

Այն բանից հետո, երբ Միությունը սեփական միջոցներով Հայաստան տեղափոխեց իր որբանոցների 250 սաներին, Հայաստանի իշխանությունները որոշեցին, որ սփյուռքահայությունը պէտք է հոգար տեղափոխման հետ կապված բոլոր ծախսերը: Այսպիսով, սփյուռքահայությունը դառնում էր ներգաղթը կազմակերպող երկու կողմերից մէկը, իսկ նրա ֆինանսական աջակցությունը՝ ներգաղթի իրագործման կարեւոր նախապայման: Հնչակյան, Դաշնակցություն եւ Ռամկավար-Ազատական կուսակցությունները, որոնց ազդեցությունն ու դերը սփյուռքում այդ տարիներին շատ մեծ էր, եւ որոնք կարող էին մասնակցել ներգաղթի թէ կազմակերպման եւ թէ ֆինանսավորման գործին, զրկված էին այդ հնարավորությունից: Հայաստանի իշխանությունների համար սկզբունքորեն անընդունելի էր որեւէ հարաբերություն կամ համագործակցություն նրանց հետ: Հայ Առաքելական եկեղեցին, որը այդ շրջանում նոր էր սկսում կազմակերպվել սփյուռքում եւ սերտորեն համագործակցում էր հայ քաղաքական կուսակցությունների հետ, նույնպէս անցանկալի գործընկեր էր խորհրդային իշխանությունների համար, հաշվի առնելով վերջինների հակակրոնական, հակաեկեղեցական քաղաքականությունը: Նման պայմաններում Հայաստանի խորհրդային իշխանությունները, ըստ էության, պարզապէս դատապարտված էին համագործակցել հենց իսկ ՀԲԸ Միության հետ:

ՀԲԸՄ-ի օժանդակությունը

Հաշվի առնելով, որ այդ տարիներին առավել ծանր վիճակում էին հայտնվել Հունաստանում ապաստանած հայ գաղթականները, Միությունը որոշեց առաջին հերթին անհրաժեշտ գումարներ հատկացնել նրանց Հայաստան տեղափոխելու համար: Արդեն 1925թ. Միության հատկացրած միջոցներով (5000 անգլ. ոսկի) հնարավոր եղավ կազմակերպել Հունաստանում, ինչպես նաև Կ.Պոլսում և Միջագետքում ապաստանած գաղթականների մի մասի (համապատասխանաբար՝ 3119, 700 և 371) ներգաղթը Հայաստան: «Ասոցմե մեծամասնությունը, գլխաւորապէս բանորներ և արհեստաւորներ, ինքնակամ ցրուեցան գաւառներ ու քաղաքները և անցան աշխատանքի, իսկ 1086 մարդ (361 ընտանիք), որ գիւղացիներ էին, հաստատուեցան Արագոյայանի շրջանին մէջ, չորս գիւղի բաժնուած - Արագոյայան, Արմաշ, Արվաշ և Ամօ: Այս գաղթականները, որոնց մէջ 80 ծխախոտագործ և շերամապահ կը գտնուէին, այնքան օգտակար տարր մը հանդիսացան Հայաստանի շինարարութեան գործին, որ Կառավարութիւնը որոշում տուաւ 1926-ին ալ աւելի մեծ թիւով գաղթականներ փոխադրել Հայաստան»:⁵

Ներգաղթի համար հանգանակություններ կազմակերպելու առումով մեծ էր Միության ԱՄՆ-ի մասնաճյուղերի դերը, ավանդաբար այստեղ է որ հավաքվում էր անհրաժեշտ գումարների ճնշող մասը: 1926թ. միայն Նյու Յորքի շրջանային հանձնաժողովի կազմակերպած «Դեպի Հայաստան ներգաղթի հանգանակության» արդյունքը եղավ շուրջ 12 հազար անգլ. ոսկի, որը նույն թվականի հուլիսին հանձնվեց Փարիզ ժամանած Հայաստանի ժողկոմխորհի ներգաղթի լիազոր Դ.Շահվերդյանին և Փարիզում Խորհրդային Միության լիազոր ներկայացուցչության քարտուղար Ս.Փիրումյանին: Փոխադարձ համաձայնությամբ այդ գումարը հատկացվելու էր Հունաստանից, ինչպես նաև Միրիայից շուրջ 300 գաղթականներին Հայաստան փոխադրելու աշխատանքին: Սակայն նույն 1926թ. Հայաստանում տեղի ունեցավ Օիրակի երկրաշարժը և նշված խմբի ներգաղթը դարձավ անհնար: Օրախնդիր էր ի նպաստ աղետյալների հանգանակության կազմակերպումը: «...Մեր ժողովուրդը հարուածող նոր և ահաւոր աղէտքին առջեւ, վստահ եմ,- ասում էր Պողոս Նուպարը Միության Ընդհանուր Ժողովում,- որ ամէն բանէ առաջ պիտի ուզէք ձայնակցիլ ինձ՝ հագիւ վերականգնած և տակաւին արինաքամ Հայաստանը աւերող երկրաշարժի զոհերուն դրկելու համար մեր ցաւակցութիւնը իրենց սոսկալի տառապանքին առթիւ: Կ'առաջարկեմ ձեզ ուրեմն հեռագիր մը դրկել Երեսանի Կառավարութեան, յանուն այս ժողովին: Աղէտքին լուրը

առնելուն պէս, Միութիւնը կարելին ըրաւ օգնութեան հասնելու համար աղէտեալներուն: Նախ անոնց յատկացուց իր բոլոր տրամադրելի գումարը, և նոյն հետայն հանգանակութեան ձեռնարկեց Ամերիկայի, Եգիպտոսի և Եվրոպայի մէջ, որուն արդիւնքը հետզհետէ Կառավարութեան պիտի յանձնուի»:⁶ Նման հանգանակություններ կազմակերպվեցին սիւնուքի բոլոր համայնքներում, ամենատարբեր կազմակերպությունների կողմից: Եվ այնուամենայնիվ, Միության մասնակցությունը առավել շոշափելի էր, և 1926թ. տեղեկագրում հասկանալի հպարտությամբ նշվում էր. «Հայաստանին Խորհրդարանին ներկայացուած հաշիվներուն համաձայն, ընդհանուր առմամբ մոտ կէս միլիոն րուպլի է հաւաքուած արտասահմանի մէջ»: Արդ, այդ գումարին մէջ, Բարեգործականի խողովակով եղած նուիրատուութիւնները աւելի քան 200.000 րուպլի կը հասնին, և եթէ հաշուի առնենք, որ արտասահմանի նուիրատութեանց ընդհանուր գումարին մէջ ամերիկեան Նիւ Իսթ Բըլիֆը իր խոշոր բաժինը ունի, կը տեսնուի թէ արտասահմանի հայութեան օժանդակութեան մէջ ինչքան գերակշիռ դեր կատարած էր Բարեգործական Միութիւնը»:⁷

Օիրակի երկրաշարժի հետեւանքով հետաձգված ներգաղթը վերսկսեց 1927թ. վերջին, երբ Հունաստանից և Կ.Պոլսից մոտ 1600 գաղթականներ ներգաղթեցին Հայաստան: Ներգաղթողները՝ ծնունդով Ատաբազարի, Բուրսայի և Սեբաստիայի շրջաններից, լինելով արհեստավորներ, շերամաբուծներ և այլն, առաջին իսկ օրից աշխատեցին իրենց մասնագիտությամբ: Սակայն նախնական համաձայնությունը ամբողջովին իրականացնել չհաջողվեց. «Ցաւալի է որ, հակառակ մեր հետապնդումներուն, կարելի չէ եղած փոխադրել Սուրիայէն եւս գաղթականներ, որով յուսախաբ մնացած են Քորփեցի, Հապուսցի և Կիրիցցի գաղթականները: Այս մասնայատուկ ներգաղթին համար եւս Ամերիկայէն մեզի տրամադրուած էր 7.427 տոլարի գումար մը, որուն մէկ մասը հարկադրուեցանք վերադարձնել»:⁸

1931թ. օգոստոսի 10-ին Հայաստանի իշխանությունները ընդունեցին «ՀԽՍՀ սահմանները արտասահմանի աշխատավոր հայերի մասսայական նոր ներգաղթ արտոնելու մասին» որոշումը, որից հետո ներգաղթը նոր թափ ստացավ: Համաձայն այդ որոշման, Հայաստանի ժողկոմխորհին առընթեր՝ Ար.Երզնկյանի գլխավորությամբ, ստեղծվեց ներգաղթի հատուկ հանձնաժողով, որին հանձնարարվում էր լուծել ներգաղթի հետ կապված բոլոր տեսակի հարցերը՝ ներգաղթողների թիվը, անցկացման ժամկետները, բնակության վայրը և այլն:⁹ Այդ օրերին Հայաստանի ժողկոմխորհի նախագահ Ս.Տեր-Գաբրիելյանը իր մի հարցազրույցում հատուկ ընդգծում էր. «Անշուշտ ներգաղթի դեպքում եւս լիովին իր գործա-

դրությունն է ունենալու խորհրդային իշխանության դասակարգային քաղաքականությունը: Խորհրդային Հայաստան կարող են գալ միայն իրապես աշխատավոր տարրերը, որոնք իրենց առաջ ազնվորեն նպատակ են դնում ձուլվել մեր երկրի ամբողջ աշխատավորությանը, ընդունելով ու գործադրելով արտադրության հանրային եղանակը, որն արագորեն ամրանում ու վերջնականապես հաստատվում է մեր ամբողջ երկրում»: Եվ հակառակը՝ «...միջազգային բանվորության հայրենիքում տեղ չեն կարող ունենալ Հայաստանի աշխատավորության և միջազգային բանվորական բանակի թշնամիները, արյունոտ իմպերիալիստների վարձկան՝ դաշնակցական թափփուկները»:¹⁰

Առավել ուշագրավ է այն հանգամանքը, որ խոսելով սփյուռքահայ կազմակերպությունների, նրանցից ակնկալվող ֆինանսական օժանդակության մասին՝ Հայաստանի կառավարության նախագահը հիշատակում է միայն հայրենակցական միությունները և ՀՕԿ-ը, բայց ոչ ՀԲԸ Միությունը: Նման մոտեցումը մի կազմակերպության հանդեպ, որը սկսած 1921թ. բազմաբնույթ գործունեություն էր ծավալել երկրում, պատահական չէր: Հայաստանի իշխանությունների տեսակետից Միությունը այդպես էլ չէր արդարացնում իրենց սպասելիքները՝ կապված ազգային-քաղաքական դիրքորոշման հետ, ավելին՝ այն համատորեն ձգտում էր պահպանել իր ինքնուրույնությունը և մերժում էր որևէ թելադրանք իր գործելակերպի հանդեպ: ՀԲԸ Միությունը, նրա ղեկավարությունը, անշուշտ, գիտակցում էին Հայաստանի այդպիսի, ոչ համարժեք վերաբերմունքը, բայց դա չազդեց երկրի վերաշինությանը ուղղված նրանց գործունեության վրա:

Հայաստանի իշխանությունների վերոհիշյալ որոշումից մեկ ամիս անց, տեղի ունեցավ Ա.Տեր-Գաբրիելյանի այցը Փարիզ, ինչը դրական ազդեցություն ունեցավ նոր ներգաղթի արագ կազմակերպման առումով: Թեև վարչապետը իր երեսնյան հարցազրույցում նույնիսկ չէր հիշատակել Բարեգործականի անունը, Փարիզ հասնելուն պես, նա առաջինը հանդիպեց Միության նախագահ Գ.Կյուլպենկյանի հետ, դրանով իսկ, կարծես, ընդունելով Միության կարեւորությունը: Բացի այդ, Հայաստանի ժողովմխորհի նախագահը հետագա օրերին մի քանի անգամ այցելեց Միության կենտրոնատեղին, ուր մանրամասն քննարկեց նախապատրաստվող ներգաղթի հետ կապված հարցերը: Վստահեցնելով, որ կառավարությունը որոշել է ընդունել 6.000 գաղթականներ Հունաստանից և Բուլղարիայից, որոնց համար արդեն ապահովված էին բնակարաններն ու աշխատատեղերը, վարչապետը միեւնույն ժամանակ իր համաձայնությունը սվեց ընդունել ևս 4.000 գաղթական, եթե արտասահմանի հա-

յությունը ֆինանսավորի նրանց համար բնակարանների կառուցումը Հայաստանում: Տունդարձի ճանապարհին Ա.Տեր-Գաբրիելյանը Բեռլինից հեռագրեց Երեսան. «Անմիջապես միջոցներ ձեռք առեք 6.000 ներգաղթողներ ընդունելու և տեղավորելու համար Ղոներում, Արթիկ-Տուֆում, Անի-Պեմզայում և Զորագետում: Միաժամանակ երկու հոգի ուղարկեցեք Աթենք ներգաղթի աշխատանքներն արագացնելու և ղեկավարելու»:¹¹

Այս հանդիպումներից հետո, ներգաղթը Հայաստան համարելով օրվա կարգախոս, Միությունը ծավալեց ակտիվ գործունեություն: 1931թ. սեպտեմբերի 30-ին Միության նախագահ Գ.Կյուլպենկյանը դիմեց սփյուռքահայությանը հատուկ կոչով, ուր ասվում էր. «Այն պահուն որ համաշխարհային տնտեսական տագնապը, օր է օր աւելի շեշտուելով, գաղութահայութեան կեանքին վրայ կը ճնշէր, Հայաստանի Կառավարութիւնը մասսայական ներգաղթի բարեղէպ որոշումովը կուգայ լայնօրէն բանալ մայր-հայրենիքին դուռները անտիրական և աստանդական գաղթականներուն առջե: 10.000 չքաւոր և գործազուրկ գաղթականներ քանի մը ամսուան միջոցին Հայաստան պիտի փոխադրուին. առաջին կարաւանին պիտի յաջորդեն ուրիշ խումբեր, քանի նիւթական կարելիութիւններ ստեղծուին: Ասիկա պատմական մեծ դէպք մըն է, որուն բարձր նշանակութիւնը ամէն հայ խորապէս կ'ըմբռնէ: Աւելորդ է ըսել որ թշուառութեան և անստուգութեան մատնուած հազարաւոր վտարանդի և հայրենաբաղձ հայրենակիցներու փրկութեան այս գործին ՀԲԸ Միութիւնը անվերապահօրէն կը լծուի:

«Յայտնի է նաեւ որ վերջերս համաձայնութիւն կայացուցած էինք Ժընէվի Գաղթ. Նախնեան Միջազգ. Պաշտօնատան հետ, որ կը գործէ Ազգերու Ընկերութեան հովանիին ներքեւ, մինչէ 1933 բնակարաններ ապահովելու, Պէլրոթի և Հալէպի նեխտ քէմբերուն փլուզումին հետեւանքով բոլորովին անապաստան 15.000 գաղթականներուն համար, յանձն առնելով իբրեւ հայկական մասնակցութիւն տրամադրել 10.000 ոսկիի գումար մը:

«Այս երկու մեծ ծրագիրները, որոնց շնորհիվ 25.000 գաղթականներ վաղընդփոյթ պիտի փրկուին, կը պահանջեն սակայն մեծ զոհողութիւններ... 25.000 գաղթականներու փրկութեան գործին համար կը նախատեսենք առնուազն 75.000 տոլարի գումար մը, որուն շուրջ մէկ երրորդը միայն կրցանք ապահովել. մնացեալին համար մեր յոյսը կը դնենք ամէն հայու օժանդակութեան վրայ. թո՛ղ ամէն ոք գիտակցի իր պարտականութեան և ի գին ամէն զոհողութեան սոյն կենսական գործերուն բերէ իր բաժինը, որքան ալ համեստ ըլլայ:

«Միութեանս մէն մի Մասնաճիւղը, ինչպէս նաեւ Բարիզի Ընդհ. Տնօրէնութիւնը, Նիւ Եորքի եւ Գաֆիորէի Օրջանակային Յանձնաժողովները, երախտագիտութեամբ պիտի ընդունին ունէ գումար գոր սրտցաւ հայրեճակիցներ եւ ազգանուէր կազմակերպութիւններ այս նպատակին համար պիտի փութան դնել մեր տրամադրութեան ներքեւ»:¹²

Հաշվի առնելով, որ ներգաղթի գործում գլխավոր դժվարությունը տեղափոխման միջոցների՝ շոգենավերի հարցն է, Միության վարչապետի Վ.Մալեզյանը ընկերակցությամբ Գաղթականների կենտրոնական հանձնաժողովի ընդհանուր քարտուղար Լ.Բաշայանի (նա միաժամանակ Միության պատվիրակն էր Ժնևում տեղակայված միջազգային կազմակերպություններում) ժնևում հանդիպումներ ունեցավ Բուլղարիայի եւ Հունաստանի վարչապետներ Ա.Մալինովի եւ Է.Վենիզելուսի հետ, որոնք խոստացան իրենց կառավարությունների օժանդակությունը շոգենավերը ձրի տրամադրելու գործում: Բանակցություններ տեղի ունեցան նաեւ Նանսենյան գրասենյակի, Կարմիր Խաչի եւ բարեսիրական այլ կազմակերպությունների հետ, որոնց արդյունքում հնարավոր դարձավ հաղթահարել հազարավոր գաղթականների փոխադրման հետ կապված մի շարք դժվարություններ:

1931թ. նոյեմբեր ամսին Աթենք է ժամանում Հայաստանի կառավարության լիազոր-պատվիրակ Դ. Շահվերդյանը, որը երեք տեսակի հարցարանների հիման վրա սկսում է կազմել ներգաղթել ցանկացողների նոր ցուցակներ: Դա, ինչպէս նաեւ նրա բանակցությունները Հունաստանի կառավարության եւ Խորհրդային Միության դեսպանատան հետ, պատճառ հանդիսացան, որ ներգաղթողների առաջին՝ իրենց իսկ բաւերով ասած, կարավանը մեկնի Պիրեայից դեկտեմբերի 30-ին միայն: Պայմանավորվածության համաձայն Հունաստանի կողմից ձրի տրամադրված նավի վրա էին 1923 գաղթականներ, ներառյալ ՀԲԸ Միության Բեյրութի, Նիկոսիայի եւ Երուսաղեմի հաստատությունների նախկին 135 որբ-սաները, ինչպէս նաեւ հապուցի գաղթականներ, որոնց տեղափոխության հետ կապված բոլոր ծախսերը հոգաց Միությունը: «Կանխահոգ բոլոր միջոցները ձեռք առնուած էին գաղթականներուն տեղաւորումին եւ պարենաւորումին համար,- նշվում էր Միության 1932թ. տեղեկագրում,- Նանսենեան օֆիսին ներկայացուցիչ Մ.Բոթելմիքոֆի եւ մեր պատուիրակին՝ Օճնիկ Թաղէօսեանի գործակցութեամբ, այդ երկու կազմակերպութիւնները ստանձնած ըլլալով բոլոր ծախքերը»:¹³ Խոսելով այս խմբի ներգաղթի կազմակերպման մասին՝ «Միութիւն» ամսագիրը հատուկ ընդգծում էր հունական իշխանությունների բարոյացական վերաբերմունքը. «Կարմիր Խաչերու Միջազգային Լիկան եւ մասնաւորաբար Հելլէն

Կարմիր Խաչը ցուց տուած են գնահատելի հոգածութիւն, մանուկներու համար յանձնելով 6.239 կտոր գործածուած հանդերձեղէն, 200 նոր հագուստ, 9 սնտուկ կաթ, իսկ չքաւոր գաղթականներու՝ 100 նոր վերարկու եւ 500 անկողնի ծածկոց: Սովիւթական Դեսպան Վ.Բոթելմքիւն եւ կինը, ինչպէս նաեւ Հայաստանի լիազոր քաղ. Շահվերտեան եւ օգնականը քաղ. Գարտաշեան, Միութեանս պատուիրակը Տ.Թաղէօսեան, հելլէն եւ օտար մամուլի ներկայացուցիչներ, կառավարական եւ ոստիկանական պաշտօնեաներ, եւ բազմաթիւ ազգայիններ շոգենաւ գացած էին ողջերթի համար»:¹⁴

Ներգաղթողների երկրորդ՝ 1250 գաղթականներից բաղկացած կարավանը նույն նավով մեկնեց 1932թ. փետրվարի 23-ին: «Ինչպէս առաջին անգամ, այս կարաւանին ալ Բիրէի մէջ ընծայուեցաւ ամէն օժանդակութիւն: Միջազգային Կարմիր Խաչի կողմէ անկողնի ծածկոցներ բաշխուեցան, եւ փոքրիկներուն համար եւս տուիւերով խոսացած կաթ: Գաղթականները ճամբայ ելան մեծ խանդավառութեամբ, շոգենաւին կամրջակին վրայէն երիցս գոռալով «Կեցցէ՛ Յունաստան, կեցցէ՛ Հայաստան»: Աւելորդ է ըսել թէ առաջին օրէն սկսեալ մեր Միութիւնը ներգաղթին համար ըրաւ ինչ որ կարելի էր, չի զլանալով իր բարոյական եւ նիւթական ամենալալս օժանդակութիւնը.- գրում էր «Միութիւնը»,- դժբախտաբար, անհկա միմակը մնաց, որպէս ազգային կազմակերպութիւն, տրամադրելու համար պէտք եղած դրամը այսքան ծանրահոգ ձեռնարկի մը յաջողութեան համար»:¹⁵

1932թ. ընթացքում Հայաստան մեկնեց եւս երկու կարավան՝ ապրիլի 25-ին՝ 1662 եւ հուլիսի 17-ին՝ 1550 գաղթականներով: Իսկ այս առաջին խմբի հինգերորդ եւ վերջին կարավանը մեկնեց Պիրեայից 1933թ. հունվարի 2-ին «Էլէնի Էմպերիքու»՝ այս անգամ արդեն վարձված շոգենավով, որի համար Միությունը վճարել էր 600 անգլ. ոսկի: Այս նավով, որը ճանապարհին կանգ առավ նաեւ Սալոնիկում եւ Բուրգասում, Հայաստան ներգաղթեց 1423 մարդ, որոնցից 96-ը՝ Ֆրանսիայից, 350-ը՝ Հունաստանից եւ 967-ը՝ Բուլղարիայից:¹⁶ «Միութիւն» ամսագիրը, նշելով, որ Բուլղարիայից մեկնող հայերը իրենց հետ որպէս նվեր Հայաստանին տանում էին «12 վակոն ատաղձ, 150 սնտուկ գամ եւ 6 օթօմոսիլ», գրում էր. «Պուլղարիոյ համեստ գաղութը ցնցող դաս մը կուտայ աւելի բախտաւոր գաղութներուն, որ տակաւին անշարժութեան մէջ գամուած կը մնան»:¹⁷

Հակառակ սպասվածի, սիյուոքահայության ֆինանսական օժանդակությունը 1931-1933թթ. ներգաղթին եղավ ոչ մեծ, ինչի հիմնական պատճառը Արեւմուտքի երկրներում շարունակվող ուժեղ տնտեսական

ճգնաժամն էր: «Դժբախտաբար միջազգային տեսակետով մեր Միությունը միևնույն ժամանակ, որպես ազգային կազմակերպություն, յատկացնելով պետք եղած դրամը այս ձեռնարկին յաջողության համար, երբ կ'ակնկալէր որ ուրիշ մարմիններ եւս, իր միջոցաւ կամ ուղղակի բերէին իրենց միջազգային մասնակցութիւնը»:¹⁸

Հաջող սկիզբ առած ներգաղթը, որի արդյունքում 1931թ. դեկտեմբերից մինչեւ 1933 հունվարը շուրջ 8.000 գաղթականներ ներգաղթեցին Հայաստան սակայն ընդհատվեց: Ի պատասխան Միության դիմումներին, Հայաստանի իշխանությունները ներգաղթի դադարեցումը պատճառաբանում էին անհրաժեշտ քանակությամբ բնակարանների բացակայությամբ եւ նորից հիշեցնում էին. «Բնակարանային շինութիւններու ի նպաստ արտասահմանեան բացառիկ օժանդակութիւն մը միայն կարող է մտաւոր ապագայի մէջ հնարաւորել ներգաղթի շարունակութիւնը, այլապէս ներգաղթը գէթ այս տարի հաւանական չէ»:¹⁹ Հայաստանի իշխանությունների նման դիրքորոշումը խիստ մտահոգիչ էր սփյուռքի համար: Տասնյակ հազարավոր գործազուրկ, ջքավոր եւ անտուն գաղթականներ պատրաստ էին անմիջապէս մեկնել Հայաստան, բայց ... Ստեղծված իրավիճակում Միությունը, հույս չդնելով ազգային այլ կազմակերպությունների, նոր հանգանակությունների վրա, 1933թ. Հայաստանի կառավարությանը ուղարկեց 5.000 անգլ. ոսկի «...բնակարաններու շինութեան համար, որպէսզի առ առաւել մինչեւ վեց ամիս վերջը գէթ 2.500 գաղթականներու փոխադրութիւնը ապահովուի ... ՀԲԸ Միութիւնը այս քայլը առաւ այն վստահութեամբ որ Հայաստանի կառավարութիւնը իր բարեացակամութեան նոր եւ հզօր ապացոյցը պիտի տայ՝ սոյն առթիւ ալ վեհանձնօրէն ընդունելով քանի մը հազար գաղթականներ որ փրկութեան ուրիշ միջոց չունին»:²⁰ Միության այս քայլին հետեւեց Հայաստանի իշխանությունների մի նոր անակ-բացատրությունը, ապա նորից Միության դիմումը ներգաղթը արագացնելու խնդրանքով, եւ այսպէս, ամիսներ շարունակ:

Այն հանգամանքը, որ Հայաստանի կառավարությունը ներգաղթի հարցով դիմում էր հատկապէս ՀԲԸ Միությանը, վկայում էր, որ չնայած բոլոր վերապահումներին, խորհրդային իշխանությունները այնուամենայնիւ Միությունը դիտում էին որպէս սփյուռքի միակ հեղինակավոր կազմակերպությունը, որը իր հնարավորությունների սահմաններում ամեն կերպ նպաստում էր ներգաղթի իրականացմանը: Նույն պէս էր ընկալվում Միությունը եւ սփյուռքում՝ Հայաստան ներգաղթելու խնդրանքով նրան էին դիմում հազարավոր մարդիկ եւ հենց նրան էին ուղղվում բոլոր տեսակի բողոքները՝ իրենց ծայրահեղ դրսևորումներով: Այդպիսի մի

դեպք արձանագրվել էր 1932թ. «Անգործութեան եւ թշուառութեան հետեւանքով գերագրգռուած գաղթականներ եւ մասնաւորապէս որբեր, Մակեդոնիոյ շրջաններէն Սելանիկ խուժած էին, հակառակ քանիցս հրատարակուած զանազան յայտարարութեանց թէ՛ ոչ ոք պէտք է տեղէն շարժի, անոնք իրենց անվերջ դիմումներով անտանելի դարձուցած են Ազգ. Վարչութեան եւ Միութեան մասնաժողովի վարիչներուն դիրքը: Ատոնցմէ գլխաւորաբար 140 «չափահաս որբեր» Աթէնք երթալով հոն շարունակած են իրենց պահանջները ներկայացնել, աւելի խստօրէն, այնպէս որ Սելանիկի եւ Աթէնքի մէջ եղած յարձակումներէն սահմոկողները հրաժարած են իրենց ազգային պաշտօններէն: Փութացիք հեռագրել Աթէնքի մեր ներկայացուցիչներուն որ այդ որբերը առժամաբար պատուպարուին Միութեան կողմէ»:²¹

Օտտ ավելի մտահոգիչ էին, սակայն, դեպքերը Հայաստանում, որոնց մասին Միությանը տեղեկացնում էր Ա.Տեր-Գաբրիելյանը իր 1933թ. սեպտեմբերի 4-ի նամակով. «...32-33 թվերին ներգաղթողների մեջ եղան առանձին տարրեր, որոնք... դեռեւս չեն կարողացել կամ ցանկացել կապվել ու հարմարվել իրենց տրամադրված աշխատանքներին, գերադասում են հաճախակի փոխել աշխատանքի վայրը, մեկ ավանից մյուսն անցնել: Հիշյալ տարրերը բացառապէս այն շերտերից են, որոնք վերջին տարիների ընթացքում արտասահմանում կտրված են եղել արտադրական աշխատանքից, զբաղվել են մանր առևտրով... մարդիկ, որոնց մեջ խոր արմատներ է թողել նպաստը նկատի հոգեբանությունը»: Եվ ամենակարեւորը՝ «Հայաստանից փախուստ տալու մի քանի դեպքերը... այս շրջաններից են դուրս եկել»:²² Մինչդեռ, նշված դեպքերի իրական պատճառներն այլ էին: Ներգաղթի պատմությանը նվիրած իր մենագրության մեջ Հ.Մելիքսեյանը հատուկ նշում էր ներգաղթածների «նյութական եւ կենցաղային վատ պայմանները», պետական հիմնարկությունների «ոչ հոգատար, բյուրոկրատական» վերաբերմունքը նրանց կարիքների նկատմամբ եւ այլն: Նման երեւոյթների համատարած բնույթի մասին է վկայում այն փաստը, որ նույն՝ 1933թ. սեպտեմբերի 21-ին (այսինքն, Ա.Տեր-Գաբրիելյանի նամակից մոտ երկու շաբաթ անց) Հայաստանի կոմկուսի կենտրոնի քարտուղարությունը հատուկ քննարկման առարկա է դարձնում «Ներգաղթածների դրության եւ նրանց հետ տարվող աշխատանքների մասին» հարցը: Ընդունված որոշման մեջ խիստ քննադատության էին ենթարկվել մի շարք կենտրոնական եւ տեղական կառավարման մարմիններ՝ նախապէս ընդունված որոշումները չիրագործելու համար: Որոշումով ստեղծվում էր ներգաղթածների շրջանում աշխատանքի հատուկ կոմիտե, իսկ կառավարությունից պահանջվում էր «արագացնել

հայրենադարձների բնակարանային շինարարությունը, բարելավել նրանց բժշկական սպասարկումը, օգնել հագուստեղենով ու կոշիկներով, դպրոցահասակ բոլոր երեխաներին ընդգրկել դպրոցներում... »²³ և այլն:

Խորհրդային Հայաստանի իշխանությունների համար տեղի էր ունենում անսպասելի և որոշ իմաստով անհասկանալի մի երևույթ: Մարդիկ, որ ինքնակամ, մեծ ոգևորությամբ ներգաղթել էին երկիր, կարճ ժամանակ անց սկսում էին արտահայտել իրենց հստակ դժգոհությունը կյանքի պայմաններից: Սպասվում էր, որ նրանց ծանր վիճակը մինչ այդ ապաստանած երկրներում, կթելադրի նրանց առնվազն հաշտվել Հայաստանում տիրող պայմանների հետ: Ներգաղթածների մի զգալի մասը, սակայն, չէր ցանկանում հաշտվել սոցիալական անարդարության, անձնական նախաձեռնության սահմանափակումների, բազմաթիվ պարտադրանքների, արգելքների և նմանատիպ այլ երևույթների հետ, որոնք խորհրդային կարգերի հաստատումից հետո անցած շուրջ 10 տարիների ընթացքում տեղի բնակչության համար արդեն դարձել էին եթե ոչ բնական, ապա անխուսափելի: Ներգաղթածների կամ «նորեկների» մասն տրամադրությունները և դիրքորոշումները ինքնին անցանկալի էին իշխանությունների համար, բայց առավել վտանգավոր էր դրանց տարածումը հիմնական ազգաբնակչության շրջանում, ինչը հղի էր հասարակության մեջ սոցիալ-քաղաքական լարվածության սպառնալիքով: Հայաստանի խորհրդային իշխանությունները անշուշտ գիտակցում էին այդ վտանգը, ինչի վկայությունն են վերոհիշյալ և նման այլ որոշումները, որոնք նպատակ ունեին բավարարել ներգաղթածների միայն ամենատարրական պահանջները և ոչ ավելին: Բայց նույնիսկ այդ մասնակի խնդրի լուծումը դառնում էր գրեթե անլուծելի, հաշվի առնելով երկրի տնտեսական ծանր վիճակը: Նման պայմաններում Հայաստանի իշխանությունները նպատակահարմար համարեցին պարզապես հետաձգել հետագա ներգաղթը և սահմանափակել ներգաղթողների թիվը:

Ներգաղթը վերսկսելու վերաբերյալ Միության դիմումները Հայաստանի կառավարությանը չէին դադարում, ավելին, Միությունը այդ նույն նպատակով ուղղակի կապ հաստատեց նաև ժնեում Խորհրդային Միության պատվիրակության անդամների հետ: 1934թ. Միության ընդհանուր ժողովին ներկայացված հաշվետվության մեջ նշվում էր. «...Մեզի հաղորդուեցաւ թէ ժընէվի Խորհրդային պատուիրակները յայտարարած են թէ Խ.Միութեան կեդր. Կառավարութիւնը սկզբունքով համամիտ է հայերու Խ.Հայաստան ներգաղթին, բայց չի կրնար միջակայս օժանդակութիւն ընծայել»:²⁴ Նոյն տարվա դեկտեմբերի վերջին Ա.Տեր-Գաբրիելյանին դիմեց ՀԲԸ Միության նորընտիր նախագահ՝ հանգուցյալ Պողոս

Նուպարի որդի Զարեհ Նուպարը: «Պատիւ ունիմ,- գրում էր նա,- ներկայ գրութեամբ պարզելու տխուր վիճակը գաղութահայ աշխատաորներուն, որ մինչև ցարդ կրցած էին իրենց յուսահատ աշխատանքով դիմագրաւել համաշխարհային տնտեսական տագնապին դժուարութեանց, բայց գանազան երկիրներու և մինչև իսկ Ֆրանսայի մէջ վերջերս գործադրուած հակաօտարական օրէնքներուն խստութեան տակ ծանր ճնշումներու ենթարկուած են, այնպէս որ անկանոն թուղթեր ունեցողները կը վտարուին, իսկ աշխատելու արտօնութիւն ունեցողներն իսկ մեծ մասամբ կը զրկուին աշխատելու տարրական իրաւունքէն»: Այնուհետև, բարձր գնահատելով Հայաստանի կառավարության բարյացակամությունը ներգաղթի հարցում և նշելով, որ իրավազուրկների համար միայն հայրենիքում կարող են ստեղծվել լավագույն հնարավորություններ, Զարեհ Նուպարը գրում էր. «Ուստի և թախանձագին կը խնդրենք, յարգելի Նախագահ, որ գարնան առաջին օրերուն իսկ քանի մը հազար աշխատաորներու առջև լայն բանաք Խ. Հայաստանի դուռները, և այս մասին ժողկոմխորհի բարեհաճ որոշումն ու կարգադրութիւնները այժմէն իսկ ազնուութիւնը ունենաք մեզի հաղորդելու, որպէսզի ըստ այնմ նախապատրաստական աշխատութիւնները կատարենք և փոխադրութեան ծախքերը տրամադրենք»: Եվ ապա. «Նկատելով որ ներգաղթի հարցը պետական և նոյն իսկ միջազգային հանգամանք ունի, քանի որ Ազգերու Ընկերութեան Ընդհ. Ժողովը ամէն տարի կը քուէարկէ հայերու ներգաղթի բանաձեւ մը, վերջերս մեր յանձնարարութեամբ մեր ժընէվի պատուիրակը տեսակցութիւններ ունեցած է այդ խնդրոյն մկատմամբ Խորհրդային Միութեան պատուիրակներուն հետ, որ խոստացած են Մոսքուայի մէջ հարցը դնել պետութեան սեղանին վրայ, վճռական լուծում մը հետապնդելու համար»:²⁵ Նույն հարցով Զարեհ Նուպարը դիմեց նաև հաջորդ՝ 1935թ. սկզբին Հայաստանի ժողկոմխորհրդի նոր նախագահ Ա.Գուլյանին, բայց միայն աշնանը Երևանից Փարիզ ժամանեց Դ.Ծահվերդյանը՝ ֆրանսահայերի ներգաղթը իրականացնելու նպատակով:

Հայաստանի իշխանությունները պաշտոնապես հայտարարել էին, որ պատրաստ են ընդունել 1.200 գործազուրկ հայ գաղթականներ Ֆրանսիայից, մինչդեռ, ցանկացողների թիվը շուրջ 7.000 էր: Այդ պայմաններում Դ.Ծահվերդյանը որոշում է անձամբ կատարել ընտրությունը, որի արդյունքում զգալի ուշացումով վերջապես կազմվեց 1.800 մեկնողների ցուցակը: Ինչպես և ներգաղթի նախորդ ձեռնարկների ժամանակ, Միությունը այս անգամ նույնպես օժանդակեց ներգաղթին, տրամադրելով 2.000 անգլ. ոսկի: Բացի այդ, իր բարձր հեղինակության շնորհիվ նա ապահովեց պաշտոնական շրջանակների աջակցությունը: Մասնավորա-

պես, նրա խնդրանքով Ժնևի Նանսենյան գրասենյակի նախագահ Հանսոնը երկու անգամ ժամանեց Փարիզ և երկրի վարչապետ Ա. Սարոյի հետ քննարկեց ներգաղթի հետ կապված հարցերը: ՀԲԸ Միության ջանքերի շնորհիվ ապրիլի 17-ին Ֆրանսիայի Արտաքին գործերի նախարարությունում Աշխատանքի ընդհանուր տնօրեն Բիքնարի նախագահությամբ գումարված ժողովում համաձայնություն կնքվեց ֆրանսիական կառավարության, Նանսենյան գրասենյակի և ՀԲԸ Միության միջև: «Այդ օրը... մեր Վարիչ-Պատուիրակը յայտարարեց թե ՀԲԸ Միությունը կը ստանձնէ աշխատատեղ չարձանագրուած ներգաղթողներուն շոգեկառքի ծախքը մինչև Մարտչը, անխտիր բոլոր գաղթականներուն գոյքերուն մինչև շոգենաւ փոխադրութիւնը, նաւուն վրայ բոլոր ներգաղթողներուն տասնօրեայ տաք սնունդի և յաւելուածական պարենատրումի (մանուկներու և հիւանդներու համար) ամբողջական ծախքերը: ...Հոգացինք նաև ողբ. Կոմիտաս վարդապետի դագաղին փոխադրութեան ծախքերը, որոշուած ըլլալով մեծանուն երաժշտագէտին աճիւնը ներգաղթողներուն հետ դրկել Հայաստան: ...Նկատի ունենալով ներգաղթողներէն ոմանց չքատրութիւնը, Միութեանս կողմէ անհատական նպաստներ եւ տրամադրուեցան, գլխաւորաբար մտատրականներուն»: 26 1936թ. մայիսի 9-ին Մարտչի նավահանգստից դեպի Հայաստան մեկնեց «Սինայա» շոգենավը՝ իր հետ տանելով 1.801 ներգաղթողներ Ֆրանսիայից:

1936թ. ներգաղթածների ընդունումն ու տեղավորումը նախորդ տարիների նման ընթացում էին բազմապիսի դժվարություններով: Հոկտեմբեր ամսին ՀՕԿ-ի նախագահ Ա.Եսայանը Հայաստանի Կոմկուսի նոր ղեկավար Ա.Ամատունուն հասցեագրած նամակում գրում էր. «Ֆրանսիայից ներգաղթած 1.800 իմմիգրանտներին աշխատանքի տեղավորելու համար թեև կառավարական հատուկ հանձնաժողով էր ընտրված, բայց այդ աշխատանքի ամբողջ ծանրությունը փաստորեն ընկած է եղել ՀՕԿ-ի վրա: Համարյա բոլոր ներգաղթածները գործ ստացան այս կամ այն հիմնարկներում: Ներկայումս, նրանցից մի մասը զանազան պատճառներով գրկվել է աշխատանքից և նորից դիմում է ՀՕԿ-ին, խնդրելով, երբեմն նույնիսկ պահանջելով, որ իրենց համապատասխան գործ տրվի: Նկատի առնելով իմմիգրանտների շրջանում անգործության բավական լուրջ տոկոս կազմելը և նրանց մեծ մասի դեռևս մեր պայմաններին անծանոթ լինելը, ցանկալի է, որ ...3-4 ամիս մի որեւիցե պետական հիմնարկ կամ պրոֆեսիոնալ կազմակերպություն օգնեն՝ նրանց համար աշխատանք ճարելու»: 27

Կոմիտասի աճյունի փոխադրումը կազմակերպելիս, ՀԲԸ Միության ղեկավարները դժվար թե պատկերացնեին, որ այդ հարցը քննարկման

առարկա էր դարձել Խորհրդային Միության կուսակցական-պետական մարմիններում: Բանն այն էր, որ այդ տեղափոխումը իրականացնելու համար Հայաստանի իշխանությունները նախապես պետք է ստանային Անդրերկրկոմի համաձայնությունը: Հայաստանի Կոմկուսի առաջնորդ Ա.Խանջյանը, ըստ երեւույթին, ենթադրելով Լ.Բերիայի ժխտական պատասխանը, դիմում է նրան միայն մայիսի 10-ին: Տեղեկացնելով Լ.Բերիային, որ ներգաղթողները նավով արդեն դուրս են եկել Մարտչից և իրենց հետ բերում են Կոմիտասի դագաղը, Ա.Խանջյանը, կանխելով նրա բացասական հակազդումը, գրում էր. «...թեև նավի մեկնելու նախօրեին մենք Երեւանից ՀՕԿ-ի միջոցով հեռագրել էինք նրան (Գ.Ծախվերդյանին-Էդ.Մ.) առաջմ հետաձգել այդ գործը: Նավը Բաթումում կլինի ս.թ. մայիսի 17-19-ին: Ստեղծված պայմաններում հարցի միակ նպատակահարմար լուծումը կլինի թույլատրել կազմակերպել Կոմիտասի թաղումը Երեւանում Հայաստանի խորհրդային կոմպոզիտորների միության գծով»: 28 Նման իրավիճակում Լ.Բերիան ստիպված էր սույ իր համաձայնությունը:

ՀԲԸ Միությունը և ՀՕԿ-ը

1930-ականների ներգաղթը, համազգային նշանակություն ունեցող իրադարձություն լինելուց զատ, միեւնոյն ժամանակ կարևոր դեր խաղաց նրա կազմակերպմանը մասնակից բոլոր կողմերի համար թե նրանցից յուրաքանչյուրի կարողությունների ճիշտ գնահատման և թե նրանց փոխհարաբերությունների հստակեցման առումով: Այդ իմաստով ուշագրավ են ՀԲԸ Միության հարաբերությունները ՀՕԿ-ի հետ: ՀՕԿ-ը հիմնվել էր Հայաստանի խորհրդային իշխանությունների կողմից դեռ 1921թ. վերջերին, և նրա սկզբնական նպատակն էր ապահովել և կազմակերպել արտասահմանի հայության օգնությունը Հայաստանի սովյալ բնակչությանը, նրա օժանդակությունը երկրի զարգացմանը: Ծատ շուտով, սակայն, ՀՕԿ-ի արտասահմանյան մասնաճյուղերը դարձան սփյուռքում Հայաստանի Կոմկուսի քաղաքականության իրագործման հիմնական միջոցը: Ղեկավարվելով Երեւանից ստացած ցուցումներով՝ նրանք փորձեցին տարածել կոմունիստական գաղափարները սփյուռքահայության մեջ և պայքար ծավալեցին սփյուռքի բոլոր կարևոր ազգային կազմակերպությունների դեմ: Վայելելով Հայաստանի իշխանությունների վստահությունն ու աջակցությունը և ձգտելով պահպանել իրենց մենաշնորհը՝ ՀՕԿ-ի ղեկավարները արտասահմանում անհաշտ աչքով էին նայում

նույն այդ իշխանությունների շփումներին այլ կազմակերպությունների և նույնիսկ անհատների հետ: Բնական է, որ նրանք առավել անհանդուրժողական կեցվածք էին դրսևորում ՀԲԸ Միության՝ իրենց որակումով «հայ բուրժուական» կազմակերպության հետ Հայաստանի իշխանությունների համագործակցության հանդեպ, ջանում էին վարկաբեկել այն իրենց հրապարակային ելույթներում և մամուլում, ինչպես նաև Երեւան հիւանդ գրություններում:

ՀՕԿ-ի՝ ՀԲԸ Միության դեմ պայքարի յուրահատուկ միջոցներից էր վերջինի կողմից Հայաստանում իրականացվող ծրագրերը իրեն վերագրելը կամ յուրացնելը: 1927թ. համարներից մեկում «Միություն» ամսագիրը գրում էր. «Նիւ Եորքի «Բանոր»-ի, որ Ամերիկայի ՀՕԿ-ի Կեդր. Վարչության հրատարակությունն է, առաջին թիվն մէջ յօդուած մը կայ որ կ'ըսէ թէ Հայաստանի Նոր Եվրոպիա գաղութը ՀՕԿ-ի ջանքերով հիմնուած է»: Այդպիսի յայտարարութիւն մը կը զարմացնէ մեզ և մենք պարտականութիւն ունինք զայն ուղղելու: Արդարութեան և երախտագիտութեան զգացումէն մղուած, չենք կրնար չյիշել թէ հանգուցեալ Գրիգոր Մ'տօթեմետեանի Բարեգործական Ընդհանուր Միութեան ըրած կտակին շնորհիւ է որ կարելի եղաւ այդ գիւղը հիմնել Հայաստանի մէջ: Միեւնոյն թիւին մէջ, «Բանոր» կ'ըսէ թէ «ՀՕԿ-ը 25.000 տոլարէ աւելի գումար մը տրամադրած է Հայաստանի կառավարութեան, օգնելու համար այն ճահիճներու չորացման, որոնց պատճառաւ ժողովուրդը կը մեղուէր մալարիալէ», և թէ «ՀՕԿ-ի միջոցաւ Հայաստանի մէջ իրագործուած են կարգ մը կտակներ»: Պարտք կը համարինք ի վեր հանել թէ յիշեալ 25.000 տոլարին 15.000 տոլարը Բարեգործական Միութեան կողմէ տրուեցաւ իբր արդիւնք իր առ այդ բացած մասնաւոր հանգանակութեան, և թէ յիշուած կտակները Միութեան եղած կտակներն են, զորոնք Միութիւնը Հայաստան փոխադրեց»: 29 Հարկ է նշել, որ ՀՕԿ-ի մամուլում կայ յուրացումները հետագայում քաղաքացիություն ստացան խորհրդահայ պատմագրության մէջ: Այսպես, Հ.Մ'ելիքսեթյանը իր վերը հիշատակած գրքում նույն Նոր Եվրոպիա գյուղից բացի, ՀՕԿ-ին է վերագրում նաև Մարի Նուպար ակնաբուժարանը, բնական է, չհիշատակելով վերջինիս անվանումը: 30

Իր այդ գործելակերպը ՀՕԿ-ը առավել մեծ չափով կիրառեց 1930-ականների ներգաղթի ընթացքում, երբ, մի կողմից մեղադրում էր ՀԲԸ Միությանը, որ չի նպաստում, չի օժանդակում ներգաղթին, իսկ մյուս կողմից՝ Միության գործունեությունը անտեսում կամ էլ փորձում էր վերագրել իրեն: 1932թ. դեկտեմբերին Վ. Մալեգյանը Միության Մարտելի մասնաժողովին հիւանդ նամակում գրում էր. «Մեր փափագն է որ բոլոր այն ներգաղթողները որոնց համար ՀԲԸ Միութիւնը կը վճարէ անցագրի,

վիզայի, երկաթուղիի, նաւատմսի և պարենագինի ծախքերը, պատշաճ եղանակով մը հասկնան այս բանը, որովհետեւ ՀՕԿ-ը կը ջանայ միշտ իւրացնել Միութեան զոհողութիւնները, այնպէս որ մեկնող գաղթականները կը կարծեն որ Միութիւնս ունիցէ նիւթական ձեռնտուութիւն չէ ըրած իրենց համար և ՀՕԿ-ն է որ կը հոգայ իրենց ծախքերը, մինչդէռ բացարձակ իրողութիւն է որ ՀՕԿ-ը ոչ մէկ ծախք ըրած է և կ'ընէ, այլ միայն գաղթականներուն արձանագրութեամբ, քննութեամբ և անցագիրներու ձեւակերպութեամբ զբաղած է»: 31 Ներգաղթի տարիներին ՀՕԿ-ի նման գործելաճը, որի նպատակն էր հնարավորին չափ բարձրացնել իր վարկանիշը սփյուռքում, այն չափերի էր հասել, որ ՀԲԸ Միության ղեկավարները ստիպված էին դիմել Երեւան: 1934թ. հունիսի 4-ին Հ.Գարակոչյանին հասցեագրած նամակում Վ.Մալեգյանը գրում էր. «Բայց ժամանակն է որ այլևս հարց ընենք թէ կարելի չէ՞ որ Երեւանի Գլխաւոր Վարչութիւնը լրջօրէն հակազդէ ՀՕԿ-ի տաք գլուխ վարիչներէ ոմանց շղթայազերծած ամբոխավարութեան, որուն յաճախ կ'ենթարկուի ՀԲԸ Միութիւնը, իրենց գրաւած բեմերէն և թերթերէն (որոնց գերատիպարն է Նիւ Եորքի «Բանոր» լրագիրը) անոր հասցէին ուղղելով յաճախ զգուելի յարձակողականներ: Այդպիսիները կը կարծեն որ աչ ու ձախ զարնելով, զարնելով մինչև իսկ ուժգնապէս ՀԲԸ Միութեան, հաճելի կը դառնան Երեւանի ղեկավար շրջանակներուն մէջ:

«Այս հարցերու մասին առիթ ունեցած ենք յաճախ սրտցաւօրէն տեսակցել քաղ. Վարդանեանի (ՀՕԿ-ի Գլխավոր վարչության նախագահ-էդ.Մ.) հետ, որ բարեսցակամօրէն մեզի հաւաստիքներ տուած է թէ ատոնք վերջացած են այլևս և պէտք եղած յանդիմանութիւնները ուղղուած են այդպիսի վայրահաջներու, որոնց գործածած լեզուն և ուղղութիւնը բնաւ չի տարբերի իրենց և մեր, և առհասարակ Հայաստանի ոխերիմ հակառակորդներու ոճէն ու ոգիէն (խոսքը Դաշնակցության մասին է-էդ.Մ.), այնպէս որ իրականին մէջ ատոնց միայն ծառայած կ'ըլլան եղբայրաբար, միւս կողմէն վհատութիւն յառաջ բերելով մեր կազմակերպութեան և առհասարակ Հայաստանի բարեկամներու մէջ»: 32 Սակայն, իրականում ՀՕԿ-ի նախագահի դիրքորոշումը Միության նկատմամբ այլ էր: Հայաստանում Միության ներկայացուցիչ Հ.Գարակոչյանի խոսքերով Գ.Վարդանյանը «...«Բարեգործականի» գծով որեւէ աշխատանք չէր տանում և, որքան ինձ հայտնի է, դեմ էր այդ Միությանը և ձգտում էր արտասահմանում առաջնակարգ կազմակերպություն դարձնել ՀՕԿ-ը»: 33

Բայց ահա, 1933թ. հուլիսին Միությունը ընդունեց նույն Գ.Վարդանյանի առաջարկը և ՀՕԿ-ի հետ հիմնեց «Ներգաղթի ֆոնտի կեդրոնական մարմին», որի նախագահ ընտրվեց ՀԲԸ Միության նախագահ Զա-

րեճ Նուպարը, իսկ անդամներն էին Միության կողմից Լ.Կյումուշկերտանը եւ Վ.Մալեզյանը, ինչպես նաեւ Ավ.Խասակյանը, Գ.Թահմիզյանը եւ Հ.Գալճյանը՝ ՀՕԿ-ի կողմից: Նորակազմ մարմնի նպատակն էր՝ սփյուռքում կազմակերպել ժողովրդային հանգանակություն, Խորհրդային Հայաստանում բնակարանային շինարարությանը նպաստելու եւ այդպիսով զանգվածային ներգաղթը արագացնելու համար:

ՀԲԸ Միությունը, ստանալով այդ առաջարկը, կանգնեց դժվարին երկընտրանքի առջեւ: Այդ տարիներին ՀՕԿ-ը դարձել էր պրոկոմունիստական, պրոխորհրդային քարոզչությամբ զբաղվող մի կազմակերպություն եւ որպես այդպիսին, քաղաքականապես անբարեհույս էր գրեթե բոլոր երկրների իշխանությունների համար: ՀՕԿ-ի մասնաճյուղերի գործունեությունը արգելվել էր Եգիպտոսում, Հունաստանում, Սիրիայում, Արգենտինայում եւ այլ երկրներում: Բուլղարիայում ՀՕԿ-ի տեղական կազմակերպության նախկին վարիչ-քարտուղար Մ.Խաչիկյանը իր նամակներից մեկում, հայտնելով մասնաճյուղի լուծարման մասին, մեջբերում էր բուլղարական կառավարության տեսակետը, ըստ որի, համահուկյան շարժումը «ըլլալով համայնավարական շարժման մէկ ձեւը, անբաղձելի է Պուլկարիոյ համար»:³⁴ ՀՕԿ-ի մասնաճյուղերի վերջնական հեղինակագրկմանը նպաստեցին նաեւ ներսում տեղի ունեցող պատակտումներն ու մատնությունները, որոնց պատճառն էր «ինքզինքնին ցոյց տալ աւելի կարմիր քան ամէնէն հաւատարո համայնավարները»: Եվ պատահական չէր, որ որոշ երկրներում, օրինակ, Սիրիայում, Ֆրանսիայում, որպէս հետեւանք ՀՕԿ-ի հետ համագործակցության, Միությունը ակամա հայտնվեց իշխանությունների անցանկալի ուշադրության կենտրոնում: Մեկ այլ հետեւանքն էլ եղավ այն, որ, օգտվելով առիթից, որոշ ազգային կազմակերպություններ՝ նախ եւ առաջ Դաշնակցությունը, անբաստանեց Միությանը խորհրդային իշխանությունների հետ գործակցության, քաղաքական պատվեր կատարելու մեջ: Հայտնի էր նաեւ, որ սփյուռքահայերի հիմնական զանգվածը, առավել եւս նրանց տնտեսապես քիչ թե շատ ապահով շերտերի համար, որոնք էլ ՀԲԸ Միության անդամներն ու համակիրներն էին, ՀՕԿ-ը խորթ, ապագային մի կազմակերպություն էր: Նրանց համար հատկապես անհասկանալի եւ անընդունելի էր թվում Միության ղեկավարության համաձայնությունը Գ.Վարդանյանի առաջարկին:

Այս ամենի հետ մեկտեղ, Միությունը ստիպված էր հաշվի առնել այն իրողությունը, որ ի դեմս Գ.Վարդանյանի, գործ ուներ ոչ միայն եւ ոչ այնքան ՀՕԿ-ի Գլխավոր վարչության, որքան Խորհրդային Հայաստանի վերին իշխանության հետ: Նման պարագաներում, մերժելով վերջինի

առաջարկած համագործակցությունը, Միությունը վստահում էր թե իր ակտիվ մասնակցությունը ներգաղթի գործում, թե Հայաստանում իր ծրագրերի իրականացման հաջող ընթացքը եւ թե ընդհանրապես ներգաղթի արագ վերականգն հնարավորությունները: Միտիթարվելով ՀՕԿ-ի հետ համագործակցության ժամանակավոր բնույթով՝ Միությունը հույս ուներ նաեւ, որ դրանով իսկ վերջ կդրվի անտեղի մրցակցությանը հանգանակությունների կազմակերպման ընթացքում եւ որ ՀՕԿ-ը պարտադրված կլինի գոնե դադարեցնել պայքարը ՀԲԸ Միության դեմ:

Միության հույսերը, սակայն, չարդարացան: Նախ, ինչպես եւ կանխագույժ էր, հայտարարված հանգանակության արդյունքները դժվար էր բավարար համարել: Փոփոխություն չկրեց նաեւ ՀՕԿ-ի գործելակերպը, ինչի մասին Վ.Մալեզյանը դառնությամբ գրում էր Երեւան հղած իր մի շարք նամակներում: Հ.Գարակյոզյանին հասցեագրած 1935թ. հունիսի 7-ի նամակում, խոսելով ՀՕԿ-ի Փարիզի կենտրոնական վարչության մասին, նա նշում էր. «...հաւաստիքներ կուտան թէ ՀՕԿ-ի անդամներուն է որ առաջնութիւն պիտի տրուի ներգաղթի պահում: Այս առթիւ ցաւ ի սիրտ կը յայտնենք թէ Յունաստանի եւ Պուլկարիոյ ՀՕԿ-երու վկայութեան վրայ հիմնուելով քաղ.Ծառիվերտեան կը կատարէր իր նախընտրանքը, եւ սակայն լաւագոյն տարրերը չէ որ կը կազմեն միշտ ՀՕԿ-ի շարքերը, եւ շատեր այդ անունը օգտագործելու համար կ'անդամակցեն անոր: Ահա թէ ինչով կրնայ բացատրուիլ, գրեթէ, այն յուսախաբութիւնը գոր կատարութիւնը կրեց ներգաղթողներուն մէջ տեսնելով բազմաթիւ անարժաններ որ յանձնարարուած էին որպէս ՀՕԿ-ի անդամներ եւ Հայաստանի բարեկամներ»:³⁵ 1936թ. մայիսի 15-ին Դ.Ծառիվերդյանին ուղղած իր նամակում Վ.Մալեզյանը նշում էր. «Բիչ չէ, արդարեւ, թիւը արձանագրութիւններու որ կը գանգատին, փաստարկութիւններով, թէ իրենց ներգաղթի խնդրանքին հետեւանք չէ տրուած, ՀՕԿ-ի տեղական վարիչներու անբարեացական վկայութեանց վրայ, պարզապէս այն պատճառաւ որ ՀՕԿ-ի անդամ չեն, կամ անդամագրուած ըլլալով վերջերս բողոքած կամ հեռացած են, եւ կամ ուրիշներուն մման չեն կրցած ՀՕԿ-ի նուիրատուութիւն մը ընել, ներգաղթի համար: ...Ծատերու տպաւորութիւնն է որ ընդհանրապէս ներգաղթի գործը կազմակերպուած է եւ կը կարգադրուի այնպէս որպէս թէ ըլլայ ՀՕԿ-ի ձեռնարկ: ...Ներգաղթի իրաւունք ձեռք բերելու յոյսով յանախ ՀՕԿ-ին կ'անդամագրուին եւ կամ որպէսզի նախընտրելի նկատուին կը թելադրուին նուէրներ ընելու: Անտարակոյս,- նկատում էր Վ.Մալեզյանը,- այդպիսի դիտողութեանց բնաւ տեղի պիտի չի տրուէր եթէ ներգաղթը կազմակերպուէր որպէս պետական գործ...»:³⁶

Մեկ այլ՝ ՀՕԿ-ի Գլխավոր վարչության նոր նախագահ Ա.Եսայանին հասցեագրած նամակում Վ.Մալեզյանը ավելի հստակ է արտահայտում Միության դիրքորոշումը. «...ներգաղթին որպես ՀՕԿ-ի ձեռնարկ, եւ ոչ թե պետական ձեռնարկ կատարուելուն երբեք չենք կրնար մեր համամտութիւնը յայտնել, որովհետեւ չենք կրնար ընդունիլ որ ներգաղթը ըլլայ այս կամ այն կազմակերպութեան բրոքերական տի եւ ազդեցութեան միջոց մը, այլ միայն եւ միայն մեր սիրելի հայրենիքին, անոր ժողովուրդին ու ղեկավարներուն պանծացումի պատենությունը: Այս տխուր երեւոյթին մեկ նոր եւ ցաւալի արտայայտութիւնը կը նկատենք նաեւ այն տարօրինակ ցոյցը որ կատարուած է «Սինայիա» շոգեմաւին մեկնումի պահուն, երբ նախապէս որոշուած եւ բանաձեւուած հեռագիրներէն դուրս, ներգաղթողներու կողմէ շնորհակալութեան հեռագիր մը կարգադրուած միմիայն ՀՕԿ-ի Ֆրանսայի Կեդր. Վարչութեան հասցէին, քաղ.Ծառավերտեանի ստորագրութեամբ կարծես հրապարակային ցոյց մը որ առնուազն ներգաղթողներուն ապերախտութեան եւ վարիչներու անփափկանկատութեան ցուցադրումը կրնար ըլլալ»: Նամակի վերջում, խոսելով նոր ներգաղթի կազմակերպման անհրաժեշտութեան մասին, Վ.Մալեզյանը խնդրում էր, որ Միությանը այլեւս «չընծայուի լոկ արկղակալի մը դերը, որ կը կայանայ ամենայնպէս ծախքն իսկ վճարելու համակերպութեան մէջ»:³⁷

Ա.Եսայանը, 1935թ. սեպտեմբերին ստանձնելով ՀՕԿ-ի Գլխավոր վարչության նախագահի պաշտոնը, փորձեց որոշակի խմբագրումների ենթարկել այդ կազմակերպության հարաբերությունները ՀԲԸ Միության հետ: Ա.Եսայանի մասին խոսքը դեռ առջեւում է, իսկ այստեղ հարկ է նշել նրա նորովի մտնեցումը ՀՕԿ-ի արտասահմանյան մասնաճյուղերի կեցվածքին՝ ՀԲԸ Միության հանդէպ: Վ.Մալեզյանին հասցեագրած իր նամակներում Հ.Գարակոչյանը գրում էր՝ դեկտեմբերի 5-ին. «ՀՕԿ-ի եւ Ներգաղթի կոմիտեի նախագահը վստահեցնում է, որ ՀՕԿ-ի արտասահմանյան մասնաճյուղերի անհարկի ելույթները եւ տարածայնությունները միանգամ ընդմիջտ վերջ պիտի գտնեն: Այս մասին նորընտիր նախագահը հարկ եղածը խոսած է այստեղ ներկա գտնվող պատգամավորներին եւ հատուկ շրջաբերական հրահանգներով պիտի ազդարարե ՀՕԿ-ի մասնաճյուղերի գործունեության նոր ոգիի մասին»: Դեկտեմբերի 21-ին. «Ընկեր Եսայան մի անգամ ալ շեշտում է որ հարկ եղած խիստ հրահանգներ տրված են թե Հայաստան այցելող պատգամավորներին եւ թե ՀՕԿ-ի բոլոր գլխ. մասնաճյուղերին, որպեսզի միանգամ ընդմիջտ վերջ տրվին ՀՕԿ-ի եւ Բարեգործականի միջեւ անհարկի արտահայտություններին եւ ելույթներին»:³⁸ ՀՕԿ-ի նախագահի նման դիրքորոշումը՝ եւ այդ ուղղությամբ նրա վճռական գործունեությունը միանշանակ չընդունվեցին

ՀՕԿ-ի արտասահմանյան մասնաճյուղերի ղեկավարների կողմից: Եթե նրանցից ոմանք դրանում տեսնում էին ՀՕԿ-ի ընդհանուր առողջացման, ազգօգուտ գործունեության վերականգնման նշաններ, ապա նրանց հիմնական մասը հայտնում էր իր ակնհայտ անհամաձայնությունը, ասելով, որ «Եսաեան ծանօթ չէ արտասահմանի պայմաններուն, որով եւ կարելի չէ հետեւիլ իր ցուցումներուն»: Ինչպես նշվեց, հաջորդ՝ 1936թ. մայիս ամսվա ներգաղթը, ցույց տվեց, որ նման տրամադրությունները մնացին իշխող՝ ՀՕԿ-ի մասնաճյուղերում:

Ա.Խանջյանը եւ Գ.Կյուլպենկյանի հրաժարականը

1931-1933թթ. ներգաղթին զուգահեռ, Հայաստանի հետ ՀԲԸ Միության հարաբերություններում տեղի ունեցան դրամատիկ իրադարձություններ: Այն բանից հետո, երբ Ա.Տեր-Գաբրիելյանը «Խորհրդային Հայաստան» պաշտոնաթերթի 1931թ. սեպտեմբերյան համարներից մեկում պատմել էր ներգաղթ կազմակերպելու կառավարության որոշման, ՀԲԸ Միության նախագահ Գ.Կյուլպենկյանի եւ այլ ղեկավարների հետ Փարիզում ունեցած իր հանդիպումների մասին, 1931թ. հոկտեմբերի 16-ին նույն թերթը հրապարակում է Հայկոմկուսի կենտկոմի առաջին քարտուղար Ա.Խանջյանի ճառը, որում մասնավորապես ասվում էր. «Սիրիայում «ազգային օջախ» ստեղծելու համար դաշնակների արած գործնական քայլերը, որոնք, ի դեպ, արվում են անգլո-ֆրանսիական իմպերիալիստական խմբակներին մոտ կանգնած Կյուլպենկյանների անմիջական հովանավորությամբ եւ հակադրվում են արտասահմանի աշխատավորության խորհրդային Հայաստան ներգաղթելու մեր ծրագրին, նպատակ ունեն «հավատարիմ ուժ» տրամադրել ֆրանսիական իմպերիալիզմին Սիրիայի գաղութային շահագործման եւ ազգային ազատագրական շարժումները ճնշելու, ինչպես նաեւ Կյուլպենկյանների նավթահանքերին կամ նավթամուղին էժան բանվորական ուժ մատակարարելու համար: «Ազգային օջախ» ստեղծելու այդ փորձի գլխավոր նպատակն է՝ թնդանոթի միս պատրաստել հակախորհրդային իմպերիալիստական ինտերվենցիայի համար...»:³⁹

ՀԲԸ Միության ղեկավարությունը, այս անսպասելի մեղադրանքներից հետո անմիջապես կապվում է Հայաստանի իշխանությունների հետ: Միության վարիչ-պատվիրակ Վ.Մալեզյանը նոյեմբերի 9-ին հատուկ նամակ է հղում Ա.Տեր-Գաբրիելյանին, որում մասնավորապես գրում էր. «Ծատ ցաւալի կը գտնենք այն ծանր մեղադրանքը, որ վիրաւորիչ բառե-

րով եւ բոլորովին յանիրաւի կ'ուղղուի Տ.Գալուստ Կիւլպէնկեանի, իր անունը կապելով ՀՅ Դաշնակցութեան եւ իրեն վերագրելով արարքներ որ բացարձակապէս անհիմն են»: Այնուհետեւ, փաստերի հիման վրա բացատրելով Միության նախագահի հասցեին արած մեղադրանքների անհեթեթ եւ անհիմն լինելը (այդ մասին ստորեւ), Վ.Մալեզյանը եզրակացնում էր. «... եթէ իտեղօկներու ներելի է իրենց աշխարհահայեացքներու մասին ազատօրէն արտայայտուիլ, սկզբունքի գետնին վրայ, չեմ կարծեր որ ուղիղ ըլլար որ հայ իտեղօկներ որ Հայաստանի վերելքին համար կ'աշխատին այնքան մեծ նուիրումով, միեւնոյն չափով հարուածեն թէ իրենց գաղափարի հակառակորդները եւ թէ նոյն Հայաստանի անկեղծ եւ անձնուէր բարեկամները: Այդ անխորհուրդ ուղղութիւնը ունեցած է եւ կ'ունենայ ծանր հետեւանքներ, յառաջ բերելով ուծացումներ: Ու խորապէս ցաւալի պիտի ըլլար որ Տիար Կիւլպէնկեանի մասն հայրենասէր պատուական հայ մը, այն պահուն իսկ որ Հայաստանի համար գործնական միտքով իր լաւագոյն ջանքերը սպաս կը դնէ, դառնօրէն վիրաւորուած իր բարձր զգացումներուն մէջ, անդարմանելի հակասութիւններ տեսնէ այն ազնիւ խրախոյսներուն մէջ զոր այնքան խոհականօրէն գիտցաք ներշնչել եւ անիրաւ մեղադրանքներուն մէջ զոր այլապէս պատասխանատու հեղինակատր անձ մը կ'ուղղէ իրեն, հրապարակաւ եւ ձեր պաշտօնաթերթին միջոցաւ»:40

Վ.Մալեզյանի նամակը Ա.Տեր-Գաբրիելյանին, ըստ ընդունված կարգի, պետք է հանձնէր Երեւանում Միության ներկայացուցիչ Հ.Գարակոյզյանը, բայց անցնում են օրեր, շաբաթներ, նույնիսկ ամիսներ՝ եւ ոչ մի պատասխան: Վերջինս կողմից Փարիզ ուղարկված գրություններից պարզվում է, որ նամակը հանձնվել է Ա.Տեր-Գաբրիելյանին միայն 1932թ. փետրվարին, այն էլ թիֆլիսում: Երեւանը, սակայն, շարունակում էր լռել: Մարտի 10-ին Վ.Մալեզյանը Հ.Գարակոյզյանին հասցեագրած հերթական նամակում գրում էր. «Ամիսներէ ի վեր անհետեւանք մնացած այդ ցաւոտ խնդիրը ստեղծած է ծանրահոգ դրութիւն մը, ու անձնապէս, տեսնելով մեր պատուական նախագահին ջղագրգռեալ վիճակը, բոլորովին ճարահատ եմ այլեւս:

«Ներգաղթի առթիւ իր առաջին խանդավառութեան մէջ իսկ դառնօրէն յուսախաբուած, Տ. Կիւլպէնկեան մինչեւ անգամ որոշած է հրաժարիլ Միութեան նախագահութենէն, որուն առաջքը առնելու համար պարտաւոր պիտի ըլլանք կանգ չառնել ոեւէ զոհողութեան առջեւ:

«Կեդր. Վարչ. Ժողովը եւ ամբողջ ՀԲԸ Միութիւնը չեն կարող առանձին թողուլ իրենց սիրելի Նախագահը, այն ծանր ամբաստանութեան մէջ որով հարկ տեսնուած է ներկայացնել ինքը, բոլորովին անհիմն եւ անօ-

գուտ, որպէս ՀՅ Դաշնակցութեան գործիք կամ գործակից, որպէս Սուրիոյ օճախի ախոյեան եւ որպէս նախամուղներու մէջ հայ գործաւորները շահագործող, ամբաստանութիւններ զոր վաղը ի լուր աշխարհի պիտի հերքենք բարձրադասակ, եթէ ճշմարտութիւնը արձագանք չի գտնէ Երեւանէն:

«Կը խնդրենք, որքան որ ալ ձեզի համար նեղացուցիչ ըլլայ այս բանը, այս մտածումները եւս հաղորդել անձամբ եւ գրութեամբ յարգոյ վարչապետին եւ կամ իր տեղակալին»:41

Գ.Կյուլպէնկյանը, համոզվելով, որ Հայաստանի համայնավար դեկավարը մտադիր չէ փոխել իր դիրքորոշումը, 1932թ. ապրիլի 22-ին, ներգաղթողների երրորդ կարավանի մեկնումից երեք օր առաջ, գրում է իր հրաժարականը՝ ուղղելով այն Միության Կենտրոնական Վարչական Ժողովին.

«Ինչպէս լաւ կը յիշէք, ՀԲԸ Միութեան Նախագահութիւնը ընդունելու պատիւն ստանձնելուս, միակ պայմանս եղաւ թէ այն օրը երբ տեսնեմ որ օգտակար չեմ կրնար լինիլ, կը հրաժարիմ:

«Եվ գիտէք թէ հակառակ իմ անձնական սուղ ժամերուն՝ ինչ հոգով սրտով փարեցայ գործին, պարտականութիւնս կատարելով իմովսանց, բնականաբար զանազան դժուարութեանց, անհարկի տրտունջներու եւ պահանջներու դէմ մաքառելով, զի կան մարդիկ որ կը կարծեն թէ Բարեգործականը պետութիւն մ'է, պարտաւոր է եւ կարող ամէն դիմումներուն գոհացում տալ, մինչդէռ Բարեգործականը անհատական հաստատութիւն մըն է՝ ողբացեալ Պօղոս Նուպար փաշայի նախաձեռնութեամբ հաստատեալ եւ շատ սահմանափակ է իր ելեմտքի վիճակը, մանաւանդ վերջերս:

«Բարեգործականը, իր բարոյական եւ նիւթական միջոցներով, իր գոյութեան սկիզբէն ցարդ, մեծապէս օգտակար եղած է այս լքեալ Ազգին անօրինակ տառապանքի օրերուն եւ ամէնքիս երախտագիտութեան արժանի է:

«Ամէն դժուարութեանց հետ նոր անակնկալ դէպք մը կուգայ Միութեան խաղաղութիւնն վրդովել, այն է Երեւանի կառավարութեան պաշտօնական ներկայացուցիչ պ.Խանձեան՝ անհեթեթ առարկութիւնով իմ անձիս դէմ նախատինքներ ըրած է. ի զուր սպասեցինք որ Հայաստանի կառավարութիւնը հերքէր այդ բացարձակ անտեղի յարձակումը. ուստի, ես իբրեւ Նախագահ ՀԲԸ Միութեան պարտաւորուած եմ հրաժարիլ, ի նկատի ունենալով որ Բարեգործականը Երեւանի կառավարութեան հետ զանազան բարեգործական ձեռնարկներու համար անհրաժեշտ կապ ո-

նի, եւ ես իմ անուամբ եւ ստորագրութեամբ չեմ կրնար յարաբերութիւն ունենալ անոնց հետ, իբրեւ Նախագահ, ներկայ պարագաներու ներքեւ:

«Արդ, բացարձակապէս հրաժարականս մատուցանելով հանդերձ, միանգամայն կը պահեմ իմ գուրգուրանք Ազգին միակ միսիթարութիւնը եղող Հայաստանի լուրջ բարգաւաճման համար, իբրեւ հայրենի արան-դութեանց զգացման պարտականութիւն:

Մնամ յարգանքք եւ առ յաւէտ բարեացակամ Բարեգործականի նուիրական հաստատութեան,
22 Ապրիլ 1932

հրաժարեալ նախագահ Գ. Ս. Կիւլպէնկեան»⁴²

Միության կենտրոնական վարչական ժողովը մայիսի 2-ի եւ 6-ի իր նիստերում քննարկելով ստեղծված իրավիճակը, դիմում է Գ.Կյուլպէնկյանին՝ խնդրելով նրան հրաժարվել ընդունած որոշումից. «Կեդր. վարչ. ժողովը, որ միշտ համերաշխ գտնուած է ձեզի հետ, յանուն այդ համերաշխութեան՝ նախ եւ առաջ որոշեց բողոքագրով մը Հայաստանի ժողկոմխորհի նախագահ քաղ. Սահակ Տէր-Գաբրիէլեանի յայտնել իր ցան ու բողոքը, այն անհիմն վերագրումներուն համար զոր քաղ. Խանճեան քանի մը ամիս առաջ ըրած էր իր մէկ ճառին մէջ, եւ որոնց դէմ մեր վարիչ-Պատուիրակին կատարած դիմումները դժբախտաբար ցարդ անհետեւանք մնացած են...

«Կեդր. վարչ. ժողովը գոհունակութեամբ նկատի ունեցաւ թէ ձեր հրաժարագրին մէջ Միութեանս կամ ժողովին վերագրելի տարակարծութեան ռեւէ պատճառ մը չի գտնուիր: Եվ յետոյ հաստատեց թէ այդ յերիւրանքները ոչ իւրք կրնան ստուեր ածել ձեր անձին եւ զգացումներուն վրայ, ռեւէ կերպով արդարացնելու համար կարելորութիւնը զոր անոնց կ'ընծայէք ձեր հրաժարմամբը, եւ թէ որքան ալ ցաւալի ըլլան անհարկի դատաւիտումները եւ պահանջկոտութիւնները որ շարունակ Միութեանս կ'ուղղուին, ձեր ձեռնթափութիւնը ոչ միայն հարուած մը պիտի ըլլայ մեր Միութեան համար եւ զրկանք մը մեր բազմակարօտ ազգին համար, այլ եւ անխուսափելիօրէն տեղի պիտի տայ նաեւ թիւր եւ անախորժ մեկնաբանութեանց:

«Երբ դժբախտութիւնը ունեցանք կորսնցնելու մեր յաւէտ ողբացեալ Հիմնադիր-Նախագահը՝ Պօղոս Նուպար փաշա, դուք նկատուեցաք այն հայը որ կրնար տիրաբար ստանձնել այս համազգային մեծ կազմակերպութեան դէկը... Երախտագիտական զգացումով մը կը յիշենք որ, հակառակ ձեր բազմազբաղ վիճակին, պատասխանեցիք մեր հրաւերին, եւ առաջին օրէն, օգտակար ըլլալու հետամտութեամբ, գործին հանդէպ ցոյց

սուիք սրտագին խանդաղատանք մը: Անշուշտ, կը խոստովանիմք, ձեր նախագահութիւնը զուգադիպեցաւ աշխարհը ցնցող տնտեսական ահաւոր տագնապի մը, որուն հետեւանքը ուժգնօրէն կրեց նաեւ մեր Միութիւնը, բայց արդարութեան պարտք մը կը կատարենք յայտարարելով նաեւ թէ՛ այդ առթիւ ալ ձեր սրտեռանդ ջանքերը եւ գործնական խորհուրդները սիրայօժար սպաս դրիք Կեդր. ժողովին:

«Այս պայմաններուն մէջ, Կեդր. ժողովը համոզուած էր որ պիտի բաւէ անկեղծօրէն պարզել ձեզի այն բարդ կացութիւնը զոր պիտի ստեղծէ ձեր հրաժարականը եւ այն անբաղձալի հետեւանքը որ պիտի ունենայ անհկա Միութեան մասին, որպէսզի անդրադառնալով թոյլ չի տաք որ գաղութահայութեան խղճմտանքին համաձայն կատարուած ընտրութիւն մը անակնկալօրէն բեկանուի ճառի մը կամ յօդուածի մը պատճառաւ, եւ, առոնց ձեր վրայ գործած յոռի տպաւորութեամբը, զոհուի Միութեան եւ Ազգին գերագոյն շահը...

«Կեդր. ժողովը համոզուած է արդարեւ որ պիտի բաւէ կոչում ընել ձեր ազգասիրութեան, լայնախոհութեան եւ խղճին ալ, որպէսզի չի լքէք ձեզի վստահուած արանդն ու դէկը, եւ կիսատ չի թողուք այնքան գուրգուրանքով սկսուած գեղեցիկ գործ մը... երբ թշուառութիւնը համատարած կը տիրէ եւ մեր վրայ կը դնէ ծանր պարտականութիւններ որոնցմէ չենք կրնար խուսափիլ: Այդ վստահութեամբ, սիրելի Նախագահ, ջերմապէս կը խնդրենք, յանուն մեր Միութեան բազմահազար անդամներուն եւ Հայ ժողովուրդին համերաշխ զգացումին, որ Միութեան խնայէք այս նոր հարուածը եւ ձեր հրաժարումովը թոյլ չի տաք որ մեծ պարսպ մը գոյանայ եւ Միութիւնը այսպէս ծանր տագնապի մը ենթարկուի...»⁴³

Միության կենտրոնական վարչությունը նույն օրը մեկ անգամ եւս դիմեց Ա.Տէր-Գաբրիէլյանին, նշելով, մասնավորապէս, որ Գ.Կյուլպէնկյանի հրաժարականը ամեն բանից զատ «զգալապէս պիտի խանգարէ մայր-հայրենիքին եւ գաղութահայութեան միջեւ Միութեան զօրի դերը զոր հպարտ եւ երջանիկ էինք կատարելով»:⁴⁴

Բայց Միության նախագահի որոշումը վերջնական էր: Մայիսի 11-ին նա հետագրում է Ալփիից. «Թորապէս շնորհակալ եմ ձեր 7 մայիսի նամակին համար: Կը խնդրեմ չի պնդել, որովհետեւ հրաժարականս անդառնալի է: Անձնական ամէն նկատումէ անկախօրէն համոզում գոյացուցի որ այս որոշումը նոյն իսկ ՀԲԸ Միութեան շահուն համաձայն է: Ծատ լրջօրէն մտածել վերջ որոշած եմ, որով անօգուտ է անդրադառնալ...»:⁴⁵ Միության ղեկավարությունը՝ Գ.Նորատունկյանը, Տիգրան Քելկյանը, Առաքել եւ Զարեհ Նուպարները հունիսի 12-ին, այնուամենայնիվ, հանդիպում են Փարիզ վերադարձած Գ.Կյուլպէնկյանի հետ: Բայց

այդ հանդիպման անհաջողությունը կանխորոշված էր. մինչ այդ՝ մայիսի 24-ին «Խորհրդային Հայաստան» պաշտոնաթերթում հրատարակված մի նոր հոդվածում Հայաստանի իշխանությունները մեկ անգամ եւս կրկնել էին իրենց ամբաստանությունները Գ.Կյուլպենկյանի եւ ՀԲԸ Միության հասցեին: Ի վերջո, Միության կենտրոնական վարչությունը 1932թ. հունիսի 15-ի նիստում հարկադրված էր ընդունել նախագահի պաշտոնից Գ.Կյուլպենկյանի հրաժարականը:

Գալուստ Կյուլպենկյանը ստանձնել էր ՀԲԸ Միության նախագահի պաշտոնը 1930թ. հոկտեմբերին՝ Միության հիմնադիր եւ առաջին նախագահ Պողոս Նուպարի մահից հետո: Այդ փաստը ինքնին խորհրդանշական էր, նկատի առնելով Նուպարյան ընտանիքի դերը Գ.Կյուլպենկյանի կյանքում: Գ.Կյուլպենկյանը ծնվել էր 1869թ. Կ.Պոլսում (Սկյուտար): Կ.Պոլսի հայտնի Ռոբերտ կոլեջում նախնական ուսումը ստանալուց հետո, Գ.Կյուլպենկյանը մեկնում է Մարսել՝ իր ֆրանսերենը կատարելագործելու նպատակով, իսկ 1884թ. ընդունվում է Լոնդոնի հեղինակավոր Քինգզ կոլեջը, որն էլ փայլուն ավարտում է 1887թ.: Առաջին կարգ քաղաքացիական ճարտարագիտություն եւ ոսկե մեդալ գիտության եւ ճարտարագիտության բնագավառում: Նրա անունն աշխարհին հայտնի դարձավ Առաջին Աշխարհամարտի նախօրեին՝ 1914թ., երբ Գ.Կյուլպենկյանի միջնորդության շնորհիվ այդ ժամանակվա երկու ամենախոշոր «Անգլո-Պերշըն օյլ քամփռնի» եւ «Ռոյալ Դաշ-Օելլ» նավթային ընկերությունները ստեղծեցին հատուկ կոնտրոլում, որը թուրքական կառավարության համաձայնությամբ պետք է շահագործեր Միջին Արեւելքի նավթային հանքավայրերը: Նորաստեղծ կոնտրոլումի եւ Գ.Կյուլպենկյանի միջեւ տեղի ունեցած երկար բանակցություններից հետո որոշվեց, որ մատուցած ծառայության համար նա դառնում էր նորաստեղծ կոնտրոլումի արժեթղթերի 5%-ի սեփականատերը (shareholder): Աշխարհի ամենաշահավետ համարվող այս գործարքից հետո է, որ Գ.Կյուլպենկյանին՝ իր ժամանակների ամենահայտնի եւ ամենահարուստ մարդկանցից մեկին, սկսեցին կոչել «Պարոն Հինգ Տոկոս»:

Գ.Կյուլպենկյանի կյանքն ու գործունեությունը մշտապես եղել է համընդհանուր եւ սելեռոն ուշադրության կենտրոնում: Տվյալ դեպքում, սակայն, առավել հետաքրքրական է հետեւյալ դրվագը նրա կյանքից: 1896թ., երբ Օսմանյան կայսրությունում տեղի էին ունենում հայերի զանգվածային սպանությունները, 27-ամյա Կյուլպենկյանը, կնոջ եւ նորածին զավակի հետ հեռանում է Թուրքիայից եւ դեպի Եվրոպա ճանապարհին, մի քանի ամիս անց է կացնում Կահիրեում, ուր ապրում էին նրանց բարեկամներն ու ազգականները: Այդ վերջինների թվում էր նաեւ

Նուպար փաշան՝ Պողոս Նուպարի հայրը, որը Եգիպտոսի այդ ժամանակվա ամենահայտնի եւ ամենահարգված պետական գործիչն էր եւ որը երկրի վարչապետի պաշտոնից հանգստի էր հեռացել ընդամենը մեկ տարի առաջ: Հենց նա էլ հյուրընկալեց երիտասարդ ամուսինը: Գ.Կյուլպենկյանի որդին՝ Նուպար Կյուլպենկյանը, իր գրքում բերում է մոր՝ Նվարդ Եսայան-Կյուլպենկյանի հիշողությունները. «Երբ իմ մայրը Նուպար Փաշայի հետ կառքով անցնում էին Կահիրեի փողոցներով, ֆելլահները ցածր խոնարհվում էին, իսկ ոմանք նույնիսկ փոսվում էին գետին: Ձիերին նախապահ էին մաքրում նրանց առջեւից վազող մարդիկ, որոնց անվանում էին *sais*, նրանց ձեռքին հասուկ ձողեր էին ձիու հինգ ազիներով: Ազիների քանակը՝ մեկ, երեք կամ հինգ, պայմանավորված էր Փաշայի զբաղեցրած դիրքով: Յոթ ազիների իրավունքը պատկանում էր միայն Խեղիվին»:⁴⁶ Գ.Կյուլպենկյանը շատ հպարտ էր այդ մեծանուն մարդու հետ իր բարեկամական հարաբերություններով, որի անունով էլ, ի դեպ, մկրտեց իր անդրամիկ որդուն: Գ.Կյուլպենկյանի մասին պատմող իր գրքում Ռ.Հյուինսը գրում է. «Նուպար Փաշայի հետ իր ընտանեկան կապերի շնորհիվ Կյուլպենկյանը ձեռք բերեց նոր կարգավիճակ... Նա աշխարհահռչակ գործչի ընկերն էր, պրոտեժե եւ «քեռորդին»: Երբ նրան հարկավոր էր ծանոթանալ Ուելսի իշխանի ֆինանսական խորհրդատու, բազմամիլիոնատեր սըր Էդմոնտ Կասսելի հետ, Գալուստը օգտագործեց Նուպար Փաշայի ազդեցիկ անունը՝ իշխանը եւ փաշան ընկերներ էին Կահիրե կատարած թագավորական այցի ժամանակներից... Սըր Իվլին Բէրինգի միջոցով Նուպար փաշան վաղեմի կապեր ուներ Բերինգ եղբայրներ՝ հանրահայտ առեւտրական բանկիրների հետ: Նրանք կենսական դեր խաղացին Պարոն Հինգ Տոկոսի վերելքի գործում... Քանի որ փաշան կրթությունը ստացել էր Ֆրանսիայում եւ ֆրանսերենը նրա առաջին լեզուն էր, նա կարողացավ ծանոթացնել Գալուստին Փարիզի ամենաազդեցիկ մարդկանց հետ, ներառյալ Ռոտշիլդները... Երկար զրույցները փաշայի հետ, կարծես, նաեւ կատարելության հասցրին Կյուլպենկյանի՝ իր տարիքի համար արագ զարգացած դիվանագիտական տաղանդը»:⁴⁷ Նույն հեղինակը նշում է, որ Կահիրեում Գ.Կյուլպենկյանը «...հանդիպում է մեկ ուրիշ՝ հետազայում հայտնի հայի՝ Նուպար փաշայի որդի Պողոս Նուպարի հետ, ...որը զբաղված էր իր հոր եւ քեռու՝ Աբրահամ փաշայի համար Հելիոպոլիս քաղաքի կառուցմամբ»:⁴⁸ Այս հանդիպումներից 34 տարի անց, Գ.Կյուլպենկյանը Պողոս Նուպարի մահից հետո հաջորդում է նրան՝ վերջինիս կողմից հիմնած ՀԲԸ Միության նախագահի պաշտոնում, իսկ ընդամենը մեկ եւ կես տարի անց ներկայացնում է իր հրաժարականը:

Այդ հրաժարականը, ինչպես եւ պետք էր սպասել, մեծ արձագանք ունեցավ սփյուռքում (Խորհրդային Հայաստանում եւ դա նույնպես սպասելի էր, որեւէ ձեռով չանդրադարձան դրան). տարբեր կազմակերպություններ, առանձին հայտնի անհատներ իրենց տեսակետներն ու գնահատականներն էին հայտնում այդ դեպքի վերաբերյալ: Թե ժամանակակիցների համար եւ թե այսօր Գ. Կյուլպենկյանի հրաժարականի պարզաբանումը հանգում է երկու հիմնական հարցի: Առաջինը՝ ինչո՞ւ էր պայմանավորված եւ որքանո՞ւ էր արդարացված Ա.Խանջյանի մեղադրանքը Գ.Կյուլպենկյանի հասցեին եւ երկրորդը՝ Գ.Կյուլպենկյանի համար Ա.Խանջյանի ճառը պատճառ էր, թե՞ առիթ Միության նախագահի պաշտոնից հրաժարվելու համար: Նշված հարցերից առաջինը մեր օրերում հատուկ քննարկման առարկա դարձավ Կ.Դալլաքյանի կողմից, որի «ՀԲԸ Միության նախագահ Գ.Կյուլպենկյանի հրաժարականի հարցի շուրջ» աշխատությունը ՀԲԸ Միության պատմությանը առնչվող եզակի գիտական ուսումնասիրություններից է:

Վերլուծելով Ա. Խանջյանի 1932թ. հոկտեմբերի 14-ին արտասանած ճառը այդ տարիներին Խորհրդային Միությունում եւ արտասահմանում ընթացող քաղաքական երեւոյթների լայն համատեքստում, Կ.Դալլաքյանը տալիս է հետեւյալ բացատրությունը: 1920-ականներին թուրքական քարոզչությունը, ցանկանալով ամեն կերպ խոչընդոտել հայ գաղթականների կենտրոնացմանը Սիրիայում՝ իր հարավային սահմանների մերձակա շրջաններում, սկսում է հմտորեն օգտագործել այդ երկրում «Հայկական օջախի» ստեղծման առասպելը: Թուրքիայի ներկայացմամբ այդ ծրագրի հեղինակներն ու իրագործողներն էին արեւմտյան իմպերիալիստական երկրները, առաջին հերթին Ֆրանսիան, ինչպես նաեւ նրանց կամակատար հայ քաղաքական կուսակցությունները, նախ եւ առաջ Դաշնակցությունը: Նույն այդ ժամանակ Խորհրդային Միության իշխանությունները, տարված արտաքին թշնամիներ փնտրելու մոլուցքով, անընդհատ հայտարարում էին իմպերիալիստական երկրների մոտալուրտ ուղղման հարձակման մասին: Այդ քարոզչության հայկական տարբերակում նույնպես կարելու տեղ էր հատկացվում նույն այդ «օջախին»: «Դաշնակցները, ֆրանսիական կառավարության «բարձր» հովանավորությամբ, գրում էր «Խորհրդային Հայաստան» թերթը 1931թ. հունիսյան համարներից մեկում, - ամեն կերպ աշխատում են անհրաժեշտ մարդկային մատերիալ համախմբել հյուսիսարեւելյան Սիրիայում: Այդ «օջախը», հանդիսանալով Սիրիայում աճող հեղափոխական շարժումները ճնշելու մի հենակետ ֆրանսիական իմպերիալիզմի համար, միաժամանակ հանդիսանալու է միջանկյալ մի օղակ «քրդական ուղղման» եւ Միջերկ-

րականի միջեւ, որն ըստ հարկին կօգտագործվի ֆրանսիական իմպերիալիզմի կողմից: Այդ «օջախը» լինելու է հակախորհրդային պատերազմի պատրաստության մի օջախ»: ⁴⁹ Սիրիայում «Հայկական օջախի» մասին թուրքական եւ խորհրդահայ քարոզչական գործունեությունը հասավ իր գագաթնակետին, երբ 1931թ. Ազգերի Լիգան եւ Նանտենյան գրասենյակը ՀԲԸ Միության հետ համագործակցաբար ծրագրավորում էին Հունաստանի գործազուրկ եւ անօթեւան հայ գաղթականներին տեղափոխել Սիրիա: Այդ պայմաններում Հայաստանի իշխանությունները դիմում են վճռական միջոցների: Կ.Դալլաքյանը գրում է. «Հայկական օջախի» առասպելը ընդունվել է որպես վերջնական ճշմարտություն, պատճառել է վիթխարի սարսափ, թուրքական քարոզչությունը եւ թերեւս այլ ծառայությունները շարունակաբար ուժեղացրել են ճնշումը, հավանաբար հարկադրանք է գործադրվել նաեւ կենտրոնից, եւ, ի վերջո ընդունվել է հասցեյ մի վճիռ՝ կատարել հայրենադարձություն եւ հենց դա հակադրել «Հայկական օջախին», խանգարել այդ «իմպերիալիստական ծրագիրը»: Կարճ. 1931 թվականին ձեռնարկած հայրենադարձությունը հետապնդում էր հստակ քաղաքական նպատակ»: ⁵⁰ Սակայն, շարունակում է Կ.Դալլաքյանը, Թուրքիային հանգստացնելու համար դա բավարար չէր. «պետք էր հարվածը հասցնել «Հայկական օջախին», որը թեպետ ծայրեծայր հորինված էր, բայց իբրեւ գաղափար արդեն գոյություն ուներ: Այդ գաղափարի իրականացումը հնարավոր էր միայն ֆինանսական միջոցներով, իսկ ֆինանսական միջոցների տերը Բարեգործականի նախագահ Գ.Կյուլպենկյանն էր: Հենց Գ.Կյուլպենկյանի անձն էլ ընտրվեց որպես հիմնական թիրախ, որի խոցումով կարող էր քանդվել ամբողջ կառույցը: Գ.Կյուլպենկյանը հարմար թիրախ էր, մանավանդ որ բոլորին հայտնի էր որպես խոշոր կապիտալիստ, իսկ խորհրդային քարոզչության աչքում նաեւ իբրեւ «իմպերիալիստական շրջանակների հետ սերտ կապեր ունեցող»»: ⁵¹

Կ.Դալլաքյանի տեսակետը՝ ներգաղթին վերաբերող իր մասով թվում է համոզիչ, հօգուտ դրա հեղինակը բերում է մի շարք փաստարկներ: Միայն թե նրա այն թեզը, որ 1931թ. սկսված ներգաղթը զուտ քաղաքական նպատակ ուներ, քանի որ Հայաստանը տարիներ շարունակ ի վիճակի չէր կազմակերպել ներգաղթ, «առավել եւս ի վիճակի չէր 1931թ. ապրիլի 27-ի երկրաշարժից հետո», որոշ ճշգրտման կարիք ունի: Բանն այն է, որ Խորհրդային Հայաստանը, հաշվի առնելով նրա սոցիալ-տնտեսական զարգացման աստիճանը, թե 1931թ., թե մինչ այդ՝ 1925, 1927 թթ. եւ թե հետագայում՝ 1936, 1946-1948թթ. երբեք էլ պատրաստ չէր զանգվածային ներգաղթի, ուստի եւ 1931թ. ներգաղթը այդ առումով չէր տարբերվում մյուսներից: Մյուս կողմից, արդեն նշվեց, որ 1927թ. հետո

ՀԲԸ Միությունը եւ Հայաստանի իշխանությունները մշտապես քննարկում էին հաջորդ ներգաղթի հարցը եւ վերջինները տարբեր պատճառներով, ըստ էության, միայն հետաձգում էին, ոչ թե հրաժարվում այն իրականացնելուց: Այլ բան է, որ նրա անցկացման ժամկետը որոշելիս, ըստ երեւոյթին, հաշվի առնվեց նաեւ «սիրիական օջախի» գործոնը: Հարկ է նշել նաեւ, որ կապիտալիստական եւ որեւէ այլ երկրից մարդկանց կամավոր ներգաղթը Խորհրդային Միություն, ընդհանրապես միշտ էլ ուներ հստակ քաղաքական եւ գաղափարախոսական իմաստ ու նշանակություն: Կարելի է ասել, որ Խորհրդային Միության քաղաքական նպատակները ներգաղթի հարցում ակամա համընկնում էին հայ ժողովրդի գերագույն շահերի հետ, եւ որ Խորհրդային Հայաստանի իշխանություններին մնում էր լավագույնս օգտվել հնարավորությունից, ծառայեցնելով այդ նպատակին թե սխյուռքի ֆինանսական ներուժը եւ թե ստեղծելով երկրում անհրաժեշտ պայմաններ ներգաղթողներին ապրելու ու աշխատելու համար:

Ինչ վերաբերում է Գ.Կյուլպենկյանի հասցեին արած մեղադրանքների բացատրությանը, ապա այն կարիք ունի արդեն հավելյալ փաստարկման: Նախ, ո՞րն էր երաշխիքը, որ Ա.Խանջյանի ճառից հետո Գ.Կյուլպենկյանը կհրաժարվեր ֆինանսավորել գաղթականների տեղափոխումը Սիրիա: Եթե նա իսկապես ուներ այդպիսի մտադրություն, ապա նույնիսկ Հայաստանի առաջնորդի հետ հակառակվել չցանկանալու դեպքում, նա հեշտությամբ կարող էր դա անել անուղղակի ձեով, ոչ որպես Միության նախագահ եւ առանց իր անունը տալու: Կարելորն այն է, սակայն, որ նման խնդիր այլես չկար. 1931թ. սեպտեմբերի առաջին օրերին Ա.Տեր-Գաբրիելյանի հետ Գ.Կյուլպենկյանի հանդիպումից հետո արդեն որոշվել էր, որ Հունաստանի հայ գաղթականները պետք է ներգաղթեին Հայաստան: ՀԲԸ Միության ծրագրերի փոփոխման փաստը բազմիցս նշվել էր տարբեր, այդ թվում նաեւ Երեւան ուղարկված գրություններում: «Բնականաբար այլես Սուրիոյ ձեռնարկը կը մոռցուի, քանի որ Յունաստանի գաղթականներուն առջեւ բաց են մայր-հայրենիքին դուռները, եւ, իսկապես, մեկ տարուան ընթացքին 27 հոգի միայն մեկնած են Սուրիա, ան ալ սխալմունքի մը հետեւանքով»:⁵² Սիրիա տեղափոխելու մասին ընդհանրապես չէր խոսվում նաեւ Հայաստան ներգաղթին նվիրված վերը հիշատակված Գ.Կյուլպենկյանի սեպտեմբերի 30-ի կոչում: Ա.Խանջյանն իր ճառը կարդաց այդ կոչից երկու շաբաթ անց, այսինքն, կամ նա տեղյակ չէր դրան, ինչը քիչ հավանական է, կամ էլ ինչ-ինչ պատճառներով անտեսեց:

Այս ամբողջ պատմության մեջ խիստ կարեւոր է թվում Ա.Տեր-Գաբրիելյանի այցը Փարիզ: Կ.Դալլաքյանը, նշելով, որ մինչ այդ այցը արդեն հայտնի էին ՀԲԸ Միության նախագահի բանակցությունները Սիրիայում Ֆրանսիայի գերագույն կոմիսարի եւ Նանսենյան գրասենյակի հետ, որ «Խորհրդային Հայաստան»-ում արդեն տպագրվել էին Գ.Կյուլպենկյանի դեմ ուղղված նյութեր, արդարացիորեն տալիս է կարեւոր մի հարց. «Ինչո՞ւ, այնուամենայնիվ, Ա. Տեր-Գաբրիելյանը գնաց Փարիզ, կասկածի եւ հարվածի տակ դնելով իր վարկն ու հեղինակությունը»:⁵³ Հարցը, սակայն, մնում է անպատասխան: Այնուհայտ է, որ նա գնաց ոչ ներգաղթի մասին հայտարարություն անելու եւ ոչ էլ նույն այդ հարցով ֆրանսիական իշխանությունների հետ հանդիպելու համար՝ ներգաղթելու էին Հունաստանից եւ Բուլղարիայից: Վստահաբար կարելի ասել, որ գեթ Միության ղեկավարության հետ հանդիպումների նպատակները երկուսն էին. կանխապես ստանալ Միության համաձայնությունը՝ օժանդակել Հունաստանի հայերի ներգաղթին Հայաստան եւ դրանով իսկ դադարեցնել նրանց Սիրիա տեղափոխման ծրագիրը եւ, ապա, ապահովել անհրաժեշտ ֆինանսներ՝ իրականացնելու ներգաղթը Հայաստան: Առաջին խնդիրը լուծվեց հաջողությամբ. Հայաստանի ներգաղթը լիովին համապատասխանում էր Միության ազգահավաքման վաղեմի գաղափարին, այն, միաժամանակ, կապված էր շատ ավելի քիչ բարդությունների հետ, քան նախորդ, «սիրիական» ծրագիրը:

Հարկ է նշել, որ Հունաստանի հայ գաղթականների հարցի հետ միաժամանակ առաջ եկավ նաեւ Բեյրութի եւ Հալեպի «քեմալերում»՝ ճամբարներում ապրող բազմահազար հայերի հարցը: Քեմալերում տիրող հակառողջական վիճակի, դրանք զբաղեցրած հողատարածքների սեփականատերերի բողոքների եւ այլ պատճառներով տեղական իշխանությունները որոշել էին անհապաղ քանդել դրանք, ինչի հետեւանքով մոտ 15.000 հայ գաղթականներ մնալու էին անօթեւան: ՀԲԸ Միությունը, ի պատասխան Նանսենյան գրասենյակի դիմումների, որոշեց իր հնարավորության սահմաններում ֆինանսավորել բնակելի տների կառուցումը Բեյրութի եւ Հալեպի հայության համար: Եվ եթե Միությունը մեծ պատրաստակամությամբ հրաժարվեց «Հունաստանից դեպի Սիրիա» ծրագրից, փոխարինելով այն «Հունաստանից դեպի Հայաստան» ծրագրով, ապա այս դեպքում նա պարզապես պարտավորված էր այն շարունակել: Այդ առիթով ՀԲԸ Միության կենտրոնական վարչությունը գրում էր. «Քաղ. Խանգեանի կողմէ արտասանած ճառին մեջ՝ Տ.Կիլպենկյանի ուղղուած բողոքովին անհիմն մեղադրանքը ամենադառն տպաւորութիւն գործեց, եւ նոյնքան եւ խոր վիշտ պատճառեց կեդր. վարչ. Ժողովին, որ

րուպե մը իսկ չէ խորհած հայրենիքէն դուրս «ազգային օջախ»-ի մասին, քանզի մէն մի գաղութ, մէջը ըլլալով Սուրիան, ժամանակաւոր կայան մըն է հայրենաբաղձ գաղթականներու համար. իսկ արտասահմանի մէջ գաղթականներուն ընծայուած եղբայրական օգնութիւնը, առանց որուն շատ աւելի ահաւոր եւ ընդարձակ թշուառութիւն մը պիտի վիճակուէր մեր քամբախտ ազգին այդ յուսալքուած բեկորներուն, ուրիշ կերպով արդար պիտի չըլլար բացատրել բայց եթէ մարդասիրական անժխտելի պարտականութեանց կատարումովը. հետեւաբար, ներելի պիտի չըլլար որ ՀԲԸ Միութիւնը այդ մեղադրուած նուազագոյն օժանդակութիւնը մերժէր, մինչեւ որ հայրենիքէն անջատուած եւ ռեւէ պաշտպանութենէ զրկուած մեր դժբախտ հայրենակիցները իրենց նախահայրերուն բնավայրը կարենան փոխադրուիլ, ինչ որ երկար ժամանակի հարց է»:⁵⁴ Բայց նույնիսկ այդ պայմաններում Միութիւնը Նանսենցյան գրասենյակի համաձայնութեամբ պետք էր «Սուրիոյ անտուն գաղթականներու գործին համար յանձն առած 10.000 ոսկիին կէսը միայն վճարել, որպէսզի ինչ գումար որ աւելնայ բարդուի ներգաղթի հիմնադրամին վրայ»:⁵⁵ Այսպիսով, եթէ «Հայկական օջախի» կարծեցյալ ծրագրի բաղկացուցիչ մասերն էին, մի կողմից, Հունաստանի գաղթականների տեղափոխումը Սիրիա, եւ մյուս կողմից՝ Բելյութում ու Հայկապոն տների կառուցումը անտուն գաղթականների համար, ապա 1931թ. սեպտեմբերին, հատկապէս Ա.Տեր-Գաբրիելյանի Փարիզ այցից հետո, Միութիւնը որոշել էր օժանդակել նրանցից միայն երկրորդին: Եթէ թուրքական քարոզչությունը դրանում նույնպէս վտանգ էր տեսնում իր երկրի անվտանգության համար, ապա, նույնիսկ նկատի առնելով հնարավոր քաղաքական հաշվարկները, դժվար է պատկերացնել, որ Հայաստանի ղեկավարությունը ինքնուրույնաբար կամ էլ կենտրոնի թելադրանքով, պահանջեր ՀԲԸ Միությունից հրաժարվել Բելյութում եւ Հայկապոն մինչ այդ արդեն հաստատված հայերին օգնելուց:

Այլ ընթացք ունեցավ Ա.Տեր-Գաբրիելյանի այցի ժամանակ առաջ քաշված երկրորդ՝ Հայաստան ներգաղթի ֆինանսավորման հարցի լուծումը: Ահա թէ ինչ է գրել այդ առիթով Վ. Մալեգյանը, որը, ի դեպ, Միության ղեկավարներից միակն էր, որ Գ.Կյուլպենկյանի հրաժարականից հետո էլ գործնական եւ անձնական սերտ հարաբերություններ պահպանեց նրա հետ. «Քանի մը ամիս առաջ (Վ.Մալեգյանը նկատի ունի Ա.Խանջյանի ճառը - Էդ. Մ.) Փարիզ այցելած էր Հայաստանի վարչապետը Սահակ Տեր-Գաբրիելեան, որ ներգաղթի պաշտօնական առաջարկը բերած էր եւ թելադրեց որ Բարեգործականի նախագահը այդ նպատակին համար ինքն իսկ հանգանակութիւն մը բանայ, հայրենադարձներուն մինչեւ Հայաստան ծախսերուն համար: Բայց Կիւլպենկեան

գոհացաւ վայելչօրէն պատուասիրելով մեծանուն հիւրը եւ նախամեծար համարեց յայտարարել խնդրանքիս հակառակ, թէ ինք պիտի սպասէ հանգանակութեան արդիւնքին, գիտակցօրէն իր բաժինը բերելու համար: Անկասկած, շատ անախորժ տպավորութեամբ մեկնեցաւ վարչապետը, ինչպէս հաստատեցին ինձի Թահմիզեան եւ Աւետիք Իսահակեան»:⁵⁶

Ա.Տեր-Գաբրիելյանի «անախորժ տպավորությունը» բնական էր ու հասկանալի, սակայն դատելով հետագա դեպքերից, թվում է, թե նա, այնուամենայնիվ, շարունակեց որոշակի հույսեր կապել Գ.Կյուլպենկյանի ֆինանսական օժանդակության հետ: Հատկանշական է, որ վերադարձից հետո տված հարցազրույցում, նա հատուկ նշում է իր հանդիպումը Գ.Կյուլպենկյանի հետ եւ ընդհանրապես որեւէ բացասական կարծիք չի հայտնում նրա եւ ՀԲԸ Միության մասին: Ավելի ուշ՝ հոկտեմբերի 10-ի իր հոդվածում, քննադատելով «Հայկական օջախի» գաղափարը, նա նույնպէս ոչ մի խոսք չի ասում Միության եւ նրա նախագահի մասին: Այդ կեցվածքին նա հարազատ մնաց եւ հետագայում: Եթե ընդունենք այն թեզը, որ Ա.Խանջյանի մեղադրանքները Գ.Կյուլպենկյանի հասցեին թելադրված էին կենտրոնից՝ Մոսկվայից կամ էլ Թիֆլիսից, ապա այդ դեպքում Հայաստանի վարչապետի նման վարքագիծը դառնում է խիստ զարմանալի, եթե ոչ անհավանական: Այդ իմաստով ուշագրավ է, որ 1937թ. Ժողկոմխորհի նախագահի նախկին տեղակալ Ար. Երզնկյանը հարցաքննություններից մեկի ժամանակ, խոսելով Ա.Տեր-Գաբրիելյանի արտասահմանում սփյուռքահայերի հետ ունեցած հանդիպումների մասին, ասել է. «Տեր-Գաբրիելյանի Փարիզում եղած ժամանակ «Խորհրդային Հայաստան» թերթում հոդված տպագրվեց Կյուլպենկյանի դեմ: Նա շատ վրդովված էր դրանից եւ ասում էր, որ հոդվածը խանգարել է նրա բանակցություններին, որ Կյուլպենկյանը հոդվածից հետո հրաժարվեց աշխատել Բարեգործականում, ուր նա նախագահն էր»:⁵⁷

Ա.Տեր-Գաբրիելյանի նման վարքագիծը բացատրելի է դառնում, եթե ենթադրենք, որ Ա.Խանջյանի մեղադրանքները Միության նախագահի հասցեին նրա սեփական նախաձեռնության արդյունքն էին: Կասկածից վեր է, որ Հայաստանի վարչապետի այնքա Փարիզ եւ բանակցությունները միլիոնատեր Գ.Կյուլպենկյանի հետ հնարավոր էր Հայաստանի առաջին դեմքի՝ նույն Ա.Խանջյանի թույլտվության կամ առնվազն համաձայնության դեպքում միայն: Ըստ ամենայնի ինքը՝ Ա.Տեր-Գաբրիելյանը, գրեթե վստահ էր իր հաջողության մեջ: Իսկ Ա. Խանջյանը՝ Այդ դժվար հարցի պատասխանը միգուցե կարելի է գտնել Ա.Խանջյանի կնոջ՝ Ռոզա Վինդզերգի վկայություններում.

«...1930 թվականից մինչև վերջին ժամանակներս (1936թ.) Հայաստանի Կ/բ/Կ Կենտրոնի ղեկավար կորիզում գրեթե երբեք չի եղել լիարժեք համատեղ աշխատանք եւ միություն: ...Խանջյանին Հայաստանի Կ/բ/Կ Կենտրոնի քարտուղար նշանակելուց հետո, համատարած կոլեկտիվացման հետ կապված դժվարությունների շրջանում, Խանջյանի դեմ ազգայնամոլության մեղադրանք առաջ քաշվեց Հ.Կոստանյան-Բանայանի, Մ.Չալյանի, Մանդալյանի, Աթանես Ակոպովի, Գուրգեն Քալաշյանի եւ մյուս խմբերի կողմից: Ամատունին, որն այդ ժամանակ ՀԿ/բ/Կ Կենտրոնի երկրորդ քարտուղարն էր, շատ մոտ էր այդ խմբի հետ: Մյուս կողմից նրա դեմ աշխատում էր Հայաստանի Կենտգործկոմի նախկին նախագահ Կասյանի ազգայնամոլական խումբը:

«Խանջյանի բնավորության առանձնահատուկ գծերից էր նրա չափազանց վստահությունը մարդկանց նկատմամբ եւ պետք է ասեմ, որ նա երկար ժամանակ չէր հավատում, որ իր դեմ ինչ-որ պայքար է մղվում, նույնիսկ այն ժամանակ, երբ նրան փաստեր էին ներկայացնում: Կիրովի մասնակցությամբ, Հայաստանից հանվեցին առաջին խմբի բոլոր անդամները, հանվեց նաեւ Կասյանը, իսկ Ամատունին մերկացվեց որպես Լոմինաձեի կողմնակից եւ հանվեց աշխատանքից:

«Մինչեւ 1933 թվականի սկիզբը սուր պայքար չէր նկատվում (այն ժամանակ դա կոչվում էր անսկզբունքային-խմբակային պայքար, այժմ պարզ է, որ այդ ամենը կրում էր քաղաքական բնույթ): Այդ ժամանակներում անհանգստացնում էր Տեր-Գաբրիելյանի աշխատանքը: Նա գտնում էր, որ Տեր-Գաբրիելյանի մոտ ուժեղ ազգայնամոլական տրամադրություններ կան... քանի որ նա ժողկոմխորհի նախագահն էր, ապա բազմիցս Խանջյանն ասում էր, որ չի կարող նրան այս կամ այն գիշումներ չանել, մասնավորապես, խորհրդային ապարատի կադրերի ընտրության հարցում... 1935թ. հասան նրան, որ Հայաստանից տարան Տեր-Գաբրիելյանին, որի հետ այդ ժամանակ հարաբերությունները խիստ սրվել էին...»:⁵⁸

Իշխանության վերնախավում ընթացող նման պայքարը, որի առանցքն էին ազգայնամոլության մեջ փոխադարձ ուղղակի եւ անուղղակի մեղադրանքները, բացատրելի է դարձնում Ա.Խանջյանի վարքագիծը: Ս.Տեր-Գաբրիելյանի եւ Գ.Կյուլպենկյանի բանակցությունների հաջող ավարտի դեպքում, նա կարող էր մատուցել այն որպես իր վարած քաղաքականության հաղթանակ: Բայց տպավորություն է ստեղծվում, որ Ա.Խանջյանը ոչ միայն չէր հավատում հաջող արդյունքին, այլև չէր էլ ցանկանում այն: Տեղեկանալով Ս.Տեր-Գաբրիելյանի այցի մանրամասներին՝ նա անտեսեց ձեռք բերած համաձայնությունները եւ շտապ կեր-

պով հանդես եկավ իր հայտնի ճառով: Եվ թեև մեղադրանքները հնչեցին Գ.Կյուլպենկյանի հասցեին, նրանք ոչ պակաս չափով ուղղված էին նաեւ վարչապետի դեմ, որը ընդամենը մեկ ամիս դրանից առաջ սիրալիր ընդունելության էր արժանացել «իմպերիալիստական շրջանակների հետ սերտ կապեր ունեցող» նույն Գ.Կյուլպենկյանի կողմից: Ըստ էության, այդ ճառով Ա.Խանջյանը դատապարտում էր, առանց անունը տալու, Ս.Տեր-Գաբրիելյանի այցը, կասկածի տակ դնում նրա՝ Կ.Դալլաքյանի բառերով ասած, «վարկն ու հեղինակությունը» եւ դրանով իսկ ամրապնդում իր դիրքերը իշխանության վերնախավում: Իսկ թե ինչպիսին կլինեն Գ.Կյուլպենկյանի հակազդումը՝ դա, կարծես, ամենաքիչն էր հետաքրքրում Ա.Խանջյանին՝ Գ.Կյուլպենկյանի որեւէ պատասխան քայլը, սկսած ներգաղթը ֆինանսավորելուց եւ վերջացրած նրա հրաժարականով, կարելի էր ներկայացնել որպես կոմունիստ Խանջյանի հաղթանակը կապիտալիստ Կյուլպենկյանի հանդեպ:

Այս կապակցությամբ հարկ է նկատել, որ թե այս եւ թե մյուս այլ դեպքերում, փորձելով բացատրել Ա.Խանջյանի վարքագիծը, նրա՝ որպես Հայաստանի առաջին դեմքի գործունեությունը, ակամա մոռացության են տրվում նրա անձնային հատկանիշները, որոնք ձեւավորվել էին նրա կյանքի յուրահատուկ պայմանների ընթացքում:

Ա.Խանջյանը ծնվել էր 1901թ. Վանում, ուստի եւ նրա մանկության տարիները հանրակրթական պատմական այնպիսի իրադարձությունների հետ, ինչպես Առաջին Աշխարհամարտը, ցեղասպանությունը, տեղահանումները, հայրենի օջախի, հարազատների անվերադարձ կորուստը եւ այլն, ինչը անխուսափելիորեն իր բացասական ազդեցությունը ունեցավ ինչպես ողջ հայ ժողովրդի, այնպես էլ այդ դեպքերի ականատես եւ մասնակից յուրաքանչյուր հայ մարդու հոգեբանական քննադրերի ձեւավորման վրա: 1917թ. սկսած նա զբաղվում է հեղափոխական գործունեությամբ եւ այդ ընթացքում երկու անգամ ձերբակալվում: Հայաստանում խորհրդային կարգերի հաստատումից անմիջապես հետո եւ մինչեւ 1921թ. հակաբոլշեւիկյան ապստամբությունը, Ա.Խանջյանը աշխատում է որպես Հայկոմկուսի Երեւանի կոմիտեի քարտուղար: Այսպիսով, 16 տարեկանից Ա.Խանջյանը ապրեց եւ գործեց հեղափոխական ժամանակներում, երբ Թալեյրանի խոսքերով՝ «ընդունակություն է համարվում միայն հանդգնությունը, իսկ վեհությունն՝ միայն ծայրահեղությունը»:⁵⁹ Կյանքի նման ուղի էին անցնում իր հասակակիցներից շատերը՝ հեղափոխությունն ապրող երկրի համար դա բնական երեւոյթ է, եւ այդ առումով Ա.Խանջյանի կենսագրության այդ հատվածը նման էր իր գործընկերների ապրած տարիներին:

1921թ. Ա.Խանջյանը կուսակցության որոշումով մեկնում է Մոսկվա՝ Կոմունիստական համալսարանում ուսանելու նպատակով, իսկ մեկ տարի անց՝ Լենինգրադ, ուր վեց տարի աշխատելով կուսակցական մարմիններում՝ զբաղվում է քարոզչական աշխատանքով: «1925թ., երբ Զինուկներ Լենինգրադի տեր ու տիրականն էր, - Աշուն է Մերի Կիրքըն Մատուսյանը,- Խանջյանը քաղաքի այն կոմունիստներից էր, որը ընդդիմադիր էր Զինուկներին և բռնել էր Ստալինի կողմը: Զինուկներ-Կամենեի-Տրոցկի ընդդիմության ջախջախումից հետո, Խանջյանի դերը կուսակցության մեջ սկսեց արագ աճել: Նա մտերմացավ Սերգեյ Կիրովի հետ, որը Ստալինի աջ ձեռքն էր և որը 1926թ. ստանձնեց Լենինգրադի կուսակցական կազմակերպության ղեկավարությունը»:⁶⁰ Այդ յոթ անընդմեջ տարիների ընթացքում Ա.Խանջյանը կտրված մնաց հայ իրականությունից՝ թե իր աշխատանքի բնույթով և թե իր անձնական կյանքում, հատկապես Ռ.Վ.Կինդզբերգի հետ ամուսնանալուց հետո: Միաժամանակ, նույն այդ տարիներին, ապրելով և աշխատելով ազգային-մշակութային առումով իրեն օտար միջավայրում, նա, ինչպես և որեւէ ազգային փոքրամասնության ներկայացուցիչ, մշտապես դատապարտված էր ինքնահաստատման՝ որպես մասնագետ, որպես անհատ, որպես հայ:

1928թ. կուսակցության որոշումով Ա.Խանջյանը վերադառնում է Հայաստան, մոտ երկու տարի աշխատում է որպես Հայաստանի Կոմկուսի կենտրոնի երկրորդ, իսկ 1930թ. մինչև իր կյանքի ավարտը՝ առաջին քարտուղար: Եվ նորից նրա առջև կանգնեց ինքնահաստատման խնդիրը: Այս անգամ Խորհրդային Միության մասշտաբով, որպես թեև ամենափոքր, բայց և այնպես մի ամբողջ հանրապետության ղեկավար: Եթե այս հարցում նրան կարող էին որոշ չափով օգտակար լինել իր կապերը Մոսկվայում և Լենինգրադում, ապա այլ էր իրավիճակը Հայաստանի ներսում: Այստեղ նա պետք է ապացուցեր սեփական կարողությունները իրեն անծանոթ միջավայրում, ուր կային փորձառու, հեղինակություն և հարգանք վայելող գործիչներ, ինչպես, օրինակ, Ս.Կասյանը, Աս.Մուսվյանը, Ս.Տեր-Գաբրիելյանը, Ար.Երզնկյանը, պետք է ճիշտ կողմնորոշվեր իշխանության ներսում ընթացող թաքնված պայքարում, պետք է կարեւորագույն որոշումներ ընդուներ ոչ միայն զուտ կուսակցական հարցերի, այլև Հայաստանի սոցիալ-տնտեսական և մշակութային զարգացման վերաբերյալ: Բայց կար և մեկ այլ, միզուցե ամենադժվար լուծելի խնդիր՝ իր անմիջական վերադասի՝ Անդրֆեդերացիայի իշխանությունների, անձամբ Լ.Բերիայի հետ հարաբերությունները, որոնց առանցքը Հայաստանի շահերի, ինքնուրույն գործելու իր իրավունքի պաշտպանումն էր: Այս և մի շարք այլ կարեւորագույն հարցերի միաժամանակ, արագ

և ճիշտ լուծումը դժվար խնդիր էր 30-35 տարեկան, անհրաժեշտ կենսափորձ ու մասնագիտական գիտելիքներ չունեցող Ա.Խանջյանի համար: Նա, ըստ էության, միշտ գործեց մեռակ՝ չվստահելով Բերիայի դրածոներին, միևնույն ժամանակ չունեցավ մնայուն դաշնակիցներ Հայաստանի իշխանության ավանդական, «հին» վերնախավում: Կարելի է ասել, որ իր կյանքի հատկապես վերջին 5-6 տարիների ընթացքում Ա.Խանջյանը մշտապես գտնվում էր նյարդահոգեկան և ֆիզիկական (տարիներ շարունակ թոքախտով հիվանդ էր) գերլարվածության՝ սթրեսային վիճակում, ինչով էլ, հնարավոր է, բացատրվում է որոշ դեպքերում ոչ համարժեք և անհետեւողական վարքագիծը:

Ինչպես նշվեց, Գ.Կյուլպենկյանի հրաժարականի հետ կապված երկրորդ հարցը նրա այդչափ կտրուկ վճռական հակազդումն էր Ա.Խանջյանի ճառին:

Իր հրաժարականը նա պատճառաբանել էր Ա.Խանջյանի, Հայաստանի կառավարության կողմից իր անձի դեմ «անհեթեթ առարկությունով... նախատիքներ, բացարձակ անտեղի հարձակում» անելով, ինչը անհնար էր դարձնում իր՝ որպես ՀԲԸ Միության նախագահի համագործակցությունը Խորհրդային Հայաստանի իշխանությունների հետ: Ընդունելով հանդերձ, որ կային և այլ պատճառներ (այդ մասին ստորեւ), թվում է, որ իր իսկ կողմից նշվածը արդեն բավական էր հրաժարական ներկայացնելու համար: Իրենց դաստիարակությամբ ու կրթվածությամբ, մտավոր զարգացման մակարդակով, կենսափորձով ու մասնագիտական ունակություններով և ուրիշ այլ բնութագրերով Ա.Խանջյանն ու իր գործընկերները այն աստիճան անհամեմատելի էին Գ.Կյուլպենկյանի հետ, որ նման վիրավորական մեղադրանքներից հետո, Գ.Կյուլպենկյանը իսկապես որ կարող էր անբաստվաբեր համարել նույնիսկ հեռակա՝ անմակագրական, զուտ պաշտոնական շփումները նույն այդ մարդկանց հետ: Ժամանակակիցները, փորձելով տարհամոզել Գ.Կյուլպենկյանին, հաճախ բերում էին Պողոս Նուպարի օրինակը, որն անուշադրության էր մատնում Երեւանից իր հասցեին ժամանակ առ ժամանակ արվող բոլոր տեսակի և նույնչափ անհիմն մեղադրանքները: Գ.Կյուլպենկյանը, սակայն, իր անձնային հատկանիշներով խիստ տարբեր էր Պողոս Նուպարից: Լինելով ընդգծված անհատապաշտության տեր մարդ՝ թե իր գործունեության մեջ և թե անձնական կյանքում, Գ.Կյուլպենկյանը չէր կարող և չէր ցանկանա զոհաբերել իր «Ես»-ը հանուն որեւէ գաղափարի կամ վեճ նպատակի:

Դրա հետ մեկտեղ, Ա.Խանջյանի մեղադրանքները Գ.Կյուլպենկյանի հրաժարականի համար թե պատճառ էին և թե պատրվակ: Ստանձնելով ՀԲԸ Միության նախագահի պաշտոնը Պողոս Նուպարից հետո Գ.Կյուլ-

պենկյանի մասշտաբի տեր անհատը չէր կարող բավարարվել նրա գործը պարզ շարունակողի դերով, ուստի եւ իր առջեւ նպատակ դրեց երկու գերխնդիր: Վ.Մալեգյանի վկայությամբ, «Իր առաջին գործը եղաւ Միութեան Թրըսթները միացնել եւ անոր ամբողջ հիմնադրամներէն կազմել «Ազգային Թրըսթ» մը, կամ տեսակ մը «Հոլտինկ», ուր յետին նուիրատուն իր բաժինը ունենար, ուր հիմնադրամները եւ եկամուտները ճշդուէին ու սահմանուէին բաժնետիրական դրութեամբ: Խանդավառուած էր այդ գաղափարով եւ կը յուսար թէ ամէն ոք, յետին հայն անգամ, պիտի փութար իր բաժինը ունենալ հայոց այդ մեծ Թրըսթին մէջ»: Այս ծրագիրը ձախողվեց այդ տարիներին որոշ անհրաժեշտ ֆինանսական ձեւակերպումների անհրաժեշտության պատճառով: «Ասիկա իրեն ցաւ պատճառեց, կարծուածէն աւելի խոր ցաւ մը, որովհետեւ յաջողելու վարժուած մարդ մը ըլլալով չափազանց զգայուն էր ռեւէ ձախողուածքի ինչպէս նաեւ հարուածի առջեւ...»:⁶¹

Գ.Կյուլպենկյանի երկրորդ կարեւորագոյն նպատակը, որի մասին նա հայտարարեց իր առաջին իսկ ճառում, սփյուռքի ողջ հայության եւ հատկապէս Դաշնակցության համախմբումն էր Միության շուրջ: «Կը փափագէր ՀԲԸ Միութեան իտեւիկն շուրջ բոլորել նաեւ Դաշնակցականները, որ մինչեւ այդ օրը իրենց հակամարտ բրոքականտովը միշտ ջանացած էին վարկաբեկել ու քայքայել անիկա. ինք անձնապէս լուրջ արգելք մը չէր տեսներ: Բարեմտօրէն սկսաւ դիմումներ ընել այդ ուղղութեամբ, եթէ ոչ անձամբ անձին, գէթ ուրիշներու միջոցաւ: Բաց աստի համերաշխութեան կոչ մըն ալ հրատարակեց այդ առթիւ: Իր յոյսը դրած էր գլխաւորաբար Ահարոնեանի, Խատիսեանի եւ Ջամալեանի վրայ, որոնց ընձեռած էր միջակայս օժանդակութիւններ. որպէս բարոյական փոխարինութիւն՝ անոնցմէ կ'ակնկալէր փութկոտութիւն իր գաղափարին մօտենալու եւ իր ծրագիրը յաջողցնելու: Ուեւ դիտողութիւն չըրիք իրեն այդ մասին, գրում էր Վ.Մալեգյանը, որը, ի դեպ, Սահմանադրական Ռաւնակար կուսակցության հիմնադիրներից էր, - եւ մանաւանդ զգուշացայ կարծիք յայտնել, իր վրայ չի ձգելու համար այն տարաբնույթի թէ մենք բացարձակապէս հակառակ ենք այդ գաղափարին կամ չենք հաւատար անոր իրականացման, ինչ որ սակայն մեր ներքին խոր համոզումն էր: Եվ ստուգի կիւլպենկեան հաստատեց իր բանակցութեանց առթիւ թէ Դաշնակցականներում հետ կարելի չէ ռեւէ համաձայնութիւն, թէ քանի մը աննշան անդամակցութիւններու փոխարէն անոնք կը դնէին արտառոց պահանջներ եւ անընդունելի պայմաններ: Օրին մէկը, երբ ըստ սովորութեան գրասենեակս այցելած էր, թղթածրարը սեղանին վրայ դրաւ ու սկսաւ դառնօրէն արտայայտուիլ: Յետոյ իր կրած յուսախաբութիւնը աւելի եւս

շեշտուեցաւ, երբ տեսաւ որ դաշնակցական մամուլը ընդհակառակը աւելի եւս շեշտակի կը շարունակէ իր յարձակումները Բարեգործականի դէմ, նոյն իսկ իր անձին ուղղելով ծանր մեղադրանքներ, թէ իրմէ սպասուած արմատական բարեփոխումները չի ներմուծեց Բարեգործականի մէջ, այսինքն թէ չի կատարեց իրենց անհրաժեշտ համարած մաքրագործումները, եւ թէ ե՞րբ արդեօք վերջապէս իրականութիւն պիտի գտնէ ազգային հսկայ բարեգործութեան ձեռնարկը որուն մասին կ'երեւայ թէ անցեալին մէջ խօսելու առիթ ունեցեր է: Կը յիշեմ թէ շատ ազդուեցաւ եւ ես զուրջանացի հանդարտեցնել ինքը, Պօղոս Նուպար օրինակը տալով: Փաշան, կ'ընէի, գիտէր արհամարհել եւ գործով պատասխանել այդպիսի վայրահաջութեանց: Բայց ինք շատ զգայուն էր եւ չէր հանդուրժեր իր հայրենակիցներէն եկած ռեւէ հարուած»:⁶²

Գ.Կյուլպենկյանի հոգեվիճակի մասին եմ վկայում հետեւյալ տողերը նրա 1930թ. դեկտեմբերի հայտարարությունից. «Հազիւ թէ ստանձնած եմ Հայկական Բարեգործ. Ընդհ. Միութեան Նախագահի պաշտօնս եւ ջանադիր եմ անոր բարոյական եւ միջակայս կացութիւնը ամրապնդելու, չափազանց ցաւ կը պատճառէ ինձ տեսնել որ մեր մամուլին մէկ մասը բանավէճներու անձնատուր կ'ըլլա, կասկածի տակ դնելով Միութիւնը իր ձգտումներուն վերաբերմամբ: Կը կարծէի թէ այդ դիտումնաւոր հրատարակութեանց առաջը առնելու պիտի ծառայէր այն անկեղծ եւ վճռական յայտարարութիւնը, զոր ըրի պաշտօնի ձեռնարկելուս առթիւ, եւ որուն մէջ կը պարզէի թէ, կուսակցական չըլլալով, պիտի աշխատիմ որ, ինչպէս իր անունն իսկ կը յայտորոշէ, Միութիւնը ըլլայ Տունը բոլոր Հայերուն, առանց կուսակցական կամ կրօնական խտրանքի: Որպէսզի մեր Միութիւնը կարենայ լրիւ կատարել իր Հիմնադիրներուն կողմէ նախատեսուած աշխատանքը, պէտք է որ բոլոր կուսակցութեանց վերաբերող համօրէն Հայերը սիրով նուիրուին անոր: ...Հարկ սեպեցի այս նոր յայտարարութիւնը ընել, միանգամ ընդմիջտ, եւ եթէ անիկա բարերար արդիւնք մը չուրենայ, խորապէս պիտի վշտակրիմ»:⁶³

Հարկ է նշել մեկ հանգամանք եւս: Նույն այդ տարիներին համաշխարհային տնտեսական հայտնի ճգնաժամի հետեւանքով անգլիական, ամերիկյան եւ այլ տարադրամների արժեզրկման հետ մեկտեղ, սակարաններում մեծ անկում էին ապրում նաեւ արժեթղթերը, ինչը խիստ ծանր հետեւանքներ կարող էր ունենալ ՀԲԸ Միության ընդհանուր ֆինանսական վիճակի վրա: Գ.Կյուլպենկյանի համար, բնական է, խիստ անցանկալի էր մտան հեռանկարը, երբ իր անվան հետ կարող էր կապվել մինչ այդ Պօղոս Նուպարի նախագահությամբ քսանհինգ տարի ֆինանսապես կայուն Միության սնանկացումը:

Այս տարաբնույթ պարագաների համագումարն էլ հանգեցրեց Գ.Կյուլպենկյանի հայտնի որոշմանը: Հաջողություններին սովոր, աշխարհով մեկ հայտնի ֆինանսիստին ու գործարար մարդուն անկարելի էր գիտակցել իր անհաջողությունը առաջին հայացքից այդքան դյուրին թվացող ազգային ոլորտում: Եվ նա շտապեց օգտվել իր իսկ կողմից նախապես ստեղծված հնարավորությունից: Նրա՝ որպես ՀԲԸ Միության նախագահ արտասանած առաջին իսկ ճառի վերջին դարձվածն էր. «Ամենաերջանիկ պիտի լինիմ եթե յաջողիմ, եւ եթե անկարելի լինի, չպիտի վարանիմ հրաժարելու այս բարձր պաշտօնէս»:⁶⁴

Այդ տարիներին սփյուռքի ցուցաբերած վերաբերմունքը Գ.Կյուլպենկյանի հանդեպ չմնաց անպատասխան: Երուսաղեմի Հայոց Պատրիարք Թորգոմ արքեպիսկոպոս Գուշակյանին հղած իր նամակում նա գրում էր. «...երբ կարելի չըլլար օգնութիւնս տրամադրել կամ շարունակել, ամէնքն ալ դժգոհ կ'ըլլան եւ կարծես թէ կը խորհին թէ ոսկիի աղբիւր մը ունիմ, որ երբեք չի սպառիր եւ որմէ ամէն ոք կրնայ ուզածին պէս առնել: Այս մտայնութիւնը այն աստիճան զգուելի եղած է որ կը սկսիմ դառնօրէն ազդուիլ... Կրնամ հաւաստիացնել Ձեր Գերապատուութիւնը որ եթէ իմ Հորս յիշատակին յարգանքը չըլլար, իմ բնավայրիս համար այլեւս ոեւէ վերաբերում պիտի չունենայի: Ասիկա ըսել չէ թէ չեմ փափագիր ընել յօգուտ իմ հայրենակիցներուս ինչ որ բանաւոր կը սեպեմ, բայց վհատած եմ իմ մասիս անոնց ցոյց տուած ասպերախտութենէն եւ սինիքութենէն»:⁶⁵

2Կայացած նվիրատվություններ

Անցնում է երեք տարի, քաղաքական եւ ազգային-քաղաքական բեմում գրեթե ամեն ինչ անկողմիս է, հատկապես արժե նշել, որ դեռ ողջ է Ա.Խանջյանը եւ կարծես չկա եւ ոչ մի նախադրյալ Գ.Կյուլպենկյանի՝ իրադարձությունների կենտրոնում վերստին հայտնվելու համար: Բայց, ահա, 1936թ. հունվարին Երեւան է հասնում Հայաստանի Ժողկոմխորհի նախագահ Ա.Գուրյանին հասցեագրած Վ.Մալեզյանի նամակը, որում սսվում էր.

«...Հանույքով տեղեկացնում եմ Ձեզ այն բարի մտադրության մասին, որը օրերս առաջացավ Միության նախկին Նախագահ տ.Գալուստ Կյուլպենկյանի մոտ, մտադրություն, որի վերաբերյալ հարգելի բարերարը երկու անգամ առիթ ունեցավ անձամբ հանդիպել Թուրքիայում դեսպան քաղ. Կարախանի հետ:

«Գալուստ Կյուլպենկյանը՝ անցյալում թրքահպատակ, հեռացել է Թուրքիայից մոտ 40 տարի առաջ եւ ձեռք է բերել անգլիական հպատակություն: Այդ պատճառով Անկարայի կառավարությունը վերջերս հրապարակավ հայտարարել է, որ նա վերջնականապես զրկվել է թրքական հպատակությունից:

«Մեր հարգելի բարերարը Կ.Պոլսում ունի արժեքավոր կալվածներ, որոնք բռնագրավման ենթակա չեն որպես լքված գույք, քանի որ նա փախստական չէ պատերազմի հետեւանքով, այլ մինչ այդ է հեռացել հայրենիքից: Իր կալվածներից ստացվող շահույթը ստացել է նրա ներկայացուցիչը Կ.Պոլսում եւ աստիճանաբար հանձնել է որպես նվիրատվություն բարեգործական հաստատություններին:

«Ըստ այդ հայտարարության, տ.Գալուստ Կյուլպենկյանը օրենքով պարտավոր է հայտարարությունից հետո մեկ տարվա ընթացքում, այսինքն մինչեւ գալող ապրիլ ամիսը, կարգավորել իր բոլոր գործերը եւ իրացնել գույքը: Նրա հիմնական կալվածներն են Սելամեթ կարավանսարայը Ստամբուլում որը ժամանակին գնվել է 20.000 ֆունտ ստերլինգով, որից ստացվող շահույթը տնտեսական ճգնաժամի հետեւանքով 2.000 ֆունտ ստերլինգից ընկել է մինչեւ 700 ֆունտ ստերլինգ, այնուհետեւ Պերայում, Փաշա թաղամասում, գերմանական դեսպանատան հարեւանությամբ առաջնակարգ հողատարածք, որը ժամանակին արժեր 8-10 հազ. ֆունտ ստերլինգ:

«Եվ ահա, տ. Գալուստ Կյուլպենկյանը իրավունք ունի եւ նրան թույլատրված է իր օգտին վաճառել այդ կալվածները, բայց նա նախընտրում է նվիրաբերել դրանք Երեւանի Պետհամալսարանին, իրեն իրավունք վերապահելով հետագայում որոշել այդ նվիրատվության մանրամասները: Բայց, ինչպես ասացի, գործը շատ շտապ է, քանզի շատ քիչ ժամանակ է մնացել՝ առավելագույնը մեկ ամսվա ընթացքում պետք է սկսել գույքի փոխանցման ձեւակերպումները, որպեսզի դեռ մինչեւ ապրիլ ամիսը այդ իրավական գործողությունները ավարտվեն:

«Ներկայացնելով այս առաջարկությունը Խ. Հայաստանի կառավարության ուշադրությանը, խնդրում ենք հնարավորին չափ արագ հայտնել Ձեր նկատառումները, որպեսզի դրա համաձայն արագ ընթացք տալ գործին: Խնդրում ենք նաեւ դրա մասին հաղորդել Մոսկվայի կենտրոնական կառավարությանը, որի ներկայացուցիչ քաղ. Կարախանը արդեն գրել է Մոսկվա եւ խոստացել է 8-10 օրից Անկարա վերադառնալուն պես զբաղվել այդ գործով...»:⁶⁶

Ա.Գուրյանին ուղղած Վ.Մալեզյանի մարտի 18-ի նամակից հայտնի է դառնում, որ Թուրքիայում Խորհրդային Միության Լիազոր ներկա-

յացուցչի՝ Լ.Կարախանի (Կարախանյան) ջանքերի շնորհիվ, թուրքական կառավարության հետ կարգավորվել է օրինական ձեռակերպումների հարցը, եւ որ Գ.Կյուլպեճկյանը այդ լուրը ստանալուն պէս դեսպանին է ուղարկել լիազորագիր, ինչպէս նաեւ իր գույքային իրավունքները հաստատող բոլոր փաստաթղթերը: Նույն օրը՝ մարտի 18-ին Լ.Կարախանին հասցեագրած իր նամակում Գ.Կյուլպեճկյանը մասնավորապէս գրում էր. «...Ինչպէս եւ պատիվ ունեցա Փարիզում Ձեր վերջին այցելության ժամանակ անձամբ ներկայացնել Ձեզ, եւ հայկական կառավարության սեփական տիրակալմանն եմ նվիրաբերում ...վերջնական եւ անկասկելի ձեռով, մեր (իր եւ իր կնոջ՝ Նվարդ Կյուլպեճկյանի - Էդ.Մ.) ողջ գույքը, որը ներկայումս գտնվում է Թուրքիայում, եւ որի հիմքում են Սալամեթ Խանը՝ գտնվում է Բախչէ Կափում... , ինչպէս նաեւ Այազ փաշայում՝ Պերս վայրում գտնվող հողատարածքները, բոլորը առանց բացառության, այնտեղ գտնվող անշարժ գույքի իրավունքով: Իմ ցանկությունն է, որ անշարժ գույքից ստացված եկամուտը կամ նրա վաճառքից ստացված շահույթը տրամադրվի Հայաստանի կառավարության հոգածությանը՝ համալսարանական որեւէ շինություն կառուցելու համար, որի իրագործումը՝ Երեւանի կառավարության համաձայնությամբ, վերապահում եմ ինձ: Ընդ որում, պատիվ ունեմ կից ուղարկել լիազորագիր, որով եւ Ձեզ լրիվ ազատություն եմ տալիս Ձեր գործունեության մէջ՝ ձեռակերպումներ եւ փոխանցումներ կատարելու նպատակով... Սեփականատիրությունը հաստատող փաստաթղթերը Ձեզ կուղարկվեն այստեղից մեկ-երկու օրից, քանզի նրանք գտնվում են Լոնդոնում, ուր եւ հետագրեցի, որպէսզի անհրապաղ հասցվեն ինձ: Չգիտեմ, ինչպէս արտահայտել իմ երախտագիտությունը Ձեր այս մեծ ծառայության համար... որով դյուրացնում եք ինձ համար թանկագին ցանկության իրականացումը՝ օգտակար լինել հայ ժողովրդին, որի վերածնունդը պատիվ է բերում Խորհրդային Միության կենտրոնական իշխանություններին եւ Երեւանի կառավարությանը»:⁶⁷

Նամակում հիշատակած լիազորագիրը բժախնդրությամբ կազմված փաստաթուղթ է, որում Կ.Պոլսում եւ Ջմյուռնիայի շրջանում Գ.Կյուլպեճկյանին եւ նրա կնոջը պատկանող անշարժ գույքի նկարագրումից հետո, մանրամասն թվարկվում են այն բոլոր իրավունքներն ու լիազորությունները, որոնք նրանց կողմից վերոնշյալ նպատակով տրվում էին Լ.Կարախանին: Եվ թվում է, թե գործի հաջողությունը ապահովված է՝ առկա են Մոսկվայի համաձայնությունը, Լ.Կարախանի պատրաստակամությունը, բոլոր անհրաժեշտ փաստաթղթերը: Հենց նման վստահ տրամադրությամբ է գրված Վ.Մալեզյանի ապրիլի 27-ի նամակը Հ.Գարակյոզյանին, որում նա, հույս հայտնելով, որ Լ.Կարախանը արդեն հաջողությամբ լու-

ծել է Գ.Կյուլպեճկյանի գույքի ձեռակերպման հարցը, ոգևորությամբ ներկայացնում է վերջինի առաջարկը՝ վաճառքից ստացած դրամով կառուցել թանգարան-գրադարան, որին, ըստ Վ.Մալեզյանի, հնարավոր է, կփոխանցի իր հայտնի հավաքածուների մի մասը:

Բայց անցնում է եւս տասնչորս ամիս, եւ 1937թ. մայիսին Վ.Մալեզյանը ստիպված է նորից դիմել Ա.Գուլյանին. «Ամիսներ անցան եւ չի կարողացանք ռեւէ տեղեկություն քաղել այս գործողութեան մասին, ո՛չ Անգարայի եւ ո՛չ ալ տեղույս դեսպանատուներէն: ...Մինչեւ այսօր թե՛ Բարերարին եւ թե՛ մեր Միութեան կողմէ կատարուած բոլոր դիմումները, տեղս, Պոլիս եւ Երեւան, ապարդիւն մնացին, ու տակաւին չենք գիտեր թե՛ գործը ի՞նչ վիճակի մէջ կը գտնուի: ...Մեր մեծանուն բարեկամը եւս անձնապէս գրեց քաղաքացի Գարախանին: Մեզի կը թուի որ եթէ չէ կրցած պէտք եղածը ընել, փափագելի է որ իր քով գտնուած թուղթերը վերադարձնէ, որովհետեւ ուղիղ չէ տարտամութեան մէջ թողուլ այսպիսի կարեւոր գործ մը»:⁶⁸

Վ.Մալեզյանի այս եւ հետագա նամակները մնացին անպատասխան: Խորհրդային Միության պատմության մէջ 1937 թվականը Ստալինի կազմակերպած զանգվածային բռնադատումների հայտնի շրջանն էր, որի առաջին զոհերն էին պետական եւ կուսակցական գործիչները: Հայաստանում, որպէս ժողովրդի թշնամի, հակահեղափոխական, ազգայնական եւ տրոցկիստ հայտարարվածների թվում էին գրեթե բոլոր այն պաշտոնյաները, որոնք ղեկավարում եւ իրականացնում էին հայկական սփյուռքի հետ տարվող աշխատանքը՝ Ա.Խանջյան, Ա.Եսայան, Ա.Երզնկյան, Դ.Ծափվերդյան, Ս.Տեր-Գաբրիելյան եւ շատ ուրիշներ (այդ մասին ավելի մանրամասն գրքի հաջորդ մասում): Նման պայմաններում, երբ որեւէ շփում արտասահմանի հետ՝ ձեռից եւ բովանդակությունից անկախ, իրապէս մահացու վտանգ էր սպառնում ուզած մարդուն, Վ.Մալեզյանի հետ կապը ի պաշտոնն շարունակում էր պահպանել Հ.Գարակյոզյանը: Վ.Մալեզյանը, տազնապով մեջբերելով նրա «ենթադրությունը, որ ռեւէ դրական ձեռնարկ չէ կատարուած, հետեւաբար անելորդ է այլեւս յոյս ունենալ այդ խնդրի յաջող կարգադրութեան մասին», Ա.Գուլյանին հղած իր վերջին նամակներից մեկում գրում էր. «Պէտք է անկեղծօրէն խոստովանինք թե՛ մեր մտաւոր հասկացութեան մէջ չի սղմիր քաղ. Գարախանի պահած լուրթինը եւ ցոյց տուած անտարբերութիւնը, որուն հետեւանքը այն կ'ըլլայ որ մեր սիրելի Համալսարանը կը գրկուի կարեւոր բարիքէ մը, եւ գուցէ բարերարին կալուածներն ալ կը գրաւուին որպէս օտարահպատակի մը:

«Ուստի եւ անգամ մը եւս թախանձագին պիտի խնդրէի որ Ձեր բարձր հեղինակութեամբը հաճիք Մոսկուայի եւ Անգարայի մէջ հետապնդել այդ կարեւոր հարցը, եւ մեզի հաղորդել վճռական տեղեկութիւն մը, որպէսզի գոնէ գիտնանք թէ խնդիրը ուր հանգամ է»:⁶⁹

Եվ Ա.Գուլոյանը իսկապէս որ դիմում է Մոսկվա. Հայաստանի կառավարությունը՝ որպէս շահագրգիռ կողմ, ոչ պակաս չափով ցանկանում էր պարզել հարցի այդչափ երկար ժամանակ չլուծված մնալու պատճառը: 1937թ. օգոստոսի 19-ին նա Խորհրդային Միության Արտաքին գործերի ժողկոմիսար Մ.Լիսովիցովին է հասցեագրում հետևյալ գրությունը.

«Անցած տարվա մարտ ամսին... ձեր հեռագրական հարցումի՛ն՝ քաղ. Կյուլպենկյանից նվիրատվություն ընդունելու հնարավորության մասին, որը բաղկացած է Թուրքիայում գտնվող շինություններից եւ այլն, տվեցի՛նք մեր սկզբունքային համաձայնությունը: Հարցի հետագա լուծումը մեզ հայտնի չէ:

«Վերջերս մեզ են հասել մի շարք նամակներ Փարիզի Հայկական Բարեգործական Միությունից, որոնցում նա տեղեկացնում է, որ Կյուլպենկյանի լիազորագիրը այդ գույքը ընդունելու եւ իրացնելու իրավունքի վերաբերյալ, փոխանցվել է Անկարայում ԽՍՀՄ նախկին Լիազոր Ներկայացուցիչ Կարախանին՝ Կյուլպենկյանի 1936թ. մարտի 18-ի նամակին կից: Հայկական Բարեգործական Միությունը 1937թ. հուլիսի 8-ի իր նամակում գրում է, որ ոչ ինքը եւ ոչ էլ Կյուլպենկյանը տեղյակ չեն գործի ընթացքի մասին, բայց իրենց ունեցած տվյալներով, Անկարայում ԽՍՀՄ Լիազոր Ներկայացուցչի կողմից իբր որեւէ քայլ չի ձեռնարկվել թուրքական իշխանությունների մոտ:

«Մեզ հասած փաստաթղթերից եւ, մասնավորապէս, Կյուլպենկյանի կողմից Կարախանի անունով տված լիազորագրից, որը կից ուղարկում ենք, կարելի է տեսնել, որ գույքը պատկառելի գումար է կազմում, ուստի նպատակահարմար կհամարելի անհրաժեշտ քայլեր ձեռնարկել թուրքական իշխանությունների մոտ Կյուլպենկյանի գույքի ստացման եւ իրացման ուղղությամբ:

«Հայաստանի Ժողկոմիսորին խնդրում է Ձեզ համապատասխան կարգադրություններ տալ Անկարայում ԽՍՀՄ Լիազոր Ներկայացուցչին մեր լիազորագրի ընդունման եւ Հայաստանի Պետհամալսարանի համար Կյուլպենկյանի գույքի իրացման վերաբերյալ: Խնդրում են մեզ տեղյակ պահել Ձեր կարգադրությունների մասին»:⁷⁰

Գ.Կյուլպենկյանի այս չկայացած նվիրատվության պատմությունը բազմաթիվ հարցեր է առաջացնում: Որքանո՞վ էր իրական, որ Խորհրդային Միության բարձրաստիճան պաշտոնյան՝ նրա դեսպանը Թուրքիա-

յում, նույն այդ երկրի դատական եւ այլ մարմիններում անձնապէս ներկայացնել անգլիահպատակ հայազգի միլիոնատիրոջ շահերը, կապված Թուրքիայի տարածքում նրա կալվածքների վաճառքի հետ, որից ստացված հասույթը պետք է տրամադրվեր Երեւանի համալսարանին: Հարցը էլ ավելի տեղին է դառնում, նկատի առնելով Գ.Կյուլպենկյանի՝ որպէս «հակախորհրդային իմպերիալիստական ինտերվենցիայի» «անմիջական հովանավորողի» դատապարտումը դրանից ընդամենը 3-4 տարի առաջ: Խորհրդային Միության պատմությանը ծանոթ մեկի համար այդ հարցի պատասխանը պետք է որ բացասական լինի: Բայց այդ դէպքում, ի՞նչ նպատակ էր հետապնդում Խորհրդային Միության ղեկավարությունը, տալով դեսպան Լ.Կարախանին իր աննախադէպ համաձայնությունը՝ պաշտպանելու Գ.Կյուլպենկյանի շահերը: Միգուցե այստեղ արժէ հիշել, որ Պետական-քաղաքական միացյալ վարչության (ՕԳՊՈ) նախկին բարձրաստիճան պաշտոնյա Գ.Աղաբեկովը, վերլուծելով ՕԳՊՈ-ի եւ Արտաքին գործերի ժողկոմիսարիատի փոխհարաբերությունները, դեռեւս 1931թ. գրում էր. «Անկասկած, ՕԳՊՈ-ի ոխերիմ թշնամին Լիսովիցովն էր: Մյուս կողմից, այդ հայտնի լեյտենանտը, Կարախանը, որը, ի դէպ, անձնական պատճառներ ուներ պարտական լինելու Լիսովիցովին, թաքուն համակրում էր ՕԳՊՈ-ին»:⁷¹ Իսկ Գ.Կյուլպենկյանի անսահման վստահությունը Լ.Կարախանի հանդէպ չէ՞ր բացատրվում արդյոք նրա ցանկությամբ՝ ոչ միայն ապահովել նվիրատվության իրագործումը, այլեւ վերականգնել իր հարաբերությունները խորհրդային իշխանությունների հետ:

Ա.Գուլոյանի դիմումը Մ.Լիսովիցովին մնաց անպատասխան. Կարախանը մինչ այդ արդեն ետ էր կանչվել Մոսկվա եւ մի շարք այլ անվանի դիվանագետների նման գնդակահարվեց 1938թ.:

Երկրորդ Աշխարհամարտի ավարտին, երբ հաղթանակած դաշնակիցները ձեռնամուխ էին եղել հետպատերազմյան աշխարհի վերածեմանը, Խորհրդային Միության նպատակներից էր վերադարձնել Առաջին Համաշխարհային պատերազմից հետո Թուրքիային անցած տարածքները: Այդ ուղղությամբ տարվող քաղաքականության բաղկացուցիչ տարրերն էին, օրինակ, Ի.Ստալինի աննախադէպ հանդիպումը Ամենայն Հայոց հայրապետության տեղապահ Գեորգ արքեպիսկոպոս Չորեքչյանի հետ 1945թ. ասրիլին, սփյուռքահայերի զանգվածային նոր ներգաղթի կազմակերպումը եւ այլն: Իր հերթին սփյուռքի հայության հիմնական զանգվածը, ոգեւորված Խորհրդային Միության նման քաղաքականության հեռանկարներով, փորձեց թե իր ուժերի՝ չափով օժանդակել այդ քաղաքականությանը եւ թե առավելագույնս օգտվել ստեղծված բարեն-

պատասխանատվությունը հարմար ակտիվ վերստին վերադառնալ Գ.Կյուլպենկյանի նվիրատվության հարցին, ըստ երեւութիւն, ակտի առնելով նաեւ նրա 16.000 դոլարով մասնակցությունը ներգաղթի հանգանակությանը: «Միութիւն» ամսագիրը, հիշեցնելով, որ տասը տարի առաջ Գ.Կյուլպենկյանը «Թուրքիոյ մէջ իր ունեցած մեծարժէք կալուածները (այսօրուան արժէքով 200.000 անգլ. ոսկի) Երեւանի Պետ. Համալսարանին տրամադրեց», այնուհետեւ տեղեկացնում էր. «Սոյն կարեւոր նուիրատուութիւնը իրագործելու համար նոր դիմումներ կատարուեցան ՀԲԸ Միութեան կողմէ, եւ այդ հարցը Սովետ դեսպան Կ.Նովիբօֆի միջոցաւ Մոսկուայի Կեդր. Կառավարութեան եւ Երեւանի Ժողկոմխորհի եւս նկատողութեան փոխանցելու համար՝ անձամբ Ուաշինգթօն գացին Միութեան փոխ-նախագահ Տ. Լեւոն Կերտան եւ վարիչ-պատուիրակ Տ.Վահան Մալեզեան, որ այդ առթիւ յիշատակագիր մը ներկայացնելով Ն.Վսեմութեան, Խ.Հայաստանի հետ ՀԲԸ Միութեան յարաբերութիւնները սերտացնելու եւ զարգացնելու խնդրանքը եւս ըրին»:⁷² Եվ նորից անորոշ, բայց ըստ էության բացասական պատասխաններ, միայն թէ այլ հեղինակությամբ: «Պ.Գալուստ Գյուլբենկյանի Թուրքիայի կալվածներին վերաբերող փաստաթղթերը նվիրատուին վերադարձնելու մասին,- Վ. Մալեզյանին 1947թ. դեկտեմբերին ուղղած իր նամակում գրում էր Հայաստանի Մինիստրների Խորհրդի գործերի կառավարիչ Ա.Ախչարումյանը,- ինչպէս հայտնել ենք մեր այս տարվա ապրիլի 21-ի նամակում, ժամանակին համապատասխան հրահանգներ տրված են: Սակայն, քանի որ այդ փաստաթղթերը, ինչպէս երևում է Ձեր նամակից, դեռեւս չեն վերադարձված Պ.Գյուլբենկյանին, մենք կրկին անգամ հիշեցում ենք արել համապատասխան օրգաններին, խնդրելով արագացնել փաստաթղթերի առաքումը՝ ՀԲԸՄ կամ Պ.Գյուլբենկյանի Լիսթոնի հասցեով»:⁷³

Այդ նամակում քննարկվող հիմնական նյութը, սակայն, այլ էր՝ Էջմիածնի Մայր Տաճարի վերանորոգման ֆինանսավորումը նույն Գ.Կյուլպենկյանի կողմից: ՀԲԸ Միության միջնորդությամբ մի կողմից Գ.Կյուլպենկյանի եւ մյուս կողմից՝ Հայաստանի կառավարության միջեւ ընթացող բանակցությունների համար փորձաքար հանդիսացավ Գ.Կյուլպենկյանի առաջարկությունը կառավարության հետ պայմանագիր կնքելու վերաբերյալ: Հայաստանի կառավարությունը մերժեց այն, բերելով հետևյալ փաստարկը. «Տաճարի վերանորոգման համար կառավարության կողմից պայմանագիր ստորագրելը կնշանակէր Հայ Եկեղեցու սուվերեն իրավունքներու խախտում»:⁷⁴ Հարցի էությունը պարզ է դառնում Գ.Կյուլպենկյանի՝ կաթողիկոս Գեորգ Զ-ին ուղղած նամակից, որում նա, հայտ-

նելով իր երախտագիտությունը ստացած կոնդակի համար, գրում էր. «Ինքնաբոխ զգացումով մըն էր որ առաջադրեցի ստանձնել մեր նուիրական Մայր Տաճարի նորոգութեան ծախքը, առ այդ տրամադրելով 100.000 տոլարի գումար մը, պայման դնելով սակայն որ անուս չի յիշատակուի բնաւ ցորքան այդ ծրագիրը չէ գործադրուած: Յետոյ, տեսնելով որ այդ գումարը գուցէ անբաւական կը համարուի, սիրայօժար 50.000 տոլար եւս աւելցուցի, որպէսզի ճարտարապետներուն կողմէ նախատեսուած հիմնական բոլոր նորոգութիւնները ամբողջովին կատարուի, առանց յաւելուածական գումար պէտք ցոյց տալու յառաջիկային»:

«Այսուհանդերձ, համոզում գոյացուցի որ այդ 150.000 տոլարը դնելով ուղղակի Ձեր վեհափառութեան տրամադրութեան ներքեւ, դարձեալ պիտի չի բաւէր ծրագրուած արմատական նորոգութեանց, եթէ Խ.Հայաստանի կառավարութիւնը իր թանկագին բարեացակամութեամբ ու պետական հեղինակութեամբը ինքն իսկ չի ստանձնէ այդ ծանրահոգ եւ բազմածախս ձեռնարկին գործնական ղեկավարութիւնը: Բարեբախտաբար, անցեալ տարուան ընթացքին, իր պաշտօնական հեռագրովը Երեւանի կառավարութիւնը հաղորդեց Նիւ Եորք թէ առաջադրած պայմաններս լիապէս ընդունուած են, որուն վրայ, բարեկամներուս տէարք Ա.Գարակէօզեանի (Արշակ Գարակոչյան՝ ՀԲԸ Միության նախագահը 1942-1953թթ.-Էդ.Մ.) եւ Վ.Մալեզեանի հետ համախորհուրդ, ստորագրեցի Համաձայնագիր մը, ուր մի առ մի նշանակուած են այն կարեւոր կէտերը որոնց իր համամտութիւնը յայտնած էր բարեխնամ Կառավարութիւնը: Յետագային սակայն, այս վերջինը յարմար չի դատեց իր կարգին հաստատել գոյացած համաձայնութիւնը, որով խնդիրը մնաց առկախ: ...ինչպէս որ Ձեր Ս.Օծութիւնը եւս կը յայտարարէ, «ներկայ պայմաններում 150.000 տոլարը եւ ոչ մի դէպքում չի կարող համարուի բաւարար», եթէ, իմ տեսութեանս համաձայն, պետական միջոցներով գլուխ չի հանուի, այսինքն նպաստաւոր սակով չի փոխարինուի տոլարները»: Նամակի վերջում նշվում էր. «Կը խորհիմ նաեւ որ աշխարհիս ներկայ խոռվեալ վիճակը արդէն իսկ նպաստաւոր մթնոլորտ չի ստեղծեր, այդպիսի հսկայ գործի մը արդիւնաւոր յաջողութեան համար, եւ թերեւս խոհական պիտի ըլլար մի քիչ հետաձգել, սպասելով յարմարագոյն ժամանակի, երբ հաւանականօրէն հանգամանքները կը դառնան աւելի թոյլատու»:⁷⁵ Գ.Կյուլպենկյանի կանխատեսումները ճիշտ էին. արդէն իջնում էր «երկաթե վարագոյրը»:

Բայց եւ այնպէս, 1955թ., Գ.Կիւլպենկեանի մահից հետո հայտնի դարձավ, որ Ս.Էջմիածնի Մայր Տաճարի վերանորոգման համար, նախկին էր ավելի քան 400.000 դոլար:⁷⁶

ՆԵՐՔԱՂԱՔԱԿԱՆ ՊԱՅՔԱՐԸ ԵՎ ՀԲԸՄ ԼՈՒԾԱՐՈՒՄԸ ՀԱՅԱՍՏԱՆՈՒՄ

1935թ. աշնանից Խորհրդային Հայաստանի եւ ՀԲԸ Միության փոխհարաբերություններում սկսվեց նոր փուլ, որը պայմանավորված էր Հայաստանում ընթացող ներքաղաքական, ներկուսակցական պայքարով:

Ա. Եսայանի գրությունները

1935թ. օգոստոսի 26-ին կայացավ Հայաստանի Կոմկուսի կենտրոնի բյուրոյի նիստը, որի օրակարգում էր նաեւ «Ներգաղթի կոմիտեի կազմի մասին» հարցը: Այդ, ըստ էության, մեծ կարեւորություն չունեցող հարցի (օրակարգում այն 22-րդն էր) քննարկման ժամանակ Ժողկոմխորհի նախագահ Ա. Գուլոյանի ղեկավարած Ներգաղթի կոմիտեի աշխատանքը խստորեն քննադատվեց Հայկոմկուսի Ախտայի շրջկոմի առաջին քարտուղար Արսեն Եսայանի կողմից, որն էլ այդ օրվանից դարձավ հետագա իրադարձությունների հիմնական դերակատարներից մեկը: Անակնկալի եկած բյուրոյի անդամները որոշում են. «Առաջարկել ընկ. Ա. Եսայանին ՀԿ/Բ/Կ ԿԿ բյուրոյին գրավոր բացատրություն տալ Ներգաղթի կոմիտեի մասին ԿԿ բյուրոյում իր արած հայտարարության առիթով»:՝ Ելույթի բովանդակությունը պարզ է դառնում մամակից, որը Ա. Եսայանը մի քանի օր անց՝ սեպտեմբերի 2-ին ուղարկում է Հայաստանի Կոմկուսի կենտրոնի երկրորդ քարտուղար Ստ. Ակոպովին եւ Համամիութենական Կոմկուսի Անդրկովկասյան երկրամասային կոմիտեի

(Անդրերկրկում, որը տեղակայված էր Թիֆլիսում) առաջին քարտուղար Լ.Բերիային:

Նամակում մասնավորապես ասվում էր. «Ներգաղթի կոմիտեն ստեղծվել է մոտ 3 տարի առաջ արտասահմանից ներգաղթող հայերի ընդունման և տեղավորման աշխատանքները ղեկավարելու նպատակով, բայց իրականում կոմիտեն զբաղվել է զբաղվում է շատ քիչ՝ ներգաղթողների հարցերով... Ներգաղթի կոմիտեն սովորական մի առևտրական կազմակերպություն է՝ Ժողկոմխորհի նախագահի ղեկավարությամբ: Կոմիտեն օգտագործում է ԽՍՀՄ-ի բարյացակամ վերաբերմունքը ներգաղթողների ընդունման և տեղավորման գործի նկատմամբ, նրանց համար պետական պլաններից դուրս, առանց ֆոնդերի ստանում է դեֆիցիտ և խիստ դեֆիցիտ ապրանքներ, մասնավորապես շինանյութեր, ներկրում է դրանք Հայաստան, վաճառում տարբեր կազմակերպությունների, իսկ ներգաղթողներին գրեթե ոչինչ չի հասնում: Նրանք միայն վարագույր են Կոմիտեի առևտրական գործարքների համար: ...Կոմիտեն չի մտնում խորհրդային հիմնարկների որևէ համակարգի մեջ: Կոմիտեի գործունեությունը և նրա բավական խոշոր (Հայաստանի պայմաններում) շրջանառությունը չի ընդգրկված Հայաստանի ժողովրդատնտեսական պլանում, Հայաստան ապրանքներ ներկրելու պլանում... Ներգաղթի կոմիտեի շուրջ 3-ամյա գործունեությունը ոչ մի անգամ չի ենթարկվել ստուգման: Կոմիտեն, բացի իր ղեկավարից, հաշվետու չի և ոչ մեկին... Կոմիտեի շահույթները, որոնք՝ շնորհիվ նրա սպեկուլյատիվ գործունեության, շատ զգալի են (1934թ. մոտ 3 մլն ռուբլի՝ 6 մլն-ոց շրջանառության դեպքում, մոտավորապես այդպիսի գումար նաև այս տարի), Ժողկոմխորհի կողմից ծախսվում են պետական պլանից և բյուջեից դուրս...»: Իր գրության վերջում Ա.Եսայանը անում է հետևյալ եզրակացությունը. «Ներգաղթի կոմիտեն ակնհայտորեն սպեկուլյատիվ բնույթի առևտրական կազմակերպություն է: Ներգաղթի կոմիտեն անտեսում է խախտում է խորհրդային բոլոր օրենքները, որոնք կարգավորում են խորհրդային տնտեսական կազմակերպությունների գործունեությունը: Նրա ողջ գործունեությունը հիմնված է խորհրդային օրենքների շրջանցման, խորհրդային պետությանը խաբեության վրա: Ներգաղթի կոմիտեի ղեկավարության (այստեղ խոսելով կոմիտեի մասին՝ ես նկատի չունեմ կոմիտեի աշխատակիցներից շատերին, որոնք երեւի նույնիսկ տեղյակ էլ չեն, թե ինչ է կատարվում այդ մարմնում) քաղաքականությունը մեր կուսակցության քաղաքականությունը չէ: Այդ քաղաքականությունը չի տանում դեպի սոցիալիստական պետության հիմքերի ամրապնդում, այն տանում է դեպի բուրժուական վերասերում»:²

Ա.Եսայանը, անկասկած, քաջ գիտակցում էր, թե ինչպիսի պատասխանատվություն էր վերցնում իր վրա՝ մեծ քաղաքական մեղադրանքներ ներկայացնելով ոչ միայն Հայաստանի վարչապետին, որպես ներգաղթի կոմիտեի նախագահի, այլ դրանով իսկ նաև Հայկոմկուսի առաջնորդ Ա.Խանջյանին:

Ա.Եսայանի մեծ վարքագիծը՝ թե ելույթը և թե Լ.Բերիային ու Ստ.Ակոպովին նամակով դիմելը, հասկանալու առումով ուշադրության է արժանի հետևյալ դրվագը Ա. Խանջյանի կնոջ՝ Ռ.Վիկտորյանի վկայություններից. «1933թ. վերջին Հայաստան աշխատանքի եկան (Թիֆլիսից) Ստ. Ակոպովը և Գեորգի Ծատուրովը, առաջինը որպես Կենտրոնի երկրորդ քարտուղար, երկրորդը՝ կազմբաժնի վարիչ... 1933թ. աշնանը (Ա.Խանջյանը) ծանր հիվանդացավ և մինչև 1934թ. հունիսը բուժվում էր թոքերի վիրահատությունից: Այդ ժամանակ, նրա բացակայությամբ, Ակոպովը, չհայտնելով Խանջյանին (համարյա նրա վերադարձից անմիջապես առաջ), լեռնային շրջանների դժվարությունների կապակցությամբ կատարեց գրեթե բոլոր կադրերի վերադասավորում: Բացի այդ, Հայաստան կուսակցական աշխատանքի վերցվեցին Արսեն Եսայանը, Մուշեղ Դանիելյանը և ուրիշներ: Երբ Խանջյանը վերադարձավ, ապա առանց թաքցնելու արտահայտեց իր դժգոհությունը, որ այդ ամենը կատարվել է առանց իր համաձայնության»:³ Թիֆլիսում Ա.Եսայանը, որպես Անդրֆեդերացիայի ժողտնտխորհի նախագահի տեղակալ, աշխատել էր Լ.Բերիայի անմիջական ղեկավարությամբ և, ըստ ամենայնի, այդ ժամանակ դեռ որոշակի պատրանքներ էր տաժում նրա հանդեպ: Մյուս կողմից, Ա.Եսայանին հայտնի էր, որ Ա.Խանջյանը դիմել էր Անդրերկրկում, անպատակահաջողորեն համարելով իր՝ Ա.Եսայանի Երեսան տեղափոխելը:

Ինչպես ցույց տվեցին հետագա դեպքերը, Ա.Եսայանի այդ նամակը շատ հարմար առիթ էր, որպեսզի ոչ միայն Ներգաղթի կոմիտեն կամ ներգաղթի հետ կապված հարցերը, այլ սփյուռքի հետ Հայաստանի հարաբերությունները ընդհանրապես հայտնվեին Անդրերկրկումի, նույն Լ.Բերիայի ուշադրության կենտրոնում:

Դեպքերը այդուհետ արագ զարգացան: Սեպտեմբերի 18-ին տեղի ունեցավ Հայկոմկուսի կենտրոնի նիստը, որին մասնակցում էր Թիֆլիսից ժամանած հանձնաժողովը՝ Անդրերկրկումի քարտուղար Ս.Կուդրյավցեի գլխավորությամբ: Նիստում քննարկվող միակ հարցը՝ Ար.Երզնկյանի և Ա.Եսայանի դիմումներն էին: Բանն այն էր, որ Ա.Եսայանի դիմումից առաջ, Ստալինին և Բերիային դիմել էր նաև Հայաստանի Ժողկոմխորհի նախագահի առաջին տեղակալ Ար.Երզնկյանը, որը, Ս.Կուդրյավցեի խոսքերով, «...մի շարք ծանր մեղադրանքներ էր ներկայացրել Հայաստանի կուսակցությանը»:

տանի Կոմկուսի կենտրոնի ղեկավարությանը՝ անձամբ Ա.Խանջյանին եւ Ա.Գուրյանին»:⁴ Նա հայտնեց նաեւ, որ Ա.Եսայանը, վերոնշյալ դիմումից զատ, մի հատուկ նամակ էր գրել Լ.Բերիային, որում նրա կողմից առաջ քաշված հարցերի շրջանակը ավելի լայն էր եւ վերաբերում էր ոչ միայն Ներգաղթի կոմիտեի աշխատանքներին: Հանձնաժողովը, ծանոթանալով այդ երկու դիմումների վերաբերյալ բյուրոյի անդամների խիստ բացասական կարծիքին եւ հարցը տեղում քննելուց հետո, վերադարձավ Թիֆլիս: Հինգ օր անց, Անդրերկրկոմի բյուրոն, լսելով Ա.Կուրյանի գեկուցումը, ընդունում է որոշում՝ «Հայաստանի կուսկազմակերպության աշխատանքի մասին»: Եվս հինգ օր անց՝ սեպտեմբերի 28-ին, Հայկոմկուսի կենտրոնը Անդրերկրկոմի ցուցումով Ար.Երզնկյանին ազատեց Ժողովուրդի նախագահի տեղակալի պաշտոնից, իսկ Ա.Եսայանին ...նշանակեց ՀՕԿ-ի գլխավոր վարչության նախագահ եւ համատեղության կարգով՝ Ներգաղթի կոմիտեի նախագահ:

Ար.Երզնկյանի եւ Ա.Եսայանի դիմումների առաջացրած իրարանցումը ավարտվեց հոկտեմբերի 4-5-ին կայացած Հայաստանի Կոմկուսի կենտրոնի եւ Երեւանի քաղաքային կոմիտեի միացյալ պլենումում: Պլենումի մասնակիցները, որոնք շարունակում էին մեծ եռանդով դատապարտել Ար.Երզնկյանին եւ իրենց հավատարմությունը արտահայտել Ա.Խանջյանին, անակնկալի եկան վերջինի առաջարկությունից՝ Ար.Երզնկյանին բյուրոյի անդամության թեկնածու ընտրելու վերաբերյալ: Պարզվեց, սակայն, որ դա ոչ թե Ա.Խանջյանի նախաձեռնությունն էր, այլ Լ.Բերիայի հերթական հնարքը՝ Ար.Երզնկյանին մշտապես հսկողության տակ պահելու նպատակով: «...Մենք ոչ միայն չենք վրձնի ձեզ Հայաստանից,- մեջբերում էր Ա.Խանջյանը Լ.Բերիայի խոսքերը,- այլեւ դուրս չենք հանի բյուրոյի կազմից՝ կթողնենք ձեզ եւ կստիպենք ձեզ կատարել Անդրերկրկոմի որոշումները, իսկ եթե չկատարեք, ապա ոչ միայն դուրս կհանենք բյուրոյից, այլեւ կվճռենք կուսակցությունից: Իսկ այսօր մենք ձեզ բոլորովին ձեռք չենք տա»:⁵

Ա.Եսայանի պարագան, կարծես, այլ էր՝ հայտնի էր նրա մոր նշանակման մասին եւ, այնուամենայնիվ, նրա հասցեին մույնպես հնչեցին ամենատարբեր մեղադրանքներ: Ինքը՝ Ա.Եսայանը, իր վերջին ելույթում դատապարտեց Ար.Երզնկյանի դիմումը, հավաստիացրեց, որ կառաջնորդվի Լ.Բերիայի ցուցումներով, իսկ իր դիմումները որակեց որպես «քաղաքական վնասակար սխալ»: Այնուամենայնիվ, ներգաղթածների հետ կապված հարցերը քննարկման առարկա չդարձան՝ ըստ երեւոյթին, Ա.Եսայանի քննադատությունը տեղին էր եւ համոզիչ: Ա.Խանջյանը ստիպված էր նշելու. «Մեր սխալը կայանում էր նրանում, որ աշխատանքի

քի այդ հատվածը մենք դիտում էինք որպես մեզ հետ, մեր կուսակցական գործերի հետ կապ չունեցող մի բան... Ներգաղթի գործին մենք չէինք նայում, ինչպես, օրինակ, մեր խորհրդային շինարարությանը, ինչպես կոլխոզներին... Ընկերներ, եկավ հանձնաժողովը, նրանք զննեցին ներգաղթածների ավանները եւ ի՞նչ տեսան: Որ մի շարք ավաններ շատ վատ տեսք ունեն... Բայց այդ ավաններում ապրում են մարդիկ, որոնք հետամնաց չեն՝ կուլտուրայի եւ այլ առումով: Մի շարք կուլտուրաներ, ինչպես, օրինակ, ծխախոտի կուլտուրան, Հայաստանում ներդրել են այդ մարդիկ: Համապատասխան մոտեցման, ճիշտ մոտեցման դեպքում այստեղ կարելի է հասնել այնպիսի վիճակի, երբ մեր ավանները կդառնան օրինակելի եւ մենք կհաբարտանանք դրանցով, եւ մենք մեր բարեկամներին ու թշնամիներին կկարողանանք ցույց տալ, թե ինչ է անում Հայաստանը իմպերիալիստների եւ նրանց գործակալներ դաշնակների եւ ազգայնականների ստոր քաղաքականության զոհերի համար: Քիչ փող չենք ծախսել, եւ այնուամենայնիվ, դուրս եկավ, որ իրականում ցույց տալու բան չունենք...»:⁶

Խիստ ուշագրավ էր Ա.Խանջյանի ելույթի հետեւյալ հատվածը Ար.Երզնկյանի մասին. «Նա մտածում էր նյութել իսկական դավադրություն, դնել այլ դիմակ, հանդես գալով ազգայնականության դեմ պայքարող մարտիկի դերում, ազգայնականություն գտնել կենտրոնի աշխատանքում, որպեսզի կատարի մեր թշնամիների հիմնական սոցիալական պատվերը՝ դաշնակների սոցիալական պատվերը՝ վարկաբեկել Հայաստանի Կոմկուսի աշխատանքը, վարկաբեկել կուսակցության ղեկավարության աշխատանքը»:⁷

Այս եւ մյուս արտահայտություններն ու որակումները պարզորոշ վկայում էին, որ Հայաստանի ղեկավարության ներսում մինչ այդ առկա հակասությունները եւ տարաձայնությունները թեւակոխել էին քաղաքական, ներկուսակցական պայքարի փուլը՝ անկախ նրանից, թե ով կամ որ կողմն էր այդ պայքարը նախաձեռնողը: Ըստ էության, Երեւանում որոշ ուշացումով սկսվում էին այն գործընթացները, որոնք արդեն տեղի էին ունեցել եւ շարունակվում էին երկրի կենտրոնում՝ Մոսկվայում: Միգուցե, այն կարեւոր տարբերությամբ միայն, որ Հայաստանում (ինչպես եւ այլ հանրապետություններում) ծավալվող պայքարում հաղթողը ամեն դեպքում նրա մասնակիցներից չէր: Դրանք միութենական եւ անդրկովկասյան իշխանություններն էին՝ Մոսկվայում եւ Թիֆլիսում, իսկ բուն պայքարի մեջ մտնող անհատներին եւ ուժերին մնում էր միայն արագ կողմնորոշվել տվյալ պահին դեպի ուժեղը: Դա մի վարքագիծ էր, որը բույնբուսական համայնքի վերջը ուղղվելու էր իրենց դեմ: «Դավադրության», «դաշնակների պատվերների» մասին հայտարարող Ա.Խանջյանը շատ շուտով

ինքն էր մեղադրվելու դրանում, իսկ նրան դատապարտողներն էին դառնալու՝ այն էլ հետմահու, նրա «հավատարիմ զինակիցները», որոնք կարճ ժամանակ անց համալրելու էին ժողովրդի թշնամիների շարքերը: Քանի դեռ առաջնահերթ խնդիրը լենինյան գվարդիայի՝ Ա.Կասյանի, Ս.Տեր-Գաբրիելյանի, Ար.Երզնկյանի չեզոքացումն էր (առայժմ ոչ ֆիզիկական ոչնչացումը), Լ.Բերիան օգտագործում էր Ա.Խանջյանին և պաշտպանում նրան: Միեւնույն ժամանակ, ոչ միայն չպատժվեց, այլև նոր պաշտոն ստացավ Ա.Եսայանը, որը Լ.Բերիայի հաշվարկներով հարկավոր էր պայքարի հաջորդ փուլում՝ արդեն նույն Ա.Խանջյանի դեմ:

Սեպտեմբերի 28-ին Հայկոմկուսի ԿԿ բյուրոյի որոշումով ստեղծվեցին նաև երկու հատուկ հանձնաժողովներ, մեկը ՀՕԿ-ի և Ներգաղթի կոմիտեի հետագա գործունեության ծրագիր մշակելու, մյուսը՝ այդ կազմակերպությունների գործերը ընդունելու և հանձնելու նպատակով: Հոկտեմբերի 19-ին Կոմկուսի կենտկոմը, էլենով հաստատված առաջարկություններից, կայացրեց որոշում ՀՕԿ-ի և Ներգաղթի կոմիտեի աշխատանքի մասին, որում հանձնարարականներ էին տրվում ներգաղթողների ընդունման և տեղավորման, նրանց համար կառուցվող ավանների շինարարության և այլ հարցերի վերաբերյալ: Հատուկ խոսվում էր Նուպարաշենի մասին: Ըստ այդ որոշման, նախատեսվում էր վերսկսել Նուպարաշեն-Երեւան ճանապարհի շինարարությունը, արագացնել էլեկտրականության անցկացումը մինչև Նուպարաշեն, բաղնիքի և կենցաղային այլ օբյեկտների կառուցումը, կազմակերպել հացի արտադրությունն ու վաճառքը ավանում: Ամենակարեւորն այն էր, որ նշելով ջրմուղի կառուցման ուշացումը, նպատակահարմար չէր համարվում մոտակա երկու տարվա ընթացքում նոր շինարարություն ծավալելը Նուպարաշենում: 1935-1936թթ. նախատեսվում էր, բացի վերը նշածից, նաև ավարտել բոլոր բնակելի շենքերի կառուցումը:⁸

Դրանից առաջ էլ կառավարությունը ժամանակ առ ժամանակ անդրադառնում էր Նուպարաշենի կառուցման խնդրին, բայց սա առաջին դեպքն էր, երբ իշխանությունները, թեկուզ ոչ հրապարակապ և անուղղակի ձեւով, այնուամենայնիվ փաստում էին ավանում կենսագործունեության համար անհրաժեշտ տարրական պայմանների բացակայությունը: Բայց սա միայն սկիզբն էր, քանի որ Ա. Եսայանը իր առջեւ նաև նպատակ էր դրել պարզել, թե որքան գումարներ են ստացվել սիյուռքահայ կազմակերպություններից ու անհատներից և թե ինչպես են ծախսվել: Այդ գործում նրան մեծապես օժանդակեց Հայաստանում ՀԲԸ Միության ներկայացուցիչ Հ.Գարակյոզյանը, տրամադրելով բոլոր անհրաժեշտ փաստաթղթերը՝ կապված Հայաստանում Միության գործունեու-

թյան, Նուպարաշենի և այլ կառույցների շինարարության և ֆինանսավորման հետ: Հարկ է նշել, որ ՀԲԸ Միության գործունեության, նրա դեկավարության հետ Ա.Եսայանը ծանոթ էր դեռևս 1928թ.: Այն ժամանակ, լինելով Հայաստանի ժողովրդական տնտեսական խորհրդի նախագահ և Ժողկոմխորհի նախագահի տեղակալ, նա գործուղվել էր Փարիզ, ուր և հանդիպումներ էր ունեցել Պողոս Նուպարի և ՀԲԸ Միության կենտրոնական վարչության անդամների հետ:⁹

1936թ. հունվարի 16-ին Ա.Եսայանը գրեց իր առաջին պաշտոնական նամակը Վ.Մալեզյանին, որում տեղեկացնում էր Նուպարաշենի շինարարության նոր՝ իր պատրաստած ծրագրի մասին, որը, ըստ նրա, պետք է որ էապես արագացներ ավանի և նրա ենթակառուցների շինարարության ընթացքը: Վ.Մալեզյանը, ըստ ամենայնի, արդեն հոգնած ու հուսահատ անվերջ և անպտուղ խոստումներից, իր պատասխան նամակում, Ա.Եսայանի ծրագրերի կապակցությամբ, սահմանափակվելով զգուշավոր լավատեսությամբ, անկեղծ ձեւով ներկայացրեց Միության կարծիքը այդ խնդրի վերաբերյալ: «Չենք գիտեր,- գրում էր նա,- թե արդեօք ձեր աչքերում առջեւ ունի՞ք Նուպարաշենի վեց տարուան ամբողջական պատկերը, խճողուած՝ կնճիռներով որ ցույց կուտան թե մեկ օրէն միւսը ի՞նչ յեղաշրջումներու ենթարկուած է անոր կառուցումը, անցնող վեց տարիներու միջոցին, յատակագիծերու, նախահաշիւներու և ծրագիրներու անվերջ փոփոխութեանց, իրարու յաջորդող Ծին. հանձնաժողովներու, ճարտարապետներու և վարիչներու հակասական գործունեութեանց հետեւանքով, այնպէս որ մեր թղթածրարներուն մէջ ամփոփուած տարտամ և տարբեր տեղեկութիւնները երբեք որոշ գաղափար մը չեն տար և ընդհակառակը մեզ շփոթութեան մատնած են մինչև այսօր:

«Անշուշտ գիտէք որ անհկա անկենսունակ աւան մը եղաւ և այդպէս պիտի մնայ ցորքան խճողին չապահովեր դիւրին և արագ հաղորդակցութիւն մը Երեւանի հետ, ցորքան խմելու ջուրը բերուած չէ աւանին սիրտին մէջ իսկ, և մանաւանդ ցորքան ջրանցքը չողոզէր իր ընդարձակ հողերը որ դատապարտուած են մնալու խոպան և ամուլ: Եթէ սկիզբը երաշխարարուած չըլլար Ղոերու ջրանցքին օգտագործումը Նուպարաշենի սահմաններուն մէջ, գործնական ոգիով անտարակոյս համամիտ պիտի չըլլայինք այդ հողամասին, որ թէւ բարեբեր և գեղատեսիլ, բայց ջուրին պակասէն անմշակ մնալով բնակչութիւնը խղճալի վիճակի մէջ կը պահէ, անձկութեան մատնուած, քանի որ աշխատանքի և ապրուստի միջոցները կը պակսին ներկայ տխուր պայմաններուն մէջ»:

Անցնելով Ա.Եսայանի նամակում ակնարկված Նուպարաշենի շինարարության լրացուցիչ՝ արդեն տրամադրված 400.000 դոլարից զատ,

ֆինանսավորման հարցին, Վ.Մալեզյանը գրում էր. «Եթե ցոյց տրուած ըլլար փութկոտութիւն եւ ճշդապահութիւն, Նուպարաշէնի հանգանակութիւնը կանգ չէր առնէր, դժգոհներու, բողոքողներու նոյն իսկ սպառնալիքներու տեղատարափի մը տակ: ...Դժբախտաբար ժամանակը անցած է որ անոնց սիրտին խօսիք գեղեցիկ յուսադրումներով եւ հուսատումներով, քանզի ծրագիրներու շրջանը անցած է թերահուստներուն համար, անոնց պէտք է ցոյց տալ կատարուած գործերը... Այս պայմաններուն մէջ, թոյլ տուէք մեզի անկեղծօրէն ըսել թէ ուղիղ պիտի չըլլար նոր կառուցուելիք շէնքերուն համար մեզմէ ուզել դրամական յանձնառութիւններ, ինչ չափով ալ ըլլայ...»:¹⁰

Նոյն հունվար ամսին Ա.Եսայանի անմիջական մասնակցությամբ պատրաստուեց երեք փաստաթուղթ: Առաջինի հեղինակն էր Կոմկուսի բյուրոյի հունվարի 7-ի որոշմամբ ստեղծված հանձնաժողովը, որի անդամներն էին, Ա.Գուլոյանից ու Ա.Եսայանից զատ, Ա.Հովսեփյանը՝ ՀԿԿ Կենտկոմին կից կուսխորհրդային վերահսկողության խմբակի ղեկավարը եւ Ա.Եղիազարյանը՝ Արվեստի գործերի վարչության պետ ու Մելգոնյան ֆոնդի Գործադիր հանձնաժողովի նախագահը: Մյուս երկու զեկուցագրերի հեղինակն էր անձամբ Ա.Եսայանը: Քանի որ այդ երեք զեկուցագրերի բովանդակությունը հիմնականում համընկնում է, ստորեւ բերեմ որոշ կրճատումներով դրանցից միայն մեկը, ուր հարցի էությունը ներկայացված է ամբողջական ձևով:

*«Գաղտնի-անձամբ
ՀԿ/Բ/Կ ԿԿ Քարտուղար ընկ. Ամատունուն*

Ջեկուցագիր

Ի լրացումն բանավոր մանրամասն զեկույցի՝ արտասահմանից ստացված տարադրամի ծախսման մասին հայտնում եմ հետևյալը.

1. Վերջին տարիներին արտասահմանից տարբեր կազմակերպությունների, այն է՝ Հայաստանի Ժողկոմխորհի, ՀՕԿ-ի, առանձին հայրենակցական միությունների եւ այլն անունով, այս կամ հատուկ նպատակներով որպէս նվիրատվություն ստացվել են տարադրամ եւ արտասահմանյան ապրանքներ: Պետք է նշել, որ այդ օգնությունը եւ ստացված միջոցները երբեք չեն կենտրոնացվել մեկ հիմնարկում, ճիշտ նոյն ձեւով կենտրոնացված չի եղել նաեւ հաշվառումն ու հաշվետվությունը, ինչի հետեւանքով հիմա շատ դժվար է նշել արտասահմանից ստացված միջոցների ճշգրիտ չափը:

Իմ տրամադրության տակ եղած ոչ լրիվ նյութերից կարելի է եզրակացնել, որ վերջին 5 տարիների ընթացքում ստացվել է տարադրամ՝ ընդամենը մոտ 2.100.000 ուրբի ոսկով, ընդ որում մեծ մասը՝ մոտ 1.500.000 անմիջաբար ստացվել է Հայաստանի Ժողկոմխորհի անունով:

Ֆինանսական տեսակետից այդ օգնությունը մեծ հետաքրքրություն չի ներկայացնում, առավել կարեւոր է նրա բարոյական-քաղաքական նշանակությունը, քանի որ այդ գումարները, բացառությամբ առանձին կապիտալիստներից ստացված մի քանի խոշոր գումարների, հավաքված են ժողովրդական լայն զանգվածների շրջանում, ինչը խորհրդային պետության հանդեպ նրանց համակրանքի դրսեւորումն է:

Գրեթե բոլոր հանգանակությունները ունեն նպատակային իմաստ, այն է՝ ներգաղթողների համար ավանների շինարարություն, այդ ավաններում եւ այլ շրջաններում հիվանդանոցների, դպրոցների, մանկապարտեզների եւ մանկամուրների, թատրոնների, ակումբների եւ այլն կառուցում:

Որպէս օրինակ բերեմ մի շարք նպատակներ, որոնց համար ստացվել են գումարներ. Նուպարաշէնի կառուցման համար՝ 400 հազ. դոլար, Նոր Արաբկիրի կառուցման համար՝ 100 հազ. դոլար, Նոր Մալաթիայի կառուցման համար՝ 50 հազ. դոլար, «Խորհրդային Հայաստան» Էսկադրիլիայի հիմնադրամին՝ 5.000 դոլար, Դարուհի Հակոբյան հիմնադրամով հիվանդանոցի կառուցման համար՝ 17 հազ. անգլ. ֆունտ, Մարի Նուպար հիմնադրամով ակնաբուժարանի կառուցման համար՝ 10 հազ. անգլ. ֆունտ, Զարեհ Նուպարի հիմնադրամով գիտաշխատողների տան կառուցման համար՝ 7 հազ. անգլ. ֆունտ, Թալինի շրջանում դպրոցի կառուցման համար՝ 4.500 անգլ. ֆունտ, Ռաֆայել Մարկոսյանի հիմնադրամով էլեկտրամեխանիկական տեխնիկոմի կառուցման համար՝ 5.000 անգլ. ֆունտ, Մելգոնյան հիմնադրամով՝ 30 հազ. անգլ. ֆունտ եւ այլն:

2. Այդ գումարները, որպէս կանոն, ստացվել են Բարեգործական Միության Կենտրոնական Վարչության եւ Հայաստանի Ժողկոմխորհի միջեւ նախնական բանակցություններից հետո եւ յուրաքանչյուր հանգանակության, կտակի դիմաց տրվել են գրավոր խոստումներ՝ Ժողկոմխորհի որոշման կամ մամակների տեսքով, համապատասխան աշխատանքներ կատարելու մասին, ընդ որում, յուրաքանչյուր օբյեկտի համար կազմվել եւ արտասահման են ուղարկվել նախագծեր:

Հայաստանի Ժողկոմխորհի կողմից Բարեգործական Միությանը կամ առանձին անհատներին եւ կազմակերպություններին տրված խոստումներից շատերը մինչեւ հիմա չեն կատարվել, այդ օբյեկտների շինարարությունը կամ չի սկսվել, կամ էլ դադարեցվել (կոնսերվացվել) է, օրինակ.

ա) Մինաս Չերազի հիմնադրամով Նուպարաշենում դպրոց-արհեստանոց կառուցելու համար ստացվել է 702 անգլ. ֆունտ, բ) Տիրայր Մարգարյանի հիմնադրամով Նուպարաշենում հիվանդանոց կառուցելու համար՝ 533 անգլ. ֆունտ, գ) Սամվելյանի հիմնադրամով Նուպարաշենում մանկապարտեզ կառուցելու համար՝ 390 անգլ. ֆունտ, դ) Սեւոյանի հիմնադրամով Նուպարաշենում մանկամտուր կառուցելու համար՝ 150 անգլ. ֆունտ, ե) Սարյանի հիմնադրամով Նոր Կեսարիա ավանում մանկապարտեզ կառուցելու համար՝ 560 անգլ. ֆունտ, զ) Մ.Պալյանի հիմնադրամով Նոր Սեբաստիա ավանում մանկամտուր կառուցելու համար՝ 460 անգլ. ֆունտ, է) Սարգսյանի հիմնադրամով Նուպարաշենում թատրոն կառուցելու համար՝ 2.000 անգլ. ֆունտ, ը) Տիգրանակերտցիների հայրենակցական միությունից (ԱՄՆ) Տիգրանակերտ ավանում դպրոցի կառուցման համար՝ 366 անգլ. ֆունտ, թ) Հակոբյան հիմնադրամով Մարտունիում դպրոց կառուցելու համար՝ 342 անգլ. ֆունտ, խ) Եվդոկիացիներից Նոր Եվդոկիա ավանում մանկամտուր կառուցելու համար՝ 269 անգլ. ֆունտ, կ) խարբերդցիներից Նոր Խարբերդում դպրոց կառուցելու համար՝ 3.000 անգլ. ֆունտ:

Բոլոր թվարկած օբյեկտների վերաբերյալ տրվել են պաշտոնական խոստումներ, կազմվել են նախագծեր, ուղարկվել են արտասահման, փողերը ստացվել են: Թվարկած օբյեկտների շինարարությունը չի սկսվել, բացառությամբ Խարբերդի դպրոցի, որի շինարարությունը սկսվել է՝ կառուցվել է մեկ մասնաշենքի մի մասը, այնուհետև դադարեցվել, իսկ Հակոբյան հիմնադրամով Մարտունիում կառուցվել է դպրոցի շենքի առաջին հարկը՝ արտասահման ուղարկած երկհարկանի շենքի նախագծի դիմաց:

Այժմ Բարեգործական Միությունը իրեն տված խոստումների և նախագծերի համաձայն, պահանջում է կառուցվող օբյեկտների լուսանկարները, ինչը, հասկանալի պատճառներով, ես չեմ կարող կատարել: Բարեգործական Միությունը նույնիսկ իր օբյեկտների նկարահանման համար Երևան էր ուղարկել 3.000 մ կինոժամպավեն, որը ստացվել է օգտագործվել է այլ նպատակով:

3. Նուպարաշենի կառուցման համար ստացվել էր 400.000 դոլար: Հայաստանի Ժողկոմխորհի և Հայկական Բարեգործական Միության միջև կնքվել էր պայմանագիր, որի գրեթե բոլոր կետերը Բարեգործական Միության կողմից կատարված են, իսկ Հայաստանի Ժողկոմխորհը այդ պայմանագրով ստանձնած պարտավորությունների մեծ մասը չի կատարել: Այժմ Բարեգործական Միությունը իմ և իր ներկայացուցչի անունով գրած նամակում պահանջում է մի շարք կոնկրետ տվյալներ պայմանա-

գրի և պարտավորությունների կատարման վերաբերյալ, որոնք մենք ի վիճակի չենք ներկայացնել:

Բոլոր վերոնշյալ և մի շարք այլ գումարներ Հայաստանի Ժողկոմխորհը ժամանակին ստացել է և ծախսել: Այնպես որ, Ժողկոմխորհից գործերը ընդունելիս իրականում կար ընդամենը 12.000 ռուբլի ոսկով:

Ծախսված գումարների վերաբերյալ Ժողկոմխորհում ամբողջական հաշվետվության բացակայության պատճառով, դժվար է ասել, թե ինչի վրա են նրանք ծախսվել...

Եթե այս տարի մենք չկատարենք արտասահմանյան կազմակերպություններին, մասնավորապես Բարեգործական Միությանը տված մեր խոստումները, գործը անխուսափելիորեն կվերջանա մեծ սկանդալով: Եթե նույնիսկ Բարեգործական Միությունը չցանկանա գործ բացել մեր դեմ, ապա առանձին անհատներ և կազմակերպություններ, որոնք իրենց փողերը վստահել էին Բարեգործական Միությանը, անկասկած չեն լո՛ի և դատական գործ կսկսեն Բարեգործականի դեմ: Բարեգործական Միությունը իր մի նամակում արդեն հայտնում է, որ մի շարք հայրենակցական միություններ պահանջում են վերադարձնել իրենց փողերը, քանի որ Բարեգործական Միությունը չի կատարել ստանձնած պարտավորությունները:

Ինքնին հասկանալի է, որ այս ամենը արդեն իսկ հմտորեն մեր դեմ է օգտագործվում դաշնակցականների կողմից և հետագայում էլ՝ մեր տված խոստումներից հրաժարվելու ու Բարեգործական Միության հետ հարաբերությունների սրման դեպքում, դաշնակցականների և հակախորհրդային տարրերի համար այդ փաստերը առիթ կձառայեն մեր դեմ կատաղի կամպանիա ծավալելու և խորհրդային իշխանությունը վարկաբեկելու համար:

Չի բացառվում, որ ամենամոտ ժամանակ ինձանից վերջնական պատասխան ստանալուց հետո, Բարեգործական Միությունը դիմի Փարիզում մեր Դեսպանատանը:

Հնարավոր սկանդալից խուսափելու համար անհրաժեշտ են համարում ամբողջությամբ ընդունել Կենտկոմի Հանձնաժողովի՝ ընկ. Օսխուրովայի նախագահությամբ որոշման նախագիծը (նշված նպատակին տրամադրել)՝ Ներգաղթի կոմիտեի բոլոր ոչ նպատակային ձեռով օգտագործված շահույթները և Հայաստանի Ժողկոմխորհի արտասահմանյան ապրանքների վաճառքից ստացումները, վերցնելով այդ գումարները Հայաստանի բյուջեից, կամ էլ այդ նպատակին տրամադրել Հայաստանի բյուջեի հավելյալ ստացումները: Հայաստանի բյուջեից այդ գումարների գանձման անհնարության և հավելյալ հատկացումների պակասու-

թյան դեպքում անհրաժեշտ է այդ հարցը դնել Անդրերկրկոմի առջև, քանի որ հասունացող սկանդալը վարկաբեկում է ոչ միայն Հայաստանի Ժողկոմխորհը, այլև խորհրդային իշխանությունը ընդհանրապես:

Հայաստանի Օգնության Կոմիտեի նախագահ Ա.Եսայան:¹¹

Այս փաստաթղթի կարևորությունը դժվար է գնահատել: Տարիներ շարունակ Երևանից տարբեր, այդ թվում ամենաբարձրաստիճան պաշտոնյաների ստորագրությամբ բազմաթիվ նամակներ էին հասնում Փարիզ, որոնցում ՀԲԸ Միությանը հավաստիքներ էին տրվում նշված բոլոր կառույցների հաջող ընթացող շինարարության մոտալուտ ավարտի մասին: Տարիներ շարունակ Հայաստանի կառավարությունն ու Կոմկուսը որոշումներ էին ընդունում նույն այդ շինարարությունների հետ կապված տարբեր հարցերի վերաբերյալ: Բայց առաջին անգամ էր, որ Երևանում, այն էլ ՀՕԿ-ի նախագահի պատրաստած փաստաթղթում պարզ էր հստակ ներկայացվում էր իրական պատկերը: Եվ բանն այն չէր, որ Փարիզում անտեղյակ էին ստեղծված իրավիճակին: Ինչպես վկայում է Վ.Մալեզյանի նամակը, ՀԲԸ Միության ղեկավարությունը եթե ոչ մանրամասներով, բայց էլ այնպես հասկանում էր, որ Հայաստանի իշխանությունների խոստումներն ու գործը շատ հեռու են իրարից: Վերջինների համար, առավել ևս, Ա.Եսայանի գրությունը որևէ նոր բան չէր պարունակում: Սակայն առաջին անգամ էր, որ այն, ինչ որ գիտեին բոլորը, արձանագրվել էր ձեռակերպվել էր որպես պաշտոնական փաստաթուղթ, որն անտեսելը գրեթե անկարելի էր:

Լ.Բերիայի ի հայտ գալը

Նշված երեք փաստաթղթերի բովանդակությունից հստակ երևում է, որ դրանց ի հայտ գալը զգալի չափով պայմանավորված էր Լ.Բերիայի՝ սփյուռքի հետ Հայաստանի հարաբերություններին հատուկ ուշադրությամբ: Ծիշտ նույն այն օրերին, երբ պատրաստվում էին այդ փաստաթղթերը, Երևանում ինքնուրույն ստուգումներ էր անցկացնում նաև Անդրծողկոմի ֆինանսների ժողկոմիսար Վ.Երեմյանը: Ստուգման արդյունքների մասին նրա 1936թ. հունվարի 13-ի թվակիր հատուկ գրությունը հասցեագրված էր Լ.Բերիային, Անդրծողկոմխորհի նախագահ Գ.Մուսաբեկովին, ինչպես նաև Ա.Խանջյանին: «Տեղեկություններ ստանալով, որ Հայաստանի ժողկոմխորհի Ներգաղթի կոմիտեի գործունեության մեջ տեղի են ունեցել օրենքների կոպիտ խախտումներ, զեկուցում էր Վ.Երեմյանը, - ես, Անդրծողկոմխորհի համաձայնությամբ, անձամբ մեկնեցի

մանրագին ստուգումներ կատարելու համար: ...Ստուգման նյութերը հաստատում են, որ Ներգաղթի կոմիտեն դեռևս 1933թ. օգտվում էր Հայմատուսպառի ապարատից առևտրական գործարքներ իրականացնելու համար: Հայաստանի Ժողկոմխորհի որոշմամբ Ներգաղթի կոմիտեն 1934թ. հունվարի 1-ից գործում է լրիվ ինքնուրույն, թեև չի անցել ոչ պետական, ոչ էլ հարկային գրանցում եւ չունի կանոնադրություն: Նրա հաշվեկշիռները ներկայացվել են ուղղակի Ժողկոմխորհ եւ քննարկվել են հակառակ գործող կարգի: Համարում են լրիվ հաստատված, 1) որ Հայաստանի Ժողկոմխորհը Ներգաղթի կոմիտեի միջոցով վաճառել է անտատանյութ եւ շինանյութ չափազանց բարձր գներով, դրանով իսկ թանկացնելով շինարարության արժեքը Հայաստանում, չնայած նրան, որ կուսակցության եւ կառավարության դիրեկտիվները պահանջում էին շինարարության արժեքի իջեցում, 2) Հայաստանի Ժողկոմխորհը, Հայմատուսպառի կողմից մատակարարվող անտատանյութի համար սահմանելով վաճառքի հատուկ գին, անօրինաբար ձեռով ստեղծել էր հսկայական կուտակումներ, որոնք տնօրինել է իր հայեցողությամբ, մինչդեռ նրանք իրենց բնույթով առևտրական հավելագին են եւ ենթակա են հանձնման միութենական բյուջե: Խնդրում են Ձեզ քննարկել Խորհրդային օրենսդրության նշված խախտումների մեջ մեղավորներին պատասխանատվության ենթարկելու հարցը եւ Հայաստանի Ժողկոմխորհին պարտավորեցնել անօրինաբար յուրացված գումարները 1936թ. մուտքագրել միութենական բյուջե՝ ի հաշիվ Հայաստանի բյուջեի»:¹²

Այսպիսով, թե Ա.Եսայանը եւ թե Վ.Երեմյանը «անօրինաբար ձեռով» առաջացած գումարները առաջարկում են հետ վերցնել Հայաստանի բյուջեից, սակայն, եթե Ա.Եսայանի կարծիքով, այդ գումարներով կառավարությունը պետք է կատարեր սփյուռքահայերի առաջ ստանձնած պարտավորությունները, ապա Վ.Երեմյանի կարծիքով, նշված գումարները պետք է մտցվեն միութենական բյուջե:

Ստեղծված իրավիճակում Հայաստանի ղեկավարությունը այլևս զրկվել էր ինքնուրույն որոշումներ կայացնելու իրավունքից, եւ մնում էր միայն ենթարկվել վերադաս՝ անդրկոլկասյան մարմիններին: Իսկ վերջինները գործում էին նախանձելի արագությամբ: Վ.Երեմյանի վերոնշված գրությունից ընդամենը երկու օր անց՝ հունվարի 15-ին տեղի է ունենում Անդրծողկոմխորհի նիստ Պ.Ազնիաշվիլու նախագահությամբ, որը, քննարկելով Հայաստանի Ժողկոմխորհին կից Ներգաղթի կոմիտեի ապօրինի գործողությունների հարցը, որոշում է մեղավորներին պատասխանատվության ենթարկելու հարցը փոխանցել Հայաստանի կառավարությանը:¹³ Ի կատարումն այդ հանձնարարականի, 1936թ. փետրվարի 1-ի

որոշմամբ Հայաստանի Ժողկոմխորհը իր համաձայնությունը հայտնելով վերեմյանի նամակում բերված փաստերին եւ թվարկելով վարչական պատիժների ենթարկված պաշտոնյաներին, միաժամանակ հատուկ կետով նշում էր. «Հաշվի առնելով, որ Ներգաղթի կոմիտեում տարիների ընթացքում առաջացած կուտակումների մեծ մասը գործածվել է ներգաղթողների ընդունման, կուտորկենցաղային սպասարկման, շինարարության նպատակով, խնդրել Անդրժողկոմխորհին չթույլատրել Անդրֆինժողկոմին հանում կատարել Հայաստանի ՄՍՀ բյուջեից՝ Ներգաղթի կոմիտեի գործունեության կապակցությամբ»:¹⁴

Բայց մինչ Հայաստանի ղեկավարությունը փորձում էր մեղմացնել ֆինանսական պատժամիջոցները, Անդրերկրկոմի ղեկավարությունը Լ.Բերիայի գլխավորությամբ կիրառեց շատ ավելի լուրջ՝ քաղաքական բնույթի պատժամիջոց: 1936թ. ապրիլի 26-ին Անդրերկրկոմի բյուրոյի հերթական նիստում քննարկվեց Հայաստանի կոմկուսի կենտկոմի հաղորդումը ՀՕԿ-ի մասին, որով հանդես եկավ Ա.Խանջյանը: Նկատի առնելով քննարկման մասնակիցների կազմը՝ Լ.Բերիա, Ֆ.Մախարաձե, Ռու.Ռախմանով, Գ.Հարությունով (Անդրերկրկոմի բյուրոյի անդամության թեկնածու, Հայաստանի կոմկուսի ապագա առաջնորդը), Ա.Ամատունի եւ Ա.Եսայան, դժվար չէր գուշակել դրա արդյունքը: Լ.Բերիայի ստորագրությունը կրող որոշման առաջին կետով ՀՕԿ-ի հետագա գործունեության հարցը պետք է քննարկման մտցվեր Խորհրդային Միության կոմկուսի կենտկոմ, իսկ երկրորդ կետով Հայաստանի Ժողկոմխորհին կից Ներգաղթի կոմիտեն լուծարվում էր եւ ներգաղթողների համար ավանների շինարարության, նրանց տեղավորման եւ սպասարկման ողջ աշխատանքը հանձնվում էր ՀՕԿ-ին:¹⁵

Լուծարելով Հայաստանի կառավարությանը կից Ներգաղթի կոմիտեն՝ Անդրֆեդերացիայի ղեկավարները կարծես անվստահություն էին հայտնում Հայաստանի թե պետական եւ թե կուսակցական ղեկավարությանը: Դրա հետ մեկտեղ, սփյուռքահայության եւ ներգաղթողների հետ տարվող ողջ աշխատանքը փոխանցելով կառավարության մաս չկազմող ՀՕԿ-ին, որի ապագա գոյությունը իր հերթին դառնում էր անորոշ, անդրկովկասյան իշխանությունները, ինչպես ցույց տվեցին դեպքերի զարգացումները, նախապատրաստում էին իրենց հետագա որոշումները:

Հայաստանի ղեկավարությունը, վերադառնալով Երեւան, համաձայն ընդունված կարգի, Հայկոմկուսի կենտկոմի բյուրոյի մայիսի 4-ի նիստում պարտադրաբար իր հավանությունը տվեց Անդրերկրկոմի վերոնշյալ որոշմանը: Սակայն, Թիֆլիսում, ըստ ամենայնի, քննարկվել եւ որոշումներ էին կայացվել եւ այլ, ֆինանսական հարցերի վերաբերյալ,

որոնց Հայաստանի ղեկավարությունը, այնուամենայնիվ, չէր կարող համաձայնել: Դրա մասին է վկայում Ա.Խանջյանի եւ Ա.Գուրյանի մայիսի 26-ի նամակը Խորհրդային Միության Ժողկոմխորհի նախագահ Վ.Մուրտովին: Իր հիմնական մասում նամակը յուրահատուկ ամփոփ մի տեղեկանք է ՀՕԿ-ի արտասահմանյան մասնանյութերի գործունեության մասին: Նամակի վերջում Հայաստանի ղեկավարները մեկ անգամ եւս շեշտելով ՀՕԿ-ի քաղաքական կարեւորությունը, շարադրում են իրենց խնդրանքը.

«1) թույլատրել Երեւանի Պետհամալսարանին, Թանգարանին, Լուսժողկոմատին, Առողջապահության Ժողկոմատին եւ Կարմիր Խաչին ՀՕԿ-ի միջոցով նվիրատվությունների եւ կտակային գումարների հաշվին դուրս գրել իրենց համար անհրաժեշտ արտասահմանյան գույք եւ սարքավորումներ առանց լիցենզիաների եւ մաքսատուրքի վճարման՝ պարտավորվածությամբ օգտագործել դրանք իրենց մոտ, առանց փոխանցման եւ իրացման իրավունքի,

2) նկատի առնելով, որ ներգաղթողների ընդունումն ու տեղավորումը, ավանների կառուցումը, նրանց հատկացված հողերի յուրացումն ու ռոզոմը չեն ֆինանսավորվել եւ չեն ֆինանսավորվում պետբյուջեից (!-Էդ.Մ.), այլ իրականացվում են արտասահմանյան հանգանակությունների շնորհիվ, թույլատրել ՀՕԿ-ին հանգանակած գումարներով դուրս գրել եւ ստանալ սարքավորումներ եւ այլ ապրանքներ, դրանք մասամբ իրացնել պետական կազմակերպություններում, պայմանով, որ ստացված գումարները ծախսվեն բացառապես ներգաղթողների համար շինարարության վրա»:¹⁶

Այս շատ հմուտ ձեռով կազմված նամակի նպատակը մեկն էր՝ պահպանել ներգաղթը շարունակելու համար եղած հնարավորությունները: Հենց դրանով է բացատրվում այն մեծ, գիտակցաբար չափազանցված կարեւորությունը, որ տրվում էր ՀՕԿ-ին, որը Ներգաղթի կոմիտեի լուծարումից հետո ստանձնել էր ներգաղթողների ընդունման եւ տեղավորման ողջ աշխատանքը եւ որի ապագա գոյության հեռանկարները պարզ չէին: Ամենաէականն ու անսպասելին այն է, որ Հայաստանի ղեկավարները, ըստ երեւութի, առաջին եւ վերջին անգամ գրում են (թեկուզ եւ «գաղտնի» գրիֆը կրող նամակում), որ Խորհրդային Միության կենտրոնական կառավարությունը չի ֆինանսավորում հայերի ներգաղթը Հայաստան: Նամակի հեղինակները ամենայն հստակությամբ նշում են. սփյուռքահայերի նյութական օգնության շնորհիվ է, որ Հայաստանի կառավարությունը կարողացել է ընդունել եւ տեղավորել ներգաղթողներին: Այդ առումով խիստ հետաքրքրական է, որ հենց Ա.Խանջյանի եւ Ա.Գուրյանի

խոսքերով, այդ միջոցները առաջացել էին սփյուռքահայերի նվիրատվություններից, «մասամբ էլ Խ. Հայաստանի մշակութային զարգացման նպատակով կտակած գումարների ամենամյա հատկացումներից»: Այլ կերպ ասած, Հայաստանի ղեկավարությունը ներգաղթի կազմակերպման եւ իրագործման վրա էր ծախսում այն գումարները (կամ նրանց մի մասը), որոնք սփյուռքահայերի կողմից տրամադրվել էին նույն այդ ներգաղթողների համար երկրում ավանների, սոցիալ-մշակութային եւ այլ բնույթի հաստատությունների կառուցման նպատակով: Տրամադրած միջոցների նման օգտագործման պայմաններում անխուսափելիորեն դանդաղում կամ ընդհանրապես չէր իրականացվում նախատեսված շինությունների կառուցումը, ինչը, իր հերթին, նոր բարդություններ էր առաջացնում իշխանությունների համար թե սփյուռքի համապատասխան կազմակերպությունների եւ թե ներգաղթածների հետ իրենց հարաբերություններում: Մյուս կողմից, կառավարությունը, նշված կազմակերպությունների հետ պայմանագրեր կնքելիս, ըստ ամենայնի, տրամադրվող գումարների դիմաց ստանձնել էր պարտավորություններ, որոնք դժվար իրագործելի էին առկա ֆինանսատնտեսական պայմաններում: Այսպես, օրինակ, կառավարությունը դեռեւս 1934թ. ապրիլի 27-ի նիստում, քննարկելով Նուպարաշենի կառուցապատման հարցը, որոշում է. «Նկատի ունենալով, որ ՀԲԸՄ միջոցով հավաքված գումարը չի ապահովում վերոհիշյալ նախագծերով նախատեսված շենքերի կառուցման ավարտումը եւ ընդառաջելով նվիրատուներին, գտնել անհրաժեշտ Ժողկոմխորհի միջոցներից լրացուցիչ կերպով 541.000 ուռլի հատկացնել այդ շենքերի կառուցման համար»:¹⁷

Պետական բյուջեով չնախատեսված ծրագրերի իրականացումը Հայաստանի ղեկավարության կողմից պարտադրաբար թելադրում էր գտնել ֆինանսական միջոցների նոր աղբյուրներ, եւ հենց դրանով կարելի է բացատրել Ներգաղթի կոմիտեի վերոնշյալ տնտեսական գործարքները, որոնք ցանկության դեպքում դժվար չէր ներկայացնել որպես «սպեկուլյատիվ» գործունեություն: Այդ առումով հատկանշական է, որ Հայաստանի ղեկավարությունը մի տեսակ հանգիստ վերաբերվեց Ներգաղթի կոմիտեի լուծարմանը, քանզի նրա գործառույթները, եւ առաջին հերթին տնտեսական գործառույթները, փոխանցվեցին ՀՕԿ-ին: Սակայն, երբ Անդրերկրյամի ղեկավարությունը իր հաջորդ քայլով արգելեց վերջինի տնտեսական գործունեությունը եւ դրանով իսկ հարցականի տակ դրեց ներգաղթի հետ կապված բոլոր ծրագրերի իրագործումը, Հայաստանի առաջնորդները արդեն ստիպված էին դիմել Խորհրդային Միության կառավարության նախագահին:

Այսպիսով, 1936թ. ստեղծվել էր մի իրավիճակ, երբ Անդրերկրյամը, անձամբ Լ.Բերիան իրենց անմիջական հսկողության տակ վերցնելով Հայաստանի հարաբերությունները հայ սփյուռքի հետ, հետեւողականորեն ձգտում էին մի կողմից վարկաբեկել եւ ուժեղացնել ճնշումը Հայաստանի ղեկավարության վրա, իսկ մյուս կողմից՝ իրենց ընդունած եւ Հայաստանի համար պարտադիր բնույթ ունեցող որոշումներով հարցականի տակ էին դնում նույն այդ հարաբերությունները ընդհանրապես: Հայաստանի ժողկոմխորհին կից Ներգաղթի կոմիտեի լուծարումը, ՀՕԿ-ի հետագա գոյության անհրաժեշտության քննարկումը, ֆինանսական պատժամիջոցների կիրառման առաջարկությունները, ղեկավար անձանց հասցեին հնչած մեղադրանքները եւ այլն՝ այդպիսին էին այդ քաղաքականության առավել շոշափելի արդյունքները: Չբավարարվելով այսքանով՝ Լ.Բերիան իր հետոն գնացող նպատակների համար հետեւողականորեն շարունակում էր կուտակել նորանոր փաստեր:

Հուլիսի 2-ին Անդրժողկոմխորհի Ներքին գործերի ժողկոմիսար Ս.Գոռլիձեն Լ.Բերիային է ուղարկում հերթական հատուկ հաղորդումը Ֆրանսիայից Հայաստան ներգաղթածների մեջ տիրող տրամադրությունների մասին: «Առաջին հաղորդման մեջ նշած թերությունները (թանկություն, վատ սպասարկում, աշխատանքով չապահովում, անբավարար կենցաղային պայմաններ) մինչեւ հիմա վերացված չեն, - գրում էր նա,- եւ ներգաղթածների որոշ մասի մեջ դժգոհության պատճառ են հանդիսանում: Դրա պատճառով Նուպարաշեն ավանից մի քանի ընտանիք տեղափոխվել է Երեւան, իսկ 35 մարդ ավանի խորհրդի նախագահին են ներկայացրել հետեւյալ պահանջները. 1) կազմակերպել կանոնավոր ավտոբուսային հաղորդակցում Երեւանի եւ Նուպարաշենի միջեւ, 2) ավելացնել առեւտրական կետերի մատակարարումը առաջին անհրաժեշտության ապրանքներով եւ բանջարեղենով, 3) բարելավել ջրի մատակարարումը»: Նշելով, որ տեղացի եւ մինչ այդ ներգաղթած «հակախորհրդային տարրերը», օգտագործելով այդ թերությունները, վարում են «հակախորհրդային ագիտացիա եւ տարբեր պրովոկացիոն լուրեր են տարածում», Ս.Գոռլիձեն բերում է նման ագիտացիայի մի օրինակ. տեղաբնակներից մեկն ասել է. «Ներգաղթողները հիմար են: Մենք չգիտենք, թե ինչպես ազատվել այս իշխանությունից, իսկ սրանք իրենք են եկել այստեղ տանջվելու: Օրերս ես տեսնվեցի ու գրուցեցի ներգաղթածներից մի քանիսի հետ եւ այնպես տարա խոսակցությունը, որ նրանք հիմա զղջում են, որ եկել են այստեղ...»:¹⁸

Այս փաստաթուղթը ուշադրության է արժանի ոչ միայն բովանդակությամբ, այլեւ վրայի մակագրությամբ: Այսօր անհնար է պարզել՝ քն-

նարկե՞լ էր Լ.Բերիան այս փաստաթուղթը Ա.Խանջյանի հետ իր վերջին հանդիպման ժամանակ, թե՞ ոչ, բայց այդ ճակատագրական հանդիպմանից երկու օր անց նա այն հասցեագրում է Ա.Ամատունուն և Ա.Գուլոյանին հետևելու մակագրությամբ. «Ուշադրություն դարձրեք, ստուգեք այս տեղեկությունները և ավանդի իրական վիճակը: Քննարկեք բյուրոյում և ընդունեք բոլոր թերությունները վերացնող անհրաժեշտ միջոցներ և ընդհանրապես ստուգեք, թե ինչպես են տեղավորվել արտասահմանից եկած հայերը: Միշտ ունեցեք ձեր հսկողությունը: Ավանդներին կցեք աշխատել իմացող լավ մարդկանց: Բերիա»:¹⁹

Բերիան այս դեպքում եւս հետևում է իր հայրենակից ուսուցչի՝ Ի.Ստալինի օրինակին. գործնականում հարվածի տակ դնելով սփյուռքահայության, հատկապես ներգաղթողների հետ Հայաստանի աշխատանքը՝ նա հիրավի «հայրական» հոգատարություն է ցուցադրում նույն այդ ներգաղթածների հանդեպ: Խոսելով Լ.Բերիայի նման դիրքորոշման մասին՝ պետք է նկատի առնել մեկ հանգամանք եւս: Հարեւան հանրապետությունների, Խորհրդային Վրաստանի և Ադրբեջանի ղեկավարները հասկանալի նախանձով էին վերաբերվում Հայաստանի՝ Խորհրդային Միության պայմաններում աննախադեպ կապերին արտասահմանում բնակվող հայության հետ: Եվ որքան էլ այդ կապերը սահմանափակ լինեին, այնուամենայնիվ, դրանց դրական հետևանքները ակնհայտ էին՝ հայ բնակչության մեխանիկական աճը, ֆինանսական օժանդակությունը Հայաստանի զարգացման ծրագրերին և այլն: Հայաստանի այդպիսի, թեև ոչ մեծ, բայց ամեն դեպքում չնախատեսված առավելությունը հաշտ աչքով չէր դիտվում վրացի և ադրբեջանցի ղեկավարների կողմից, առավել ևս նկատի առնելով երեք հանրապետությունների միջև եղած հին և նոր հակադրությունները ազգային-քաղաքական, հատկապես տարածքային հարցերում: Այդ առումով Լ.Բերիայի կողմից ղեկավարվող Անդրկովկասյան պետական և կուսակցական մարմինները շատ հարմար միջոց էին Հայաստանի այդ առավելությունը չեզոքացնելու համար:

Հայաստանի քաղաքական վերնախավում տիրող վիճակը՝ ներքին համախմբվածության բացակայությունը, տարբեր, այդ թվում նաև Լ.Բերիայի «թիֆլիսյան» կադրերից և տեղացիներից կազմված խմբավորումների միջև մշտական ընդհատակյա պայքարը (Ռ.Վինդգրեբոգի վկայությամբ այն կարծիքը կար, որ «...Խանջյանը չի ուզում համագործակցել Անդրերկրյումի ուղարկված մարդկանց հետ, որ նրանց դուրս է մղում Հայաստանից»²⁰) և այլ հանգամանքներ անհնար էին դարձնում միասնական գործունեությունը հանրապետության շահերը պաշտպանելու ու հետապնդելու նպատակով: Նման պայմաններում առանձին դեպքերում

միայն (նամակը Վ.Մոլոտովին) փորձ էր արվում մեղմել Թիֆլիսից եկած հրահանգների բացասական հետևանքները: Այդ առումով ուշագրավ են Ռ.Վինդգրեբոգի խոսքերը Ա.Խանջյանի մասին. «...նա շատ ապրումներ էր ունենում և ասում էր՝ հավանաբար ինքը չի կարողանում ղեկավարել, եթե չի լինում զոնե մեկ տարի առանց ներքին պայքարի, որ հավանաբար պատճառն ինքն է և պետք է Հայաստանից գնա... որ իրեն մեկուսացած է զգում, որ ինքը չի կարող ոչ մի հարց անցկացնել, որ «Ելյակը» (Ամատունի, Ակոպով, Գուլոյան) ամեն ինչ նախապես որոշում է և իրեն կանգնեցնում կատարված փաստերի առաջ...»:²¹

Ի.Ստալինի և Վ.Մոլոտովի 1936թ. որոշումը

Այսպիսին էր իրավիճակը 1936թ. կեսերին, երբ տեղի ունեցավ մի իրադարձություն, որը, ըստ էության, հակասում էր դեպքերի զարգացման սրամաքանությանը: 1936թ. հուլիսի 21-ին ՀամԿ/բ/Կ կենտկոմը՝ ի դեմս առաջին քարտուղար Ի.Ստալինի և Խորհրդային Միության կառավարությունը՝ ի դեմս նրա նախագահ Վ.Մոլոտովի, ընդունում են նախադեպը չունեցող մի որոշում՝ «Հայ ներգաղթողներին Հայկական ԽՍՀ-ում տեղավորելու միջոցառումների մասին»: Փաստաթղթում հենց սկզբից «սխալ և անհանդուրժելի» է գնահատվում Հայաստանի կառավարության կողմից «արտասահմանյան հասարակական կազմակերպությունների և առանձին հայ նվիրատուների առջև ստանձնած պարտավորությունները չկատարելու հաստատված պրակտիկան»:²² Այստեղ բավական մանրամասն թվարկված են այն միջոցառումները, որոնք՝ ըստ Խորհրդային Միության ղեկավարների, պետք է ուղղեին Հայաստանի կառավարության և Կոմկուսի «կոպիտ սխալները»: շինարարական բոլոր աշխատանքների 50%-ը պետք է ավարտվեր 1937թ. հունվարի 1-ին, իսկ ամբողջությամբ՝ նույն տարվա հուլիսի 1-ին, միութենական և հանրապետական հիմնարկներին հստակ հաճնարարականներ էին տրվում ֆինանսավորելու և շինանյութերով ապահովելու համար, նախատեսվում էր ներգաղթողների արտադրական արտելները ապահովել անհրաժեշտ հումքով, գյուղաբնակ ներգաղթողները 3-4 տարով կամ ազատվում էին տարբեր տեսակի հարկերից, կամ էլ պետք է վճարեին կիսով չափ, վերջապես, սահմանվում էին արտասահմանի հայերից որպես նվիրատվություն տարբեր սարքավորումների և այլ ապրանքների ստացման և իրացման ձեւերը: Հատուկ նշվում էր ֆինանսավորման խնդիրը. սահմանվում էր բոլոր օբյեկտների շինարարության ընդհանուր արժեքը՝ 3.200

հազ. ռուբլի, որից 1936թ. ԽՍՀՄ Ֆինանսական հանձնարարվում էր հատկացնել 1,5 մլն ռուբլի՝ ի հաշիվ Հայաստանի բյուջեից միութենական բյուջե վերադարձման ենթակա գումարի, մնացած 1,7 մլն ռուբլին Հայաստանի Ժողովուրդի պետք է հատկացներ իր 1937թ. բյուջեից, իսկ ԽՍՀՄ Ֆինանսական պետք է հատուկ նախատեսեր այդ գումարը Հայաստանի 1937թ. կապիտալ շինարարության պլանում:

Որոշումը ուներ նաև հատուկ հավելված, ուր տրված էր այն 12 շինությունների ցանկը, որոնք պետք է կառուցվեին համաձայն Հայաստանի կառավարության ստանձնած պարտավորությունների և որոնցից 7-ը վերաբերում էին Նուպարաշենին:

Իր բովանդակությամբ և կարեւորությամբ սա իսկապես շատ տպավորիչ փաստաթուղթ էր, առավել ևս, մկատի առնելով Ի.Ստալինի և Վ.Մոլոտովի ստորագրությունները: Ըստ էության, առաջին անգամ էր, որ Խորհրդային Միության ղեկավարները նման որոշում էին կայացնում ներգաղթած հայերի վերաբերյալ, մինչդեռ շատ հայեր սկսել էին ներգաղթել Խորհրդային Հայաստան դեռևս 1921թ.: Եվ ահա միայն 1936թ. երկրի ղեկավարությունը կայացնում էր որոշում, որով ստանձնում էր ներգաղթողների տեղավորման հետ կապված հարցերի լուծումը:

Համաձայն Խորհրդային Միությունում արմատացած ավանդույթի, նույնիսկ երկրի ղեկավարների կողմից ընդունված որոշումների իրագործումը կապված էր բազմաթիվ դժվարությունների, մասնավորապես կառավարման ավելի ստորին օղակներում դրանց յուրովի մեկնաբանության հետ: Նման բախտի արժանացավ նաև նշված որոշումը: Այսպես, արդեն նույն 1936թ. վերջին Հայաստանի ղեկավարությունը, ծանոթանալով Մոսկվայից ստացած հաջորդ տարվա ֆինանսավորման ծրագրին, ստիպված էր նորից դիմել Վ.Մոլոտովին:²³

Ֆինանսավորումից բացի, ամենադժվար լուծվողը, ինչպես և նախորդ տարիներին, Նուպարաշենի ջրանցքի ու ջրմուղի խնդիրն էր: Դրանք պետք է շահագործման հանձնվեին 1937թ. հուլիսի 1-ին: Սակայն, Հայաստանի կոմկուսի կենտկոմի բյուրոն հուլիսի 3-ի նիստում ստիպված էր արձանագրել. «Ջրմուղի շինարարությունը ժամանակին չի ավարտված: ...Ժողովուրդի նախագահին (Գուլյան) միութենական մարմինների առաջ վերստին դնել խողովակները ոչ ժամանակին մատակարարելու հարցը»:²⁴ Բայց կար և հպարտանալու պատճառ. «...Նուպարաշենի 1937թ. շինարարության ծրագիրը հիմնականում ավարտված է: Լիովին ավարտված են դպրոցը, մանկամասը, մանկապարտեզը, թատրոնը, բաղնիքը և բնակելի շենքերը... Լրիվ չի ավարտվել միայն հիվանդանո-

ցի շենքը»²⁵: 1937թ. կեսերին Նուպարաշենի 100-ից ավելի բնակարաններում բնակվում էր շուրջ 1000 ներգաղթած հայ:

Չնայած այդ և ուրիշ այլ դժվարություններին ու թերություններին, այնուամենայնիվ, հարկ է հատուկ նշել, որ Խորհրդային Միության ղեկավարների հուլիսի 21-ի որոշումը խիստ կարեւոր նշանակություն ունեցավ, որի շնորհիվ Նուպարաշենում և ներգաղթողների համար կառուցվող այլ ավաններում շինարարական և բարեկարգման աշխատանքները ընթացան անհամեմատ ավելի արագ՝ դրանով իսկ նպաստելով բնակիչների կենսապայմանների որոշակի բարելավմանը:

Եթե փորձենք այս փաստաթուղթը բացատրել նախորդող դեպքերի պատճառահետեանքային կապերով, ապա կարելի է հանգել հետևյալ եզրակացություններին. ա) Խորհրդային Միության, Խորհրդային Հայաստանի իշխանությունները, կազմակերպելով հայերի ներգաղթը, միեւնույն ժամանակ ի վիճակի չէին ապահովել անհրաժեշտ պայմաններ նրանց աշխատանքի և ապրելու համար, բ) ինչպես հետևում էր Ա.Խանջյանի և Ա.Գուլյանի՝ Վ.Մոլոտովին հասցեագրած նամակից, այդ բոլոր տարիների ընթացքում ներգաղթի կազմակերպման և երկրում ներգաղթողների տեղավորման ողջ աշխատանքը միութենական կառավարության կողմից չէր ֆինանսավորվել, գ) անհրաժեշտ դրամական միջոցներ ձեռք բերելու համար իշխանությունները Ներգաղթի կոմիտեի միջոցով ձեռնարկել էին առևտրական գործունեություն, որը հակասում էր գործող օրենքներին, դ) Հայաստանի իշխանությունները ներգաղթողների տեղավորման հետ կապված բազմապիսի հարցերի լուծման էին ծառայեցնում սփյուռքահայ կազմակերպություններից (հիմնականում ՀԲԸ Միությունից) ու անհատներից այլ նպատակներով ստացված միջոցները, որի հետևանքով տարիներով չէին կատարում պայմանագրերով ստանձնած պարտավորությունները, նախ և առաջ Նուպարաշեն ավանի շինարարությունը, ե) ի հետևանս դրա՝ թե ներգաղթողների մոտ և թե սփյուռքի համապատասխան կազմակերպություններում ձեռավորվել էր բացասական կարծիք երկրի իշխանությունների, ընդհանրապես խորհրդային հասարակարգի մասին: Եթե բավարարվենք այսքանով, ապա կարելի է ենթադրել, որ Խորհրդային Միության վերին ղեկավարությունը, գիտակցելով ստեղծված անցանկալի իրավիճակը արագ շտկելու անհրաժեշտությունը, կայացրեց այդ որոշումը: Սակայն մարդկային պատմության յուրահատկությունը և, միեւնույն ժամանակ, նաև բարդությունը հենց այն է, որ նման տրամաբանական եզրահանգումներում ու բացատրություններում միշտ չէ, որ հաշվի են առնվում պատմական երեւույթների ու իրադար-

ծությունների իրական պատկերը, ամենատարբեր գործոնների, ներառյալ՝ առանձին անհատների, դերը:

Այդ որոշումից մոտ տասն ամիս առաջ Ա.Եսայանը ՀԿԿ կենտկոմի բյուրոյում Հայաստանի ղեկավարությանը մեղադրեց ներգաղթողների համար նախատեսված ավանների, հատկապես Նուպարաշենի եւ այլ կառույցների շինարարությունը ձախողելու մեջ: Այն օրերին հույս չդնելով տեղի ղեկավարության վրա նա շտապեց դիմել Անդրերկրկոմ՝ Լ.Բերիաշին, որի գլխավորությամբ աշխատել էր Թիֆլիսում եւ որի մեջ տեսնում էր կամ ուզում էր տեսնել զուտ պետական շահերով առաջընդվող գործչի: Սակայն ստանձնելով Ներգաղթի կոմիտեի եւ ՀՕԿ-ի գլխավոր վարչության նախագահի պաշտոնները՝ Ա.Եսայանը շատ շուտով զիտակեցեց, որ Բերիան բնավ էլ մտահոգված չէ ներգաղթողների ընդունման եւ տեղավորման բազմաթիվ հարցերի լուծմամբ, որ նրա համար դրանք լոկ միջոց են Հայաստանի ղեկավարությանը վարկաբեկելու, նրա վրա ճնշումը ուժեղացնելու համար: Ժամանակակիցներից մեկի վկայությամբ՝ «...Եսայանն ասում էր, որ իր մտերիմների (ենթադրում եմ՝ Հակոբ Տարոնացու, Տիգրան Զավենի, Գարակյոզյանի՝ Հայաստանում Բարեգործականի ներկայացուցիչ, պրոֆ. Հակոբյանի՝ Մելգոնյան ֆոնդի ներկայացուցիչ) եւ Հայաստան եկող պատվիրակների ու առանձին, որպես զբոսաշրջիկ եկած ՀՕԿ-ի անդամների միջոցով հայկական արտասահմանյան գաղութներին դարձնում է այն ուղին, որ նրանք իրենց եւ Հայաստանի հարցերով անմիջական դիմեն Ստալինին, քանի որ արտասահմանյան գաղութների հարցերը կորչում են ՀամԿ/ԲԿ Անդրերկրկոմում...»:26

Ա.Եսայանը, հուսախաբ եղած Անդրերկրկոմից եւ Լ.Բերիայից, միեւնույն ժամանակ չփոխեց իր բացասական կարծիքը հայաստանցի գործընկերների, հատկապես Ա.Խանջյանի մասին, որը, ըստ Ա.Եսայանի, թույլ պատրաստություն չունեցող, նույնիսկ վախկոտ աշխատող է, որը չի կարողանում պաշտպանել Հայաստանի շահերը Թիֆլիսում եւ Մոսկվայում:27

Եթե նա մտադրվել էր հետապնդել իր իսկ բարձրացրած եւ իր անմիջական պարտականությունների մեջ մտնող հարցի լուծումը, ապա մնում էր մեկ միջոց՝ դիմել Մոսկվայի կենտրոնական կառավարությանը: Բայց ինչպե՞ս: Համաձայն օրենքի ուժ ունեցող ենթակարգության, նա որեւէ հարցով պարտավոր էր դիմել նախ Հայաստանի, այնուհետեւ Անդրկովկասի երկրամասային իշխանություններին եւ ապա նոր միայն՝ այն էլ որոշակի պարագաներում, իրավունք էր ստանում դիմել Մոսկվա: Ակնհայտ էր, սակայն, որ այդ դեպքում նրա նպատակը դառնում էր անհասանելի: Հաշվի առնելով այս եւ ուրիշ այլ հանգամանքներ Ա.Եսայանը դիմում է անսովոր մի քայլի:

1937թ. հունվարի 11-ին Հայաստանի Ներքին գործերի Ժողկոմիսարիատ է կանչվում՝ առայժմ միայն որպես վկա, Հայաստանում ՀԲԸ Միության ներկայացուցիչ Հայկազ Գարակյոզյանը (Կարազոյզյան): Նրա կենսագրությանն ու աշխատանքին վերաբերող մի շարք հարցերից հետո քննիչը տալիս է մի հարց, որը, ինչպես պարզ է դառնում հարցաքննության հետագա ընթացքից, ամենակարեւորն էր նրա համար: Ահա՛ որոշ կրճատումներով, համապատասխան հատվածը Հ.Գարակյոզյանի հարցաքննության արձանագրությունից.

«Հարց.- Ե՞րբ եք դուք վերջին անգամ եղել Մոսկվայում:

Պատասխան.- 1936թ. հունիս-հուլիսին: Ես մեկնեցի Մոսկվա ՀՕԿ-ի նախկին նախագահ Ա.Եսայանի առաջարկությամբ: Մոսկվա գնալու ձեական պատճառն էր Հայաստան տեղափոխել Լենինգրադի մաքսատանը պահվող յոթ ավտոմեքենաները, որոնք Մելգոնյան ֆոնդի պատվերով առաքվել էին Ամերիկայից: Ավտոմեքենաները պատվիրվել էին նախկին Լուսժողկոմ Արտո Եղիազարյանի կողմից, ում համար՝ չգիտեմ...

Հարց.- Ա.Եսայանը ոչ մի կապ չունեւ Մելգոնյան ֆոնդի հետ, ինչո՞ւ նա միջամտեց:

Պատասխան.- Իսկապես, Եսայանը կապ չունեւ Մելգոնյան ֆոնդի հետ, բայց նրան խնդրել էր միջամտել Ա.Եղիազարյանը:

Հարց.- Ձեզանից եւ Եսայանից բացի, էլ ո՞վ մեկնեց ձեզ հետ Մոսկվա ավտոմեքենաների հարցով:

Պատասխան.- Մեզ հետ մեկնեցին նաեւ պրոֆ. Հակոբյանը եւ Տիգրան Զավենը:

Հարց.- Ի՞նչ անհրաժեշտություն կար մեկ հարցով (ավտոմեքենաների) չորս հոգու Մոսկվա մեկնելու համար եւ ի՞նչ կապ ունեիք դուք, որպես Բարեգործականի ներկայացուցիչ, այդ հարցի հետ:

Պատասխան.- Ավտոմեքենաների հարցի հետ ես՝ Գարակյոզյան, Տիգրան Զավենը եւ Ա.Եսայանը ոչ մի կապ չունեինք: Այդ հարցը հետաքրքրում էր միայն պրոֆ. Հակոբյանին: Եսայանը ինձ իր հետ վերցրեց, որպեսզի կշիռ տա պատվիրակությանը, քանի որ ես Բարեգործականի ներկայացուցիչն էի, եւ բացի այդ, ճանապարհին հայտնեց ինձ, որ Մոսկվայում, կենտրոնական մարմիններում դնելու է ներգաղթողների Նուպարաշեն ավանի կառուցման եւ բարեկարգման հարցը:

...Մոսկվա հասնելու երկրորդ օրը Եսայանը պատվիրակության քննարկմանը դրեց մի հարց՝ ի՞նչ ձեռով դիմել ԽՍՀՄ Ժողկոմխորհ Նուպարաշեն ավանի խնդրով եւ ինքն էլ առաջարկեց պատրաստել դիմում Ժողկոմխորհի նախագահի տեղակալ Մեծխուկի անունով: Դիմումը ան-

գլերեն լեզվով գրեց պատվիրակության անդամ պրոֆ. Հակոբյանը: Դիմումի հիմնական հարցը, կարծես՝ միակը, Նուպարաշենի բարեկարգման հարցն էր: Համեմայն դեպք, ինձ այդպես բացատրեցին, քանի որ, անգլերենին չտիրապետելով, ես դիմումը չէի կարդացել: Դիմումը ստորագրեցին Մելգոնյան ֆոնդի անունից պրոֆ. Հակոբյանը եւ Բարեգործականի անունից ես՝ Գարակոչյանս:

Հարց.- Ինչո՞ւ էր դիմումը գրված անգլերեն լեզվով:

Պատասխան.- Մինչեւ դիմումը կազմելը մենք խորհրդակցում էինք ԽՍՀՄ Պետսլանի աշխատակից Գագիկ Պարզյանի հետ, որը եւ խորհուրդ տվեց գրել անգլերենով, քանի որ ընկ. Մեծխուկը գիտի այդ լեզուն... Պրոֆ.Հակոբյանը անգլերեն լավ գիտի եւ որոշեց ինքն էլ գրի, քանի որ թարգմանելիս կարող էին աղավաղել մտքերը: ...Դիմումը ներկայացնելուց երկու օր անց Մեծխուկը ընդունեց մեզ՝ ինձ, Հակոբյանին եւ Տիգրան Զավենին: Երբ մենք մտանք Մեծխուկի առանձնասենյակը, այնտեղ արդեն նստած էին Ա.Եսայանը եւ Խորհրդային վերահսկողության անդամ Վեյքաուրը...

Հարց.- Պատվիրակության ուղևորությունը Մոսկվա համաձայնեցված էր ՀԿ/բ/Կ Կենտկոմի հետ:

Պատասխան.- Ես ստույգ չգիտեմ այդ մասին: Բայց Հայաստանի Ժողկոմխորհից մեզ տվեցին վկայականներ՝ հյուրանոցում տեղ տրամադրելու համար...

Հարց.- Ինչպե՞ս էր բացատրում Եսայանը իր անմիջական դիմումը ԽՍՀՄ կենտրոնական մարմիններ ներգաղթողների ավանների հարցով՝ անդրկովկասյան կազմակերպությունների գլխի վրայով:

Պատասխան.- Որեւէ բացատրություն չտվեց: Այդ մասին հայտնեց Մոսկվայի ճանապարհին»:²⁸

Մոսկվա մեկնած պատվիրակության մեկ այլ անդամ՝ Մելգոնյան ֆոնդի Գործադիր հանձնաժողովի պատասխանատու քարտուղար Հովհաննես Հակոբյանը նույնպես՝ որպես վկա, հարցաքննվել էր դրանից տասնմեկ օր առաջ՝ 1936թ. դեկտեմբերի 31-ին: Այս անունը մեզ արդեն ծանոթ է: Նա էր, որ դեռեւս 1910թ. Կահիրեում՝ Միացյալ Ընկերության անունից բանակցեց Պողոս Նուպարի հետ՝ Արեւմտյան Հայաստանում ու Կիլիկիայում դպրոցներ հիմնելու վերաբերյալ: Պատերազմից հետո Հ.Հակոբյանը, լինելով Ռամկավար-Ազատական կուսակցության գործիչ, 1922-1927թթ. «Արեւ» թերթի (Կահիրե) խմբագիրն էր: 1927թ. ներգաղթելով Հայաստան նա զբաղվում էր գիտությամբ, դասավանդում անգլերեն եւ, ինչպես նշվեց, Մելգոնյան ֆոնդի պատասխանատուներից էր:

Այս դեպքում էլ քննիչի ուշադրության կենտրոնում էր հանդիպումը Վ.Մեծխուկի հետ, մասնավորապես դիմումը անգլերեն լեզվով գրելու հանգամանքը.

«Պատասխան.- ...Եսայանը ինձ ասաց, որ պետք է դիմում պատրաստել ԽՍՀՄ Ժողկոմխորհի նախագահի տեղակալ, Պետսլանի նախագահ ընկ. Մեծխուկի հասցեով, խնդրելով օգնություն ցույց տալ Նուպարաշեն ավանի հարցում, նշելով դիմումի մեջ, որ դրա համար ստացված գումարները Հայաստանի կառավարությունը ծախսում է ոչ ուղղակի նպատակով: ...Եսայանը, Գարակոչյանը, Տիգրան Զավենը գրեցին դիմումի հայերեն տեքստը... Ես թարգմանեցի եւ խմբագրեցի...

Հարց - Իսկ ինչո՞ւ հատկապես Խորհրդային կառավարության դեկավար աշխատողին դուք դիմում էիք անգլերեն լեզվով:

Պատասխան.- Որպեսզի արտասահմանցիների տպավորություն գործենք, որպես արտասահմանյան կազմակերպությունների ներկայացուցիչներ:

Հարց.- Ինչի՞ մասին էիք դուք խոսում Մեծխուկի հետ ընդունելության ժամանակ:

Պատասխան.- Հուլիսի 8-ին ես, Գարակոչյանը, Տիգրան Զավենը Մեծխուկի մոտ ընդունելության էինք... Մեծխուկի հետ ես խոսում էի անգլերենով, զրույցը վարում էի համաձայն Եսայանի ցուցումների, այսինքն՝ խնդրում էի Միութենական կառավարության օգնությունը Հայաստանի ներգաղթողների ավաններին, նշեցի, որ ներգաղթողների ավանների համար արտասահմանյան բարեգործական կազմակերպություններից ստացված միջոցները Հայաստանի կառավարությունը լրիվ չափով չի ծախսում ուղղակի նպատակով, ինչպես նաեւ դրեցի նոր ներգաղթի հարցը, նշելով, որ արտասահմանում կա 600-700.000 հայ, մեծ մասամբ բանվորներ, որոնք մեծ ցանկություն ունեն գալ Խորհրդային Հայաստան: Եսայանի ցուցումները Մեծխուկի հետ զրույցի վերաբերյալ ես կատարեցի այն տարբերությամբ, որ նա մեր այցին եւ զրույցին բողոքի տոն էր տալիս... իսկ ես հարցը ներկայացրի ավելի լայն՝ կապելով այն հայերի արտագաղթի պատմության հետ՝ որպես իմպերիալիստական պատերազմի զոհեր, եւ խնդրեցի օժանդակել ներգաղթին Հայաստան»:²⁹

Ինքը՝ Արսեն Եսայանը, ձեռքակալվել էր դեռեւս 1936թ. նոյեմբերին, եւ հենց նրա գործի հետաքննության կապակցությամբ էլ Հ.Գարակոչյանն ու Հ.Հակոբյանը կանչվել էին Ներքին գործերի Ժողկոմիսարիատ: Հարցաքննության ժամանակ Ա.Եսայանը Վ.Մեծխուկին ներկայացրած դիմումի մասին ասել էր. «ԽՍՀՄ Ժողկոմխորհի համար կազմած դիմումի մեջ նշվում էր, որ ներգաղթողների Նուպարաշեն ավանը գտնվում է

ծանր վիճակում, առանց ջրի, քանի որ Հայաստանի ժողովուրդին չի կատարել Բարեգործականի առջև վերցրած պարտավորությունը՝ ջրանցք անցկացնելու վերաբերյալ: Դիմումի նպատակն էր հասնել նրան, որ միջոցներ հատկացվեն ջրանցքի կառուցման համար եւ որ այն մտցվի 1937թ. ստուգիչ թվերի մեջ (այլ կերպ ասած՝ կառուցումը ավարտվի 1937թ.- Էդ. Մ.):» Այնուհետեւ, պատասխանելով քննիչի հարցին, ասել է. «Ես ինձ մեղավոր եմ ճանաչում նրանում, որ Հայաստանի ժողովուրդի վրա բողոքներով այդ դիմումը եւ ներկայացրել եմ ՀԿ/Բ/Կ Կենտկոմի գլխի վրայով եւ նրան հակառակ»:30

Այսպիսով, Ա.Եսայանի համար Ամերիկայից ուղարկված մեքենաների հարցը լուր պատրվակ էր պատվիրակություն կազմելու եւ այդ պատվիրակության հետ Մոսկվա մեկնելու համար: Իսկ բուն նպատակը մեկն էր՝ Խորհրդային Միության կառավարությանը տեղյակ պահել ներգաղթողների համար նախատեսված ավանների եւ հատկապես Նուպարաշենի շինարարական աշխատանքների խիստ անբավարար վիճակի մասին, փորձել ձեռք բերել կենտրոնական կառավարության որոշումը ներգաղթողների հետ կապված բոլոր տեսակի հարցերի պարտադիր լուծման վերաբերյալ:

Բայց Ա.Եսայանի նախաձեռնությունը՝ անկախ նրա նպատակներից, երբ նա անցել էր Հայաստանի ու Անդերկրկոմի կուսակցական եւ պետական ղեկավարության, քննիչի բառերով ասած՝ «գլխի վրայով», չէր կարող մնալ անպատիժ: Հայաստանի վերին ղեկավարության, հատկապես Ա.Խանջյանի եւ Ա.Գուրյանի վերաբերմունքը Ա.Եսայանի հանդեպ, հատկապես 1935թ. աշնանից սկսած, հասկանալի պատճառներով, մեղմ ասած, հեռու էր բարյացակամ լինելուց: Այդ է վկայում, օրինակ, Ա.Եսայանի 1936թ. մարտի 15-ի նամակը Ա.Խանջյանին եւ Ա.Գուրյանին. «...Համաձայն ԺԿԽ որոշման, ԺԿԽ-ին կից Նուպարաշենի շինարարության գրասենյակն իր ակտիվ-պասիվով հանձնված է Ներգաղթի կոմիտեին, որի «ակտիվը», ինչպես հայտնի է, ոչինչ իրենից չի ներկայացնում, իսկ պասիվի հաշվին, արդեն մեր ծրագրով չնախատեսված, մոտ 200.000 ռուբլի ծախս ենք կատարել՝ ծառայողներին եւ բանվորներին աշխատավարձի պարտքի եւ այլ վճարումների դիմաց:

«Միակ քիչ թե շատ արժեքավոր բանն էլ՝ մի փոքրիկ մարդատար մեքենան, որը ԺԿԽ-ի գործերի կառավարչության կարգադրությամբ, առանց մեր գիտության, վերցրել են եւ հետ չեն վերադարձնում: Նուպարաշենը երեք անգամ մեքենա է ստացել՝ երեքն էլ վերցրել են:

«Խնդրում եմ վերադարձնել մեքենան, որը վաճառվել է գյուտարարական կոմիտեին»:31

Մայիսի 25-26-ին կայացած Հայաստանի Կոմկուսի բյուրոյի նիստում սահմանվեց նոր կարգ, համաձայն որի ՀՕԿ-ը եւ Մեղգոնյան ֆոնդի Գործադիր հանձնաժողովը իրենց դրամական միջոցները կարող էին ծախսել արտասահմանում բացառապես Կենտկոմի թույլտվությունը ստանալուց հետո միայն: Հուլիսի 5-ին, երբ Ա.Եսայանը արդեն Մոսկվայում էր, Հայկոմկուսի կենտկոմի բյուրոն կայացնում է մի որոշում, որը կարող էր ծանր հետեւանքներ ունենալ նրա համար: Համաձայն այդ որոշման, Կենտկոմին կից կուսակցական-խորհրդային վերահսկողության խմբակին հանձնարարվում էր ստուգել ՀՕԿ-ի Գլխավոր վարչության անդամների կողմից միջոցների ծախսման կարգը եւ ներկայացնել առաջարկություններ այդ գործը կարգավորելու համար: Հնարավոր է, որ դա Ա.Խանջյանի ստորագրած բյուրոյի վերջին որոշումներից էր, քանի որ երեք օր անց՝ հուլիսի 8-ին նա մեկնեց Թիֆլիս:

Ա.Խանջյանի մահը

1936թ. հուլիսի 9-ին Թիֆլիսում կայացած Անդերկրկոմի բյուրոյի նիստում Ա.Խանջյանը խստորեն քննադատվեց ազգայնամոլական, աջ-տրոցկիստական ուժերի դեմ չպայքարելու, նրանց եւ ամենից առաջ Մարքսիզմ-լենինիզմի ինստիտուտի նախկին տնօրեն Ն.Ստեփանյանին հովանավորելու ու նման այլ հանցանքների համար եւ նույն օրն էլ սպանվեց:32

Ա.Խանջյանի հուղարկավորության օրը՝ հուլիսի 12-ին, Երեւանում կայացավ Հայաստանի կուսակցական ակտիվի ժողով, որը միահամուռ կերպով դատապարտեց «ինքնասպան» եղած Ա.Խանջյանին: «...Ում-ում, բայց այստեղ հավաքված ընկերներին դժվար չէ հասկանալ այն իրական պատճառները, որոնք Խանջյանին հասցրին այդ ամոթալի ակտին: Մի՞թե այսօր, այդ դավաճանական կրակոցի լույսի տակ, հասկանալի չէ, որ Խանջյանի բազմաթիվ սխալները, որոնց մասին գիտե Հայաստանի կուսակցական ակտիվը, պատահական չէին, որ դրանք արտացոլում էին թշնամական ազգայնամոլական տարրերի ազդեցությունը Խանջյանի վրա, որ նա երկերեսանություն էր անում կուսակցության հետ, չարաշահում էր նրա բարձր վստահությունը: Վերջիվերջո, խրվելով իր սխալների մեջ... Խանջյանը հասկացավ, որ ինքը պատասխան է տալու կուսակցությանը եւ պետք է բացահայտվի: Եվ նա մնաց իրեն հավատարիմ ու ինքնասպանություն գործեց, դրանով իսկ ձեռք մեկնելով մեր մոլի թշնամիներին»:33

Հայկոմկուսի կենտրոնի երկրորդ քարտուղար Ա.Ամատունու կողմից հանգուցյալին ներկայացված այս մեղադրանքները ժողովում մեծ ոգեւորությամբ կրկնում էին բոլոր ելույթ ունեցողները: Միանման մերկացնող ելույթների շարքում, ինչպես եւ պետք էր սպասել, առանձնանում էր Անդրերկրկոմի քարտուղար Ս.Կուդրյավցեւինը, որը, ըստ երեւութին, ձգտելով զարմացնել հայ կոմունիստներին իր գիտելիքներով, մասնավորապես արեց յուրօրինակ մի համեմատություն. «Չինացիների մեջ վրեժխնդրության այսպիսի հին ձեւ կա. չինացին հարակիրի է անում իրեն նեղացնողի տան շենին: Խանջյանը, պատկերավոր ասած, հարակիրի արեց Անդրերկրկոմի բյուրոյի շենին: Միայն թե հասկանալի չէ, ումից եւ ինչի համար էր վրեժխնդիր Խանջյանը»:³⁴ Իսկապես որ ցնցող համեմատություն է, հատկապես նկատի առնելով, որ հարակիրին ոչ թե չինացիների, այլ ճապոնացի սամուրայների ինքնասպանության ավանդական ձեւն էր:

Ինչ վերաբերում է ազգայնականությանը, ապա մեղադրել դրանում Հայաստանի ինչ-ինչ տարրերին եւ նույնիսկ ղեկավարությանը՝ նման էր քաղաքական ծաղրածանակի: 1920թ. հետո անցած 15-16 տարիների ընթացքում, խորհրդային կարգերի օրոք, Անդրկովկասի երեք հանրապետություններից հենց Հայաստանն ու հայ ժողովուրդն էին, որ տուժել եւ շարունակում էին տուժել թե՛ Մոսկվայի եւ թե՛ Վրաստանի ու Ադրբեջանի իշխանությունների ազգայնական քաղաքականությունից: Այդ քաղաքականության ամենացայտուն, հայերի համար ճակատագրական արդյունքներից էր Ղարաբաղի եւ Նախիջեւանի հանձնումը Ադրբեջանի ԽՍՀ-ին: Այլ տեսակի էր Վրաստանի իշխանությունների ազգայնականությունը: 1936թ. սկզբներին ձերբակալված Ն.Ստեփանյանը, որին հովանավորելու մեջ էր մեղադրվում Ա.Խանջյանը, իր գրառումներում նշել էր.

«Վրաստանի կոմկուսի նեխած կուսակցական ապարատը տենդորեն երկակի աշխատանք է անում. մի կողմից, ամրապնդում է ազգայնական դիրքերը, նույնիսկ պատմության խեղաթյուրման միջոցով, մյուս կողմից՝ զրկում է որեւէ հնարավորությունից ուսումնասիրություններ կատարել՝ հենվելով իրենց հանցավոր գործունեության փաստերի վրա: ...Մոտ ապագայում կսկսվի ոչինչով չբողարկված հարձակում հայերի, ռուսների եւ այլոց վրա, ազգային փոքրամասնությունները կխեղդվեն: Վրաստանի ազգայնականությունը իմպերիալիստական է, լկոտի եւ զազրելի: ...Վրաստանի ազգային սխալ քաղաքականության հետեւանքով ամբողջ, այսպես կոչված սեւ աշխատանք (կատարող) արհեստավորները (դերձակներ, կոշակարներ, մաշակարներ, հավաքարարներ) եւ արդյունաբերական պողեւտարիատի ամբողջ կեսը՝ ոչ վրացիներն են: Բյուրոկրատիան՝ վրացիներն են: Ինչպիսի՞ փաստարկներով կարելի է ապացու-

ցել այդչափ հանցավոր քաղաքականության անհրաժեշտությունը: Ի՞նչ պատճառով ոչ վրացական պողեւտարիատը (վերցնենք նաեւ Տկվարչեյին եւ Վրացնավթը) պահում է մշակույթով իրեն օտար ամբողջ այդ բյուրոկրատիային: ...Բոլոր հայերին դուրս են քշում Թիֆլիսից, հայերի ձեռքից առել են կատավարական պաշտոնները, հայերից թողնում են ամենագարշելի, ամենածախված տարրը»:³⁵

Քաղաքական ծաղրածանակն այն էր, որ Հայաստանից Ղարաբաղի ու Նախիջեւանի անջատման համահեղինակներից մեկը՝ Ստալինը, Վրաստանում հայերի հանդեպ ազգային խտրականության եւ ձուլման քաղաքականություն իրականացնող Լ.Բերիան, նույնպիսի քաղաքականություն իրագործող Ադրբեջանի իշխանությունները, այդ բոլորը միասին Հայաստանի ժողովրդին, նրա պետական-կուսակցական գործիչներին, մտավորականներին էին մեղադրում ազգայնականության մեջ, որի կեսն նպատակն էր... իբր Հայաստանի անջատումը Խորհրդային Միությունից:

Ա.Եսայանը բացակայում էր այդ ժողովին եւ մնում է միայն ենթադրել՝ արդյո՞ք նա նույնպես կհայտնվեր Ա.Խանջյանին որպես «ժողովրդի ինքնազոհականհարված թշնամի» ներկայացնողների շարքում: Այդ օրը, հավանաբար, ոմանք հիշեցին նրանց անհաշտ կեցվածքը միմյանց նկատմամբ, ինչը նոր իրավիճակում, կարծես թե, կարող էր դրական հետեւանքներ ունենալ Ա.Եսայանի համար: Լրիվ այլ էր Լ.Բերիայի կարծիքը:

Հայաստանից, Վրաստանից ու Ադրբեջանից կազմված Անդրֆեդերացիայի կուսակցական ղեկավար՝ Անդրերկրկոմի առաջին քարտուղար եղած տարիներին Լ.Բերիայի վարած քաղաքականությունը թե՛ իր նպատակներով եւ թե՛ կիրարկվող միջոցներով իսկական պատճենն էր այն քաղաքականության, որը Խորհրդային Միության ողջ տարածքում իրականացնում էր Ի.Ստալինը: Ձգտելով հաստատել միանձնյա, անսահման իշխանություն, նա, հետեւելով Մոսկվայի կենտրոնական իշխանությունների օրինակին, դիմեց բոլոր հնարքներին՝ Անդրկովկասի երեք հանրապետությունների իրեն ոչ հարմար պետական ու կուսակցական գործիչներին վարկաբեկելու եւ ֆիզիկապես ոչնչացնելու համար: Միաժամանակ, Հայաստանում իր ազդեցությունը ուժեղացնելու, տեղի ղեկավարության գործունեությունը մշտապես վերահսկելու, իր ցանկացած որոշումները պարտադրելու նպատակով Լ.Բերիան վարպետորեն օգտագործում էր Թիֆլիսում Անդրֆեդերացիայի տարբեր հիմնարկներում աշխատող եւ իր ձեռքի տակով անցած հայերին: Ինչպես արդեն նշվեց, ժամանակ առ ժամանակ նա նրանց փոքր խմբերով տեղափոխում էր Հայաստան, ուր իր վստահությունը վայելող այդ մարդիկ սկսում էին զբաղեցնել պետական եւ կուսակցական ամենաբարձր պաշտոններ: Բերիայի «թիֆլիսյան»

կարերից հատկապես հայտնի դարձան ՀԿԿ քարտուղարներ Ա.Ամատունին և Ստ.Ակոպովը, Ներքին գործերի ժողկոմիսար Խ.Մուղդուսիան, նրա տեղակալ Իվ.Գեղորկովը, Գ.Ծատուրովը և այլք: Նույն այդ ձեռով 1934թ. Հայաստան էր վերադարձել նաև Ա.Եսայանը:

Մոսկվայում պետական և կուսակցական անվանի գործիչների դատապարտումները, որպես «ժողովրդի թշնամիների, հակահեղափոխականների, տրոցկիստների» և այլն, հանրապետություններում լրացվում էին տեղի ղեկավարության «ազգայնամոլական» հորջորջումով: Մասնավորապես, Հայաստանի պարագայում Բերիան մտադրվել էր օգտագործել նաև հարաբերությունները հայ սփյուռքի հետ, մի կողմից՝ իշխանությունների շփումներն ու համագործակցությունը «բուրժուական» և «խմպերիալիստական» երկրներում բնակվող սփյուռքահայերի հետ և մյուս կողմից՝ վերջինների առջև ստանձնած պարտավորությունների անտեսումը, ներգաղթողների դժգոհությունները և այլն: Հենց Ա.Եսայանն էլ՝ գիտակցաբար թե ոչ, պետք է դառնար Լ.Բերիայի այդ ծրագրի հիմնական կատարողներից մեկը:

Եվ կարծես, սկզբում նա էլ ուրիշների նման արդարացնում էր Լ.Բերիայի հույսերը՝ Ներգաղթի կոմիտեի հարցով նրա ելույթը Հայկոմկուսի կենտկոմի բյուրոյի նիստում, նրա դիմումը Բերիային, որին հետևեցին նույն կոմիտեի և, ըստ էության, ընդհանրապես, Հայաստանի կառավարության գործունեության ստուգումները և այլն: Այսքանից հետո Ա.Եսայանի կտրուկ շրջադարձը, որի գագաթնակետը եղավ նրա անձնական հանդիպումը Վ.Մեժլաուկի հետ, իսկական մարտահրավեր էր Լ.Բերիային, որը չէր կարող մնալ անպատասխան:

Բայց մինչ այդ, հարկ է անդրադառնալ մի հարցի. հնարավո՞ր է, այնուամենայնիվ, հաստատել, որ Ա.Եսայանի պատվիրակության շնորհիվ միայն կայացվեց Խորհրդային Միության կոմկուսի և կառավարության որոշումը Նուսրաբաշենի մասին: Չափազանցություն կլիներ այդ հարցին միանշանակ դրական պատասխան տալը: Երկրի վերին իշխանությունները ծանոթ էին ներգաղթի, ներգաղթածների տեղավորման հետ կապված հարցերին: Վերը արդեն խոսվեց Վ.Մոլոտովին հասցեագրած Ա.Խանջյանի և Ա.Գուլոյանի նամակի մասին, բայց գրեթե այդ նույն օրերին Մոսկվայում ստացվել էր մեկ այլ, իր տեսակի մեջ աննախադեպ նամակ:

ՀԲԸՄ գրությունները Մոսկվա

1936թ. մայիսի 21-ին ՀԲԸ Միության վարիչ-պատվիրակ Վ.Մալեզյանը և Գաղթականների կենտրոնական հանձնաժողովի նախագահ Ա.Չոպանյանը Ֆրանսիայից հայ գաղթականներին Հայաստան տեղափոխելու կապակցությամբ հատուկ նամակով դիմեցին Ի.Ստալինին: Իրենց երախտագիտությունը հայտնելով Խորհրդային Միության կառավարությանը՝ 1.800 հայերի ներգաղթին ցույց տված աջակցության համար, նամակի հեղինակները տեղեկացնում էին, որ այն մեծ ոգեւորություն է առաջացրել հայ գաղթականների մեջ, որ մոտ 7.000 հայեր Ֆրանսիայում և ավելի քան 20.000 Հունաստանում, Բուլղարիայում, Ռումինիայում, Սիրիայում և այլ երկրներում արդեն ցուցակագրվել են Հայաստան մեկնելու համար: «Խորհրդային Հայաստանի կառավարությունը բազմիցս հայտարարել է,- գրում էին նամակի հեղինակները,- որ ինքը կցանկանար ընդունել ավելի մեծ թվով գաղթականներ և որ կարող էր աշխատանքով ապահովել այդ մարդկանց, որոնք օտար երկրներում տառապում են գործազրկությունից կամ էլ գտնվում են շատ անորոշ վիճակում, բայց դրան խոչընդոտում է անհրաժեշտ քանակությամբ բնակարանների բացակայությունը»: Ապա նամակում ներկայացվում էր անցած տասնհինգ տարիների ընթացքում «մեր հայրենիքի վերականգման աշխատանքներում սփյուռքահայ կազմակերպությունների բավական մեծ մասնակցությունը»՝ ՀԲԸ Միության կողմից 400.000 դոլարի տրամադրումը Նուսրաբաշենի կառուցման նպատակով, Նոր Եվրոկիս ավանի, Մարի Նուսպար, Դարուհի Յակոբեան հիվանդանոցների, Ավետ Սարգիս պատյոցյան կայանի, Բարեգործականի Տուն բնակելի շենքի, Մելգոնյան ֆոնդի հիմնադրումը և այլն: Նշվում էր նաև, որ հայրենակցական միությունների հանգանակած և Հայաստանի իշխանություններին ուղարկած գումարներով մի շարք ավաններ են կառուցվում ներգաղթողների համար: «Սակայն մենք հասկանում ենք,- գրում էին Վ.Մալեզյանը և Ա.Չոպանյանը, - որ այն, ինչ մենք արել ենք, շատ քիչ է՝ համեմատած նրա հետ, ինչը դեռ պետք է անել, և որ այդչափ մեծ մասշտաբի խնդիրը չի կարող ունենալ բավարար և արմատական լուծում այլ կերպ, քան պետական միջոցների շնորհիվ: Խորհրդային Միության կենտրոնական կառավարությունը տասնհինգ տարիների ընթացքում մեծ եղբայրական օգնություն է ցույց տվել ու շարունակում է ցույց տալ Խորհրդային Հայաստանին... ողջ աշխարհի հայությունը երախտապարտ է մեր սիրելի հայրենիքի վերականգնման գործում այդ մեծ օգնության համար: Մենք կրկնակի երախտապարտ կլինենք, եթե նա ուշադրության առնի մեր կո-

չը եւ գործուն աջակցություն ցույց տա Երեւանի կառավարությանը բնակարանների շինարարության գործում... Ծատ ավելի երախտապարտ կլինեն նրան տարբեր երկրներում ապաստանած տասնյակ հազարավոր հայ գաղթականներն ու աշխատավորները, որոնք պատրաստ են ծառայելու իրենց հայրենիքին, բայց անգործ ու անհիմաստ ապրում են օտարության մեջ, անհամբերությամբ սպասելով այն պահին, երբ կկարողանան իրենց ուժերը միավորել իրենց քույրերի ու եղբայրների ուժերի հետ հանուն այն մեծ գործի, որն իրագործվում է Խորհրդային Հայաստանում»³⁶

Նամակի հասցեատերերի հնարավոր անդրադարձի տեսակետից ուշագրավ է Ա.Եղիազարյանի վկայությունների հետևյալ հատվածը, որ նա տվել էր 1954թ.՝ արդարացվելուց հետո. «Հիշում եմ, ինչպես մի անգամ ՀԿԿ կենտկոմի անդամների շրջանակում Ժողկոմխորհի նախկին նախագահ Ս.Տեր-Գաբրիելյանը, հայտնելով Մոսկվայի թույլտվությունը՝ «Բարեգործականի» միջոցով Երեւանի տրամվայի համար ռելսեր ստանալու վերաբերյալ, հաղորդեց Ի.Ստալինի խոսքերը, որոնք ուղղված էին նրանց դեմ, ովքեր կասկածի տակ էին դնում Խորհրդային Հայաստանին լոյսով վերաբերվող հայ բուրժուազիայից օգնություն ստանալու հնարավորությունը. «Եթե հայ կապիտալիստները հիմարություն են թույլ տալիս, օգնելով հայ կոմունիստներին կառուցել սոցիալիզմ, ապա Հայաստանի կոմունիստները թույլ կտան ավելի մեծ հիմարություն, եթե հրաժարվեն այդ օգնությունից»³⁷

Հարկ է նկատի առնել նաև այն ավանդական ակնածանքը արեւմտյանի՝ եվրոպականի հանդեպ, որը ներհատուկ էր Ռուսաստանի վերնախավին եւ որը՝ անկախ գաղափարաբանական բոլոր տարբերություններից, փոխանցվել էր նաև խորհրդային իշխանություններին: Ըստ ամենայնի, Ա.Եսայանը հաշվի էր առել այդ հանգամանք, ինչը եւ բացատրելի է դարձնում նրա հնարամտությունը՝ արտասահմանյան կազմակերպությունների ներկայացուցիչներից պատվիրակություն կազմելը, անգլերենով գրած նամակը եւ անգլերենով զրույցը Վ.Մեժլաուկի հետ: Խորհրդային Միության պես երկրում նման գործելակերպը ամենալուրջ հարցերի լուծման արդյունավետ ձևերից էր արդեն այդ եւ հատկապես հետագա տարիներին, ու հնարավոր է, որ Ա.Եսայանը դրա առաջին կիրառողներից էր: Անկասկած իր դերը խաղաց նաև սփյուռքահայության հետ համագործակցության քարոզչական նշանակությունն ու կարեւորությունը: Այսպիսով, կարելի է ասել, որ Մոսկվայում առկա էին որոշ բարենպաստ նախադրյալներ, եւ Ա.Եսայանի պատվիրակությունը խաղաց յուրատեսակ կատալիզատորի դեր, առանց որի եղած հնարավորությունները այդպես էլ կմնային չիրագործված:

ՀԲԸ Միության ղեկավարությունը առաջիններից մեկը իմացավ Խորհրդային Միության Կոմկուսի եւ կառավարության որոշման մասին: Ա.Եսայանը, որը Մոսկվայում սպասում էր Վ.Մեժլաուկի հետ հանդիպման արդյունքներին, որոշումը կայացնելուց չորս օր անց՝ հուլիսի 25-ին հատուկ հեռագիր հղեց Փարիզ, որը հրապարակվեց «Միություն» ամսագրում «Նուպարաշենի մասին պետական կարգադրություններ: Մոսկուա լայնօրէն կ'օժանդակէ» վերտառությամբ: «Բարեբախտութիւնը ունիմ ձեզի հաղորդելու,- հեռագրում էր Ա.Եսայանը,- որ Կուսակցութեան կեդր. Կոմիտէն եւ Խորհրդային Միութեան Կառավարութիւնը մանրակրկիտ կերպով քննեցին հայկական ներգաղթի հետ կապ ունեցող բոլոր խնդիրները, եւ ատոմց կարգին տակաին չի լուծուած հարցերը որ Նուպարաշենը կը շահագրգռեն: ...Ստացայ մեծաքանակ շինուածանիւթ եւ հարկ եղած վարկերը այդ աշխատութեանց իրագործումին համար... Կրնաք ապահով ըլլալ որ ձեռք առնուած են այն ամէն միջոցները որ պիտի ապահովեն տրուած որոշումներուն գործադրութիւնը, այնպէս որ 1937-ին Նուպարաշենը օժտուած կ'ըլլայ ոռոգելի եւ ըմպելի ջուրերով, ընդունելով ներգաղթող հարիւր ընտանիք եւս»³⁸

Որոշ ժամանակ անց ՀԲԸ Միության վարիչ-պատվիրակ Վ.Մալեզյանը շնորհակալական նամակով դիմեց Վ.Մոլոտովին. «Երախտագիտական շատ խոր զգացումով է, որ տեղեկացանք օգնության եւ նպաստի այն բոլոր միջոցների մասին, որ Ձեր խորհուրդը ընծայում է Խորհրդային Հայաստան ներգաղթող հայ գաղթականներին, ինչպես նաև Երեւանի մերձակա Նուպարաշեն ավանին, որը հատկացված է ներգաղթող հայերի բնակության եւ որը կառուցված է մեր Միության կողմից կազմակերպված ազգային հանգանակության շնորհիվ:

Ձեր կառավարության վերջին եղբայրական ժեստը, Նուպարաշենի ջրմուղին հատկացնելով 3.200.000 ռուբլու մի գումար, մի նոր ապացույց է այն մեծ բարյացակամության, որ Դուք ցույց եք տալիս Խորհրդային Հայաստանին ընդհանրապես եւ մասնավորապես ներգաղթողներին»: Օգտվելով Խորհրդային Միության վարչապետին դիմելու այդ բացառիկ հնարավորությունից՝ Վ.Մալեզյանը հերթական անգամ բարձրացնում է ներգաղթող շարունակելու հարցը. «Խորհրդային Հայաստանը, շնորհիվ այն բարձր հոգատարության, որին արժանացել է Ձեր կողմից, մտել է բարեկեցության եւ բարգավաճման ճանապարհը, ինչ որ մեզ հույս է ներշնչում, որ առաջիկայում, շնորհիվ Ձեր վեհանձն օժանդակության, պետք է կարողանա ընդունել հետզհետե ավելի մեծ թվով հայ փախստականներ»³⁹

Բռնադատումները Հայաստանում

Խորհրդային Միության իշխանությունների ծրագրերը, սակայն, այլ էին: Ի.Ստալինի և Վ.Մոլոտովի նշված որոշումից մեկ շաբաթ անց՝ հունիսի 28-ին ՀամԿ/բ/Կ Կենտկոմը հանրապետական և այլ խոշոր կուսակցական կազմակերպություններին ուղարկեց «Փակ նամակ տրոցկիստական-զինվորական հակախորհրդային բլոկի տեռորիստական գործունեության մասին» վերնագրով փաստաթուղթը, որում այդ բլոկի «հանցագործությունները» թվարկելուց հետո, պահանջվում էր ուժեղացնել տեղերում սբայքարը հակախորհրդային բոլոր տեսակի տարրերի դեմ, բացահայտել հատկապես պետական և կուսակցական մարմիններում դեռևս թաքնված թշնամիներին:⁴⁰ Հայաստանի ղեկավարությունը պատասխանեց արագ: ՀամԿ/բ/Կ Կենտկոմի ղեկավար կուսակցական մարմինների բաժնի վարիչ Գ.Մավենկովին և Անդրերկրկոմի քարտուղար Ս.Կուրյավցեին հասցեագրած «Տեղեկատվական զեկուցագրում» մանրամասն նկարագրվում էր Հայաստանում տարվող աշխատանքը «ժողովրդի թշնամիներին» բացահայտելու ուղղությամբ, թվարկվում էին արդեն իսկ մերկացվածները և այլն:⁴¹ Բայց զեկուցագիրը տպավորիչ չէր՝ ձեռքարկված բարձրաստիճան պաշտոնյա թշնամիները ընդամենը երեքն էին. Ն.Ստեփանյանը (Մարքսիստ-լենինիզմի ինստիտուտի տնօրեն), Դր.Տեր-Սիմոնյանը (ԺԿԽ-ին կից Արվեստի գործերի վարչության պետ) և Ա.Գալոյանը (ՀԿԿ կուսակցական վերահսկողության հաձնաժողովի քարտուղար), նշված էր նաև Ա.Ադոյանը, թեև նրա գործը դեռ նոր էր քննվում կուսակցական մարմիններում: Իսկ ամենակարևոր թերությունն այն էր, որ Հայաստանում դեռ չէր հայտնաբերվել թշնամիներից կազմված որևէ խումբ, բլոկ, կենտրոն կամ նման մի բան:

Եվ Հայաստանի իշխանությունները Անդրերկրկոմի ղեկավարությամբ ձեռնամուխ եղան այդպիսի մի միֆական կազմակերպության ստեղծմանը: Գործելով բավական խնայողաբար՝ նրանք նախ օգտագործեցին արդեն բանտարկվածներին, ստիպելով նրանց տալ վկայություններ գոյություն չունեցող խմբի գործունեության և անդամների մասին: Միաժամանակ, 1936թ. կեսերից սկսվեցին հասարակության տարբեր խավերի ներկայացուցիչների և հատկապես պետական ու կուսակցական գործիչների, մտավորականների համատարած բռնադատումները: Չդիմանալով ֆիզիկական դաժան բռնություններին՝ նրանք, իրենց համոզմունքներին ու կամքին հակառակ, անհրաժեշտ «ցուցմունքներ» էին տալիս ինչպես իրենց, այնպես՝ էլ այլոց «հակահեղափոխական, տրոցկիստական, ազգայնական, տեռորիստական, լրտեսական» և այլ գործու-

նեության մասին: «Ժողովրդի թշնամիների» ինքնավերարտադրության նման մեխանիզմի շնորհիվ հնարավոր դարձավ բավական կարճ ժամկետներում ստեղծել «տրոցկիստական-ազգայնական» հատուկ մի խումբ, որի անդամներ հայտարարվեցին Ն.Ստեփանյանը, Ս.Տեր-Գաբրիելյանը, Ա.Երզնկյանը, Ա.Եսայանը, Դ.Ծահվերյանը, Ա.Եղիազարյանը և այլք: Այս մարդկանց ընտրությունը բնավ պատահական չէր: Նվիրյալ կոմունիստներ, պետական և կուսակցական հայտնի գործիչներ լինելով հանդերձ, նրանք միեւնույն ժամանակ, ոչ պակաս չափով պաշտպանն էին Հայաստանի, հայ ժողովրդի ազգային-պետական շահերի՝ յուրաքանչյուրը իրեն վերապահված ոլորտում և իր հնարավորությունների ու կարողությունների սահմաններում: Նման մտայնության և գործելակերպի տեր մարդկանց համար անընդունելի էին Ի.Ստալինի՝ Խորհրդային Միությունում, և Լ.Բերիայի՝ Անդրկովկասում իրականացվող քաղաքականության սկզբունքներն ու իրագործման միջոցները: Եվ բնական է, որ առաջին հերթին հենց նրանք պետք է դառնային կուսակցական ահաբեկչության հիմնական թիրախը:

Այս խմբի ձեւավորումն ու նրա անդամների ձերբակալումը կատարվեց աստիճանաբար: Առաջինը Ա.Եսայանն ու Ա.Եղիազարյանն էին: Լ.Բերիան և նրա դրածոները Երեւանում անմիջապես օգտվեցին ստեղծված հնարավորությունից՝ անհնազանդներին պատժելու համար: Հայաստանի Կոմկուսի բյուրոյի 1936թ. նոյեմբերի 17-ի որոշմամբ ՀՕԿ-ի Գլխավոր վարչության նախագահ Ա.Եսայանը և ՀՍԽՀ ժողկոմխորհին առընթեր Արվեստի գործերի վարչության պետ, Երեւանի Պետհամալսարանին կից ՀԲԸՄ Մելգոնյան ֆոնդի Գործադիր հանձնաժողովի նախագահ Ա.Եղիազարյանը, մեղադրվելով հակահեղափոխական, ազգայնական տրոցկիստական գործունեության մեջ, ազատվեցին իրենց պաշտոններից և նույն օրն էլ ձերբակալվեցին: Ա.Եսայանի դատաստանը պատրաստող մարդիկ ոչ պակաս հնարամիտ էին իրենց գործելակերպում. այդ օրերին նրան ուղարկել էին Ղամաբլու բամբակահավաքը հսկելու համար, և հենց այնտեղ էլ նա ձերբակալվեց: Ընդամենը մեկ տարի և երկու ամիս էր անցել այն օրից, երբ Ա.Եսայանը գրեց իր հայտնի նամակը Բերիային, որից հետո էլ նշանակվեց ՀՕԿ-ի և Ներգաղթի կոմիտեի նախագահ: Ուշագրավ է, որ նա, ի տարբերություն այլոց, առաջին անգամ հարցաքննվեց յոթ ամիս անց միայն՝ 1937թ. հունիսին: Մինչեւ իր գնդակահարությունը, որը կատարվեց եւս ավելի քան մեկ տարի անց, նա այլևս երբեք չհարցաքննվեց. կարծես, իր ճակատագիրը կանխորոշված էր ի սկզբանե: Բայց այդ ընթացքում տեղի էր ունենում այն, ինչը տարիներ անց հաստատվեց նրա արդարացման գործում. «Հայաստանի բան-

տարկված ղեկավար աշխատողները Ներքին գործերի ժողկոմատի աշխատակիցների կողմից ենթարկվում էին չլաված ծեծի եւ Արտոնաբերության այլ միջոցների, որի հետեւանքով բանտարկվածներից ոմանք մահանում էին կամ խեղանդամ դարձվում: Մասնավորապես, Աղեկյանի ցուցմունքներով, Արսեն Եսայանը ծեծերից խելագարվել էր»:⁴²

Ա.Եսայանի եւ Ա.Եղիազարյանի ձերբակալությունից տասն օր անց, նույն ձեռակերպումներով բանտարկվեց նաեւ սփյուռքի հետ հարաբերությունների հիմնադիրներից մեկը՝ Ար.Երզնկյանը: ՆՊ ժողկոմատի նախկին պաշտոնյան վկայել էր, որ ժողկոմիսար Մուղղուսու հրահանգով բանտում Ա.Երզնկյանի համար ստեղծվել էին այնպիսի պայմաններ, որ նա կենդանի չմնա. «Երզնկյանին տեղավորել էին ամենավատ կարգերում, այն դեպքում, երբ նա այն ժամանակ հիվանդ էր: Երզնկյանն այդ պայմանները չկարողացավ տանել եւ կարգերում տեղավորվելուց մի քանի օր անց մահացավ»:⁴³

Հիրավի չարաղետ էր դարձել ՀՕԿ-ի նախագահի պաշտոնը: Ա.Եսայանից հետո նախագահ նշանակվեց անցած տարիների ներգաղթի անմիջական կազմակերպիչներից մեկը՝ Դ.Ծահվերդյանը (Ծահվերդով): Իշխանությունները, սակայն, շատ արագ ուղղեցին իրենց վրիպումը: ՀՕԿ-ի Գլխավոր վարչության պատասխանատու քարտուղար Վ.Տարախչյանը 1937թ. փետրվարին գրած մի բացատրագրում այսպես է նկարագրել տեղի ունեցածը. «Եսայանի բանտարկության հետ միաժամանակ, Դ.Ծահվերդյանը նշանակվել էր ՀՕԿ-ի նախագահ: Այդ օրերին հրավիրվեց վարչության նիստ, ուր Եսայանը հանվեց նախագահությունից եւ վարչության կազմից, նախագահ նշանակվեց Դ.Ծահվերդյանը: Սակայն նույն օրերի 27-ին Կենտկոմից հետ վերցրին ՀՕԿ-ին ուղարկած Դ.Ծահվերդյանի նշանակման մասին որոշումը: Նույն ժամին Դ.Ծահվերդյանը Կենտկոմից եկավ եւ հաղորդեց, որ իրեն նախագահ նշանակելը չհրապարակենք (թեեւ արդեն բոլորը գիտեին, որ նա նշանակվել է նախագահ), այլ, որ նա ժամանակավոր է աշխատում ՀՕԿ-ում, որ Մոսկվայից քննություն է լինելու...»:⁴⁴ Կարճ ժամանակ անց, ձերբակալված Դ.Ծահվերդյանին այդ պաշտոնում փոխարինեց Ա.Մանուչարյանը, որն էլ եղավ ՀՕԿ-ի Գլխավոր վարչության վերջին նախագահը:

ՀՕԿ-ի նախագահների ձերբակալությունները, ընդհանրապես համընդհանուր քաղաքական հալածանքի մթնոլորտը ամեն բանից զատ, կաթվածահար էին արել այդ կազմակերպության գործունեությունը: Նույնիսկ արտասահմանյան տարբեր երկրներում գործող ՀՕԿ-ի տեղական կազմակերպությունների հետ հարաբերություններ պահպանելը դարձել էր պարզապես վտանգավոր: 1937թ. ապրիլին եւ մայիսին Նյու

Յորքում Խորհրդային Միության Գլխավոր հյուպատոսությունը իր ծառայողական նամակներում, քաղաքական մեծ կարեւորություն տալով ԱՄՆ-ում ՀՕԿ-ի մասնաճյուղի գործունեությանը, միաժամանակ զարմանք էր հայտնում Հայաստանի ՀՕԿ-ի վերջին ամիսներին բռնած դիրքից: Հատուկ նշելով, որ Նյու Յորքի ՀՕԿ-ի հետ կապերի թուլացումը, նրա նամակներին ու հեռագրերին չպատասխանելը առաջացնում են մեծ դժգոհություն, հյուպատոսությունը նպատակահարմար էր համարում առաջարկել Հայաստանի ՀՕԿ-ին վերականգնել կապը մասնաճյուղի հետ, անմիջապես պատասխանել իրեն ուղղած բոլոր գործնական հարցերին:⁴⁵ Բայց իզուր էին այդ կոչերը՝ երկրի համապետական շահերը հերթական անգամ պետք է զոհաբերվեին Ստալինի միանձնյա իշխանության ամրապնդմանը:

Իսկ Հայաստանում «տրոցկիստական-ազգայնական» կենտրոնի/խմբի ձեւավորումը մոտենում էր ավարտին: Հայաստանում ապրող նրա բոլոր «անդամները» արդեն բանտում էին, սակայն, Մոսկվայում էր գտնվում ամենակարեւոր դեմքերից մեկը՝ Ա.Տեր-Գաբրիելյանը: 1937թ. հունիսին Ներքին գործերի ժողկոմ Խ.Մուղղուսին ՀԿ/բ/Կ Կենտկոմի առաջին քարտուղար Ա.Ամատունուն հասցեագրած իր զեկուցագրում գրում էր. «Ա.Մ.Տեր-Գաբրիելյանը 1931թ. Երզնկյանի, Եսայանի, Տեր-Սիմոնյանի եւ ուրիշների հետ միասին կազմակերպել է հակախորհրդային հայկական անցիոնալիստական-տրոցկիստական կենտրոն: Կենտրոնի կազմի եւ ակտիվի ղեկավար բջջի կազմում էին 14 հոգի, որոնցից 10-ը՝ ՀԿ/բ/Կ Կենտկոմի նախկին կազմի անդամներ»: Ըստ Խ.Մուղղուսու, կենտրոնի հակախորհրդային գործունեության հիմնական ուղղություններն էին. «...հակախորհրդային, ազգայնական աշխատանք արտասահմանի հայ համայնքներում: Կապեր հայ կապիտալիստների, ռամկավարների ու դաշնակների բուրժուական կուսակցությունների հետ: Քաղաքական դիրքերի սխտեմատիկաբար հետեւողական զիջումների գնով նրանց միջոցով միջոցների հավաքում Հայաստանի համար, ինչը բերեց նրանց սերտաճելուն՝ այդ կուսակցությունների ներկայացուցիչների հետ: Արտասահմանի հայ աշխատավորության ապակողմնորոշում, տեղի ազգային բուրժուազիայի դեմ նրանց պայքարի ճնշում: Ծնշելով դաշնակների դեմ պայքարը երկրի ներսում, ընդհանրապես դադարեցնելով պայքարը ռամկավարների դեմ այստեղ եւ արտասահմանում, նրանց՝ որպես հայ ժողովրդի բարեկամների հուշակում»:⁴⁶

Երեսնում որոշել էին գործել Մոսկվայում ընթացող դատավարությունների սցենարով, երբ Խորհրդային Միության նախկին ղեկավարները մեղադրվում էին արտասահմանյան ինչ-ինչ երկրների եւ ուժերի հետ

համագործակցելու, նրանց առաջադրանքները կատարելու մեջ, այն տարբերությամբ միայն, որ հայկական տարբերակում արտասահմանյան պետությունները փոխարինվեցին սփյուռքահայ կազմակերպություններով՝ հայ քաղաքական կուսակցություններով: Եվ հենց այդ նպատակով էլ ՆԳ ժողկոմատում հորինվեց հաջորդ առասպելը, այս անգամ արտասահմանում գործող դաշնակցական-նամկավարական կենտրոնի մասին, որի հետ իբր համագործակցում էր տրոցկիստական-ազգայնական հայաստանյան խումբը: Այսքանից հետո մնում էր միայն անհրաժեշտ վկայություններ ու խոստովանություններ կորզել ձեռքակալվածներից: Այս վերջիններն էլ, չդիմանալով հարցաքննությունների ժամանակ կիրառվող ֆիզիկական բռնություններին, հոգեբանական ճնշումներին եւ մնան այլ միջոցներին, նորանոր «փաստեր» էին հաղորդում այդ կենտրոնի, սփյուռքահայ տարբեր կազմակերպությունների հակախորհրդային գործունեության, նրանց անվանի գործիչների բուրժուական երկրների հատուկ ծառայությունների գործակալ լինելու, նրանց հետ խորհրդահայ մտավորականների, պետական եւ կուսակցական գործիչների համագործակցության եւ մնան այլ «հանցագործությունների» մասին:

Մոսկովյան դատավարությունների ժամանակ, երբ Լենինի մտերիմներն ու տարիների հավատարիմ գործընկերները, 1917թ. բոլշեիկյան հեղափոխության կազմակերպիչները մեղադրվեցին լրտեսության, դավաճանության, տնտեսության քայքայման եւ այլ հանցագործությունների մեջ՝ Խորհրդային Միությունում կապիտալիզմի վերականգնման նպատակով, Ստալինը կանգնեց դժվարին մի խնդրի առջեւ՝ ներկայացնել այդ բոլոր մեղադրանքները հաստատող փաստաթղթեր: Այսինքն, ներկայացնել այն, ինչը գոյություն չուներ: 1937թ. հունվարին կայացած հերթական դատավարության ժամանակ պետական մեղադրող, Խորհրդային Միության Գլխավոր դատախազ Ա.Վիշինսկին փորձեց փրկել դրությունը՝ հետեւյալ կերպ բացատրելով ապացույցների բացակայությունը. «Մեղադրյալներին վերագրվող գործողությունները իրենց կողմից կատարված են... Սակայն, իրավաբանական պահանջների առումով ինչպիսի՞» ապացույցներ կան մեր տրամադրության տակ... Մենք ունենք դավադրություն, մենք ունենք մեր առջեւ մարդկանց մի խումբ, որը մտադիր էր իրականացնել պետական հեղաշրջում, որը կազմակերպվել էր եւ մի շարք տարիների ընթացքում իրականացնում էր գործունեություն, որը պետք է ապահովեր այդ դավադրության հաջողությունը, դավադրություն՝ բավականին ճյուղավորված, դավադրություն, որը դավադիրներին կապեց ֆաշիստական ուժերի հետ: Այդ պայմաններում ինչպե՞ս կարելի է ապացույցների հարց դնել: ...Ես համարձակվում եմ պնդելու, որ քրեական դա-

տավարության գիտության հիմնական պահանջների համաձայն, դավադրությանը վերաբերող գործերում մնան պահանջներ ներկայացնել չի կարելի»:⁴⁷ Նման պահանջներ չէր կարելի ներկայացնել նաեւ Հայաստանում բացահայտված տրոցկիստական-ազգայնական խմբի ու նրա անդամների պարագային, երբ նրանց ճակատագիրը վճռված էր: Ծիշտ է, պատժից խուսափում էին դաշնակցական-նամկավարական կենտրոնի անդամները, բայց փոխարենը Հայաստանում էին նրանց ներկայացուցիչները՝ կազմակերպություններ եւ անհատներ, եւ տրամաբանական է, որ նրանց գոյությունը պետք է հայտարարվեր օրենքից դուրս:

Բայց մինչ այդ, ՍՏԵՐ-Գաբրիելյանի գործը ունեցավ այնպիսի շարունակություն, որի հետեւանքների մասին նույն այդ սցենարի հեղինակները՝ Ա.Ամատունին, Խ.Մուղդուսին եւ նրանց թիֆլիսյան «կնքահայր» Լ.Բերիան չէին կարող նույնիսկ երեւակայել:

Մոսկվայում ձեռքակալված եւ օգոստոսին Երեւան բերված ՍՏԵՐ-Գաբրիելյանը հարցաքննության ժամանակ դուրս գետնից Ներքին գործերի ժողկոմատի երրորդ հարկից: Ինքնասպանություն էր դա, թե սպանություն՞, ամեն դեպքում, հետագա դեպքերի զարգացման առումով կարեւորն այն էր, որ Խորհրդային Հայաստանի ղեկավարությունը «որոշում է այդ մասին Մոսկվա տեղեկություն չուղարկել, սակայն Ստալինը շուտով իմանում է եղելության մասին եւ սեպտեմբերի 8-ին մամակ է ուղարկում ՀԿ/բ/Կ Կենտկոմի բյուրոյին, որը Հայաստան են բերում ՀամԿ/բ/Կ Կենտկոմի քաղբյուրոյի անդամ Ա.Միկոյանը եւ Կենտկոմի ղեկավար կուսակցական օրգանների բաժնի վարիչ Գ.Մալեճկովը»:⁴⁸ Իր մամակի սկզբում Ի.Ստալինը ամենախիստ գնահատականն էր տալիս Հայաստանի ղեկավարությանը. «ԽՍՀՄ կառավարությունը եւ ՀամԿ/բ/Կ Կենտկոմը գտնում են, որ Հայաստանում ինչպես տնտեսական, այնպես էլ կուսակցական եւ կուլտուրական գործը գտնվում է չափազանց վատ վիճակում»: Այնուհետեւ, նա իրեն հատուկ վարպետությամբ օգտագործում է Հայաստանի ղեկավարների հիրավի անհեթեթ վարքագիծը. «ՏԵՐ-Գաբրիելյանի «ինքնասպանության» հետ կապված վերջին դեպքերը ցայտուն կերպով արտացոլում են այն ամբողջ առավելագույն նեխումն ու քայքայումը, որոնք Հայաստանի կուսակցական եւ սովետական կազմակերպությունների դրության արդյունք են: ...ՀամԿ/բ/Կ Կենտկոմը եւ ԽՍՀՄ ժողկոմխորհը չեն կարող թույլ տալ, որ հայ ժողովրդի թշնամիների հովանավորները ժողովրդից թաքցնեն ղեկավարության խոցերը եւ այդ խոցերը թաքցնելու համար ժողովրդի թշնամու սպանությունը, որը հանձն էր առել մերկացնել ժողովրդի ազատ մնացած թշնամիներին, ներկայացնեն որպես «ինքնասպանություն»:⁴⁹

Դեպքի նման հնարամիտ մեկնության շնորհիվ ժողովրդի թշնամի էր հայտարարվում արդեն ոչ միայն Ա.Տեր-Գաբրիելյանը, այլև հանրապետության գործող ղեկավարությունը, որը պետք է պատժվեր: Առաջին երկու անունները տվեց հենց ինքը՝ Ստալինը, հայտնելով իր անակում գերքին գործերի ժողովրդասար Խ.Մուղդուսու եւ ժողովրդաբի գախազան Ա.Գուլյանի ձեռքակալության մասին: Ա.Միկոյանի եւ Գ.Մալենկովի մասնակցությամբ Հայաստանի Կոմկուսի Կենտկոմի պլենումում Ստալինի անակի քննարկումից հետո կուսակցությունից հեռացվեցին Կենտկոմի քարտուղարներ Ա.Ամատունին եւ Ստ.Ակոպովը, ինչպես նաև մի շարք կուսակցական եւ պետական գործիչներ, որոնք անմիջապես հայտնվեցին Ներքին գործերի ժողովմատի բանտում:

Այդ օրերին «Խորհրդային Հայաստան» պաշտոնաթերթը Ա.Ամատունի եւ Ստ.Ակոպովին՝ Հայաստանում Լ.Բերիայի դրածոներին ու ամենավատահաված անձանց, ներկայացնում է արդեն որպես «հակահեղափոխական տրոցկիստների, ֆաշիստ դաշնակների» պատվերներ կատարողների, նույն Ստ.Ակոպովի մասին գրելով, որ նա «...իր նողկալի ավերիչ աշխատանքի համար առատորեն նվերներ էր ստանում արտասահմանից՝ դրանք բերում էր նրա համար հայտնի դաշնակ լրտես Ծահվերդյանը»:⁵⁰

1937թ. դեկտեմբերի որոշումը եւ ՀԲԸ արձագանքը

1937թ. հոկտեմբերի 7-ին Հայաստանի Կոմկուսի Կենտկոմի բյուրոյի հերթական նիստում հատկապես այդ նպատակով ստեղծված հանձնաժողովին հանձնարարվեց «...տասն օրվա ժամկետում բազմակողմանիորեն ուսումնասիրել ՀՕԿ-ի գոյության անհրաժեշտության հարցը»:⁵¹ Մինչ հանձնաժողովը կուսումնասիրեր հարցը, նրա երեք անդամներից մեկը՝ Կարախանյանը, հոկտեմբերի 21-ին իր հերթին մեղադրվեց հակահեղափոխական գործունեության մեջ: Նոյեմբերի 13-ին, հանձնաժողովի գեկուցումը քննարկելուց հետո, կայացվում է հետևյալ որոշումը.

«ՀԿ/բ/Կ ԿԿ բյուրոն նշում է, որ Հայաստանի ժողովրդաբի 1923թ. որոշումով «Հայաստանի սովյալ բնակչությանը օգնություն» (Հայաստանի ժողովրդաբի որոշումից) ցույց տալու նպատակով ստեղծված Հայաստանի Օգնության Կոմիտե կազմակերպությունը ըստ էության հակահեղափոխական դաշնակցական պրովոկացիա է Խորհրդային իշխանության, Հայաստանի աշխատավորության նկատմամբ:

«Մերկացված ժողովրդի թշնամիներ Խանջյանը, Տեր-Գաբրիելյանը, Ամատունին եւ Գուլյանը, գլխավորելով Հայաստանում կուսակցության եւ խորհրդային իշխանության ղեկավար մարմինները, ՀՕԿ-ին են փոխանցել հսկայական գումարներ, որոնք Միությանական կառավարությունը տրամադրում էր ներգաղթող հայերի տեղավորման համար... ՀՕԿ-ի անունից ներգաղթողների համար կառուցվում էին ավաններ, դպրոցներ, ջրմուղ եւ այլ կառույցներ եւ կոչվում էին հակահեղափոխական դաշնակցական առաջնորդների եւ հայ կապիտալիստների անուններով (Նուպար փաշա, Մելգոնյան, Կարապետ Սարյան եւ այլն):

«ՀՕԿ-ը եւ նրա արտասահմանյան մասնաճյուղերը դարձել են դաշնակների եւ ռամկավարների հակահեղափոխական կուսակցությունների կազմակերպություն, որի միջոցով իրականացվում էր կապը Խորհրդային Հայաստանի տարածքում գտնվող դաշնակների եւ այլ ազգայնական տարրերի հետ, եւ ՀՕԿ-ի ու հայրենակցականների ներկայացուցիչների պատրվակով Հայաստան էին ուղարկվում արտասահմանյան էմիսարներ ու գործակալներ քայքայիչ հակահեղափոխական աշխատանք վարելու համար:

«Ելնելով դրանից, ՀԿ/բ/Կ ԿԿ բյուրոն որոշում է.

1. ՀԽՍՀ ժողովրդաբիին առաջարկել լուծարել ՀՕԿ-ը եւ արտասահմանյան հայրենակցականների բոլոր ներկայացուցչությունները, ինչպես նաև «Բարեգործական» եւ «Մելգոնյան ֆոնդ» միությունները:
2. ՀԽՍՀ ԿԳԿ-ին (Կենտրոնական Գործադիր Կոմիտե-Էդ.Մ.) պարտավորեցնել վերանվանել ավանները, դպրոցները, հիվանդանոցները եւ այլ հաստատությունները, որոնք կրում են հակահեղափոխական կուսակցությունների առաջնորդների եւ հայ կապիտալիստների անունները:
3. ԽՍՀՄ ժողովրդաբիին խնդրել թույլատրել տեղացի բնակչությանը բնակեցնել ազատ եւ դեռ կառուցվող բնակելի տները ներգաղթողների ավաններում:
4. ՀՕԿ-ի վարչության նախագահ Արամ Մանուչարյանին հեռացնել ՀամԿ/բ/Կ շարքերից եւ նրա հակահեղափոխական կապերի մասին նյութերը փոխանցել Հայաստանի ՆԳԺԿ:
5. ՀՕԿ-ի լուծարման մասին հարցը ներկայացնել ՀամԿ/բ/Կ ԿԿ-ի հաստատմանը»:⁵²

Ուշագրավ է, որ փաստաթղթում բացակայում են քաղաքական եւ այլ տեսակի մեղադրանքներ ՀԲԸ Միության հասցեին: Միեւնույն ժամանակ ընդհանրապես չի հիշատակվում նաև նրա գործունեությունը Հայաստա-

նում, ավելի ստույգ՝ այն, ըստ էության, վերագրված է ՀՕԿ-ին: Դա բացատրվում էր նրանով, որ Ա.Եսայանին ՀՕԿ-ի նախագահ նշանակելուց եւ Ներգաղթի կոմիտեն լուծարելուց կարճ ժամանակ անց սփյուռքի հետ բոլոր տեսակի հարաբերությունները ղեկավարում էր ՀՕԿ-ի Գլխավոր վարչությունը, որին էլ ենթակա էին թե ՀԲԸ Միության ներկայացուցիչը Հայաստանում եւ թե Մեյգոնյան ֆոնդի Գործադիր հանձնաժողովը: Բնականաբար, հենց նա էր պատասխանատու իշխանությունների առջև այդ երկու կազմակերպությունների գործունեության համար:

Դեպքերի հետագա ընթացքը դժվար չէր կոսիել: Համ/Կ/Կ կենտրոնի համաձայնությունը ստանալուց հետո Հայաստանի կոմկուսի կենտրոնի բյուրոյի ղեկավարների 3-ի որոշմամբ ստեղծվում է եւս մեկ հանձնաժողով, այս անգամ արդեն ՀՕԿ-ի լուծարման նպատակով: Այստեղ արժե հատուկ նշել, որ այս, ինչպես եւ նախորդ ու հետագա կուսակցական բոլոր որոշումները, տարբեր հանձնաժողովների եզրակացությունները երբեք չէին հրապարակվում, ուստի եւ հայ հասարակությունը Հայաստանում եւ հատկապես սփյուռքում լրիվ անտեղյակ էր մնում: Եվ կարելի է պատկերացնել, թե որքան անսպասելի էր շատ-շատերի համար «Խորհրդային Հայաստան» թերթի 1937թ. դեկտեմբերի 8-ի համարում կարդալ հետևյալ կարճ պաշտոնական հաղորդագրությունը. «Հայկական ԽՍՀ ժողկոմխորհը որոշեց լուծարքի ենթարկել Հայաստանի Օգնության կոմիտեն (ՀՕԿ), Բարեգործական միությունը եւ Մեյգոնյան ֆոնդը: Կազմակերպված է հատուկ կառավարական հանձնաժողով լուծարքի հետ կապված հարցերը լուծելու համար»:

Բայց սա դեռ վերջը չէր: Նույն օրը իր աշխատանքներն է ավարտում հերթական՝ ՀՕԿ-ի ֆինանսատնտեսական գործունեությունը ստուգող հանձնաժողովը: Հայաստանի կոմկուսի կենտրոնի նոր նշանակված առաջին քարտուղար Գ.Հարությունովի (Հարությունյան) անունով ներկայացրած զեկուցագրում հանձնաժողովը, որը, ի դեպ, գլխավորում էր ներքին գործերի ժողկոմատի ներկայացուցիչը, կրկնելով արդեն հայտնի մեղադրանքները ՀՕԿ-ի հասցեին, եզրակացնում էր. «Նշված գործողությունների համար Հանձնաժողովը անհրաժեշտ է գտնում քրեական պատասխանատվության ենթարկել հետևյալ անձանց ՀՕԿ-ի ապարատից. Գրիգոր Վարդանյանին, Դանուշ Ծահվերդյանին, Արսեն Եսայանին, Արամ Մանուչարյանին, Վարդուշ Տարախչյանին, Տիգրան Զավենին, Հայկազ Գարակոչյանին, Ցուլակ Պարզյանին... Միաժամանակ հանձնաժողովը անհրաժեշտ է գտնում ծառայողական դիրքը չարաշահելու համար, ինչը դրսևորվել է ՀՕԿ-ի պահեստներից մի շարք ներմուծված ապրանքներ ինքնակամ վերցնելու մեջ, քրեական պատասխանատվու-

թյան ենթարկել Մուղղուսուն, Ամատունուն, Ծախսովարովին, Գուլոյանին, Գեորգիովին...»:⁵³

Բոլոր այս մարդիկ արդեն բանտում էին, նույն բանտախցում էին հայտնվել Ա.Գուլոյանը եւ Ա.Եսայանը: Նրանք, որ երկար ամիսներ շարունակ հակառակորդներ էին, քաղաքական բնույթի մեղադրանքներ էին ներկայացնում միմյանց, այժմ՝ բանտում դարձել էին համախոհներ: Նույն բանտախցում նրանց հարեաններից մեկը (ի դեպ, ՆԳ ժողկոմատի նախկին աշխատակից) հարցաքննության ժամանակ հայտնում էր, որ Ա.Գուլոյանը, Ա.Եսայանը եւ Ա.Ծախսովարյանը հակահեղափոխական ակտիվ աշխատանք են տանում բանտում, օրինակ՝ Ա.Եսայանը Լ.Բերիայի մասին ասում է, թե նա Վրաստանում բանտարկեց եւ ոչնչացրեց բոլոր իր ընկերներին եւ բոլշեիկյան լավագույն կադրերին, որ Բաքվում մուսավաթիստների օրոք նա ծառայել է գաղտնի ուստիկանությունում, իսկ Ա.Գուլոյանը, իր հերթին, ասում է, որ Հայաստանում տրոցկիստական-ազգայնական կազմակերպությունը արհեստականորեն ստեղծվել էր Մոսկվայից ժամանած ՆԳ ժողկոմատի աշխատակիցների կողմից: Հարեանի հարցին, թե ինչ կապ ունեն Մոսկվայից ժամանածները, «...երբ այդպիսի կազմակերպություն գոյություն ուներ ժողովրդի թշնամի Խանջյանի օրոք, որի մասին դուք, Գուլոյան, բազմիցս խոսել եք ազատության մեջ, վերջինս պատասխանեց բացասաբար եւ փորձեց համոզել, որ Հայաստանում եւ ոչ մի հակահեղափոխական կենտրոն չի եղել...»:⁵⁴ Նույնը կարող էին կրկնել երեկվա եւ մյուս մերկացնողները՝ Ա.Ամատունին, Խ.Մուղղուսին եւ այլք, բայց արդեն ուշ էր եւ անօգուտ:

Արտասահմանում խորհրդային իշխանությունների որոշման մասին հայտնի դառնալուն պես, Հայաստանի պաշտոնական տարբեր հիմնարկների հասցեով բազմաթիվ նամակներ սկսեցին ստացվել նախ եւ առաջ ՀՕԿ-ի տարբեր մասնաճյուղերից եւ նրա հետ համագործակցող հայրենակցական միություններից: Որոշումը հատկապես անարդար եւ անհասկանալի էր ՀՕԿ-ի անդամների համար, քանի որ նրանք տարիներ շարունակ, չնայած բազմաթիվ դժվարություններին ու խոչընդոտներին, Խորհրդային Միության սակավաթիվ եւ հավատարիմ բարեկամներն էին, նրա քաղաքականության ու գաղափարաբանության պաշտպաններն ու պրոպագանդիստները: Ինչպես եւ կարելի էր ենթադրել, Երեւանում ՀՕԿ-ի գլխավոր վարչության լուծարումից կարճ ժամանակ անց նրա բոլոր արտասահմանյան մասնաճյուղերը քայքայվեցին եւ դադարեցրին իրենց գոյությունը:

Իսկ 1938թ. մարտին Երեւանում ստացվեց ՀԲԸ Միության վարիչ-պատվիրակ Վ.Մալեգյանի նամակը, որը հասցեագրված էր Հայաստանի Ժողկոմխորհի նախագահին.

«[Խորհրդային Հայաստանի] 8 դեկտեմբերի թիւին մէջ կարդացիք որ Ժողկոմխորհի որոշմամբ լուծարքի ենթարկուած են Հայաստանի Օգնութեան Կոմիտէին հետ, մեր Միութիւնը եւ Մելգոնեան ֆոնդը, եւ թէ յատուկ Յանձնախումբ մը կազմուած է լուծարքի գործերով զբաղուելու համար:

«Մինչեւ ցարդ այդ որոշման մասին մեզի պաշտօնական զեկուցում եղած չըլլալով, եւ խնդրոյն էութեան եւ հետեւանքներուն նկատմամբ զրկուած ըլլալով ոեւէ տեղեկութենէ, ներկայիս պատիւ ունինք խնդրելու որ հաճիք մեզի հաղորդել թէ լուծարքը ի՞նչ պայմաններու մէջ պիտի ունենայ եւ յառաջիկային համար կարգադրութիւններ տնօրինուած են:

«Ամիսներէ ի վեր զանազան կարեւոր եւ ոմանք յոյժ ստիպողական հարցերու վերաբերմամբ մեր ուղղած բազմաթիւ նամակները Ժողկոմխորհի Նախագահին, Համալսարանի ռեքտորի տեղակալին, ՀՕԿ Գլխ. Վարչութեան եւ մասնատրապէս մեր ներկայացուցիչ-գործակատար քաղ. Հ.Գարակէօզեանի, անպատասխան մնացած ըլլալով, ներկայիս կը խնդրենք հետեւանք տալ անոնց մէջ պարզուած խնդիրներուն, որ կապ ունին Միութեան ձեռնարկներուն եւ վարկերուն հետ: Մեզ շնորհապարտ պիտի թողուք իմացնելով ո՞ր վարչութեան կամ պաշտօնատարին հետ կրնանք հարաբերուիլ Միութեան վերաբերեալ հարցերու մասին»:⁵⁵

Չստանալով պատասխան, Միությունը նոր նամակներ է հղում, ապրիլին՝ Ֆրանսիայում Խորհրդային Միության դեսպանին, հունիսին՝ Հայաստանի Կոմկուսի կենտրոնի քարտուղարին, օգոստոսին՝ կրկին Ժողկոմխորհի նախագահին: Այդ վերջին նամակում, մասնավորապէս, նշվում էր. «Վստահ ենք թէ, նկատի առնելով մեր պատասխանատուութիւնը, լիուլի պիտի ըմբռնէք մեր կրկնակի դիմումներուն նպատակը եւ պիտի բարեհաճիք հետեւանք տալ վերջապէս մեր խնդրանքներուն. հակառակ պարագային, մեր Կեդրոնական Վարչական Ժողովին պարտականութիւնը պիտի ըլլայ որոշել թէ ինչ նպատակայարմար միջոցներով պէտք է օգտագործել, ի նպաստ արտասահման գտնուող բարենպատակ ձեռնարկներու եւ հիմնարկութեանց, առկախ մնացած Հայաստանի յատուկ զանազան վարկերը եւ ասպարանքները»:⁵⁶ Բայց ասպարոյուն՝ բոլոր նամակները մնացին անպատասխան:

Ստեղծված իրավիճակում Միության Կենտրոնական Վարչությունը երկար քննարկումներից հետո միաձայն ընդունում է մի փաստաթուղթ՝ «որոշմնագիր», որը գործադրվելու էր Հայաստանի Ժողկոմխորհին եւ Ֆրանսիայում Խորհրդային Միության դեսպանատանը այն ուղարկելուց

վաթսուն օր հետո միայն: Նշելով «...ցաւալի կացութիւնը որ աւելի քան մէկ տարիէ ի վեր ստեղծուած է՝ Խ.Հայաստանի հետ ամէն յարաբերութեանց խզումին հետեւանքով...» եւ թվարկելով Միության կողմից ուղարկված բոլոր անպատասխան մնացած նամակները, ինչպէս նաեւ կնքված եւ իրագործվող պայմանագրերը, Կենտրոնական Վարչությունը գրում էր. «Նկատելով թէ Միութեան կրկնակի խնդրանքներուն եւ ստոնց մասին Երեւանի կառավարութեան պահած լռութեան հետեւանքով, այս իրողութիւնը մերժումի համարժէք համարուելով, հաստատուած է թէ ըստ էութեան անտարակոյս խզում մը կայ պայմանադիր երկու կողմերուն միջեւ, անոր որ բարեմտօրէն կ'ընծայէ իր նուիրատուութիւնը վաւերաթողութեամբ համաձայն, եւ անոր որ չընդունիր այդ նուիրատուութիւնները՝ ստորագրուած պայմանագրութեանց եւ փոխադարձաբար կնքուած յանձնառութեանց համաձայն»: Այնուհետեւ, ՀԲԸ Միությունը հայտնում է իր ընդունած որոշման մասին.

«Կեդր. Վարչ. Ժողովը, նախանձախնդիր իր պարտականութեան, որ է ոչ մէկ գիճով դադրեցնել կտակարարներուն եւ նուիրատուներուն յայտնած կամքին գործադրութիւնը, միանգամայն գիտակից այն մեծ պատասխանատուութեանց որ իր վրայ կը ծանրանան այս սկսման զանցառութեան հետեւանքով, ինքզինքը պարտաւոր կը զգայ հետեւեալ որոշումը տալու.- Կեդր. Վարչ. Ժողովը, միաձայնութեամբ, կ'որոշէ որ՝ Խ. Հայաստանի հաշուոյն Միութեան ունեցած բոլոր տրամադրելի գումարները, ասոնց մէջ ըլլալով տարեկան յատկացումները, որոնց գործածութիւնը անցեալ տարիէն ի վեր անհնարին եղած է, Հայաստանի մեր ձեռնարկներուն լուծարքին եւ Երեւանի կառավարութեան հետ մեր յարաբերութեանց խզումին հետեւանքով, առժամապէս յատկացուին,-մինչեւ այն օրը որ Հայկական կառավարութիւնը տրամադիր ըլլայ վերստին ի զօրու դնելու հին պայմանագրութիւնները կամ անոնց տեղ նորեր կնքելու,- նմանօրինակ ձեռնարկներու՝ յօգուտ հայ գաղթականներուն որ օտար երկրներուն մէջ ցրուած են, պայմանաւ որ կարելի եղած չափով համաձայն ըլլան իւրաքանչիւր հիմնադրամի սկզբնական նպատակին եւ անոնց յատկացումը կիրարկուի ըստ կարելոյն հաւասարիմ մնալով նուիրատուներուն բաղձանքին»:⁵⁷ Այս գրությունը նույնպէս մնաց անպատասխան:

ՀԲԸ Միությունը այլեւ չէր կարող առկախ թողնել Հայաստանի համար նախատեսած գումարները, հատկապէս նկատի առնելով սփյուռքահայության բազմաթիվ կարիքները: Այսպիսով, 1939թ. ՀԲԸ Միությունը Խորհրդային Հայաստանի համար նախատեսված գումարները սկսեց ծառայեցնել սփյուռքում իր կողմից իրականացվող ծրագրերին: Առաջին տարում դա իրականացվեց հետեւյալ կերպ.

«1. Երեւանի Համալսարանի հաշույն առկախ մնացած գումարէն 1000 անգլ. ոսկի, ազգային, պատմական եւ գրական մեծարժէք երկերու տպագրութեան, Մելգոնեան Հրատարակութեան յորջորջումով: 2. Նոյն վարկէն 1103 անգլ. ոսկի, Նիկոսիոյ Մելգոնեան Վարժապետանոցին: 3. Նոյն վարկէն 125 անգլ. ոսկի Զարդարեան գրադարանի եւ Յուշարանի հաւաքածոներու գնումին: 4. Երեւանի Համալս. Նուպարեան Մրցանակի վարկէն 800 անգլ. ոսկի, Նուպարեան Սաներու Հիմնարկութեան: 5. Նոյն վարկէն 150 անգլ. ոսկի, իբր մրցանակ արժանատր հեղինակներու եւ ուսանողներու: 6. Նոյն վարկէն 170 անգլ. ոսկի Հէլիոպոլիսի Նուպարեան վարժարանին: 7. Երեւանի Դարուհի Յակոբեան Մայրանոցի հաշույն տրամադրելի վարկէն 800 անգլ. ոսկի, Պէլրոյթի մէջ աղջկանց ցերեկեայ բարձրագոյն նախակրթարանի մը հաստատման, որ պիտի կրէ «Դարուհի Յակոբեան Կրթարան» անունը: 8. Նոյն գումարէն 400 անգլ. ոսկի, յօգուտ անոք որբուհիներու հոգատարութեան եւ օժտուած հայուհիներու դաստիարակութեան: 9. Զանազան հիմնադրամներու եկամուտներէն 868 անգլ. ոսկի Միութեան հովանաւորեալ վարժարաններուն եւ 350 ոսկի Միութեան հովանիին ներքեւ գործող երիտասարդական կազմակերպութեանց: 10. Կրթական տրամադրելի վարկերէն 50 անգլ. ոսկի Պէլրոյթի Մխիթարեան Վարժարանին եւ 100 ոսկի Կ. Պոլսի Ազգ. Պատրիարքարանին: 11. Նուպարաշէնի յատուկ տրամադրելի գումարներէն 3.000 անգլ. ոսկի, կէսը Աթէնքի եւ միւս կէսն ալ Պէլրոյթի եւ Հալէպի տնագուրկ չքավոր գաղթականներու զետեղման: 12. Նոյն վարկէն 1.000 անգլ. ոսկի, Անտիոք-Սուէտիա շրջանին կամ Լիբանանի յարմարագոյն մէկ կեդրոնին մէջ հողագործական-գիւղատնտեսական ձեռնարկի մը հաստատման, այդ նպատակին փոխանցելով նաեւ Պատուոյ Անդամ ողբ. Մկրտիչ Պալեանի նուիրած 450 ոսկին: 13. Միեւնոյն վարկէն, 20.000 ֆրանք Կ. Պոլսի Ազգ. Պատրիարքարանին, գաւառներէն եկած գաղթականներու եւ որբերու պատսպարման, եւ 5.000 ֆրանք Թուրքիայէն Հալէպի շրջանակը գաղթած հողագործ համայնքին տեղաւորման պէտքերուն համար»:⁵⁸

Այս երկար ցուցակը կարող է ընկալվել տարբեր կերպ. այն հստակ պատկերացում է տալիս, մի կողմից, թե հետագա երկար տարիների ընթացքում ինչից զրկվեց Հայաստանի ժողովուրդը խորհրդային իշխանությունների վարած քաղաքականության պատճառով, եւ մյուս կողմից, թե որքան կարեւոր ծրագրեր շարունակվեցին եւ սկսեցին իրագործվել նույն այդ գումարների շնորհիվ սփյուռքի տարբեր համայնքներում: Ամեն դեպքում, մխիթարականն այն էր, որ Միության միջոցները շարունակեցին ծառայել հայ ժողովրդին, թեկուզ եւ նրա միայն մեկ հատվածին՝ սփյուռքահայությանը:

3.4 Գարակոյան՝ քաղաքական խարդավանքների գոհը

Բայց Միությունը ունեցավ եւ այլ՝ մարդկային կորուստ: ՀՕԿ-ի ֆինանսատնտեսական գործունեությունը ստուգող հանձնաժողովի 1937թ. դեկտեմբերի 8-ի վերոնշված զեկուցագրում քրեական պատասխանատվության ենթակա անձանց թվում էր նաեւ Հայաստանում ՀԲԸ Միության ներկայացուցիչ Հայկազ Գարակոյանը: Այդ օրերին նա, ինչպես եւ մյուս բոլոր նշված անձինք, արդեն ամիսներ շարունակ գտնվում էր բանտում: Այդ տարիներին, երբ իրար հետեւից բանտարկվում, աքսորվում, զնդակահարվում էին հայտնի պետական ու կուսակցական գործիչներ, մտավորականներ, Հ.Գարակոյանի ճակատագիրը մի տեսակ դուրս մնաց ժամանակակիցների, առավել եւս հետագա սերունդների ուշադրությունից: Մինչդեռ, թե գործունեությամբ եւ թե մարդկային հատկանիշներով նա արժանի տեղ ունի ՀԲԸ Միության պատմության մէջ: Ըակատագրի հեզմանքով, Հ.Գարակոյանի կյանքի ու գործունեության պատմության համար հիմնական աղբյուրն է 1937թ. Ներքին գործերի ժողովխարհատում նրա վերաբերյալ կազմված գործը:

Հ. Գարակոյանը ծնվել էր 1882թ. Տրապիզոնում, ունեւոր վաճառական Իզմատիոս Գարակոյանի ընտանիքում: Ապրելով հոր հետ՝ նա նույնպես զբաղվել է ծխախոտի առետրով: Դեռ Առաջին Աշխարհամարտից առաջ Հ. Գարակոյանը գործի բերումով հաստատվել էր Օդեսայում: 1917թ. նա ընտրվում է Օդեսայում ՀԲԸ Միության նորաստեղծ մասնաճյուղի վարչության անդամ: Այստեղ նա ծանոթացավ, ապա ամուսնացավ Երեւանից կրթություն ստանալու նպատակով եկած Սոֆյա Եղիազարյանի (Եղիազարովայի) հետ: 1923թ. Հ.Գարակոյանը կնոջ եւ երկու զավակների հետ Օդեսայից գալիս է Հայաստան: Տարիներ անց, պատասխանելով քննիչին, նա այսպես է բացատրել իր Հայաստան գալը. «Ինձե՛լ հայերի մէջ, իմ հայրենիքում... ես չգիտեի ուսերե՛ն եւ ինձ դժվար էր այնտեղ (Օդեսայում-Էդ.Մ.) պահպանել իմ գոյությունը»:⁵⁹ Իր իսկ խոսքերով, այդ բախտորոշ որոշումը կայացնելիս, կարեւոր դեր է խաղացել նաեւ կնոջ ցանկությունը՝ վերադառնալ Երեւան, իր ազգականների ու բարեկամների մոտ: 1926թ. նա հաճախակի հանդիպումներ է ունենում Երեւանում գտնվող ՀԲԸ Միության հայտնի գործիչ Ե.Կարիկյանի եւ դեռեւս Տրապիզոնից իրեն ծանոթ բժիշկ Խ.Հեքիմյանի հետ, որոնք էլ երկու տարի անց՝ 1928թ., երբ Միությունը անհրաժեշտ համարեց Հայաստանում ունենալ մշտական ներկայացուցիչ, առաջարկեցին Հ.Գարակոյանի թեկնածությունը: Նույն՝ 1928թ., Հ.Գարակոյանը ստանձնեց Հայաստանում ՀԲԸ Միության ներկայացուցչի պաշտոնը, որը

եւ վարեց երկրում Միության գործունեության ողջ ընթացքում: Որքանով եզակի եւ աննախադեպ էր Միության, որպէս սփյուռքահայ կազմակերպության, գործունեությունը Խորհրդային Հայաստանում, այդչափ եզակի էր նաեւ Հ.Գարակչոյանի պաշտոնը: Նկատի առնելով այն տարիներին բնորոշ մտայնություններն ու քաղաքական մթնոլորտը, դժվար չէ պատկերացնել, թե որքան աննախանձելի էր Հ.Գարակչոյանի նման մարդու վիճակը. ծագումով արեւմտահայ, հարուստի ընտանիքից, զբաղմունքով առեւտրական, արտասահմանից միայն 1923թ. Երեւան եկած, անկուսակցական, եւ այսքանից հետո արտասահմանի հայկական «բուրժուական» կազմակերպության ներկայացուցիչ Խորհրդային Հայաստանում: Եվ նման՝ խորհրդային չափանիշներով կասկածելի կենսագրության տեղ մարդու պարտականությունն էր, իր իսկ խոսքերով, «լինել միջնորդ նրա (ՀԲԸ Միության-Էդ.Մ.) եւ Հայաստանի կառավարական հիմնարկությունների միջեւ՝ Միության տնտեսական-շինարարական միջոցառումների հարցում: Բարեգործականի առաջարկությունները եւ համաձայնեցնում էի Հայաստանի կառավարության հետ, ստանում եւ շինարարության համար փոխանցում էի դրամական միջոցներ, հսկում էի Միության միջոցառումների իրականացումը»:⁶⁰ Մեծ երեւակայություն պետք չէ պատկերացնելու, թե ինչ տարաբնույթ դժվարությունների հետ էր կապված նշված պարտականությունների կատարումը երկրում տիրող սոցիալ-քաղաքական եւ տնտեսական պայմաններում: Եվ չնայած բոլոր տեսակի դժվարություններին, նա, այնուամենայնիվ, պետք է ապահովեր իր առջեւ դրած խնդիրների լուծումը՝ այդպիսին էր ՀԲԸ Միության ղեկավարության պահանջը:

Հ.Գարակչոյանը, իհարկե, գիտակցում էր, թե ինչ վտանգ է սպառնում իրեն՝ որպէս արտասահմանյան կազմակերպության ներկայացուցչի՝ երկրում «ժողովրդի թշնամիների» դեմ օրեցօր ծավալվող պայքարում: Այդ կասկածները սկսեցին հաստատվել 1936թ. նոյեմբերին՝ Ա.Եսայանի եւ Ա.Եղիազարյանի բանտարկությունից հետո: Չանցած երկու ամիս, հետքը հասավ Հ.Գարակչոյանին՝ 1937թ. հունվարի 11-ին նա կանչվեց Ներքին գործերի ժողովմասարիատ եւ հարցաքննվեց՝ առայժմ միայն որպէս վկա: Վերը արդեն մեջբերվել էր հարցաքննության արձանագրության այն հատվածը, որը վերաբերում էր Ա.Եսայանի գլխավորած պատվիրակության, որի անդամներից էր նաեւ Հ.Գարակչոյանը, Մոսկվա կատարած այցի մանրամասներին: Հ.Գարակչոյանի՝ որպէս անհատի համար խիստ հատկանշական էին նաեւ նրա պատասխանները ՀՕԿ-ի նախագահների մասին: Այսպէս, Ար.Երզնկյանի մասին նա ասել է. «Արամայիս Երզնկյանի՝ որպէս Հայաստանի ժողովմասրհի նախագահի

տեղակալի հետ եւ կապված էի «Բարեգործականի» աշխատանքների գծով: Բացի այդ, բարեկամություն էինք անում որպէս թղթախաղի ընկերներ: Ես հաճախ էի հանդիպում նրա հետ թղթախաղի սեղանի շուրջ՝ հիմնականում իր տանը, երբեմն էլ ինձ մոտ»: Ա.Եսայանի մասին. «Նրա հետ եւ կապված էի միայն աշխատանքով, այն բանից հետո, երբ «Բարեգործականը» անցավ ՀՕԿ-ի տնօրինության տակ: Ա.Եսայանը շատ լավ էր վերաբերվում ինձ, աջակցում էր «Բարեգործականի» կողմից կառուցվող օբյեկտների շինարարությանը»:⁶¹ Այս պատասխանները ըստ արժանվույն գնահատելու համար հարկ է վերստին նշել, որ թե Ար.Երզնկյանը եւ թե Ա.Եսայանը բանտարկված էին դեռեւս նախորդ՝ 1936թ. նոյեմբեր ամսին: Եվ այնուամենայնիվ, հարցաքննության համար Ներքին գործերի ժողովմաստ կանչված Հ.Գարակչոյանը անկեղծորեն պատմում է նրանց հետ իր բարեկամական հարաբերությունների, իր նկատմամբ նրանց լավ վերաբերմունքի մասին: Ի՞նչ էր դա՝ անվախություն, պարզամտություն, թե՞ հավատ իշխանությունների արդարամտությանը:

Հունվարյան հարցաքննությունից հետո էլ Հ.Գարակչոյանը շարունակեց աշխատել նույն եռանդով ու բարեխղճությամբ, կարծես անտեսելով իրեն սպառնացող վտանգը: Այդ առումով ուշագրավ է հետեւյալ դեպքը: Հարցաքննությունից ընդամենը երկու շաբաթ անց՝ 1937թ. հունվարի 25-ին նա մի գրություն է ուղարկում Հայկոմկուսի ԿԿ առաջին քարտուղար Ա.Ամատունուն, որում տեղեկացնում էր, որ «Փարիզի Հայկ. Բարեգործական Ընդհ. Միության Կեդր. Վարչությունը իր 9 նոյեմբեր 1936 թվակիր նամակով հայտնում է, որ նկատի առնելով Երեւան-Նուպարաշեն խճուղու մոտալուտ ավարտումը, Նուպարաշենի բնակիչների երթեւեկությունը դյուրացնելու համար որոշել է Միության կողմից բացառիկ մի նվիրատվություն անել (ոչ Հայաստանին տրամադրելի գումարներից), ուղարկելով 20-25 հոգինոց մի ավտոբուս»: Հ.Գարակչոյանը, վկայակոչելով գործող օրենքներով նախատեսված սահմանափակումները, խնդրում էր Ա.Ամատունուն միջնորդել Խորհրդային Միության կառավարության առջեւ հատուկ արտոնություն ձեռք բերելու՝ ավտոբուսը ստանալու համար: Ա.Ամատունին դիմումը հասցեագրում է Ներքին գործերի ժողովմասին Ս.Մուղղուսուն. «Նստացնել եւ վճարել հեղինակին»: Մուղղուսին իր հերթին, արդեն հայերենով մակագրում է. «Կառավարության որոշում (!-Էդ.Մ.) պետք է կատարել առանց վիճելու»: Այլ պատասխան չէր էլ կարող լինել. նույն Ամատունու եւ Մուղղուսու գլխավորությամբ Հայաստանում, ինչպէս արդեն նշվել էր, սկսվել էր պետական ու կուսակցական գործիչների բռնադատումների նոր փուլ, ներկայացվող մեղադրանքներում կարեւոր տեղ էր վերապահված ազգայնական գործունեությանը,

արտասահմանի հայկական բուրժուական կազմակերպությունների, այդ թվում նաև ՀԲԸ Միության հետ համագործակցությանը: Նման իրավիճակում առնվազն միամտություն կլիներ սպասել, որ Հայաստանի առաջին դեմքը այդպիսի մի կազմակերպության հարցով միջնորդեր Մոսկվայի կենտրոնական կառավարության առջեւ, առավել եւս որ խնդրագրի հեղինակի՝ Միության ներկայացուցչի անունը արդեն մտցված էր «ժողովրդի թշնամիների» հերթական ցուցակների մեջ:

1937թ. հունիսի 25-ին Պետանվտանգության կրտսեր լեյտենանտ Կիրակոզովը իր վերադասին՝ կապիտան Զիթունուն ներկայացնում է տեղեկանք Հ.Գարակյոզյանի մասին, որի վերջում գրված էր. «Գարակյոզյանը սխտեմատիկաբար տանում է հակահեղափոխական ազիտացիա եւ ենթակա է կանչվելու պատասխանատվության՝ համաձայն ՀԽՍՀ ՔՕ 67 հոդվածի»: Տեղեկանքը նույն օրը հաստատում է Ն.Գ. Ժողկոմ, Պետանվտանգության ավագ մայոր Խ.Մուղդուսին, նույն օրը այդ երեք մարդկանց ստորագրություններով կայացվում է որոշում Հ.Գարակյոզյանին Ներքին գործերի ժողկոմատի ներքին բանտում կալանավորելու մասին, որով եւ սկսվեց Հայկազ Գարակյոզյանի կյանքի վերջին, ողբերգական շրջանը: Հաջորդ օրը նրա բնակարանում, որը գտնվում էր ՀԲԸ Միության կառուցած «Բարեգործականի Տուն» բնակելի շենքում, կատարվում է խուզարկություն, որի ընթացքում առգրավվում են նրա երկու գրասենյե-նաները, ռադիոն, ինքնահոս գրիչը, անձնական թղթակցությունը եւ այլն: Այստեղ հարկ է մեջբերել հետեւյալ հատվածը Հայաստանի ժողովրդա-կան նկարիչ, քանդակագործ Արա Սարգսյանի 1955թ. սեպտեմբերի 8-ի թվակիր գրությունից, որն ուղղված էր ՀԽՍՀ Պետանվտանգության կոմիտեին. «Հ.Կարազյոզյանը ապրում էր շատ համեստ: Ես մի քանի անգամներ եղել եմ նրանց տանը եւ տեսել բնակարանի համեստ սարքն ու ընտանիքի պարզ ապրելակերպը: Այն ժամանակ Բարեգործականի ներկայացուցիչը, եթե նա ուղղամիտ եւ ազնիվ մարդ չլիներ, կարող էր լիա-նատ կերպով օգտվել Բարեգործականի բարիքներից իր անձի եւ իր ըն-տանիքի համար: Մինչդեռ, Հ.Կարազյոզյանի մոտ հակառակն էր: Նրա ու նրա ընտանիքի միտ ու կացը ապացույց էր Կարազյոզյանի պարզու-թյան, ուղղամտության եւ ազնվության»:⁶²

Հ.Գարակյոզյանը հարցաքննվեց ընդամենը երկու անգամ՝ հունիսի 29-ին եւ հոկտեմբերի 13-ին, եւ այդ հարցաքննությունները խիստ տար-բերվում էին իր՝ որպես վկայի հունվարյան հարցաքննությունից: Հունիսի 29-ին, այսինքն բանտարկվելուց երեք օր անց, Խ.Մուղդուսու անունով գրած իր դիմումի մեջ նա անում է հետեւյալ «խոստովանությունը». «Իմ ձեռքակալվելուց հետո, երբ որ քննիչ ընկեր Կիրակոսյանը (նույն ինքը Կի-

րակոզով-Էդ.Մ.) հարց դրեց իմ՝ սովետական իշխանության հանդեպ ու-նեցած հանցանքների մասին, ես որոշեցի լինել անկեղծ եւ հայտնել ճշմարտությունը: Խոստովանում եմ, որ ես 1932 թվից եղել եմ ֆրանսի-ական հետախուզական մարմինների գործակալ եւ տարել եմ աշխա-տանք սովետական իշխանության հանդեպ»:⁶³ Թե ի՞նչ ձեռով եւ ինչպի-սի՞ հարցեր էր դրել նրա առջեւ «քննիչ ընկեր Կիրակոսյանը», կարելի է ենթադրել, դատելով դիմումի եւ նրա՝ ազատության մեջ գրած գրություն-ների միջեւ եղած տարբերություններից: Հավանական է, որ Հ.Գարակյո-զյանը գրել էր Կիրակոզով-Կիրակոսյանի թելադրությամբ (հետաքննու-թյան գործում այս դիմումը միակ փաստաթուղթն է, որ գրված է հայերե-նով, քանի որ Հ.Գարակյոզյանը չէր տիրապետում ռուսերենին): Նույն օրը տեղի ունեցած կարճ հարցաքննության ժամանակ (սկզբում դիմումն է գրվել թե հակառակը՝ ըստ էության այնքան էլ էական չէ) Հ.Գարակյո-զյանը կրկնում է իր վերոնշյալ «խոստովանությունը», հայտնելով, որ իրեն որպես գործակալ հավաքագրել է կաթողիկոսի ընտրությունների առիթով Երեւան եկած Լ.Կյումուշկերտյանը (ՀԲԸ Միության կենտրոնական վար-չության անդամ-Էդ.Մ.), որ ինքն այդ օրերին նրան եւ Ա.Չուպանյանին մանրամասն տեղեկություններ է տվել Հայաստանի տնտեսական եւ քա-ղաքական վիճակի մասին: Հ.Գարակյոզյանը միակ լրտեսը չէր, նա ուներ մի շարք անվանի գործընկերներ: Ներքին գործերի ժողկոմատի քննիչների գործադրած ուժային միջոցների հետեւանքով իրենց լրտես էին հայտարա-րել գրողներ Զ.Եսայանը եւ Վ.Թոթովենցը, թարգմանիչ եւ գրաքննադատ Պ.Մակինցյանը եւ այլք, իսկ նրանց հավաքագրողներն էին ֆրանսիական հետախուզության գործակալներ Հրաչ Երվանդը եւ Արշակ Չուպանյանը:⁶⁴

Երկրորդ եւ վերջին հարցաքննությունը, որը տեղի ունեցավ հոկտեմ-բերի 19-ին, քննիչը սկսում է սպառնալիքով. «Ձեր գործի հետաքննության ողջ ընթացքում դուք համառորեն թաքցնում եք ձեր հակահեղափոխական գործունեությունը՝ որպես արտասահմանյան դաշնակցական-ռամկա-վարական կենտրոնի միսիոներ (ըստ երեւութին, քննիչը միսիոները շփո-թել է էմիսարի հետ-Էդ.Մ.) Հայաստանում: Առաջարկում ենք վերջ տալ չխոստովանելուն եւ սպառիչ ցուցմունքներ տալ ձեր հակահեղափոխա-կան գործունեության մասին»:⁶⁵ Քննիչի այս խոսքերը խիստ ուշագրավ են, քանզի վկայում են, թե որ սցենարի համապատասխան էր սարքվում Հ.Գարակյոզյանի գործը եւ թե ինչ դեր էր հատկացվում նրան այդ սցե-նարում: Նախ, հարկ է նշել, որ ի տարբերություն հունվարյան հարցա-քննության, քննիչին այլեւս բնավ չի հետաքրքրում Ա.Եսայանի գլխավո-րած պատվիրակության այցը Մոսկվա. ըստ ամենայնի, նույնիսկ մեծ ցանկության դեպքում այն չէր կարող հիմք ծառայել քաղաքական լուրջ

մեղադրանքների համար: Իսկ այդպիսի հնարավորություն էր տալիս Ներքին գործերի ժողկոմատի հերյուրանքը արտասահմանում դաշնակցական-նամկավարական կենտրոնի եւ Հայաստանում տրոցկիստական-ազգայնական խմբի գոյության եւ նրանց համագործակցության մասին, որի նպատակն էր իբր խորհրդային իշխանության տապալումը, Հայաստանի անջատումը Խորհրդային Միությունից եւ այլն: Իր զբաղեցրած պաշտոնի բերումով Հ.Գարակյոզյանը, իհարկե, չէր կարող մտցվել այդ խմբի կազմի մեջ, նրա համար նախատեսված էր այլ, համեստ, բայց կարեւոր մի դեր, որը նույնպես մահաբեր եղավ:

Հետաքննության տրամաբանությունը պարզ էր եւ հստակ. քանի որ գոյություն ունեն երկու հակախորհրդային կենտրոններ՝ արտասահմանում եւ Հայաստանում, որոնք ունեն ընդհանուր նպատակներ եւ համագործակցում են, ապա մնում է պարզել, թե ով է ապահովում կապը նրանց միջեւ: Դժվար չէր կոահել, որ պատասխաններից մեկն էր՝ ՀԲԸ Միությունը եւ նրա ներկայացուցիչը Երեսնում՝ Հ.Գարակյոզյանը: Այսքանից հետո շատ դյուրին էր Հ.Գարակյոզյանին ու Միության գծով Հայաստան այցելած բոլոր մարդկանց՝ Մ.Պապաջանյանին, Ա.Չոպանյանին, Լ.Կյումուշկերտանին, Հրաչ Երվանդին, Մ.Միհրդատյանին եւ այլոց ներկայացնել որպես դաշնակցական-նամկավարական կենտրոնի ներկայացուցիչների, Հ.Գարակյոզյանի օգնությամբ կազմակերպված նրանց հանդիպումները Ս.Տեր-Գաբրիելյանի, Ա.Խանջյանի, Ար.Երզնկյանի, Ա.Եսայանի հետ՝ որպես երկու կենտրոնների համագործակցություն, ՀԲԸ Միությունը՝ որպես քաղաքական կազմակերպություն, որը հիմնվել է նամկավարների կողմից՝ արտասահմանի հայությանը հայկական բուրժուազիայի հանդեպ հավատարմության ոգով դաստիարակելու նպատակով, ՀԲԸ Միության կողմից Հայաստանում կառուցվող Նուպարաշենը, հիվանդանոցները եւ այլ շինությունները՝ որպես հայկական բուրժուազիայի ժողովրդականացման, նրա մասին հայ ժողովրդի մեջ դրական կարծիք ստեղծելու միջոց եւ այլն, եւ այլն: Իսկ որքանով էին օգտակար այս ամենի համար Հ.Գարակյոզյանի ցուցմունքները: Պետք է ընդունել, որ քննիչները այս դեպքում իրենց նպատակներին հասնելու համար վարպետորեն էին օգտագործել նրա բնավորության վերոնշյալ հատկանիշները: Ըստ ամենայնի, խոստումներ տալով Հ.Գարակյոզյանին ապագա դատավարության՝ նրա համար բարեհաջող ավարտի մասին, նրանք հենց սկզբից ձեռք բերեցին ամենակարեւորը՝ նրա ձեռքով հայերեն գրած խոստովանությունը ֆրանսիական հետախուզության գործակալ լինելու մասին: Հարցաքննությունների արձանագրությունները, ընդունված կարգի համաձայն, կազմվում էին ռուսերենով, բայց քանի որ Հ.Գարակյոզյանը չէր տիրապետում այդ

լեզվին, նրան պարզապես հայերենով շարադրում էին գրվածը, որից հետո նա ստորագրում էր արձանագրությունը (ռուսերեն չիմանալու պատճառով նույն կերպով էին ընթանում նաեւ գրող Զապել Եսայանի հարցաքննությունները): Նույնիսկ, եթե այդ պատասխանները չաղավաղվեին, ապա հեշտությամբ կարող էին ներկայացվել այլ, մինչեւ իսկ հակառակ ենթատեքստում: Այսպես, օրինակ, Հ.Գարակյոզյանը քննիչին պատմում է, որ Մ.Պապաջանյանի խոսքերով, Ս.Տեր-Գաբրիելյանը վերջինիս հետ հանդիպման ընթացքում խոստացել էր ամեն կերպ աջակցել Նուպարաշենի շինարարությանը, հատկապես պնդելով հայկական բուրժուազիայի կողմից Հայաստանին ավելի մեծ չափով դրամական միջոցներ հատկացնելու անհրաժեշտությունը, ասելով. «Հայկական բուրժուազիան պետք է հասկանա, որ իր հայրենիքը ոչ թե Սիրիան է, այլ Հայաստանը»: Դժվար չէ պատկերացնել, թե ինչպիսի «հակախորհրդային» իմաստ կարելի էր հաղորդել Ս.Տեր-Գաբրիելյանի այդ խոսքերին, որքան դյուրին էր նրան ներկայացնել որպես հայկական բուրժուազիայի գործակալ:

Ամեն դեպքում, Հ.Գարակյոզյանը թե իր անձնային հատկանիշներով եւ թե ռուսերենի չիմացությամբ դյուրացրել էր քննիչի աշխատանքը եւ մնում է ենթադրել, որ դրա շնորհիվ նրա նկատմամբ ֆիզիկական ճնշման միջոցներ չեն կիրառվել: Անվանի ճարտարապետ Միքայել Մազմանյանը, որը նրա հետ նույն բանտախցում էր եղել չորս ամիս՝ 1937թ. սեպտեմբերի 27-ից մինչեւ 1938թ. հունվարի 20-ը, 1955թ. տված իր վկայություններում, համենայն դեպս, մեծ փաստեր չի հիշատակում: Մ. Մազմանյանը այսպես է նկարագրել Հ.Գարակյոզյանին. «Նա ընդհանուր գծերով պատմում էր ինձ իր գործի մասին, պատմում էր, որ քննիչը գիտի ողջ ճշմարտությունը, ամբողջությամբ ներթափանցում է իր ոգու մեջ եւ հասկանում է, որ ինքը լրիվ անմեղ մարդ է ... Նա պահում էր իրեն համեստ եւ համբերատար սպասում էր իր գործի բարեհաջող ավարտին, քանի որ համոզված էր, որ ոչ մի բանում մեղավոր չէ եւ պետք է դուրս գա»:⁶⁶

Այդ օրերին Հ.Գարակյոզյանի գործի հետաքննությունը արդեն ավարտված էր՝ 1937թ. նոյեմբերի 20-ին քննիչ կիրակոպոլը ներկայացրել էր նրան լրացուցիչ մեղադրանքներ ՀԽՍՀ ՔՕ երեք հոդվածներով: Անցնում են ամիսներ, եւ միայն յոթ ամիս անց՝ 1938թ. հունիսի 17-ին Հայաստանի Ներքին գործերի ժողկոմի տեղակալ Կոնդակովը եւ Գլխավոր զինվորական դատախազի օգնական Ծուլց-Անը հաստատում են մեղադրական եզրակացությունը, որում, մասնավորապես, ասված էր.

«Դաշնակցական-նամկավարական կենտրոնը եւ հայկական խոշոր բուրժուազիան իրենց աշխատանքը կատարում էին իրենց ներկայացուցիչների միջոցով, որոնք ուղարկվում էին Խորհրդային Հայաստան ՀՕԿ-

ի կամ «Բարեգործական» միության ներկայացուցիչների պատրվակով, որոնց ամբաստանյալ Գարակյոզյանը ապահովում էր լրտեսական տեղեկություններով և կապում էր Հայաստանի աջ-տրոցկիստական ազգայնական կազմակերպության անդամների հետ»:⁶⁷ Հ.Գարակյոզյանի գործը, հաշվի առնելով նրան ներկայացված մեղադրանքները, հանձնվում է Խորհրդային Միության Գերագույն Դատարանի Զինվորական կոլեգիա: Մեկ ամիս անց՝ հուլիսի 17-ին տեղի է ունենում վերջինիս նախապատրաստական նիստը, որի որոշման երրորդ կետն էր. «Գործը լսել փակ դատական նիստում, առանց մեղադրող և պաշտպանող կողմերի մասնակցության և առանց վկաներ կանչելու՝ ԽՍՀՄ ԿԳԿ 1934թ. դեկտեմբերի 1-ի որոշման կիրառմամբ»:⁶⁸ Հաջորդ օրը՝ հուլիսի 18-ին Երեւանում կայացավ ԽՍՀՄ Գերագույն Դատարանի Զինվորական կոլեգիայի արտագնա նստաշրջանի դատական փակ նիստը. նախագահ՝ դիվիզիոնական զինիրավաբան Օրլով, անդամներ՝ բրիգադային զինիրավաբաններ Կոլպակով և Ստեմվախովիչ, քարտուղար՝ 3-րդ կարգի զինիրավաբան Կոզլով, մասնակցում էր Շուլց-Աննը:

«Նիստը բացվում է ժամը 17.25-ին... Նախագահողը պարզաբանեց ամբաստանյալին նրան ներկայացված մեղադրանքների էությունը և հարցրեց նրան, ճանաչում է նա արդյոք իրեն մեղավոր, ինչին դատապարտյալը պատասխանեց, որ նա իրեն մեղավոր է ճանաչում մասնակիրեն: Նա դաշնակցական կենտրոնի ներկայացուցիչ չի եղել: Ռուսաստան է եկել 1914թ.: Երզնկյանի հետ ծանոթացել է ԽՍՀՄ-ում: 1928թ. կապ է ունեցել Փոխօգնության կոմիտեի (?-ըստ երեւոյթին, դատական նիստի ռուսագրի անդամները այսպես են թարգմանել «Բարեգործական Միություն»-ը -Էդ.Մ.) հետ և բանակցություններ է վարել Խորհրդային կառավարության հետ: Անգլիական հետախուզության գործակալ չի եղել: Դիմումը՝ թեև նա գրել է իր հանցավորության ճանաչման մասին, չի համապատասխանում իրականությանը: Տեր-Սիմոնյանին ինքը ճանաչում էր:

«Հրապարակվում է Տեր-Սիմոնյանի ցուցմունքը:

«Դատապարտյալ. քաղաքական թեմաներով Տեր-Սիմոնյանի հետ ինքը երբեք չի գրուցել, իսկ ինչու է նա ցուցմունք տալիս այդ մասին, ինքը չի կարող բացատրել: Ինքը ազգայնական հայացքներ ուներ, որովհետև դաստիարակվել է Թուրքիայում:

«Դատական հետաքննությունը ավարտված է:

«Իր վերջին խոսքում դատապարտյալը ներողամտություն է խնդրում դատարանից, քանի որ ինքը 10 տարի ազնիվ աշխատել է և իր մեղքն այն է, որ ազգայնական հայացքներ է ունեցել:

«Դատարանը հեռանում է խորհրդակցելու:

«Վերադառնալով խորհրդակցելուց, նախագահողը հրապարակում է դատավճիռը:

«Ժամը 17.45-ին նիստը փակվեց:

Դատավճիռ, 18 հուլիսի 1938թ.

«Նախնական և դատական հետաքննությամբ հաստատված է, որ Գարակյոզյանը 1928թ. արտասահմանյան հակահեղափոխական դաշնակցական-նամկավարական կենտրոնի ներկայացուցիչ էր Հայաստանում և իրականացնում էր կապը հակահեղափոխական ազգայնական տեղորիստական կազմակերպության հետ, որը Հայաստանում գործում էր հակահեղափոխական աջ-տրոցկիստական տեղորիստական կազմակերպության հետ միասնաբար, որի նպատակն էր՝ Խորհրդային իշխանության զինված տապալումը, Հայաստանի անջատումը ԽՍՀՄ-ից և այսպես կոչված «անկախ» հայկական պետության ստեղծումը՝ կապիտալիստական մի երկրի պրոտեկտորատի տակ: Բացի այդ, Գարակյոզյանը զբաղվել է լրտեսական գործունեությամբ հօգուտ արտասահմանյան հետախուզություններից մեկի, վերջինիս փոխանցել է գաղտնի տեղեկություններ, որոնք իրենցից Խորհրդային Միության պետական գաղտնիք էին ներկայացնում:

«Այսպիսով ապացուցված է Գարակյոզյանի մեղավորությունը ՀԽՍՀ ԲՕ 59, 63, 65, 68 հոդվածներով նախատեսված հանցագործությունների կատարման մեջ:

«Ղեկավարվելով ՀԽՍՀ ԲԴՕ-ի 297 և 298 հոդվածներով, ԽՍՀՄ Գերագույն Դատարանի Զինվորական կոլեգիան դատապարտեց Հայկազ Իզնատիոսի Գարակյոզյանին պատժի առավելագույն չափի՝ գնդակահարության, անձամբ իրեն պատկանող ողջ գույքի բռնագրավումով:

«Դատավճիռը վերջնական է և ԽՍՀՄ ԿԳԿ նախագահության 1934թ. դեկտեմբերի 1-ի որոշման հիման վրա ի կատար է ածվում անմիջապես»:⁶⁹

Եվ վերջին փաստաթուղթը. «Տեղեկանք. Հայկազ Իզնատիոսի Գարակյոզյանի վերաբերյալ դատավճիռը գնդակահարության մասին ի կատար է ածվել ք. Երեւանում 1938թ. հուլիսի 18-ին»:⁷⁰

Նույն օրը գնդակահարվեցին նաև Ա.Եսայանը և Հ.Հակոբյանը, հոկտեմբերի 4-ին՝ Մոսկվա մեկնած պատվիրակության վերջին անդամ Տիգրան Զավենը: 1938թ. ընթացքում գնդակահարվեցին այս գլխում հիշատակված գրեթե բոլոր պետական և կուսակցական գործիչները, այդ

թվում նաև Մոսկվայում Վ.Մեծյալովը և Լ.Կարախանը: Նրանց մեջ ամենատարեցներն էին Ար.Երզնկյանն ու Դ.Ծահվերդյանը՝ 59 տարեկան:

Անցնում են տարիներ, Ի.Ստալինի մահից և Լ.Բերիայի գնդակահարությունից հետո Խորհրդային Միությունը աստիճանաբար սկսում է ազատագրվել նախորդ տարիների մղձավանջից, որի ամենակարեւոր դրսևերումներից էր տասնյակ հազարավոր բռնադատվածների արդարացումը: 1954թ. նոյեմբերին Հայկազ Գարակյոզյանի որդին՝ Լեւոնը (այդ ժամանակ արդեն Խորհրդային գրողների միության անդամ), դիմում է Հայաստանի Միմիստրների խորհրդին կից Պետանվտանգության կոմիտեի նախագահ Գ.Բաղասյանցին, խնդրելով վերանայել իր հոր գործը:

Ստալինյան տարիներին դատապարտվածների արդարացումը երկարատև և մանրակրկիտ գործ էր, այն չէր կատարվում և չէր էլ կարող կատարվել մեկ հրամանի կամ մեկ որոշման հիման վրա, քանի որ թվով անհամեմատ ավելի անմեղ զոհերից բացի կային նաև իսկապես մեղավորներ: Յուրաքանչյուրի վերաբերյալ, ըստ էության, կազմվում էր մի նոր գործ, ուր իրավաբանորեն համոզիչ ապացույցների հիման վրա պետք է հիմնավորվեր տվյալ անձի անմեղությունը: Բայց անցած տարիներին ոչնչացվել էին նաև նախկին վկաները, որոնք կարող էին հրաժարվել իրենց՝ բռնությունների ազդեցության տակ սված ցուցմունքներից, ոչնչացվել, թաքնվել էին բռնությունների կազմակերպիչներն ու իրագործողները, ավելին՝ նրանց մի մասը շարունակում էր զբաղեցնել պետական ու կուսակցական պաշտոններ և, ամենակարեւորը, Խորհրդային Միության նոր ղեկավարությունը դեռևս հրապարակավ չէր դատապարտել Ստալինի վարչակարգի հանցագործ քաղաքականությունը սեփական ժողովրդի նկատմամբ, որ պետք է աներ կոմկուսի նոր առաջնորդ Ն.Սրուժնովը իր պատմական ճառով 1956թ.՝ Խորհրդային Միության կոմկուսի XX համագումարում:

Նման դժվարությունների հետ էր կապված նաև Հ.Գարակյոզյանի արդարացման գործը: Եվ այնուամենայնիվ, հետզհետե ապացուցվում էր, որ հանրապետության ղեկավարներից կազմված աջ-տրոցկիստական կազմակերպություն Հայաստանում գոյություն չի ունեցել, որ գոյություն չի ունեցել նաև դաշնակցական-նամկավարական կենտրոն արտասահմանում, որ ՀԲԸ Միության գործիչներ Լ.Կյումուշկերտանը, Ա.Չուպանյանը, Մ.Պապաջանյանը, Հրաչ Երվանդը և այլք ոչ այդ կենտրոնի ներկայացուցիչներն էին և ոչ էլ տարբեր երկրների հետախուզության գործակալներ, և որ Հ.Գարակյոզյանի և ուրիշների «խոստովանությունները» արվել էին նրանց նկատմամբ կիրառված ֆիզիկական և հոգեբանական ճնշման արդյունքում: Հ.Գարակյոզյանի անմեղությունը հաստատեցին

աքտրավայրերից վերադարձած Ա.Եղիազարյանը, Հայաստանի ժողով-միտրոսի գործերի նախկին կառավարիչ Ա.Թոքմաջյանը, Հայաստանի, ապա Անդրֆեդերացիայի կենտգործկոմի նախկին նախագահ Ս.Մարտիկյանը, քանդակագործ Ա.Սարգսյանն ու ճարտարապետ Մ.Մազմանյանը: Ի վերջո, 1956թ. մարտի 7-ին Պետանվտանգության կապիտան Կոստանդյանը, ավարտելով Հ.Գարակյոզյանի արդարացման գործը, եզրակացնում է. «...Հայկազ Գարակյոզյանը 1937թ. ձերբակալվել էր դատապարտվել է անհիմն կերպով»: Մի քանի ամիս անց Խորհրդային Միության Գերագույն Դատարանի Զինվորական կոլեգիան որոշում է. «ԽՍՀՄ Գերագույն Դատարանի Զինվորական կոլեգիայի 1938թ. հուլիսի 18-ի դատավճիռը Գարակյոզյանի վերաբերյալ չեղյալ հայտարարել..., իսկ գործը հանցակազմի բացակայության պատճառով կարճել»:⁷¹

Բայց մինչ այդ, եղավ մի պահ, երբ թվաց, որ թե ՀԲԸ Միության և թե Հ.Գարակյոզյանի գործունեությունը Խորհրդային Հայաստանում ոչ այլ ինչ է, եթե ոչ պարզ միստիֆիկացիա: 1955թ. հուլիսին Հ.Գարակյոզյանի արդարացման առիթով, Պետանվտանգության կոմիտեի նախագահի տեղակալը դիմում է Միմիստրների խորհրդի գործերի կառավարչին, խնդրելով կառավարության արխիվի նյութերի հիման վրա հայտնել հետևյալ տեղեկությունները ՀԲԸ Միության մասին. «1) Ե՞րբ է գոյություն ունեցել, ի՞նչ նպատակներ է հետապնդել և իրականում ինչպիսի՞ գործնական օգնություն է ցույց տվել, 2) Ինչպիսի՞ տեղեկություններ կան այդ Միության Հայաստանում ներկայացուցիչ Հ.Գարակյոզյանի վերաբերյալ, ե՞րբ և ո՞ւմ կողմից է նա նշանակվել այդ պաշտոնին, ինչպիսի՞ նպատակներով և ի՞նչ աշխատանք էր տանում նա»:⁷² Մեկ ամիս անց Ներքին գործերի միմիստրության արխիվային բաժնի պետը Պետանվտանգության կոմիտեի քննչական բաժնի պետին է հասցեագրում կենտրոնական պետական արխիվից ստացված տեղեկանքը... «Կովկասյան բարեգործական միության» մասին: Տեղեկանքում նշվում էր, որ այդ միությունը գործել է 1881-1924թթ. և որ «Միության անձնակազմում Հ.Գարակյոզյան չի հայտնաբերվել»:⁷³ Ստանալով մման ապշեցուցիչ տեղեկություններ՝ Պետանվտանգության աշխատակիցները, սակայն, բնավ չեն հուսալքվում և նորից են դիմում Ներքին գործերի միմիստրության արխիվային բաժնի պետին: Այս անգամ հարցը ձեռակերպվում է այլ կերպ. «Խնդրում ենք ցուցում տալ ստուգել և տեղեկացնել՝ ղեկավար ո՞ր մարմինների հրահանգների հիման վրա է թույլատրված եղել «Հայկական բարեգործական միության»՝ «Բարեգործականի» գործունեությունը Հայաստանում 1935-1937թթ.»։ 1955թ. սեպտեմբերի 9-ին ստացվում է հետևյալ պատասխանը. «ԽՍՀ ՆԳՄ արխիվային բաժնին տեղեկացնում

է, որ Հայաստանում խորհրդային իշխանության տարիներին «Հայկական բարեգործական միություն»՝ «Բարեգործական» գոյություն չի ունեցել: Նրա մասին վերջին տեղեկությունները վերաբերում են 1921թ. փետրվար-մարտ ամիսներին, այսինքն դաշնակցական ավանտյուրայի շրջանին»:⁷⁴

Ակամա հիշում ես լորդ Բոլինգբրոկի խոսքերը. «Երկար էր մեր ճանապարհը մինչեւ ապականացման այս աստիճանը, իսկ չարի քրոնիկական արատներից հետ ընկրկումը, ինչպես հայտնի է, շատ ավելի դանդաղ է, քան դեպի այն տանող առաջընթաց շարժումը»:⁷⁵

7

ԵՐԿՐՈՐԴ ԱՇԽԱՐՀԱՄԱՐՏԻ

ՏԱՐԻՆԵՐԻՆ:

ՄԵԾ ՆԵՐԳԱՂԹԸ

1939թ. սեպտեմբերի 1-ին սկսվեց Երկրորդ Աշխարհամարտը: Հայ ժողովրդի համար այդ պատերազմը, Առաջին Աշխարհամարտի համեմատ ուներ որոշակի առանձնահատկություններ: Այս անգամ հայաբնակ հայկական տարածքներում՝ Խորհրդային Հայաստանում ուղղակի կան գործողություններ չեղան: Թուրքիան, ակնհայտորեն համակրելով Գերմանիային, այդպես էլ չհամարձակվեց պատերազմել Խորհրդային Միության հետ: Պատերազմի հետեւանքով ոչ միայն հերթական անգամ չնվաճվեց Հայաստանի տարածքը, այլև հակառակը՝ պատերազմի ավարտին շատ հավանական էր թվում Թուրքիայի զավթած հայկական տարածքների մի մասի վերադարձը: Այս պատերազմում նույնպես հայ ժողովուրդը կրեց մարդկային մեծ կորուստներ՝ շուրջ 200 հազ. մարդ: Սակայն այդ մարդիկ այլևս ցեղասպանության զոհեր չէին եւ նրանց մեջ չկային ծերեր, երեխաներ եւ կանայք: Դրանք հայ զինվորներն էին, որոնք Խորհրդային կարմիր բանակի կազմում արիաբար կռվեցին եւ հաղթեցին նացիստական Գերմանիային եւ դրանով իսկ պաշտպանեցին իրենց հայրենիքը, հայ ժողովրդի խաղաղ ապագան:

ՀԲԸՄ-ը պատերազմող Ֆրանսիայում

Առաջիններից մեկը, որ իր վրա զգաց Երկրորդ Աշխարհամարտի արհավիրքները Եվրոպայի երկրներում, Ֆրանսիայում բնակվող հայությունն էր:

Այդ տարիներին Ֆրանսիան հայ սփյուռքի մշակութային եւ քաղաքական կենտրոնն էր, ինչպիսին հետագայում հաջորդաբար հանդես էին գալու Լիբանանն ու ԱՄՆ-ը: Փարիզում, Մարսելում, Լիոնում եւ այլ քաղաքներում ձեւավորվել էին հայկական համայնքներ, գործում էին մի շարք ազգային կազմակերպություններ, այդ թվում Փարիզում Հայաստանյայց Առաքելական եկեղեցու Արեւմտյան Եվրոպայի թեմի առաջնորդարանը եւ կենտրոնական մարմինները, ազգային կուսակցությունները, Գաղթականաց կենտրոնական հանձնաժողովը, Փարիզի Հայ տիկնանց միությունը, Հայ Բժշկական միությունը, Անի Հայ արվեստագետներու խմբակցությունը, Ֆրանսահայ Կապույտ Խաչը, Հայ Չափահաս որբերու միությունը, Ռուսահայ կանանց միությունը, հայրենակցական միություններ եւ այլն: Փարիզում՝ այդ տարիներին աշխարհի մշակութային կենտրոնում, ստեղծագործում էին նաեւ մեծ թվով հայ արվեստագետներ: Նրանց թվում էին նկարիչներ՝ Ֆրանսիայի ծովանկարիչների ընկերության հիմնադիր անդամ Արսեն Ծապանյանը, Վարդան Մախոխյանը, Հովհաննես Ալխազյանը, Հովսեփ Փուշմանը, Էդգար Ծաֆինը, քանդակագործ Հակոբ Գյուրջյանը, ճարտարապետ Լեոն Նաֆիլյանը, գրող եւ հրապարակախոս Արշակ Չոբանյանը եւ այլք: Ընդհանրապես դեմքերից էին նաեւ քարտեզագիր Զատիկ Խանգատյանը, որի պատրաստած Սիրիայի եւ Լիբանանի ատլասի առաջաբանի հեղինակն էր Ֆրանսիայի Ծովային նախարար Ժորժ Լեկը, Փարիզի լուսանկարչության ինստիտուտի պրոֆեսոր Աբել Մինասյանը, բժիշկներ, պրոֆեսորներ Կարապետ Աղաջանյանը, Հրանտ Հանչերը, Մկրտիչ Տեր-Կարապետյանը եւ այլք: Փարիզի մոտակայքում՝ Նեղյում էր գտնվում Աթանազիան Էզնայանի հիմնած ադամանդի հոլկման գործարանը, որի արտադրանքը վաճառվում էր Եվրոպայի եւ Ամերիկայի հայտնի ոսկերչական խանութներում: Նրա որդին՝ Վահեն իր հոր բանավոր կտակի համաձայն, 1926թ. մեկ միլիոն ֆրանկ էր հանձնել Պողոս Նուպարին՝ ազգօգուտ որեւէ նպատակով գործածելու համար:

Ֆրանսահայերի ընդհանուր զանգվածը այդ երկրում հաստատվել էր հիմնականում Առաջին Համաշխարհային պատերազմից հետո: Անցած տարիների ընթացքում նրանք ոչ միայն կազմակերպեցին իրենց ազգային կյանքը, այլեւ աստիճանաբար սկսեցին ներգրավվել եւ ինքնհաստատվել երկրի սոցիալ-տնտեսական կյանքում: Հատկանշական է, որ

1939թ. հունվարի 24-ին Փարիզի «Ռադիո-30» կայանը հատուկ հաղորդում էր նվիրել Փարիզի հայ համայնքին: «Ասիկա եղաւ իսկապէս հայկական բրոքականտի հրապարակային գեղեցիկ արտայայտութիւն մը, մեր ցեղային ինքնյատկութեանց, նախաձեռնութեան ոգիին, հանրային գործունէութեան, ազգային, մշակութային եւ այլ պատուաբեր երեսյթներուն մասին: Բարիզահայ կարեւորագոյն հաստատութիւնները իրարու յաջորդեցին այդ զուտ հայկական համասփիւռին մէջ, որուն տնօրէնութեան մասնատր հրաւերին վրայ իր մասնակցութիւնը բերաւ նաեւ ՀԲԸ Միութիւնը...»:¹

Ֆրանսիայում ՀԲԸ Միության առաջին մասնաճյուղերը՝ շնորհիվ Երվանդ Աղաթոնի ջանքերի, հիմնվել էին դեռեւս 1910թ.՝ Մարսելում եւ 1911թ.՝ Փարիզում, իսկ հետագայում նրանք գործում էին գրեթե բոլոր հայաբնակ քաղաքներում՝ Նիսում (1927թ.), Լիոնում (1928թ.), Սենտ-Էտյենում (1929թ.), Սեն-Ծամոնում (1927թ.), Վլեմում (1930թ.) եւ այլուր: Սակայն սուկ մասնաճյուղերի գոյությամբ չէ, որ պայմանավորված էր Ֆրանսիայի, մասնավորապես Փարիզի առանձնահատուկ դերն ու նշանակությունը ՀԲԸ Միության կյանքում: Փարիզում էին կրթություն ստացել Միության բոլոր երեք նախագահները՝ Պողոս Նուպարը, Գալուստ Կյուլպենկյանը, Զարեհ Նուպարը, ինչպես եւ նրա մի շարք ականավոր գործիչներ: 1912թ., երբ Պողոս Նուպարը ստանձնեց Ազգային պատվիրակության ղեկավարումը, Փարիզը դարձավ նրա եւ իր ընտանիքի մշտական բնակության վայրը: Փարիզաբնակ Տիգրան Քելեկյանի, Ռաֆայել Մարկոսյանի, Աթանազիան Էզնայանի, Լեոն Ակոբյանի, Նոյեմի Գափամանյանի (Պողոս Նուպարի քույրը) եւ այլոց նյութական օժանդակության շնորհիվ էին իրականացվում Միության ծրագրերը Արեւմտյան Հայաստանում եւ Կիլիկիայում:

Փարիզի դերը հատկապես կարեւոր դարձավ, երբ 1921թ. Կահիրեից այստեղ փոխադրվեց ՀԲԸ Միության Կենտրոնական Վարչական Ժողովը, որի անդամները դարձան փարիզաբնակներ Գաբրիել Նորատունկյանը, Գրիգոր Սինասյանը, Լեոն Կյումուշկերտանը, Սերովբե Սվաճյանը, Տիգրան Կամարականը եւ այլք: Փարիզում էին տեղակայված ՀԲԸ Միության Կենտրոնական Վարչական Ժողովի շենքը (որն այսօր ՀԲԸ Միության Ֆրանսիայի շրջանային հանձնաժողովի կենտրոնատեղին է), Նուպարեան Մատենադարանը, Մարի Նուպար Հայ ուսանողական տունը, նրա սեփականությունն էին նաեւ Տիգրան խան Քելեկյանի տրամադրած Դպրոցասեր տիկնանց վարժարանի շենքը, Նոյեմի Գափամանյանի նվիրաբերած բնակարանները կարիքավոր գաղթականների համար եւ այլն:

1938թ. հոկտեմբերին Փարիզում՝ Նուպարեան Մատենադարանի սրահում Զարեհ Նուպարի նախագահությամբ հրավիրվեց ՀԲԸ Միության հերթական Ընդհանուր ժողովը, որից մի քանի ամիս անց Կենտրոնական Վարչությունը հայտարարեց հաջորդ ժողովի անցկացման ժամանակն ու վայրը՝ 1939թ. սեպտեմբեր, Լոզան: Սակայն 1939թ. սեպտեմբերին սկսված Համաշխարհային պատերազմը ոչ միայն անհնարին դարձրեց ժողովի գումարումը, այլև, ինչպես ցույց տվեցին հետագա դեպքերը, արմատական փոփոխությունների ենթարկեց ՀԲԸ Միության ողջ գործունեությունը:

Ֆրանսիայի պատերազմի մեջ մտնելը անխուսափելիորեն տարբեր տեսակի զրկանքներ եւ սահմանափակումներ բերեց երկրի ողջ բնակչությանը: Սակայն շատ ավելի դժվարին վիճակում հայտնվեցին «օտարականները»՝ այլազգի գաղթականները: «Արդէն պատերազմից առաջ, ռուս եւ հայ գաղթականները, ֆրանսական օրէնքով 1928թ., պարտաւոր էին զինուորական ծառայութիւն կատարել տեղացիների պէս, առանց վայելելու սակայն երկրի քաղաքացիի իրաւունքները»,- վերհիշում էր ժամանակակիցը,- «Պատերազմը հռչակուելուց յետոյ զինուորագրութեան ենթակայ «անհայրենիք» գաղթականների դիրքը ոչ թէ միայն չբարուրուեց, այլ նոր երեւոյթներ մէջտեղ եկան, կարծես հաստատուելու համար, որ անպաշտպան օտարականները ռուս թէ հայ, միայն պարտականութիւններ ունին եւ արժանի չեն հաւասար իրաւունքների տեղացիների հետ, նոյն իսկ երբ վճարում են «արեան տուրքը»: Այսպէս, օրինակ, պարզուեց որ ճակատ ուղարկուող մեր եւ ռուս երիտասարդ զինուորների ինքնութեան տեսրակների վրայ բացայայտ գրում էր թէ «չունի ֆրանսական ազգութիւն», թէ եւ ենթակաները հագած ունէին ֆրանսական համազգեստ եւ կրում էին ռազմական պայուսակ եւ հրացան, այս վերջինը երբեմն հինամնաց, մէկ փամփուշտաւոր: Թունաւոր գազերի դէմ պաշտպանուելու նպատակով տեղացիներին եւ դաշնակից օտարականներին վերապահեցին դիմակները, մերժելով գրեթէ ամենուրեք այդ կրատրական պաշտպանութեան միջոցը ռուս եւ հայ տարագիրներին, թէ եւ սրանց զաւակները ֆրանսացիների հետ միասին զինուորագրուեցին եւ իրենց արհնը չխնայեցին երկրի պաշտպանութեան համար»: Օտարական հայների նկատմամբ կիրաւովող տարբեր տեսակի սահմանափակումները եւ արգելքները, խիստ գրաքննությունը, նրանց թերթերի դադարեցումը եւ նման այլ երեւոյթներ, նոյն հեղինակի խոսքերով՝ «...խտացրին անօգնականութեան եւ յուսահատութեան աստիճանը»:²

Ռուս գաղթականներից մեկը, իր հերթին, վերհիշելով այդ տարիները, գրում էր. «Պատերազմը սկսվեց, եւ մենք ճաշակեցինք արտասահ-

մանցու վիճակի ողջ դառնությունը: Առաջացան հերթեր նույնիսկ քարտերով վաճառվող ապրանքների համար: Հերթերը հենց սկզբից բաժանվեցին՝ ֆրանսիացիների համար, որոնք սպասարկվում էին առաջին հերթին, եւ արտասահմանցիների համար, որոնք բավարարվում էին մնացուկներով: Երբեմն, մի քանի ժամ հերթում կանգնելուց հետո, գնում էինք դատարկ ձեռքերով: Չնայած փաստաթղթերով մենք անհպատակ էինք (ապատրիոյ), բոլոր ռուս տղամարդիկ դարձան զինապարտ... Իսկ կանայք թիկունքում մնում էին իրավագուրկ արտասահմանցիներ: Ահա այսպես էին գործում ֆրանսիացիները պատերազմի տարիներին»:³

1939թ. վերջին իր մի հողվածում Արշակ Չոպանյանը ուշադրություն էր հրավիրում պատերազմի հետեւանքով առաջացած մի խնդրի վրա. «Ֆրանսահայ գաղութի զինուորական տարիք ունեցող բոլոր անդամները, Ֆրանսա ապաստանած տարագիրներու պարտադրական զինուորագրութեան օրէնքին գործադրութեամբ, բանակի մաս կը կազմեն, արդէն իսկ ճակատը դրկուած... Ատոնց մէջ կան՝ որ բարեկեցիկ են, բայց կան ալ, որ աղքատ են, օգնութեան կարօտ: Կան, որ ընտանիք ունին, կան ալ որ միճակ են, անոք, իրենց հոգածութիւն տուողի մը, թղթակցողի մը, նուէրներ դրկողի մը պէտք ունին... Կան հայ զինուորներ, որոնք ունին բազմանդամ ընտանիք մը որուն նեցուկն էին եւ որ այժմ նեղութեան մէջ է եւ պէտք ունի օգնութեան»:⁴ Նման վիճակում հայտնված ֆրանսահայ զինվորներին եւ նրանց ընտանիքներին օժանդակելու նպատակով ՀԲԸ Միությունը, Հայ Գաղթականաց կենտրոնական հանձնաժողովը, Հայ տիկնանց միությունը, Հայ Կապոյտ Խաչը, Արեւմտյան Եվրոպայի թեմի առաջնորդարանը եւ այլ կազմակերպություններ Փարիզում հիմնեցին Ֆրանսական բանակի հայ զինուորներու օգնութեան յանձնախումբ: Տիրան վարդապետ Ներսոյանի նախագահությամբ: Հանձնախմբի ստեղծման ամենամեծ ջատագովներից մեկը՝ Միության փոխնախագահ Պողոս Լսմերյանը դարձավ նրա գանձապահը, իսկ ատենապետն էր՝ Նուպարեան Մատենադարանի գրադարանապետ Արամ Անտոնյանը:

ՀԲԸ Միությունը նորաստեղծ կազմակերպությանը տրամադրեց 500 ֆունտ ստերլինգ՝ ամսական 5.000 ֆրանկի մասնավճարներով:⁵ Բացի այդ, Միության Փարիզի մասնաժողովը դրամական օգնություն էր ցույց տալիս հատկապես փարիզահայ զինվորների կարիքավոր ընտանիքներին: Դրա հետ մեկտեղ, Միությունը իր պարտքը համարեց մասնակցել կառավարության կազմակերպած «Մեր զինվորների համար» հանգանակությանը, որի համար շնորհակալական նամակ ստացավ Ֆրանսիայի ֆինանսների նախարար Պոլ Ռեյնոյից:

Պատերազմական դրության պայմաններում երկրի իշխանությունները խիստ սահմանափակումների ենթարկեցին նաև տարբեր, ներառյալ ազգային փոքրամասնությունների համայնքային կազմակերպությունների գործունեությունը: Այսպես, 1939թ. ընդունված հատուկ օրենքի համաձայն, գինվորական իշխանությունները իրավունք էին ստանում արգելել ժողովներ, փակել թերթեր և ամսագրեր, կատարել խուզարկումներ, վտարել քաղաքացիություն և մշտական բնակություն չունեցող անձանց և այլն:

1939թ. սեպտեմբերի կեսին Միության կենտրոնական վարչությունը, նկատի առնելով Փարիզում ստեղծված անորոշ և շփոթ կացությունը, որոշում է Միության ընդհանուր տնօրինությունը և կենտրոնական գրասենյակը տեղափոխել ավելի ապահով վայր: Որպես այդպիսին ընտրվեց Պրոքոյոլ գյուղաքաղաքը, որը գտնվում էր Փարիզից մեկ ու կես ժամ հեռավորության վրա, շնորհիվ ինչի, տնօրինության աշխատակիցները, նախ և առաջ վարիչ-պատվիրակ Վահան Մալեզյանը հաճախ այցելում էին մայրաքաղաք և ապահովում մշտական կապը կենտրոնական վարչության հետ: Բայց յոթ ամիս անց՝ 1940թ. ապրիլի 15-ին, այսինքն՝ Փարիզի գրավումից մոտ երկու ամիս առաջ, Միության պաշտոններումը լրիվ կազմով վերադառնում է Փարիզ: Միության ղեկավարության նման, առաջին հայացքից տարօրինակ գործողությունները, բացատրվում են երկրում այդ օրերին կատարվող իրադարձություններով:

Մինչ այդ, 1940թ. մարտի 20-ին, Ֆրանսիայի վարչապետ դարձավ Պոլ Ռեյնոն, որը, ի տարբերություն իր նախորդի՝ Դալադյեի, հայտնի էր իր անգլո-ամերիկյան կողմնորոշմամբ և Գերմանիայի դեմ ակտիվ ռազմական գործողություններ վարելու վճռականությամբ: 1940թ. ապրիլի 14-ին Հյուսիսային Նորվեգիայում ակտիվացան անգլո-ֆրանսիական զորքերը, որոնք շուտով մարտի բռնկեցին գերմանական բանակի հետ: Գերմանական զորքերի ներխուժումը Սկանդինավիա՝ ոչ միայն չանհանգստացրեց ֆրանսիացիներին, այլև հակառակը՝ ըստ նրանց, այդ հարձակումը և հետագա երկարատև պատերազմը Նորվեգիայի, գուցե և Շվեդիայի հետ պետք է քայքայեր գերմանական բանակը և ավարտվեր նրա արագ պարտությամբ: Անգլո-ֆրանսիական համատեղ ռազմական գործողությունները և իշխանությունների լավատեսական հայտարարությունները ֆրանսիական հասարակության մեջ ստեղծեցին պաշտպանվածության, պատերազմի հաղթական ավարտի տրամադրություններ, որոնք և պայմանավորեցին ՀԲԸ Միության ղեկավարության՝ Փարիզ վերադառնալու մասին որոշումը: Սակայն ֆրանսիական իշխանությունների հաշվարկները պարզապես անհեթեթ էին՝ արդեն մայիսի

10-ին Բելգիա, Հոլանդիա և Լյուքսեմբուրգ ներխուժած գերմանական զորքերը ջախջախիչ պարտության մատնեցին անգլո-ֆրանսիական զորքերին և ընդամենը հինգ օր անց անցան ֆրանսիական սահմանը: Մեծ Բրիտանիայի վարչապետ Ու.Չերչիլը իր գրքում բերում է Պ.Ռեյնոյի խոսքերը. «Մենք ջախջախված ենք, մենք տանուլ տվեցինք պատերազմը»:⁶ Ֆրանսիացիների, ինչպես և ֆրանսահայերի համար անկարելի էր նույնիսկ երեւակայել, որ Ֆրանսիան՝ աշխարհի այդ ժամանակվա ամենազարգացած և ռազմական առումով ամենահզոր երկրներից մեկը, մտնելով Երկրորդ Համաշխարհային պատերազմի մեջ 1939թ. սեպտեմբերի 3-ին, արդեն 1940թ. ամռանը ջախջախիչ և անպատվաբեր պարտության կմատնվի նացիստական Գերմանիայի կողմից:

Ստեղծված իրավիճակում ՀԲԸ Միության ղեկավարությունը ստիպված էր նոր որոշում կայացնել տնօրինությունը Փարիզից տեղափոխելու մասին: Նկատի առնելով դեպի երկրի հարավը շարժվող մարդկանց մեծ բազմությունը, դա կապված էր բազմապիսի բարդությունների հետ: 1940թ. հունիսի 13-ին՝ գերմանական զորքերի Փարիզ մտնելուց երեք օր առաջ միայն Վ.Մալեզյանին հաջողվեց մեկնել մայրաքաղաքից, տանելով իր հետ Միության կարելորագույն փաստաթղթերը: Մեկամսյա արկածներով լի ճամփորդությունից հետո նա հասավ Մարսել՝ տեղի Բարեգործականի Տան մեջ հաստատելով Միության առժամյա գրասենյակը:

Տագնապալի այդ օրերին, սակայն, Միության ղեկավարության հիմնական մտահոգությունը կապված էր նրա ֆինանսական միջոցների հետ, որոնց ապահովությունը՝ Եվրոպայի տարածքով մեկ ընթացող պատերազմի պայմաններում, այլևս երաշխավորված չէր: Դեռևս 1939թ. վերջերին Փարիզում ստացվեց Միության Նյու Յորքի կենտրոնական Հանձնաժողովի առաջարկը՝ անհապաղ Լոնդոնի դրամատներից Նյու Յորք փոխադրել Միությանը պատկանող ամերիկյան բոլոր արժեթղթերը: Այդ առաջարկը, որին իր համաձայնությունն էր հայտնել այդ ժամանակ ԱՄՆ-ում գտնվող Միության նախագահ Ջարեհ Նուպարը, պայմանավորված էր պատերազմող երկրներում ֆինանսական միջոցների օգտագործմանը վերաբերող նոր կարգն ընդունելու հետ: Այսպես, պատերազմի նախօրեին՝ 1939թ. օգոստոսի 29-ին անգլիական կառավարությունը ընդունել էր հատուկ մի օրենք, որի համաձայն, այլ երկրների արժեթղթերի հետ բոլոր գործառնությունները ենթարկվում էին որոշակի սահմանափակումների և արգելքների: Եվ թեև այդ օրենքը վերաբերում էր միայն անգլիահպատակներին, սպասելի էր, որ շարունակվող պատերազմի պայմաններում այն կտարածվի նաև այլոց վրա: Նկատի առնելով, որ Միության ֆինանսական միջոցների հիմնական մասը պահվում էր անգ-

լիական բանկերում, Կենտրոնական Վարչությունը հրահանգեց, որ նրանք անմիջապես Նյու Յորքի Նեշնըլ Սիթի Պենք փոխադրեն Միության բոլոր ամերիկյան արժեթղթերը: Դա, սակայն, հարցի միայն մասնակի լուծում էր, քանզի Միության տրամադրության տակ եղած հիմնական ֆինանսական միջոցները ձեռակերպված էին որպես «Թրասթ»-ներ (խնամակալության տակ գտնվող գույք կամ գումար) և որոնց փոխադրումը Նյու Յորք շարունակվեց հետպատերազմյան տարիներին: «Այդ ծրագրին իրագործումը,-նշվում էր Միության տեղեկագրում,- օրինական ծանր արգելքներու կը բախէր և այդ առթիւ կատարուած են երկար բանակցութիւններ և թղթակցութիւններ, մէկ կողմէն անեղծ պահելու համար Թրասթներու նպատակը և միւս կողմէն գգուշանալու համար անոնց ապահովութիւնը վտանգելու նուազագոյն հաւանականութենէն իսկ: Իրաւական կնճոտ, բազմադիմի և անվերջանալի գործողութիւններ տեղի ունեցան, հաւասարապէս Լոնտոնի և Նիւ Եորքի դրամատուներուն և փաստաբաններու հետ, և ձեռնարկը իր յաջող վախճանին յանգելու վրայ էր, Նիւ Եորքի Չէյզ Նեշնըլ Պենքի հետ համաձայնութեամբ, երբ Ֆրանսայի անսպասելիօրէն արագ պարտութեամբը ամէն հաղորդակցութիւն ընդհատուեցաւ... Ցաւալի է որ կարելի չէր այդ ծրագիրը իրագործել, այսուհանդերձ այդ անյաջողութիւնը բարեբախտաբար տեղի չի տուաւ ոեւէ անդարմանելի վնասի»:⁷

Կենտրոնի տեղափոխումը Նյու Յորք

Գերմանական զորքերի Ֆրանսիա ներխուժումից հինգ օր անց՝ մայիսի 20-ին, Միության շահերը պաշտպանելու համար շտապ կերպով է վերջին անգամ Փարիզում հրավիրված իր նիստում Միության Կենտրոնական Վարչությունը պարտադրաբար ընդունեց հետեւյալ խիստ կարեւոր և պատասխանատու որոշումը.

«Կեդր. Վարչ. Ժողովը, երկարօրէն խորհրդակցելէ յետոյ տիրող կացութեան մասին գոր պատերազմի ցաւալի հետեւանքները աւելի ճնշող և ծանրակշիռ դարձուցած են: Նկատելով որ պատերազմական վիճակին բերումովը, թղթակցութիւնները, ինչպէս նաեւ դրամատանց հետ գործառնութիւնները կը կրեն վնասաբեր յապաղումներ: Նկատելով մանաւանդ որ Միութեան դրամազուխներուն մատակարարութիւնը ներկայ հանգամանքներու մէջ կը պահանջէ կանխագուշութեան և ապահովութեան միջոցներու շուտափոյժ կիրարկումը: Նկատելով հետեւաբար որ, անխուսափելի դժուարութեանց նախատեսութեամբը, հարկ է պատերազմի տեւո-

ղութեան միջոցին ապահովել ընկերակցութեան շահերը, բացառիկ և ժամանակաւոր իրաւասութիւններ փոխանցելով Ամերիկայի իր ամէնէն աւելի հեղինակաւոր ներկայացուցիչներուն: Կ'արտօնէ և կը փոխանորդէ փոխ-ատենապետ տ. Պ.Էսմէրեանը, փոխ-գանձապահ տ. Վահէ Ֆրէնկեանը և վարիչ-պատուիրակ տ. Վ.Մալէզեանը, Միացեալ Նահանգներու Բարիզի Ընդհ. Հիւպատոսարանին առջեւ անմիջապէս ստորագրելու փոխանորդագիր մը, որուն մասին արդէն առնուած էր ամերիկեան օրէնագէտի մը կարծիքը, և որով լիազօրութիւն կը տրուի Նիւ Եորքի մէջ գործող ՀԲԸ Միութեան Կեդր. Յանձնաժողովի անդամներուն և մասնաւորապէս Ատենապետ տ. Ա.Գարակէօզեանի և Գանձապետ տ. Յ.Կիւլպէնկեանի»:⁸

Հաջորդ օրը այդ փոխանորդագիրը վավերացվեց Փարիզում ԱՄՆ-ի հյուպատոսարանում. «...և այս կերպով Կեդր. Վարչ. Ժողովը իմաստուն և հեռատես ոգիով մը լուծած էր իր խղճին ու պարտականութեան վրայ ծանրացող ամենալուրջ հարցը, Հիմնական Կանոնագրի բացորոշ տրամադրութեանց համաձայն Միութեան վարչական Կեդրոնատեղին Նիւ Եորք փոխադրելով և այդու փրկելով ՀԲԸ Միութեան գերագոյն շահերը»:⁹ Դրանից չորս ամիս անց, Վիշի քաղաքում, ուր տեղակայվել էր Գերմանիայի հետ համագործակցող Պետենի գլխավորած կառավարությունը (Վիշիի կառավարություն), կայացավ ՀԲԸ Միության Կենտրոնական Վարչական Ժողովի 355-րդ նիստը՝ Առաքել Նուպարի նախագահությամբ: Այն բավարարվեց 1941թ. համար առժամյա նախահաշվի քննարկմամբ, ինչպէս նաեւ հավանություն տվեց Միության վարիչ-պատվիրակի, փոխ-նախագահի և գանձապետի «սահմանափակ և խորհրդապահ» գործունեությանը, ինչպէս նաեւ նրանց օժանդակությանը Նյու Յորքի Կենտրոնական Հանձնաժողովին՝ Միության գործունեությունը ղեկավարելու գործում:

Եթէ ՀԲԸ Միության պատմությունը պարբերացվի ըստ նրա կենտրոնի աշխարհագրական տեղակայման, ապա կարելի կլիներ ասել, որ այդ օրերին ավարտվեց Միության պատմության առաջին՝ «եգիպտականից» հետո երկրորդ՝ 1921թ. սկիզբ առած «ֆրանսիական» շրջանը: Այդուհետ, սկսվեց ՀԲԸ Միության երրորդ «ամերիկյան» շրջանը, որը շարունակվում է ցայսօր:

Միության կենտրոնի տեղափոխումը Փարիզից չէր նշանակում, որ դրանով դադարեցվում էր Ֆրանսիայում նրա մասնաճյուղերի գործունեությունը, որքան էլ դա դժվար լիներ ընթացող պատերազմի պայմաններում: Գերմանացիների կողմից Փարիզի գրավումից որոշ ժամանակ անց, Միության կենտրոնական գրասենյակը վերսկսեց իր գործունեությունը՝ զբաղվելով տարբեր տեսակի ընթացիկ հարցերով: Նույն այդ օրե-

րին Միությունը բնականաբար հայտնվեց գերմանական իշխանությունների ուշադրության կենտրոնում: Նրանց հետաքրքրում էր Միության «նպատակը, ներկայ և բացակայ Վարիչներուն անունները և հասցեները, անոնց հպատակությունը, զինուորական պարտականություններէ գերծ ըլլալը կամ ոչ, և մանաւանդ թէ Միութեան կեդրոնը միշտ Փարիզ կը գտնուէր և ո՞ր պէտք էր դիմել կարելոր խնդիրներու մասին, ևն.»¹⁰ Նկատի առնելով իշխանությունների նման չթուլացող հետաքրքրությունը, ինչպես նաև նրանց կողմից այն կազմակերպությունների գրասենյակների, ընդհանրապես տարածքների գրավումը, որոնց տերերը բացակայում էին Փարիզից, որոշվեց ստեղծել առժամյա մի մարմին՝ «Փարիզի կեդրոնական ժողով», որը պետք է, մի կողմից, հարաբերվեր իշխանությունների հետ և մյուս կողմից՝ ղեկավարեր ու վերահսկեր Միության տեղական մարմիններն ու հաստատությունները: Նշված ժողովի նախագահը եղավ Պ. Քոլոյյանը, ինչը և առիթ է տվել հետագայում որոշ հրապարակումներում թյուրիմացաբար հիշատակել նրա անունը որպես ՀԲԸ Միության նախագահի 1940- 1942թթ.:

Փարիզի կենտրոնական ժողովը գործեց 1940թ. նոյեմբերից մինչև 1944թ. վերջը և այդ դժվարին տարիներին հաջողությամբ ապահովեց Միության աշխատանքը Ֆրանսիայի տարածքում: Նրա անմիջական մասնակցությամբ ձեւավորված Փարիզի տեղական մասնաճյուղի նոր կազմի ջանքերով՝ Ա.Չիլիկիոյանի, ապա Ա.Սաղըրյանի գլխավորությամբ, վերսկսվեցին հայերենի թաղային դասընթացները, հաջողությամբ կազմակերպվեցին տարբեր բանախոսություններ, այդ թվում Ա. Չոպանյանի հայագիտական դասախոսությունները ուսանողության համար, և թատերական ներկայացումներ, վերակազմվեց և սկսեց գործել Միության Հայ Երիտասարդաց Ընկերակցությունը: Պատերազմական տարիներին Փարիզում Միությունը սկսեց Մելգոնեան մատենաշարի հրատարակումը՝ այդ թվում Արշակ Չոպանյանի «Հայրեններու բուրաստանը», Լեոն Բաշայյանի «Նորավէպներ և պատմութեան», Նիկողայոս Ադոնցի «Histoire d'Armenien» և Ա.Սազըզյանի «Pages d'Art Armenien» աշխատությունները: Ուշագրավ է, որ գրեթե միաժամանակ, բայց արդեն Նյու Յորքում, Միությունը հրատարակեց մեկ այլ կարելոր հայագիտական աշխատություն՝ Սիրարփի Տեր-Ներսեսյանի «Armenia and Byzantine Empire» մենագրությունը: Փարիզի կենտրոնական ժողովը նաև վերսկսեց որոշ ժամանակ ընդհատված Միության անդամավճարների կանոնավոր գանձումը, ինչի շնորհիվ հնարավոր դարձավ նպաստներ տրամադրել կարիքավոր հայ մտավորականներին, չքավոր հիվանդներին և այլն: Հիշատակման արժանի է նաև Միության նախաձեռնությունը՝ հայ անվանի մտա-

վորականների համար ապահովել ազգային դամբարան Փարիզի Բանյո թաղի գերեզմանատան մեջ: Նույնպես արդյունավետ էր Մարսելի մասնաճյուղի գործունեությունը, ուր հատկապես նկատելի էր Հայ երիտասարդաց ընկերակցությունը: Այս մասնաճյուղի գործունեությունը ժամանակավորապես ընդհատվեց 1944թ. մայիսին, երբ քաղաքի ոմբակոծումների ընթացքում հիմնահատակ ավերվեց Բարեգործականի Տան շենքը:

Նուպարեան Մատենադարանի կողոպուտը

Փարիզում մնացած Միության ղեկավարների առջև ծառայած դժվարին և ամենակարևոր խնդիրն էր «...ամէն զինով պահպանել Միութիւնը և իր գոյքերը, գրասենեակն իր կուտակեալ արխիւներով, Մատենադարանը իր բազմաազար գիրքերով և ձեռագիրներով, տակաւին մաս մը ֆրանսական արժեթուղթեր, որ հակառակ պարագային իբր լքեալ գոյք անկասկած պիտի գրաւուէին, մանաւանդ բազմաթիւ արժէքաւոր կալուածները...: Անոնք յաջողած են,- եզրակացնում էր Միության տեղեկագիրը,- իրենց առաջադրած նպատակին մէջ և համերաշխ գործակցութեամբ մը ըրած են ինչ որ մարդկօրէն կարելի էր ընել պատերազմի դժնի պարագաներուն մէջ»:¹¹

Սակայն չնայած իր «խոհական և հեռատես» գործելակերպի, Միությունը մեկ անգամ չէ, որ ենթարկվեց գերմանական օկուպացիոն իշխանությունների կամայականություններին: Դրանց շարքում, անկասկած, առանձնակի կարեւորություն և հնչեղություն ունեցավ Նուպարեան Մատենադարանի հավաքածոների մի մասի բռնագրավումը: Մատենադարանը հիմնադրել էր Պողոս Նուպարը, որն էլ անձնապես հոգացել էր նրա տարածքի, հատուկ կահավորման և մյուս բոլոր հարցերը: Պատերազմի նախօրեին այնտեղ հաշվվում էր տարբեր լեզուներով ավելի քան 20.000 գիրք, հիմնականում հայագիտական բնույթի, ինչպես նաև տարբեր պարբերականների հավաքածոներ, ձեռագրեր և այլ արժեքավոր նյութեր: Նուպարեան Մատենադարանի հիմքում նախ դրվեց Վիլյ/գ/են Հոլասի Կ.Պոլսի մեծարժեք հավաքածոն, որը հետագա տարիներին համալրվեց Նուպար փաշայի, Պողոս Նուպարի, Միքայել Փորթուզալ փաշայի, Օրմանյան և Մանկունի սրբազանների, Ն.Ադոնցի, Վահրամ Թորգոմյանի և այլոց նվիրաբերած հավաքածոներով: Դրա շնորհիվ Նուպարեան Մատենադարանը իրավամբ համարվում էր երրորդը Եվրոպայում՝ Վեներտիկի և Վիեննայի Մխիթարյան միաբանությունների հայագիտական հավաքածոներից հետո:

Գերմանական զինվորականների առաջին երկու այցելությունները Նուպարեան Մատենադարան տեղի ունեցան 1941թ. հունվարին. նրանց հետաքրքրել էին ընդհանուր տեղեկություններ՝ գրքերի քանակը, ինչ լեզվով եւ ինչ ճյուղի էին պատկանում դրանք եւ այլն: Գրադարանապետ Ա.Անտոնյանը իմանալով, որ նրանք մինչ այդ արդեն Բեռլին էին տեղափոխել Փարիզում առգրավված ռուսական, լեհական, հրեական եւ այլ գրադարաններն ու արխիվները, որոշում է թաքցնել Մատենադարանի ամենաարժեքավոր գրքերը, տեղափոխելով նրանց մի մասը Ակուղ եւ Ատոկ Կերեկի հարկաբաժինը: Ուշագրավ է, որ այդ օրերին Մատենադարան են այցելում Բեռլինից եկած հայ երիտասարդներ, որոնցից մի քանիսը հայերենին բոլորովին անտեղյակ՝ հետաքրքրվում էին, մասնատրաբար Հայաստանի պատմությանը եւ աշխարհագրությանը վերաբերող գրքերով: «...Ակներեւ էր,- գրում է Ա.Անտոնյանը,- որ իրենց դիմումը կապ ուներ գերմանացի պաշտօնատարներու կողմէ կատարուած ...այցելութեանց հետ, եւ թէ եկած էին պարզապէս քննութիւն մը կատարելու Մատենադարանին հայերէն գիրքերուն նկատմամբ»:¹²

Փետրվարի 10-ին գերմանական իշխանությունները Պ.Քոլոյյանին հայտնում են, որ Բեռլինից ստացված հրահանգի համաձայն, հաջորդ օրն իսկ պետք է սկսվի Նուպարեան Մատենադարանի փոխադրումը Բեռլին: Վերհիշում է Ա.Անտոնյանը. «Ես տեղեկութիւն չուների այս ազդարարութեան, այնպէս որ յաջորդ օրը յանկարծակիի եկայ, երբ առտու կանուխ, ժամը 7էն առաջ, երբ դեռ մութ էր, Մատենադարանին դուռը զարնուեցաւ կոուսի ռոժգին հարուածներով: Երբ դուռը բացի, չորս գերմանացիներ ներս մտան, մէկը զինուորական համազգեստով եւ միւսները քաղաքային հագուստով: Իրենցմէ մէկը ֆրանսերէն լեզուով ըսաւ ինձի թէ «Այսօր Մատենադարանին բոլոր գիրքերը պիտի գրաւուին Պերլին փոխադրելու համար: Մեր խօսակցութեան միջոցին՝ մօտաւորապէս 25 ֆրանսացի թեռնակիրներ ներս կը փոխադրէին պարսպ սնտուկներ, որոնցմով լեցուեցան նրբանցքներն ու սրահներէն մէկ քանին: Բեռնակիրներէն մաս մը սկսած էր արդէն Ա եւ Բ սրահներու գիրքերը վար առնել եւ լեցնել սնտուկներու մէջ: Այնքան արագութեամբ եւ այնքան վարժութեամբ կ'ընէին այս գործը որ կարծես ամբողջ կեանքերնին անով զբաղած էին: ...Այս գործողութիւնը շարունակուեցաւ մինչեւ փետրվար 13 հինգշաբթի օրը, եւ Մատենադարանին գիրքերը, պարբերականները, եւն. լեցուեցան 168 սնտուկներու մէջ, որոնցմէ հազիւ 50 հատը կրցան գամել այդ օրը: Հսկողը ինձի ծանոյց թէ յաջորդ առտու կանուխ պիտի գան միւս սնտուկները գամելու, եւ թէ փոխադրութիւնը տեղի պիտի ունենայ ցերեկէն վերջ,

որովհետեւ մասնաւոր կառախումբ մը պիտի գայ Փարիզ յատկապէս մեր գիրքերուն համար»:¹³

Գերմանացիները, սակայն, ոչ միայն հաջորդ օրը, այլեւ հետագա մեկ ամսվա ընթացքում այդպէս էլ չեկան: Ա.Անտոնյանը օգտվելով որեւէ հսկողության բացակայությունից, 110 բաց մնացած սնտուկների մեջ եղած գրքերի մեծ մասը փոխարինում է «անպէտ գիրքերով ու թերթերով» եւ նույնիսկ կարողանում է արդեն գամված սնտուկներից հանել բոլոր արժեքավոր ձեռագիր վավերաթղթերը: «Այս թերթերիւնը գոր գերմանացիք տուին Նուպարեան Մատենադարանի գրաման գործին մէջ,- նշում է Ա.Անտոնյանը,- երբեք չի համաձայնիր իրենց սովորական գրաման խիստ մեթոսներուն զորս բրտօրէն կիրարկած էին ռուսական, բոլոնիական, եւն. Մատենադարաններու գրաման միջոցին, նոյն իսկ առաջին օրէն ամէն մարդ դուրս նետելով եւ դուռները կնքելով»:

Ա.Անտոնյանի այս խոսքերը հաստատում է Փարիզում դեռեւս 1870-ականներին հիմնադրած եւ մեծանուն ռուս գրող Ի.Տուրգենևի անունը կրող հայտնի Տուրգենևյան գրադարանի բռնագրավման փաստը: «Ֆաշիստների կողմից Փարիզը գրավելուց անմիջապէս հետո գրադարանում հայտնվեցին ինչ-որ անձեր, որոնք հետաքրքրվում էին նրա կարգավիճակով, ֆոնդերով, վարչության կազմով, նրա անդամների քաղաքական հայացքներով: Հատկապէս եռանդով էր գործում ոմն դոկտոր Հելմուտ Վայսը, որը որոշ չափով տիրապետում էր ռուսերենին եւ կատարում էր մագիստրների գաղափարախոս Ա.Ռոզենբերգի ցուցումները... Վայսը հայտնեց, որ գրադարանի գործունեությունը դադարեցվում է եւ պահանջեց բանակիները: Մի քանի օր անց, հիտլերականները փաթեթավորեցին գրքերը, ինչպէս նաեւ գրադարանում պահվող նկարները, քանդակը, փաստաթղթերի մի մասը եւ ուղարկեցին Գերմանիա»:¹⁴ 1988թ., երբ գրվել էին այս տողերը, բռնագրավված գրքերը եւ այլ իրերը այդպէս էլ չէին հայտնաբերվել:

Գերմանացի զինվորականների անսովոր գործելակերպից Ա.Անտոնյանը անում էր այն հետեւությունը, որ «...Նուպարեան Մատենադարանի գրաման գործը մասնաւոր թելադրութեան մը հետեւանքն էր պարզապէս, եւ ոչ թէ իրենց յղացումը, եւ անոր ձեռնարկած էին աւելի ուրիշներու քան իրենց հաշուին»: «Ուրիշներ» ասելով, Ա.Անտոնյանը նկատի ուներ որոշակի անձի՝ Բեռլինում բնակվող՝ Արտաշես Աբեղյանին: Այս մարդու անունը առաջին անգամ հնչեցվեց գերմանացիների կողմից, երբ՝ ի պատասխան Պ.Քոլոյյանի եւ ՀԲԸ Միության այլ ղեկավարների բողոքների, նրանք որոշեցին Բեռլին փոխադրել Նուպարեան Մատենադարանի ոչ բոլոր գրքերը, իսկ գրքերի ընտրությունը հանձնարարեցին նույն

Ա.Աբեղյանին:

Ա.Աբեղյանը 1922 թվականից ղեկավարում էր Բեռլինում Դաշնակցության տեղական կազմակերպությունը, Գերմանա-հայկական միության փոխնախագահն էր եւ Բեռլինի համալսարանում հայոց լեզվի ամբիոնի հիմնադրման նախաձեռնողներից մեկը: Երկրորդ Համաշխարհային պատերազմի տարիներին նա, ինչպես եւ ՀՀ Դաշնակցության մի շարք հայտնի գործիչներ, համագործակցեց նացիստական Գերմանիայի իշխանությունների հետ:¹⁵ Ա.Աբեղյանը, որը, ի դեպ, ծանոթ էր գրադարանապետ Ա.Անտոնյանին դեռեւս Կ.Պոլսից, մինչ պատերազմը Փարիզ այցի ընթացքում որոշ ժամանակ աշխատել էր Նուպարեան Մատենադարանում եւ նույնիսկ դրվատալից հողված էր տպագրել նրա մասին: Բնական է, որ թե Ա.Անտոնյանն ու Միության ղեկավարները եւ թե Մատենադարանի ճակատագրով բոլոր հետաքրքրվողները հուսով էին, որ Ա.Աբեղյանի օգնությամբ առնվազն նվազագույնի կհասցվի առգրավվող գրքերի քանակը: Սակայն, տեղի ունեցավ հակառակը:

Պ.Քոլոլյանը իր «Նուպարեան Մատենադարանի կողոպուտը» հոդվածում գրում էր. «Ա. Աբեղեան եկաւ Փարիզ 1941 մարտ 14-ին... եկաւ, բայց առաջին տեսակցութեանն իսկ յայտարարեց,- Ես գերմանացի պաշտօնեայ եմ,- հասկցնելով թէ ինք իբրեւ հայ չէր ներկայանար, այլ որպէս գերմանացի զինուորական: Իր այդ խօսքովն ու համագետտովը սարսափի մէջ պահեց մեզ: ...Երկու ժամ խօսեցայ իր հետ. ըսի թէ Փարիզ եւ շրջակաները 25.000 հայեր կային, մեծ թիւ կը կազմեն մտաւորականները որ կ'այցելեն Մատենադարան կարդալու, աշխատելու, գրելու համար ...Մինչդեռ Պերլինի մէջ հայ մտաւորականութիւն չկայ. ինչո՞ւ համար կ'ուզէր այդ գիրքերը: - Ես գերմանացի պաշտօնեայ մըն եմ, մեծերուն հրամանը կը գործադրեմ, պատասխանեց: Այս հայը հոգիով ալ գերմանացի էր»:¹⁶

Մինչդեռ Ա.Աբեղյանի այս վերջին պատասխանը հակասում էր հենց գերմանացի զինվորականների կեցվածքին, երբ նրանց ներկայությամբ Ա.Աբեղյանի եւ գրադարանապետի ու Ա.Չոպանյանի միջեւ բռնուց վեճեր էին ընթանում գրքերի ընտրության շուրջ: Թե Ա.Անտոնյանը եւ թե Պ.Քոլոլյանը հատուկ նշում էին, որ գերմանացի զինվորականները երբեք էլ չմիջամտեցին եւ որեւէ ձեռով չպաշտպանեցին իրենց գործընկերոջը. «Ամէն բան կախումս էր Պերլինէն յատկապէս հրահանգով հրաւիրուած եւ լիազորուած պ.Աբեղեանէն», - եզրակացնում էր Պ.Քոլոլյանը:¹⁷

Ա.Անտոնյանի խոսքերով, գրքերի ընտրության հարցում իրենք Ա.Աբեղյանի հետ համաձայնության էին եկել, որ նա «...գուտ հայագիտական, առաւելապէս բանասիրական գործերէ զատ ուրիշ ոեւէ գիրք

չպիտի առնէր... չպիտի առնէր նաեւ այն գիրքերը զորս կարելի էր հրապարակի վրայ գտնել ու գնել... չպիտի առնէր Թուրքիոյ մէջ հրատարակուած հայերէն օրաթերթերու եւ պարբերականներու, ինչպէս «Արեւելք», «Մասիս», «Հայրենիք», «Բիւզանդիոն», «Արեւելեան Մամուլ», «Ծաղիկ», եւն. հաւաքածոները, որոնց համար Փարիզի Հայ Գրողներու Միութիւնը եւ Նահատակ Գրագէտներու Մատենաշարի հրատարակիչները, պ. Չոպանեանի թելադրութեամբ դիմում ըրած էին, յայտնելով թէ այդ թերթերուն տարուիլը բացարձակապէս անկարելի կը դարձնէր իրենց գործունեութիւնը: Պ.Աբեղեան այս պայմաններուն ոչ մէկը յարգեց»: Այնուհետեւ, թվարկելով առգրավված ամենակարեւոր գրքերն ու մեծարժեք ձեռագրերը, Ա.Անտոնյանը ամփոփում է. «...Նուպարեան Մատենադարանէն Պերլին տարուեցան 18 սնտուկ գիրք ու պարբերականներ... այդ սնտուկներուն մէջ կը գտնուէին 1.343 հատոր գիրքեր, որոնց 917 հատորը հայերէն եւ 423 հատորը եվրոպական լեզուներով: Նաեւ 481 հատոր կամ ծրար պարբերականներ եւ 33 հայերէն հին ձեռագրեր»:¹⁸

Պատերազմի ավարտից անմիջապէս հետո Միությունը ձեռնարկեց բոլոր հնարավոր միջոցները Նուպարեան Մատենադարանից բռնագրավված գրքերը վերադարձնելու նպատակով: Արդեն 1947թ. Ա.Անտոնյանի՝ Ֆրանսիայի պետական տարբեր մարմիններին հղած բազմաթիվ դիմումների արդյունքում գտնվեցին եւ իրենց տերերին հանձնվեցին 444 հատոր գիրք, հաջորդ տարի՝ եւս 209 հատոր: 1947թ. օգոստոսին Հայաստանի Արտաքին գործերի նախարարությունում կազմած մի տեղեկանքից պարզվում է, որ նույն տարվա հունվարին ՀԲԸ Միությունը Նուպարեան Մատենադարանի հարցով դիմել էր նաեւ Հայաստանի կառավարությանը, խնդրելով օժանդակել գրքերը որոնելու եւ վերադարձնելու գործում: Հայաստանի Արտաքին գործերի նախարարությունը 1947թ. ապրիլի 10-ին հատուկ գրություն է ուղարկում Խորհրդային Միության Արտաքին գործերի նախարարության Մերձավոր Արեւելքի բաժնի վարիչ Սամիլովսկուն՝ խնդրելով Բեռլինում խորհրդային վարչական իշխանությունների միջոցով պարզել Նուպարեան Մատենադարանի գրքերի գտնվելու վայրը՝ հետագայում դրանք Հայաստանի Արտգործնախարարության հասցեով ուղարկելու համար: Բայց, ինչպես գրված է այդ փաստաթղթում, «Մինչ օրս մենք չենք ստացել պատասխան մեր նամակին»:¹⁹

Ա.Գարակյոզյանը Միության նախագահ

Ինչպես նշվել է, Փարիզում 1940թ. մայիսի 20-ին կայացած պատմական նիստում Միության Կենտրոնական Վարչությունը, ելնելով պատերազմի պատճառով ստեղծված իրավիճակից, իր բոլոր իրավասությունները կամովին փոխանցեց Միության Ամերիկայի Կենտրոնական Հանձնաժողովին: Վերջինս, գիտակցելով իր պատասխանատվությունը կազմակերպության ապագայի համար, նախ եւ առաջ շարունակեց փոխանցման, հատկապես տարբեր դրամատներում Միության միջոցների հետ կապված բազմաթիվ իրավական, գույքային եւ այլ հարցերի կարգավորման գործը: Սակայն այն հանգամանքը, որ նա գործում էր լուրջ փոխանորդագրի հիման վրա եւ որ Միության վարչական կենտրոնատեղին շարունակում էր մնալ գերմանացիների գրաված Փարիզը, լուրջ բարդություններ էր առաջացնում նրա լիարժեք գործունեության համար: Ակնհայտ էր նաեւ, որ պատերազմը լինելու է երկարատեւ, ինչը նույնպես թելադրում էր համապատասխան կազմակերպական որոշումների կայացում: Եվ ահա, 1942թ. հոկտեմբերի 17-18-ին առաջին անգամ Նյու Յորքում «Պենսիլվանիա» հյուրանոցում հրավիրվեց ՀԲԸ Միության հերթական 30-րդ Ընդհանուր պատգամավորական ժողովը: Հրավիրագրում հստակ նշվում էր ժողովի գումարման հիմնական պատճառը. «Բրիտանական կառավարությունը Լոնտոնի մեր թրքաթներու եւ դրամագլուխներու հատկությունն կէտը վար կը դնէ իբրեւ տուրք: Պատճառն այն է որ Միութիւնս, թէեւ Զուիցերիական կազմակերպութիւն, իր գործերը կը վարէր Բարիզէն, որ հիմա թշնամիէն գրաւուած է. ուստի Միութեանս Լոնտոնի արժեթուղթերուն եկամուտը կը նկատուի թշնամիի սեփականութիւն: Այդ օրէնքին համեմատ, միայն 1941-ին վճարուած տուրքի գումարը կը հասնի 43.500 տոլարի: Լոնտոնի մեր փաստաբանները խորհուրդ կուտան որ Միութեանս Բարիզի կեդրոնին նախորդ վարիչներուն պաշտօնէ դադարումը վճռուի Ընդհ. Ժողովին կողմէ: Այն ատեն կարելի պիտի ըլլայ Միութիւնը զերծ կացուցանել տուրքի վճարումէն եւ վճարուած գումարներն ալ ետ ստանալ»:

Ընդհանուր ժողովը ընտրեց Կենտրոնական Վարչության նոր կազմ, նախկին կազմից նրա անդամներ դարձան ԱՄՆ տեղափոխված Տիգրան խան Քելեկյանը՝ որպէս փոխնախագահ եւ Լեւոն Կերտանը (Կյումուշկերտան): Զարեհ Նուպարը նույնպէս ընտրվեց Վարչության անդամ, սակայն, հրաժարվեց, պատճառաբանելով, թե ինքը ժամանակավոր կերպով է գտնվում ԱՄՆ-ում: Եվ ամենակարեւորը՝ ՀԲԸ Միության նախագահ ընտրվեց Միության ամենանշանավոր եւ հայտնի գործիչներ՝

Գարակյոզյան եղբայրներից ավագը՝ Արշակ Գարակյոզյանը, որը տարիներ շարունակ գլխավորում էր Միության Ամերիկայի Կենտրոնական Հանձնաժողովը:

Արշակ եւ Միհրան Գարակյոզյանները ծնվել էին Կ.Պոլսում, մեծահարուստ եւ հայտնի բարերար Կարապետ աղայի ընտանիքում: 1890-ական թթ. կեսերին նրանք մեկնում են Անգլիա՝ Մանչեսթր, ուր, շարունակելով ընտանեկան ավանդույթները, զբաղվում են կտորեղենի առևտրով: Որոշ ժամանակ անց, գործնական կապեր հաստատելով տեղի արտադրողների հետ, Արշակ Գարակյոզյանը վերադառնում է Կ.Պոլիս, իսկ Միհրանը մեկնում է Նյու Յորք՝ գորգերի առևտրով զբաղվելու նպատակով: Այստեղ նա բացում է արեւելյան եւ այլ գորգերի մեծ խանութ, ապա՝ 1896թ. հիմնում է գորգի ամենամեծ գործարանը (A & M Karagheusian, Inc.) Նյու Ջերսիում:²⁰ Առաջին Աշխարհամարտի տարիներին գործարանը ամերիկյան բանակի համար արտադրում է տարբեր տեսակի համազգեստ եւ նույնիսկ որոշ սարքավորումներ: Հետագայում Միհրանը՝ իրեն մինչ այդ միացած Արշակի հետ, արագ ընդլայնում է գործունեության ասպարեզը եւ ստանում համաշխարհային ճանաչում: Տարբեր երկրներում գործարաններ հիմնելու հետ մեկտեղ (այդ թվում նաեւ Չինաստանում), Գարակյոզյան եղբայրները սեփական խանութներ են բացում Եվրոպայի, Ասիայի եւ Աֆրիկայի մի շարք երկրների խոշոր քաղաքներում: Նրանց գործարանում պատրաստած գորգերը զարդարում էին հանրաճանաչ Radio City Music Hall-ը Նյու Յորքում եւ ԱՄՆ-ի Գերագույն Դատարանի շենքը Վաշինգտոնում:

Հայության համար, սակայն, առավել կարեւոր էր եղբայրների ազգային եւ բարեգործական գործունեությունը: Արդեն նշվեց (3-րդ գլխում), որ 1922թ. Գարակյոզյան եղբայրները ստանձնեցին Նահր Էլ Օմարի 150 որբերի հոգսը: Եվ եթե Միհրան Գարակյոզյանի ազգային գործունեության գագաթնակետը եղավ «Հաւորդ Գարակէօզեան Հիմնադրամ»-ի հիմնումը 1921թ.՝ ի հիշատակ իր վաղամեռիկ որդու, ինչի շնորհիվ էլ բազմաթիվ դարմանատներ ու հիվանդանոցներ կառուցվեցին տարբեր երկրներում (մեր օրերում նաեւ Հայաստանում), ապա Արշակ Գարակյոզյանի համար, որպէս այդպիսին եղավ ՀԲԸ Միության նախագահի պաշտոնի ստանձնումը 1942թ. Միության Ընդհանուր ժողովում:

Ժողովն առաջին իսկ օրը ընդունեց հատուկ մի բանաձեւ, որում հաստատվում էին 1940թ. մայիսի 20-ին Փարիզում կայացած նախորդ ժողովի վերոհիշյալ որոշումները, ինչպէս նաեւ նորընտիր Կենտրոնական Վարչական Ժողովի, որի նստավայրն էր Նյու Յորքը, բացարձակ եւ լիակատար իրավասությունները: Այդ որոշումը անմիջապէս ուղարկվեց Լոնդոնի եւ Նյու Յորքի համապատասխան դրամատներին եւ բրիտանա-

կան կառավարությանը: Դրա շնորհիվ, «Կեդր. Ժողովը ... յաջողեցաւ դրամագլուխները գերծ կացուցանել տալ 50 առ հարիւր եկամտոյ պատերազմի տուրքէն, հաստատելով թէ Միութիւնը չէզոք զուիցեցիրական ընկերութիւն մըն է, զուտ բարեպարական մարմին մը, որուն կեդրոնատեղին 1940էն ի վեր կը գտնուի Միացեալ Նահանգներուն մէջ: Բրիտ. Կառավարութիւնը տրուած բացատրութիւնները արդարացի գտնելով ո՛չ միայն յետ այնու այդ տուրքէն գերծ հուշակեց մեր դրամագլուխներուն եկամտոները, այլ եւ վերադարձուց այն տուրքերը որ գանձուած էին Ֆրանսայի գրաւումէն ի վեր, ինչ որ կը ներկայացներ 80.000 տոլարի նշանակելի գումար մը»:²¹

Նյու Յորք թե Փարիզ

Թե՛ն այս որոշման մեջ, որպէս Միության վարչական կենտրոնատեղի, հայտարարված էր Նյու Յորքը, այնուամենայնիվ, հարցի վերջնական լուծումը, կարծես, հետաձգվում էր մինչեւ Համաշխարհային պատերազմի ավարտը: Դրա մասին է վկայում, մասնավորապէս, այն, որ ՀԲԸ Միության տեղեկագրում 1942թ. նորընտիր կենտրոնական վարչական ժողովը ներկայացված էր որպէս «... առժամեայ ... երեք տարուան համար ...»: (Մնում է միայն զարմանալ պատերազմի ավարտի վերաբերյալ նման ճշգրիտ զուգահեյություն համար:) Ընդհանուր ժողովի այսպիսի զգուշավոր դիրքորոշումը կարելի է բացատրել հարցի մեծ կարեւորությամբ, ընթացող պատերազմի պայմաններում նրա վերջնական լուծման անպատակահարմարությամբ: Բայց ոչ միայն դրանով:

Արդե՛ն հայտնի էր, որ Միության փարիզյան ղեկավարությունը համաձայն չէր, որպէսզի պատերազմից հետո նույնպէս կազմակերպության կենտրոնը տեղակայվեր Նյու Յորքում: Նման տրամադրությունները առավել հստակ դրսեւորվեցին պատերազմից հետո, հատկապէս, երբ 1945թ. վերջին նախատեսվում էր Ընդհանուր ժողովը գումարել Նյու Յորքում: Վ.Մալեզյանի նույն տարվա հունիսին Փարիզում գրած եւ Միության կենտրոնական վարչությանը հասցեագրած հուշագրերից մեկը ամբողջովին նվիրված էր այդ հարցին:

«Ամենակարեւոր հարցը որ այս պահուս Միութեան շրջանակներուն մէջ գրաւած է խոր ուշադրութիւն,- գրում էր Վ.Մալեզյանը,- այն է թէ Միութեան վարչական կեդրոնատեղին պէ՞տք է ընդմիշտ թողուլ Նիւ Եորք: Թէ ոչ ըստ առաջնոյն Բարիզ փոխադրել, կամ Գահիրէ՝ ինչպէս ոմանք կը խորհին: Այս առթիւ պէտք կը տեսնեմ յուշագրել մեր յաւէտ ող-

բացեալ Հիմնադիր-Նախագահ Պողոս Նուպարի մէկ ցաւագին յանկերգը, զոր զանազան պատեհութիւններով, մանաւանդ ամէն անգամ որ Միութեան ամերիկեան «ինքօրքօրէշըն»-ի խօսքը կ'ըլլար, կը կրկնէր իր մտերիմներուն, թէ «շատ կը վախճամ որ օրին մէկը մեր Ամերիկայի բարեկամները հոն ուզեն փոխադրել Միութիւնը»: Ինք եւ իրեն այէ խորհող հիմնադիրները եւ ղեկավարներ համամիտ չէին այդ բանին, շատ մը նկատումներով, որոնց գլխաւորներն էին Ամերիկայի տարապայման հեռակայութիւնը եւ ամերիկահայութեան լայնախոհ մտայնութիւնը, որ գուցէ դժուար կը հաշտուի ՀԲԸ Միութիւնը հիմնադրող պահպանողական սկզբունքներուն, սակաւապետական դրութեան եւ նուիրագործեալ աւանդութեանց հետ»: Թվարկելով ուրիշ այլ փաստարկներ հօգուտ Փարիզի՝ որպէս կենտրոնատեղիի (ԱՄՆ-ի հեռավորությունը Հայաստանից, Մերձավոր Արեւելքից եւ Եվրոպայից, Միության քառասուն տարվա արխիվների, ներառյալ ֆինանսական փաստաթղթերի, գտնվելը Փարիզում, այնտեղ փորձառու պաշտոնեության առկայությունը եւ այլն), Վ.Մալեզյանը բերում է եւ այսպիսի մեկը. «Այսօր մեծ բարեբախտութիւն մըն է որ Նիւ Եորքի մէջ Միութիւնը ունի թանկագին առաջնորդներ յանձին Գարակեօզեաններու, Կիւլպէնկեաններու (Հարություն Կյուլպէնկյան՝ Միության Ամերիկայի մասնաժողովի ղեկավարներից մեկը - Էդ.Մ.), Քիրքեճեաններու, եւն., բայց անոնք տարիքոտ վերերաններ են եւ վաղը այդ շրջավայրին մէջ շատ դժուար պիտի ըլլայ անոնց արժանաւոր յաջորդներ գտնել, որ գիտնան նոյն նուիրումը ցոյց տալ եւ նոյն պ հաւատարմութիւնը ՀԲԸ Միութեան ոգիին, նկարագրին, կանոններուն եւ աւանդութեանց հանդէպ»:²² Գրելով այս, Վ.Մալեզյանը, կարծես, մի կողմից հրաժարվում էր Միության ԱՄՆ-ի մասնաճյուղերի հասցեին իր իսկ կողմից բազմիցս եւ հրապարակավ արված գովասանական խոսքերից, եւ մյուս կողմից՝ անտեսում էր իր եւ Փարիզի գործընկերների՝ նույնպէս «տարիքոտ վերերանների» շարքին պատկանելու հանգամանքը:

Երբ երեք տարի անց՝ 1945թ. դեկտեմբերին Նյու Յորքում կայացած հերթական Ընդհանուր ժողովում նախկին կենտրոնական վարչության վեց անդամների առաջարկով քննարկման դրվեց Միության կենտրոնատեղին Փարիզ փոխադրելու հարցը, Վ.Մալեզյանը արդե՛ն ԱՄՆ-ում էր, ուր նա գլխավորեց Միության կենտրոնական գրասենյակը: Թե որքանով այդ հանգամանքը կանխորոշեց նրա տեսակետի փոփոխումը՝ մնում է միայն կռահել: Ակնհայտ էր, սակայն, որ նրա ելույթը առավել իրատեսական էր եւ զուրկ իր իսկ հուշագրին բնորոշ հուզականությունից: «Մեր պատուական նախագահին եւ Կեդր. վարչական ժողովի յարգելի անդամներուն հետ խորհրդակցելով, այն եզրակացութեան յանգեցանք,-

ասում էր Վ. Մալեգյանը իր ելույթում,–որ ներկայ աննպաստ հանգամանքներում մեջ գործնական չէ արմատական փոփոխության ենթարկել այն վարչական իրաւակարգը զոր բացառապէս հաստատեց 1942-ին Նիւ Եորք գումարում ընդհ. ժողովը: Արդարեւ նկատելի է որ համաշխարհային կացութիւնը այնքան պղտոր եւ կնճապից է որ կարելի չէ յստակօրէն տեսնել ներկան եւ հանգամանօրէն նախատեսել ապագան: Քանզի, թէեւ պատերազմը վերջ գտած է Միացեալ Ազգերու փայլուն յաղթանակովը, բայց խաղաղութիւնը դեռ շատ հեռու է վերահաստատուելէ եւ պատերազմին ստեղծած դժուարութիւնները վերջ գտած չեն բնաւ, ընդհակառակը, աշխարհի ելեւմտական գործառնութիւնները եւ արտաքին հաղորդակցութիւնները կանոնաւորում չեն, ու մասնաւորաբար Եվրոպան եւ Մերձար Արեւելքը չեն վերագտած իրենց կարգն ու կանոնը»:²³

Իր ելույթում Վ.Մալեգյանը այլեւս չանդրադարձավ նաեւ «արժանաւոր յաջորդների» հարցին: Պետք է ենթադրել, այն պատճառով, որ այդ երկու ամիսների ընթացքում նա համոզվել էր, որ նման մարդիկ արդեն իսկ ընդգրկված էին Միության ղեկավարության կազմում: Նրանցից էր 44-ամյա Ալեք Մանուկյանը, որը սկսած 1943թ. Կենտրոնական Վարչության անդամ էր եւ որն էլ 8 տարի անց ստանձնելու էր Միության նախագահի պաշտոնը:

Վարչական կենտրոնի տեղակայման մասին որոշումը տրամաբանական ավարտն էր այն գործընթացի, որ սկսվեց 1940թ. Փարիզի Ընդհանուր ժողովում: Երկրորդ համաշխարհային պատերազմի ավարտը ՀԲԸ Միության համար դարձավ նրա պատմության մեջ «ամերիկյան շրջանի» սկիզբը: Արդյոք դա տեղի կունենա՞ր անկախ պատերազմից, եւ եթէ այո, ապա որքա՞ն ավելի ուշ՝ այս եւ նման այլ հարցերին կարելի է տարբեր կերպ պատասխանել: Ամեն դեպքում, ՀԲԸ Միության կենտրոնատեղին այդուհետ դարձավ ԱՄՆ-ը՝ աշխարհի առաջատար եւ ամենազարգացած պետությունը, որը շատ շուտով դառնալու էր ողջ հայ սփյուռքի կենտրոնը:

Վ.Մալեգյանի վերոհիշյալ նոր կեցվածքը, ըստ ամենայնի, պայմանավորված էր հետեւյալ հանգամանքով: Բանն այն է, որ նույն 1945թ. Միության Ամերիկայի շրջանակը «...իբրեւ առանձին ընկերակցութիւն կազմակերպուեցաւ Ամերիկեան օրէնքով (The Armenian General Benevolent Union of America, Inc.- Էդ.Մ.), այդ կերպով տուրքէ զերծ մնաց, եւ իր բարեսիրական նպատակներուն համար դրամ տուողները իրենց եկամուտի տուրքէն կարելոր մասով մը իրենց տուածը իրաւունք ունէին զեղչելու»:²⁴ Իրավական այս նոր կարգավիճակը, բնականաբար, էլ

ավելի խթանեց նվիրատւություններ անելու ամերիկահայերի պատրաստակամությունը, որոնք մինչ այդ էլ ապահովում էին Միության ֆինանսական միջոցների առյուծի բաժինը: Հարկ է նշել, սակայն, որ ՀԲԸ Միության Կենտրոնական Վարչությունը, որպէս դեռեւս 1924թ. Ծվեյցարիայում գրանցված, այսինքն՝ արտասահմանյան կազմակերպություն, չէր կարող նման դյուրություն ընծայել իր նվիրատուներին: Ավելի՛ն՝ 1954թ. ԱՄՆ-ի կառավարությունը ընդունեց որոշում, համաձայն որի ամերիկյան ընկերություններին, տվյալ դեպքում՝ Միության Ամերիկայի մասնաժողովին, արգելվում էր դրամ փոխանցել արտասահմանյան կազմակերպություններին, այն է՝ թէ Միության Կենտրոնական Վարչությանը եւ թէ մյուս մասնաճյուղերին, միաժամանակ տուրքից զուրկ պահելով իրենց նվիրաբերած գումարները: ԱՄՆ-ի կառավարության որոշումը հարցականի տակ էր դնում ՀԲԸ Միության գործունեությունը ընդհանրապէս: Ստեղծված կացության մեջ Միության հերթական Ընդհանուր ժողովը կայացրեց կարելոր որոշում, ըստ որի կազմակերպությունը, որպէս իրավաբանական անձ, պետք է վերագրանցվեր ԱՄՆ-ում: Որոշումը իրագործվեց 1955թ. մարտի 29-ին. ԱՄՆ-ի Դելավեր նահանգում: Հարկ է ընդգծել, որ ստանալով «ամերիկյան քաղաքացիություն», ՀԲԸ Միությունը որեւէ փոփոխության չենթարկեց թէ իր անվանումն ու կազմակերպական կառուցվածքը եւ թէ հիմնական նպատակները: Դրա հետ մեկտեղ, «...միանգամայն սահմանափակ ձեւով կը պահուէր նաեւ Զուիցերական Ընկերակցութիւնը՝ գլխավորաբար Միութեան արտասահմանի (ոչ ամերիկյան-Էդ.Մ.) կալուածներուն կապակցութեամբ եւ ապագայ զանազան հաւանականութեանց ի նախատեսութիւն...»:²⁵

Բայց ահա, անցնում է հինգ տարի եւ Եվրոպայի Կենտրոնական Հանձնաժողովի ղեկավարությունը, համարելով այդ որոշումները անօրինական, հրաժարվում է ճանաչել Միության Կենտրոնական Վարչության իրավասությունները, ինքն իրեն հռչակում որպէս ՀԲԸ Միության ժամանակավոր վերին մարմին, ձգտելով կենտրոնատեղին տեղափոխել Փարիզ: Ավելի՛ն. «...իրենց այս ծրագիրը իրականացնելու երազով, միմիայն ինքզինքնին ցոյց կուտան իբրեւ Բարեգործականի հաստատրիմ անդամներ: Ամերիկայի մեր բոլոր կազմակերպութիւնները եւ արտասահմանի մեր միւս բոլոր շրջանակները որոնք կարելոր պատճառներով տեղական իրաւական անձնաւորութիւն եւ մասնաւոր կանոնագիր ունին, ՀԲԸ Միութեան ընտանիքէն դուրս կը ձգեն եւ զանոնք իբրեւ օտար ընկերութիւններ կը նկատեն: Այս կերպով կ'ուզեն քուէի իրաւունքէ զրկել Միութեան գրեթէ ամբողջ զանգուածը, նոյն իրաւունքը վերապահել միայն Ֆրանսայի

մէջ մասի վրայ համրուող իրենց հետետորդներուն եւ այդ խաղով ալ իրենց մատակարարութեան տակ ունենալ Միութեան հարստութիւնը»:²⁶

Միութեան մասնաճյուղերի եւ անդամների բացարձակ մեծամասնութիւնը դատապարտեց Եվրոպայի Հանձնաժողովի ղեկավարներից ոմանց անանորինակ գործողությունները, որոնք, սակայն, դիմեցին էլ ավելի անանախաղեայ քայլի՝ դատ բացելով Լոզանում ՀԲԸ Միութեան Կենտրոնական Վարչության դեմ: Սպասվածի պես, դատարանը, ի վերջո, անհիմն համարեց «փարիզյան խմբակի» բոլոր հավակնությունները: Այդպիսով, վերջ դրվեց, Ալ.Մանուկյանի խոսքերով՝ «ամօթալի» դրվագին Միութեան պատմության մէջ, որը կարող էր հանգեցնել նրա պատակտմանը:

Հետագայում՝ 1981թ. Ընդհանուր ժողովի որոշմամբ Միութեան ԱՄՆ-ի շրջանակի ընկերակցությունը (Armenian General Benevolent Union of America, Inc.) ձուլվեց մայր ընկերակցության՝ ՀԲԸ Միութեան մէջ: ԱՄՆ-ի Միութեան ընկերակցության գոյության de jure դադարեցման հետ մեկտեղ, հետագա մի քանի տարիներին՝ մինչեւ 1980-ականների վերջերը, պահպանվում էր նրա ողջ կազմակերպական կառույցը, շարունակում էին հրավիրվել ԱՄՆ-ի Կենտրոնական Հանձնաժողովի տարեկան ժողովները:

Օգնություն պատերազմի աղետյալներին: ՀԲԸՄ-ը եւ Հայկական Հանձնախումբը

Արդեն ասվեց, որ հայերի համար Երկրորդ Աշխարհամարտը ուներ այն յուրահատկությունը, որ բուն Հայաստանի տարածքում պատերազմական գործողություններ տեղի չունեցան եւ երկիրը չենթարկվեց անխուսափելի ավերածությունների: Մեկ այլ առանձնահատկությունն էլ այն էր, որ պատմական ճակատագրի բերումով միայն աննշան թվով հայեր էին ապրում անցիստական Գերմանիայում եւ նրա դաշնակից երկրներում՝ Իտալիայում եւ առավել եւս Ճապոնիայում եւ հակառակը՝ սփյուռքահայության բացարձակ մեծամասնությունը ապրում էր կամ ֆաշիզմի դեմ պատերազմող Խորհրդային Միությունում, Անգլիայում, ԱՄՆ-ում եւ այլն, կամ էլ չեզոքություն պահպանող երկրներում: Ինչպէս Ֆրանսիայում, այնպէս էլ անցիստների գրաված եվրոպական որոշ երկրներում (Բուլղարիա, Ռումինիա, Հունաստան եւ այլն) տեղի հայ բնակչությունը անխուսափելիորեն կրում էր բազմապիսի զրկանքներ ու դժվարություններ: Դեռեւս շարունակում էր ծանր մնալ հայերի վիճակը նաեւ

Արեւելքի երկրներում, հատկապէս Սիրիայում եւ Լիբանանում: Ըստ էության, հայկական սփյուռքի համակարգում միայն ԱՄՆ-ի եւ որոշ չափով Կանադայի հայությունն էր, որ մի կողմից, ուղղակիորեն ներքաշված չէր պատերազմի մէջ եւ, մյուս կողմից, տնտեսապէս ի վիճակի էր օգնության հասնել Արեւելքի եւ Եվրոպայի երկրներում հաստատված իր ազգակիցներին: Եվ բնական է, որ պատերազմի սկսվելուց քիչ անց, ողջ ամերիկահայությունը, բոլոր կազմակերպությունները՝ եկեղեցին, կուսակցությունները, հայրենակցական, բարեսիրական եւ այլ միությունները, յուրաքանչյուրը իր հնարավորությունների սահմաններում լայն գործունեություն ծավալեցին այդ նպատակով: Բայց քանի որ նրանցից եւ ոչ մեկի ֆինանսական միջոցները բավական չէին անհրաժեշտ չափերով օգնություն ցույց տալու համար, նրանք դիմեցին ողջ ամերիկահայությանը՝ կազմակերպելով տարբեր տեսակի հանգանակություններ:

Նույն խնդիրն էր ծառայել նաեւ ՀԲԸ Միութեան առջեւ: Անցած տարիներին ամերիկյան շրջանակները Միութեան ծրագրերի՝ սփյուռքում եւ Խորհրդային Հայաստանում, հիմնական ֆինանսավորողներն էին: Այժմ ամերիկահայերի դերակատարությունը ստանում էր առաջնակարգ կարեւորություն, թեւէ իրենք նույնպէս, որպէս պատերազմող երկրի քաղաքացիներ, պարտադրված էին դիմել որոշակի զոհողությունների եւ սահմանափակումների: Պատահական չէ, որ Միութեան ամերիկահայ հայտնի գործիչ Աշոտ Թիրյաքյանը իր «Օրումն մեծ պարտականությունը» հոդվածում գրում էր.

«Ինչպէս գիտենք՝ այս պատերազմը տասնապատիկ աւելի արգահատելի ըրած է մեր հայ բեկորներուն արդէն թշուառ վիճակը տարբեր վայրերու մէջ: Երէկի քիչ թէ շատ ինքնբաւ ֆրանսահայութիւնը՝ մէկ օրէն միւսը՝ թշուառութեան մատնուած՝ օրումն հացին կարօտ վիճակի մէջ է: Ա՛յ կրնանք երեսակայել Սուրիոյ, Յունաստանի հայութեան կացութիւնը: Ասոնց ամէնուն ալ հասնիլ պէտք է եթէ ոչ տասնով՝ գոնէ մէկով երկուքով:

«Այո՛ դրամի՛ խնդիր է սկիզբէն մինչեւ վերջը: Զանձրացա՞ք տալէ: Բայց չէ՞ք կարծեր թէ անոնք ապրել է իսկ ձանձրացած են՝ շարունակ նպաստով օրական չոր հացի կտորի մը սպասելով: Երէկ տուինք, այսօր նորէն պիտի տանք, վաղն ալ, եւ այսպէս շարունակաբար, քանի անոնք շունչ եւ այդ հացի կտորին պէտք ունին:

«Ես տարակոյս չունիմ թէ՛ մենք որ այս երկրին օրհնութիւնները կը վայելենք՝ մեզվէ սպասուած փետտորի թեթեւութեամբ օգնութիւնը պիտի հասցնենք: Մեզի պակասածը կազմակերպական մեքենականութիւնն է, որպէսզի՝ ո՛չ թէ պատահական դրամահաւաքութեան ելնենք, հապա առնուազն հարիւր հազար ամերիկահայութիւն մը շաբաթէ շաբաթ օրա-

կան 5 հատիկ սենթի հաշուով իր տեսական մասնակցությունը ապահովել թշուառության մեջ ինկած մեր հարազատներուն օգնելու համար»:²⁷

Արդեն 1940թ. Միությունը ձեռնարկեց Պատերազմի Հայ Աղետալներու Օգնության հանգանակությունը, որը շարունակվեց եւ հաջորդ տարվա ընթացքում: Ըստ արժանվույն գնահատելով Միության մասն գործունեությունը՝ 1941թ. աշնանը ԱՄՆ-ի կառավարության որոշմամբ ՀԲԸ Միությունը ազատվեց «...բարեսիրական օտար կազմակերպություններու դեմ դրուած սեղմումներէն...»²⁸ եւ հնարավորություն ստացավ էլ ավելի ընդլայնել իր աշխատանքները այդ երկրում: Հետգիտելու լայն չափեր ընդունող այս հանգանակությունն ընդհատվեց 1941թ. վերջին, երբ Միության Ամերիկայի կենտրոնական Հանձնաժողովը, ընդառաջելով Ամերիկայի Հայ Առաքելական եկեղեցու առաջնորդ Գարեգին արք. Հովսեփյանի կոչին եւ ցանկանալով աջակցել ամերիկահայության միասնական ջանքերին, համաձայնվեց մեկ շրջան (1941թ. նոյեմբեր - 1942թ. հունիս) մասնակցել ավելի ընդհանուր Համագոյային հանգանակությանը, որը ղեկավարելու էր առաջնորդարանի կողմից ստեղծված Հայկական Հանձնախումբը (Armenian War Relief): Ըստ պայմանավորվածության, այդ հանգանակության ընթացքում գոյացած գումարի կեսը պետք է հատկացվեր «...Խորհրդային Միության բանակի կարիքներուն՝ իբր հայ ժողովուրդին համակրանքին արտայայտութիւն, իսկ միւս կէսը պիտի գործածուէր Հայաստանի եւ սփիւռքի պատերազմի աղետալներուն, ՀԲԸ Միության միջոցաւ»:²⁹

1942թ. դեկտեմբերի 3-ին Միության Ամերիկայի կենտրոնական Հանձնաժողովը իր տեղական մասնաճյուղերին հղեց մի շրջաբերական՝ նվիրված Հայկական Հանձնախմբի հետ իր ապագա համագործակցությանը, ուր, մասնավորապէս, ասվում էր. «Ներկայ տարուան ամառնային շրջանէն ետքը, Հայկական Յանձնախմբի Նախագահ Առաջնորդ Հօր տեղեկացուցինք գործակցութեան պայմանաժամին լրանալը, եւ շարունակելու մասին յայտնուած փափագին վրայ ալ՝ ներկայացուցինք մեր նոր պայմանները: Սակայն, երբ տեղեկացանք թէ Հայկական Յանձնախումբը որոշած է իբրեւ Նպաստահաւաք Մարմին արտօնագիր ստանալ, եւ՝ ցորչափ պատերազմը տեւէ՝ շարունակել իբրեւ ուրոյն կազմակերպութիւն, Կեդրոնով եւ Մասնաճիւղներով, Նախագահ Սրբազան Հօր ներկայացուցինք նոյեմբեր 27-ի մեր վերջին Բացառիկ Նիստին հետեւեալ որոշումը:

«Նկատելով որ ՀԲԸ Միութիւնը տարիէ մը ի վեր դադրեցուցած էր ի նպաստ Պատերազմէ Աղետելոց իր ժողովրդական Հանգանակութիւնը, չի խաչաձեւելու համար Հայկական Յանձնախումբին սկսելիք Հանգանակութիւնը:

«Նկատելով որ Առաջնորդ Սրբազան Հօր եւ Կեդրոնական Յանձնաժողովիս միջեւ եղած այդ հասկացութիւնը մէկ տարուան համար էր միայն:

«Նաեւ նկատելով որ Հայկական Յանձնախումբը այժմ որոշած է իր գործունեութիւնը շարունակել զատ արտօնագրով եւ ինքնուրոյն կազմակերպութեամբ:

«Կեդր. Յանձնաժողովս կ'որոշէ վերսկսիլ Պատերազմէ Աղետելոց Հանգանակութեան գործը»:³⁰

Միության մասն որոշումը անսպասելի չէր, եթէ հաշվի առնենք, որ դեռեւս 1941թ. վերջին, երբ նոր էր սկսվում Հայկական Հանձնախմբի աշխատանքը, ըստ որոշ տեսակետների, հանգանակած միջոցները Ռուսական նպաստամատուցի (Russian War Relief) միջոցով պետք էր ամբողջությամբ հատկացնել Խորհրդային Միությանը: Այն ժամանակ, սակայն, հաղթեց՝ նաեւ Միության ջանքերի շնորհիվ, նախապես որդեգրած որոշումը, որի համաձայն, միջոցների կեսը պետք է հատկացվեր հայ աղետալներին՝ Խորհրդային Հայաստանում եւ սփյուռքում: Այժմ, երբ Հայկական Հանձնախումբը դառնում էր ինքնուրույն, արտոնագրված կազմակերպություն, նրա հետ համագործակցելիս ՀԲԸ Միությունը հարկադրված կլիներ ենթարկվել նրա բոլոր որոշումներին: Նման հեռանկարը չէր կարող հրապուրել Միությանը, նկատի առնելով, մի կողմից, ինքնուրույնություն պահպանելու նրա մշտական ձգտումը, իսկ մյուս կողմից՝ նրա պարտավորությունները հայ աղետալների հանդեպ: Որոշման ճշտությունը հաստատեց Հայկական Հանձնախմբի լուծարումը, որի պատճառը Երեւանից եկած ազդակներն էին:

Պատերազմի սկզբնական շրջանի ծանր պարտություններից հետո Ի.Ստալինը, ձգտելով էլ ավելի ուժեղացնել ժողովրդի, նախ եւ առաջ ուս ժողովրդի հայրենասիրական զգացումները, դիմեց տարբեր միջոցների, այդ թվում նաեւ եկեղեցու օգնությանը: Գերմանիայի հետ պատերազմը սկսվելուց քիչ անց դադարեցվեցին հակակրոնական քարոզչությունը, աթեիստական հատուկ պարբերականների հրատարակումը եւ այլն: Այն բանից հետո, երբ Ռուս ուղղափառ եկեղեցուն թույլատրվեց հավատացյալների մեջ կազմակերպել հանգանակություններ՝ ի նպաստ Կարմիր բանակի, Ամենայն Հայոց կաթողիկոսի տեղապահ Գեորգ արքեպիսկոպոս Չորեքչյանը Հայաստանի ղեկավարության համաձայնությամբ, 1943թ. հունվարի 20-ին հեռագիր է հղում Ստալինին. «Կատարելով իմ պարտքը հայրենիքի հանդեպ, աղթում եմ Ամենաբարձրային՝ սուլտանական զենքի հաղթության համար, փառապանծ Կարմիր բանակի հզորությունն էլ ավելի ուժեղացնելու եւ թշնամու վերջնական ջախջախումն

արագացնելու համար: Էջմիածնի կաթողիկոսարանը «Սասունցի Դավիթ» տանկային շարասյուն կառուցելու ֆոնդին հատկացնում է ադամանդներով զարդարված մի թանկարժեք պանակե և այլ թանկարժեք իրեր՝ պատիճից և ադամանդներից՝ ավելի քան 850 հազար ռուբլու արժողությամբ, 1000 անգլիական ֆունտ ստերլինգ և 50 հազար ռուբլի: Խնդրում են Ձեր կարգադրությունը ԽՍՀՄ պետքանկում հատուկ հաշիվ բացելու մասին: Միաժամանակ, հատուկ կոնդակով դիմում են աշխարհիս բոլոր հավատացյալ հայերին, որ իրենց խնայողություններով մասնակցեն «Սասունցի Դավիթ»-ի անվան տանկային շարասյան կառուցմանը»:³¹

Ստալինը, ինչպես և սպասելի էր պատերազմող երկրի ղեկավարից, պատասխանեց շատ արագ՝ վեց օր անց. «Խնդրում են իմ ողջույնը և Կարմիր բանակի շնորհակալությունը հայտնել հավատացյալ հայերին ու Էջմիածնի կաթողիկոսարանի հոգեւորականությանը, որ միջոցներ է մոծել «Սասունցի Դավիթ» տանկային շարասյուն կառուցելու համար: ԽՍՀՄ պետքանկում հատուկ հաշիվ բանալու համար ցուցում է տրված: Ի.Ստալին»:³²

1943թ. փետրվարի 2-ին, Գետրոգ արք. Չորեքչյանը դիմեց հայ հավատացյալ ժողովրդին՝ կոչ անելով մասնակցել նշված հանգանակությանը: Մասնավորապես, դիմելով սփյուռքահայությանը, նա գրում էր. «Առավել եւս դու՛ արտասահմանի հայություն, նամանավանդ Ամերիկայի հայեր, որ ազատ եք մնացել ահեղ պատերազմի արհավիրքներից և Մայր երկրի ձեր հարազատ եղբայրների ապրումներով եք տառապել ու նրա մղած ազատագրական պատերազմի հաջողության համար մինչեւ այժմ չեք խնայել նյութական ու բարոյական աջակցությունը Կարմիր բանակին և Մայր երկրի որբացյալ ընտանիքներին, վստահ եմ, որ այժմ էլ, ձեր առատ նվերներով կնպաստեք թշնամու շուտափույթ ջախջախմանն ու վտարմանը մեր երկրից»:³³

Մոտ մեկ ամիս անց, Նյու Յորքում Գարեգին արք. Հովսեփյանի նախագահությամբ կազմավորվեց «Սասունցի Դավիթ» տանկային շարասյան հանգանակության հանձնաժողովը, իսկ Համազգային հանգանակություն կազմակերպող Հայկական Հանձնախումբը լուծարվեց:

ՀԲԸ Միությունը, թեև մինչ այդ վերսկսել էր իր հանգանակությունը, այնուամենայնիվ, արձագանքեց նաև հայ եկեղեցու առաջնորդների կոչին: Այսպես, Միության Ամերիկայի Կենտրոնական Հանձնաժողովի անդամ, ամերիկյան բանակի կապիտան Ջիմ Չանգալյանը արդեն մարտ ամսին հատուկ կոչով դիմեց Հայկական Լեգեոնի իր մարտական ընկերներին. «Եկած է ժամանակը որ անգամ մ'ալ սկսինք մեր յառաջխաղացումը, լրացնենք այն կոիւը որ մղեցինք Արարայի գագաթը, Կիլիկիոյ լեռ-

ներուն և Կովկասի բարձունքներուն վրայ: ...Թէև այսօր հազարաւոր մղոններ հեռու կը գտնուինք այդ նուիրական վայրերէն և չենք կրնար մասնակցիլ կոիւին անձամբ, սակայն հոն անոնց մօտ մեր եղբայրները կը շարունակեն մեր կոիւը և մեզմէ զէնք կը խնդրեն»: Այնուհետև, խոսելով «Սասունցի Դավիթ» հանգանակության կազմակերպման մասին, նա գրում էր. «Կոչ կ'ընեն իմ բոլոր Լեգեոնական ընկերներու որ իրաքանչիւր տեղի մէջ իրարու քով գան և օգնեն այս Յանձնախումբերուն»:³⁴

Բայց և այնպես, ՀԲԸ Միությունը, չնայած իր մշտական և իրական մասնակցությանը այդ բոլոր հանգանակություններին, ինչպես և անցյալում, այս դեպքում նույնպես քննադատության թիրախ էր դառնում տարբեր, նույնիսկ իրարամերժ հայ քաղաքական շրջանակների համար: Այդ առիթով Միության պաշտոնաթերթ «Յուշարար»-ը գրում էր. «...երբ ուզեցինք Կարմիր Բանակին հերոսական մարտնչումին հանդէպ մեր հիացումն ու սրտազին համակրութիւնը յայտնել մեր համեստ լուսման մատուցանելով, ոմանք զայն որակեցին անհարկի ժէպօ և մսխում ազգումն միթական ուժերու, իսկ ուրիշներ ուզեցին որ այդ յաւէտ բարոյական իմաստ ունեցող ժէպօը դառնար ազգային բովանդակ ու ծայրագոյն զոհաբերութեան արտայայտութիւն, կարծես Կարմիր Բանակի յաջողութիւնը և մեր ցեղին լինել չլինելու հարցին լուծումն ու ճակատագիրը կախուած ըլլային մեր զոհաբերութենէն, որ (եթէ հնար իսկ ըլլար քամել բովանդակ ազգին միթական հարստութիւնը)՝ Կարմիր Բանակի օրումն մը կարիքը չէր կրնար հոգալ ...նոյն իսկ պակաս չեղան առաջնորդի պիտակը վրանին մարդիկ որ չի դատապարտելին ՀԲԸ Միութիւնը որովհետև ան իր ամբողջ գանձը չէր տրամադրեր Կարմիր Բանակի Հանգանակութեան... Միեւնոյն երեւոյթը կրկնուեցաւ Հրասայի Հանգանակութեան առթիւ, անպատասխանատու և խելառ ամբաստանութիւններով և հակամբաստանութիւններով, մէկ խմբաւորում մը խծթելով և քամահրելով այս ժէպօին բարոյական նշանակութիւնը (ինչպէս ըրած էին Կարմիր Բանակի Հանգանակութեան առթիւ), իսկ ուրիշ խմբակ մը՝ հագցնելով անոր ռազմական արժէք մը որ կրնար ծառայել միայն մեզ ծիծաղելի դարձնելու՝ մեր անսահման հաւակնութեան մէջ»:³⁵

Թեև «Յուշարար»-ը չէր տալիս այդ քննադատների անունները, ակնհայտ է, սակայն, որ խոսքը հայ ազգային կուսակցությունների՝ մի կողմից Դաշնակցության, իսկ մյուս կողմից՝ Հնչակյան և Ռամկավար-Ազատական կուսակցությունների մասին էր: Նրանց միջև եղած տարածայնությունների հիմքում դիրքորոշումն էր Հայաստանի խորհրդային իշխանությունների հանդեպ: Պատերազմի տարիներին, Դաշնակցությունը, իր բոլոր վերապահումներով հանդերձ, այնուամենայնիվ, ստիպված էր

որոշակիորեն խմբագրել եւ մեղմել իր քաղաքականությունը Խորհրդային Միության եւ Հայաստանի հանդեպ:

Իրենց կողմից, Հնչակյան եւ Ռամկավար-Ազատական կուսակցությունները, օգտվելով ԱՄՆ-ի եւ Խորհրդային Միության միջեւ դաշնակցային հարաբերությունների հաստատումից, առավել հստակ դրսևորեցին իրենց աջակցությունը խորհրդահայ իշխանություններին: Նման դիրքորոշումը մեծապես պայմանավորված էր նաեւ նրանով, որ այդ շրջանում Մոսկվան ուղղակի եւ անուղղակի ձեռով սկսել էր արծարծել Թուրքիայի մաս կազմող՝ հայկական տարածքները վերադարձնելու հարցը: Քաղաքական նպատակների ընդհանրության հիմքի վրա այդ նույն տարիներին սկսվեց նշված երկու կուսակցությունների համագործակցությունը նաեւ Ամերիկահայ առաջադիմական միության (Պրոգրեսիվ լիգա) տեղի հայ կոմունիստների կողմից ղեկավարվող խորհրդամետ կազմակերպության հետ, որի արդյունքում 1944թ. սկզբին ստեղծվեց Ամերիկահայ Ազգային Խորհուրդը: (Հենց այդ Խորհուրդն էլ երեք տարի անց Նյու Յորքում հրավիրեց Հայկական Համաշխարհային Կոնգրեսը, որի մասին կխոսվի ստորև):

Ազգային Խորհուրդը, չնայած Դաշնակցությունը հրաժարվեց նրան անդամակցելուց, հավակնում էր ներկայացնել ողջ ամերիկահայությունը, ինչը խիստ ցանկալի էր դարձնում ՀԲԸ Միության՝ ամենահեղինակավոր եւ գործունյա կազմակերպություններից մեկի մասնակցությունը: Միությունը, սակայն, հրաժարվեց անդամակցել Ազգային Խորհրդին եւ քանի որ իր այդ որոշումը կարող էր մեկնաբանվել տարբեր կերպ, անհրաժեշտ համարեց հանդես գալ հատուկ հայտարարությամբ: Հիշեցնելով, որ Միությունը՝ համաձայն իր կանոնագրի առաջին հոդվածի, մարդասիրական հաստատություն է եւ որեւէ քաղաքական հանգամանք չունի, Կենտրոնական Վարչությունը նշում էր. «Ազգային ժամանակաւոր Միութեան կամ Խորհուրդի կանխաւ ծրագրած չորս կէտերէն վերջին երկուքը իսկութեան մէջ քաղաքական են: Ահաւասիկ այդ կէտերը. «3. Պաշտպանել տարագիր հայերու իրաւունքները հարկ եղած բոլոր միջոցներով, եւ աշխատիլ ի խնդիր անոնց Հայկական հողի վրայ վերաբնակեցման»: Նաեւ «4. Նախաձեռնել ձեռնարկներ՝ որոնք ժամանակի ընթացքին անհրաժեշտ կրնան ըլլալ ներգաղթի շարժումի մը օգնելու համար»: Որչափ ալ մեր սիրտերուն մօտիկ ըլլան այդ նպատակները, սակայն, անոնց քաղաքական հանգամանքը մաս չկազմեր մեր ծրագրին, թէեւ նիւթական օժանդակութիւնը Միութիւնս ըրած է անցեալին մէջ եւ սիրով պիտի ընէ միշտ»: Կար մեկ պատճառ եւս. «Միութիւնս Անգլիոյ եւ Միացեալ Նահանգաց մէջ պաշտօնապէս ճանչցուած է իբր բացառիկ առանձնաշ-

նորհներ վայելող մարդասիրական հաստատութիւն մը, եւ այս երկու երկիրներու մէջ տուրքէ գերծ կացուցուած է եւ Հանգանակութիւն ընելու լիազօրուած է: Հետեւաբար, ստիպուած է ամսէ ամիս մեր Կառավարութեան ներկայացնել իր նպաստամատոյց գործին աղբիւրներուն եւ յատկացումներուն մանրամասն հաշիւները: Միութեանս եւ անոր նպաստամատոյց կարեւոր գործին բարեկամները, վստահ ենք թէ, պիտի չփափագէին որ որեւէ պատճառաւ ան զրկուէր իր վայելած այդ առանձնաշնորհումներէն»:³⁶

Հարաբերությունների վերահաստատումը Խորհրդային Միության հետ

ՀԲԸ Միության այդ տարիների դիրքորոշումը հասկանալու համար կարեւոր է նկատի ունենալ մի հանգամանք եւս: Պատերազմի տարիներին Խորհրդային Միության եւ ԱՄՆ-ի, Անգլիայի ու այլ երկրների միջեւ դաշնակցային հարաբերությունների հաստատումը, ամեն բանից զատ հայկական սփյուռքի, մանավանդ ամերիկահայության համար բացառիկ հնարավորություն էր Խորհրդային Հայաստանի, հայ ժողովրդի հանդեպ իրենց համակրանքն ու օժանդակությունը դրսևորելու համար: Երկու տասնամյակ զրկված լինելով Հայաստանի հետ հարաբերվելու իրավունքից, այժմ՝ իրենց անվերապահ աջակցությամբ խորհրդային բանակին եւ խաղաղ բնակչությանը, նրանք, կարծես, ցանկանում էին առիթ տալ Խորհրդային Միության իշխանություններին՝ վերանայել իրենց քաղաքականությունը սփյուռքահայության հանդեպ: Եթե այսպիսին էր ընդհանրապես սփյուռքի, ամենատարբեր կազմակերպությունների դիրքորոշումը, ապա ՀԲԸ Միության պարագայում այն ուներ որոշ առանձնահատկություններ: Նախ, Միությունը շարունակում էր իրագործել իր ծրագրերը գաղթականների բազմապիսի կարիքները հոգալու նպատակով, որոնք այնչափ հրատապ էին, որ նույնիսկ ընթացող պատերազմը անկարելի էր դարձնում նրանց գեթ ժամանակավոր դադարեցումը: Մյուս կողմից, Միության կարեւորագույն խնդիրն էր դառնում օգնությունը Խորհրդային Հայաստանի ժողովրդին եւ աղետալի վիճակում հայտնված հայությանը՝ գերմանացիների գրաված երկրներում: Այս ամենի հետ մեկտեղ, Միությունը՝ ի տարբերություն մնացած բոլոր սփյուռքահայ կազմակերպությունների, ցանկանում էր ոչ թե սոսկ հարաբերություններ հաստատել Խորհրդային Հայաստանի հետ, այլ հենց իսկ վերահաստատել իր շուրջ 14-ամյա հարաբերությունները, հնարավորություն ստանալ շարուն-

նակել եւ զարգացնել հայաստանյան իր ծրագրերը: Թե Խորհրդային Հայաստանի հետ իր համագործակցության պատմությունը եւ թե սփյուռքում իր բարձր հեղինակությունն ու դիրքը, պարտավորեցնում էին նրան հանդես գալ ինքնուրույն եւ առավել շոշափելի նախաձեռնություններով:

1942թ. հոկտեմբերին Նյու Յորքում կայացած Միության 30-րդ Ընդհանուր ժողովում ընդունված որոշումներից մեկը ամբողջությամբ վերաբերում էր Խորհրդային Հայաստանին. «Ընդհ. ժողովս իր սիրագեղ զգացումներն ու եղբայրական ողջունները կը մատուցանէ Հայաստանի կառավարութեան եւ ժողովուրդին, որ հասարակաց թշնամիին դէմ հերոսական կռիւ կը մղեն, Խորհրդային Միութեան փառապանծ դրօշին ներքեւ: Ժողովս ջերմապէս կը մաղթէ ջախջախիչ յաղթանակ մը՝ որ վերջնականապէս ապահովէ գերեալ ազգերուն ազատութիւնը, եւ Հայաստանի ինչպէս եւ համայն աշխարհի տեսական խաղաղութիւնը: Սոյն իմաստով հետագրել իրենց, նոյնպէս Ուաշինկթոնի Դեսպան Լիթվինօֆի, եւ առիթէն օգտուելով խնդրել որ նորընտիր Կեդրոնական Վարչութեան կողմէ Պատուիրակութիւն մը ընդունի՝ որպէսզի Խորհրդային Միութեան եւ Բարեգործականի յարաբերութեան խնդիրները վերահաստատուին»:³⁷

ԱՄՆ-ում Խորհրդային Միության դեսպան Մ. Լիտվինովի հետ Միության պատվիրակության հանդիպումը կայացավ երկու ամիս անց, հաջորդ՝ 1943թ. հունվարի 4-ին: Հայաստանի կառավարության 1937թ. դեկտեմբերի 8-ի հայտնի որոշումից հետո սա Միության առաջին հանդիպումն էր Խորհրդային իշխանությունների հետ, ուստի եւ Կենտրոնական Վարչության անդամներ Լեւոն Կերտանը եւ Մարտիք Պալիոզյանը նախ ներկայացրին դեսպանին Խորհրդային Հայաստանում ՀԲԸ Միության իրագործած ծրագրերը, որոնց ընդհանուր արժեքն էր շուրջ 1.200.000 դոլար: Այնուհետեւ պատվիրակները հայտնեցին իրենց փափագը՝ դրամական առաքումներով պարբերաբար օգնել Հայաստանի ժողովրդին եւ հաստատություններին: Հանդիպումից մի քանի օր անց Միությունը դեսպան Մ.Լիտվինովին տեղեկացրեց, որ պատրաստ է 25.000 դոլար տրամադրել Հայաստանին, հատկապէս իր իսկ հիմնած հաստատություններին: Մեկ ամիս անց Միությունը ստացավ դեսպանի պաշտոնական նամակը.

«Ձեր Յունուար 8 թուակիր նամակին եւ մեր նախապէս ունեցած տեսակցութեան համաձայն՝ հարկ եղած դիմումը ըրած ըլլալով՝ ի վիճակի եմ ձեզ հաղորդելու թէ իմ կառավարութիւնս յօժարական է ընդունելու ձեր 25.000 տոլարը՝ Սովիեթ Հայաստանի այլեայլ Հաստատութեանց յատկացուելու համար, ինչպէս նաեւ ուրիշ յատկացումներ՝ նոյն նպատակաւ: Կը զգամ թէ Սովիեթ Հայաստանի ժողովուրդը ջերմապէս պիտի

զնահատէ ձեր օժանդակութիւնը»:³⁸ Այս նամակը ստանալուց տասն օր անց Միությունը Մ.Լիտվինովին ուղարկեց 25.000 դոլարի չեք, խնդրելով այդ գումարից հատկացնել Երեւանի Պետհամալսարանին, Մարի Նուպար ակնաբուժարանին, Դարուհի Յակոբեան մայրանոցին եւ «կարօտեալներու ու ուսուցիչներու համար, Հայաստան»: Եվս երեք օր անց հետեւեց դեսպանի պատասխանը, որում հայտնվում էր, որ գումարը «...ուղարկած ենք Մոսկուա, փոխադրուելու համար Երեւան, եւ բաշխուելու ըստ ձեր փափագանաց»:³⁹

Հետագա ամիսների ընթացքում Միությունը նույն նպատակների համար կատարեց եւս երկու դրամական առաքում Հայաստան՝ որոնցից վերջինը դեկտեմբերին՝ Խորհրդային Միության նոր դեսպան Անդրեյ Գրոմիկոյի (հետագայում՝ Խորհրդային Միության Արտաքին գործերի նախարար) միջոցով: Միությունը, քաջալերված Հայաստանի հետ իր կապերի վերահաստատումով, ձգտում էր ընդլայնել իր օժանդակությունը հայ ժողովրդին: 1944թ. նա Հայաստան է ուղարկում մեծ քանակությամբ զանազան հագուստեղէն (թրոյս ծածկոցներ, վերարկու, գուլպա եւ այլն), ինչպէս նաեւ դեղորայք՝ մոտ 105.000 դոլար ընդհանուր արժեքով: Ընթացող պատերազմի այդ օրերին Հայաստանի հետ նամակագրական եւ որեւէ այլ կապի բացակայության պայմաններում Միությունը ի վիճակի չէր տեղեկանալու նշված գումարների եւ ապրանքների ստացման մասին եւ նրան մնում էր միայն բավարարվել դեսպանների հավաստիացումներով:

Քառորդ միլիոնի հանգանակությունը

1943թ. նոյեմբերի 20-ին Նյու Յորքում գումարված ՀԲԸ Միության հերթական 31-րդ Ընդհանուր ժողովը ընդունեց որոշում «Համազգային եւ Համաշխարհային» նոր հանգանակություն կազմակերպելու մասին, համաձայն որի, Հյուսիսային եւ Հարավային Ամերիկայի երկրներում Միության տեղական կազմակերպությունների կողմից պետք է հանգանակվեր 250 հազար դոլար, իսկ Եգիպտոսի Կենտրոնական Հանձնաժողովի շրջանակի երկրներում (Եգիպտոս, Իրաք, Իրան, Հնդկաստան, Սիրիա եւ Լիբանան, ինչպէս նաեւ Անգլիա, Կիպրոս եւ այլն)՝ եւս 110 հազար դոլար: Ամերիկայում «Քառորդ միլիոն տոլարի հանգանակութեան» ընթացքում հավաքված գումարը նախատեսվում էր հատկացնել՝

«Խորհրդային Հայաստանին - Հանգանակութեան արդիւնքին կէսը՝ ի նպաստ պատերազմի աղէտելոց եւ թժկական ու հիւանդանոցային հոգածութեան:

«Եվրոպա - Նպաստ պատերազմի աղետելոց՝ Յունաստան, Ֆրանսա, Պալքանեան երկիրներ:

«Սուրիա եւ Լիբանան - Նպաստ գաղթականաց, Տիրոսի եւ Գարատուրանի տնագործներուն 100 տուներու, հակաշերմախտային արշալի, 80 դպրոցներու օժանդակութեան, բժշկական դարմանատանց, որբանոցներու եւ կաթի ֆոնտի համար:

«Հիւանդանոցներու - նաեւ Այնճարի մէջ հիւանդանոցի մը կառուցման»:⁴⁰

Ազգից եւեթ փորձ էր արվում ներկայացնել հանգանակությունը ոչ թե որպէս զուտ ՀԲԸ Միության, այլ ողջ ամերիկահայության ձեռնարկ: Դիմելով վերջինիս հայրենասիրությանն ու ազգային ինքնասիրությանը՝ «...հայը ուրիշներուն նպաստին սպասող ժողովուրդ չէ...», «...ցիրուցան հայութիւնն ալ կրնայ գործել միական եւ միանպատակ...», միեւնոյն ժամանակ Միությունը, հիշեցնելով, որ Հայկական Հանձնախմբի եւ «Սասունցի Դավիթ» հանգանակությունների հաջողությանը նպաստելու համար ինքը դադարեցրել է չէր ձեռնարկել սեփական հանգանակություններ, բարոյական իրավունք էր վերապահում իրեն «...սպասել մեծ ու փոքր հայ կազմակերպութիւններէն որ նոյն լայն ոգիով նային այս համագաղութային ճիգին, որուն արդիւնքը անմիջական եւ վաղուան մեծ կարիքներուն պիտի հատկացուի ամբողջովի»:⁴¹

Հանգանակության հաջող ընթացքի համար կարեւոր եղավ Ամերիկահայ թեմի առաջնորդ Գարեգին արք. Հովսէփյանի անվերապահ աջակցությունը, որը Միությանը հղած իր նամակում, մասնավորապէս, գրում էր. «Այս ձեռնարկութիւնը, ինչպէս եւ Բարեգործականի բոլոր ձեռնարկութիւններն ու գործունէութիւնը, մեր ամենուն սրտին մօտ է ազգային եւ քրիստոնէական տեսակէտներով...»:⁴²

Առավել կարեւոր էր, սակայն, Միության ղեկավար գործիչների, ներառյալ Կենտրոնական Վարչական Ժողովի անդամների, ակտիվ մասնակցությունը ոչ միայն իրենց հանգանակած մեծաթիվ գումարներով, այլ լեւ իրենց անձնական մասնակցությամբ ԱՄՆ-ի տարբեր քաղաքներում կազմակերպվող ժողովներին ու հանդեսներին: Քարոզչության նման՝ ամերիկյան ձեռք, մեծապէս նպաստեց թե հանգանակության հաջող ընթացքին եւ թե Միության հեղինակության բարձրացմանը ամերիկահայության մէջ: Միության գրեթե բոլոր մասնաճյուղերի աշխույժ գործունէության պայմաններում առանձին մասնաճյուղեր առանձնանում էին իրենց առավել արդյունավետ գործելակերպով:

Հատկանշական էր այդ առումով Դետրոյտի մասնաճյուղը: Այստեղ մասնաճյուղի ատենապետ Ալեք Մանուկյանի ջանքերով կազմվել էր

ներկայացուցչական հանձնախումբ, որի պատվո նախագահներն էին տեղի Հայ Առաքելական եւ Ավետարանական եկեղեցիների առաջնորդները եւ որին՝ ՀԲԸ Միության Արանց, Տիկնանց եւ Երիտասարդաց մասնաճյուղերից բացի, անդամակցում էին քաղաքի Հայ Առաքելական եկեղեցու Տիկնանց Եկեղեցատերը, Հայաստանյայց եկեղեցու Երիտասարդ Տիկնանց Միությունը, Հայ Ժողովրդական եկեղեցու Տիկնանց Օժանդակը, Եկեղեցաշինաց Միությունը եւ այլն, ինչպէս նաեւ ողջ հայ բնակչությունը ներկայացնող մեծ թվով ճանաչված, հեղինակավոր անհատներ: Դետրոյտի հանձնախմբի աշխատանքը այնքան արդյունավետ էր, որ Միության պաշտոնաթերթը անհրաժեշտ համարեց ներկայացնել այն հատուկ հոդվածով. «Միութեանս ուրիշ Մասնաճիւղերուն եւ համայնքներու իբրեւ օրինակ՝ հարմար դատեցինք բացատրել Տիրոջ ժողովրդական Յանձնախումբին կազմութիւնը, որ ներկայացուցչական է եւ համագաղութային»:⁴³

Հանգանակության ճիշտ եւ հաջող կազմակերպման մասին էր վկայում նաեւ այն, որ ԱՄՆ-ի եւ Կանադայի մի շարք քաղաքներում մասնակիցների թվում էին նաեւ Դաշնակցության անդամները: Այսպէս, Տորոնտոյում «...դաշնակցական անհատներ եւս ներկայ էին եւ մասնակցեցան Հանգանակութեան՝ երբ լսեցին ընդհանուր կոչը որ կ'ըլլար հայութեան, առանց դաւանանքի եւ կուսակցական խտրութեան»:⁴⁴

1944թ. հոկտեմբերի 1-ին Նյու Յորքում տեղի ունեցավ ՀԲԸ Միության Քառորդ միլիոն դոլարի հանգանակության վերջին հրապարակային ժողովը: Ժողովի կազմակերպիչների (ատենապետությամբ հատուկ այդ նպատակով Դետրոյտից հրավիրված Ալեք Մանուկյանի) ջանքերով այն թե իր մասնակիցներով եւ թե բովանդակությամբ տեղի հայության կյանքում դարձավ տարվա ամենանշանավոր իրադարձությունը: Ամերիկահայ մշակութային պատմության առումով հիշատակման արժանի է, որ հանդեսի գեղարվեստական բաժնի մասնակիցներից էր այն ժամանակ դեռ երիտասարդ, իսկ հետագայում աշխարհահռչակ երաժիշտ Ալան Հովհաննեսը՝ իր հեղինակած «Վարազ», «Մազերդ աման ռեհանի», «Արշալույս» եւ այլ ստեղծագործությունների կատարմամբ: Ժողովին առանձնահատուկ կարեւորություն էր հաղորդում Նյու Յորքում Խորհրդային Միության Գլխավոր հյուպատոս Երգ. Կիսելյովի եւ փոխհյուպատոս Ս.Ապրեսյանի ներկայությունը: Բարձրաստիճան դիվանագետների ներկայությունը վկայությունն էր այն բանի, որ ՀԲԸ Միությունը վերստին վայելում էր Խորհրդային Միության հարգանքն ու վստահությունը եւ դիտվում որպէս հուսալի գործընկեր, ինչը, իր հերթին, ճնարավոր էր դարձնում գործնական հարաբերությունների վերահաստատումը Հայաս-

տանհի հետ: Ակնհայտ էր նաև, որ դրան նպաստող հանգամանքների շարքում կարևոր դեր խաղաց հենց իսկ Քառորդ միլիոնի հանգամանկության հաջող կազմակերպումը: «...Ձեռնարկին յաջողությունը,- գրում էր Միության Ամերիկայի Կենտրոնական Հանձնաժողովի վարիչ-տնօրեն Երվանդ Մեսիայանը,- որոշ ճամբայ բացաւ ՀԲԸ Միութեան ղեկավարութեան առջեւ: Այս ճամբան ՀԲԸ Միութիւնը պիտի առաջնորդէ դէպի Խորհ. Հայաստան՝ եւ անհրաժեշտ պիտի դարձնէ որ ՀԲԸ Միութիւնն անքակտելի եւ զօրաւոր կապերով կապուի Խ. Հայաստանի կառավարութեան հետ, աստիճանաբար իրականացնելով այն հետադիմ եւ հայրենասիրական քաղաքականութիւնն, որուն՝ Նուպարաշէնի հիմնարկութեամբ՝ առաջին գործնական արտայայտութիւնը տուաւ Պողոս Նուպար Փաշա, երբ պետական գիտակցութեամբ անհկա իր քաղաքական իրատեսութիւնը հաստատեց սա հիմնական մտածումին վրայ՝ թէ հայկական պետութեան տակ եւ հայկական հայրենիքին մէջ միայն՝ ազգին կրած աղէտներէն վայրափատին դարձած հայ ժողովուրդին տառապող զանգուածներն իրենց տեւական ապահովութիւնն ու բարօրութիւնը պիտի գտնէին»:⁴⁵

ՀԲԸ Միության այս ժողովը ուշադրության արժանի է նաև այնտեղ հնչած ելույթների առումով: Միության վետերան, Կենտրոնական Վարչության բազմամյա անդամ Լեոն Կերտանը իր ելույթում Միության օրինակի վրա, դասակարգային պայքարի սկզբունքին հակադրեց դասակարգային համերաշխության եւ համագործակցության թեզը: «Հպարտ եմ մտածելով թէ ՀԲԸ Միութիւնն հիմնողներու, անոր համար զանազան Կեդր. Խորհրդանիւններու եւ Ծրջանային ու տեղական Յանձնաժողովներու մէջ աշխատողներու հսկայ մեծամասնութիւնը,- ասում էր նա,- օրինակելի Պորժուաներ եղած են եւ են: Միշտ լուզումով պիտի յիշեմ որ այն պահուն երբ դրամատիկական ընկերութիւնը դէմ կանգնած էր Սովիետներու, երբ տղէտ ու ստրուկ մամուլ մը կը ջանար խեղաթիւրել ինչ որ կը կատարուէր Ռուսական սահմաններէն ներս եւ արտասահմանի մէջ ալ կարգ մը հայեր կը շարունակէին մեզի դէմ պայքարի, Պողոս Փաշա եւ իր գործակիցները, որոնց ամենակրտսերներէն մէկն էի ես, երբեք չտատամսեցան Խորհրդային Հայաստանի օգնելու եւ իրենց գործերով ու խօսքերով ապացուցանելու թէ գիտէին ճանչնալ Մոսկուայի կառավարութեան մեր հայրենակիցներուն մատուցած անհաշունելի ծառայութիւնները, մինչ միւս բոլոր պետութիւնները հայերն իրենց տխուր բախտին լքած էին: Ներկայիս, աշխարհ իր կարծիքը փոխած է Ռուսիոյ մասին, կոյրերու եւ թշնամի գործակալներու փոքրամասնութիւն մը միայն կը շարունակէ հակա-Խորհրդային բրօփականսը սնուցանել»:⁴⁶

Լ.Կերտանի այս խոսքերը առավել մեծ իմաստ էին ստանում, հաշվի առնելով դասակարգային անհաշտ պայքարի սկզբունքը որդեգրած Խորհրդային Միության պաշտոնական ներկայացուցիչների ներկայությունը: Հիշեցնելով նախորդ տարիներին ՀԲԸ Միության դիրքորոշումը Խորհրդային Միության հանդեպ՝ Լ.Կերտանը, դրանով իսկ, երաշխավորում էր ՀԲԸ Միության «պորժուա» ղեկավարների պատրաստակամությունը հետագայում նույնպես նպաստել Խորհրդային Հայաստանի զարգացմանը: «Որպէսզի ՀԲԸ Միութիւնը կարողանայ այս դերը շարունակել, եւ առաւելագոյն չափով Հայաստանին օգնել,- դիմելով հյուրերին, ասել էր Լ.Կերտանը,- անհկա պէտք ունի ձեր օժանդակութեան եւ քաջալերութեան: Ապագային, ոչ միայն պէտք է տառապողներու վերքերը բուժել, այլ եւ մեր բոլոր ուժերովն օգնել՝ որպէսզի Հայաստան փոխադրենք այն բոլոր հայերն որոնք չկրցան վարժուիլ իրենց ապաստանած երկիրներու կենտրոնին: Հայկական տառապանքներու հարցը միայն Խորհրդային Միութիւնը կրնայ լուծել»: Այդ տարիներին, ըստ էության, առաջին անգամ էր, որ ՀԲԸ Միության ղեկավարներից մեկը հրապարակավ բարձրացնում էր նոր ներգաղթ կազմակերպելու հարցը եւ, ինչպես ցույց տվեցին հետագա դեպքերը, ոչ անհիմն:

Ժողովում հնչած եւս մեկ՝ Ալեք Մանուկյանի ելույթը, ամեն բանից զատ, ուշադրության է արժանի թեկուզ միայն այն պատճառով, որ վկայությունն էր նրա՝ որպէս ՀԲԸ Միության ապագա նախագահի, մտնեցումների ձեւավորման մասին: Դա, ըստ էության, ծրագրային ելույթ էր, որում ոչ միայն արժեւորվում էր Քառորդ միլիոնի հանգամանկությունը, այլև հստակ խոսվում էր Միության հետագա տարիների գործունեության մասին: Նա նախ եւ առաջ նշեց Մերձավոր Արեւելքի եւ Բալկանյան երկրների հայության բազմաթիվ եւ բազմապիսի կարիքները հոգալու խնդիրը, հատկապէս շեշտելով աճող սերնդի հայեցի կրթության՝ հայկական դպրոցներ հիմնելու անհրաժեշտությունը:

Ուշագրավ է, որ Ա.Մանուկյանը՝ Միության ղեկավարներից առաջիններից մեկը, եթե ոչ առաջինը, խոսեց ՀԲԸ Միության ազգապահպան գործունեության հրատապության մասին նաև ԱՄՆ-ում. «Ունիք հոս նոր սերունդի հայեցի դաստիարակութեան հարցը, որ ցարդ նուազագոյն լուծումն անգամ գտած չէ: Կան բազմատեսակ երիտասարդական կազմակերպութիւններ, որոնց անջատ գոյութիւնը առնուազն անիմաստ է: Պէտք է համախմբել զանոնք մէկ նպատակի շուրջ: Բարեգործականին կ'իյնայ այդ աշխատութիւնը իբր համազգային կազմակերպութիւն»: Ա.Մանուկյանի այս վերջին թեզը պատահական չէր, նա, կարծես, փորձ էր անում վերակենդանացնել Պողոս Նուպարի եւ Գալուստ Կյուլպենկյա-

նի գաղափարը ՀԲԸ Միության՝ որպես համահայկական կազմակերպության մասին: «Քանի մը հազարներու կազմակերպութիւն ըլլալու չէ անկա,- ընդգծում էր նա,- հապա, կազմակերպութիւնը բոլորին անխտիր: Համապարփակ ըլլալու է Բարեգործականին դերը եւ անոր ծառայութիւնը տարածուելու է բոլոր այն մարզերուն մէջ, որոնք բնոյթով ազգային են: Մէկ խօսքով Բարեգործականն ըլլալու է գաղութահայութեան անվիճելի կազմակերպութիւնը, վայելելով բոլորին անվերապահ նուիրումն ու գործակցութիւնը: Բարեգործականն ըլլալու է նաեւ ամենագօրատր կապը Հայաստանի եւ գաղութահայութեան միջեւ եւ խողովակը երկուքի յարաբերութեան»:⁴⁷

1944թ. հոկտեմբերին, երբ հանգանակությունը դեռ չէր ավարտվել, ԱՄՆ-ում հավաքված գումարը արդեն իսկ գերազանցում էր նախատեսած քառորդ միլիոնը, կազմելով մոտ 300 հազ. դոլար: Այդ գումարից մոտ 126 հազ. օգտագործվեց Խորհրդային Հայաստանի համար դեղորայք, հագուստեղեն եւ այլ ապրանքներ գնելու եւ Ռուսական նպաստամատույց կազմակերպության միջոցով ուղարկելու համար: Մնացած գումարը օգտագործվեց Լիբանան եւ Սիրիա, Հունաստան, Ֆրանսիա ապաստանած հայերի առողջապահական, կրթական եւ այլ կարիքները հոգալու նպատակով (Այնճարում մայրանոցի, Ալեքսանդրետի սանջակի գաղթականների համար տների կառուցում եւ այլն):

Կես միլիոնի հանգանակությունը

1945թ. ապրիլին, ՀԲԸ Միության նախագահ Արշակ Գարակյոզյանը պաշտոնապես հայտարարեց արդեն կես միլիոն դոլարի հանգանակության մասին: Իր «Ընդհանուր հայ ժողովուրդին» վերնագիրը կրող կոչում Միության նախագահը գրում էր. «Պատերազմի հաւանական մօտաւուտ վերջաւորութիւնը ՀԲԸ Միութիւնը պիտի դնէ ազգային ծովածաւալ պէտքերու եւ պահանջներու առջեւ: Այս պատճառաւ, բացարձակապէս ստիպողական եւ անհրաժեշտ նկատելով կէս Միլիոն Տոլարի Հանգանակութիւնը, այս սրտաբուխ Կոչը կ'ուղղեմ ընդհանուր Հայութեան, խնդրելով որ ամէն հայ, իր ազգային պարտաւորութեան գիտակցութեամբ եւ իր վայելած ազատութեան բարիքներուն երախտագիտութենէն մղուած առատօրէն եւ ուրախութեամբ մասնակցի այս համազգային հանգանակութեան»:⁴⁸

Դրան հետեւեց նոր հանգանակության կենտրոնական Հանձնախմբի ատենապետ, Միության ամենահեղինակավոր գործիչներից մեկի, նա-

խագահի եղբոր՝ Միհրան Գարակյոզյանի հայտարարությունը, որում, մասնավորապես, նշվում էր, որ նախատեսած գումարի հիմնական մասը՝ 350.000 դոլարը, ինչպես եւ նախորդ դեպքում, պետք է հավաքվեր Ամերիկայում: 1945թ. ապրիլին սկիզբ առած հանգանակությունը շարունակվեց նաեւ 1946թ. առաջին ամիսներին, հատկապես հաջող արդյունքներ արձանագրելով առանձին շրջաններում: Մասնավորապես, Միության նախագահ Ա.Գարակյոզյանի հատուկ շնորհակալական նամակին արժանացավ հանգանակության Կալիֆորնիայի կենտրոնական Հանձնախումբը, որը գլխավորում էր Արամ Սարոյանը Ֆրեզնոյից (գրող Վիլյամ Սարոյանի ազգականը): Որոշ ժամանակ անց, Ա.Սարոյանը եւս մեկ շնորհակալական նամակ ստացավ՝ արդեն Մոսկվայից: Նամակի հեղինակներն էին ճարտարապետ, ակադեմիկոս Կարո Հալաբյանը եւ կոմպոզիտոր Արամ Խաչատրյանը, որոնք, մասնավորապես, գրում էին. «Ձեր տուած օգնութիւնը, բարեկամներ, օգտակար եղաւ հայրենասիրական մեծ պատերազմի օրերին, նաեւ օգտակար պիտի լինի այն պատերազմի հետեւանքների հեռացման օրերին: Ուստի, շարունակեցէք ձեր օգտակար մեծ գործը մեր հայրենիքի, Սօվիետական Հայաստանի ի նպաստ»:⁴⁹

Ուշագրավ է, որ այս հանգանակությանը ակտիվ մասնակցություն ունեցավ նաեւ Միության Բուէնոս Այրեսի (Արգենտինա) մասնաճյուղը, որը պետք է ապահովեր 35 հազ. դոլար: Սակայն, տեղական հանձնախմբի, նախ եւ առաջ, նրա ատենապետ Արմեն Պերկամալիի ջանքերով հնարավոր եղավ հանգանակել Արգենտինայի հայերի համար նմանը չունեցող գումար՝ ավելի քան 40 հազ. դոլար:

ՀԲԸ Միության անդնդմեջ երկու հանգանակությունները աննախադեպ էին սխյուռքի համար: Ալեք Մանուկյանը իր վերը նշած ելույթում նշում էր. «Չեմ յիշեր թուական մը Ամերիկահայ գաղութի կեանքին մէջ, երբ հայ կազմակերպութիւն մը վայելած ըլլայ այնքան համակրութիւն որ կարենայ միս մենակը, մի քանի ամիսներու ընթացքին ու մէկ քէմպէյնով գոյացնել աւելի քան քառորդ միլիոն տոլարի պատկառելի գումար մը, ի նպաստ Խորհրդային Հայաստանի եւ սխյուռքի կարօտ եւ աղէտահար հայութեան»:⁵⁰

Այն, որ Միությունը վայելում էր ամերիկահայերի համակրանքը, վկայում էին հետեւյալ թվերը: 1941թ. ԱՄՆ-ում, կանադայում եւ Հարավային Ամերիկայում գործում էին ՀԲԸ Միության 72 մասնաճյուղ, 16 Տիկնանց մասնաճյուղ եւ Օժանդակ մարմին, ինչպես նաեւ 22 Երիտասարդական մասնաճյուղ ու Կրտսերաց Լիգա, իսկ անդամների ընդհանուր թիվն էր 3.700: 1943թ. այդ բոլոր մասնաճյուղերի թիվը արդեն 121

էր եւ անդամներին՝ 5.675: Միությունն էլ ավելի մեծ ան ունեցավ 1944թ.՝ 176 մասնաճյուղ եւ շուրջ 8 հազար անդամ:⁵¹

Ամերիկահայերի ցուցաբերած օգնության չափերը, նրանց մասնակցությունը ՀԲԸ Միության եւ ազգային այլ կազմակերպությունների նմանօրինակ ձեռնարկներին՝ հարցեր էին, որոնք շատ-շատերի համար ձեռք էին բերել նաեւ ազգային արժանապատվության նշանակություն:

Պատերազմը սկսվելուն պես ԱՄՆ-ի բոլոր ազգային փոքրամասնությունները (ռուսները, հրեաները, հույները, լեհերը եւ այլք) նույնպես օգնության հասան Եվրոպայում բնակվող իրենց հայրենակիցներին՝ հանգանակություններ, անհրաժեշտ ապրանքների եւ իրերի առաքումներ եւ այլն: Ամերիկահայերն էլ իրենց օգնության ծավալը արժեւորելու համար, կամա թե ակամա, դիմում էին այդ փոքրամասնությունների հետ համեմատմանը: Եվ, որպես կանոն, նրանք ստիպված էին լինում ընդունել, որ այդ համեմատությունները հօգուտ իրենց չէին: «Ամերիկայի 500.000 յույները, - նշվում էր «Յուշարար» ամսագրում, - երկու տարուան ընթացքին Նպաստամատուց մը յառաջ բերին աւելի քան 1000 մասնաճիւղներով: Ամէն կողմէ անանկ մեծ ընդունելութիւն յառաջ եկաւ որ կարելի է ըսել՝ թէ ամէն մէկ յոյն այսօր քսակով ու սրտով անդամ ու մասնակից է այդ հսկայ ձեռնարկին: Այդ մարմինը մտքին մէջ ունի 30 միլիոն տղարի քեմբէյն մը: Տասը միլիոնը արդէն հաւաքած է: Ասիկա կը նշանակէ որ իրաքանչիւր յոյն 60 տղարով պիտի մասնակցի այս ֆընտին»:⁵² Ավելի քան մեկ տարի անց, երբ կես Միլիոնի հանգանակությունը դեռ չէր ավարտվել, ամսագիրը վերստին անդրադարձավ այդ հարցին. «Այս երկիրը ապրող մեծագոյն ազգերու մասնակները, ռուսներ, ֆրանսացիներ, յույներ, լեհեր, հրեաներ, եւ բոլոր միւսները, կ'ընեն իրենց կարելին օգնութիւն հասցնելու համար իրենց ժողովուրդներուն: Հրեաները 34.000.000 ժողվեցին իրենց տարագիրներուն եւ հարստահարեալներուն համար: Իրաւ է թէ մենք անոնց բարգաւաճ վիճակը չունինք, բայց ի՞նչ է վերջապէս կէս միլիոնը, այսօրուան Ամերիկայի բարեկեցիկ հայութեան համար... Պիտի ուզէի՞նք մենք բացառութիւն կազմել միւս ժողովուրդներուն քով: Անոնց բնիկ երկրին մէջ կ'ապրին մեր տարագիր հայերը եւ արդէն առաջին օրէն, բեռ մը նկատուած են մերինները, այդ օտար կառավարութեանց աչքին»:⁵³

Միության հանգանակությունների հաջող ընթացքը պայմանավորված էր նաեւ պատերազմական տարիներին ամերիկյան տնտեսության մեջ տեղի ունեցող որակական փոփոխություններով: Պատերազմի նախօրէին ամերիկյան տնտեսությունը դեռեւս կրում էր Մեծ ճգնաժամի բացասական արդյունքները, մասնավորապէս, գործազուրկների քանակը երկրում հասել էր 10 միլիոն մարդու: Սակայն, պատերազմը սկսվելուն

պես, մեծ արագությամբ սկսեցին զարգանալ ինչպես ռազմական արդյունաբերությունը, այնպես էլ տնտեսության այլ ոլորտները: Արդեն 1942թ. ոչ միայն վերացվեց գործազրկությունը, այլ նույնիսկ առաջացավ աշխատուժի պահանջարկի խնդիրը: ԱՄՆ-ի համախառն արտադրանքը, որը 1940թ. կազմում էր 100.6 մլրդ դոլար, 1944թ. կազմեց 211.4 մլրդ: Երկրի ներսում եւ նրա սահմաններից դուրս գյուղատնտեսական ապրանքների մեծ պահանջարկի պայմաններում ամերիկյան ֆերմերների շահույթները 1945թ., 1940թ. համեմատ, անեցին ավելի քան չորս անգամ: Երկրի ողջ տնտեսության նման բուռն զարգացմանը զուգընթաց աճում էր եւ ժողովրդի, այդ թվում նաեւ ամերիկահայերի, կենսամակարդակն ու բարեկեցությունը: ՀԲԸ Միության հանգանակություններին ամերիկահայերի գործոն մասնակցության համար մեծ խթան էր նաեւ, ինչպես նշվեց, Միության Ամերիկայի մասնաժողովի իրավաբանական նոր կարգավիճակը:

Նշված հանգանակություններին ամերիկահայերի մեծ մասնակցությունը ուներ եւ այլ՝ ազգային-քաղաքական բնույթի պատճառներ: Այն բանից հետո, երբ 1941թ. հունիսի 22-ին նացիստական Գերմանիան պատերազմ սկսեց Խորհրդային Միության դեմ, կտրուկ փոփոխություն կրեցին վերջինիս փոխհարաբերությունները Արեւմուտքի երկրների, նախ եւ առաջ ԱՄՆ-ի եւ Մեծ Բրիտանիայի հետ: Նոր իրավիճակում նրանք մոռացության տվեցին Գերմանիայի հետ Խորհրդային Միության 1939թ. օգոստոսին կնքած հայտնի պայմանագիրը (Ռիբենտրոպ - Մոլոտով պակտը), որի հետեւանքով պատերազմի առաջին՝ մոտ երկու տարիների ընթացքում այդ երկու երկրների միջեւ ստեղծվել էին, ըստ էության, դաշնակցային հարաբերություններ: Արդեն հունիսի 23-ին, տեղեկանալով Գերմանիայի հարձակման մասին, ԱՄՆ-ի կառավարությունը հանդես եկավ հատուկ հայտարարությամբ, որում, նշելով ԱՄՆ-ի համար «կոմունիստական դիկտատուրայի սկզբունքների եւ դոկտրինայի» անընդունելի լինելը, միաժամանակ ասվում էր. «Սակայն, ամերիկյան ժողովրդի առջեւ անմիջաբար կանգնած հարցն այն է, թե կարելի է, արդյոք, հաջողությամբ դիմակայել եւ խափանել աշխարհի նվաճման ծրագիրը... ծրագիր, որն այժմ Հիտլերը հանդգնաբար ջանում է իրագործել: Այդպիսին է իրական հարցը, որ այժմ կանգնած է Ամերիկայի առաջ... Մեր կառավարության կարծիքով, ցանկացած պաշտպանություն հիտլերիզմից, ինչպիսին էլ լինեք նրա ծագումը, կմոտեցնի ներկա գերմանական առաջնորդների տապալումը եւ դրանով իսկ կծառայի հօգուտ մեր սեփական պաշտպանության եւ անվտանգության»: Մեկ օր անց ԱՄՆ-ի նախագահ Ռուզվելտը հաստատեց իր պատրաստակամությունը «...տրամադրել Ռուսաստանին

այն բոլոր օգնությունը, որը մենք կարող ենք»:⁵⁴ ԱՄՆ-ի, ինչպես եւ Մեծ Բրիտանիայի ղեկավարության մասն դիրքորոշման հիմքում այն համոզմունքն էր, որ ողջ պատերազմի ճակատագիրը կախված է լինելու Գրանից, թե կկարողանա, արդյոք, Խորհրդային Միությունը նախ դիմակայել, ապա նաեւ պարտության մատնել Գերմանիային: Երբ պատերազմի առաջին փուլի ընթացքում գերմանական զորքերի հաջողություններին հետևեցին սովետական զորքերի հաղթանակները, Արեւմուտքի երկրների առաջնորդները էլ ավելի կարեւորեցին Խորհրդային Միության՝ որպէս իրենց դաշնակցի, դերն ու նշանակությունը: 1943թ. փետրվարի 23-ին, Ստալինգրադի ճակատամարտից հետո, Ստալինին հղած իր ուղերձում Ռուզվելտը գրում էր. «Միացյալ Նահանգների ժողովրդի անունից ես ցանկանում եմ Կարմիր Բանակին՝ նրա 25-ամյակի առիթով, հայտնել մեր խոր հիացմունքը նրա հիանալի, պատմության մեջ անգերազանցելի հաղթանակներով... Միեւնույն ժամանակ, ես ցանկանում եմ պատշաճը մատուցել ռուս ժողովրդին, որից Կարմիր բանակն առնում է իր ակունքները եւ համարվում մարդկանցով ու մատակարարվում: Ռուս ժողովուրդը նույնպէս իր ողջ ուժերն է տալիս պատերազմին եւ կրում մեծագույն կորուստներ: Կարմիր բանակը եւ ռուս ժողովուրդն են, անկասկած, որ պարտադրեցին Հիտլերի զինված ուժերին՝ զնալ վերջնական պարտության ճանապարհով եւ մշտապէս ձեռք բերեցին Միացյալ Նահանգների ժողովրդի հիացմունքը»:⁵⁵

Խորհրդային Միության ժողովուրդների հերոսական եւ անձնագոր պայքարը հանուն հայրենիքի ազատագրման, Կարմիր բանակի հաղթանակները էապէս ազդեցին նաեւ ԱՄՆ-ի եւ հակահիտլերյան կոալիցիայի մյուս երկրներում հասարակական կարծիքի եւ դիրքորոշումների վրա. անվստահությունն ու կասկածամտությունը բավական արագ փոխարինվեցին հիացմունքով, աջակցության ամենատարբեր դրսեւորումներով: Այդ առումով հատկապէս ուշագրավ էր պատերազմի ազդեցությունը ռուսական գաղթաշխարհի վրա: Ռուսական գաղթաշխարհի առաջացման պատճառներն, ինչպէս հայտնի է, զուտ քաղաքական էին եւ պայմանավորված էին 1917թ. բոլշևիկյան հեղափոխությունից հետո Ռուսաստանի նոր իշխանությունների քաղաքականությամբ, որի արդյունքում մեծ թվով ազնվականներ, հոգեւորականներ, զինվորականներ, մտավորականներ ու գիտնականներ ստիպված եղան գաղթել կամ էլ վտարվեցին հայրենիքից: Բնական է, որ նրանց դիրքորոշումը Խորհրդային Միության, այնտեղ հաստատված վարչակարգի հանդեպ անցած բոլոր տարիների ընթացքում միանշանակ թշնամական էր եւ անհամոզածողական: Այդուամենայնիվ, նրանք նույնպէս խորապէս տպավորված էին իրենց

«դասակարգային թշնամիների» հաղթանակներով: Խիստ կարեւոր էր, այդ առումով, Ստալինգրադյան ճակատամարտը, որը «...սկիզբ դրեց ռուս-խորհրդային հայրենասիրությանը նրանց մեջ: Հատկապէս մեծ էր հարգանքը Կարմիր բանակի հանդեպ, որը իր վրա էր կրում հիմնական հարվածը: Որքան մոտենում էր խորհրդային զենքի հաղթանակը, այնքան ամրանում եւ ընդլայնվում էին այդ հայրենասիրական զգացմունքները: Գաղթաշխարհի մի շարք ականավոր գործիչներ վերանայում էին իրենց վերաբերմունքը Խորհրդային Ռուսաստանի հանդեպ: Թշնամական վերաբերմունքը խորհրդային իշխանության հանդեպ փոխարինվում էր անկեղծ ակնածանքով՝ ժողովրդի ռազմական սխրագործության եւ երկրի զոհողության նկատմամբ: 1945թ. փետրվարի կեսերին ռուս գաղթականությանը պարզապէս ցնցեց Վ.Ա. Մակլակովի խորհրդային դեսպանատուն այցի եւ խորհրդային դեսպան Ա.Ե. Բոգոմոլովի հետ նրա զրույցի մասին լուրը: ...Վասիլի Ալեքսեեւիչ Մակլակովը՝ կադետների կուսակցության առաջնորդներից մեկը, Պետական դումայի անդամ, 1917թ. Ռուսաստանի դեսպանն էր Ֆրանսիայում: Նրա մոտ մնացել էին խոշոր դրամական միջոցներ, եւ նա շատ բան էր արել գաղթականների կյանքը կազմակերպելու եւ կարիքավորներին օգնություն ցուցաբերելու համար: Նրա հեղինակությունը Ֆրանսիայի գաղթականների շրջանում չափազանց բարձր էր»:⁵⁶

Եթե պատերազմը մասն արմատական փոփոխություններ էր բերել ռուս գաղթաշխարհում, ապա առավել եւս բնական պետք է համարել նույն այդ տարիներին սփյուռքահայության բարյացակամ դիրքորոշումը Խորհրդային Միության հանդեպ: Արտասահմանի հայերի համար ո՛չ բոլշևիկյան իշխանությունները եւ ո՛չ էլ Ռուսաստանն ընդհանրապէս, չէին զուգորդվում Թուրքիայի սկսած 1915 թվականից իրականացրած ցեղասպանության եւ բռնազաղթի քաղաքականության հետ, որի արդյունքում նրանք ստիպված էին եղել հեռանալ իրենց հայրենիքից եւ ապաստանել աշխարհի տարբեր երկրներում: Ընդհակառակը, Ռուսաստանն այն երկիրն էր, ուր թե մինչեւ 1914թ. եւ թե Առաջին Համաշխարհային պատերազմի տարիներին տասնյակ հազարավոր հայեր գտան իրենց փրկությունը եւ հենց այդ երկրի հետ էին կապված թուրքական տիրապետությունից ազատագրվելու նրանց հույսերը: Հետագայում, սակայն, հայերը, այդ թվում նաեւ սփյուռքի հայությունը, ստիպված եղան ընդունել, որ Խորհրդային Միության արտաքին քաղաքականությունը սկզբից եւեթ անտեսել է հայ ժողովրդի ազգային շահերը, նախ եւ առաջ ցարական Ռուսաստանին պատկանող Արեւելյան Հայաստանի տարածքները վերադարձնելու հարցում: Եվ, այնուամենայնիվ, նրանք, ինչպէս վերը նշվել

էր Պողոս Նուպարի առիթով, քաջ գիտակցում էին, որ ստեղծված իրավիճակում հայկական տարածքներից հայաբնակ մնացած միակ հատվածը Խորհրդային Հայաստանն է, որի ապահով գոյությունը հնարավոր է միայն Խորհրդային Միության կազմում:

Սակայն գերմանական զորքերի հարձակումը Խորհրդային Միության վրա, վերջինիս պարտությունները պատերազմի սկզբնական շրջանում հարցականի տակ էին դնում նաև նրա մաս կազմող Հայաստանի գոյությունն իսկ: Ակնհայտ էր, որ Գերմանիայի հաղթանակի դեպքում, նրան փաստացի կերպով օժանդակող Թուրքիան կձգտի վերսկսել իր ցեղասպան քաղաքականությունը, այս անգամ արդեն Խորհրդային Հայաստանի եւ ողջ Անդրկովկասի հայերի նկատմամբ: Ուստի եւ օրինաչափ էր արտասահմանի հայերի այդ տարիների դիրքորոշումը Խորհրդային Միության հանդեպ, նրանց պատրաստակամությունը՝ օգնության հասնել թե խաղաղ բնակչությանը եւ թե բանակին:

Ի.Ստալինի ծրագիրը եւ հայերը

Նման տրամադրությունները էլ ավելի ուժեղացան, երբ սկսած 1944 թվականից տարբեր աղբյուրներից ստացվող տեղեկությունները վկայում էին, որ Խորհրդային Միությունը մտադիր է վերանայել իր հարաբերությունները Թուրքիայի հետ՝ նպատակ ունենալով վերադարձնել Ռուսական կայսրության մաս կազմող հայկական տարածքները:

Ինչպես հայտնի է, 1917թ. հոկտեմբերյան հեղափոխությունից հետո ռուս բոլշեիկները, իրենց իշխանությունը պահելու համար դիմեցին տարածքային մեծ զիջումների: Սակայն արդեն 1920-1921թթ. նրանք ձեռնամուխ եղան Ռուսական կայսրության տարածքային սահմանների վերականգնմանը, ինչը եւ հաջողությամբ ավարտեց Ստալինը Երկրորդ Համաշխարհային պատերազմից հետո: Ստալինը մտադրվել էր այլ տարածքների հետ մեկտեղ վերադարձնել նաև Թուրքիային անցած Արևելյան Հայաստանի տարածքը եւ այդ նպատակով Մոսկվայում մշակվել էր հատուկ մի ծրագիր, որում որոշակի դեր էր հատկացված սփյուռքահայությանը:⁵⁷

«Յուշարար» ամսագիրը 1944թ. մայիսի համարում արտատպել էր մի հոդված «Նյու Յորք թայմզ» օրաթերթից, որում, մասնավորապես, ասվում էր. «Խորհրդային կառավարությունը ծրագրած է Մերձաւոր Արևելքի մէջ ընդարձակել իր դիւանագիտական յարաբերութիւններն եւ կապ հաստատել Հայաստանի Սովիէթ Հանրապետութեան եւ Սիւրիոյ ու Լի-

բանանի կառավարութեանց միջեւ: Այս տեսակ ծրագիր մը պիտի վերաբանայ ամբողջ Հայկական հարցը եւ ենթադրել պիտի տայ՝ որ ռուս դիւանագէտներ կ'ուզեն հոգ տանիլ այն հազարաւոր անտուն եւ ցրուած հայոց, որոնք չքաւորութեան ենթարկուած են Մերձաւոր Արևելքի կարգ մը մասերուն մէջ»:⁵⁸ Եվ, իրոք, սկսած այդ ժամանակից՝ Մերձավոր Արևելքի երկրներում աշխատող Խորհրդային դիվանագետները, ի կատարումն Մոսկվայից ստացած հրահանգների, աշխուժացրեցին իրենց շփումները տեղի հայկական համայնքների հետ, նպատակ ունենալով ուսումնասիրել նրանց տրամադրություններն ու դիրքորոշումները, հատկապես Խորհրդային Հայաստան ներգաղթելու վերաբերյալ, ինչպես եւ էլ ավելի խթանել Խորհրդային Միության հետ կապված նրանց ազգային-քաղաքական սպասելիքները:

Դրա հետ մեկտեղ, նրանց կողմից պատրաստվում էր Մոսկվա էին ուղարկվում տեղի հայ բնակչության պատմությանն ու արդի վիճակին վերաբերող մեծ թվով տարբեր բնույթի տեղեկանքներ եւ այլ նյութեր: 1944թ. աշնանը նույն այդ նպատակով այդ տարածաշրջանի երկրներ գործուղվեց նաև Երեւանի Պետհամալսարանի պրոֆեսոր, պատմաբան Աշոտ Աբրահամյանը: Մեծ աշխատանք էր տարվում նաև Երեւանում՝ Հայաստանի Արտաքին գործերի նախարարության փոքրաթիվ աշխատակազմը ձեռնամուխ էր եղել Հայկական հարցի վերաբերյալ տեղեկատուի (թղթածրարի) պատրաստմանը: Այս ամենը վկայում էր, որ Խորհրդային Միության ղեկավարությունը՝ Թուրքիային ներկայացնելիք իր տարածքային պահանջները ձգտում էր հիմնավորել անժխտելի փաստարկներով, հատկապես նկատի ունենալով իր իսկ դաշնակիցների հնարավոր հակազդեցությունը:

Խորհրդային Միության դիվանագետների գործունեությունը, բնական է, մնում էր անհայտ, սակայն, նույն այդ գործունեության ձեւերից էր նաև «տեղեկատվության արտահոսքը», որի արդյունքում թե Հայաստանում եւ թե սփյուռքում, հետզհետե ավելի հաճախակի եւ առավել վստահ սկսեցին խոսել հայկական տարածքների վերադարձման, նոր ներգաղթի մոտալուտ կազմակերպման մասին: Այդ տրամադրությունների տարածմանն ու ամրապնդմանը մեծապես նպաստեց նաև Ամենայն Հայոց կաթողիկոսի տեղապահ Գեորգ արքեպիսկոպոս Չորեքչյանի հանդիպումը Ստալինի հետ 1945թ. ապրիլի 19-ին: Այն տարբեր մեկնաբանությունների արժանացավ ինչպես ժամանակակիցների կողմից, այնպես էլ հետագայում, սակայն արդարացիորեն գնահատվեց որպես պատմական երեւոյթ: Այստեղ նախ հարկ է նշել, որ մինչ այդ՝ 1943թ. սեպտեմբերի 4-ին, տեղի էր ունեցել Ստալինի եւ Մոլոտովի երկարատև

հանդիպումը Ռուս ուղղափառ եկեղեցու առաջնորդների հետ, որի ընթացքում մշակվել էին Ռուս եկեղեցու կանոնադրության ու գործունեության հետ կապված մի շարք կարևոր հարցեր: «...Այն պահին՝ եկեղեցու դեմ տասնյակ տարիների ահաբեկություններից հետո, նոր կարգը, անկասկած, առաջադիմական քայլ էր, քանի որ ուղղափառ եկեղեցու համար նշանակում էր օրինական գոյության հնարավորություն»:⁵⁹ Նույնչափ պատմական էր նաև Ստալինի հանդիպումը Հայ եկեղեցու առաջնորդի հետ, որի արդյունքում ընդունվեցին վերջինիս գործունեության առումով կարևոր որոշումներ, մասնավորապես, հոգևոր ճեմարանի վերաբացումը, սեփական տպարան ունենալու, հոգևոր գրականության, այդ թվում «Էջմիածին» ամսագիրը հրատարակելու իրավունքը, Հոփսիսմե, Գեղարդ եւ Խոր վիրապ վանքերը Ս.Էջմիածին վերադարձնելը, արտասահմանի հայ հոգևորականներին Հայաստան հրավիրելը եւ այլն:⁶⁰ Այս հանդիպումը հնչեղ արձագանք ունեցավ նաև սփյուռքում, ուր ընկալվեց որպես Խորհրդային Միության դեկավարության կողմից իրագործվող նոր քաղաքականության եւս մեկ ապացույց:

1945թ. մայիսին Թավրիզում Խորհրդային Միության Գլխավոր հյուպատոսարանից ստացված տեղեկագրում հատուկ նշվում էր այն ոգևորությունը, որ առաջացրել էր այդ հանդիպումը տեղի հայերի մեջ եւ բերվում էին նրանց կարծիքները. «...իբր, ընկ. Ստալինը իր մոտ է կանչել Չորեքչյանին եւ հանձնարարել է նրան Ազգային ժողովում հարց բարձրացնել Խորհրդային Հայաստանի տարածքների՝ ի հաշիվ Թուրքիայի, ընդլայնման եւ արտասահմանի հայերին Հայաստան մշտական բնակության տեղափոխվելու հնարավորություն տալու մասին...» եւ «...իբր, նախքան հայկական շրջանների վերադարձման հարցը բարձրացնելը եւ արտասահմանի հայերին Խորհրդային Հայաստան տեղափոխվել թույլ տալը, Ստալինը հարկ համարեց այդ հարցերի շուրջ խորհրդակցել Չորեքչյանի հետ...»:⁶¹ Սփյուռքահայերի երեսակայական պատկերացումները այդ հանդիպման մասին, կարծես, հաստատվում էին նաև Հայաստանից ստացվող տեղեկություններով՝ Ս.Էջմիածնում Ազգային եկեղեցական ժողով գումարելու մասին, որը նույնպես Ստալինի հետ հանդիպման ամենակարևոր արդյունքներից էր: Ինչպես նշվում էր վերոբերյալ տեղեկագրում. «...կաթողիկոսի ընտրության նպատակով, պատգամավորների Հայաստան առաջիկա ուղեւորության կապակցությամբ, թեմական խորհրդի նախաձեռնությամբ բոլոր հայերի անունից պատրաստվում է դիմում՝ Խորհրդային կառավարության հասցեով: Այդ դիմումը ստորագրում են բոլոր այն հայերը, որոնք ցանկանում են բնակություն հաստատել Խորհրդային Հայաստանում, եւ այն պատվիրակության կողմից ներկա-

յացվելու է Էջմիածնում: Առ 1/06 1945թ. արդեն հավաքված է 2.000 ստորագրություն»:⁶²

Ստալինը, իհարկե, բնավ էլ մտադիր չէր խորհրդակցել կաթողիկոսի տեղապահի հետ. այդ հանդիպումը պարզապես իր իսկ մշակած սցենարի հերթական դրվագներից էր եւ ոչ ավելին: Նույն այդ սցենարով նախատեսված Ազգային եկեղեցական ժողովը, իր հերթին, պետք է Ստալինին տար լրացուցիչ եւ համոզիչ փաստարկներ՝ հօգուտ Թուրքիային անցած տարածքների վերադարձման: Դա եզակի եւ իր նախադեպը չունեցող երևույթ էր, երբ Ստալինի ծրագրերը համահունչ էին հայ ժողովրդի ազգային շահերի եւ նպատակների հետ: Ինքը՝ Ստալինը, անկասկած, հիանալի գիտակցում էր այդ եւ համոզված էր, որ հայերը, ներառյալ սփյուռքի հայությունը, կարողարացնեն իր հույսերը:

1945թ. հունիսի 16-ին Էջմիածնի հոգևոր ճեմարանի շենքում իր աշխատանքները սկսեց Ազգային եկեղեցական ժողովը, որին մասնակցում էին 102 պատգամավորներ աշխարհի տարբեր երկրներից, ինչպես նաև Խորհրդային Միության եւ Խորհրդային Հայաստանի կառավարությունների ներկայացուցիչներ: Եկեղեցական ժողովի առաջին օրը կաթողիկոսի տեղապահ Գեորգ արքեպիսկոպոս Չորեքչյանի առաջարկությամբ ողջույնի հեռագիր ուղարկվեց Ստալինին, որում, մասնավորապես, ասվում էր. «Ձեր շնորհիվ իրականացվում է հայ ժողովրդի ազատագրությունը եւ հայկական պետականության վերածնունդը, եւ մենք հաստատ հավատացած ենք, որ Ձեր օժանդակությամբ կիրականանան ճնշման ու հալածանքների պատճառով տարագիր դարձած արտասահմանյան հայերի իղձերը, եւ նրանք կվերադառնան իրենց հայրենիքը՝ Խորհրդային Հայաստան»:⁶³

Հունիսի 25-ին, ժողովի վերջին օրը նորընտիր Ամենայն Հայոց կաթողիկոս Գեորգ Զ-ի առաջարկությամբ որոշվեց եւս մեկ հեռագիր հղել Ստալինին, որում ժողովի մասնակիցները, իրենց երախտագիտությունը հայտնելուց զատ, վերստին հույս էին հայտնում, որ «...Խորհրդային Միության պետական եւ քաղաքագիտական իմաստությունը կցտնի նաև միջոց ու ճանապարհ՝ վերացնելու այն անարդարությունները, որին ենթարկվեց մեր ժողովուրդը Առաջին Համաշխարհային պատերազմի ընթացքում»:⁶⁴

Դժվար չէ պատկերացնել ժողովականների ոգևորությունը. ակնհայտ էր, որ նման բովանդակությամբ հեռագրերի հղումը Ստալինին հնարավոր էր միայն իր իսկ՝ Ստալինի համաձայնության եւ հավանության դեպքում, ինչը, իր հերթին, հաստատում էր Խորհրդային Միության մտադրությունը՝ վերադարձնել հայկական տարածքները եւ այնտեղ բնակեցնել արտա-

սահմանից ներգաղթած հայերին: Իսկ որ Խորհրդային Միությունը ի զորու էր իրագործել այդ մտադրությունը, սփյուռքի հայությանը համոզում էր հաղթանակով ավարտված պատերազմը, որի յուրահատուկ արդյունքների ականատեսը եղան նրանք հենց Երեւանում: Եկեղեցական ժողովի պատգամավորներից Պետրոս Թերզյանը ԱՄՆ ուղարկած իր մի հոդվածում գրում էր. «Ամենէն սրտապարար եւ գոհունակութիւն պատճառող մէկ տեսարանն է հազարաւոր գերման գերի զինուորները, որ կ'աշխատին հայ զինուորին հսկողութեան տակ՝ շինելու Երեւանի փողոցները: Ինչեր, ինչեր կ'անցնին մեր մտքերէն եւ իրենց մտքերէն»:⁶⁵

2. Չաքըրը եւ 3. Գավուկյանը Երեւանում

Ժողովի մասնակիցների թվում էին նաեւ ՀԲԸ Միության նեկայացուցիչներ՝ Զանկի Չաքըրը եւ Հայկ Գավուկյանը, որոնք ունեին եւ այլ պատճառներ նման ոգեւորության համար: Այդպիսիք էին նրանց հանդիպումները Խորհրդային Հայաստանի պետական պաշտոնյաների, նախ եւ առաջ, Ժողկոմխորհի նախագահի տեղակալ, Արտաքին գործերի ժողովրդական կոմիսար Սահակ Կարապետյանի հետ, որոնց ընթացքում քննարկվեց երկու կողմերի միջեւ հարաբերությունների վերահաստատման հարցը:

Հատկանշական է, որ այդ հարցը Ա.Կարապետյանը նախապես քննարկեց Եկեղեցական ժողովի առիթով Երեւան ժամանած իրեն գաղափարակից կոմունիստների հետ: Հետաքրքրական է նաեւ, որ թե Ֆրանսիայի Հայ Ազգային Ճակատի ղեկավարներ Մեսրոպ Ասատուրյանն ու Անրի Մարմարյանը եւ թե ԱՄՆ-ում հրատարակվող խորհրդամետ «Լրաբեր» թերթի խմբագիր Պատրիկ Սեյլանը, խոսելով ՀԲԸ Միության մասին, իրատեսորեն են գնահատում նրա դերն ու կարեւորությունը սփյուռքում եւ ընդհանրապես գերծ են մնում՝ ի տարբերություն իրենց իսկ ելույթների ու հրապարակումների, այն որպես «բուրժուական», «կապիտալիստական» կազմակերպություն որակելուց: Ավելին: Ահա մի հատված Ա.Կարապետյանի կազմած գրառումից. «Այնուհետեւ Սեյլանը ասաց, որ Ամերիկայից եկած պատգամավորների թվում է ՀԲԸՄ փոխնախագահ Հայկ Գավուկյանը (ոսմկավար)՝ այդ կազմակերպության ամենազդեցիկ դեմքերից մեկը, որը ՀԲԸՄ նախագահ Գարակոչյանից հանձնարարություն ունի կապվել Հայաստանի ներկայացուցչական մարմինների հետ՝ եւ պարզել Հայաստանի կառավարության վերաբերմունքը ՀԲԸՄ կողմից Խորհրդային Հայաստանին նյութական օգնություն ցույց տալու

նկատմամբ: Եվ ես խնդրում եմ Ձեզ, ասաց Սեյլանը, ընդունել Գավուկյանին, եթե Դուք, իհարկե, մտադիր եք օգտագործել ՀԲԸՄ միջոցները, եւ ես պետք է ասեմ, շարունակեց նա, որ այդ կազմակերպությունը շատ խոշոր՝ մի քանի տասնյակ միլիոններ հաշվվող միջոցների տեր է, եւ հնարավորություն ունի ստեղծել նոր ֆոնդեր, քանի որ նա ամենամեծանշանն է այդ առումով եւ բացի այդ, լավ է տրամադրված Խորհրդային Հայաստանի հանդեպ: ...«Ես ասացի, որ կմտածեմ այդ մասին եւ հնարավոր է կընդունեմ նրան»:⁶⁶

Կառավարության նախագահի տեղակալը խորամանկում էր. ՀԲԸՄ ներկայացուցիչների հետ հանդիպումը արդեն նշանակված էր հաջորդ օրվա համար, իսկ ինքը, իր իսկ խոսքերով, նույնիսկ հասցրել էր ծանոթանալ իրեն դեռեւս չհանձնած ՀԲԸ Միության նախագահ Արշակ Գարակոչյանի նամակին: Եվ այսպես, 1945թ. հունիսի 23-ին Խորհրդային Հայաստանի կառավարության նախագահի տեղակալ Սահակ Կարապետյանը պաշտոնապես ընդունեց որպես Եկեղեցական ժողովի պատգամավորներ Երեւանում գտնվող ՀԲԸ Միության փոխնախագահ Հայկ Գավուկյանին եւ Միության Եգիպտոսի Կենտրոնական Հանձնաժողովի փոխատենապետ Զանկի Չաքըրին: Համաձայն Ա.Կարապետյանի կազմած ծառայողական «խիստ գաղտնի» վերտառությամբ զեկուցագրի, գրույցը ընթացել էր երկու հիմնական հարցի շուրջ: Նախ՝ Հ.Գավուկյանը ներկայացնելով ՀԲԸ Միության հիմնական նպատակներն ու գործունեության ոլորտները եւ հիշեցնելով նրա կողմից Խորհրդային Հայաստանում մինչեւ 1938թ. իրականացված ծրագրերը, դիմում է գրուցակցին. «Սակայն 1937թ. մեր կապը Հայաստանի կառավարության հետ ընդհատվեց եւ վերջինս մեզ համար անհայտ պատճառներով հրաժարվեց օգնություն ընդունել մեր կազմակերպությունից: Մեր Միության նախագահ պարոն Գարակոչյանը հանձնարարել է ինձ պարզել, եթե դա հնարավոր է, այդ հրաժարման պատճառները եւ շփումների վերականգման կարելիությունները»:⁶⁷

ՀԲԸ Միության ղեկավարությունը ութ տարիների ապարդյուն փորձերից հետո, ահա, վերջապես, ստանալու էր իր համար այդչափ կարեւոր հարցի պատասխանը: «Մինչ տված հարցին պատասխանելը,- գրում էր Ա.Կարապետյանը,- ես հարցրի՝ ինչպիսի՞ օգնություն է մտադիր ՀԲԸՄ ցույց տալ Խորհրդային Հայաստանին եւ ինչպիսի՞ն են նրա տրամադրության տակ եղած միջոցները»:

«Գավուկյանը պատասխանեց. «Մենք կարող ենք օգնություն ցույց տալ ինչպես տարադրամով՝ ամերիկյան դոլարի ձեռով, այնպես էլ իրերով եւ սարքավորումներով, նայած ինչն է ավելի հարմար Հայաստանի

կառավարությանը: Այդ նպատակի համար Միության տրամադրության տակ այժմ կա 500.000 ամերիկյան դոլար, բայց այդ գումարը կարող է կրկնապատկվել եւ եռապատկվել: Իսկ Միության ընդհանուր ֆոնդերը կազմում են մի քանի միլիոն դոլար (ես զգացի, որ Գավուկչյանը խուսափում է նշել կոնկրետ թվեր)»:

Իր համար ցանկալի պատասխան ստանալուց հետո միայն Ս.Կարապետյանը վերջապես բացատրում է Խորհրդային Հայաստանում 1937թ. ՀԲԸ Միության գործունեությունը արգելելու պատճառները. «Հայաստանի կառավարության տրամադրության տակ եղած տվյալների համաձայն, ՀԲԸՄ կողմից, սկսած 1921թ., հատկացված գումարները հիմնականում օգտագործվել են ըստ նպատակի, Ձեր նշած շինությունները իսկապես կառուցվել են եւ գոյություն ունեն: Հատկացված միջոցների ընդունման ժամանակավոր դադարեցման պատճառն էր այդ գործում եղած չարաշահումները, որոնք թույլ էին տվել Հայաստանում ՀՕԿ-ի այն տարիների ղեկավարությունը եւ կառավարական մարմիններ սարքած թշնամական տարրերը, որոնք խեղաթյուրում էին Խորհրդային Միության կառավարության քաղաքականությունը եւ չարաշահում էին այդ ազնիվ գործի վրա: Ահա թե ինչու Հայաստանի կառավարությունը անհրաժեշտ համարեց ժամանակավորապես դադարեցնել կապը ՀԲԸ Միության հետ, որպեսզի բացահայտի եւ կարգավորի թույլ տված շեղումները»:⁶⁸

Խորհրդային իշխանությունները առաջին անգամ պաշտոնապես բացատրեցին 1937թ. Հայաստանում ՀԲԸ Միության լուծարման պատճառը: Ս. Կարապետյանի պատասխանը, մի կողմից, արդարացնում էր 1937թ. որոշումը, իսկ մյուս կողմից՝ չէր պարունակում որեւէ մեղադրանք ՀԲԸ Միության հասցեին: Հոգեբանորեն հաշվարկը կատարվել էր ճիշտ՝ նման պատասխանից հետո ՀԲԸ Միության համար այլեւս չկար ոչ մի լուրջ խոչընդոտ Խորհրդային Հայաստանի հետ իր համագործակցությունը վերսկսելու համար: Մնում էր միայն Հայաստանում ՀԲԸ Միության ներկայացուցիչ Հայկազ Գարակոչյանի ճակատագրի հարցը: Ս.Կարապետյանի կազմած փաստաթղթում այդ հարցը չի հիշատակվում, սակայն, նույնիսկ քննարկման դեպքում դժվար չէ կռահել, որ Հ.Գարակոչյան անհատին ՀՕԿ-ի ղեկավարների նման նույնպես կվերագրվեին ինչ-ինչ չարաշահումներ եւ այլ հանցանքներ: Ամեն դեպքում, խորհրդային իշխանությունները ի գորու էին տալ եւ տալիս էին իրենց համար ամենահարմար բացատրությունը:

Ջրույցի ընթացքում քննարկված երկրորդ հարցի՝ Միության կողմից Խորհրդային Հայաստանին ցույց տրվելիք օգնության նախնական քննարկումից հետո որոշվեց, որ Հայաստանի կառավարության նախա-

զահի տեղակալը անհրաժեշտ ապրանքների եւ սարքավորումների ամբողջական ցանկը կներկայացնի ՀԲԸՄ նախագահ Ա.Գարակոչյանին ուղղած իր նամակում: Հատկանշական է, որ Միությունը, նկատի առնելով նախորդ շրջանում ՀՕԿ-ի հետ իր համագործակցության տխուր փորձը, այս անգամ սկզբից եւեթ հրաժարվեց շփվել կառավարության հետ այս կամ այն միջնորդների՝ ԱՕԲՍ-ի (Արտասահմանյան երկրների հետ մշակութային կապի ընկերության), Կարմիր Խաչի եւ այլոց միջոցով:

Այս հանդիպումից յոթ օր անց՝ 1945թ. հունիսի 30-ին, Ս.Կարապետյանը ծավալուն մի նամակ է հղում ՀԲԸՄ նախագահին, որում, մասնավորապես, գրում էր. «Գոհունակությամբ նշելով, որ Սովետական Հայաստանն այժմ միանգամայն ի վիճակի է ինքնուրույն ապահովել իր երկրի ու ժողովրդի հետագա բարգավաճումը, Սովետական Հայաստանի կառավարությունը միեւնույն ժամանակ հնարավոր չի գտնում որեւէ կերպ արգելք հանդիսանալ Ձեր Միության եւ սփյուռքի մեր մյուս հայրենակիցների հայրենասիրական այն ձգտումներին, որոնց նպատակն է օգնություն ցույց տալ Սովետական Հայաստանին՝ նրա շինարարական, ստեղծագործական աշխատանքներում»:⁶⁹ Նամակի հիմնական մասը՝ վերոնշյալ սարքավորումների ցանկն էր, որպիսիք «ցանկալի կլինեք ստանալ առաջին հերթին»՝ ռադիոհաղորդիչ կայաններ, ավտոմատ հեռախոսակայաններ, վերամբարձ մեքենաներ, էքսկավատորներ ու շինարարական այլ մեքենաներ, հիվանդանոցային սարքավորումներ եւ այլն:

Հայաստանի իշխանությունների հետ հարաբերությունների ու համագործակցության վերսկսումը արդեն իսկ վկայում էր Միության հեղինակության եւ բարձր վարկանշի մասին: Ավելին, հունիսի 26-ին Հայաստանի կառավարության շենքում Եկեղեցական ժողովի պատգամավորների համար կազմակերպված ընդունելության ժամանակ Ս.Կարապետյանը, խոսելով Հայաստանին օգնության հարցի շուրջ, ասել էր. «Մենք ունենք կարողություն չունինք եւ չենք սպասեր, սակայն, երբ դուք եղբայրական օգնություն կ'ուզեք ընել՝ մանր բաներ մի ընէք, ըրէք խոշոր բաներ Բարեգործականին պէս եւ ւաւելի շիտակը ՀԲԸ Միութեան միջոցաւ: Մենք պետություն ենք, մեր պետական վարկին համապատասխան բաներ ըրէք»:⁷⁰

Պատմությունը կրկնվում էր՝ խորհրդային իշխանությունները, որոշելով վերականգնել հարաբերությունները սփյուռքի հայության հետ, վերստին ստիպված էին որպես միակ հնարավոր եւ վստահելի գործընկեր ընտրել ՀԲԸ Միությունը: Սակայն, ինչպես եւ նախորդ շրջանում, նույն այդ պարտադրվածության հետեւանքով վստահությունը Միության նկատմամբ սահմանափակ էր: Այդ առումով հատկանշական է հետեւյալ դրվագը Ս.Կարապետյանի եւ ֆրանսահայ կոմունիստների միջեւ վերոհի-

շյալ գրույցից: Արձագանքելով վերջիններիս այն հաստատմանը, որ ՀԲԸՄ-ը միակ կազմակերպությունն է, որ լուրջ միջոցներ ունի, Ս.Կարապետյանը, իր իսկ խոսքերով՝ ասում է. «Ես անմիջապես պատասխանեցի, որ մեր տեսակետից հայկական գաղութներում կուտակված միջոցները նպատակահարմար է օգտագործել ուղղակի նպատակով՝ *օժանդակել հայերին նրանց Հայաստան տեղափոխվելու դեպքում* (ընդգծումը իմն է-Էդ.Մ.): Ցանկալի է, որ ձեր կազմակերպությունը, ասացի ես, սերտ շփման մեջ լինի նրա հետ, իսկ հնարավորության դեպքում իր ձեռքում կենտրոնացնի այդ կարևոր գործը»:⁷¹ Ի տարբերություն դրան, Ս.Կարապետյանը թե Միության ներկայացուցիչների հետ գրույցի ժամանակ եւ թե նրա նախագահ Ա.Գարակչոյանին հասցեագրած նամակում, այդ հարցը ընդհանրապես չի հիշատակում: Տվյալ դեպքում նա խստորեն հետևում էր օրենքի ստաի՞ն՝ հայերի ներգաղթի մասին դեռևս չէր եղել եւ ոչ մի պաշտոնական հայտարարություն:

Իր հերթին Միության նախագահը, կարծես, ընդունելով խաղի նման կանոնները, նույնպես շրջանցում է այդ հարցը եւ իր հրապարակած պաշտոնական զեկույցում՝ ի պատասխան Ս.Կարապետյանի նամակի, շեշտը դնում է Հայաստանի վերաշինությանը օժանդակելու կարելորության վրա: Անդրադառնալով Հայաստանի կառավարության նախագահի տեղակալի կողմից ներկայացված անհրաժեշտ իրերի ցուցակին, նա նշում էր. «Մատնանշուած ապսպրանքները կարծածէն աւելի բազմադիմի են, որոնց լրիւ գոհացում տալու համար վատահաբար աւելի քան մէկ միլիոն տոլար պէտք կ'ըլլայ ծախսել: Մինչդէռ այս տարուան Կէս Միլիոն Տոլարի Հանգանակութեան կէտովը հազիւ ուզուած մեքենաներուն, գործիքներուն եւ այլ իրեղէններուն մէկ մասը միայն կարելի է Հայաստան դրկել, սկսելով ամէնէն աւելի սոխպողականներէն: Բայց, տարակոյս չունիմ թէ ամէն ազգասէր հայու սրտին կը խօսի այդ կոչը եւ յոյսն ունիմ որ պիտի գտնուին Հայրենակցական Միութիւններ եւ վեհոգի հայրենասէրներ որ պիտի փութան այս կամ այն մեքենային կամ սարքաորումին ծախքը ստանձնել, սիրայօժար, յօրինակ այլոց»:⁷²

**Ի. Ստալինի համառությունը.
1945թ. որոշումը ներգաղթի մասին**

Այդ ընթացքում Ստալինը իրեն հատուկ հետևողականությամբ շարունակում էր հետապնդել Թուրքիային անցած տարածքների վերադարձման հարցը: 1945թ. մարտի 19-ին Թուրքիայի հետ 1921թ. բարե-

կամության մասին պայմանագիրը չեղյալ հայտարարելուց հետո, նույն տարվա հունիսի 22-ին Թուրքիայում Խորհրդային Միության դեսպան Ս.Վինոգրադովը թուրքական կառավարությանը հայտնեց, որ իր երկիրը պատրաստ է նոր պայմանագիր կնքել Թուրքիայի հետ այն դեպքում, եթե վերանայվի Մոնտրեի համաձայնագիրը նեղուցների մասին եւ եթե Կարսը, Արդահանը եւ Արդվինը վերադարձվեն Խորհրդային Միությանը՝ ի դեմս Խորհրդային Հայաստանի եւ Վրաստանի:⁷³ Դրանից մտո մեկ ամիս անց՝ հուլիսի 17-ին Պոտսդամում հաղթանակած դաշնակիցների հերթական եւ վերջին կոնֆերանսում Արտաքին գործերի ժողկոմ Վ.Մոլոտովը ԱՄՆ-ի եւ Մեծ Բրիտանիայի ղեկավարներին հայտնեց նույն այդ տարածքները վերադարձնելու մտադրության մասին: Մեծ Բրիտանիայի Արտաքին գործերի նախարար Է.Իդենի հետ տարածքների հարցը քննարկելիս, Մոլոտովը փաստարկեց այն շուրջ 1 մլն սփյուռքահայերի մեծ մասի Խորհրդային Հայաստան ներգաղթելու ցանկությամբ, որը անհրաժեշտաբար պահանջում է նրա տարածքի ընդարձակում՝ ի հաշիվ Թուրքիային անցած շրջանների:⁷⁴ Սակայն Արեւմուտքի երկրները, որոնք արդեն իսկ մտահոգված հետևում էին Խորհրդային Միության ռազմաքաղաքական ազդեցության հաստատմանը Արեւելյան Եվրոպայում, բնավ էլ մտադիր չէին համաձայնվել նրա տարածմանը նաեւ դեպի հարավ: Մի բան, որը եվրոպական երկրների արտաքին քաղաքականության հիմնական նպատակներից էր ողջ XIX դ. ընթացքում:

ԱՄՆ-ի եւ Մեծ Բրիտանիայի նման դիրքորոշումը, սակայն, չազդեց Ստալինի վճռականության վրա. Թուրքիայի հետ սահմանամերձ շրջաններում սկսվեցին համապատասխան ռազմական պատրաստություններ, սկսեցին մշակվել նաեւ որոշակի ծրագրեր՝ կապված վերադարձվելիք տարածքների ղեկավարման հետ: Այդ իմաստով ուշագրավ է հետևյալ փաստը:

1945թ. նոյեմբերի վերջին Գիտությունների ակադեմիայի հրավերով Մոսկվայից Երեւան է ժամանում հայտնի պատմաբան, գրականագետ եւ արվեստաբան պրոֆեսոր Ա.Ջիվիլեգովը: Եվրոպական երկրների պատմության խոշոր մասնագետ լինելով հանդերձ, նա դեռևս մինչ 1917թ. բոլշեիկյան հեղափոխությունը հրապարակել էր Արեւմտյան Հայաստանի քաղաքական պատմությանը նվիրված մի շարք աշխատություններ: Երկար ընդմիջումից հետո՝ 1945թ., Մոսկվայում նրան, հասկանալի պատճառներով, հանձնարարվում է պատրաստել հրապարակային դասախոսություն՝ «Հայաստանը եւ Թուրքիան» վերնագրով: Երեւանում Ա.Ջիվիլեգովը հանդիպում է նաեւ Արտաքին գործերի ժողկոմ Ս.Կարապետյանին, որին էլ պատմում է գնացքում Պաշտպանության ժողկոմի-

սարիատի բարձրաստիճան մի գեներալի հետ իր գրույցի մասին: «Գեներալ Չեսնիխը իր հետ կուպեում ուներ Անդրկովկասի մեծ մասշտաբի քարտեզ՝ խորհրդա-թուրքական սահմանից այն կողմի վրա արած տարբեր նշումներով: Իմանալով իմ ով լինելը, գեներալը մեծ վստահություն դրսևորեց իմ հանդեպ ... Չեսնիխը ասաց, որ գնում է Երևան, ուր պետք է հանդիպի զինվորական եւ քաղաքացիական պատասխանատուների հետ՝ տարածքային պահանջների հարցով: Զրույցի ժամանակ գեներալը փոխանցեց ինձ քարտեզը եւ ասաց. «Ապա, գծեք, ինչպե՞ս կանցկացնեիք նոր սահմանը Խորհրդային Միության եւ Թուրքիայի միջև»: Ես դա ընդունեցի որպես կատակ եւ ասացի. «Իրագե՞լ եմ, արդյոք, ես այդ հարցում»: Չեսնիխը պատասխանեց. «Իսկ ինչու չասել անձնական կարծիքը, Դուք Հայկական հարցի լավ գիտակ եք...»: Իմ կարծիքով, ասացի ես, Սեւ ծովի ծովափում սահմանը պետք է անցնի Տրապիզոնի շրջանով: Գեներալը անմիջապես ընդհատեց ինձ եւ ասաց. «Իսկ ինչո՞ւ եք Դուք դուրս թողնում Տրապիզոնը, իմ կարծիքով, այն պետք է լինի սահմանից այս կողմ»: Ես պատասխանեցի դրան. «Այդ դեպում մտցրեք նաեւ Էրզրումը եւ Բայբուրտը»: Չեսնիխը ամենայն լրջությամբ պատասխանեց. «Իհարկե, իսկ ինչու ոչ»: Չթաքցնելով ուրախությունս՝ ես հարցրի, իսկ ինչպիսի՞ն կլինի սահմանը Վանա լճի շրջանում: Նա պատասխանեց, որ այն կանցնի լճից դեպի հյուսիս: Իմ այն բացականչությանը, որ նշանակում է, թե լիճը կմնա սահմանից այն կողմ, Չեսնիխը նկատեց. «Ըստ ամենայնի, այդ, բայց փոխարենը Ալաշկերտի հարթավայրը, Բայազետը կմնան սահմանից այս կողմ»: ... Չեսնիխի հետ գնում էր բարձրաստիճան սպաների մի մեծ խումբ...»:75

Ստալինի մշակած ծրագրում, դիվանագիտական եւ ռազմական գործողություններից զատ, ինչպես նշվեց, հատուկ տեղ էր հատկացվում նաեւ արտասահմանի հայերի ներգաղթին: Եվ, ահա, 1945թ. նոյեմբերի 21-ին Խորհրդային Միության կառավարությունը ընդունեց հետևյալ որոշումը:

«Ի նշանավորումն Հայաստանում Սովետական իշխանության հաստատման 25-ամյակի, ՍՍՀՄ Ժողովրդական Կոմիսարների Խորհուրդը որոշում է.

1. Նկատի առնելով արտասահմանում ապրող հայերի դիմումները հայրենիք՝ Սովետական Հայաստան վերադառնալու թույլտվության մասին եւ Հայաստանի ՍՍՀ ղեկավար մարմինների միջնորդությունը, թույլատրել ՀՍՍՀ Ժողովրդական կոմիսարների խորհրդին կազմակերպել արտասահմանյան երկրներում ապրող հայերի վերադարձը հայրենիք, որոնք այդ մասին ցանկություն են հայտնել:

2. Ընդունել Սովետական Հայաստանի կառավարության առաջարկությունը՝ Հայաստանի Ժողովրդին առընթեր արտասահմանից ներգաղթող հայերի ընդունման եւ տեղավորման Կոմիտե ստեղծելու մասին:

3. Հանձնարարել Սովետական Հայաստանի Ժողովրդին արտասահմանից հայրենիք վերադարձող հայերի բնակարանային անհատական շինարարությունն ապահովել պետական վարկով՝ տան արժեքի 50% չափով:

4. Արտասահմանից ՍՍՀՄ վերադարձող հայ քաղաքացիներին ազատել մաքսային տուրքերից՝ իրենց պատկանող եւ բնակության նոր վայր տեղափոխվող գույքի համար:

ՍՍՀՄ Ժողովրդական Կոմիսարների Խորհրդի նախագահ Ի.Ստալին»76

Եթե մինչեւ Ստալինի այս որոշումը, Թուրքիայի նկատմամբ տարածքային պահանջներն արվում էին միայն Խորհրդային Միության ամենաբարձր ղեկավարության կողմից, ապա այն հրապարակելուց հետո նմանատիպ հայտարարություններով հանդես գալու հնարավորություն, եթե ոչ պարտավորություն, ստացան նաեւ Հայաստանի իշխանությունները: Ծուրջ երկու ամիս անց՝ 1946թ. փետրվարի 3-ին «Սովետական Հայաստան» պաշտոնաթերթը հրապարակեց Հայաստանի Կոմկուսի առաջին քարտուղար Գրիգոր Հարությունյանի ճառը, որի հիմնական մասը նվիրված էր այդ հարցերին: Խոսելով հայ ժողովրդի համար Խորհրդային Միության կառավարության որոշման պատմական նշանակության, արտասահմանի հայության կողմից այն խանդավառությամբ ընդունելու մասին՝ Գր.Հարությունյանը, նշում էր.

«...Մենք առաջիկա տարիներում Հայաստանի ներկայիս տերիտորիայում կարող ենք ընդունել մաքսիմում 350-400 հազար մարդ: Այնինչ, ցանկացողները ավելի շատ են: Մենք ինչպե՞ս պետք է վարվենք մնացածների հետ: Մնացած 500-600 հազար հայերին ընդունելու համար, մենք հարց ենք դնում, որ Սովետական Հայաստանին վերադարձվեն Թուրքիայի կողմից զավթված հայկական մարզերը:

«Միայն այդ պայմանով մենք կկարողանանք ընդունել բոլոր ցանկացող հայերին: Իսկ նրանց մերժելու մենք ոչ մի բարոյական իրավունք չունենք: Դա է ներկայումս Թուրքիայի ձեռքին գտնվող հայկական մարզերը Սովետական Հայաստանին վերադարձնելու հարցի այժմեականությունը: Մենք հաստատականորեն կձգտենք մեր առաջադրած հարցի դրական լուծմանը, նկատի առնելով նրա այժմեականությունը»:⁷⁷

Դժվար է ասել, քե ինքը՝ Գ.Հարությունյանը, հավատում էր, արդյոք, իր թերած թվերին, քանզի ըստ դրանց, Խորհրդային Միության սահման-

երրորդ անընդմեջ հանգանակությունն էր, որ անցկացվելու էր ընդամենը երկու- երեք տարիների ընթացքում: Հանգանակվող գումարը՝ գրեթե ամբողջությամբ, այս դեպքում եւս պետք է ապահովեր ամերիկահայությունը, ինչը, նկատի առնելով նրա աննախադեպ չափը՝ մեկ միլիոն դոլար, հանգանակության հաջող իրականացումը դարձնում էր չափազանց բարդ մի խնդիր: Նման պայմաններում Միությունը իր հաջողության երաշխիքը համարեց համապատասխան միջոցառումների ծրագրավորումն ու նախապատրաստումը, աշխատանքի բաժանումը ըստ շրջանների եւ ոլորտների: Հանգանակությունը կազմակերպելու նպատակով ստեղծվեց Հանգանակիչ Կենտրոնական Հանձնախումբ, որը գլխավորեց Միության փոխնախագահ Լեոն Կերտանը, իսկ զանազապահի պատասխանատու պաշտոնը ստանձնեց՝ հակառակ իր տկարության, անվերապահ վստահություն վայելող Միհրան Գարակոչյանը: Նկատի առնելով քարոզչական աշխատանքի կարեւորությունը՝ ստեղծվեց նաեւ Բրոպականտի Յանձնախումբ, որի գործունեության մասին «Յուշարար»-ը գրում էր. «Ամերիկահայ մամուլը, ամխտիր, մասնատր թիւեր նուիրեց եւ էջեր տրամադրեց Միլիոն Տոլարի հանգանակութիւնը յաջողցնելու համար: Եօթանասուն հայ մտաւորականներ եւ ազգային առաջնորդներ ներշնչող յօդուածներ ստորագրեցին եւ հայրենասիրութեան եւ զոհաբերութեան ոգին արծարծեցին, ընդառաջ երթալով Բրոպականտի Յանձնախումբին խնդրանքին: Ծանուցումներու, յայտարարութեանց մեծ ու փոքր թուղիկներու պատրաստութիւնը այս խումբը կատարեց»:⁸¹ Ինչպէս եւ նախորդ հանգանակությունների դեպքում, այս անգամ եւս հանգանակության հաջողությունը պայմանավորված էր Միության բոլոր մասնաճյուղերի աժխույժ եւ հետեւողական աշխատանքով: Այդ առումով ՀԲԸ Միության 1946թ. տարեգրքում հատկապէս կարեւորելով որոշ՝ Կալիֆորնիայի, Նյու Յորքի, Նյու Ինգլանդի շրջանակային հանձնաժողովների աշխատանքը, հատուկ նշվում էր. «Մասնաճիւղերուն մէջ առաջին տեղը կը գրաւէ Տիթթոյթը իր 110.000 տոլարի մասնակցութեամբ»:⁸² Այստեղ հանգանակիչ հանձնախմբի նախագահն էր նախորդ հանգանակություններից հայտնի, նույն Ալեք Մանուկյանը:

Ներգաղթի Մեկ Միլիոնի Հանգանակությունը, որը սկիզբ առավ 1946թ. ապրիլին եւ ավարտվեց 1947թ. հունիսին, պատկերաց արտակարգ, իսկ ոմանց համար անսպասելի մեծ հաջողությամբ: ԱՄՆ-ում, Կանադայում եւ Հարավային Ամերիկայի երկրներում հանգանակության արդյունքն էր 1.073.810 դոլար, իսկ այլ երկրներում (Ֆրանսիա, Եգիպտոս, Հունաստան, Անգլիա, Իտալիա եւ այլն)՝ 339.232 դոլար: Ինչպէս նշվում էր Միության տեղեկագրում, այդ արդյունքը «...ոչ միայն պատիւ կը բե-

րէ մեր ժողովուրդին ազգային գիտակցութեան, այլ եւ գոհունակութեամբ կը լեցնէ մեր Միութիւնը, որ զայն կազմակերպեց եւ ղեկավարեց, եւ մեզի իրենց թանկագին գործակցութիւնը բերող բոլոր հայ կազմակերպութիւններն ու մարմինները»:⁸³

Ամերիկայի երկրներում հավաքած գումարը բաշխվել էր հետեւյալ կերպ. Հայաստան, Ներգաղթի կոմիտեին՝ վարձված շոգենավերի համար 700.000, վեց էքսկավատորների եւ հագուստեղենի համար՝ 92.642, տարբեր երկրների ներգաղթի հանձնախմբերին փոխադրության եւ հագուստեղենի համար, այդ թվում, Իրան՝ 110.041, Լիբանան՝ 91.486, Սիրիա՝ 33.750, Բուլղարիա՝ 14.358, Հունաստան՝ 10.039, Ռումինիա՝ 5.429, եւ մոտ 26.000 դոլար ինչ հագուստեղենի եւ կազմակերպական տարբեր տեսակի ծախսերի համար: 1946թ. նշված երկրներից Խորհրդային Հայաստան ներգաղթեցին 51.060 մարդ:⁸⁴

1947թ. ապրիլին ՀԲԸ Միության Կենտրոնական Վարչությունը Հայաստանի Միմիստրների Սովետի (1946 թվականից այսպէս էր կառավարության պաշտոնական անվանումը) նախագահի տեղակալ Ս.Կարապետյանից ստացավ հետեւյալ հեռագիրը. «Ստացումս տեղեկութիւնների եւ մամուլի հաղորդումների համաձայն, յաջողութեամբ աւարտել էք Ներգաղթի Մեկ Միլիոն Տոլարի հանգանակութիւնը: 1947 թուի ներգաղթի աշխատանքներն արդէն սկսուած են եւ այս տարի նախատեսուած է ներգաղթ կատարել նաեւ Ֆրանսիայից, Եգիպտոսից, Հարաւային եւ Հիւսիսային Ամերիկայից: Յունաստանից նախատեսուած է հիմնականում աւարտել այնտեղ մնացած հայութեան ներգաղթը:

Խնդրում ենք նաւերի փոխադրավարձն ապահովելու համար տեղափոխել Հայաստանի կառավարութեան թիւ 24001 ընթացիկ հաշուին Սովետական Միութեան Պետական պանքի Հայաստանի գրասենյակում 800.000 տոլար»:⁸⁵

Միության Կենտրոնական Վարչությունը դեռ շարունակվող հանգանակության արդեն պատրաստի գումարից անմիջապէս Մոսկվա փոխանցեց 400.000 դոլար: Սակայն, նկատելով նոր ներգաղթի հետ կապված ծախսերը, որոշվում է նաեւ նույն 1947թ. ձեռնարկել եւս մեկ, այս անգամ Կես միլիոն դոլարի հանգանակություն:

Հայկական Համաշխարհային Կոնգրեսը եւ նոր հանգանակությունը

Գրեթե այդ նույն օրերին՝ ապրիլի 30-ից մայիսի 4-ը, Նյու Յորքում կայացավ Հայկական Համաշխարհային Կոնգրեսը, որը դիմեց նորաստեղծ Միացյալ Ազգերի Կազմակերպությանը, խնդրելով «...հայոց հողային պահանջները դնել Միացյալ Ազգերու օրակարգին վրայ եւ արդար ու հաստատական վճիռով մը՝ ազատագրել տակաին թրջական լուծին տակ գտնուող Ռիխտնի սահմանագծած հայապատկան երկրամասը, եւ վերադարձնել զայն իր օրինաւոր տիրոջ՝ Հայկական Հանրապետութեան»⁸⁶։

Կոնգրեսի ավարտից հետո նրա պատվիրակությունը հանդիպեց ԱՄՆ-ի Պետքարտուղարի տեղակալ Դին Էչիսոնի (1948թ. նախագահական ընտրություններից հետո նա գլխավորեց երկրի արտաքին քաղաքականության գերատեսչությունը) հետ։ Նկատի առնելով ինչպես Կոնգրեսի, այնպես էլ այդ հանդիպման կարեւորությունը՝ Նյու Յորքում Խորհրդային Միության Գլխավոր հյուպատոս Յակով Լոմակինը՝ ՍՍՀՄ Արտաքին գործերի մինիստր Վ.Մոլոտովին հղեց հատուկ մի հաղորդագրություն, որում գրում էր. «Պատվիրակությունը Էչիսոնին ներկայացրեց Հայկական Համաշխարհային Կոնգրեսի հուշագիրը՝ տարածքային հարցի վերաբերյալ եւ իր դիմումը։ Դիմումի մեջ պատվիրակությունը խնդրում էր պաշտպանել հայերի իրավացի պահանջը «Թուրքիայից հայկական հողերի եւս վերցնելու եւ հայ ժողովրդին հանձնելու մասին»։ Էչիսոնը ...հարցրեց պատվիրակներին՝ ինչ են պատրաստվում անել հայերը այդ տարածքների հետ եւ չեն ցանկանում, արդյոք, նրանք ստեղծել ինքնուրույն հայկական պետություն՝ ՄԱԿ-ի հովանու ներքո։ Ներսյան եպիսկոպոսը պատասխանեց, որ հայերը ցանկանում են այդ տարածքները կցել Խորհրդային Հայաստանին։ ...Էչիսոնը այդ պատասխանից շփոթվեց եւ տարակուսանքով հարցրեց՝ արդյոք բոլոր հայերը (այդ թվում նա, ըստ երեւույթին, նկատի ուներ նաեւ պատվիրակության անդամներին) կոմունիստներ չեն, որ նման պահանջ են առաջ քաշում եւ մտադիր են տեղափոխվել Խորհրդային Հայաստան։ Այնուհետեւ Էչիսոնը հայտարարեց, որ Պետդեպարտամենտը չի կարող ընդունել նման պահանջը, քանի որ դա ինքնասպանություն կնշանակեր ԱՄՆ-ի արտաքին քաղաքականության համար»⁸⁷։

Այլ պատասխան չէր էլ կարող լինել արդեն սկսված սառը պատերազմի պայմաններում, որի նպատակն էր՝ ամերիկյան հայտնի հրապարակախոս Ուոլտեր Լիպմանի խոսքերով, «...կասեցնել Ռուսաստանի

կողմից իր ազդեցության ոլորտի ընդարձակումը ...իսկ այնուհետեւ, պարտադրել Ռուսաստանին սեղմել այդ ոլորտը»⁸⁸։ Դրա ապացույցն էր Հայկական Կոնգրեսի նախօրեին՝ 1947թ. մարտին ԱՄՆ-ի նախագահ Հերի Թրումենի հայտարարած «Վարդապետությունը» (Թրումենի դոկտրինը), որով երաշխավորում էր Թուրքիայի եւ Հունաստանի տարածքային ամբողջականությունը։ Այնուամենայնիվ, կարելի էր հասկանալ նաեւ հայերին։ Ստալինի քաղաքականությունը եզակի հնարավորություն էր ստեղծում իրենց հայրենի տարածքների գոնե մի մասը վերադարձնելու համար, եւ հանուն դրա իրագործման նրանք ոչ թե ի վիճակի չէին, այլ պարզապես չէին ցանկանում հաշտվել իրենց հույսերի վրա խաչ քաշող քաղաքական նոր իրողության հետ։

Հայկական Կոնգրեսի աշխատանքներին մասնակցեցին սփյուռքի բոլոր քաղաքական կազմակերպությունները, բացառությամբ Դաշնակցության, որը շատ արագ արձագանքեց «սառը պատերազմի» ազդակներին եւ վերստին՝ պատերազմյան տարիների ընդմիջումից հետո, որդեգրեց իր համար ավանդական կոշտ հակախորհրդային կեցվածքը։ Ի տարբերություն Կոնգրեսի մասնակիցների, վերադարձված տարածքների վրա, ըստ Դաշնակցության, պետք էր ստեղծել Խորհրդային Միությունից անկախ հայկական պետություն։ Եվ, կարծես, այդ տարբերակը ավելի շահեկան էր՝ հիշենք Դ.Էչիսոնի խոսքերը։ Բայց դրանք լոկ պարսապ խոսքեր էին, իսկ իրողությունը Հ.Թրումենի դոկտրինն էր, որն էլ ձախողեց Ստալինի մտադրությունները։

ՀԲԸ Միությունը նույնպես չմասնակցեց կոնգրեսի աշխատանքներին, բայց լրիվ այլ պատճառով։ Պատասխանելով այդ առիթով հնչած քննադատությանը՝ Միության վարիչ-պատվիրակ Վ.Մալեգյանը հիշեցնում էր, որ «Հիմն. Կանոնագիրը ՀԲԸ Միութեան կ'արգիլե քաղաքական ռեւէ գործունեություն եւ այդ հիման վրայ է որ հարկադրուած է գործել այս երկրին մէջ, հարկազերծ ըլլալ իր գուտ բարեսիրական հանգամանքին շնորհիւ։ Այլապէս, Միութիւնը սիրայօժար փութկոտութեամբ պիտի ուզէր մասնակցիլ յառաջիկա... գումարուելիք Համագաղութային Քոնկրեսին, որուն օրակարգի կարեւորագոյն խնդիրը ամէն հայու սրտին կը խօսի գերադրապէս»։ Բերելով այս ծանոթ փաստարկները՝ Վ.Մալեգյանը միեւնույն ժամանակ, կարծես, հասկացնել էր տալիս դրանց ձեւական լինելու հանգամանքը. «...Միութեան անդամները ազատ են Քոնկրեսի աշխատութեանց մասնակցելու սուկ անհատական հանգամանքով»⁸⁹։ Օգտվելով, ահա, այս հնարավորությունից (եւ, անշուշտ, Միության ղեկավարության համաձայնությամբ), Մեկ Միլիոնի Հանգանակության նախագահ Լեւոն Կերտանը հանդես եկավ զեկուցումով՝ Կոնգրեսի մայիսի 1-ի նիս-

տին, որը նվիրված էր հայրենադարձության խնդիրներին: Հայկական Կոնգրեսի որոշմամբ, ներգաղթող իրականացնելու նպատակով մինչև 1950թ. պետք է հանգանակվեր եւս 5 մլն դոլար, այդ թվում 1 մլն՝ նույն 1947թ.: Արդյունքում՝ ՀԲԸ Միության Կենտրոնական Վարչական Ժողովը, «ընդատաջ երթալով ժողովրդային խաւերու եւ մանաւանդ Համաշխարհային Հայկ. Բոնկրեսին կողմէ արտայայտուած բաղձանքներուն, որոշում կայացուց որ Կէս Միլիոն Տոլարի յաւելուածական հանգանակութիւնը բարձրացուի Մէկ Միլիոն Տոլարի, այն ակնկալութեամբ որ այդ գումարը մինչեւ տարելէրջ ապահովուի»:⁹⁰

Նոր հանգանակության նախատեսած ժամկետները շատ հեռու էին իրատեսական լինելուց: Ամենից լավ դա հասկանում էին հենց իրենք՝ ՀԲԸ Միության ղեկավարները, քանզի դեռ չէր հայտարարվել Առաջին Մեկ Միլիոնի հանգանակության ավարտման մասին: Ակնհայտ էր, որ նոր՝ Երկրորդ Մեկ Միլիոնի Հանգանակությունը հնարավոր էր ձեռնարկել միայն 1947 աշնանը, ոչ շուտ: ՀԲԸ Միության նորանշանակ Ընդհանուր տնօրեն Գ.Կիրակոսյանը Ներգաղթի կոմիտեի նախագահ Բ.Աստվածատրյանին հասցեագրած իր նամակում գրում էր. «Ի մօտոյ պիտի ձեռնարկենք Երկրորդ Միլիոն Տոլարի հանգանակութեան, որուն բացումը քանի մը օրէն կը յայտարարուի մեր Նախագահին կոչով եւ որուն համար նախապատրաստական աշխատութիւնները յառաջ կը տարուին մեծ փութաջանութեամբ: Ժողովուրդին համար թէեւ քիչ մը ծանր է, 5-6 տարիէ ի վեր, առանց ընդմիջումի, հանգանակութեանց իր բաժինը բերել, մանաւանդ երկու վերջիններուն... բայց մեր Միութիւնը ամէն ջանք ի գործ պիտի դնէ որպէսզի դարձեալ յաջողի գոյացնել առաջադրուած Երկրորդ Միլիոն տոլարի գումարը»:⁹¹

Հանգանակությունը սկսվելուց մոտ մեկ տարի անց՝ 1948թ. հունիսին, Միությունը ամփոփեց նախնական, ոչ լրիվ արդյունքները, որոնց համաձայն ԱՄՆ-ում եւ Կանադայում հավաքված գումարը կազմում էր շուրջ 331.130 դոլար: Այդ գումարից 100.000, ինչպես նաև 6 էքսկավատոր (դրանց ընդհանուր քանակը կազմեց 11), մեծ քանակությամբ հագուստ, կոշիկ, կաթի փոշի եւ այլն, նույն տարում ուղարկվեց Հայաստան: Ակնհայտ էր, սակայն, որ լավագույն դեպքում վերջնական արդյունքը չէր գերազանցելու կես միլիոնը, ինչը հաստատում էր Միության իրատեսությունը, երբ նա սկզբնապես՝ մինչ Հայկական Կոնգրեսի որոշումը, նախատեսում էր հանգանակել հենց այդքան գումար:

Սառը պատերազմի դրսևորումները

Եվ այնուամենայնիվ, կարելի՞ է, արդյոք, սփյուռքահայերի, առաջին հերթին, ամերիկահայերի նվազող մասնակցությունը բացատրել անընդմեջ հանգանակությունների փաստով միայն: Չժխտելով դրա կարևորությունը՝ այդուհանդերձ, հարկ է նկատի առնել նաև այլ, արտաքին բնույթի եւ առավել ազդու գործոնների ազդեցությունը:

Սկսված սառը պատերազմի պայմաններում որոշ երկրների իշխանությունները խիստ բացասաբար էին վերաբերում իրենց քաղաքացիների արտագաղթին Խորհրդային Միություն, ինչը ունենում էր ամենատարբեր դրսևորումներ: Այսպես, 1947թ. հոկտեմբերին մի խումբ բոստոնահայերի Հայաստան արտագաղթելու առիթով Հայ Առաջադիմական Լիգան որոշել էր ընդունելություն կազմակերպել տեղի հյուրանոցներից մեկում: Վերջին պահին, սակայն, հյուրանոցի տերը հրաժարվում է ընդունել հայերին՝ հայտարարելով, թե չի ցանկանում գործ ունենալ ամերիկյան քաղաքացիությունից հրաժարված մարդկանց հետ: Ավելին, նրա խնդրանքով տեղի ոստիկանապետը հայերի մուտքը հյուրանոց արգելելու նպատակով այնտեղ է ուղարկում մահակներով եւ արցունքաբեր նոսակներով զինված 150 ոստիկան: Միաժամանակ նույն նպատակով ցույց են կազմակերպում պատերազմի վետերանները, որոնք ԱՄՆ-ի նախագահին, պետքարտուղարին եւ Հետաքննության դաշնային բյուրոյի տնօրենին հղած իրեց հեռագրերում պահանջում էին երկրից անմիջապես արտաքսել, որպես դավաճանների, այն հայերին, որոնք Հայաստան արտագաղթելու կապակցությամբ պարտադրաբար հրաժարվել էին ամերիկյան նպատակությունից: Նույն պատճառաբանությամբ մի շարք ամերիկյան թերթեր թշնամական դիրք էին զբաղեցրել արտագաղթող հայերի հանդեպ եւ իրենց հողվածներում կառավարությունից պահանջում էին ոչ միայն արտաքսել հայերին, այլև բռնագրավել նրանց պատկանող ողջ գույքը:⁹² Նման վերաբերմունքի ամենաձայրահեղ դրսևորումներից էր Համբարձում Չոլակյանի գործը, որին իշխանությունները թույլ չտվեցին Հայաստան տանել իր երեք զավակներին:⁹³

Արտագաղթող հայերի նկատմամբ անբարյացակամ վերաբերմունք էր դրսևորվում նաև այլ երկրներում: Իրանի կառավարությունը, որը 1947թ. ապրիլին թույլատրել էր հայերի արտագաղթը Հայաստան, հետագա ամիսներին նախ արգելեց ընտանի կենդանիների արտահանումը, ինչը ուղղված էր իրանահայ գյուղացիության դեմ, իսկ այնուհետև, ընդհանրապես արգելեց հայերի ներգաղթը Հայաստան: Ստեղծված պայմաններում Իրանում Խորհրդային Միության դեսպանատունը ստիպված

Էր հայտարարել 1947թ. ներգաղթի դադարեցման մասին: Մինչդեռ, Իրանի իշխանությունները, ձգտելով խախտել տեղի հայերի հավատը ներգաղթի հանդեպ, մի կողմից հայտարարեցին, թե ներգաղթը դադարեցվել է հենց իսկ Խորհրդային Միության կողմից, իսկ մյուս կողմից՝ այլևայլ հավածանքների ենթարկեցին երկրի հյուսիսում՝ Իրանական Ադրբեջանում բնակվող հայերին: Այդ ամենի արդյունքում ներգաղթել ցանկացող շուրջ 15.000 իրանահայեր հայտնվեցին անելանելի վիճակում. «Թշուառութեան մատնուած են մանաւանդ մեծ քաղաքները հաւաքուած հազարաւոր երկրագործներ, որոնք պարսիկ հողատերներու կալուածներուն վրայ կ'աշխատէին եւ չեն կրնար ետ վերադառնալ, իրենց գործերը պարսիկ գիւղացիներու յանձնուած ըլլալով»:⁹⁴ Տեղեկանալով այս ամենին՝ Բ.Աստվածատրյանը 1948թ. մարտի 1-ին ՀԲԸ Միությանը հղած իր հետագրում խնդրում էր հավաքված միջոցներից որոշ գումար շտապ կերպով փոխադրել Իրան՝ այդ մարդկանց նյութական օգնություն ցույց տալու համար:⁹⁵

ՀԲԸ Միությունը Թեհրանի իր մասնաճյուղի միջոցով մինչ այդ արդեն տեղյակ էր ստեղծված կացությանը եւ ուղարկել էր 46.000 դոլար: Հայտնելով այդ մասին Բ.Աստվածատրյանին՝ Միության փոխնախագահ Տիգրան Տիրատրյանը գրում էր. «Մեր ստացած նորագոյն լուրերու համաձայն, այս օգնութեան շնորհիւ հնարաւոր եղած է ըստ բաւականին բարելաւել ներգաղթողներու վիճակը, ժամանակաւոր կերպով, պայմանաւ որ ի մօտոյ անոնք հնարաւորութիւն ունենան հայրենիք մեկնելու»:⁹⁶

Ներգաղթի հանգանակությանը ամերիկահայերի մասնակցության վրա բացասաբար ազդեցին նաեւ դաշնակցական մամուլում հրատարակած հոդվածները, որոնցում ՀԲԸ Միությունը մեղադրվեց նրանում, որ հանգանակած գումարները իբր տրամադրել է ԱՄՆ-ում Խորհրդային Միության դեսպանատանը, որը, իր հերթին, օգտագործել է այն իր հակամերիկյան գործունեության համար: Դաշնակցության կուսակցության նման գործելակերպը պատահական չէր: Երկրորդ Աշխարհամարտի տարիներին, երբ ֆաշիստական Գերմանիան հարձակվեց Խորհրդային Միության վրա, Դաշնակցության «Հայրենիք» պաշտոնաթերթը գրել էր. «Բարեբախտաբար, խորհրդային կառավարութիւնը ոչ այնքան զօրաւոր է, որ կարենայ ջախջախել Գերմանիան, ոչ ալ այնքան ներքնապէս զօրաւոր, որ երկարօրէն դիմանա Գերմանիոյ հարուածներուն»:⁹⁷ Քիչ անց, երբ Խորհրդային Միությունը ԱՄՆ-ի եւ Անգլիայի հետ միասին որպէս դաշնակիցներ, պայքարեցին ֆաշիզմի դեմ, նա ստիպված էր հրաժարվել, ավելի ճիշտ, դադարեցնել իր հակախորհրդային քարոզչությունը: Սակայն սառը պատերազմը սկսվելուն պես նա անմիջապէս վերսկսեց այն,

ինչի հետեւանքներից էր այդչափ ծանր քաղաքական մեղադրանքներ ներկայացնելը ՀԲԸ Միությանը: Բայց կար եւ մեկ այլ պատճառ: Արդեն նշվեց, որ պատերազմի տարիներին այդ կուսակցությունը, համեմայն դեպս, նրա եվրոպական կառույցները, համագործակցեցին նացիստների հետ: Հետագայում Դաշնակցությունը ամեն կերպ ձգտում էր արդարացնել իր այդ գործելակերպը: Մասնավորապէս, Թեհրանում հրատարակվող «Ալիք» թերթը «...Դրոյի ու նրա գործակիցների ֆաշիզմին մատուցած ծառայությունները որակեց իբրեւ գերմանական գայլին կուշտ պահելու ու հայ գառնուկին փրկելու քաղաքականություն»:⁹⁸ Այսօրինակ բացատրությունները, իհարկեւ, չէին կարող արդարացնել այդ կուսակցության վարքագիծը ֆաշիզմի դեմ պայքարած երկրների թե ժողովուրդների եւ թե ղեկավարների աչքերում: Վարկաբեկելով ՀԲԸ Միությունը եւ դրանով իսկ ընդհանրապէս ներգաղթի գաղափարը՝ նա հույս ուներ ձեռք բերել հակախորհրդային կոշտ կեցվածք որդեգրած Թրումենի վարչակարգի վստահությունն ու բարեհաճությունը, իսկ մյուս կողմից՝ ընդմիշտ վարկաբեկել ՀԲԸ Միությունը՝ հաչս թե ԱՄՆ-ի եւ թե ամերիկահայերի:

Ստեղծված իրավիճակում «Հայկական Բարեգործական Ընդհանուր Միութեան ղեկավար դեմքեր եւ հայ եկեղեցական առաջնորդներ հարկադրուեցան երթալ Ուաշինկթըն, ուր մասնաւոր տեսակցութիւն ունեցան Պետական Բաժանմունքի (Դեսպարտամենտի) գլխաւորներու հետ: Եվ վաւերական փաստերով համոզեցին զանոնց, որ հանգանակուած գումարներէն ոչ մէկ սենթ փոխանցուած է սովետ ռեւէ պաշտօնեայի, այլ ամբողջը յատկացուած է ներգաղթողներու ճամբորդական կարիքներուն: Ուաշինկթընի հաւանութեամբ կատարուեցաւ 1947-ի հանգանակութիւնը: Բայց հայ հասարակութեան մէկ մասին մէջ, դաշնակցական վարիչներուն արձակած զրպարտչական արշաւը որոշ վախեր յարուցած էր: Եվ իբրեւ հետեւանք՝ շատեր վերապահ մնացին, ու նուիրահաւաքման արդիւնքը նշանակելի չափով նուազ եղաւ նախորդ տարուան գերակատաւում գումարէն»:⁹⁹

Այդ հանդիպումից հետո է, որ ՀԲԸ Միության նախագահ Արշակ Գարակոչյանը հանդես եկավ հատուկ հայտարարությամբ, որում, մասնավորապէս, ասվում էր. «Միացեալ Նահանգներու կառավարութիւնը միշտ մօտէն տեղեակ պահած ենք ՀԲԸ Միութեան ծրագրին եւ գործունեութեանց, որոնց հիմնական նպատակն է արտասահմանի մեր աստանդական եւ դժբախտ հայրենակիցներուն օգնութեան հասնիլ, անոնց նիւթական վիճակը բարելաւել եւ զօրավիզ ըլլալ անոնց ազգային ինքնութիւնը պահպանող բոլոր ազդակներուն, մինչեւ որ անոնք պատեհութիւնը ունենան երթալ իրենց Հայրենիքին մէջ հաստատուելու:

«Այդ ցանկալի պատեհությունը ներգաղթն է, որ ահա երկու տարի է վեր կը կատարուի, Սով. Հայաստանի նախաձեռնությամբ եւ ստանձնած գոհողություններով:

«Այս առթիւ կ'ուզենք մասնատրապէս շեշտել թէ Ներգաղթի Հանգանակութեան մեր ձեռնարկին մասին Միացեալ Նահանգներու կառավարութիւնը ո՞նէ առարկութիւն չունի:

«Ներկայ Յայտարարութիւնը հրատարակելով, մեր նպատակն է մի անգամ ընդմիջտ փարատել կարգ մը անտեղի մտավախութիւններ եւ ազատութեան ու բարգաւաճութեան այս մեծ երկրին բացառիկ բարիքները վայելող մեր ազգակիցներուն յիշեցնել, որ չմոռան իրենց սրտի պարտականութիւնը մեր տարաբախտ բեկորներուն հանդէպ եւ Ներգաղթի Հանգանակութեան իրենց մասնակցութիւնը բերեն, անվարան եւ առատաձեռնօրէն»:¹⁰⁰

Ներգաղթածների գոյավիճակը. 1949թ. արտաքսումը

Բայց կար հարցի եւ մյուս կողմը: Արդեն նշվեց, որ սփյուռքահայերի ներգաղթը Խորհրդային Միության ղեկավարության համար քաղաքական որոշակի նպատակների՝ Թուրքիային անցած տարածքների վերադարձմանն ուղղված ծրագրի իրագործման միջոցներից մեկն էր: Այն բանից հետո, երբ պարզ դարձավ այդ ծրագրի ձախողումը, անիմաստ դարձավ նաեւ ներգաղթը շարունակելը, ինչի մասին է վկայում ներգաղթողների քանակի կտրուկ նվազումը՝ 1946-ին՝ 51.060, 1947-ին՝ 35.438, 1948-ին՝ 3.092, իսկ 1949-ին՝ ընդամենը 162 մարդ:¹⁰¹

Իր կարեւոր դերը խաղաց նաեւ երկրի անպատրաստ լինելը այդ քանակությամբ ներգաղթողներ ընդունելու համար: Թեեւ Հայաստանի տարածքում պատերազմական գործողություններ չընթացան եւ նա չենթարկվեց անխուսափելի ավերածությունների, այնուամենայնիվ, հանրապետության, ինչպէս եւ ողջ Խորհրդային Միության տնտեսությունը այդ բոլոր տարիներին ծառայեցվեց պատերազմական կարիքներին, եւ ժողովրդի ընդհանուր կենսամակարդակը առաջնօրէն չուներ: Հակառակը՝ ամենուրեք առկա էր բնակարանների, սննդամթերքի, հագուստեղենի եւ առաջին անհրաժեշտության այլ ապրանքների պակաս:

Սկսած 1946թ. առաջին ամիսներից, Հայաստանի կառավարությունը բազմաթիվ որոշումներ էր ընդունում ներգաղթողներին հատկապէս բնակարաններով ապահովելու նպատակով, որոնց կատարումը, սակայն, իրատեսական չէր եղած տնտեսական պայմաններում: Այսպէս, կառա-

վարության 1946թ. հունիսի 26-ի որոշման մեջ նշվում էր, որ Երեւանի չորս շրջաններում ներգաղթողների համար նախատեսված 1.500 սենյակներից (ոչ բնակարաններից) պատրաստ են միայն 274-ը: Էլ ավելի անմխիթար էր վիճակը գյուղական վայրերում, ուր նախատեսված 1.000 տներից 1946թ. օգոստոսի 10-ի դրությամբ ընթացքի մեջ էր միայն 462-ի շինարարությունը, եւ ոչ մի տան շինարարություն ընդհանրապէս ավարտված չէր:¹⁰² Նման իրավիճակում ներգաղթողները ստիպված էին բնակվել ամենազարհուրելի պայմաններում:¹⁰³

Ինչպէս Հայաստանի ղեկավարության, այնպէս էլ նրա բնակչության մի մասի համար ներգաղթողների դժվարին կենսապայմանները արդարացվում էին այն հոգեբանությամբ, թե քանի որ ներգաղթողներին հնարավորություն է տրվել գալ Հայրենիք, ապա նրանք կարող են եւ պարտավոր են ապրել նույնպիսի պայմաններում, որոնցում ապրում է ժողովրդի հիմնական զանգվածը, ուստի եւ՝ «եթե մենք ապրում ենք, նրանք էլ կարող են»:

Նման մոտեցումը անհիմն չէր. պատմության մեջ՝ թե մինչ այդ եւ թե հետագայում, բազմաթիվ են դեպքերը, երբ ներգաղթողները, հաղթահարելով բոլոր տեսակի դժվարությունները, ստեղծել են պետություններ, մասնակցել են իրենց հայրենիքի վերաշինմանը: Եթե այդպիսին էր Հայաստանի իշխանությունների դիրքորոշումը, ապա առավել եւս նման ձեւով էր մտածում եւ գործում հայ սփյուռքը, ներառյալ ՀԲԸ Միությունը, որի արդյունքն էր տասնյակ հազարավոր հայերի ներգաղթը Հայաստան:

Եվ նրանք եկան ու ապրեցին իրենց հայրենիքում, որի առաջընթացին նպաստեցին իրենց ուժերի չափով: Ներգաղթողների ներդրումը հատկապէս հայ մշակույթի, գիտության, բժշկության եւ այլ ոլորտներում հանրահայտ է եւ հազիվ թե կարիք ունի լրացուցուցիչ փաստարկների: Քիչ է գրված թվով ավելի շատ ներգաղթած հմուտ արհեստավորների, բարձրակարգ մասնագետների մասին, որոնց ավանդը երկրի զարգացման գործում նույնպէս ակնհայտ է:

Այդ ամենը, սակայն, իրականության մի կողմն էր: Ներգաղթողները պարզապէս չէին գիտակցում ու պատկերացում այն սկզբունքային տարբերությունները, որ կային իրենց ապրած երկրների ու Խորհրդային Միության միջեւ: Բայց կանցնի որոշ ժամանակ, եւ նրանք կասեն. «Ներգաղթողը իր բնակութեան վայրը ընտրելու ազատ չէ. որոշուած բնակավայրը փոխելու ազատ չէ. իր նախաձեռնությամբ գործելու ազատ չէ. ամէնից սարսափելիին քով-քովի գալով հասարակութեան եւ ազգի յօգուտ մի բան ասելու կամ որոշելու ազատ չէ. մի խօսքով անհատը լիարժէք անհատականութիւն չէ, այլ խամահիկ, կամագուրկ եւ գրկուած վսե-

մագոյն պարգեւ՝ ազատութիւնից...»:¹⁰⁴ Եվ այդ կյանքը, որը լի էր հիասթափութեամբ, աստուածաբանութիւնով ու կորուստներով, ի վերջո, մի հայտնի չափով հանգեցրեց ներգաղթի, հայրենադարձութեան գաղափարի ու գործի վարկաբեկմանը:

Հիասթափությունն ու հուսալքումը ներգաղթողների մեջ այնչափ մեծ էր, որ նրանցից ոմանք դիմում էին նույնիսկ ծայրահեղ միջոցի՝ ասորիների անցնելով պետական սահմանը, փորձում էին փախչել...Թուրքիա կամ Իրան: Իշխանությունների համար դեպքերի նման զարգացումը առավել անհանդուրժելի էր՝ նկատի առնելով հնարավոր ազդեցությունը Հայաստանի ողջ բնակչության տրամադրությունների վրա:

1949թ. հունիսի 13-ի լույս 14-ի գիշերը արտաքսվեց եւ Հայաստանից դեպի Խորհրդային Միության հեռավոր շրջաններ արտաքսվեց 13.272 մարդ:¹⁰⁵ Բերելով այս թիվը՝ Արմենակ Մանուկյանը նշում է, որ դա այն իրական քանակն է, որն արտահայտված է Հայաստանի Ազգային անվտանգության եւ Ներքին գործերի նախարարությունների արխիվներում եղած անձնական գործերում: Որոշ հրապարակումներում այդ թիվը շատ ավելի մեծ է: Այսպես, Մ.Բազարյանը, որը այդ ժամանակ պետական պաշտոնյա էր, գրում էր. «Երէկ, Յունիս 13-14-ի լույս գիշերը, երկու ժամուկայ ընթացքում, 53 հազար մարդ, գուցէ ասելի, մեծամասնութեամբ ներգաղթողներ, տեղահան են արել եւ արքայի Սիբիրի խորերը»:¹⁰⁶

1949թ. հունիսին Խորհրդային Միության իշխանությունների կողմից իրականացված հայերի արտաքսումը Հայաստանից միայն վերջին տարիներին հայտնվեց ուսումնասիրողների ուշադրության կենտրոնում, եւ այդ պատճառով էլ նրա հետ կապված մի շարք հարցեր դեռես կարող են պարզաբանման: Այստեղ քննարկվող նյութի առնչությամբ անդրադառնամ միայն որոշ հանգամանքների:

Նախ հարկ է նշել, որ Խորհրդային Միությունում դեռես պատերազմի ժամանակ սկսվեց Կովկասի ժողովուրդների արտաքսումը՝ 1943թ. հոկտեմբեր-նոյեմբեր ամիսներին շուրջ 70 հազար կարաչայցիներ արտաքսվեցին Ղազախստան: Խորհրդային Միության Գերագույն Խորհրդի Նախագահության համապատասխան որոշման մեջ այդ գործողությունները հիմնավորվում էին հետևյալ կերպ. «... գերմանա-ֆաշիստական զավթիչների կողմից Կարաչաեի ինքնավար մարզի տարածքի գրավման ընթացքում շատ կարաչաեցիներ պահեցին իրենց որպես դավաճաններ, մտան խորհրդային իշխանության դեմ պայքարելու համար ստեղծված գերմանական ջոկատների շարքերը, մատնեցին գերմանացիներին ազնիվ խորհրդային քաղաքացիներին, ուղեկցում եւ ճանապարհներ էին ցույց տալիս գերմանական զորքերին, իսկ զավթիչներին քշելուց

հետ հակազդում են խորհրդային իշխանությունների կողմից անցկացվող միջոցառումներին, իշխանության մարմիններից թաքցնում են թշնամիներին ու գերմանացիների կողմից ուղարկված գործակալներին եւ ցույց են տալիս նրանց օգնություն...»:¹⁰⁷ Գրեթե նույն պատճառաբանությամբ արտաքսվեցին չեչենները, ինգուշները, բալկարները եւ Հյուսիսային Կովկասի որոշ այլ ժողովուրդներ:

Այլ հիմնավորում ունեցավ մարդկանց արտաքսումը Անդրկովկասից: Ինչպես վերը նշվել էր, 1943թ. շատ իրական էր դարձել թուրքական բանակի ներխուժումը Խորհրդային Միություն, ինչի մասին վկայում էր նրա 30 դիվիզիաների կենտրոնացումը խորհրդային սահմանի մոտ: Այդ պայմաններում, ինչպես գրում են Ն.Բուզայը եւ Ա.Գոնովը, Խորհրդային Միության իշխանություններին «...անհանգստացնում էին սահմանամերձ շրջանների մահմեդական բնակչության տրամադրությունները, որը, ինչպես նշվում էր փաստաթղթերում, «ստեղծված իրավիճակում կարող էր թեքվել Թուրքիայի կողմը»:¹⁰⁸ Նշված հեղինակները հենց դրանով են բացատրում այն, որ 1944թ. հուլիսին ԽՍՀՄ ներքին գործերի ժողկոմ Լ.Բերին Ի.Ստալինին հղած նամակում առաջարկում էր վերաբնակեցնել Ախալցխայի, Ախալքալաքի, Բոզդանովկայի եւ Ադիգեմի շրջաններում բնակվող թուրք մեսիտեթիցիներին, քրդերին եւ խեչիններին,¹⁰⁹ ինչը եւ իրագործվեց նույն թվականի նոյեմբեր-դեկտեմբեր ամիսներին:

Նման բացատրությունը, սակայն, դժվար է համարել բավարար: Բանն այն է, որ 1944թ. կեսերին թուրքական զորքերի ներխուժման մասին այլևս խոսք չէր կարող լինել. պատերազմի ելքը արդեն վճռված էր, եւ Թուրքիան, հակառակը, պատրաստվում էր պատերազմ հայտարարել հենց Գերմանիային: Առավել հավանական է, որ նշված ժողովուրդների արտաքսումը պայմանավորված էր Ի.Ստալինի վերը հիշատակած ծրագրով՝ վերադարձնել Թուրքիային անցած Ռուսական կայսրության տարածքները: Այդ ծրագրի իրականացումը անխուսափելիորեն կհանգեցներ պատերազմական գործողությունների, որոնց հաջող ընթացքին կարող էր վտանգել մահմեդական հոծ բնակչության գոյությունը թիկունքում:

Եթե նշված երկու դեպքում իշխանությունները այդ մարդկանց արտաքսումը հիմնավորում էին պատերազմող երկրի արտաքին թշնամիների հետ նրանց իրական կամ սպասվող համագործակցությամբ, ապա այլ էր պատկերը 1949թ. արտաքսման պարագայում:

1949թ. մայիսի 17-ին Խորհրդային Միության Կոմկուսի Քաղբյուրոն կայացնում է որոշում «Սեւծովյան ափը, Վրացական եւ Ադրբեջանական ԽՍՀ քաղաքականապես անվստահելի տարրերից զտելու (մաքրելու) նպատակով» ընդմիջտ Ղազախական ԽՍՀ արտաքսել տեղի բոլոր հու-

նահապատակներին եւ խորհրդային քաղաքացիություն ընդունած նախկին հունահապատակներին:¹¹⁰ Իսկ արդեն մայիսի 29-ին ԽՍՀՄ Միգիստրների Խորհրդի որոշմամբ թույլատրվում էր «...դաշնակցականների, թուրքական քաղաքացիների, քաղաքացիություն չունեցող թուրքերի եւ խորհրդային քաղաքացիություն ընդունած նախկին թուրքական քաղաքացիների, հունահապատակների, քաղաքացիություն չունեցող նախկին հունահապատակների եւ խորհրդային քաղաքացիություն ունեցող նախկին հունահապատակների»¹¹¹ արտաքսումը: Որպես բնակության նոր վայր «դաշնակցականների» համար նախատեսված էր Ալթայի երկրամասը:

Վերջին փաստաթուղթը ուշագրավ է հատկապես իր ձեւակերպումներով: Եթե 1943-1944թթ. արտաքսումների մասին որոշումներում նշվում էին այս կամ այն ժողովուրդները (բալկարներ, չեչեններ, թուրքեր եւ այլն), ապա այս դեպքում չափանիշներն են՝ «դաշնակցականներ, թրքահապատակներ, հունահապատակներ»: Ա.Մանուկյանը այդ առիթով նկատում է. «...հայերը որպես արտաքսվողներ չեն հիշատակվում: Սակայն հասկանալի է, որ իրական կամ ոչ իրական դաշնակցականներ կարող էին լինել միայն հայերը: Ավելին, պատերազմից հետո, զանգվածային ներգաղթի արդյունքում Հայաստանում, բնականաբար, մեծ թիվ էին կազմում Թուրքիայի եւ Հունաստանի նախկին քաղաքացիները, որոնք եւս ընդգրկվում էին արտաքսվողների ցուցակներում»:¹¹² Այս ճշմարիտ եզրակացությունից, իհարկե, չի հետեւում, որ նշված որոշումը ուղղված էր միայն ու միայն հայերի եւ հատկապես ներգաղթածների դեմ, քանի որ այդ դեպքում պետք է նշված լինեին նաեւ Իրանի, Եգիպտոսի, Ֆրանսիայի եւ այլ երկրների հապատակություն ունեցողները: Կարելի է ենթադրել, որ Թուրքիայի եւ Հունաստանի հետ կապ ունեցող մարդկանց (անկախ ժամանակից եւ ազգությունից) հիշատակումը բացատրվում է մինչ այդ՝ 1947թ. այդ երկրների ԱՄՆ-ի պաշտպանության տակ անցնելու փաստով: Սա սկիզբ առած սառը պատերազմի առաջին դրսեւորումներից էր:

Ա.Մանուկյանը, անդրադառնալով Հայաստանում 1949թ. աքսորվածներին ներկայացված մեղադրանքների հարցին, նշում է, որ դրանք գրեթե նույնությամբ կրկնվում էին. «...հիմնական մեղադրանքներն էին նախկինում Դաշնակցության կուսակցության անդամ լինելը եւ պատերազմի տարիներին գերեզմաններում ու «Հայկական լեգեոնում» ծառայելը»:¹¹³ Ֆաշիստական Գերմանիայի բանակի կազմում գործող «Հայկական լեգեոնի» (եթե նման անվանման նպատակն էր այդ գործառնականությունները ներկայացնել որպես Առաջին Աշխարհամարտում թուրքերի դեմ կռվող «Հայկական լեգեոնի» ժառանգորդներ, ապա պետք է խոսել ար-

տասովոր ցինիզմի մասին) կազմակերպիչներն ու ղեկավարները հիմնականում Դաշնակցության անդամներն էին: Ինչ վերաբերում է «Հայկական լեգեոնի» անձնակազմին, ապա այն հիմնականում համալրված էր գերի ընկած խորհրդային բանակի հայազգի զինվորականներով, իսկ համաձայն դեռեւս 1941թ. Ի.Ստալինի ստորագրած մի հրամանի՝ խորհրդային բոլոր ռազմագերիները հայտարարվել էին հայրենիքի թշնամիներ եւ ենթակա էին աքսորման:

Մեղադրանքների նման բնույթը բացատրելի է դարձնում Խորհրդային Միության կառավարության հետեւյալ որոշման մեջ «դաշնակցականներ» ձեւակերպումը: Առնվազն միամտություն կլիներ կարծել, թե Խորհրդային Միության իշխանությունները եւ անձամբ Ստալինը, կարող են անպատիժ թողնել մարդկանց, որոնք գերմանական բանակի կազմում ներխուժել էին երկիր եւ մարտական գործողություններ վարել Կարմիր բանակի դեմ: Դա այն գիճն էր, որ վաղ թե ուշ պետք է վճարվեր Դաշնակցության վերոհիշյալ «գերմանական գայլի եւ հայ գառնուկի» քաղաքականության համար: Պատերազմից անմիջապես հետո իշխանությունների համար պահը հարմար չէր՝ իրականացվում էր հայերի ներգաղթը: Սակայն նույն այդ տարիներին Դաշնակցությունը դեմ դուրս եկավ թե հայրենադարձությանը եւ թե Թուրքիայից հայկական տարածքների վերադարձման դեպքում Խորհրդային Միությանը վերամիավորվելուն: Այսքանից հետո, ըստ Ստալինի, պետք է պատժվեին ներգաղթած հայերը՝ որպես Դաշնակցության իրական կամ կարծեցյալ անդամներ ու համակիրներ:

1949թ. հազարավոր մարդկանց բռնադատումը տեղի ունեցավ ներգաղթողների վերջին խմբի Երեւան հասնելուց ընդամենը երեք ամիս անց եւ դրանով իսկ, կարծես, խորհրդանշեց թե ներգաղթի վերջնական ավարտը եւ թե սփյուռքի հետ համագործակցության հերթական դադարը: Դա մի ծանր եւ անսպասելի հարված էր ողջ սփյուռքի համար, որը հուսով էր, եթե չասենք համոզված, Հայաստանի հետ որակապես նոր, ավելի սերտ, քան երբեւէ, հարաբերությունների հաստատման մեջ: Կատարվածը անսպասելի ու ցավալի էր նախ եւ առաջ սփյուռքի այն անհատ մարդկանց եւ կազմակերպությունների համար, որոնք անցած չորս տարիների ընթացքում անձնվեր ծառայել եւ օժանդակել էին այդ հարաբերությունների կայացման գործին: Ավելին՝ նրանք պատրաստ էին, տրամադրվել էին էլ ավելի մեծ չափով նպաստել Հայաստանի առաջընթացին: Դա առավելապես վերաբերում էր ՀԲԸ Միությանը:

Երկու տարբեր ճակատագրեր

Խորհրդային Հայաստանում 1923-1937թթ. ՀԲԸ Միության գործունեությանը նվիրված բաժնի վերջում անդրադարձ եղավ Երեւանում Միության ներկայացուցչի՝ Հայկազ Գարակչոյանի ողբերգական ճակատագրին: Այս անգամ խոսքը Միության, այսպես ասած, չկայացած ներկայացուցիչների մասին է:

1947 հունվարին ԱՄՆ-ում Խորհրդային Միության դեսպանին հանձնած հուշագրում ՀԲԸ Միությունը, նշելով Հայաստանի իշխանությունների հետ ոչ կանոնավոր անավակարգական կապի հանգամանքը, առաջարկում էր. «...եթե դա չի հանդիպի Երեւանի կառավարության առարկությանը, ընտրել հատուկ լիազորված մի անձ, որը վարեր անավակարգությունը, ինչպես դա արվում էր առաջ: Մենք ցկատի ունենք մեր նախկին ծառայողներից մեկին՝ Աթենքից ներգաղթած պարոն Մ.Բարթիկյանին, եթե դրան համաձայն կլինի Երեւանի կառավարությունը, եւ եթե նա չունի որեւէ այլ ավելի ընդունակ եւ վստահելի մեկը»:¹⁴ Միքայել Բարթիկյանը հայտնի դեմք էր սփյուռքում. սկսած 1911թ. Կոնիայում, Ջմյունիայում եւ Աթենքում տարբեր պարբերականների («Շավիղ», «Ատրուշան», «Ամրոց» եւ այլն) եւ տպարան-հրատարակչությունների հիմնադիրն էր ու խմբագիրը: Պատերազմի տարիներին նա ՀԲԸ Միության Աթենքի մասնաճյուղի գործիչ-քարտուղարն էր եւ Հին Հունաստանի շրջանի Միության կողմից հովանավորվող դպրոցների կրթական քննիչը: Մ.Բարթիկյանը ընտանիքով Հայաստան էր ներգաղթել 1946թ.:

Միության հուշագիրը ուղարկելով Մոսկվա՝ Արտաքին գործերի նախարարություն, դեսպան Կ.Նովիկովը իր կից անակում դժգոհում էր Հայաստանի համապատասխան հիմնարկներից, որոնք «...չգիտես ինչու չեն պատասխանում անակներին ու հեռագրերին...»:¹⁵ Այդ բոլոր փաստաթղթերը ուղարկվում են Երեւան, որը եւ պետք էր պատասխաներ հուշագրի հարցերին: Հայաստանի Արտաքին գործերի փոխնախարարը Կոմկուսի առաջին քարտուղար Գ.Հարությունյանին հղած իր գրության մեջ, մասնավորապես, գրում էր. «Հուշագրում նշված Բարեգործականի որոշ անակներ եւ հեռագրեր ընդհանրապես չեն ստացվել Երեւանում եւ շատ հավանական է, որ նրանք կորցվել են, ինչի հետեւանքով էլ հուշագրում հիշատակած մի շարք հարցեր մնացել են անպատասխան: Ինչպես երեւում է, դա առիթ է հանդիսացել Բարեգործականի բողոքի համար ...Բացի այդ, Բարեգործականի ղեկավարությանը, ըստ երեւույթին, անհրաժեշտ էր դիմել նման փաստարկներին, որպեսզի հիմնավորի իր առաջարկությունը՝ Երեւանում իր ներկայացուցչությունը հիմնելու մասին»: Այնու-

հետեւ փոխնախարարը եզրակացնում էր. «Աննպատակահարմար եմ համարում այդ նպատակով Բարեգործականի հատուկ ներկայացուցիչ ունենալ Երեւանում...»:¹⁶

Միքայել Բարթիկյանի որդու՝ Հայաստանի Գիտությունների Ազգային Ակադեմիայի ակադեմիկոս, պատմաբան Հրաչ Բարթիկյանի խոսքերով, իր հայրը ընդհանրապես տեղյակ չէր Միության կողմից իր թեկնածության առաջադրման մասին: Ինչեւէ, Մ.Բարթիկյանը հնարավորություն ստացավ Հայաստանում ապրել համեմատաբար հանգիստ կյանքով եւ աշխատեց իր նախընտրած մասնագիտությամբ Գրականության ինստիտուտում:

Այլ էր Միության հաջորդ թեկնածուի ճակատագիրը: Միությանը հղած իր հետագա գրություններում Երեւանը գերադասեց պարզապես շրջանցել ներկայացուցչություն հիմնելու հարցը: Դա յուրովի ընկալվեց Միության ղեկավարության կողմից: Ենթադրելով, որ Մ.Բարթիկյանի թեկնածությունը ինչ-ինչ պատճառներով հարմար չէ Հայաստանի իշխանություններին, նրանք առաջարկեցին մեկ այլ թեկնածություն: Նույն 1947թ. հունիսի 30-ին, Վ.Մալեգյանը Բ.Աստվածատրյանին հասցեագրած անակում գրում էր. «Ներկայիս Ձեզի եւ Ձեր միջոցաւ Խ.Հայաստանի կառավարութեան եւ Պետ.Համալսարանի բարեացակամ ընդունելութեան կը յանձնարարենք ջերմօրէն վաստակաւոր մտաւորական մը, տիար Վ.Բագրեւանդեան, որ Սելանիկէն հայրենիք կը ներգաղթէ իր ընտանիքով...»: Այնուհետեւ, ներկայացնելով Վահրամ Բագրեւանդյանին՝ «...11 տարի ի վեր մեր Միութեան ծառայած է որպէս Նոր Յունաստանի շրջանին Կրթ. Քննիչ եւ Ընդհ. Գործիչ, ...հոգեւին աշխատած է ներգաղթի գործողութեանց առթիւ...», Վ.Մալեգյանը հայտնում էր. «Միութեան Կեդր. Վարչութիւնը տրամադիր է իրեն վստահիլ ներկայացուցչի պաշտօն, որպէս գործակատար, եթէ կառավարութիւնը այդ կարգադրութեան մէջ անպատեհութիւն չի տեսներ»:¹⁷

Հայաստանի իշխանությունները, սակայն, այլես այլերորդ էին համարում քննարկել Միության գրասենյակի հարցը: Մնում էր հուսալ, որ Միության կողմից երաշխավորված անձը կարծանանա նրանց «բարեացակամ ընդունելութեան», բայց կատարվեց լրիվ հակառակը: Մ.Բագրեւանդյանը, որը Վ.Բագրեւանդյանի մտերիմներից էր դեռ Հունաստանում, այսպես է նկարագրում նրա կյանքի պայմանները Երեւանում: «Երեւանում ընտանիքին տրամադրուեց մի կիսաւեր շէնքի ձեղնայարկը: 20 քառակուսի մէթր տարածութեամբ մի սենեակ առանց խոհանոցի եւ ջրի: Առաստաղը այնքան ցածր էր որ՝ մի քիչ օդ շնչելու, մի աղօստ արեւի շող որսալու համար, պէտք էր երկծալ մօտենայիր ձեղունի վրայ տեղադր-

րուած ապակիի կտորին որը հազիւ թէ լուսամտտ կոչէիր: Այս բոլորին աւելանում էր ապրուստի մեծագոյն հոգար: Լրագրութիւն չէր կարող անել լեզուի եւ ոճի խոշոր տարբերութեամբ, մանաւանդ որ կաղապարուած գաղափարների մուճետիկ երբեք չէր կարող լինել: Վկայեալ էր Կ.Պոլիսի իրաւաբանական կանոնից, անուանի ճառախօս-դատաւարչական. միակ մասնագիտութիւնը որ կարող էր գործադրել: Գերագոյն դատարանի իրաւաբան նշանակուեց: Չկարողացաւ դատ պաշտպանել: Մեղադրեալի դատավճռի յօդուածը՝ նախքան դատավարութեան, Չեկայից կամ պարտիական վերին օրգաններից որոշուած թղթածրարով էր գալիս. ինչպէ՞ս պաշտպանել: ...Ու այդպէս խանդավառ եւ հայրենասէրն ճառախօսը լուսկեաց դարձաւ, ինք իր մէջ կծկուեց, փոքրացաւ, մի բուռ մնաց»:¹¹⁸

Նույնիսկ Մ.Բազարյանը Վ.Բագրեւանդյանի մահից տասը տարի անց միայն՝ 1963թ., իմացալ նրա ողբերգության բուն պատճառը: Հայաստանի հատուկ ծառայությունների համար Վ.Բագրեւանդյանը՝ ի տարբերություն ուրիշ շատ ներգաղթողների, առավել մեծ հետաքրքրություն էր ներկայացնում, քանի որ նախկինում Դաշնակցության անդամ էր: 1930 -ական թթ. սկզբին Վ.Բագրեւանդյանը, դուրս եկալ կուսակցության շարքերից: «Իր միջոցներով հրատարակվող «Արեւելքը», - վկայում էր Մ.Բազարյանը,- երկար տարիներ հակադաշնակցական պայքարի դրօշակակիրը եղաւ՝ թերթը լայնօրէն տրամադրելով Սովետական Հայաստանի իրագործումներին»:¹¹⁹ Հատուկ ծառայությունների նպատակն էլ հենց այն էր, որ նա Հայաստանում նույնպէս շարունակի «հայրենիքի թշնամիների» բացահայտումը: Իր որդու պատմելով՝ «Երկու տարի գիշերցերէկ Չեկայի գազանատիպ աստիճանատորները հօքս հետապնդում էին, որ իրենց գործակալը լինի եւ հակասովետ մարդկանց մասին մատերիալ (նյութ) տալ: Գիշերները տանում էին հարցաքննութեան, առաւօտները հելաք դարձած (ուժասպառ) տուն էր գալիս: Չէր ուտում, չէր խմում, տխուր ու յուսաբեկ մտածում, մտածում եւ ծխում ու ծխում էր: ...Նախ ուզեցին իր հայրենասիրութիւնը շահագործել: «Հայրենիքի» անգնահատելի ծառայութիւն մատուցած կը լինես եթէ հայրենիքի թշնամիները չէզոքացնես»: Հայրս տեղի չտուեց. առաջարկեցին բարձր պաշտօններ, նիւթապէս կաշառելու նպատակով, նորից հայրս անդրդուելի մնաց. վերջը դիմեցին սարսափի: Սպառնացին. «քեզ բանտարկելու ենք եւ ընտանիքդ էլ Սիբիր ենք արքորելու»: Հայրս վախից լեղանաք եղաւ եւ մի քանի շաբաթ յետոյ հոգին աւանդեց»:¹²⁰

Ամփոփելով ՀԲԸՄ դերը նախապատերազմյան (1920-1930-ական թթ.) եւ հետպատերազմյան (1946-1949թթ.) տարիների ցանգվածային ներգաղթների կազմակերպման եւ իրականացման գործում՝ կարելի է նշել հետեւյալը:

Որպէս ներգաղթի նախաձեռնող եւ իրագործող ՀԲԸ Միությունը հանդես եկալ 1924թ., երբ Հայաստան տեղափոխեց իր որբանոցների 250 չափահաս որբերին: Հետագայում՝ 1920-1930 եւ 1940-ական թթ. ներգաղթի ժամանակ Խորհրդային Միության - Խորհրդային Հայաստանի իշխանությունները ստիպված էին համագործակցել ՀԲԸ Միության հետ, քանի որ մյուս այլ՝ հեղինակավոր սփյուռքահայ կազմակերպությունների (եկեղեցի, կուսակցություններ) հետ դա համարեցին անհնարին՝ գաղափարաբանական եւ քաղաքական պատճառներով:

Բացի այդ, Խորհրդային Միությանը խիստ անհրաժեշտ էր համագործակցել ֆինանսապէս հզոր կազմակերպության հետ: Հանուն դրա, կարելի էր անտեսել նույնիսկ այն, որ ընդամենը 7-8 տարի առաջ՝ 1937թ., նույն ՀԲԸ Միությանը արգելվել էր գործել Հայաստանում: Իր հերթին, Միությունը նույնպէս անտեսեց այդ փաստը, բայց այլ պատճառով՝ հանուն հայ ժողովրդին ծառայելու իր մշտական եւ անփոփոխ ցանկության:

Այդ տարիների ընթացքում արմատապէս փոխվել էր նաեւ Խորհրդային Միության դերն ու կշիռը աշխարհում, ինչը անխուսափելիորեն անդրադարձալ ՀԲԸ Միության հետ նրա համագործակցության չափերի ու ձեւերի վրա: Չնայած Միության ներկայացուցիչները առաջվա պէս ընդգրկված էին ներգաղթի տեղական կոմիտեներում, իրականում, սակայն, կազմակերպական աշխատանքը ղեկավարում ու վերահսկում էին Խորհրդային Միության դեսպանատների եւ հյուպատոսարանների աշխատակիցները, ինչպէս նաեւ հատուկ այդ նպատակով Հայաստանից գործուղված պաշտոնյաները, որոնց մեջ քիչ թիվ չէին կազմում հատուկ ծառայությունների ներկայացուցիչները:

Որքան հետեւողական էր Միությունը ներգաղթին օժանդակելու գործում, նույնչափ հետեւողական էին նաեւ նրա գաղափարական ընդդիմախոսները, մի կողմից, Դաշնակցությունը իր ավանդական հակախորհրդային կեցվածքով, իսկ մյուս կողմից՝ այսպէս կոչված «առաջադիմականները»: 1940-ական թթ. ներգաղթի ժամանակ այդ վերջինները, ինչպէս եւ տարիներ առաջ Հայ Օգնության կոմիտեն, ստիպված էին համակերպվել այն իրողության հետ, որ Խորհրդային Միության իշխանությունները ոչ միայն համագործակցում էին «բուրժուական», կապիտա-

լիստների կողմից ղեկավարվող ՀԲԸ Միության հետ, այլև հրապարակավ շեշտում նրա կարելի էրը ներգաղթի իրականացման գործում: Այդուհանդերձ, Հայաստանի իշխանություններին հղած իրենց գրություններում ի հայտ էր գալիս հին վերաբերմունքը. նրանք տարբեր միջոցներով փորձում էին նսեմացնել Միության գործունեությունը, հայտարարելով, որ վերջինիս ղեկավարությունը թշնամի է Խորհրդային Միությանը, որ ՀԲԸ Միությունը կարող է տրամադրել շատ ավելի մեծ միջոցներ, քան անում է, եւ որ նա հանգանակությունները օգտագործում է սփյուռքում իր հեղինակությունը բարձրացնելու համար եւ այլն:

Եթե այդչափ ընդհանրություն կար այդօրինակ կազմակերպությունների՝ Միության հանդեպ որդեգրած քաղաքականության մեջ, ապա անփոփոխ էր նաեւ Միության պատասխանն այդ ամենին: Պողոս Նուպարի ժամանակներից ի վեր այն՝ անտեսել է հակառակորդներին եւ անստույգ ու քայքայիչ վեճերի փոխարեն գործել:

8

ՀԱՅ ԻՆՔՆՈՒԹՅԱՆ ՊԱՀՊԱՆՈՒՄԸ ՍՓՅՈՒՌՔՈՒՄ

1914-1918թթ. Առաջին Աշխարհամարտը իր անդառնալի եւ ճակատագրական հետեւանքներով կանխորոշեց հայ ժողովրդի պատմության հետագա ընթացքը, որի ամենակարեւոր բնութագրերից էր, այդուհետ, սփյուռքի գոյությունը: Սփյուռքյան գոյավիճակը էապես ազդեց ժողովրդի կենսագործունեության անխտիր բոլոր կողմերի վրա: Նոր պայմաններում որոշակի փոփոխություններ կրեցին նաեւ ազգային հաստատությունները, ինչպես նպատակների, այնպես էլ գործելակերպի առումով:

ՀԲԸ Միության հիմնադրման նպատակն էր նպաստել «հայրենաբնակ» հայ ժողովրդի զարգացմանը: Միայն թե «հայրենաբնակ» բառը ստացավ այլ իմաստ: Նախապես դրա տակ հասկացվում էր Արեւմտյան Հայաստանի եւ Կիլիկիայի հայությունը, սակայն 1922թ. հետո այդ տարածքներում հայեր այլևս չկային: Գրեթե նույն այդ ժամանակ նշված նպատակը դարձավ հնարավոր եւ իրագործելի հայրենաբնակ մեկ այլ մասում՝ Խորհրդային Հայաստանում: Սակայն, որքան էլ կարելի էր արդյունավետ չլիներ Միության գործունեությունը Հայաստանում, այն չէր կարող բավարարվել միայն դրանով: Առավել մեծ օգնության կարիք ունեւր Արեւմտյան Հայաստանի ու Կիլիկիայի նախկինում հայրենաբնակ, իսկ այժմ բռնագաղթված հայությունը՝ սփյուռքահայությունը:

Առաջին Աշխարհամարտից անմիջապես հետո Միությունը զբաղվեց տարբեր երկրներում ապաստանած հայ որբերի ու գաղթականների բազմապիսի հարցերով: Դրա հետ մեկտեղ, Միությունը պետք է հստակեցներ սփյուռքում իր հետագա գործունեության հիմնական ուղղությունը:

նը: Որպես այդպիսին եղավ սփյուռքահայության ազգային ինքնության պահպանումը:

Սկսած 1920-ական թթ. եւ այդուհետ, «ազգապահպանում» գաղափարը դառնում է սփյուռքահայության գիտակցության եւ գործունեության ամենակարեւոր գերակայությունը: Ամերիկահայ հրապարակագիր Անդրանիկ Անդրեասյանը գրում էր, որ այդ տարիներից «ազգապահպանում» կարգախոսը «...ամէնէն խոռովիչ մարտահրաւերը դարձաւ ու կը մնայ միշտ սփիւռքի հայ կուսակցութեանց, եկեղեցիներուն եւ հանրային առաջնորդներուն համար, որոնք զայն դիմագրաւելու անձկութեամբ կը նախաձեռնեն ամէն յուսատու միջոց, կը կանգնեն ամէն խոստմնալի պատուար»:¹

Միության գործունեությունը ազգային ինքնության պահպանման նպատակով սկիզբ առավ Մերձավոր Արեւելքի երկրներում՝ իր իսկ հիմնած որբանոցներում, ուր, ինչպես նշվել է, երեխաները ազգային ուսում էին ստանում նախակրթարանի ծրագրով: Այս որբանոց-վարժարաններում էր, որ որբ երեխաներից շատ-շատերը առաջին անգամ սովորեցին գրել եւ կարդալ իրենց մայրենի լեզվով: Սակայն եթե որբանոցներում նրանք ապրում էին իրենց ազգակիցների շրջապատում եւ ստանում ազգային կրթություն ու դաստիարակություն, ապա հետագայում՝ ասպնջական երկրների միջավայրի եւ մշակույթի ուժեղ ազդեցությունը կարող էր բերել նրանց օտարմանը հայ մշակույթից ու ազգային արժեքներից, այդ արժեքները կրող ավագ սերնդից:

Գիտակցելով խնդրի կարեւորությունը՝ ՀԲԸ Միության ղեկավարությունը արդեն 1920-ական թթ. վերջերից ձեռնամուխ եղավ երիտասարդական հատուկ ծրագրերի մշակմանն ու իրագործմանը: Դրա առաջին եւ կարեւոր արդյունքներից էր Միության երիտասարդական կազմակերպությունների ստեղծումը ԱՄՆ-ում: Սակայն, պահպանելով շարադրանքի տրամաբանությունը, նախ անդրադառնամ Միության այդօրինակ գործունեությանը Արեւելքի երկրներում:

ԱՐԵՎԵԼՔԻ ԵՐԿՐՆԵՐ

Հայ երիտասարդաց ընկերակցություն

Վերը խոսվեց Մերձավոր Արեւելքի Նպաստամատուց (Near East Relief) ամերիկյան բարեսիրական կազմակերպության մասին, որի Սիրիա-Լիբանանում, Թուրքիայում, Հունաստանում, Եգիպտոսում, ինչպես նաեւ Հայաստանի Առաջին եւ Երկրորդ (Մորհորդային) Հանրապետություններում ու այլ երկրներում հիմնած բազմաթիվ որբանոցներում ապաստանել էին տասնյակ հազարավոր որբեր, ներառյալ մեծ թվով հայ երեխաներ: Որոշ ժամանակ անց, երբ առաջին չափահաս որբերը հրաժեշտ տվեցին որբանոցներին, այս կազմակերպությունը նույնպես ստիպված եղավ ինչ-որ չափով զբաղվել նրանց ճակատագրով: Դրա պատճառները տարբեր էին՝ աշխատատեղերի եւ բնակարանների պակասը, ուսումը շարունակելու անկարելիությունը եւ նման այլ դժվարություններ, բայց ոչ միայն դա: Ամերիկյան Նպաստամատուցի նախագահ Ջեյմս Բարտոնը նշում էր. «Որբանոցներում երեխաները ընկերություն էին անում եւ շփվում միայն այլ որբերի հետ: Երբ նրանք հեռացան որբանոցներից եւ ունեցան իրենց սունն ու աշխատանքը, նրանք, բնականաբար, ցանկացան պահպանել իրենց շփումներն ու ընկերակցությունները: Սակայն գոյություն չունեին ոչ համայնքային ակումբներ կամ նրանց համախմբելու համար կազմակերպված գործունեություն, ոչ երեկոյան դպրոցներ կամ սոցիալական կենտրոններ: Նման իրավիճակում կազմակերպությունը առաջարկեց հիմնել բոլոր նախկին սաների ընկերակցություն...»:² Նման կազմակերպություններ ստեղծվեցին տարբեր երկրներում, այդ թվում նաեւ 1924թ. Սիրիա-Լիբանանում, ուր այն կոչվեց Մերձավոր Արեւելքի Ընկերակցություն (Near East League): Նորաստեղծ կազմակերպության հիմնական նպատակներից էր նրա անդամների տնտեսական, սոցիալական եւ բարոյական փոխօգնությունը՝ անկախ իրենց ազգությունից, կրոնից, բնակության վայրից եւ զբաղեցրած դիրքից, նրա ամեն մի անդամի՝ որպես անհատականություն, կերտումն ու զարգացումը: Կարճ ժամանակում Սիրիա-Լիբանանի տարբեր վայրերում (Հալեպում, Դամասկոսում, Բեյրութում, Ալեքսանդրիայում) Ընկերակցության մասնաճյուղերը ծավալեցին աշխույժ գործունեություն՝ երեկոյան դասընթացներ, մարզական խաղեր, տարբեր զվարճանքներ եւ այլն, ինչպես նաեւ «Star» («Աստղ») ամսաթերթի հրատարակում: Այս կազմակերպությանը անդամագրվածների մեջ մեծ թիվ էին կազմում ամերիկյան որբանոցների հատկապես հայ-ազգի նախկին սաները:

Ամերիկյան արժեքների ոգով կրթված եւ դաստիարակված հայ պատանիներին ու երիտասարդներին բավական դժվար էր ընտելանալ ոչ միայն տեղի բնիկ մահմեդական ժողովուրդների ապրելակերպին, այլ նաեւ հարմարվել այդ տարիների գաղթահայ իրականությանը՝ որը լի էր թե՛ զրկանքներով եւ թե՛ ներքին հակասություններով ու հակամարտություններով: Նման պայմաններում նրանց համար ավելի դյուրին էր շփվել մյուս նախկին սաների հետ, որոնց հետ կենսական մի շարք հարցերի վերաբերյալ փոխըմբռնման եզրերը շատ ավելի էին: Մյուս կողմից, հայ գաղթականների ընդհանուր զանգվածի համար նույնչափ խորթ էր եւ անձանոթ նույն այդ Ընկերակցության՝ Լիգայի անդամների կեցվածքը եւ ապրելաոճը, հատկապես նրանց անմասն լինելը ազգային կյանքին: Այդ տարիներին հայ երիտասարդական շարժման հիմնադիրներից Խ.Գալուստյանը իր հողվածներից մեկում նշում էր. «Լիգայի պատկանող մեկը, շատ հաճախ փաղաքշական ըլլալէ աւելի, վիրաւորական ձեռով «Լիգանի» կը կոչուէր: Ուրեմն, Մերձատր Արեւելքի Ընկերակցութիւն (Լիգա) անունն ալ գոհացուցիչ չէր. որովհետեւ անգոյն մակդիր մըն էր անորոշ խորագրով. ան հայկականութիւն չէր բուրեր Սուրիոյ եւ Լիբանանի գաղթական հայերուն համար, որոնք սկսեք էին կազմակերպուիլ եւ հիմնել երիտասարդական շատ մը կազմակերպութիւններ՝ ՀԲԸՄ, Արարատ, Ուսումնասիրաց, Վասպուրական, ՀՄԸՄ եւ այլն»:³

Այդ տարիները հայ համայնքների կազմակերպական կառուցվածքի ձեւավորման շրջան էր: Առավել հեղինակություն վայելող հայ քաղաքական կուսակցություններից յուրաքանչյուրը, ձգտելով էլ ավելի ընդլայնել իր ազդեցության ոլորտը, ձեռնամուխ եղավ ազգային հաստատությունների սեփական ցանցի ստեղծմանը: Առկա լարված եւ քաղաքականացված մթնոլորտը անխուսափելիորեն իր ներգործությունը ունեցավ նաեւ ամերիկյան որբանոցների նախկին հայազգի սաների վրա, որոնք կանգնել էին յուրահատուկ երկրնորանքի առաջ. շարունակել իրենց անդամակցությունը Մերձավոր Արեւելքի Ընկերակցության - Լիգայի մեջ, թե՛ հարել այս կամ այն ազգային խմբավորմանը: Թե՛ ինչպիսին կլինեք նրանց ընտրությունը, կարելի է միայն ենթադրել, քանզի հարցը անսպասելի լուծում ստացավ:

1930թ. Ամերիկյան Նպաստամատուցը որոշում կայացրեց գործունեությունը դադարեցնելու մասին: Եթե նրան պատկանող որբանոցները պարզապես փակվում էին նոր որբերի բացակայության պատճառով, ապա այլ էր նախկին որբերի կազմակերպության պարագան: Ամերիկյան Նպաստամատուցը, գիտակցելով Լիգայի կարեւորությունը, առաջարկեց նրա ընդհանուր ղեկավարությունն ու խնամակալությունը հանձնել Կիլի-

կիո կաթողիկոսությանը: 1931թ. հունիսի 1-ին Բաբկեն Ա կաթողիկոսի հրավերով կայացավ հատուկ ժողով՝ մասնակցությամբ «Լիկային Վարիչ Մր. Ծեսըփի եւ չորս պաշտօնեաներու, նաեւ Ծահէ եւ Եղիշէ եպիսկոպոսներու, Հայր Պողոս Արիսի, Վերպ. Ենույք Կէօքկեօզեանի, դոկտ. Յ.Թօփ-ճեանի, Միհրան Տամատեանի եւ Լ.Ջէնեանի: Ժողովը կ'որոշէ Լիկա անունը փոխել Հայ Երիտասարդաց Ընկերակցութիւն կոչումի: Երկու Յանձնախումբեր կը կազմուին. մին կանոնագիրը վերամշակելու համար, միւսը՝ Նիր Իսթէն ստանալու համար նախկին Լիկայի գույքերը: Ու փոխանցումը կը կատարուի նույն ամսուան վերջաւորութեամբ...»:⁴

Բելրութեւն տեղակայված Հայ Երիտասարդաց Ընկերակցության (ՀԵԸ) վարչության մշակած կանոնադրությունը 1932թ. մարտին Բաբկեն Ա կաթողիկոսի կողմից վավերացվելուց հետո, այնուհետեւ, վավերացման ներկայացվեց տեղի իշխանություններին: Մինչ այդ, 1931թ. օգոստոսին Հայեպոմ կազմվեց Գործադիր մարմին՝ Սիրիայի տարածքում ՀԵԸ-ի մասնաճյուղերի գործունեությունը վարելու նպատակով:

Կիլիկիո կաթողիկոսությունը, ստանձնելով այս նորացված կազմակերպության ղեկավարությունն ու հատկապես խնամակալությունը, անշուշտ, գիտակցում էր դրա հետ կապված բազմաթիվ դժվարությունները: Սակայն նա, ըստ էության, չուներ այլընտրանք. հրաժարվել կնշանակեր մեծ հարցականի տակ դնել տարիների պատմություն ունեցող երիտասարդական այդ կազմակերպության հետագա գոյությունն իսկ: Մյուս կողմից, նա, պետք է ենթադրել, ակնկալում էր հայության աջակցությունը հայկական անուն եւ դիմագիծ ստացած ՀԵ Ընկերակցության կայացման գործում:

Հարկ է նկատել, որ այդ տարիներին Լիբանանում եւ Սիրիայում գործող երիտասարդական միությունների շարքում առանձնանում էին՝ Հայ Մարմնակրթական Ընդհանուր Միությունը (ՀՄԸՄ) եւ Հայ Մարմնամարզական Միությունը (ՀՄՄ), որոնք ղեկավարվում էին համապատասխանաբար՝ Դաշակցություն եւ Հնչակյան կուսակցությունների կողմից: Նման պայմաններում անհրատեսական էր օժանդակություն ակնկալել այդ վերջիններից կամ նրանց ենթակա հաստատություններից: Հակառակը՝ որեւէ ազգային հիմնարկություն ձգտում էր ունենալ հնարավորին չափ մեծ թվով անդամներ ու կողմնակիցներ: Ստեղծված իրավիճակը, կարծես, թելադրում կամ անխուսափելի էր դարձնում ՀԲԸ Միության եւ ՀԵ Ընկերակցության փոխշահագրգռվածությունը:

1930-ական թթ. սկիզբը հուզումնալից տարիներ էին ՀԲԸ Միության համար: Նրա հիմնադիր եւ առաջին նախագահ Պողոս Նուպարի մահից հետո՝ 1930թ., նրան այդ պաշտոնում հաջորդած Գալուստ Կյուլպեճկյանը

իր հրաժարականը ներկայացրեց ընդամենը երկու տարի անց, որին հաջորդեց Զարեհ Նուպարը: Այդչափ կարճ ժամանակահատվածում կատարված փոփոխությունների պատճառով որոշ անորոշություն էր տիրում թե Միության արդեն որդեգրած ծրագրերի իրագործման եւ թե նրա հետագա գործունեության վերաբերյալ: Եթե նկատի առնվի նաեւ, որ այս ամենը զուգորդվում էր Միության լարված հարաբերություններով, մի կողմից՝ սփյուռքի որոշ ազգային-քաղաքական կազմակերպությունների, իսկ մյուս կողմից՝ Խորհրդային Հայաստանի իշխանությունների հետ, ապա կարելի ասել, որ այդ տարիները ՀԲԸ Միության համար իսկական փորձության տարիներ էին: Միությունը, սակայն, հերթական անգամ ապացուցեց իր, որպես կազմակերպության կենսունակությունը եւ ոչ միայն հաղթահարեց առաջ եկած դժվարությունները, այլեւ էլ ավելի ընդարձակեց իր գործունեության ասպարեզը, ինչի համոզիչ ապացույցներից էին նրա՝ սփյուռքահայ երիտասարդությանը ուղղված նոր ծրագրերը:

Հայ երիտասարդաց Ընկերակցության պատմությունը լուսաբանող մի շարք հրատարակումներում նշվում է, որ ՀԲԸ Միությունը ստանձնել է այդ կազմակերպության ղեկավարումն ու խնամակալությունը 1933թ.: Այսպես, օրինակ, Բարունակ Թովմասյանը գրում էր. «Կիլիկիոյ Կաթողիկոսարանի հովանաւորութիւնը պահելով հանդերձ, 1933ին վարչական հսկողութիւնն ու անմիջական հոգածութիւնը փոխանցուեցան ՀԲԸ Միութեան»:⁵ Ավելի վաղ նույն թվականն են նշել նաեւ Բյուզանդ Եղիալանը, Միքայել Նաթանյանը եւ այլք.: Մինչդեռ «Միութիւն» ամսագրի 1934թ. մարտ-ապրիլ համարում է խոսվում միայն նման մտադրության մասին. «Վերջերս փափագ յայտնուած լինելով Սուրիա գտնուող Մելգոնեան եւ Քէլէկեան նախկին սաներու միութիւն մը կազմել, առաջարկ բերուեցաւ Միութեան սաները միացնել Հայ երիտասարդաց Ընկերակցութեան, որ կազմուած է Կիլիկիոյ Վեհ. Կաթողիկոսին հովանաւորութեամբ, եւ այդ ընկերութիւնը դնել Միութեան պաշտպանութեան տակ: Հարցը տեղւոյն վրայ ուսումնասիրուելէ վերջ, որոշուեցավ Սուրիոյ հայ երիտասարդներուն ընծայել Միութեան համակրանքն ու օժանդակութիւնը, եւ այդ նպատակով 250 Անգլ. ոսկի վարկ մը տրամադրուեցաւ, որպէսզի Հալէպի եւ Պէյրութի մէջ շէնքեր վարձուին» որպէս «Բարեգործականի Տուն», իբրեւ հաւաքատեղի ծառայելու համար, թէ ՀԵ Ընկերակցութեան, որ, ինչպէս Ամերիկայի մէջ, Կրտսերներու Լիկայի կը վերածուի այս կերպով, եւ թէ ՀԲԸ Միութեան երկսեռ անդամներուն...»:⁶

Կիլիկիո կաթողիկոսարանի կողմից հրատարակվող «Հասկ»-ի 1937թ. առաջին համարում բերվում են այլ մանրամասներ այս հարցի շուրջ. «1934 մայիս 17ին ...Բաբգէն Կաթողիկոսն էլ խնդրուի ներկայ ըլ-

լալ Կեդր. Վարչութեան ժողովին (խոսքը ՀԵԸ-ի մասին է-Էդ.Մ.) ...Ժողովի օրակարգի միւսն էր.- Բարեգործականի հետ գործակցութիւն: Այս գործակցութեան առաջարկը բերուած էր ՀԲԸ Միութեան Գահիրէի Շրջ. Յանձնաժողովէն,- Ընկերակցութեան մէջ ընդունելու երիտասարդական ուրիշ խմբակցութիւններ ալ, անոնցմէ իրաքանչիւրին խմբական նկարագիրը պահելու պայմանաւ:- Խորհրդակցութենէ ետքը ժողովը կ'որոշէ պատասխանել Բարեգործականի Շրջանակայինի, թէ «Այսպիսի գործակցութիւն մը անպատեհութիւններ ունի եւ անկարելի է. փափագողները պէտք է պարզապէս միանան ՀԵ Ընկերակցութեան: Յաջորդ բանակցութիւններով, Բարեգործականը կը յօժարի ՀԵԸ-ը Կիլիկիոյ Կաթողիկոսարանին հովանիին ներքեւ շարունակելով հանդերձ, անոր գործերը դիւրացնելու համար տարեկան յատկացում մը ընել, եւ 1934 սեպտեմբեր 8ին կը վճարէ իր առաջին յատկացումը, 250 Անգլ. ոսկի... Այդ առիթով է նաեւ, որ կը վարձուի ՀԵԸ-ի Պէյրութի կեդրոնին շէնքը, նախկին սրահ «Գեղարուեստասիրաց Միութեան»...»:⁷

Դեպքերի նման ընթացքը հաստատում է նաեւ ՀԲԸ Միության 1934թ. տարեգիրքը, որում առաջին անգամ հատուկ տեղ է հատկացված «Յետ-դպրոցական դաստիարակութիւն» հարցին: Նշելով, որ Միության նպատակներից է գաղութահայության ցանուցիր երիտասարդության կազմակերպումը Միության հովանու ներքեւ եւ որ Միության որբանոցներից եւ վարժարաններից դուրս եկած երիտասարդները նույն այդ խնդրով դիմում են Միությանը, տեղեկագիրը այնուհետեւ հայտնում է. «...Ընդ առաջ երթալով Եգիպտոսի Շրջանակային Յանձնաժողովին առաջարկութեանց, նախ Սուրիոյ մէջ եւ յետոյ Եգիպտոսի, ձեռք առինք Երիտասարդական Միութեանց Կազմակերպումը, Բարեգործականի տուներու եւ Մարգարաններու հաստատմամբ: Առաջին շրջանին յատկացուցինք, իբրեւ նախափորձի ծախք, Ա/Ագլ./ Ո/Սկի/. 250, իսկ Գահիրէի ձեռնարկին համար Ա.Ո. 200»:⁸ Դժվար չէ նկատել, որ 1934թ. տեղեկագրում Հայ երիտասարդաց Ընկերակցությունը ընդհանրապես չի հիշատակվում նույնիսկ հատկացված գումարի առիթով: Բայց, ահա, հաջորդ՝ 1935թ. տեղեկագրում առաջին անգամ կարդում ենք. «...անմիջապէս Միութեան հովանաւորութեան ներքեւ առնուեցան Հալէպի եւ Պէյրութի մէջ արդէն գոյութիւն ունեցող Երիտասարդական Ընկերակցութիւնները, որ նախապէս Նիր Իսթ Ֆաունտէյշընի կողմէ կը նպաստաւորուէին եւ կը գտնուէին Անթիլիասի Կաթողիկոսարանին հսկողութեան ներքեւ»:⁹

Միությունը, իր հովանավորության տակ վերցնելով ՀԵԸ, անփոփոխ թողեց նրա կանոնադրությունը եւ կազմակերպական կառուցվածքը եւ միայն 1936թ. նախաձեռնեց Բեյրութում գտնվող ՀԵԸ Կենտրոնական

Գործադիր Մարմնի նոր կազմի ընտրությունը, որի արդյունքում աստեճապետի պաշտոնը վստահվեց Բյուզանդ Եղիայանին: 1930թ. սկսված «փոխանցման շրջանը», երբ երիտասարդական այս կազմակերպությունը գործեց նախ Ամերիկյան Նպաստամատույցի, ապա Կիլիկիո Կաթողիկոսարանի, իսկ 1934-ից՝ ՀԲԸ Միության հովանավորության ներքո, միանշանակ չընկալվեց կամ չընդունվեց նրա իսկ անդամների կողմից: Եղան ինչպես ձեռքբերումներ, այնպես էլ կորուստներ. «...անոր միացան կարգ մը կազմակերպություններ - Կրթասիրաց, Նուպարեան, իսկ անկէ հետագան կարգ մը անհատներ՝ միանալով Դաշնակցութեան եւ Հնչակեաններուն, Ռամկավարներուն եւ Հայ Համայնավարներուն: Սակայն առանց նուազագոյն վարանմանի, կարելի է ըսել թէ՛ 90% մնաց ՀԲԸ Միութեան ՀԵ Ընկերակցութենէն ներս: Թէեւ կարգ մը ներքին խլրտումներ վնասեցին Լիկային, սակայն եւ այնպէս, անկէ ներս տիրող մթնոլորտը, մաքուր մթնոլորտը, ոչ մէկ ուրիշ միութիւն կրցաւ ստեղծել. եւ ասիկա արտահայտութիւնն է հաւասարապէս՝ մնացողներուն, միացողներուն եւ միութենէն հեռացողներուն»:¹⁰

1936թ. ՀԵԸ-ի մասնաճյուղերը գործում էին Սիրիայի եւ Լիբանանի մի շարք քաղաքներում (Բեյրութում, Հալեպում, Դամասկոսում, Զահլեում, Թրիփոլիում, Հոմսում, Լաթաքիայում, Ալեքսանդրետում եւ այլուր), որոնց անդամների թիվն էր 826: Երկու տարի անց ՀԵԸ-ի մասնաճյուղերի թիվը հասավ 16-ի, իսկ անդամներինը՝ 1.800-ի: Նրա անդամներն էին հայ հասարակության գրեթե բոլոր խավերը՝ ուսանողներ, արհեստավորներ, մտավորականներ եւ այլք: ՀԲԸ Միության երիտասարդական կազմակերպության գործունեության երկու հիմնական ուղղություններն էին՝ մշակութայինը եւ մարզականը: Երեկոյան դասընթացներ (հայոց լեզու եւ պատմություն, օտար լեզուներ եւ այլն), գրադարան-ընթերցասրահներ, փողային եւ լարային նվագախմբեր, թատերական ներկայացումներ, պարահանդեսներ, այս ամենը ստեղծում էր որակապես նոր հոգևոր մթնոլորտ թե երիտասարդության եւ թե մեծահասակների համար: Պատահական չէր, օրինակ, որ Բեյրութի ՀԸ Ընկերակցության Անդրանիկ եւ Զարեհ Նուպար ակումբների մշտական այցելուներից էր քաղաքի հայ մտավորականությունը:

Մարզական շարժում

Խոսելով Լիգայի եւ ՀԵԸ-ի միջեւ գործունեության շարունակականության մասին՝ նախ եւ առաջ պետք է նշել սպորտը: Սպասելի էր, որ

ՀԵԸ-ի, ինչպես եւ որեւէ այլ երիտասարդական կազմակերպության համար, սպորտը վաղ թե ուշ պետք է դառնար գործունեության հիմնական ուղղություններից մեկը: Տվյալ դեպքում, սակայն, պետք էր միայն պահպանել եւ զարգացնել արդեն իսկ Լիգայի օրոք ձեւավորված ավանդույթները: Հետեւելով Լիգայի օրինակին, որը հայտնի էր իր ուժեղ ֆուտբոլային թիմով, ՀԵԸ-ն սկզբից եւեթ նույնպես մեծ հաջողություններ գրանցեց այդ մարզաձեւում, որը ընդհանրապես մեծ տարածում ուներ հայ երիտասարդների մեջ, եւ ՀԲԸ Միության փակվող որբանոցների մարզիկները հաճախ համալրում էին ՀԵԸ-ի խմբերը:¹¹ Սկսած 1930-ականների վերջից ՀԵԸ-ի ֆուտբոլային թիմերը գրեթե մշտապես, թեեւ տարբեր հաջողությամբ մասնակցեցին Լիբանանի եւ Սիրիայի տարբեր կարգի մրցաշարերում: Այդ մարզաձեւի էլ ավելի տարածմանը մեծ շարժում նպաստեցին Հայաստանից առաջին անգամ ժամանած Երեւանի «Սպարտակ» թիմի ելույթները 1959թ.:

Լիբանանում, ուր ՀԵԸ պետության կողմից ճանաչվում է «Անդրանիկ» անունով (Antranik Youth Association), նրա տղամարդկանց բասկետբոլի թիմը հիմնվեց 1948թ., եւ 1959-ից ի վեր այն դասվում է երկրի առաջնակարգ թիմերի շարքը: Բեյրութի ՀԵԸ-ի աղջիկների թիմը նույնպես երկրի ուժեղագույն թիմերից մեկն է, որը երեք տարի անընդմեջ (1998-2000թթ.) նվաճել է Լիբանանի չեմպիոնի կոչումը:

Սիրիայում՝ Հալեպի ՀԵԸ-ի մարզական կյանքը էլ ավելի է աշխուժանում 1950-ականին նոր ակումբ (Ազիզիե թաղամաս) տեղափոխվելուց հետո: Ֆուտբոլային խմբից զատ կազմավորվում են բասկետբոլի եւ վոլեյբոլի երկու թիմերը, որոնք նույնպես մասնակցեցին երկրի եւ քաղաքի մրցաշարերում: 1966թ. աղջիկների բասկետբոլի թիմը վեցերորդ անգամ անընդմեջ նվաճեց Սիրիայի չեմպիոնի կոչումը:

1955թ. ՀԵԸ-ի Կենտրոնական Վարչությունը Բեյրութում առաջին անգամ կազմակերպեց Նավասարդյան Խաղերը, որոնք հետագա տարիներին դառնալու էին ՀԲԸ Միության երիտասարդական շարժման ամենակարեւոր ավանդույթներից մեկը: Իսկ առաջին խաղերի մասին Միության տարեգրքում ասվում էր. «Երիտասարդաց Միութեանց գործունեության փառապսակը կազմեց Նաւասարդեան Խաղերու նշանակալից դէպքը, Պեյրութի մէջ, ապրիլ 11ին: Քաղապետարանի դաշտին վրայ, Լիբանանեան բանակի Ընդհանուր Հրամանատարին հովանաորութեամբ եւ Մեծի Տանն Կիլիկիոյ Կաթողիկոսական Տեղապահ Բարձր. Կ. Խաղ Արքեպիսկոպոսի նախագահութեամբ տեղի ունեցաւ այս աննախընթաց տօնակատարութիւնը: Անոր մասնակցեցան 600 աշխուժ եւ կրօնի երիտասարդներ եւ պարմանուհիներ, Հայ Երիտ. Ընկերակցութեան

Լիբանանի, Սուրիոյ եւ Յորդանանի կազմակերպութիւններէն, Գահիրէի եւ Ադէքսանդրիոյ ՀՄԸՄ (ի տարբերություն այլ երկրների, Եգիպտոսում ՀՄԸՄ-ը գործում է ՀԲԸ Միության հովանու ներքո-Էդ.Մ.) եւ Նուպար Միութենէն, Բարեգործականի Կիպրոսի Մելգոնեան Հաստատութենէն եւ Պէլրոյթի Յովակիմեան-Մանուկեան ու Դարուհի Յակոբեան Երկրորդական Վարժարաններէն»:¹²

Նույն՝ 1955թ. ՀԵԸ-ի Մարզական բաժինը Սիրիայի պետական հատուկ արտոնագրով ճանաչվեց մարզական միություն՝ Նէտի Մաշ'ալ (Ջահ) անունով: 1972թ. երկրի իշխանությունները՝ մարզական կյանքը կանոնավորելու նպատակով սահմանափակեցին մարզական միությունների քանակը, խոշորացնելով դրանք: Այդ պայմաններում նպատակահարմար էր ՀԵԸ-ի միացումը իրեն ամենամոտ՝ Հայ Մարմնամարզական Միություն եւ Վասպուրական կազմակերպությունների հետ: Այս նոր միության պաշտոնական անվանումն էր Նէտի Ուրուպէ: Երեք տարի անց, նկատի առնելով, որ ՀՄՄ-ի մարզական կյանքը դադարել էր, Նէտի Ուրուպէ-ի կազմում մնացին ՀԵԸ-ն եւ Վասպուրականը:

Սիրիայի եւ Եգիպտոսի ՀԲԸ Միության մարզական կազմակերպությունների պատմության ուշագրավ էջերից է նրանց համագործակցությունը այդ երկու երկրների միացումով ստեղծված Արաբական Միացյալ Հանրապետության տարիներին (1958-1961թթ.): «Մարզական Վարչությունը,- կարդում ենք մի հոդվածում,- օգտուելով Սուրիա-Եգիպտոս միացումէն, ու մանաւանդ սերտացնելու համար Սուրիահայ ու Եգիպտահայ գաղութներու փոխ-յարաբերութիւնները, 1960ի Յուլիսին պասքէթ արտի մանչերու խումբը...կ'ուղարկուէր 15 օրուան շրջապտոյտի մը համար Եգիպտոս, ուր ՀԵԸ Հալէպ, ՀԵԸ Պէլրոյթ, ՀՄԸՄ Ադէքսանդրիա, ՀՄԸՄ Նուպար՝ կ'ունենան երկու մարզական փառատօներ. առաջինը՝ Ադէքսանդրիոյ մէջ, երկրորդը՝ Գահիրէի: Նոյն տարուան Օգոստոս ամսուն, Ադէքսանդրիոյ ՀՄԸՄ Նուպարի պասքէթ արտի մանչերու խումբը կ'այցելէ Սուրիա, եւ զանազան մրցումներ կ'ունենայ Հալէպի եւ Դամասկոսի մէջ: Կ'այցելեն նաեւ Քեսապ ու շրջակայ գիւղերը: Եվ քանի որ զոյգ այցելութիւնները մեծ խանդավառութիւն ստեղծած էին երկու գաղութներու մէջ ալ, յաջորդ տարին ...ՀԵԸ-ի պասքէթ արտի մանչերու խումբը կրկին կը մեկնի Եգիպտոս...»:¹³ Արաբական Միացյալ Հանրապետությունը կազմալուծվեց 1961թ., սակայն, նրա գոյության տարիներին սկիզբ առած՝ Սիրիայի եւ Եգիպտոսի ՀԵ Ընկերակցությունների բասկետբոլի թիմերի նման փոխադարձ այցելությունները շարունակվեցին հետագա տարիներին եւս, ինչպես, օրինակ, 1998-1999թթ.:

Դեռեւս պատերազմի տարիներին՝ 1944թ. ապրիլին կազմավորվեց Հալէպի ՀԵ Ընկերակցության սկաուտական շարժումը՝ Հարություն Գասպարյանի ղեկավարությամբ: Առաջին 42 սկաուտները բաժանվել էին տարիքային չորս խմբերում՝ «Առյուծ», «Արծիվ», «Գայլ» եւ «Աքլոր»:
Չնայած իր համեմատաբար սակավաթվությանը, ՀԵ Ընկերակցության սկաուտական խումբը սկզբից եւեթ աչքի էր ընկնում իր կազմակերպչածությամբ եւ կարգապահությամբ, ինչպես նաեւ գեղեցիկ համազգեստով: Պատահական չէ, որ ՀԵ Ընկերակցության սկաուտները մշտապես հրավիրվում էին մասնակցելու տարբեր ձեռնարկների: Վարդան Սվաճյանը իր հոդվածում բերում է Բերիոյ թեմի առաջնորդ Զարեհ Ծ.Վարդապետ Փայասյանի (հետագայում Կիլիկիո Աթոռի գահակալ) հետեւյալ ամսակը, ուղղված ՀԵ Ընկերակցության վարչությանը. «Հանրապետութեան Նախագահ Նորին Վսեմութիւն Օրբքի Պէլ Բուաթլի, վաղը, չորեքշաբթի, 7 Նոյեմբեր 1945, կէսօրէ առաջ ժամը 11ին պիտի հանի այցելել Ազգային Առաջնորդարան: Կը փափագիմ որ ՀԵ Ընկերակցութեան արիւններէն 50 հատ, վաղը առաւօտ ժամը 10ին, իրենց խմբապետին առաջնորդութեամբ ներկայ ըլլան Առաջնորդարանի բակը, ընդունելու համար Նորին Վսեմութիւնը»:¹⁴

Ջուտ քանակի առումով 1940-ականների վերջերին արձանագրվեց Երիտասարդաց Միությունների անդամների թվի որոշ նվազում: Այսպես, 1948թ. տվյալներով ՀԵԸ-ն այդ երկրներում ուներ 12 մասնաճյուղ եւ մոտ 1.100 անդամ: Դրա պատճառներից մեկը 1946-1948թթ. հայրենադարձությունն էր, երբ մեծ թվով հայեր, այդ թվում նաեւ ՀԵԸ տարբեր տարիքի անդամներ արտագաղթեցին Խորհրդային Հայաստան: Դա, սակայն, չանդրադարձավ այդ կազմակերպության կենսունակության վրա: 1947-1948թթ. ՀԵ Ընկերակցության Կենտրոնական Վարչության որոշումով Բասալբեքում տեղի ունեցան Հալէպի, Դամասկոսի եւ Բելրոյթի սկաուտների առաջին եւ երկրորդ միջմասնաճյուղային բանակումները: Նման բանակումների կազմակերպումը Սիրիայի եւ Լիբանանի տարբեր վայրերում հետագա տարիներին դարձավ ՀԵ Ընկերակցության ավանդույթներից մեկը: ՀԵԸ-ի սկաուտական շարժումը Լիբանանում 1970-ականների սկզբին համախմբում էր շուրջ 400 արիներ եւ արեւուշներ: 1960-ական թթ. կեսերից սկիզբ է առնում նաեւ ՀԵ Ընկերակցության արեւուշական շարժումը Հալէպում: 1993թ. Բելրոյթում, երկար ընդմիջումից հետո, տեղի ունեցավ ՀԵԸ-ի սկաուտական 4-րդ հավաք-բանակումը, որին մասնակցեցին Ալեք Մանուկեան, Անդրանիկ-Անթիլիաս, Անդրանիկ-Սեւան եւ Անդրանիկ-Ջահլէ մասնաճյուղերի երիցական, սկաուտական, գայլիկային, արեւուշական եւ արծվիկական խմբերը, ինչպես

նաեւ ՀԵԸ-ի Հալեայի մասնաճյուղի փողային նվազախումբը: Լիբանանի ՀԵ Ընկերակցության սկաուտական շարժման աշխուժացման մասին է վկայում նաեւ նրա անդամների թվի նկատելի աճը՝ 1998թ. շուրջ 800 էր:

Հայաստան-սփյուռք հարաբերությունների պատմության մեջ առանձնահատուկ կարեւորություն ունեցան 1999-2002թթ. Երեւանում կայացած Առաջին եւ Երկրորդ Համահայկական մարզական խաղերը: Խորհրդանշական է, որ այդ խաղերի գաղափարը ծնունդ առավ 1996թ. Փարիզում կայացած ՀԵ Ընկերակցության 14-րդ Նավասարդյան Խաղերի ժամանակ: Հետագա չորս տարիների ընթացքում Համահայկական խաղերի համաշխարհային կոմիտեն՝ նախագահությամբ Հայաստանի Արտաքին գործերի նախարարության պատասխանատու աշխատակից դեսպան Աշոտ Մելիք-Շահնազարյանի, լուրջ աշխատանք կատարեց այդ գաղափարը իրականություն դարձնելու համար: Իր իսկ վկայությամբ «...մեր նախաձեռնող կոմիտեն ունեցաւ մեծ աջակցութիւն Բարեգործականի կողմէ. միջազգային եւ բարոյական գետնի վրայ: Ես շատ ուրախ եմ որ տարբեր երկրներու բոլոր քաղաքներէն Բարեգործականը պատրաստ էր գործակցելու ՀՄԸՄ-ի եւ ՀՄՄ-ի հետ որպէսզի դրական արդիւնքներու հասնինք: Ծատ շնորհակալ եմ ՀԲԸ Միութենէն եւ բոլոր ներկայացուցիչներէն, որովհետեւ շատ դրական դեր խաղցան»:¹⁵ Պատահական չէ, որ դեսպանը նշում էր համագործակցության պարագան, քանզի Երեւանում կայացած Խաղերին առաջին անգամ մասնակցում էին ոչ թե տարբեր միություններ, այլ առանձին քաղաքներ ներկայացնող հավաքական թիմեր, որոնցում ընդգրկված էին 1.750 մարզիկներ: Առաջին անգամ էր, որ, այսպէս կոչված, «ավանդական» սփյուռքի երիտասարդությունը հանդիպում էր հետխորհրդային տարածքի երկրների (Ռուսաստան, Վրաստան եւ այլն) հայազգի հասակակիցների հետ: Նման բարեկամական միջհամայնքային, միջմիութենական շփումները եւ, միեւնոյն ժամանակ, սփյուռքահայ երիտասարդների նորահաստատ բարեկամությունը իրենց հայաստանցի հասակակիցների հետ, աննախադեպ երեւոյթ էին հայ իրականության համար:

Համահայկական Խաղերի կազմակերպական կոմիտեի կազմում ընդգրկված էին ՀԲԸ Միության Երիտասարդական հարցերի հանձնախմբի (Central Youth Committee) անդամներ Հրաչ Մանուկյանը, Հրանդ Պարտազգյանը, ինչպէս նաեւ Լեւոն Հասրբճյանը եւ այլք: Վերջիններիս վկայությամբ, Խաղերի իրականացման գործում առավել նշանակալից էր Լոս Անջելըսի ՀԲԸՄ-ՀԵԸ-ի պատասխանատու անդամ Ալլաբեր Պոյաճյանի դերը: «Հոս կ'ուզեմ անդրադառնալ,-ասում էր Հրաչ Մանուկյանը,- ՀԲԸ Միութեան Կեդրոնական Վարչական Ժողովի անդամ պրն. Ալլաբեր

Պոյաճեանի միջազգային աջակցութեան, հակառակ ամոր որ ինք համեստօրէն չ'ուզէր հրապարակել՝ ան 50.000 \$ տրամադրեց «Տինամօ» մարզադաշտի վերանորոգման, եւ նոյնպէս 65.000 \$ օգտակար եղաւ Համահայկական Խաղերու պիտոնէն հաւասարակշռելու»:¹⁶ Ալլաբեր Պոյաճյանի մասն գործելակերպը բնական է թվում, երբ կարդում ես հետեւյալ տողերը նրա հարցազրույցից. «Մենք մեր կեանքի ընթացքին եղած ենք եւ պիտի մնանք նեցուկ հայ երիտասարդութեան, հայ ազգին եւ մեր սիրելի Հայաստանին»: Եվ այսպէս՝ ՀԵ Ընկերակցության մասին. «Այնքան ատեն որ մենք կ'սպրիմք պէտք է թիկունք կանգնինք այս երիտասարդներուն, եւ պէտք է շիտակ ճանապարհը ցոյց տանք անոնց: ՀԵԸ-ը շատ կարեւոր է: Առանց ՀԵԸ-ի Բարեգործական չըլլար, ինչպէս նաեւ առանց ՀԲԸՄ-ի ՀԵԸ չըլլար: ՀԵԸ-ը կը հասցնէ ծրարակաւ մի հատիկներ որպէսզի ՀԲԸՄ-ը մշտադալար մնայ: Անձնապէս եղած եմ ՀԵԸ-ական եւ մինչեւ հիմա կը մնամ ՀԵԸ-ական, քայց նաեւ Բարեգործականի գործունեայ անդամ: Եթե ես վաղ հասակէս չդաստիարակուէի ՀԲԸՄ-ՀԵԸ-ի գաղափարականով, այսօր ժողովորդիս օգտակար ըլլալու պարտաւորութիւնը իմ կեանքիս գերագոյն նպատակներէն մին եղած պիտի չըլլար»:¹⁷

Մշակութային ծրագրեր

Նախքան ՀԵ Ընկերակցության մշակութային գործունեության մասին խոսելը, անհրաժեշտ է նշել հետեւյալը: Արդեն նշվել է, որ տարբեր պատճառներով անկարելի է հավասար չափով ներկայացնել ՀԲԸ Միության գործունեությունը թե ըստ տարբեր ոլորտների եւ թե ըստ տարբեր երկրների: Այդ իսկ պատճառով որոշ հարցերի քննարկումը կատարվում է առավելապես Միության այս կամ այն մասնաճյուղի օրինակով, ինչը, անշուշտ, որեւէ չափով չպետք է ընկալվի որպէս մնացած մասնաճյուղերի գործունեության անտեսում կամ թերագնահատում:

Բեյրութը, լինելով այդ տարածաշրջանի ամենակարեւոր նավահանգիստ քաղաքը եւ առեւտրական ու ֆինանսական կենտրոններից մեկը, վաղուց ի վեր առանձնացել է տարբեր մշակույթների, տարբեր դավանանքների համագոյակցությամբ: Դրա շնորհիվ այս քաղաքին բնորոշ է եղել ուրույն՝ արաբական այլ քաղաքներից տարբեր կենսաձեւ եւ հոգեւոր մթնոլորտ, որը մեծապէս դնուրացնում էր տեղի քրիստոնյա ժողովուրդների կենսագործունեությունը:

Այլ էր Հալեայի պարագան, որը ժամանակի ընթացքում կորցնելով իր, որպէս արաբական աշխարհի կարեւոր կենտրոններից մեկի դերը, աս-

տիճանաբար վերածվեց գավառական մի քաղաքի՝ իր բոլոր առանձնահատկություններով հանդերձ: Հալեպին ներհատուկ մշակութային-հոգեւոր մթնոլորտում, հայերը իրենք էին հաճախ հանդես գալիս որպես ուսուցիչներ՝ առաջինը ներմուծելով եվրոպական մշակույթի եւ ճարտարվեստի այս կամ տարրերը, կամա թե ակամա, հաղորդակից դարձնելով դրանց տեղի արաբ ժողովրդին: Օրինակներից է Հալեպում ՀԵԸ-ի թատերական շարժումը, որը սկիզբ առավ դեռես 1933-1934թթ.: Հակոբ Միքայելյանը գրում է. «...այն օրերուն երեւի թատերախումբերը այսօրուան նման ինքնութիւն մը չեն ունեցած: Այս կամ այն միութիւններէն խմբուած տղաք խաղացած են թատերգութիւններ եւ ակամայ անոնք վերագրուած են այս կամ այն միութեան»:¹⁸ Ըստ նույն հեղինակի, ՀԵԸ-ի թատերական շարժման պատմության մեջ նոր շրջան է սկսվում 1947թ., երբ Գրիգոր Մելքոնյանը իր ղեկավարած «Երեսան» թատերախմբով միանում է ՀԵ Ընկերակցությանը: «Գ.Մելքոնեան...կը հիմնէ ՀԵԸ-ի թատերական նոր կազմ մը, եւ ըստ իր հաստատումին, թատերախումբը կը կոչուի «Ադամեան» անունով: Մեզի համար,- ընդգծում է Հ.Միքայելյանը,- շատ հետաքրքրական նորութիւն մը եղաւ այս յայտնութիւնը, որովհետեւ ինչպէս բոլորին ծանօթ է, ՀԵԸ-ի թատերախումբը պաշտօնապէս «Ադամեան» կոչուեցաւ 1961ին»:¹⁹ Ոգեւորված այս թատերախմբի հաջող գործունեությանը, ՀԵԸ-ի որոշ անդամներ թատրոնը «...աւելի զօրացնելու եւ հաստատ հիմերու վրայ դնելու հեռանկարով ...կը ծրագրեն ու կը յաջողին թատերախումբին մաս կազմելու հրաւիրել հալեպահայ ծանօթ եւ վաստակաւոր դերասան Պետրոս Քելեշեանը, որուն զլիարորութեամբ կը հիմնուի Ադամեան թատերախումբը, 1961»:

Հալեպում թատերական գործունեության այս նոր աշխուժացմանը մեծապէս նպաստեցին Բելրութից եկող ազդակները, ուր 1956-ին կազմավորվել էր ՀԵԸ-ի Երգի եւ պարի խումբը, իսկ քիչ անց՝ 1960-ին կազմավորվեց նաեւ ՀԵԸ-ի Վահրամ Փափագեան հանրաճանաչ թատերախումբը:

Հալեպի Ադամեան թատերախմբի առաջին ներկայացումն էր Մոլիերի «Երեսակայական հիվանդը» կատակերգությունը. «Պ.Քելեշեան՝ Մոլիերով նոր ճաշակ մը եւ կատակերգական թատրոնի նոր հասկացողութիւն մը տուաւ հալեպահայութեան, որ ընդհանրապէս դիտած էր միմիայն թեթեւ զանեշտներ, որպէս կատակերգութիւն, եւ ամենաբախտաւոր պարագային՝ Պարոնեան կամ Օտեան: Ուրեմն, «Երեսակայական հիւանդ»ով, Պետրոս Քելեշեան նոր շրջան մը սկսաւ Հալեպի եւ ՀԵԸ-ի մէջ»:²⁰ Որոշ ժամանակ անց Ադամյանին կից կազմակերպվում է նաեւ Աշակերտական թատերախումբը, որի առաջին ներկայացումը Հ. Պարո-

նյանի «Շողոքորթը» պիեսն էր: 1970թ. Ադամյան թատերախումբը առաջին անգամ զլիարորում է պրոֆեսիոնալ բեմադիչ Գրիգոր Քելեշեանը՝ Երեսանի Գեղարվեստաթատերական ինստիտուտի շրջանավարտ: Այդ ժամանակից ի վեր թատերախմբի գործունեությունը կրեց որակական փոփոխություններ եւ որոշ չափով գերազանցեց զուտ սիրողական թատրոնի մակարդակը: Ինչպէս նշում է Հ.Միքայելյանը, «Ադամեանը առաջինը եղաւ Սուրիահայ պատմութեան մէջ (եւ ըստ արաբական թերթերու՝ Սուրիոյ պատմութեան մէջ), որ հիմնեց Մանկա-պատանեկան թատրոն, ...առաջինը եղաւ Հալեպահայ թատերախումբերու մէջ, որ ունեցաւ իր մնայուն տեքորիսթը, ...որ Հալեպի մէջ իրագործեց դարձող-բեմի գաղափարը...»:²¹

ՀԵ Ընկերակցությունը իր մշակութային գործունեության մեջ կարեւոր տեղ էր հատկացնում նաեւ երաժշտությանը ու դեռես 1933թ. ձեռնամուխ եղավ երգչախմբի եւ նվագախմբի կազմավորմանը: Այդ տարիներին երգի եւ պարի դասերը ընդգրկված էին ՀԵԸ-ի դասընթացների ցանկում եւ կարեւոր միջոցներից էին հայ պատանիներին ու երիտասարդներին հայ մշակույթին հաղորդակից դարձնելու համար: «Ընկերակցութեան պատասխանատուները կը դիմագրաւեն շատ մը դժուարութիւններ: Չկան հայերէն դասագրքեր, ձայնագրուած երգեր, բայց կայ ուսուցիչի եւ մանուաւոր՝ նիւթականի տագնապ: Բայց եւ այնպէս, հակառակ բոլոր տեսակի խոչընդոտներուն, յամաօրէն կը շարունակուին այդ դասերը, յաղթահարելով բոլոր դժուարութիւնները: Այսօր, տասնամեակներ ետք,- նշվում է այդ հարցին նվիրված մի հոդվածում,- արդար հպարտութեամբ պետք է յայտարարուի, թէ ՀԵԸ իր մեծ ներդրումը ունեցաւ տարագրութենէ մագապործ սերունդին հոգիին ու մտքին մէջ հայ երգն ու բանը դրոշմելու»:²² Այդ գործում հատկապէս մեծ էր հայտնի կոմպոզիտոր եւ խմբավար Համբարձում Պերպերյանի ավանդը, որը 1935-1938թթ. Հալեպում վարում էր ՀԵԸ-ի քարտուղարի պաշտոնը: 1936թ. նա հիմնում է ՀԵԸ-ի մի նոր երգչախումբ, որը համերգներով հանդես է գալիս Հալեպում, Ալեքսանդրետում եւ այլուր: ՀԵԸ-ի եւ իր անձնական նախաձեռնությամբ նա ներկայացնում է «Անուշ», «Սայաթ Նովա», «Աշուղ Ղարիպ» եւ այլ օպերաներն ու օպերետները, որոնց մասնակցում էր նաեւ ՀԵԸ-ի երգչախումբը: 1940-ական թթ. սկզբին առաջին անգամ կազմավորվում է ՀԵԸ-ի սեփական նվագախումբը:

Հալեպահայության մշակութային կյանքի ամենանշանակալից դեպքերից էր ՀԵԸ-ի նորաստեղծ Սպենդիարեան երգչախմբի առաջին ելույթը՝ Ժիրայր Իսկենյանի խմբավարությամբ, 1953թ. դեկտեմբերի 23-ին: Ընդհանրապէս իր կատարողական բարձր արվեստի եւ հարուստ երգացանկի,

երգչախումբը կարճ ժամանակում մեծ ճանաչում ստացավ ոչ միայն հայ, այլև արաբ ունկնդիրների մոտ: «Հալեպի Արաբական Երաժշտանոցի Տնօրեն՝ Ուսթեզ Հաշեմ Ֆանսա, չի խնայեր իր աջակցությունն ու քաջալերանքը մեր երգչախումբին: Ինքն է, որ յաճախ արաբերեն երգացանկը ճոխացուցած է, մեզի տրամադրելով նպատակայարմար երգեր, հսկած անոնց ճգրիտ կատարման: Առաջադրներեն ըլլալով արաբական աշխարհին, շատ մը արաբերեն երգեր դաշնաորելով, քառաձայնի վերածած է, գանոնը Սպենդիարեանի միջոցաւ հրամցնելով սուրիական ժողովուրդին: Իր այս մեծ ծառայությունը՝ արաբերեն երգերու կատարումը նոր մեկնաբանութեամբ եւ մանաւանդ հայկական երգչախումբի միջոցաւ հրամցուած, արդեօք արգասիքը չէ՞ արաբ-հայ մշակույթի գործակցութեան, եւ ճիշդ այդ պատճառաւ, հայրենի կառավարությունը չուշացաւ տալու իր գնահատականը՝ երբ Սպենդիարեան երգչախումբի հետ միասին Ուսթեզ Հաշեմ Ֆանսա եւս հրաիրուեցաւ Հայաստան այցելութեան»:²³

ՀԵԸ-ի Սպենդիարեան երգչախումբի ստեղծագործական կենսագրության կարեւոր էջերից էր նրա մասնակցությունը Երեւանում Ալեքսանդր Սպենդիարյանի ծննդյան 100-ամյակին նվիրված հանդիսություններին: Ավելի քան երկու շաբաթ տեւած այդ այցելության ընթացքում նրանց ելույթների շնորհիվ Հայաստանի ժողովուրդը եզակի հնարավորություն ստացավ ծանոթանալ սփյուռքի երգչախմբային արվեստի հետ:

1955թ. Հալեպում սկսեց գործել Ասլամազեան լարային քառեակը: Նրա առաջին կազմի անդամներից էր (երկրորդ ջութակ) ՀԲԸ Միության հայտնի գործիչ՝ ակնաբույժ Ռուպերտ Ծեպեճյանը, որը տարիներ անց գրում էր. «Ամաթեօրական (սիրողական-Էդ.Մ.) սոյն ձեռնարկին ներշնչումը կու գար Կոմիտասի անուան Հայկական Քառեակէն, որը այդ օրերում կը գործէր Մոսկուայի մէջ. անոր արտակարգ յաջողություններու լուրերը մեզի հասած էին հայրենի մամուլէն, իսկ երաժշտութիւնը մեզ դիտած էր Երեւանի ուստիոկայանէն: Այդպէս այ, նորաստեղծ քառեակը Հալեպի մէջ կը մկրտուէր Սերկէյ Ասլամազեանի անունով, Կոմիտասի Քառեակի հիմնադիր, թաւ ջութակահար, անգուգական մշակողը Կոմիտասի երգերու լարային քառեակի համար»:²⁴ Խորհրդանշական էր, որ Ասլամազեան քառյակի առաջին համերգը կայացաւ ՀԲԸ Միության նորահաստատ Լազար Նաճարեան դպրոցի դահլիճում, 1956թ., իսկ վերջինը՝ 1975թ. Մեծ Եղեռնի 60-ամյա տարեդարձի համագային հանդիսության առիթով: Ռ.Ծեպեճյանի խոսքերով, «Մեծ հուսակնություններ չուներ Ասլամազեան Քառեակը. այսուհանդերձ, արուեստի քառուղիներէն հեռու այս գաղութի պայմաններում, ան ունեցաւ 20-ամեայ ճշելի գոր-

ծուկություն, հարստացնելով գաղութիս հաւաքոյթներուն ու հանդէսներուն գեղարուեստական յայտագրերը»:²⁵

Երեւի թե անբնական կոչույթներ, եթե սփյուռքի երիտասարդ սերունդը բավարվեր լոկ ազգային կամ դասական երաժշտությամբ, որքան էլ զգար ու գիտակցեր նրանց կարեւորությունը: Երիտասարդները, որոնք ձգտում էին հնարավորին չափ հետեւել նաեւ արեւմտյան արդիական, այսպէս կոչված, էստրադային երաժշտությանը, լինի ձայնասկավառակների կամ ռադիոյի միջոցով, վաղ թե ուշ պետք է փորձեին իրենց ուժերը նաեւ այդ ասպարեզում: ՀԵԸ-ի պարագայում դա տեղի ունեցավ 1963թ., երբ նրա մի քանի անդամների նախաձեռնությամբ կազմավորվեց «Տիգր Եանկ Սթարզ» («Երիտասարդ աստղեր») էստրադային նվագախումբը: Սկզբնական շրջանում այս խումբը ելույթներ էր ունենում հիմնականում ՀԲԸ Միության եւ ՀԵԸ-ի կազմակերպած տարբեր հանդէսներում եւ համերգներում, սակայն ձեռք բերելով որոշ հմտություն եւ փորձառություն, նա սկսեց հանդես գալ հրապարակային համերգներով: Նվագախմբի համընդհանուր ճանաչմանը հատկապէս նպաստեցին նրա համերգները Բելյուրում, ՀԲԸ Միության Յովակիմեան-Մանուկեան վարժարանի սրահում, 1974թ.:

Երկրորդ Աշխարհամարտից հետո թե Բելյուրում եւ թե Հալեպում ՀԲԸ Միության եւ ՀԵ Ընկերակցության գործունեության արդյունավետությունը մեծապէս պայմանավորված էր Բարեգործական Տների կամ Ակումբների առկայությամբ: Դրա վկայությունն է Հալեպի Բարեգործական Տան կամ, ինչպէս այն ընդունված էր կոչել՝ Բարեգործական Ընտանեկան Ակումբի գործունեությունը:

Մինչեւ 1947թ. Հալեպի Հայ Երիտասարդաց Ընկերակցության ակումբը տեղակայված էր քաղաքի հյուսիսային բնակելի թաղի ծայրամասում գտնվող շենքերից մեկում, որն ուներ ընդամենը չորս սենյակ (նրանցից մեկը տրամադրված էր ՀԲԸ Միությանը), մեկում՝ դաշնամուր: Ծեմքը ուներ ընդարձակ բակ, ուր թատերական ներկայացումների եւ այլ հանդէսների ժամանակ տեղավորվում էին հանդիսատեսները: Նման պայմաններում, բնականաբար, հնարավոր էր միայն սահմանափակ գործունեություն: Երկրորդ Աշխարհամարտի ավարտից հետո, երբ դաշնակիցների գորքերը մեկնեցին Հալեպից, ազատվեց նաեւ ֆրանսիացիների կողմից զբաղեցված շենքը՝ Ֆրանսիական ակումբը, որը գտնվում էր Մազլումյանների պատկանող պատմական Օթել Պարոնի դիմաց: ՀԲԸ Միության երիտասարդ անդամների որոշումը՝ այդտեղ փոխադրել Միության գրասենյակը եւ ՀԵ Ընկերակցության ակումբը, արժանացավ Սիրիայի Շրջանային Հանձնաժողովի եւ Եգիպտոսի կենտրոնական Հանձնա-

ժողովի հավանությանը, որոնց հատկացված դրամական միջոցներով էլ շենքը նորոգվեց և կահավորվեց: Այդ նոր շենքի անհամեմատ ավելի մեծ հարմարությունները (պարտեզ, ընդարձակ՝ 700 տեղանոց սրահ, 8 սենյակ և այլն) հնարավոր դարձրին ՀԵ Ընկերակցության բազմաբնույթ և աշխույժ գործունեությունը սկսած 1948թ.: ՀԵ Ընկերակցության այդ տարիների ղեկավարներից Լեոն Պերդուտյանը վերհիշում էր. «Ակումբը օժտուած էր պիլյարտոյով մը. արտօճուած էին նարտի և թուղթի խաղերը. ազատութիւններ՝ որոնք օրին ոմանց խորթ թուեցան կենցաղային մեր վարք ու բարքին: Զմռան շրջանին շենքին մէջ, իսկ գարնան ալ պարտեզը, երկսեռ անդամներ կ'օգտուէին զովացուցիչներէ, խմիչքներէ և աղանդերներէ: Նորութիւն էր: Ակումբէն ներս, նորութիւն էր նուագախումբն ալ, որ հաճելի մթնոլորտ մը կը ստեղծէր երեկոյեան, հայերէն և օտար երգերու կատարումով: Մէկ մէկ, ելոյթ կ'ունենային անգամ եվրոպացի արուեստագէտներ»:՝²⁶ Այս «խորթ թվացող» նորամտություններին զուգահեռ, Ակումբում սկսեցին գործել նաև կրթական, մշակութային, օրիորդաց, տիկնանց, սկաուտական և այլ հանձնաժողովներ ու մարմիններ:

Այդ տարիների Միության Հալեայի մասնաճյուղի անդամների հետաքրքրությունների ու մտավոր զարգացման մասին կարելի է դատել հենց միայն 1950թ. Ակումբում կազմակերպված «վիճաբանական» երեկոներից: Դրանցից առաջինը նվիրված է եղել Կոստան Զարյանի «Տատրագոմի հարսը» վեպին, մյուսը՝ «Վասակի դատավարությունը», ավարտվել է հինգ հոգուց բաղկացած դատական կազմի հետևյալ վճիռով. «Վարդանանց ժողովրդային ապստամբությունը պատմական անհրաժեշտություն մըն էր և Վասակ դատապարտելի է Հայոց պատմութեան մէջ»:՝²⁷ Ուշագրավ է երրորդ երեկոյի ընթացքում քննարկված հարցը՝ «Էօթանագիա» (անդորր մահբերում երբ անխուսափելի է), մի հարց, որը, խիստ այժմեական լինելով հանդերձ, չի ստացել իր միանշանակ լուծումը նաև այսօր՝ ավելի քան կես դար անց: Բացի այդ, մոտ մեկ ու կես տարվա ընթացքում (մայիս 1949- հունվար 1951) ՀԲԸ Միության ակումբում կազմակերպվել էր 14 դասախոսություն, նվիրված գրականության, ճարտարապետության, հայ ժողովրդի և եկեղեցու պատմության, երիտասարդության և այլ հարցերի: Զեկուցողների թվում էին Գարեգին Ա. կաթողիկոսը, պրոֆ. Գափլանը (Գափլանյան), Բյուզանդ Եղիայանը, Ամերիկահայ թեմի առաջնորդ Տիրան եպիսկոպոս Ներսյանը, վերապատվելի Եղիա Քասունին, «Երիտասարդ հայուհի» ամսագրի խմբագիր Սիրան Սեզան և այլ հայտնի դեմքեր: Գրեթե նույն ժամանակահատվածում մեծ թվով ձեռնարկներ էին կազմակերպվել ՀԵ Ընկերակցության և նրա

տարբեր հանձնախմբերի կողմից. Գրիգոր Նարեկացու 1000-ամյակին նվիրված հանդիսություն, թատերական ներկայացումներ, կար ու ձեռի դասընթացներ, ամառային անվճար դասընթացներ աշակերտության համար և այլն:

1955թ. Հալեայի մասնաճյուղը հիմնեց մինչ օրս գործող Սարեան Ակադեմիան, որը հալեպահայ երիտասարդության համար դարձավ արվեստի յուրահատուկ մի տուն, ուր նրանք հնարավորություն են ստանում զարգացնել և կատարելագործել իրենց ընդունակությունները նկարչական, փորագրական, ճարտարապետական, գծագրության և այլ բաժիններում:

Հալեայի ՀԵ Ընկերակցության այդ տարիների գործունեության կարևոր արդյունքներից էր Ուսանողական բաժնի ստեղծումը 1950թ.: Դեռևս ձևավորման շրջանում ՀԵԸ կազմում կային օտար բարձրագույն կրթական հաստատությունների ուսանողներ: Հայկական մասն հաստատությունների չգոյության պատճառով մասն հայ երիտասարդների քանակը քաղաքում տարեցտարի աճում էր: Զրկված լինելով իրենց հայագրի հասակակիցների հետ մշտական շփումներից, նրանք կամա թե ակամա ժամանակի ընթացքում օտարվում էին ազգային կյանքից: Նորաստեղծ Ուսանողական բաժնի հիմնական նպատակն էլ հենց այն էր, որ «...երիտասարդ-երիտասարդուհիները քով-քովի բերել, մոյն հարկի տակ և ամոնց համար ստեղծել հայկական ջերմիկ մթնոլորտ մը: Առ այդ կը խմբագրուի Ուսանողական յատուկ Ծրագիր-Կանոնագիր մը, Ընկերակցութեան սկզբունքներուն համաձայն»:՝²⁸ Երիտասարդությանը ազգային արժեքներին ծանոթացնելու հիմնական միջոցներն էին երաժշտական, գրական, պատմական և այլ դասախոսությունները և հանդեսները, որոնց իրականացման ձեւերը, բնականաբար, փոփոխվում, առավել արդյունավետ էին դառնում ժամանակի ընթացքում: Այսպես, 1960թ. ստեղծվեց Ուսանողականի թատերախումբը՝ կազմված մեծամասնությամբ Միության Լ.Նաճարեան-Գ.Կիլիպէնկեան վարժարանի աշակերտներից: Ուսանողականը առաջին անգամ կազմակերպեց շախմատի մրցում, «առաջին անգամ ըլլալով կը կազմակերպէ ընդհանուր զարգացման մրցում մը, ուսանողներու և ոչ ուսանողներու միջեւ, ...«Բէլլի Բէլլըր» (հանելուկ արշաւ), որ մեծ նորութիւն էր քաղաքիս համար»:՝²⁹ և այլն:

Մինչև 1957-1958թթ. Ուսանողական Բաժնի վարչության անդամները օտար, ոչ հայկական երկրորդական վարժարաններից էին: Սակայն, երբ այդ տարի ՀԲԸ Միության Լ.Նաճարեան-Գ.Կիլիպէնկեան վարժարանը ունեցավ իր երկրորդական բաժինը, վարչությունը համալրվեց վերջինի աշակերտներով նույնպես: Այդ տարիներին Ուսանողականի վարչու-

թյունը սկսեց կազմակերպել հավաքություններ՝ հայկական նախակրթարանների շրջանավարտների մասնակցությամբ, նրանց իրենց գործունեությանը ծանոթացնելու նպատակով: Դրա շնորհիվ ապահովվում էր թե ՀԵԸ-ի եւ թե Ուսանողական բաժնի անդամության հավելումը եւ գործունեության ընդարձակումը: Ավելի ուշ՝ 1970-ականների վերջին Ուսանողական Բաժինը սկսեց համալրվել նաեւ երկրի տարբեր համալսարանների հայ ուսանողներով: Արդյունքում՝ հնարավոր դարձավ Ուսանողականի «Էրեբունի» խմորատիպ պարբերականի հրատարակումը, Քեսապի ՀԲԸ Միության կազդուրման կայանում հավաք-բանակումների կազմակերպումը եւ այլն: 1956-ին Հայ համալսարանականներու (Ուսանողաց) միությունը իր ավելի քան 150 անդամներով սկսեց գործել նաեւ Բելյուրում:

«Խօսնակ», «Գեղարդ»

1957թ. ՀԲԸ Միության՝ նրա Արեւելքի երկրներում գործող մասնաճյուղերի պատմության ամենակարեւոր իրադարձություններից էր «Խօսնակ» ամսագրի հրատարակումը Բելյուրում: Պաշտոնաթերթ ունենալու գաղափարը, որը վաղուց էր հասունացել, հատկապես կարեւորվեց 1955-1956թթ. եկեղեցական տազնապի շրջանում, երբ անհրաժեշտ էր հստակ արտահայտել Միության բացասական դիրքորոշումը Կիլիկիո կաթողիկոսության որդեգրած քաղաքականության վերաբերյալ: ՀԲԸ Միության Վետերանների հանձնախմբի նախաձեռնությամբ ստեղծվեց հատուկ վարչություն՝ Պողոս Պեյ Թուրսարգիսյանի ատենապետությամբ, որն էլ իրականացրեց «Խօսնակ» ամսագրի հրատարակումը: Ամսագրի առաջին համարում այսպես էր բացատրվում նրա հիմնական նպատակը. «արտասահմանի ամէնէն հոծ հայութիւնը կը գտնուի Սուրիոյ եւ Լիբանանի մէջ, եւ այս շրջաններուն գործունէութեան մանրամասն հետապնդումին համար անհրաժեշտ էր ստեղծել անոր «Խօսնակը» ...համադրելու եւ զօրացնելու համար (ՀԲԸ Միության) բոլոր գործունէութիւնները, զանոնք սեփականութիւնը դարձնելու համար համայն հայ ժողովուրդին, անհրաժեշտ էր ունենալ օրկան մը, որ ծառայէր իբր հոգեկան ու բարոյական կապ Բարեգործականի բոլոր հաւատաւորներուն միջեւ»:³⁰

Ամսագիրը, լինելով Լիբանանի ՀԲԸ Միության եւ ՀԵ Ընկերակցության պաշտոնաթերթը, միաժամանակ իր էջերը մշտապես տրամադրեց Սիրիայի քույր կազմակերպությունների գործունեության լուսաբանմանը: «Խօսնակի» պատմության մէջ առավել դժվարին եղան քաղաքացիական պատերազմի տարիները, որի գրեթե ողջ ընթացքում նրա գլխավոր

խմբագիրն էր Պարույր Աղապաշյանը: Յովակիմեան-Մանուկեան եւ Դարուհի Յակոբեան վարժարանների տնօրեն Ժիրայր Դանիելյանի խոսքերով՝ «...Պարույր Աղապաշեանի խմբագրութեան շրջանը եղաւ ամէնէն երկարը եւ ամէնէն փորձաճանաոր ժամանակահատուածի մը՝ Լիբանանի 17-ամեայ պատերազմի շրջանին: Երբ բազմաթիւ թերթեր եւ հրատարակութիւններ շիջեցան այս պատճառով, «Խօսնակ»ը շարունակեց լոյսին գալ իր խմբագրին անձնուէր եւ հետետղական աշխատանքին ու զոհողութիւններուն շնորհիւ: Վարչական փոփոխութիւններու ծիրին մէջ՝ «Խօսնակ» ժամանակաւորապէս դադրեցաւ 1989 սեպտեմբեր-դեկտեմբեր միացեալ թիւով»:³¹ Բայց արդեն 1991թ. աշնանը այն վերստին հրատարակվեց նույն ծավալով եւ պարբերականությամբ: 1990-ականների սկսեց հրատարակվել նաեւ ամսագրի «The Khosnag Supplement» հավելվածը՝ անգլերեն եւ ֆրանսերեն լեզուներով:

Առաջին Աշխարհամարտից հետո Հալեպը սփյուռքի մշակութային կարեւոր կենտրոններից էր, ուր գործում էին մի շարք հայկական տպարաններ, հրատարակվում տարբեր պարբերականներ: Սակայն 1960-ական թթ. երկրի իշխանությունները որոշակիորեն սահմանափակեցին ազգային փոքրամասնությունների հրատարակչական գործունեությունը: Բայց, ահա, 1975թ. Հալեպի ՀԲԸ Միության մատենագիտական հանձնախումբը լույս ընծայեց «Գեղարդ. Սուրիահայ տարեգիրք»-ի առաջին հատորը՝ որի կազմողն ու խմբագիրն էր Հայկ Պարիկյանը: Սկսած երկրորդ հատորից նրան միացավ նաեւ Ռոբերտ Շեպեճյանը, որը մահից առաջ՝ 2000թ. հրատարակեց տարեգրքի վերջին Զ հատորը, ապա նաեւ արաբերեն տարբերակը: Իր տեսակի մէջ «Գեղարդ» տարեգիրքը եզակի հրատարակություն է. այն, ըստ էության, յուրահատուկ հանրագիտարան է, որը ներկայացնում է Սիրիայի հայության ողջ պատմությունը՝ իր գրեթե բոլոր մանրամասներով:

Գամիշլի, Դամասկոս

Սիրիայի հայաշատ քաղաքներից առանձնահատուկ է Գամիշլին, որը գտնվում է երկրի հյուսիս-արեւելքում՝ Տեր-Ջորից մոտ 250 կմ հեռավորության վրա, Թուրքիայի եւ Իրաքի սահմանագծի մոտ: Պատմական Մծքիճի մոտ գտնվող այս քաղաքի պատմությունը սկիզբ է առնում XX դ. 10-ականներից: Գամիշլիի Հայ Ավետարանական եկեղեցու 1960-ական թթ. առաջնորդ պատվելի Պարգե Օրջանյանը, անդրադառնալով հայերի այստեղ հաստատվելուն, գրել է. «Ա. Համաշխարհային պատերազմէն

վերջ, երբ դաշնակիցները տակաւին հաստատած չէին իրենց մշակած ծրագիրները եւ տեղի տալով Քեմալական ոյժերուն առջեւ կը նահանջէին թրքական հողերէն, ֆրանսացիները՝ հոս թէ Այնտիպարի մէջ հաստատած էին զօրանոցներ, կազմելով բանակ մը Ասորի Եագուպիկներէ, Հայերէ, Քիւրտներէ եւ Արաբներէ: Միջանկեալ պէտք է յիշենք թէ՛ հայերուն արգիլուած էր մաս կազմել բանակին: Ուստի, այն հայը, որ կը փափագէր զինուոր ըլլալ, պէտք էր իր ինքնութիւնը փոխէր եւ հայ ըլլալէ դադրէր: Այսպիսով, ապրուստի համար, իսկ մը հայեր իրենց ինքնութիւնը փոխելով բանակ մտած էին: Ֆրանսական բանակին ներկայութիւնը կը քաջալերէր Թուրքիոյ մէջ գտնուող սահմանամերձ քրիստոնէականներուն Սուրիա գաղթելը: Հետեւաբար հայեր, սուրիացիներ եւ քիւրտեր, հոծ բազմութիւններով կը գաղթեն այս նորակազմ գաղութը: Ֆրանսական իշխանութիւնն ալ այս պատենթութիւնը օգտագործելով կը սկսի հոս աքսորել Սուրիոյ այլ քաղաքներուն մէջ գտնուող անբաղձալիներն ու յանցագործները, եւ Գամիշլի կը սկսի ծաղկել որպէս «արշակաւան»:³²

Գամիշլի գաղթած հայերը ի սկզբանէ տարբեր էին իրենց ազգամշակութային նկարագրով, եւ նրանց որոշ մասը գտնվում էր մշակութափոխման տարբեր փուլերում. «...գաղթող քիւրտերու մէջ կային հայեր, որոնք թէեւ քրտախօս էին, սակայն պահած՝ իրենց ազգային հպարտութիւնն եւ հնաւանդ սովորութիւնները: Անոնք կու գային Թուրքիոյ Ծեզի-րէթ Պոթանէն կամ Պշերի լեռներէն եւ իրենց անունը առած էին իրենց տեղանունէն՝ կոչուելով պշերիկցիներ»: Նշելով այս, Պ. Օրջանյանը հատուկ ընդգծում է, որ հարկ է «զանազանել զանոնք քրտացած հայերէն: Քանի որ Պոթանի մէջ կ'ապրին քիւրտեր, որոնք անցելիւն եղած են հայեր, սակայն ժամանակի ընթացքին իրենց լեզուն եւ կրօնը փոխելով դադրած են հայութենէ»:³³ Այդ առումով ուշագրաւ է, որ Գամիշլիի Հայ Ավետարանական եկեղեցու առաջին քարոզիչներից էին նաեւ քրդախոս եւ արաբախոս հայերը: Մի կողմից, տեղի հայերի ազգային մասնակարգիոր, մյուս կողմից՝ Գամիշլիի հեռավորությունը հայաբնակ Հայկապոսի ու Ռամասկոսից, կարծես թէ անխուսափելի էին դարձնում նրանց արագ եւ անդադնալի ձուլումը իրենց շրջապատող եւ թվով շատ ավելի մեծ այլազգիների մէջ: Սակայն տեղի ունեցավ հակառակը: Առաջին իսկ օրից այստեղ աշխույժ գործունեությունն են ծավալում Հայ Առաքելական, Կաթողիկէ եւ Ավետարանական եկեղեցիները, որոնք էլ, սկսած 1930-ական թթ., հիմնում են հայկական վարժարաններ: «Գամիշլիի Հայ ավետարանական համայնքը ունի իր եկեղեցին եւ իր դպրոցը՝ 200 աշակերտով: Հայ կաթողիկէ համայնքը՝ իր եկեղեցին եւ դպրոցը 350 աշակերտով, իսկ Հայ առաքելական համայնքը՝ իր եկեղեցին եւ իր վարժարանը 1200 աշակեր-

տով»: Հնչեցնելով այս թվերը 2000թ. դեկտեմբերին Բուենոս Այրեսում կայացած ՀԲԸ Միության հերթական Ընդհանուր ժողովում՝ Միության կենտրոնական վարչության անդամ, Սիրիայի ներկայացուցիչ Գառնիկ Յագուպյանը հատկանշական մի համեմատություն արեց. «Անցյալ օրը, Հարավային Ամերիկայի ՀԲԸ Միության Ատենապետների ժողովին ժամանակ, պրն. Խուան Նուրիխանը Գորտոպայից (Արգենտինա) նշեց, որ Գորտոպայում ապրում է 12.000 հայ: Նույն թվով հայեր կան նաեւ Գամիշլիում: Սակայն այնտեղի հայկական վարժարաններում կա միայն 300 աշակերտ, իսկ Գամիշլիում՝ 1.750: Աշակերտության այս մեծ թիվը վկայում է, թէ որքան մեծ է Գամիշլիի հայության վճռականությունը պահպանել իրենց մշակույթը եւ ավանդույթները»:³⁴

Սկսած 1947թ., երբ կազմավորվեց ՀԲԸ Միության Գամիշլիի մասնաճյուղը (1958թ. հիմնվեց նաեւ ՀԵ Ընկերակցությունը), նա իր կարեւոր բաժինն է բերել տեղի հայերի ազգային եւ մշակութային գործունեությանը: Սակայն սեփական եւ մնայուն կենտրոնի բացակայությունը մեծապես խոչընդոտում էր Միության աշխատանքների ընդարձակմանն ու արդյունավետությանը: 1971թ., երբ նախագահ Ալեք Մանուկյանը գտնվում էր Բեյրութում, այս հարցով նրան են դիմում Գամիշլիից ժամանած Միության մասնաճյուղի ներկայացուցիչները: Հանդիպման արդյունքը սպասել չտվեց. Ա.Մանուկյանի տրամադրած միջոցներով գնվում է 500 քմ հողատարածք, որի վրա էլ մասնաճյուղի անդամները իրենց ձեռքով կառուցում են Միության առաջին ակումբը: Որոշ ժամանակ անց պարզ դարձավ, որ Միության գործունեության աշխուժացումը այս քաղաքում, հատկապես երիտասարդության շրջանում անհրաժեշտաբար պահանջում էր ավելի արդիական եւ հարմարավետ պայմաններ: Եվ ահա, 2001թ. ապրիլին Գամիշլիում մեծ հանդիսավորությամբ, ՀԲԸ Միության նախագահ Լուիզ Մանուկյան Սիմոնի ներկայությամբ իր դռները բացեց Միության «Գառնիկ Եագուպեան կեդրոնը»: Գառնիկ եւ Անահիտ Յագուպյանների բարերարությամբ կառուցված նորակերտ ընդարձակ շենքը (1250 քմ) օժտված է բազմաթիվ գրասենյակներով, լսարաններով եւ 250 հոգանոց դահլիճով, ինչը հնարավորություն է տալիս կազմակերպել զանազան միջոցառումներ եւ ձեռնարկներ: Գ.Յագուպյանի խոսքերով սասած՝ «Թուրքիոյ սահմանէն 1 քիլոմէթր հարաւ, Եղերնէն 85 տարի վերջ, հայը իր շինիչ շունչով կը կառուցէ իր կեդրոնը եւ կը վերահաստատէ իր գոյութիւնը»:³⁵

Սիրիայի ՀԲԸ Միության անդամների եւ ողջ սիրիահայության համար այդ տարիները աննախադէպ էին նորակառուցների քանակով: Գամիշլիի Միության կենտրոնի բացումից մեկ տարի առաջ նմանօրինակ

իրադարձություն տեղի ունեցավ երկրի մայրաքաղաք Դամասկոսում: Չնայած հայության համեմատաբար փոքր թվին, Դամասկոսում գործում են բազմաթիվ հայկական կազմակերպություններ, այդ թվում նաև ՀԲԸ Միության և ՀԵԸ-ի մասնաճյուղերը: Այստեղ նույնպես նրանց գործունեության ընդարձակմանը խոչընդոտում էր ժամանակի պահանջներին համապատասխանող ակումբի բացակայությունը: Յագուայան ընտանիքը, որի ներկայացուցիչները վաղուց ի վեր հայտնի էին իրենց ազգանվեր գործունեությամբ, այս դեպքում եւս ստանձնեց ՀԲԸ Միության նոր կենտրոնի շինարարությունը: Դամասկոսի ՀԲԸ Միության «Նազարեթ Եագուպեան կեդրոն-ակումբ»-ի բացումը կատարվեց 1999թ. մայիսին, և այդ օրվանից այն դարձավ թե երիտասարդների և թե տարեցների հիմնական հավաքատեղին:

Նպաստընկալ վարժարաններ

1931թ. ՀԲԸ Միության 25-ամյակի կապակցությամբ նախագահ Գալուստ Կյուլպենկյանի նախաձեռնությամբ պատրաստվեց կազմակերպության հետագա գործունեության նոր ծրագիրը: Այս կարևոր փաստաթղթում մեծ տեղ էր հատկացված նաև ազգային կրթությանը և մշակույթին. «...անհկա գլխատր, եթե ոչ միակ պատուարն է գաղութահայությունը հայ պահելու, թող չտալով որ օտարության մեջ ուծանայ ազգային զգացումը: Հայերեն լեզուի, ազգային պատմության, հայ կենսքի ամենագոյի արտայայտություններովն է որ պիտի կրնանք ազգային շունչներարկել և հայ ոգին պահպանել գաղութներում մեջ, առաջքն առնելով անխուսափելի այլաստումին և ուծացումին, որ իրապես կը սպառնան հայ բազմահոծ զանգուածներուն, ակնյայտնի ըլլալով որ առանց ուծոգին հակազդեցության անոնք պիտի օտարանան 1-2 սերունդէ վերջ»:³⁶

Կարեւորելով ազգային կրթության հարցը՝ Միությունը դեռեւս 1920-ականներին, քանի դեռ իր սահմանափակ ֆինանսական հնարավորությունների պատճառով ի վիճակի չէր հիմնել սեփական վարժարաններ, սկսեց դրամական նպաստներ հատկացնել տարբեր երկրներում տարբեր պատկանելության հայկական վարժարաններին: Արդեն 1924թ. Միությունը նպաստներ էր հատկացնում Խարբերդի, Մյունխենի, Ղազիրի, Տրիպոլիի, Լաթաքիայի, Զահլեի և այլ վարժարաններին, Մարաշի և Այնթապի կրթասիրաց միություններին, ինչպես նաև Բելքրոթի համալսարանի երկու որբ ուսանողներին:³⁷ Հետագա տարիներին նման վարժարանների քանակը մշտապես աճում էր: 1929թ. Միությունը նպաստներ էր

հատկացրել Լիբանանում ու Սիրիայում, Հունաստանում, Բուլղարիայում և Պաղեստինում գործող 78, իսկ 1933-ին՝ 100 վարժարաններին: «Այդ վարժարանները միջազգային միջոցներու անբաւականութեան պատճառաւ առանց Միութեան օժանդակութեան փակուելու պիտի դատապարտուէին և այդ պատճառաւ բնականաբար գաղթական երկսեռ հայ մանուկներն ալ անուսում և թափառական կեանք մը պիտի վարէին, ենթակայ այլասերման և ապագայնանալու վտանգներուն»:³⁸

Միությունը ոչ միայն ավելացրեց նպաստընկալ վարժարանների քանակը, այլև ձեռնամուխ եղավ կրթական աշխատանքների բարելավմանը: Հարկ է նշել, որ Միությունը օժանդակում էր նախ և առաջ գյուղական վայրերում գտնվող վարժարաններին, որոնց վիճակը հատկապես մտահոգիչ էր: Միության ուսումնասիրությունները վկայում էին, որ «...նպաստընկալ վարժարաններէն ոմանք դպրոցական և առողջապահական անհրաժեշտ պայմանները չեն լրացներ, ընդհանրապես ուսուցիչները բաւարարութիւն չեն տար իրենց կոչումին, պէտք եղած զարգացումը և ձեռնհասութիւնը չունենալով, շատերն ալ միջազգային գրկանքներով կը կատարեն իրենց պարտականութիւնը: Յաճախ, դիպուածին թողուած են դասաւանդութիւնները և գործնական գիտելիքներուն լայն տեղ չի տրուիր, մանկավարժութեան արդիական սկզբունքները չեն կիրարկուիր, բարոյական դաստիարակութեան հոգ չի տարուիր»:³⁹

Նման կացությունը շուկելու նպատակով Միության նախաձեռնությամբ պատրաստվեց միասնական կամ միօրինակ ուսումնական ծրագիր՝ «Ուսման ծրագիր գաղթական համայնքներու յատուկ նախակրթարաններու», որին իրենց մասնակցությունը բերեցին այնպիսի հեղինակավոր դեմքեր, ինչպես, օրինակ, դոկտոր Վ.Թորգոմյանը, Լեւոն Բաշալյանը, Արշակ Չոպանյանը, Դավիթ Բեկը, Վահան Թեքեյանը, Ծավարշ Պերպերյանը, Ա.Ինճիճյանը, Արամ Անտոնյանը և այլ մասնագետներ: Ամեն բանից զատ, այն կարևոր ներդրում էր հայ մանկավարժական մտքի զարգացման գործում:

Հայտնի է, սակայն, որ նույնիսկ կատարյալ ծրագրի իրական արժեքը նրա իրագործման մեջ է: Եվ հենց այս հարցում Միությունը հանդիպեց տարաբնույթ դժվարությունների: Բանն այն է, որ նշված վարժարանները ենթակա էին թաղային խորհուրդներին կամ հոգաբարձություններին, որոնք կազմավորվում ու գործում էին ազգային-քաղաքական տարբեր ուժերի մրցակցության ու հակամարտության պայմաններում: Հայ քաղաքական կուսակցություններից և այլ կազմակերպություններից յուրաքանչյուրի համար ինքնահաստատման ավանդական ձևերից էր իրենց բոլոր ընդդիմախոսների վարկաբեկումը, նրանց «հակազգային» գործունեու-

թյան մերկացումն ու չեզոքացումը: Այս գործելակերպը կիրառվում էր նաև իրենց հսկողության տակ գտնվող դպրոցներում, նպատակ ունենալով դաստիարակել ապագա կուսակցականների կամ կողմնակիցների նոր սերունդներ, ընդլայնել սեփական ազդեցության ոլորտը:

Այս ամենի արդյունքներից էր, մասնավորապես, այն, որ, օրինակ, Դաշնակցության այս կամ այն չափով ազդեցության տակ գտնվող դպրոցներում նման վարկաբեկման թիրախ էր դառնում հաճախ նաև ՀԲԸ Միությունը եւ անգամ այն դպրոցներում, որոնք օգտվում էին վերջինիս տրամադրած նպաստներից: Կահիրեի «Արեւ» թերթը այդ առիթով գրում էր. «Սուրիոյ մէջ, Յունաստանի մէջ, Կիպրոսի մէջ բազմաթիւ դաշնակցական պաշտօնեաներ եւ ուսուցիչներ ընդունուեցան Բարեգործականի հաստատութիւններէն ներս: Ի՞նչ եղաւ անոնց վերաբերմունքը հանդէպ Բարեգործականին: Անոնք փոխանակ Բարեգործականի համար ուղղաւթիտ (ընդգծումները՝ ըստ բնագրի- Էդ.Մ.) վերաբերմունք տածելով, իրենց կուսակցութիւնը դուրս ձգելու այս հաստատութիւններէն ներս, ջանացին թունաւորել աշակերտութիւնը, Բարեգործականի դէմ լարեցին զանոնք եւ պատրաստեցին սերունդ մը, որ ըմբոստ եղաւ իր բարեբարներուն դէմ եւ ապերախտ՝ զինքը արաքական անապատներէն փրկող, խնամող-դաստիարակողներուն դէմ»:⁴⁰

Մյուս կողմից, ՀԲԸ Միությունը ստիպված էր դիմագրավել նաև Ռամկավար Ազատական կուսակցության ճնշման փորձերին: Կարլեն Դալլաքյանը, որը իր «Ռամկավար Ազատական կուսակցության պատմություն» գրքում առաջին անգամ բազմակողմանի վերլուծության է ենթարկել այդ երկու կազմակերպությունների փոխհարաբերությունները 1920-1930-ական թթ., գրում է. «ՌԱ կուսակցության հարաբերությունները ՀԲԸ Միության ղեկավարության հետ միշտ եղել են բավականին բարդ ու խճողված զանազան հակասություններով: Բարեգործականի Կենտրոնական Վարչական Ժողովը տարել է անկախ քաղաքականություն, թեպետ նրա գործադիր մարմնի ղեկավարը՝ վարիչ-պատվիրակը, եղել է կուսակցության երևելի ղեմքերից մեկը՝ Վահան Մալեգյանը: Այս հարաբերությունների շրջագծից դուրս գտնվողների տպավորությունը եղել է, ընդհակառակն, միանգամայն վարդազույն: Այն իմաստով, թե ՌԱԿ-ը տեր ու տիրական է Բարեգործականի նկատմամբ: ՀՀ Դաշնակցության մամուլը, օրինակ, հաճախ էր օգտագործում «Ռամկավար Բարեգործական» հասկացությունը»:⁴¹ Մինչդեռ, նշում է Կ.Դալլաքյանը, «Բարեգործականի անկախ քաղաքականությունից դժգոհ էին նաև ՌԱ կուսակցության կենտրոնական եւ շրջանային՝ ղեկավար մարմինները: Քննադատության առիթ հատկապես տալիս էր Բարեգործականի կադ-

րային քաղաքականությունը, որի բերումով տեղերում ՀԲԸՄ-ի մականի տակ գործող կազմակերպություններում (օրինակ, դպրոցներում) աշխատանքի էին ընդունվում ուրիշ կուսակցությունների պատկանող եւ «ծայրայեղ ընկերային դաւանանք» ունեցող մարդիկ»:⁴² Ուշագրավ է, որ ՌԱԿ-ի Ամերիկայի Շրջանային վարչությունը 1930թ. մարտին կուսակցության Կենտրոնական Վարչությանը ուղղած նամակում կոչ էր անում «...ազդեցութիւն բանեցնել անոր (ՀԲԸՄ-ի - Էդ.Մ.) Վարիչ մարմնոյն վրայ, իրենց դպրոցները մաքրագործելու Դաշնակցական տարրերէ»:⁴³ Մեկ այլ, արդեն ՌԱԿ-ի Դ. Ընդհանուր Պատգամավորական ժողովի (1929թ.) բանաձեւում ասվում էր. «...կը պահանջուի որ Բարեգործականի կրթական հաստատութեանց մէջ պաշտօնի կոչուին միայն ազգային ուղղութեան հաւատարիմ եւ աշակերտութիւնը հատուածական աղանդամուտութենէ զերծ պահող անհատներ»:⁴⁴ Ակնհայտ էր, որ տվյալ դեպքում Միությունից պահանջվող «ազգային ուղղությունը» պետք է նախ եւ առաջ համապատասխաներ հենց ՌԱԿ-ի գաղափարախոսությանը: Բայց այդ դեպքում արդեն ՌԱԿ-ի քաղաքական ընդդիմադիրները կամքաստանեին ՀԲԸ Միությունը «հատուածական աղանդամուտության» մեջ: Այդուհանդերձ, ՌԱ կուսակցությունն ու նրա մամուլը մշտապես պաշտպանել են ՀԲԸՄ-ի ազգային առաքելությունը: Այդ կուսակցության բազմաթիվ անդամներ եղել են ՀԲԸՄ-ի եւ ՀԵԸ-ի հայտնի գործիչներ, ղեկավար ղեմքեր ու պաշտոնյաներ:

Նման, Կ.Դալլաքյանի բնութագրմամբ, «գաղութների անընչելի մթնոլորտի պայմաններում», Միությունը հարցի լուծումը տեսնում էր սեփական դպրոցներ հիմնելու մեջ, ինչը, սակայն, առաջիմ անիրագործելի էր, նախ եւ առաջ, անհրաժեշտ ֆինանսական միջոցների բացակայության պատճառով: Ստեղծված իրավիճակում Միությունը կայացրեց մի որոշում, համաձայն որի նախ, իր նպաստները ստացող վարժարանները պետք է որդեգրեին վերոհիշյալ ուսումնական ծրագիրը, ապա նաև, Միության հսկողության տակ պետք է դրվեին նույն այդ վարժարանների բյուջեն եւ ուսուցիչների ընտրությունը: Եվ թեև մի շարք դպրոցներ մերժեցին այդ պայմանները, այնուամենայնիվ, թվով շատ ավելի դպրոցներ նախընտրեցին ընդունել դրանք եւ շարունակեցին գործել ՀԲԸ Միության մականի տակ:

Առավել բարդ էր ուսուցիչների հարցը: Ցեղասպանության տարիներին էլ ավելի էր նվազել որակյալ, մասնագիտական ուսում ստացած ուսուցիչների թիվը: Իսկ եղածների ճնշող մեծամասնությունը, ներգրավված լինելով ազգային-քաղաքական գործունեության մեջ, այս կամ այն կուսակցության, քաղաքական հոսանքի գաղափարների ոչ միայն կողմ էր, այլև քարոզիչը, այդ թվում նաև դպրոցներում: Նման պայմաններում,

ինչպես նշվեց, դպրոցը վերածվում էր միջկուսակցական հակամարտության յուրատեսակ մի դաշտի՝ իր բոլոր անցանկալի հետեւանքներով հանդերձ: Միությունը, չցանկանալով համակերպվել մեծ կացությանը՝ զոհն էր դառնում, ձեռնամուխ եղավ ուսուցիչների նոր սերնդի պատրաստմանը, այդ նպատակին ծառայեցնելով 1926 թվականից գործող Մելգոնեան կրթական հաստատությունը:

Մելգոնեան կրթական հաստատություն

Գրիգոր և Կարապետ Մելգոնեան եղբայրների նվիրատվությունը, որը իր տեսակի մեջ աննախադեպ էր հայ իրականության մեջ, շրջադարձային եղավ ՀԲԸ Միության պատմության համար՝ ինչ-որ իմաստով կանխորոշելով սփյուռքում նրա ազգապահպան գործունեության հիմնական կերպը և էությունը:

Մելգոնեան եղբայրները ծնվել էին Կեսարիայում, սակայն իրենց առևտրական գործունեությունը սկսել էին 1870թ. Ռումիհայի Ֆոքշան քաղաքում: Որոշ ժամանակ անց նրանք տեղափոխվում են Եգիպտոս և 1880-ական թթ. ծխախոտի և սիգարետների արտադրություն են հիմնում Զակազիկում, Ալեքսանդրիայում, Ֆեյումում ու Ասուանում: 1900թ. Գրիգոր և Կարապետ Մելգոնեան առևտրական տունը հաստատվում է արդեն մայրաքաղաք Կահիրեում: Եղբայրների աշխատասիրության և մասնագիտական հմտության շնորհիվ նրանց գործարանի արտադրանքը հայտնի է դառնում երկրի սահմաններից դուրս՝ Հեռավոր Արևելքից մինչև Եվրոպա:

Մելգոնեան եղբայրների ազգասիրության ամենակարեւոր դրսևորումն էլ եղավ այն, որ նրանցից ավագը՝ Գրիգորը (հենց նրան էլ պատկանում էր սեփականության հիմնական մասը), իր մահից առաջ (1920թ. փետրվարին) կրտսեր եղբորը՝ Կարապետ Մելգոնեանին և Կոստանդնուպոլսի Հայոց պատրիարք Զավեն Տեր-Եղիայանին ու Մուշեղ եպիսկոպոս Աերոբյանին բանավոր հայտնում է իր որոշումը՝ ողջ ունեցվածքը Հայաստանի կառավարությանը նվիրաբերելու մասին: Եղբոր մահից հետո Կարապետ Մելգոնեանը 1921թ. հուլիսի 25-ի հատուկ կարգադրությամբ ողջ ունեցվածքը նվիրաբերում է Արևմտյան Հայաստանում և Կիլիկիայում՝ երեք արդիական դպրոցներ կառուցելու նպատակին՝ կտակակատար նշանակելով Կոստանդնուպոլսի Պատրիարքարանը: Սակայն հետագայում, նկատի առնելով Թուրքիայում քեմալականների իշխանության հաստատումը և նրանց հակահայկական քաղաքականությունը

Կ.Մելգոնեանը 1924թ. մայիսին մի նոր փաստաթղթով կտակակատարին իրավունք է տալիս դպրոցներ և որբանոցներ հիմնել հայաբնակ տարբեր երկրներում, որից հետո էլ Պատրիարքարանը ձեռնամուխ է լինում դպրոցական շենքերի կառուցմանը Կիպրոսում: Այդ ընթացքում, սակայն, պարզ է դառնում, որ Կ.Պոլսի Պատրիարքարանը ի վիճակի չէր բավարար չափով իրականացնել կտակակատարի դերը: Մի կողմից, որպես եկեղեցական հաստատություն, նա չունէր անհրաժեշտ փորձառություն մեծ խոշոր և մեծարժեք գույք տնօրինելու, այլ երկրում շինարարություն իրականացնելու համար, ինչն էլ անխուսափելիորեն հանգեցրեց գումարների ոչ ճիշտ օգտագործմանը: Մյուս կողմից, այն հանգամանքը, որ պատրիարքարանը, որպես իրավաբանական անձ, ենթարկվում էր Թուրքիայի օրենքներին, կարող էր վտանգել նվիրատվությունը ընդհանրապես: Ստեղծված իրավիճակում Կարապետ Մելգոնեանը բանակցություններ է սկսում Պողոս Նուպարի հետ: Արդյունքում նա իր ողջ ունեցվածքը նվիրաբերում է ՀԲԸ Միությանը, ինչն էլ պաշտոնապես հաստատվում է Ալեքսանդրիայի Խառն դատարանի 1925թ. դեկտեմբերի 28-ի և 1926թ. դեկտեմբերի 15-ի որոշումներով:

Կ.Մելգոնեանի այս վերջին որոշումը մեծ արձագանք ստացավ սփյուռքում: Նվիրատվության աննախադեպ չափը անտարբեր չէր թողել և ոչ մեկին: Եվ զարմանալի օրինաչափությամբ, Միության դեմ հերթական, բայց ոչ վերջին անգամ բուռն արշավ սկսեցին թե ՀՀ Դաշնակցությունը և թե Խորհրդային Հայաստանի իշխանությունները, որոնցից յուրաքանչյուրը ինքն էր ցանկանում դառնալ նվիրատվության հասցեստեղծ: Հատկապես ուշագրավ էր Խորհրդային Հայաստանի իշխանությունների դիրքորոշումը, որի արտահայտիչը սփյուռքում այս դեպքում էլ ՀՕԿ-ի մասնաճյուղերն էին: Անդրադատնալով այդ հարցին՝ Կ.Դալլաքյանը մեջբերում է ՀՕԿ-ի որոշումը, որում ասված էր. «...Նկատի առնելով, որ զանազան մեքենայութիւնների շնորհիւ Մելգոնեան կտակը խլում է իր իսկական տիրոջից՝ Խորհրդային Հայաստանից, ՀՕԿ-ի ճիւղերին առաջարկել որոշումներ կայացնել, պահանջելով անմիջապէս յանձնել այդ գումարները իր իսկական տիրոջը՝ Խորհրդային Հայաստանում կիրառելու»:45 Ուշագրավն այն է, որ Խորհրդային Հայաստանը իր գոյության առաջին իսկ օրերից սկզբունքորեն չցանկանալով ներկայանալ որպես Հայաստանի Առաջին Հանրապետության իրավահաջորդը, այս դեպքում, երբ խոսքը վերաբերում էր մեծագումար նվիրատվությանը, մեծ պատրաստակամությամբ հանդես էր գալիս որպես այդպիսին: Հետաքրքրական է նաև, որ Խորհրդային իշխանությունների մեծ դիրքորոշումը մնաց անփոփոխ հետագայում նույնպես: Երկրորդ Աշխարհա-

մարտից հետո, ներգաղթի տարիներին, երբ, ինչպես նշվել է, որոշակի աշխուժացում էր նկատվում սփյուռքի հետ Հայաստանի հարաբերություններում, Մելգոնյան կտակի մասին Հայաստանի Արտաքին գործերի նախարարությունում պատրաստված հատուկ տեղեկագրում նույնպես նշվում էր, որ Կարապետ Մելգոնյանի որոշումը հակասում էր իր ավագ եղբոր կամքին և թելադրված էր ՀԲԸ Միության ազդեցությամբ:⁴⁶

Մինչդեռ, դեռևս 20-ական թթ. Կարապետ Մելգոնյանը տվել էր իր հստակ պատասխանը տարբեր տեսակի հավակնորդներին: «Գոյութիւն չունի Մելգոնեանի կտակ,-գրում էր Կ.Մելգոնեանը,-այլ գոյութիւն ունի Մելգոնեան նուիրատուութիւն մը: Եվ ան ուրիշ բան չէ, բայց եթէ նախախնամութեան անհասանելի կամօքը դեռ այսօր ապրող և իր գիտակցութիւնն ու դատողութիւնը պահած մարդու մը կողմէ իր ամբողջ ունեցածին փոխանցումը երէկ Կ.Պոլսոյ Ազգային Պատրիարքարանին և այսօր այս վերջնոյս հաւանութեամբ՝ ՀԲԸ Միութեան, որպէսզի նպաստաւոր կերպով հաշուեյարդարութեան ենթարկուելէ ետք՝ գոյացած հնչուն դրամը ի պահ դրուի արտասահմանի ամէնէն ապահով պետական դրամատուներուն մէջ և միայն եկամուտը յատկացուի զանազան կանխորոշ ազգային նպատակներու, ոմանք արտասահմանի և ոմանք Հայաստանի մէջ»: Այնուհետեւ, Կ.Մելգոնյանը հայտնում է, որ նախապես ինքը որոշել էր Հայաստանի կառավարությանը հանձնել, բայց հետո փոխել էր մտադրությունը: ...«Միշտ է, որ ես ինքս նախ որոշած եմ նուիրելու ընել Հայաստանի կառավարութիւնը, բայց Հայաստանի մէջ պատահած դէպքերը պատճառ եղած են, որ ասկէ վեց տարի առաջ արդէն, այսինքն՝ 1920- ին և ոչ թէ այսօր, դիտաւորութիւնս փոխել և նուիրատուութիւնը միշտ յօգուտ հայ ժողովուրդին պահելով հանդերձ՝ նուիրելու ուրիշ հաստատութիւն մը ընեմ»: Վերջում հեղինակը բացակայում է. «Ազգը կրնար իմ նուիրու մերժել, բայց կարծեմ չէր կրնար ինծի պարտադրել նուիրատուութեանս այս կամ այն ձեւը»:⁴⁷

Այս նվիրատվությունը խիստ կարեւոր եղավ ՀԲԸ Միության հետագա գործունեության համար, հատկապես կրթական բնագավառում: 1927թ. նոյեմբերին կայացած Միության հերթական Ընդհանուր ժողովին ներկայացրած իր զեկույցում Պողոս Նուպարը հատուկ անդրադարձել էր Կարապետ Մելգոնեանի «հոյակապ նուիրատուութեանը», «...որուն նմանը մինչեւ հիմայ ոչ մէկ հայրենակից կատարած էր, մարդասիրական և ազգասիրական բարձր զգացումներէ մղուած»:

«Նուիրատուութիւնը որքան ալ փառաւոր էր,-նշում էր Պողոս Նուպարը,-Միութիւնս, որ առեւտրական կամ ճարտարագործական ոեւէ ձեռնարկ շահագործելու համար հարկ եղած կազմակերպութիւնը չուներ

բնաւ, այն հաստատ որոշումով ընդունած էր միայն զայն որպէսզի առաջին պատենթութեան հաշուեյարդարի ենթարկէ: Անշուշտ դիւրին գործ չէր գնորդ մը գտնել ձեռնարկի մը համար որուն արժէքը 500.000 անգլ. ոսկիէն աւելի կը գնահատուէր: Հետեւաբար, մասնաւոր հաճութեամբ է որ կ'իմացնեմ ձեզ այսօր թէ, զանազան երկիրներու մէջ կատարուած բազմաթիւ փորձերէ և երկար առեւն ապարդիւն ջանքեր ընելէ յետոյ, վերջապէս կրցանք գործարանը ծախել Իսթըրն Ընկերութեան մօտ 564.480 անգլ. ոսկիի»:⁴⁸ ՀԲԸ Միության 1928թ. տեղեկագրում բերվում էին վաճառքի վերջնական արդյունքները, համաձայն որոնց, Մելգոնյանների գործատուներ Իսթըրն Ընկերությանը վաճառվել էր 564.696 անգլ. ոսկիով, որն էլ երկու հավասար մասերով դրվել էր Լոնդոնի Միդլընդ բանկում և Նյու Յորքի Նեշընըլ Սիթի բանկում, որպես անձեռնմխելի հիմնադրամներ:⁴⁹ Այդ գումարներից ստացվող տարեկան հասույթը, ըստ պայմանավորվածության, պետք է հատկացվեր որոշակի նպատակների, որոնցից ամենակարեւորներն էին.

«1. - Յման տ. Կ.Մելգոնեանին վճարել, իբրեւ կենսաթոշակ, տարեկան 5.000 եգ. ոսկի (որուն 1.000 ոսկին իր յօժար կամքովը քանի մը տարի առաջ յատկացուց Կիլիկիոյ կաթողիկոսարանին, Անթիլիաս հաստատուելուն առթիւ):

2. - Նիկոսիոյ մէջ հիմնուած Մելգոնեան Կրթական Հաստատութեան բոլոր ծախքերը հոգալ, առաւելագոյն 500 երկսեռ որբերու և չքատոր տղոց դաստիարակութիւնը ապահովելու համար:

3. - Տարեկան 1.000 եգ. ոսկի վճարել Երուսաղէմի Պատրիարքարանին, Ժառանգաւորաց վարժարանին մէջ Մելգոնեան սաներ պահելու համար:

4. - Տարեկան 1.500 եգ. ոսկի վճարել Կ.Պոլսի Հայոց Պատրիարքարանին, 500 ոսկիով Ազգ. Հիւանդանոցին մէջ Մելգոնեան եղբայրներու անունով անկողիններ պահելու համար:

5. - Տարեկան 3.000 եգ. ոսկի վճարել Երեսանի Պետական Համալսարանին, հայ լեզուի, հայ գրականութեան և հայոց պատմութեան ամպիոններու հաստատման, ուսումնասիրութեանց և հրատարակութեանց համար (ձեռնարկ որ կը մատակարարուի Մելգոնեան ֆոնտի Յանձնաժողովին միջոցաւ):»⁵⁰

Այս կետերից Միության համար ամենակարեւորն ու ամենապատասխանատուն, անշուշտ, Մելգոնեան կրթական հաստատությանը վերաբերող կետն էր: Նվիրատվությունը ՀԲԸ Միությանը փոխանցելու պահին Կիպրոսի մայրաքաղաք Նիկոսիայից շուրջ երկու կիլոմետր հեռավորությամբ արդեն կառուցվել էին երկու եռահարկ մեծ շենքեր, որպես

դպրոցներ՝ տղաների եւ աղջիկների համար: Բացի այդ, կառուցվել էին նաեւ առանձնատուն Կ.Մելգոնեանի համար, բնակարաններ դպրոցի պաշտոնյաների համար, հիվանդանոց, բաղնիք, էլեկտրակայան եւ այլ շինություններ, որոնք շրջապատված էին պուրակներով ու այգիներով: Ոչ միայն այդ տարիներին, այլեւ հետագայում հայկական եւ ոչ մի դպրոց՝ սփյուռքում թե Հայաստանում, օժտված չէր նման հարմարավետ պայմաններով: Մյուս կողմից, սակայն, ինչպես նշվում էր Միության տեղեկագրում, «սոյն մեծածախս շինությունները եւ այլազան ճիւղաւորումները, ընդարձակածաւալ սահմանի մը մէջ (186 666 քառ. մէթր) կը հարկադրեն անխուսափելիորէն աչքի գարնող ծախքեր...»:⁵¹

1927-1928 ուսումնական տարում Մելգոնեան կրթական հաստատությունը ուներ 255 երկսեռ սաներ՝ հիմնականում որբեր, այդ թվում 101 աղջիկ, որոնք ուսանում էին նախակրթարանի ծրագրով: Հաստատության տնօրենն էր հայտնի մանկավարժ Գրիգոր Կիրակոսյանը, որը մինչ այդ տնօրենն էր Կահիրեի Գալուստեան վարժարանի, իսկ շուրջ 20 տարի անց փոխարինելու էր Վահան Մալեգյանին՝ ՀԲԸ Միության ընդհանուր տնօրենի պաշտոնում: Այս կրթական հաստատությունը նախատեսված էր հիմնականում որբ երեխաների համար, եւ այդ պատճառով ի սկզբանէ գործեց որպէս գիշերօթիկ դպրոց, ուր երեխաները մի քանի տարի պետք է ոչ միայն ուսանեին, այլեւ ապրեին: Նման պայմաններում դպրոցի ղեկավարությունը եւ դասախոսները պարտավորված էին զբաղվել նաեւ սաների առողջական վիճակով, նրանց բարոյահոգեբանական եւ ֆիզիկական դաստիարակությամբ: Այդ նպատակին էին ծառայում դպրոցի գոյության առաջին իսկ օրվանից գործող բազմաթիվ գեղարվեստական խմբակները, հատուկ դասընթացները, հաստատության մատուցում երեխաների կանոնավոր եւ մշտական մասնակցությունը եկեղեցական պաշտամունքներին: Մեծ կարեւորություն էր տրվում նաեւ նրանց աշխատանքային դաստիարակությանը: «Աշակերտները, վարժուելու համար անշահախնդիր գործունէութեան, հաճոյքով եւ արդիւնատրապէս կատարած են նաեւ կարգ մը աշխատութիւններ: Մանչերը կարգով սպասարկած են սեղանատան մէջ, օգնած խոհանոցի աշխատութեանց, մաքրած են իրենց դասարաններուն եւ ննջարանին ապակիները, շաբաթներով ոչնչացուցած են անտառիկներուն մոլախոտները, պեղած են այգի, ջրած են բանջարանոցները, ամիսներով հող պեղած եւ փոխադրուած են մարգարտաշտը: Աղջիկները կատարած են իրենց պատշաճող նոյն կարգի աշխատութիւններ, եւ բարձրագոյն դասարաններուն մէջ իրենք ձեւած եւ կարած են թէ՛ իրենց եւ թէ՛ փոքրիկներուն ամառնային հագուստները»:⁵²

Հաջորդ տարի, երբ աշակերտների թիվը հասել էր 268-ի, որոշվեց որոշակի փոփոխությունների ենթարկել ուսումնական ծրագիրը. «1. Սաներու թիւը բարձրացնել տարուէ տարի, 25 նոր սաներ ընդունելով, նիւթական կարելիութեան սահմանին մէջ, 2. Բարեփոխել տարրական նախակրթութեան ծրագիրը, տակաւ առ տակաւ ջնջելով մանկապարտէզը եւ նախակրթարանի առաջին դասարանները, վարժարանին մակարդակը բարձրացնելով երկրորդական գործնական նախակրթութեան աստիճանին, 3. Ներմուծել յայտագրին մէջ գործնական դասընթացներ եւ քանի մը օգտակար արհեստներ, ապահովելու համար շրջանաւարտ որբ եւ չքաւոր սաներուն ինքնաբաւութիւնը»:⁵³ Ծառ շուտով հաստատությունում սկսեցին գործել նաեւ արհեստագիտական բաժիններ. մեքենագիտություն, կահագործություն եւ լուսանկարչություն՝ տղաների եւ ձեռագործություն՝ աղջիկների համար: Այս ամենի շնորհիվ, Մելգոնեան կրթական հաստատությունը 30-ական թթ. սկզբին «կուտայ ուսում մը որ համարժէք է ֆրանսական բարձրագոյն նախակրթարաններու եւ գրեթէ հաւասար գերմանական ընթացիկներու ուսման»:⁵⁴

Ակնհայտ էր, սակայն, որ չնայած բոլոր առավելություններին, Մելգոնեան հաստատությունը իր գործունէութեան՝ սկզբնական փուլում, ըստ էության, քիչ էր տարբերվում այլ որբանոց-դպրոցներից կամ նախակրթական դպրոցներից: Լոկ նախակրթարանի համարժէք կրթություն ստացած նրա շրջանավարտների համար նույնպէս շատ դժվար էր տնտեսապէս ինքնահաստատուել Արեւելքի զարգացող երկրներում, եւ նրանք հաճախ ստիպված էին լինում սովորել նոր արհեստ՝ իրենց ապրուստը հայթայթելու համար: Մյուս կողմից, նույն երկրներում բնակություն հաստատած հայ երիտասարդությունը գուրկ էր լիարժէք երկրորդական կրթություն ստանալու հնարավորությունից, ինչը, բնականաբար, անհնարին էր դարձնում նաեւ հետագա ուսումը համալսարաններում: Անշուշտ, կային ոչ հայկական երկրորդական վարժարաններ, որոնք մի կողմից, վճարովի էին եւ այդ պատճառով էլ անմատչելի՝ իրենց մեծամասնության մեջ չքավոր հայ երեխաների համար, իսկ մյուս կողմից՝ պահանջում էին այս կամ այն օտար լեզվի տիրապետում, ինչից այդ տարիներին նույնպէս գուրկ էր հայ երեխաների մեծ մասը: Նման իրավիճակի պահպանումը հիի էր անդառնալի բացասական հետեւանքներով թե այդ տարածաշրջանի եւ թե ողջ սփյուռքահայության համար: Այն անհնարին էր դարձնում մտավորականների ու մասնագետների նոր սերնդի ձեւավորումը, հետեւաբար՝ նաեւ ազգային մշակութային ավանդույթների պահպանումն ու զարգացումը, ինչը կանխորոշում էր սփյուռքահայության սոցիալ-տնտեսական ստորադաս կարգավիճակը ասպնջական հասարակություններում:

ՀԲԸ Միության ղեկավարությունը գիտակցելով հարցի հրատապությունն ու կարեւորությունը, ձեռնամուխ եղավ որոշակի գործնական քայլերի. Միության կենտրոնական վարչության որոշմամբ Մելգոնեան հաստատությունը վերածվեց երկրորդական վարժարանի, ուր պետք է ուսանեին հայ չքավոր ընտանիքների զավակները: «Բացի Մելգոնեանէն, - նշվում էր Միության 1936թ. տեղեկագրում, - չունինք առ այժմ արտասահմանի մէջ ուրիշ աշխարհիկ երկրորդական վարժարան մը, որ ի վիճակի ըլլայ հայ չքատոր ուսումնաստենչ սերունդին երկրորդական վարժարանի մը բազմակողմանի ուսուցումը աւանդել ձրիաբար, տարիներ շարունակ, գիշերօթիկ պահելով անոնք»:⁵⁵ Որոշվեց նաեւ 1936-1937 տարեշրջանից սկսած Մելգոնեան հաստատությունում մշտական հիմքերի վրա դնել վարժապետանոցի եւ Արհեստանոցի գործունեությունը: «Այս կերպով, Ճեմարանէն շրջանաւարտ ելած ամէն սան ու սանուհի, բացի երկրորդական վարժարանի մը տուած ընդհանուր մտաւոր զարգացումէն, պիտի ունենայ նաեւ մասնագիտական որոշ պաշար մը, հմտութիւն մը, կեանքի պայքարին մէջ յաջողելու համար: Անոնք պիտի ըլլան կա՛մ արդիական մանկավարժական պահանջներու համաձայն ազգային նախակրթարաններու համար պատրաստուած ուսուցիչներ եւ ուսուցչուհիներ, կա՛մ առեւտրական ասպարեզի համար մարզուած պաշտօնէականեր, եւ կա՛մ գիտական ճիւղին հետեւողներ որ պիտի ստանան գիւղատնտեսական եւ այլ գործնական հմտութիւններ»:⁵⁶

Միության այս որոշումները միշտ չէ, որ դրական ընկալվեցին հենց նրա անդամների ու կողմնակիցների մէջ: Այն դժգոհությունն էր արտահայտվում, որ նույնիսկ Միության նպաստընկալ գյուղական եւ աղքատիկ նախակրթարանների շրջանավարտները զրկվելու են այդ երկրորդական դպրոցում սովորելու հնարավորությունից, քանի որ նրանց գիտելիքները բավարար չէին ընդունելության պարտադիր քննությունները հանձնելու համար: Իրականում, Մելգոնեան հաստատության տնօրինությունը, քաջ գիտակցելով նույն այդ խնդրի նշանակությունը, ի սկզբանէ նախատեսել էր նախապատրաստական երեք դասարանների գոյությունը, ինչի շնորհիվ «... ոչ միայն քաղաքի, այլ նաեւ գիւղական 4 դասարան (տարրական եւ միջին) ունեցող վարժարաններ կրնան թեկնածուներ ներկայացնել Մելգոնեան Հաստատութեան, բաւական է որ անոնք ընդունակ ըլլան եւ պատրաստուած ըլլան կարող ուսուցիչներէ»:⁵⁷

Առավել ուշագրավ էր նորաստեղծ վարժապետանոց ընդունվելու պայմանների հարցը: Ինչպես նշվեց, որպես այդպիսին դիտվում էր՝ ի թիվս այլոց, հավակնորդների ընտանիքների չքավոր լինելու հանգամանքը, համաձայն որի, առաջին մի քանի տարիներին նրանք պետք է ներ-

կայացնեին հատուկ, այսպես կոչված, «չքավորության վկայական»: Այս պայմանի դեմ վճռականորեն հանդես եկավ վարժապետանոցի առաջին տնօրեն, հայտնի բանաստեղծ Վահան Թեքեյանը, որը անթույլատրելի էր համարում նման խտրականությունը, ոչ չքավոր ընտանիքների զավակների նկատմամբ: «Չքավորություն» չափանիշի գերակայությունը, որը ժառանգություն էր մնացել որբախնամ գործունեության տարիներից, ոչ միայն չէր նպաստում, այլեւ հակառակը՝ հաճախ խոչընդոտում էր բարձրորակ կրթություն ապահովելու խնդրի իրագործմանը: Դա էր վկայում ոչ միայն վարժապետանոցի, այլեւ երկրորդական դպրոցի առաջին տարիների փորձը, ինչը եւ անհրաժեշտ դարձրեց այդ պայմանի վերանայումը: Արդեն 1939թ. ՀԲԸ Միության տեղեկագրում հատուկ նշվում էր. «Հաստատութեան վերելքին առաջին պայմաններէն մէկը ուսանողութեան ընդունակութիւնն ու նախապատրաստութիւնն է: Այլեւս ամէն ոք պէտք է հաշտուի այն գաղափարին հետ թէ Մելգոնեան Հաստատութիւնը պատսպարան չէ եւ չքատոր ըլլալը չբաւեր հոն ընդունուելու համար: Անընդունակ սաներն ու սանուհիները չեն կրնար բոլորել երկրորդական վարժարանի մը շրջանը: Թէ՛ իրենք ժամակորոյս կ'ըլլան եւ թէ՛ հիմնարկութեան կը պատճառեն ի գուր վատնուած մեծ ծախքեր, որոնցմէ կրնան օգտուիլ ազգին ուրիշ աղքատ բայց ընդունակ եւ մտացի զաւակները»:⁵⁸ Չնայած դրան, Միության մասնաճյուղերը եւ տեղական ազգային իշխանությունները, երեխաների մէջ ընտրություն կատարելիս, այնուամենայնիվ, որոշ ժամանակ շարունակեցին առաջնորդվել հին չափանիշներով: ՀԲԸ Միության հեթոթական Ընդհանուր ժողովը ստիպված էր վերստին շեշտել, որ Մելգոնեան հաստատությունը «...պատսպարան չէ, ոչ ալ որբանոց մը, ուր ամէն գիճով անոք սաներ պէտք է տեղաւորել, ինչպէս ի սկզբանէ եղած է, որբութեան շրջանին, երբ ազգին որբերուն առջեւ լայն բացուեցան ՀԲԸ Միութեան բազմաթիւ հիմնարկութիւնները»:⁵⁹

Արդեն այս առաջին որոշումները վկայություններն էին Միության հետեւողական եւ վճռական քայլերի՝ Մելգոնեան հաստատությունը կրթական ամենաբարձր չափանիշներին համապատասխանեցնելու համար: Դա հավասարապես վերաբերում էր թե հայագիտական եւ թե հանրակրթական ստարկաների դասավանդմանը, մի բան, որը, ինչպես վկայում է սիւյուրքահայ դպրոցների պատմությունը, միշտ չէ, որ պսակվել է հաջողությամբ:

Մելգոնեան հաստատության վարժապետանոցում, որը սկսեց գործել 1934թ., դասընթացների տեւողությունը երկու տարի էր, իսկ ուսումնական ծրագիրը, համապատասխանելով երկրորդական վարժարանի աստիճանին, միեւնույն ժամանակ նախատեսում էր հայագիտական եւ

մանկավարժական առարկաների խորացված ուսուցում: Այս վարժապետանոցը գործեց շուրջ 35 տարի եւ նրա շրջանավարտները շատ կարեւոր դեր խաղացին ՀԲԸ Միության եւ այլ դպրոցների եւ թե՛ ազգային որոշ կառույցների կայացման գործում: Սակայն 1968թ. հայտարարվեց վարժապետանոցի փակման մասին: Նրա առաջին շրջանավարտներից հայտնի մանկավարժ Հարություն Էսեկյուլյանը տարիներ անց, անդրադառնալով այդ հարցին, գրում էր. «Մեր զարմանքը մեծ կ'ըլլայ, երբ 1968-1969 տարեշրջանին, օր մըն ալ կ'իմանանք որ վարժապետանոցի բաժինը վերջ գտեր է Մելգոնեանի մէջ: Տրուած բացատրութիւնները, - թե՛ բաւարար աշակերտութիւն չկար, եւ թե՛ Հաստատութիւնը դժուարութեան մէջ էր - մեզ չէին գոհացներ...: Վարժապետանոցը տոկացեր եւ իր գոյութիւնը պահպաներ էր նոյնիսկ Բ. Համաշխարհային Պատերազմի ընթացքին, ի գին արտակարգ զոհողութիւններու: Գուցէ կարելի էր գերազույճ ճիգով մը վերոյիջեալ դժուարութիւնները բառնալ, երբ մանաւանդ այս շրջանին հայ ուսուցիչի սով կար գաղթաշխարհի մէջ, ամենուրեք: Աւելին, ուսուցչութիւնը յարաբերաբար գնահատուած եւ լաւ վարձատրուող ասպարէզ մը դարձեր էր: Կար նաեւ ակնբախ հակասութիւն մը. Գիտական եւ Առեւտրական Բաժինները, ազգանուէր առաքելութիւն մը չունենալով հանդերձ, կը շարունակէին իրենց ընթացքը, մինչդէռ այդ ճիւղերուն կարելի էր հետեւիլ ուրիշ հայ երկրորդական վարժարաններու եւ բազմաթիւ օտար հաստատութիւններու մէջ ալ: Վարժապետանոցը մէկ հատիկ էր արտասահմանի մէջ եւ ՀԲԸ Միութեան պատիւ բերող, վարկը բարձրացնող կրթական բացառիկ ձեռնարկ մը կը ներկայացներ»:⁶⁰

Մելգոնեան կրթական հաստատությունում սաների համատեղ ապրելը, հայագիտական առարկաների (հայոց լեզու, ներառյալ գրաբար, հայոց պատմություն, հայ գրականություն ու մատենագիտություն) խոր ուսուցումը, որակյալ ուսուցիչները (որոնց թվում էին հայտնի գրողներ, մտավորականներ Վահան Թեքեյանը, Վահե Վահյանը, Հակոբ Օշականը եւ այլք), գեղարվեստական (երգչախմբային, թատերական, պարային) եւ մարզական խմբերի մշտական գոյությունը, ուսանողական պարբերականների («Այգ», «Ցուլք») հրատարակումը, հայ եկեղեցու եւ մշակութային անվանի գործիչների հաճախակի այցելությունները, այս ամենը ստեղծում էր իր տեսակի մեջ եզակի եւ ուրույն ազգային մթնոլորտ, որում էլ տեղի էր ունենում յուրաքանչյուր սանի՝ որպէս հայ մարդու, ձեւավորումը:

Դրա հետ մեկտեղ, մշտական շփումները տեղի օտարազգի իրենց հասակակիցների եւ դասախոսների հետ, օտար լեզուներով հանրակրթական առարկաների դասավանդումը, կրթական ամենաարդիական ծրագրերի կիրառումը, Լոնդոնի համալսարանի, Լոնդոնի Առեւտրական գրա-

սենյակի (London Chamber of Commerce) եւ նման այլ հաստատությունների քննություններին մասնակցությունը բացառում էին սաների պարփակումը զուտ ազգային շրջանակներում, հնարավոր էին դարձնում նրանց արագ ինքնահաստատումը տարբեր ոլորտներում: Այս ամենի շնորհիվ, Մելգոնեան հաստատությունը առաջին իսկ օրից դարձավ սփյուռքահայ մտավորականության յուրահատուկ մի դարբնոց: Կիպրոսից, Հունաստանից, Լիբանանից ու Սիրիայից, Պաղեստինից, Հորդանանից, Ֆրանսիայից եւ այլ երկրներից եկած նրա սաները հետագայում կազմեցին սփյուռքահայության մտավոր եւ գործարար վերնախավի կարեւոր մեկ մասը:

Մելգոնեան հաստատության պատմության մեջ առանձնահատուկ կարեւորություն ունեցավ 1986թ. մայիսին, մեկշաբաթյա հանդիսություններով նրա գործունեության 60-րդ տարին նշելը: Այդ առիթով իրենց շնորհավորական ուղերձներն էին հղել Ամենայն Հայոց Կաթողիկոս Վազգեն Ա., Մեծի Տանն Կիլիկիո Կաթողիկոս Գարեգին Բ., Կիպրոսի Հանրապետության նախագահ Սիիրոս Կիպրիանուն եւ այլք: Վազգեն Ա. կաթողիկոսը, արժեւորելով հաստատության գործունեությունը, մասնավորապես, գրում էր. «Մեր օրերին անհուն մխիթարութեամբ տեսնում ենք, թե՛ մելգոնեանցիները հայ կեանքում ներկայ են ազգանուէր առաքելութեան գրեթե բոլոր ճամբաների վրայ, թե՛ Հայաստանում, թե՛ սփյուռքում, իբրեւ գրողներ եւ հրապարակագիրներ, իբրեւ հասարակական գործիչներ եւ գիտութեանց ծառայողներ, բոլորը որպէս եռանդապաշտ ժիր մատուակներ»:⁶¹ Նրանցից էին Հայաստան ներգաղթած նկարիչ Հակոբ Հակոբյանը, գրող - թարգմանիչ Կարպիս Սուրենյանը, գրող-հրապարակագիրներ Գրիգոր Քեշիշյանը եւ Ծաքե Վարսյանը, երաժշտագետ Նիկողայոս Թահմիզյանը եւ այլք: Բայց, իհարկե, մելգոնյանցիների հիմնական զանգվածը գործեց սփյուռքում. խմբագիրներ Գերսամ Ահարոնյանը («Զարթօնք»), Ազատ Յափունյանը («Եփրատ»), Անդրանիկ Փոլադյանը («Յուշարար-Միութիւն»), Արա Գալայճյանը («The Armenian Mirror - Spactator»), հայկական դպրոցների ուսուցիչներ եւ տնօրէններ՝ Հարություն Էսեկյուլյանը, Օննիկ Սարգիսյանը, Ազապի Նասիպյանը, Սոսի Պետիկյանը, Զարեհ Մելքոնյանը, Վարդգես Գուրոյանը եւ այլք, զանազան ճյուղերի մասնագետներ Հայկաշեն Ուզունյանը, Թորոս Թորանյանը, Վարուժան Տյովլետյանը, Նուրել Պելլեդյանը, Կարո Արմուտյանը, Դանիել Ապտուլյանը եւ ուրիշ շատ - շատերը:

1986թ. հանդիսության մասնակիցների համար, սակայն, հատկապես կարեւոր էր Միության նախագահ Ալեք Մանուկյանի շնորհավորական ուղերձը, որը պետք է պարզեր Մելգոնեան հաստատության ապագան:

Բանն այն է, որ սկսած 1974թ., երբ Կիպրոս ներխուժած թուրքական զորքերը զավթեցին երկրի տարածքի մոտ 40%-ը եւ հայտարարեցին, այսպես կոչված, Հյուսիսային Կիպրոսի թուրքական պետության ստեղծման մասին, երկրում ստեղծվել էր անապահով եւ լարված վիճակ: Նման պայմաններում, բնականաբար, հարցականի տակ էր դրվում Մելգոնեան հաստատության հետագա գոյության նպատակահարմարությունն իսկ: ՀԲԸ Միության ղեկավարությունը, գիտակցելով հաստատության կենսական կարևորությունը սփյուռքահայության եւ հատկապես Արևելքի երկրների հայ երիտասարդության համար, որոշում կայացրեց հաստատության գործունեությունը շարունակելու մասին:

ՀԲԸ Միության 72-րդ Ընդհանուր ժողովում (1985թ.) նախագահ Ա.Մանուկյանը, հատուկ անդրադառնալով այդ հարցին, նշում էր. «Մելգոնեան Կրթական Հաստատությունը... իր աշխարհագրական դիրքով, գիշերօթիկ հանգամանքով, իրահատուկ մթնոլորտով եւ ուսումնական մակարդակով բացառիկ կրթարան մըն է... Արտասովոր պատասխանատուութեամբ օժտուած այս Հաստատութենէն ժամանակը եկած է, որ օգտուի՞ն Ամերիկաներու եւ Եվրոպայի մեր գաղութները եւս, ինչպէս որ ըրին Միջին Արևելքի հայ գաղութները անցնող տասնամեակներուն ...Այս առաջադրութեամբ՝ հաստատութիւնը նոր դպրոցաշէնքով եւ յարակից արդիական յարմարութիւններով օժտելու ծրագիրը, որուն իրականացումը կախեալ էր Մելգոնեան ընդարձակ եւ արժէքատր կալուածին զարգացման կարելիութիւններէն, մտած է գործնական փուլի մէջ...»⁶² Այնհայտ էր, սակայն, որ Հաստատության շենքային պայմանները արդեն ոչ միայն չէին համապատասխանում օրվա պահանջներին, այլև անհնարին էին դարձնում նրա արդյունավետ գործունեությունը ընդհանրապես: Եվ, ահա 1986թ. նախագահ Ալեք Մանուկյանը հայտարարեց հաստատության զարգացման նոր ծրագրերի մասին. «Մելգոնեանի 60 - ամեակի սոնակատարութիւնը անցեալի վաստակի ոգեկոչում մը չէ միայն, այլ նախապատրաստութիւն մը՝ ապագայ մեծ իրագործումներու, դաստիարակութեան եւ ազգային առաքելութեան ճամբուն վրայ: Հաստատութեան համար ծրագրուող շինարարական նոր ծրագիրները պիտի գան մեր սերունդները իբրեւ արժանատր մարդ արարածներ, գիտակից ազգայիններ եւ Միութեան նուիրեալներ առաջնորդելու 21 դարու լուսաւոր սեմէններս»⁶³

1987թ. Կիպրոսի Հանրապետության նախագահի մասնակցությամբ կատարվեց Մելգոնեան կրթական հաստատության նոր համալիրի հիմնարկեքը: Հաստատությունը այժմ զբաղեցնում է մոտ 125.000 քառ. մետր տարածություն, որի վրա տեղակայված է տարբեր շինությունների մի ամ-

բողջ համալիր՝ արդեն հիշատակված երկու եռահարկ ուսումնական շենքերը, որոնք ապահովված են ամենաարդիական սարքավորումներով ու միջոցներով, երկու նորակառույց հանրակացարան աղջիկների ու տղաների համար՝ իրենց բոլոր հարմարություններով, մարզահամալիր, տարբեր մարզադաշտեր, պաշտոնյաների բնակելի շենք եւ այլն: Մելգոնեան հաստատության հաջողությունը մեծապես պայմանավորված է նաեւ սովորելու եւ ապրելու համար անհրաժեշտ բոլոր պայմանների առկայությամբ, եւ այդ առումով, այն նմանվում է ԱՄՆ-ի համալսարանական ավաններին (campus):

Այսպիսով, 1986թ. սկսվեց Մելգոնեան հաստատության պատմության մի նոր փուլ, որի արդյունքում այն դարձավ առաջատար կրթական հաստատությունը ողջ սփյուռքում: Այսօր Մելգոնեան կրթական հաստատությունը միակ գիշերօթիկ, երկրորդական, ամենօրյա դպրոցն է սփյուռքում: Այն նաեւ միակ միջազգային դպրոցն է, քանզի այստեղ ուսանում են 20-ից ավելի երկրներից եկած շուրջ 320 հայ երեխաներ: Սկսած 1990-ական թթ. կեսերից առաջին անգամ այստեղ ուսանում են նաեւ հայ երեխաներ Հայաստանից ու Ղարաբաղից, Ռուսաստանից եւ նախկին Խորհրդային Միության այլ հանրապետություններից: Այս հանգամանքը նույնպես առանձնահատուկ է միայն Մելգոնեան հաստատությանը: Հաստատության հեղինակությունը պայմանավորված է կրթական բարձր մակարդակով, որը ապահովվում է արդիական ուսումնական ծրագրերի (հիմնականում հումանիտար, գիտական եւ առևտրական ճյուղերով) եւ փորձառու ուսուցիչների շնորհիվ: Այդ ծրագրերով նախատեսվում է նաեւ սաների նախապատրաստումն ու մասնակցությունը միջազգային քննություններին (GCE Advanced Level subjects, TOEFL, SAT I, SAT II եւ այլն), ինչը հնարավոր է դարձնում նրանց հետագա ուսումը տարբեր երկրների առաջատար համալսարաններում: Նույն այդ նպատակով, բացի հիմնական երկու լեզուներից՝ հայերենից ու անգլերենից, դասավանդվում են նաեւ հունարեն, ֆրանսերեն, արաբերեն, ռուսերեն եւ բուլղարերեն լեզուները⁶⁴:

Դ.Յակոբեան եւ Յովակիմեան-Մանուկեան վարժարանները

Միության համար Մելգոնեան հաստատությունում վարժապետանոցի հիմնումը, ինչպես նշվեց, կարևոր նախապայմաններից էր սեփական վարժարանների ցանցի ստեղծման համար: Կար, սակայն, մեկ նախա-

պայման են՝ անհրաժեշտ ֆինանսական միջոցների հայթայթումը, ինչը՝ չնայած բոլոր ջանքերին, այդպես էլ չէր գտնում իր լուծումը: Թեև 1930-ական թթ. որբանոցները դադարեցրին իրենց գոյությունը, Միությունը շարունակում էր իր տարաբնույթ օգնությունը Արեւելքի երկրներում ապաստանած բազմահազար գաղթականներին, դրա հետ մեկտեղ ընդլայնելով իր գործունեությունը Խորհրդային Հայաստանում: Տարիներ շարունակ այս բոլոր ծրագրերի իրականացումը, բնականաբար, պահանջում էր դրամական մեծ միջոցներ: Այդ միջոցները հայթայթվում էին հիմնականում շնորհիվ Արեւմուտքի երկրներում, նախ եւ առաջ, ԱՄՆ-ում բնակվող Միության անդամների եւ բարեկամների նվիրատվությունների: Սակայն նրանց հնարավորությունները անսպառ չէին, հատկապես հաշվի առնելով նույն այդ տարիների համաշխարհային տնտեսական Մեծ ճգնաժամի ծանր հետեւանքները: Հարկ է նշել մեկ հանգամանք էս: Սոցիալ-տնտեսական հաստատման այդ դժվարին տարիներին սփյուռքահայերը, գիտակցելով ազգային կրթության կարեւորությունը, այնուամենայնիվ, հասկանալի պատճառներով պարտադրված էին առաջնությունը տալ իրենց ֆիզիկական գոյության համար անհրաժեշտ պայմանների ասպարհվմանը: Նման իրավիճակում Միության ղեկավարությունը պարտադրաբար ստիպված էր տարեցտարի հետաձգել իր իսկ որդեգրած կրթական ծրագրի իրագործումը, հատկապես սեփական դպրոցների հիմնումը:

Բայց ահա, 1939թ. այս հարցը անսպասելիորեն ստացավ իր դրական լուծումը, որը, սակայն, երկակի զգացումներ առաջացրեց ՀԲԸ Միության շարքերում, քանզի այն ուղղակիորեն կապված էր Հայաստանում ՀԲԸ Միության գործունեությունը արգելելու մասին Խորհրդային իշխանությունների՝ 1937թ. որոշման հետ: Այդ հարցը մանրամասն քննարկվեց գրքի 6-րդ գլխում, եւ այստեղ հիշեցնեն միայն հետեւյալը: Երբ ՀԲԸ Միության ղեկավարության մի շարք դիմումները Հայաստանի իշխանություններին՝ վերոհիշյալ որոշման պատճառների պարզաբանման եւ Միության՝ Հայաստանում գործունեությունը վերսկսելու վերաբերյալ, մնացին անպատասխան, Միության Կենտրոնական Վարչական Ժողովը ստիպված եղավ Հայաստանի համար նախատեսված գումարները ծառայեցնել իր սփյուռքյան ծրագրերին: Համաձայն համապատասխան որոշման 7-րդ կետի, Երեւանի Դարուհի Յակոբեան մայրանոցի համար տարեկան տրամադրելի 800 անգլ. ոսկի գումարով Բեյրութում պետք է հիմնվեր աղջիկների հատուկ դպրոց՝ Դարուհի Յակոբեան կրթարան անունով:

Բեյրութի Դարուհի Յակոբեան վարժարանի բացումը տեղի ունեցավ 1939թ. հոկտեմբերին: Միության այդ նոր հաստատության նպատակն էր

«...կարօտ այլ աղջիկներուն ձրիաբար տալ բարձրագոյն նախակրթութիւն, վաղուան համար անոնցմէ պատրաստելու համար գիտակից մտաւորականներ եւ մայրեր»:⁶⁵ Վարժարանը սկսեց գործել որպէս բարձրագոյն նախակրթարան եւ առաջին տարում ուներ 50 աշակերտուհի: Առավել ընդունակ շրջանավարտները պետք է շարունակէին ուսուցումը Մելգոնեան հաստատությունում, իսկ համալսարան ընդունվողները կարող էին օգտվել Պողոս Նուպարի ուսանողական հիմնադրամից: 1943թ. Դարուհի Յակոբեան վարժարանը տվեց իր առաջին շրջանավարտները, որոնցից ոմանք իբրեւ Կիւլպէնկեան սաներ, շարունակեցին ուսումը, ոմանք ամուսնացան, իսկ ուրիշներն էլ աշխատեցին Միության նպաստընկալ վարժարաններում՝ որպէս ուսուցչուհի: Իր գործունեության առաջին մի քանի տարիներից հետո վարժարանը դարձավ հեղինակավոր կրթական հաստատություններից մեկը եւ այդտեղ սովորող ցանկացողների թիվը միշտ էլ գերազանցում էր եղած հնարավորությունները: Այս հանգամանքը թույլ էր տալիս վարժարանի ղեկավարությանը նախնական մրցույթի արդյունքներով ընդունել առավել ընդունակ եւ պատրաստված աղջիկների: Դրա հետ մեկտեղ, վարժարանի տնօրինությունը ոչ պակաս խստապահանջ էր նաեւ ուսուցիչների հարցում եւ աշխատանքի էր հրավիրում բարձրակարգ մասնագետներին: Այսպես, 1947-1948 ուսումնական տարում վարժարանի ուսուցիչներից էին Բյուզանդ Եղիաջանը, Սարգիս Ապտալյանը (Վահե Վահյան), Սիմոն Սիմոնյանը, երաժշտագետ Համբարձում Պերպերյանը եւ այլք: 1952թ. վարժարանը՝ իր վեց դասարաններով (ներառյալ նախապատրաստականը), որտեղ ուսանում էր 101 աշակերտուհի վերածվեց լրիվ երկրորդական վարժարանի: Հետաքրքիր գուգադիպությամբ նույն տարին շրջանավարտների ընդհանուր թիվը նույնպես կազմել էր 101, որոնք էլ հիմնեցին Դարուհի Յակոբեան Օրջանաւարտից Միութիւնը: Սկսած 1952թ., վարժարանում սկսեց գործել նաեւ ՀԲԸ Միության Դարուհի Յակոբեան մասնաճյուղը, որը հատկապես աչքի էր ընկնում իր բազմապիսի մշակութային եւ գեղարվեստական միջոցառումներով: Այդ մասնաճյուղի գործունեության կարեւոր արդյունքներից էր 1955 թվականից «Հորիզոն» աշակերտական հանդեսի հրատարակումը՝ չորս լեզվով: Վարժարանի կրթական բարձր մակարդակի մասին էր վկայում հետեւյալ փաստը. «...Պէլյուրի Ամերիկեան համալսարանի Տնօրէնութիւնը, գնահատելով Դարուհի Յակոբեանի ուսման մէջ ունեցած փայլուն յաջողութիւնները, համաձայն գտնուած է որ անոնց շրջանավարտներուն հարիւրին 40ը համալսարան ընդունուին, առանց մուտքի քննութիւններ պահանջելու անոնցմէ»:⁶⁶ Բացի այդ, վարժարանի ավարտական դասարանի աշակերտուհիները տարեցտարի հա-

ջողությամբ մասնակցում էին Օքսվլդդի եւ Քեմբրիջի համալսարանների Ջենըրլ Սերթիֆիքեյթի քննություններին, իսկ 1960թ. «...սկսում է արաբական պաքալորեայի դրուսիւնը կիրարկուիլ վարժարանէն ներս»:⁶⁷

Նույն 1960թ. վարժարանը վերջապէս ունեցավ նորակառույց շէնք Բէյրութի Հազմիե արվարձանում, ինչի կարիքը զգացվում էր վաղուց ի վեր: «Անոր կալուածին տարածութիւնն է 5.250 քառ. մէդր, իսկ դպրոցին ընդարձակ, գրաւիչ եռյարկանի շէնքը գոհացում կու տայ արդի մանկավարժութեան բոլոր պահանջներուն, իր բաժանումներով, սարքաւորումով եւ ճաշակատր կահաւորումով: Ունի լուսատր, օդասուն դասարաններ, 350 սանուհիներու համար հանգստաւէտ ճաշարան մը, խոհանոց, գիտական աշխատանոցներ, պասքէթպոլի, վոլիպոլի եւ աթլէթիք մրցումներու յատուկ խաղավայրեր, եւն ...»:⁶⁸ Նմանօրինակ պայմանները հնարավոր դարձրին ինչպէս դասավանդման որակական բարելավումը, այնպէս էլ դպրոցի սաների քանակի աճը. 1964թ. Դարուհի Յակոբեան դպրոցում ուսանում էր 216, իսկ հաջորդ տարի՝ 237 աղջիկ:

Դարուհի Յակոբեան վարժարանը բացվեց այն օրերին, երբ Եվրոպայում արդեն սկիզբ էր առել Երկրորդ Աշխարհամարտը: Թեւեւ հետագա շուրջ վեց տարիների ընթացքում Մերձավոր Արեւելքում ռազմական գործողություններ չընթացան, այնուամենայնիվ, պատերազմը անխուսափելիորեն իր կնիքն էր դրել նաեւ այստեղ ասարող մարդկանց կյանքի վրա: Պատերազմի ավարտը եւ դաշնակից պետությունների հաղթանակը, ինչպէս արդեն նշվել է այլ աղբյուր, մեծ ոգեւորությամբ ընդունվեց նաեւ սփյուռքահայության կողմից: Խորհրդային Միության տարածքային պահանջները Թուրքիային, Հայաստան ներգաղթի կազմակերպումը, կարծես, նոր հեռանկարներ էին բացում ազգային իղձերի իրականացման համար: Դրա հետ մեկտեղ, պատերազմական տարիներից հետո որոշակի աշխուժացում էր ակատվում նաեւ սփյուռքի տարբեր համայնքների կյանքում: Սոցիալ-տնտեսական ինքնահաստատման շուրջ 30 ծանր եւ դաժան տարիներից հետո սփյուռքը՝ կազմակերպություններն ու անհատ մարդիկ, արդեն պատրաստ էին գործելու ոչ թե հանուն իրենց գուտ ֆիզիկական գոյության պահպանման, այլ հանուն իրենց ազգային դիմագծի՝ սփյուռքահայ մշակույթի կերտման: Այդ գործունեության կարեւոր ասպարեզներից էր, անշուշտ, նաեւ դպրոցաշինությունը, ինչը եւ եղավ սփյուռքի հետպատերազմյան պատմության ամենանշանակալի երեւույթներից մեկը: Դրա վաղ վկայությունն է նաեւ ՀԲԸ Միության գործունեությունը:

Արդեն 1947թ. Բէյրութում սկսեց գործել Միության եւս մեկ կրթական հաստատություն՝ Մանչերու Բարձրագոյն վարժարան, որի առաջին

սաներն էին 45 տղաներ: Այդ դպրոցը սփյուռքի ամենահեղինակավոր դպրոցներից մեկն է, հայտնի՝ Յովակիմեան-Մանուկեան երկրորդական վարժարան անունով: Ուշագրավ է, որ այդ անունը, ի տարբերություն Միության մի շարք դպրոցների, կապված չէ Միության նախագահ Ալեք Մանուկյանի հետ: Ինչպէս կարդում ենք Միության 1952թ. տեղեկագրում, Միության Բարեբար անդամուհի տիկ. Մեհրյուպե Մանուկյանը, ծնյալ Հովակիմյան, «...բարեսիրական նպատակի մը յատկացուելու համար կտակով գումար մը թողած էր եւ անոր գործածութեան կերպը վստահած էր իր քրոջ՝ տիկ. Զարուհի Ն.Էսմէրեանի: Մեր կազմակերպութեան Պատուոյ Անդամուհի տիկ.Էսմէրեան յոյժ ազնուօրէն այդ գումարը ՀԲԸ Միութեան տրամադրեց եւ անով կառուցուեցաւ Պէյրութի մէջ Յովակիմեան-Մանուկեան Երկր. Վարժարանին հոյակապ շէնքը, որ իր նպատակին համար սկսաւ գործածուիլ 1952ին»:⁶⁹

1953թ. Յովակիմեան-Մանուկեան դպրոցը վերածվեց լրիվ երկրորդական վարժարանի, եւ այստեղ նույնպէս սովորել ցանկացողների քանակը գերազանցում էր առկա հնարավորությունները: Արդեն 1952թ. դպրոցի սաները սկսեցին հրատարակել «Նուիրում» հանդեսը: 1954- 1955 տարեշրջանում դպրոցի ուսումնական ծրագիրը ենթարկվեց որոշակի փոփոխությունների, եւ սկսեց գործադրվել Լիբանանի պետական բակալորիայի ծրագիրը, իսկ շրջանավարտները իրավունք ստացան առանց ընդունելության քննությունների շարունակել ուսումը Բէյրութի Ամերիկյան համալսարանում: 1960թ. Գալուստ Կիւլպէնկեան հիմնարկության տրամադրած միջոցներով վարժարանում կառուցվեց համաճանաչ նոր ընդարձակ հանդիսասրահ: Սկսած 1960-ական թթ., դպրոցի սաների թիվը մշտապէս 200- ից ավելի էր, ինչի շնորհիվ հնարավոր դարձավ էլ ավելի աշխուժացնել ազգային-մշակութային կյանքը: Դրա օրինակներից էր վարժարանում Հայ Երիտասարդաց Ընկերակցության մասնաճյուղի հիմնումը՝ 1966թ.:

Լիլա Գարակյոզյանի հաշվետվությունը

Այսպիսով՝ 1940-ական թթ. վերջին ՀԲԸ Միությունը սփյուռքում ուներ երեք սեփական վարժարաններ՝ Մելգոնեան կրթական հաստատությունը Կիպրոսում, Դարուհի Յակոբեան աղջիկների եւ Յովակիմեան-Մանուկեան երկրորդական վարժարանները Բէյրութում եւ բացի այդ, նա հովանավորում եւ աջակցում էր հիմնականում Մերձավոր Արեւելքի տարբեր երկրներում գործող մի քանի տասնյակ հայկական վարժարաններին:

Միության ղեկավարության համար, սակայն, ակնհայտ էր թե գործող դպրոցների քանակի, թե նրանց շենքային պայմանների եւ թե ուսման մակարդակի անբավարար լինելը: Հարցը պահանջում էր արագ եւ արմատական լուծում, հակառակ դեպքում այդչափ մեծ զոհողությունների գնով մահից փրկված տասնյակ հազարավոր հայ երեխաները դատապարտված էին մեծանալ՝ զրկված ազգային կրթությունից ու դաստիարակությունից, ինչի անդառնալի եւ բացասական հետեւանքները ազգի գոյատեւման առումով ակնհայտ էին: Գիտակցելով հարցի հրատապությունն ու կարեւորությունը՝ Նյու Յորքում տեղակայված Միության ղեկավարությունը որոշում է Մերձավոր Արեւելք գործուղել հատուկ պատվիրակություն՝ տիրող կացության մասին իրական պատկերացում կազմելու նպատակով: Պատվիրակության առաքելության կարեւորության մասին էր վկայում նրա կազմը. այն գլխավորեց Միության Կենտրոնական Վարչական Ժողովի անդամ, ականավոր գործիչ եւ մեծ բարերար Միհրան Գարակյոզյանի (նա իր մահկանացուն կնքեց 1948թ.) դուստր Լիլա Գարակյոզյանը, իսկ անդամներն էին Կենտրոնական Վարչական Ժողովի անդամներ Մաքրուհի Հովսեփյանը եւ Միության Ընդհանուր տնօրեն Գրիգոր Կիրակոսյանը: Պատվիրակությունը 1950թ. ապրիլի քան երկու ամիս եղավ Լիբանանում, Սիրիայում եւ Հունաստանում, ուր այցելեց գրեթե բոլոր հայաշատ վայրերը: Երկարամյա ընդմիջումից հետո ՀԲԸ Միության բարձրաստիճան պաշտոնյաները առաջին անգամ է, որ այցելում էին այս տարածաշրջանը եւ հնարավորություն էին ստանում ոչ միայն գնահատել իրենց գործունեության արդյունքները, այլեւ տեսնել եւ հասկանալ տեղի հայության կարիքներն ու սպասումները: Վերադառնալով Նյու Յորք՝ Լիլա Գարակյոզյանը ներկայացրեց մի հաշվետվություն, որի հրապարակումը հայերենով ու անգլերենով, թե առանձին գրքույկի ձեւով եւ թե «Միութիւն» եւ «Hooshar» ամսագրերում մեծ դեր խաղաց Արեւելքի երկրներում ՀԲԸ Միության ազգապահպան գործունեության աշխուժացման գործում:

Այս հաշվետվությունը, ամեն բանից զատ, անաչառ կազմված մի փաստաթուղթ է, որը ներկայացնում է ոչ միայն ՀԲԸ Միության հաստատությունների գործունեությունը, այլեւ ընդհանրապէս Լիբանանում եւ Սիրիայում ազգային կյանքի ու կրթության հետ կապված մի շարք կարեւոր հարցեր: Այդ իսկ պատճառով, անհրաժեշտ համարեցի այսչափ ծավալուն մեջբերումներ անել նշված հաշվետվությունից:

«Սուրիա եւ Լիբանան երկու մեծ կեդրոններ են, առաջինը 100.000 եւ երկրորդը 75.000 հայ բնակչութեամբ: Բէյրութի մէջ, սքանչազայ եւ հրճուեցայ փողոցներում մէջ այնքան շատ հայերէն խօսակցութիւն լսելով,

բազմաթիւ հայերէն անուններ կարդալով խանութներում վրայ, լաւագոյն խանութները յաճախ, Պէյրութի Ամերիկեան Համալսարանին հայ բրօքէ-սէօրներուն տպաւորիչ եւ պատուաբեր անուանացանկը տեսնելով եւ նոյն Համալսարանին ուսանողներուն մէջ հանդիպելով այնքան շատ հայ անուններու, շատերը Պատուոյ տախտակներու վրայ: Նոյն այս դիտողութիւնները ճիշդ են Սուրիոյ համար ալ: Հայ գաղթականները, թէ՛ Սուրիոյ եւ թէ՛ Լիբանանի մէջ, այդ երկիրներուն բարգաւաճման ազդակ եղած են՝ ազատ ասպարէզներու մէջ, իրենց առեստորով, իրենց մշակոյթով եւ իրենց արուեստներով ու արհեստներով: Կարելոր եւ յարգուած փոքրամասնութիւններ են անոնք, Խորհրդարաններու մէջ իրենց սեփական երեսփոխաններով: ...Մինչ հազարաւոր հայեր, Մերձարոր Արեւելքի մէջ, իրենց աշխատութեամբ տարագիրներու քէմբերէն դուրս գալով կրցած են իրենց համար տուն եւ լաւ դիրք շինել, անելի շատ հազարաւորներ դեռ կ'ապրին դրութեան մը մէջ որ ինծի զարհուրելի թուեցաւ»:

«...Սուկումով ու ամօթով կը յիշեմ,- գրում էր Լ. Գարակյոզյանը,- Պէյրութի Մասլաք Քէմբը՝ ուր մէկ քանի հազար հայեր կ'ապրին, ու կը շնչեն մօտակայ աղբանոցէն, կաշիի գործարանէն, եւ սպանդանոցէն եկած նեխած օդը: Մղձաւանջի պէս բան մըն էր տեսնել մեր հայ մանկիկները որ աղբիւրը եւ աղտեղութիւնը կը փորփրէին խոզերուն հետ: Քրչահաւաքներն ալ զբաղած էին, ժողովելով լաթի կտորներ, մետաղի մնացորդներ, ապակի, փետուր եւ ոսկոր, ծախելու համար: Այսպէս կ'ապրին մեր ժողովուրդէն ոմանք, եւ ասիկա ամօթ եւ նախատինք է մեզի համար: ...Կը յիշեմ նաեւ հաւասարապէս վատթար վիճակը Թիրոյի Քէմբին, Պէյրութի մէջ, որ արտաքնոց չունի, եւ Սանճաքի Քէմբը՝ որ կը գտնուի ուրիշ սպանդանոցի մը մօտ ...Ինծի ըսուեցաւ թէ բարեբախտ էի որ Քէմբը կ'այցելէի ամառը եւ ոչ անձրեւի շրջանին, երբ գետինը կը դառնայ ցեխի ծով մը, երբ հասարակաց կոյուղիները ջուրով լեցուելով դուրս կը վազեն, երբ տուններու հողէ գետիներն ալ պարզապէս ցեխի կը վերածուին:

Տիրութեամբ կը վերյիշեմ Հալեպի Տավուտիէի խեղճ գաղթակա-յանը եւ Ջէյրուն Խանի Քէմբը ուր շատ մը հայ ընտանիքներ կ'ապրին դեռ չլուացած շէնքի մը չորս պատերուն մէջ որ ոմբակոծուած ըլլալու տպաւորութիւնը կը թողու վրադ: Այս բոլոր հիւղակներուն եւ տուններուն մէջ ամբողջ ընտանիք մը կ'ապրի մէկ սենեակի մէջ. ստեպ եօթը կամ ութը հոգի ամէն տարիքէ եւ երկու սեռէ՝ կ'ապրին այսպէս խոնոած իրենց ծնունդէն մինչեւ մահը»:⁷⁰

Այս բոլորից հետո առավել տպավորիչ է Լ. Գարակյոզյանի հետեւյալ միտքը. «Բայց ապրուստի այս վատ դրութեանէն անելի ամօթալի է այն

կատարի եւ ծայրայեղ քաղաքական ատելութիւնը որ գոյութիւն ունի Մերձատր Արեւելքի հայութեան մէջ, ու այն կուսակցական պայքարը որ Հայուն բարի անունը կ'աղարտէ գարշելի սուտով ու խաբէպատիր բրոքականտով»:⁷¹

Անցնելով ՀԲԸ Միության Բեյրութի երկու դպրոցներին՝ Լ.Գարակոյզյանը անթաքույց հպարտությամբ գրում է. «Ասոնք պատուաբեր կերպով կրնան բաղդատուիլ այս երկրին բարձրագոյն վարժարաններուն հետ: Երկուքն ալ կը գտնուին վարձուած վիլլաներու մէջ, Պէյրութի կեդրոնը: Մանչերու վարժարանը ունի պզտիկ պարտէզ մը, թէնիսի եւ պասքէթպօլի խաղավայրեր: Այցելեցի երկու դպրոցներուն ալ օդասուն եւ պայծառ դասարանները, տեսայ աղջիկները, 109 հոգի, վայելուչ համազգեստներով եւ ճերմակ կօշիկներով: Տեսայ 99 պատանի ուսանողներ: Այս տղոց եւ աղջիկներուն ութսուն առ հարիւրը աղքատ թաղերէ են եւ դպրոց կը բերուին պըսերով: Դարուհի Յակոբեան վարժարանը հինգ դասարան ունի Աղջկանց Ծիւններ գոլէճի մուտքի համար: Մանչերուն վարժարանը ունի եօթը դասարան Ամերիկեան համալսարանը ընդունուելու համար: Աշակերտները ընտրուած են 20 նախակրթարաններէ, ֆիզիքական եւ մուտքի քննութիւններէ յետոյ: ...Հաճույքն ունեցայ այս երկու վարժարաններու մարզանքի միացեալ դաշտահանդէսին ներկայ ըլլալու: Հիանալի էր տեսնել մեր տղաքն ու աղջիկները որ կը կատարէին իրենց մարզանքը ճկունութեամբն ու համաչափութեամբը մեր Ամերիկեան ամենալաւ մարզիկներուն»:

Լրիվ այլ էր թաղային կամ համայնքային նախակրթական վարժարանների վիճակը, որոնց մի մասին, ինչպես նշվեց, Միությունը տարիներ շարունակ հատկացնում էր նպաստներ: «Սուրիոյ մէջ, - վկայում է Լիլա Գարակոյզյանը, - յիսուն թաղային վարժարաններ Միութենէն օգնութիւն կ'ստանան, ընդհանրապէս մասնատր թուով աշակերտներու թոշակին վճարման ձեով: 470 փոքրիկներ Հալէպի 17 վարժարաններուն մէջ հարիւր օր շարունակ կաթ ստացան: ...Հալէպի մէջ ուսուցիչներէն մին ինծի պատմեց թէ կաթի սպասարկութեան սկսելէ առաջ իր աշակերտներէն մի քանին անսուաղութենէ մարեցան դասի պահուն: Հազարատրոններ դպրոց կուգան առանց նախաճաշի: ՀԲԸ Միութիւնը այս տարի 9.514 տղար ծախսած է փոշի կաթի համար, զոր դրկած է Սուրիա, Լիբանան եւ Յուստան»:

Նման իրավիճակը անխուսափելի հետեւանքն էր լիբանանահայերի մի զգալի մասի խիստ ծանր տնտեսական վիճակի: Լ.Գարակոյզյանի նկարագրությամբ այդ վարժարանները գրեթէ չէին տարբերվում վերը հիշատակված հայաբնակ թաղերից.

«Ահա՛ ինչ որ տեսայ. դպրոցներ որ հիւղակներ էին, դպրոցներ՝ եկեղեցիներու մէջ պատսպարուած, դպրոցներ՝ որ կրթական յարկէ աւելի մարագներու կը մմանէին, որոնց պատերը ճեղքոտուած էին ու տանիքները լեցուն ծակերով՝ որոնց մէջէն երկինքը կրնայի տեսնել: Ձմռան միջոցին այս բացուածքներէն անձրեւ կը տեղայ տղոց գլխուն: ...Պատահաններէն շատերը ապակի չունին, եւ ձմեռը տախտակով կը գոցուին՝ դուրսի ցուրտէն պաշտպանուելու համար, դասարանները բոլորովին մութցնելով: Բոլոր դպրոցներն ալ սաստիկ խճողուած են ...ստէպ մէկէ աւելի կարգեր դաս կ'առնեն միեւնոյն սրահին մէջ, միեւնոյն պահուն: Հազարատր աշակերտներ գրասեղան չունին եւ ստիպուած են գրել գետնին վրայ նստած կամ ծուկի վրայ...»

«Այս դպրոցներուն առողջապահական վիճակը վատ է: Ընդհանուր առմամբ մէկ արտաքնոց կայ հարիւր աշակերտի համար: Հալէպի մէջ դպրոցներ տեսայ ուր բնաւ արտաքնոց չկար. հետեւաբար փոքրիկները ստիպուած էին դաշտերը երթալ: Դարձեալ հոն աշակերտները կը խմէին պղտոր եւ հաւանաբար ապականեալ հորի մը ջուրը: Նման պատճառներով փոքրիկներուն հարիւրին իննիսունը աղիքի ճիճուներով վարակուած են»: Եվ որպէս եզրակացութիւն. «Ամերիկայի մէջ մենք բնաւ չպիտի հանդուրժէինք մեր զաւակները նման խղճալի դպրոցներ դրկելու»:⁷²

Լիլա Գարակոյզյանի հաշվետվությունը, ուր նա անդրադառնում էր մի շարք այլ հրատապ հարցերի եւս (ուսուցիչների պակասը, նրանց մասնագիտական ցածր մակարդակը, մեծ թվով հայ երեխաների դպրոց չհաճախելը եւ այլն), մեծ արձագանք ունեցավ Միության ղեկավարության եւ շարքային անդամների մէջ: Արդեն 1950թ. դեկտեմբերին Միության նախագահ Արշակ Գարակոյզյանը հանդես եկավ հատուկ կոչով, որով բացված հայտարարեց «Հանգանակութիւն Մերձատր Արեւելքի կարօտ հմայնքներու վարժարանների համար», որի արդյունքում նախատեսվում էր հավաքել 300.000 դոլար: Հանգանակության նպատակներն էին՝ անհրաժեշտության դեպքում կառուցել նոր շէնքեր Միության կողմից հովանավորվող դպրոցների համար կամ նորոգել դրանք, դպրոցները օծտել կահույքով, ուսումնական նյութերով, աղքատ ընտանիքների երեխաներին ապահովել սննդով եւ այլն:

Ալ.Մանուկյանը ՀԲԸՍ նախագահ

Այս հանգանակությունը Արշակ Գարակոյզյանի՝ որպէս ՀԲԸ Միության նախագահի, կազմակերպած վերջինն էր: 1953թ. մայիսին բժիշկ-

ների թելադրանքով նա հարկադրված եղավ ներկայացնել իր հրաժարականը, որը եւ ընդունվեց հունիսի 1-ին:

Միության նոր նախագահի ընտրությունը կայացավ 1953թ., հեթոական Ընդհանուր ժողովից անմիջապես հետո: ՀԲԸ Միության Կենտրոնական Վարչական Ժողովը, դեկտեմբերի 12-ի իր միաձայն որոշմամբ, ՀԲԸ Միության նախագահ ընտրեց Ալեք Մանուկյանին:⁷³

Կասկածից վեր էր, որ Ա.Գարակյոզյանի՝ նախագահի պաշտոնում մնալու դեպքում, Միությունը հաջողությամբ շարունակելու էր իր բազմաբնույթ ծրագրերի իրականացումը. դրա երաշխիքն էր նախորդ տարիների նրա արդյունավետ գործունեությունը: Սակայն ակնհայտ էր, որ թե՛ հետպատերազմյան աշխարհաքաղաքական նոր պայմանները եւ թե՛ սփյուռքի զարգացման առանձնահատկությունները նոր խնդիրներն էին դնում Միության առջեւ, որոնց լուծումը պահանջում էր համապատասխան նոր գործելակերպ: Այս իմաստով Ալեք Մանուկյանը իր տարիքով, խառնվածքով ու ազգային նկարագրով եւ փորձառությամբ նախագահի պաշտոնի առավել հարմար թեկնածուն էր: Այլ կերպ ասած՝ նոր ժամանակները պահանջում էին նոր առաջնորդներ: Ալեք Մանուկյանի՝ որպես Միության նախագահ, առաջին ելույթի հետեւյալ խոսքերը դարձան նրա հետագա գործունեության կարգախոսը. «Իմ երազս է Միութեան նիւթական միջոցները բազմացնել. որպէսզի շատ մը կենսական պէտքեր – որոնց մանրամասնութեան մէջ չեն մտներ, բայց որոնց գլուխը կը գտնուի մեր մշակոյթը, հայ գիրն ու գրականութիւնը – չ'անտեսուին այլեւս»:⁷⁴

Վարժարաններ Սիրիայում

Վերոհիշյալ հանգանակության իրական նախաձեռնող՝ օրիորդ Լիւս Գարակյոզյանը, ինչպես եւ սպասվում էր, հավատարիմ մնաց Միության եւ իր ընտանիքի ավանդույթներին եւ դարձավ առաջին նվիրատուներից մեկը՝ տրամադրելով 20.000 դոլար Լիբանանի ու Սիրիայի դպրոցների անմիջական կարիքները հոգալու համար: Այդ գումարով, մասնավորապես, Սիրիայում նորոգվեցին մի քանի դպրոցների շէնքեր, ինչպես նաեւ 33 դպրոցների համար հայթայթվեցին 239 գրասեղան-նստարան, 560 մանկապարտեզի նստարան, 25 ուսուցչական սեղան եւ 49 գրատախտակ: 1951-1952թթ. դպրոցական տարեշրջանում հանգանակությամբ հավաքված գումարներից, մասնավորապես, վճարվեց Լիբանանի Ազգային, Հայ ավետարանական եւ կաթոլիկ վարժարանների 33 ուսուցիչ-

ների աշխատավարձը, Հալեպի տարբեր վարժարանների 746 աշակերտների ուսման վարձը եւ այլն:

Սակայն այդ հանգանակության ամենակարեւոր արդյունքներից էր Միության՝ Հալեպում առաջին երկրորդական վարժարանի հիմնումը: Դեռեւս մինչեւ Լ.Գարակյոզյանի պատվիրակության ժամանումը, Միության Սիրիայի Ծրջանակային Հանձնաժողովը որոշում էր կայացրել նման դպրոցի կառուցման մասին եւ հարմար շէնք էր գտել Հալեպի կենտրոնում՝ Ազիզիե թաղում: Պատվիրակությունը հավանություն տվեց այդ որոշումին եւ հետագրեց Նյու Յորք, անհրաժեշտ գումարը՝ 33 հազ.դոլար, հատկացնելու մասին: «Գումարը գոյացաւ, ծերունազարդ բարերար Լազար Նաճարեանի նուիրած 20.000 տոլարին վրայ անելցնելով, Միութեան Նիւ Եորքի Տիկնանց կեդր. Յանձնախումբի հաւաքած 13.000 տոլարը»:⁷⁵ Դպրոցի շէնքը գնվեց 1952թ. վերջին, իսկ արդեն հաջորդ տարի սկսվեցին անհրաժեշտ վերակառուցումները: Լազար Նաճարեան վարժարանի բացումը կատարվեց 1954թ., առաջին տարեշրջանում այն ուներ ընդամենը 83 աշակերտ, բայց արդեն 1958թ. այդ թիվը կազմում էր 454: 1959թ., այն բանից հետո, երբ Գ. Կիլպէնկեան Հիմնարկությունը մեծ գումար հատկացրեց դպրոցի շէնքի ընդարձակման համար, դպրոցը սկսեց կոչվել Լազար Նաճարեան-Գալուստ Կիլպէնկեան վարժարան: Նույն թվականին դպրոցը վերածվեց երկրորդական վարժարանի, իսկ աշակերտների թիվը հասավ 585-ի, ապա նաեւ՝ 1960-ին՝ 669-ի: 1970-ական թթ. կեսերին այստեղ անվճար սովորեցին Լիբանանից քաղաքացիական պատերազմի պատճառով արտագաղթած հայ երեխաները: Հետագա տարիներին նույնպես շարունակվեց աշակերտության թվի աճը, ինչի շնորհիվ այն դարձավ ՀԲԸ Միության ամենախոշոր դպրոցը սփյուռքում: Լ.Նաճարեան - Գ.Կիլպէնկեան վարժարանի տնօրեն Ալեքսան Աթթարյանի տվյալներով, 2001թ. դպրոցում ուսանում էր շուրջ 1.500 աշակերտ, «...մանկապարտեզը 1954էն մինչեւ 2001 ունեցած է 3.620 շրջանաւարտ: Նախակրթարանի շրջանաւարտներու ընդհանուր թիւն է 1954էն մինչեւ 2001ը 3.455 հոգի: Երկրորդականէն շրջանաւարտ՝ 1961էն մինչեւ 2001ը 2.159 հոգի»:⁷⁶

1998թ. Սիրիայի Ծրջանակային Հանձնաժողովը որոշեց Հալեպի Ազիզիե թաղամասում Միությանը պատկանող տարածքի վրա, ուր գտնվում է Լ.Նաճարեան - Գ.Կիլպէնկեան դպրոցի շէնքը, կառուցել նաեւ մանկապարտեզ եւ ՀԲԸ Միության ու ՀԵ Ընկերակցության կենտրոններ: Նոր համալիրի պաշտոնական բացումը տեղի ունեցավ 2003թ. օգոստոսին:

Առաջին անգամ չէ, որ Գ.Կիլպէնկեան Հիմնարկությունը կարելու էր Սիրիայում ՀԲԸ Միության հաստատությունները: Բավական է նշել, որ նախորդ տարիների ընթացքում նրա տրամադրած միջոցներով հնարավոր էր դարձել Միության վարժարանների վերանորոգումն ու կահավորումը, կենտրոնական ջեռուցումն ու համակարգիչների ձեռքբերումը եւ այլն: Նման գործելակերպը, որը ընդհանրապես բնութագրական էր այդ Հիմնարկությանը, եւ ոչ միայն Սիրիայում, առավել ընդգծված ձեւ ստացավ նրա հայկական բաժնի նախագահ Միքայել Եսայանի եւ նույն բաժնի տնօրեն Զավեն Եկավյանի օրոք: Հալեպում Միության նոր կենտրոնի կառուցումը եղավ այդ գործելակերպի յուրահատուկ գազաթանկետը, նկատի առնելով, որ Գ.Կիլպէնկեան Հիմնարկությունը ստանձնեց թե՛ ողջ համալիրի կառուցումը եւ թե՛ նրա կահավորումը եւ անհրաժեշտ սարքավորումներով ապահովումը:

Լ.Նաճարեան - Գ.Կիլպէնկեան վարժարանի հիմնումից մեկ տարի անց՝ 1955-56թթ. Սիրիայի մայրաքաղաք Դամասկոսում դռները բացեց Կիլլասի Կիլպէնկեան վարժարանը: Վարժարանի եռահարկ շենքը գնվել էր Կիլլասի Կիլպէնկեան Հիմնարկության կողմից եւ հանձնվել ՀԲԸ Միության սեփականությանը: Միության տեղական մարմինը շենքը նորոգելուց եւ կահավորելուց հետո, այստեղ փոխադրվեց իր կողմից հովանավորվող նախկին Սահակեան վարժարանի նախակրթարանը՝ իր շուրջ 100 աշակերտներով: 1966թ. վարժարանի մանկապարտեզում եւ նախակրթարանի վեց դասարաններում աշակերտում էր արդեն 211 երեխա: 2000թ. Միության Կենտրոնական Վարչության եւ Յագուայանների ընտանիքի տրամադրած միջոցներով Կիլլասի Կիլպէնկեան նախակրթարանը օժտվեց Աւետիս Եագուպեան անունով ընդարձակ խաղավայր բակով: Անցնող տասնամյակների ընթացքում առանց ընդհատումների գործող Կիլլասի Կիլպէնկեան վարժարանը, այժմ ՀԲԸ Միության երկրորդ վարժարանն է Սիրիայի տարածքում, 2002թ. տվյալներով նա ուներ 150 աշակերտ:

Այս երկու վարժարաններից բացի, ՀԲԸ Միությունը տարբեր տարիներին ունեցել է այլ դպրոցներ եւս: Թեեւ նրանք այլեւայլ պատճառներով դադարել են գործել, այնուամենայնիվ, անուրանալի է նրանց դերը ազգային կրթության եւ դաստիարակության գործում: 1953թ. Միությունը ստանձնեց 1937 թվականից Հալեպի Անուրլուք թաղում գործող Արմենեան վարժարանի խնամակալությունը, երբ այն տարբեր հանգամանքների քերումով հայտնվել էր փակման վտանգի առջեւ: Դեռեւս 1954թ. Արմենեան վարժարանի նոր շենքի կառուցման համար Միության կողմից հատկացված 10 հազ. դոլարը այդպես էլ չիրացվեց, քանի որ քաղաքա-

պետարանը այդ թաղամասի հատակագծի մշակման պատրվակով, անորոշ ժամանակով արգելել էր որեւէ շինարարություն: Ի վերջո, Միությունը 1959թ. ստիպված եղավ փակել այդ վարժարանը, իսկ աշակերտներին (1955թ. նրանց թիվը շուրջ 170 էր) փոխադրել այլ դպրոցներ:

1953թ. Միության սեփականությունը դարձավ նույնպես 1937թ. Հալեպի Օելիս Մաքսուտ արվարձանում գործող նույնանուն՝ Արմենեան դպրոցը: Առաջին տարում այստեղ կար 122 աշակերտ, որոնցից 62-ը՝ նախակրթարանի հինգ դասարաններում, իսկ մնացածը՝ մանկապարտեզում: 1957թ. կառուցվեց վարժարանի նոր, սեփական շենքը, որից հետո էլ այն վերանվանվեց բարերար՝ Սեդրակ Մեսրոպեան վարժարան: Նույն տարում այս նախակրթարանում ուսանում էր 158, իսկ 1966թ.՝ 168 աշակերտ: Հետագա տարիներին հայերի Օելիս Մաքսուտ արվարձանից դեպի քաղաք տեղափոխվելու հետեւանքով հայ աշակերտների թիվը դպրոցում սկսեց նվազել: 1978-1979 տարեշրջանի ավարտին, երբ 164 աշակերտից միայն 64-ն էին հայ երեխաներ, որոշվեց փակել Սեդրակ Մեսրոպեան նախակրթարանը:

1954թ. Միության սեփականությունը դարձավ նաեւ Տերպետիեի (սիրիա-թուրքական սահմանի վրա, Հալեպից մոտ 35 կմ հեռավորությամբ) Կիլիկեան վարժարանը: Սկզբնական շրջանում այս նախակրթարանում նկատվում էր սաների քանակի մշտական աճ՝ 1955-ին՝ 88, իսկ 1963-ին՝ արդեն 143 աշակերտ: Ավելի ուշ, տեղի հայ բնակչության երկրի այլ շրջաններ արտագաղթելու հետեւանքով, աշակերտների թիվը սկսեց կտրուկ նվազել եւ 1966թ. Կիլիկեան վարժարանում ուսանում էին 82 երեխա, որոնց մեծ մասը՝ 47 աշակերտ, տեղացի արաբներ էին: Նման պայմաններում Միությունը աննպատակահարմար նկատեց այս դպրոցի հետագա գոյությունը եւ փակեց այն 1967թ.: «...Տերպետիեի մնացող մեր ազգայիններու 14 զաւակները 1966-1967 տարեշրջանին տեղւոյն կաթողիկէ վարժարանը պիտի դրուին եւ անոնց հայերէնի եւ հայոց պատմութեան դասերուն համար այցելու ուսուցչուհի մը նշանակուած է»:⁷⁷

Սիրիայի հայաշատ կենտրոններից հեռու գտնվող Այն էլ Արաբ գյուղաքաղաքում գործող հայկական վարժարանը ՀԲԸ Միության սեփականությունը դարձավ 1956թ.: Արդեն 1958թ. այն կոչվեց ՀԲԸ Միության Կալիֆորնիայի շրջանի նախկին քարտուղար Գրիգոր Սարաֆյանի հանգուցյալ որդու անունով՝ Աւետիս Սարաֆեան նախակրթական վարժարան: Գ.Սարաֆյանը մեծագումար նվիրատվություն էր արել ի նպաստ այդ դպրոցի, որի մի մասով հիմնովին նորոգվեց վարժարանի շենքը, իսկ մնացած մասից ստացված հասույթները պետք է օգտագործվեին վարժարանի տարբեր կարիքների համար: Աւետիս Սարաֆեան վարժարանի

աշակերտության թիվը հասնում էր շուրջ 140-ի: Տեղաբնակ հայերի կյանքի ոչ բարեկեցիկ պայմանների մասին էր վկայում այն, որ վարժարանում կազմակերպվել էր «երեկոյեան սերտողութեան դրութիւնը, նկատի ունենալով կարգ մը տուներէ ներս դասերու պատրաստութեան անյարմարութիւնները»: ⁷⁸ Ուշագրավ է նաեւ, որ վարժարանի մանկապարտեզի 91 սաներից 32-ը օտարներ էին, հիմնականում պետական պաշտոնյաների երեխաներ: Աւետիս Սարաֆեան վարժարանը փակվեց 1975թ.: հայազգի աշակերտության թվաքանակի խիստ նվազման պատճառով:

Սեփական վարժարաններից զատ, ՀԲԸ Միությունը Սիրիայում տարբեր տարիներին ուներ նաեւ մի շարք «հովանավորեալ» վարժարաններ, որոնք մատակարարվում էին նրա տեղական մարմինների կողմից, որոնց շենքերը հաճախ նրա սեփականությունն էին, իսկ պաշտոնական արտոնատերը տեղի Ազգային իշխանությունն էր կամ առանձին անհատներ: Այս նախակրթական դպրոցներից էին Յագուպիեի Վերածնունդ վարժարանը եւ Գարատուրանի Մեսրոպեան վարժարանը, որը 1961թ. սկսեց կրել բարերար Վահան Պետրոսյանի անունը: Սակայն, այդ վայրերից հայերի անընդհատ արտագաղթի հետեւանքով տարեցտարի զգալիորեն նվազում էր նաեւ նշված երկու դպրոցների աշակերտության թիվը: Այսպէս, 1964թ. Վերածնունդ նախակրթարանում ուսանում էին 47, իսկ Վահան Պետրոսեան նախակրթարանում՝ 18 երեխա: Դա չվրիպեց սիրիական իշխանությունների ուշադրությունից, որոնք նախ պահանջեցին սիւսնավորել այդ երկու դպրոցները, իսկ 1965թ. որոշում կայացրին նրանց փակման մասին: Նույն վիճակում էր նաեւ Վարդանեան վարժարանը Ճարապլուսում (Հալեպից 90 կմ դեպի հյուսիս, Եփրատ գետի եզերքին, թուրքական սահմանի մոտ): Տեղի երբեմնի բարգավաճող հայության Հալեպ եւ այլ վայրեր արտագաղթելու հետեւանքով, այս դպրոցը նույնպէս փակվեց՝ 1960թ.: Մեկ տարի անց, նույն ճակատագիրն ունեցավ 1950-ականների կեսից գործող Քեսապի Ազգային վարժարանը, որ աշակերտության թիվը իջել էր 13-ի:

Սիրիայի հայկական դպրոցների պատմության մէջ կարեւոր տարի էր 1967 թվականը: Մինչ այդ, հայկական դպրոցներում արաբերեն լեզվի ուսուցումը, ընդհանուր առմամբ, մատնված էր անուշադրության: Այսպէս, մանկապարտեզում եւ նախակրթարանում առարկաների ճնշող մասը դասավանդվում էր հայերենով: Թեւեւ պետությունը դեռեւս 1949թ. ընդունել էր օրենք՝ արաբերեն լեզվի պարտադիր կիրառման վերաբերյալ, այն ինչ-ինչ պատճառներով երկար ժամանակ չիրագործվեց: Սակայն 1967թ., արաբա-իսրայելական պատերազմի վարդողայնին, Սիրիայի

կառավարությունը հրամանագիր հղեց բոլոր ոչ պետական դպրոցներին, համաձայն որի դասավանդումը պետք է կատարվեր միայն արաբերենով եւ տնօրենի պաշտոնում թեկնածուները պետք է հաստատվեին իշխանությունների կողմից: Կառավարության այդ քայլը, անշուշտ, բխում էր երկրի պետական շահերից եւ պատահական չէ, որ ՀԲԸ Միության ղեկավարությունը հրաժարվեց որակել այն որպէս ազգայնականության դրսեւորում: ⁷⁹ Ամեն դեպքում, տեղի հայ համայնքների ղեկավարությունից պահանջվում էր արագ կողմնորոշվել եւ գտնել հարցի լուծման ընդունելի մի տարբերակ: Իտքերտ Շեպեճյանը, որը այդ տարիներին ՀԲԸ Միության տեղական Հանձնախմբի ատենապետն էր, վերհիշում էր.

«Այդ օրերուն ոյժի մէջ էր Առաջադիմական Հայ Ծակաւոր: Պետութեան մօտ ալ ուներ վարկ ու կշիռ, ինչպէս նաեւ բարեկամներ: ՀԲԸ Միութեան մէջ, տեղական Յանձնախումբի ատենապետի մեր հանգամանքով, կրնայինք ազդեցութիւն բանեցնել ու համոզել Ծակաւորի ղեկավարները: Արդ, ի մի բերելով Առաջադիմական տարբեր միութիւններու ազգային հոգսերով տարուած ղեկավարները, որոշեցինք Առաջադիմական Ծակաւորի անունով պատուիրակութիւն մը կազմել ու տիրող շփոթ կացութեան մէջ պետութեան ներկայանալ, որպէս իրեն կողմնակից տարր, համաձայն նոր օրէնքի գործադրութեան: ...Կը խնդրուէր պետութենէն, որ հայերէնը թոյլատրուի դասաւանդութեան որոշ առարկաներուն համար: Պետութիւնը, արդէն ըմբոստ միւս համայնքներէն յոյժ դժգոհ, բարեացականօրէն նկատի առնելով Ծակաւորի խնդրանքը, համաձայնեցաւ ընթացք տալ ասոր: Լռելեայն համամտութիւն գոյացաւ, որ հայերէնը դասաւանդուի շաբաթը 4 պահ, իբր օտար լեզու, իսկ կրօնն ալ տրուի հայերէն, 2 պահ: ...Հայկական դպրոցները փրկուեցան, ինչ որ խոշորագոյն յաջողութիւն մըն էր Սուրիահայ գաղութի համար»: ⁸⁰

Ինչ վերաբերում է Հայ կաթոլիկ համայնքին, ապա այն չցանկացավ միանալ նշված համաձայնությանը, եւ նրան պատկանող հայկական վարժարանները՝ ազգային-կրոնական մյուս համայնքների դպրոցների մեան, պետականացվեցին: Այդ դպրոցների աշակերտները ստիպված եղան իրենց ուսումը շարունակել հայկական այլ, այդ թվում նաեւ ՀԲԸ Միության դպրոցներում:

Հայ եկեղեցու պառակտումը

Այն, որ Լիւս Գարակոչյանի գլխավորած պատվիրակության Սիրիա եւ Լիբանան կատարած այցի արդյունքում սկիզբ առած դպրոցաշի-

նության ծրագիրը նախ եւ առաջ սկսեց իրագործվել Սիրիայում, օրինաչափ էր: Այդ երկրում Միությունը չունէր մինչ այդ եւ ոչ մի մնայուն հայկական վարժարան, եւ այդ պակասը չէին կարող լրացնել նրա մյուս հաստատությունները, որքան էլ արդյունավետ լինէր նրանց գործունեությունը: Մինչդեռ, Լիբանանում, ինչպես ասվեց, մեծ հաջողությամբ տարիներ շարունակ գործում էին Միության երկու վարժարանները: Այնուամենայնիվ, այստեղ նույնպես ակնհայտ էր նոր վարժարանների անհրաժեշտությունը, եւ սկսած 1950-ական թթ. կեսերից ՀԲԸ Միությունը ձեռնամուխ եղավ դպրոցաշինության ծրագրի իրագործմանը նաեւ այդ երկրում: Մինչ այդ, սակայն, նույն Բեյրութում տեղի ունեցան դեպքեր, որոնք բախտորոշ եղան ողջ սփյուռքի համար եւ կանխորոշեցին նրա հետագա գոյակերպը ընդհանրապես: Խոսքը Հայ Առաքելական եկեղեցու պառակտման մասին է:

Այն բանից հետո, երբ Հայաստանում 1920թ. վերջին իշխանության եկան կոմունիստները եւ այն մաս կազմեց Խորհրդային Միության, սփյուռքահայությունը՝ ի դեմս նրա բոլոր քաղաքական եւ ոչ քաղաքական կազմակերպությունների, անհրաժեշտաբար կանգնեց Խորհրդային Հայաստանի հետ հարաբերվելու գլխավոր չափանիշի ընտրության առջեւ: Չափորոշիչ համարել Հայաստանի իշխանությունների գաղափարախոսությունը, թե՞ հենց Հայաստանի՝ թեկուզ եւ Խորհրդային Միության կազմում, գոյության փաստը: Սփյուռքի մի մասը՝ «կոշտ» ընդդիմությունը, Դաշնակցության գլխավորությամբ, առաջնային համարեց գաղափարական չափանիշը եւ համապատասխան դրան խորհրդային սոցիալիզմի եւ արեւմտյան կապիտալիզմի հակամարտության մեջ անցավ վերջինի կողմը: Սփյուռքի մյուս մասը՝ Ռամկավար-Ազատական եւ Հնչակյան կուսակցությունների գլխավորությամբ, հալ ժողովրդի ազգային շահերի տեսակետից խորհրդային իշխանությունը համարելով չարյաց փոքրագույնը, բավարարվեց «մեղմ» ընդդիմության դերով՝ ձգտելով բարիդրացիական հարաբերություններ հաստատել Հայաստանի հետ: ՀԲԸ Միությունը սկզբից եւեթ որդեգրեց նման դիրքորոշում եւ, ինչպես տեսանք, շուրջ 14 տարի իր հնարավորությունների սահմաններում օժանդակեց հայաստանաբնակ հայ ժողովրդի առաջընթաց զարգացմանը:

Դաշնակցությունը, ձգտելով գերիշխող դիրք գրավել ողջ սփյուռքում, փորձեց իր հսկողության տակ վերցնել ամենահեղինակավոր ազգային հաստատության՝ Հայ Առաքելական եկեղեցու արտասահմանյան կամ սփյուռքյան թեմերը, անջատել դրանք Ա.Էջմիածնից: Այդ խնդրի լուծմանը Դաշնակցությունը ձեռնամուխ եղավ դեռեւս 1920-1930-ական թթ., հմտորեն օգտագործելով Հայաստանի իշխանությունների մարտնչող

աթեիզմի քաղաքականությունը (եկեղեցիների փակում եւ քանդում, հոգեւորականների հետապնդում եւ այլն), իսկ սկիզբը դրվեց 1933թ., երբ Նյու Յորքում նույն այդ կուսակցության անդամների կողմից եկեղեցում սպանվեց տեղի թեմի առաջնորդ Ղեւոնդ արք. Դուրյանը: Դրան հետեւեց (առայժմ՝ միայն ԱՄՆ-ում) Ա. Էջմիածնի հոգեւոր եւ վարչական իրավասությունը չճանաչող եկեղեցիների աստիճանական աճ: Դաշնակցության այդ քայլը, ինչպես եւ սպասելի էր, հանդիպեց ամերիկահայերի մեծամասնության ուժեղ դիմադրությանը եւ դատապարտվեց: Հոգեբանորեն դրան պատրաստ չէր նույն Դաշնակցության կողմնակիցների զգալի մասը, քանզի դրանով իսկ նրանք, կամա թե ակամա, օտարվում էին ազգային ամենակարեւոր արժեքներից մեկից՝ Ա. Էջմիածնից, եւ կտրում էին իրենց վերջին, թեկուզ եւ խորհրդանշական կապը Հայաստանի հետ:

Երկրորդ Աշխարհամարտից հետո սկիզբ առած սառը պատերազմը երկու գերտերությունների՝ Խորհրդային Միության եւ ԱՄՆ-ի միջեւ պարտադրեց սփյուռքահայությանը վերստին հաստատել իրենց քաղաքական կողմնորոշումները Հայաստանի հանդեպ: Եվ եթե «մեղմ» ընդդիմությունը ընդհանուր առմամբ հավատարիմ մնաց իր մինչ այդ որդեգրած քաղաքականությանը, ապա «կոշտ» ընդդիմությունը որոշեց մասնակցել սառը պատերազմին ԱՄՆ-ի կողմից (այդ են վկայում նրա 1951թ. 15-րդ եւ 1955թ. 16-րդ համագումարների որոշումները⁸¹), եւ առավելագույնս օգտվել ստեղծված իրավիճակից, նախ եւ առաջ, եկեղեցու հարցում: 1952թ. Մեծի Տանն Կիլիկիո կաթողիկոս Գարեգին Ա-ի մահանալուց հետո, Դաշնակցությունը նպատակադրվեց ապահովել իր կողմից հովանավորվող թեկնածուի հաղթանակը, եւ, դրանով իսկ, հակադրել այդ կաթողիկոսությունը Ա.Էջմիածնին, որպես սփյուռքում Հայ Առաքելական եկեղեցու հոգեւոր եւ վարչական կենտրոնի:⁸² Նրա ընդդիմադիրների (Հայաստանում եւ սփյուռքում) անկազմակերպ գործողությունների, բայց կարեւորը՝ Լիբանանի իշխանությունների անթաքույց ուժային աջակցության շնորհիվ Դաշնակցությունը 1956թ. հասավ իր նպատակին. Կիլիկիո կաթողիկոսության նոր ղեկավարությունը սկզբից եւեթ որդեգրեց Ա.Էջմիածնից լրիվ անջատվելու քաղաքականություն: Հայ եկեղեցու նման՝ քաղաքական պատճառներով պառակտումը, կարելու փուլ էր սփյուռքի պատմության մեջ, քանզի դրանով իսկ ավարտվեց երկու կուսակցական-եկեղեցական ներսփյուռքյան համակարգերի ձեւավորումը: Այդ համակարգերից առաջինի հիմնական տարրերն են՝ Դաշնակցությունը եւ Կիլիկիո կաթողիկոսության թեմերը, իսկ երկրորդինը՝ ՌԱԿ եւ Հնչակյան կուսակցությունները եւ Ա.Էջմիածնի թեմերը: Յուրաքանչյուր համակարգի մյուս տարրերն են համապատասխան մշակութային, երիտասարդական-

մարզական, բարեգործական եւ այլ միությունները, դպրոցները, կրթական հաստատությունները, մամուլը, զանգվածային լրատվության այլ միջոցները եւ այլն:

ՀԲԸ Միությունը տազնապով էր հետևում Բելյուրթում ընթացող դեպքերին եւ իր հնարավորությունների սահմաններում փորձում էր կանխել եկեղեցու պատակտումը՝ նկատելով այն որպես «ազգավնաս արկածախնդրություն»: 1959թ. դեկտեմբերին կայացած ՀԲԸ Միության 45-րդ Ընդհանուր ժողովում նախագահ Ալեք Մանուկյանը ամենայն հստակությամբ արտահայտեց Միության սկզբունքային դիրքորոշումը կատարվածի հանդեպ.

«Մեր եկեղեցու պատակտումին ամբողջ ողբերգությունը ինձի համար ցաւագինօրէն բացատրելի դարձաւ, երբ տարի մը առաջ իր խնդրանքով տեսակցութիւն մը ունեցայ Կիլիկիոյ Աթոռին նուիրակ Եպիսկոպոսին հետ: Իր արտայայտութիւնը, հանդէպ ուխտապահ միաբանութեան, հայ եկեղեցու միասնականութեան նախանձախնդիր ժողովուրդին, ուժգնօրէն ցնցեց ու խոռվեց զիս: Իմ դէմն ունէի ո՛չ թէ սիրոյ, բարութեան եւ խաղաղութեան պաշտօնեան, այլ անկարեկիր, կարծրասիրտ իշխանաւոր մը՝ որ սոսկում պատճառող լեզուով մը ցարդ գործադրուած բռնական միջոցներու մասին իր չարախիճն գոհունակութիւնը կը յայտնէր եւ ա՛լ աւելի ծանր սպառնալիքներու հետանկարը կը շողացնէր՝ ծրագրուած տիրակալութիւնը ամբողջական ընելու համար: Այդ օրէն, ինձի համար այլեւս բացայայտ էր թէ ի՛նչ մթնոլորտ, ձգտում եւ ոգի կը տիրէր Կիլիկեան Աթոռէններս»: Այնուհետեւ, անդրադառնալով Միության հասցեին հնչած մեղադրանքներին, Ա. Մանուկյանը ասաց. «Այդ Աթոռին պաշտօնաթերթը, «Հասկ», որ եկեղեցական պատակտումին պատմութիւնը կը շարահիւսէ իրողութեանց ըստ կամս մեկնաբանութեամբ, *անմարդկային* (ընդգծումները՝ ըստ բնագրի-Էդ.Մ.) կ'որակէ Բարեգործականի ընթացքը, Կաթողիկոսարանին ոեւէ գումար չտրամադրելուն համար: Իսկապէս *անմարդկային* եւ *հակազգային* շարժումի մը մեղսակիցը պիտի ըլլայինք, ընդհակառակը, այդ Աթոռին հետ գործակցելով: Երբ անձամբ տեսայ մեր խեղճ ազգն ու եկեղեցին բաժան բաժան ընող պայքարին պարագլուխը եւ անսահման տրտմութեամբ լսեցի իր անողորմ խօսքերը, այլեւս ո՛չ մէկ տարակուսանք ունէի թէ որո՞նց հետ էր մեր գործը եւ ի՛նչ պէտք էր ըլլար Բարեգործականին դիրքը»:⁸³

Վարժարաններ Լիբանանում

Դեռեւս մինչ Ալ. Մանուկյանի հիշատակած հանդիպումը, Միությունը առիթ էր ունեցել տեսնել Կիլիկիո կաթողիկոսության նոր քաղաքականության հետեւանքները, երբ վերջինիս որոշմամբ փակվեց կաթողիկոսարանի տարածքում գործող նախակրթարանը, «որովհետեւ չէր ուզուէր որ դուրսէն աշակերտ կամ ծնողք ազատ մուտք ունենային վանքէն ներս: Փոքրիկները ամիսներով ուսումէ զուրկ մնացին եւ Լիբանանի Օրջ. Յանձնաժողովին ջանքերուն շնորհիւ էր որ գիւղին մէջ կանոնաւոր նախակրթարան մը բացուեցաւ, ուր կը լսանային 120 մանուկներ, կը պաշտօնավարեն 8 ուսուցիչներ եւ որուն համար տարեկան 6.000 տղայի բացառիկ ծախք մը ստանձնած ենք, պարզապէս անմեղ մանուկներ քմահաճ կարգադրութեան մը զոհ չդարձնելու համար»:⁸⁴ Սակայն 1964թ., այս դպրոցի աշակերտների քանակը կտրուկ նվազեց եւ կազմեց մոտ 80-85 մարդ: Դրա հիմնական պատճառը Միության անդամների եւ համակիրների մեծ մասի տեղափոխվելն էր այլ շրջան,⁸⁵ ինչն էլ, ի վերջո, հասցրեց վարժարանի փակմանը՝ 1974թ.:

Այս վարժարանին փոխարինելու եկավ նույնպէս Անթիլիասում նույն տարվա հոկտեմբերին բացված Պօղոս Գ.Կարմիրեան նախակրթարանը, ուր առաջին իսկ տարում արձանագրվեց 225 աշակերտ: Այս նոր դպրոցը հաջողությամբ գործեց հետագա տարիներին եւ 1978-1979թթ. ուներ 411 սան: Չնայած քաղաքացիական պատերազմի ծանր հետեւանքներին, Պօղոս Կարմիրեան դպրոցը պահպանեց իր գոյությունը եւ 2002թ. ուներ 274 աշակերտ:

1957թ. հոկտեմբերին Բելյուրթում բացվեց ՀԲԸ Միության եւս մեկ դպրոց՝ Երուանդ Տեմիրճեան վարժարանը եւ Տիկնանց տիպար մանկապարտեզը: Այս վարժարանը կառուցվեց Միության Լիբանանի Օրջանակային Հանձնաժողովի ատենապետ Երվանդ Տեմիրճեանի բարերարությամբ, իսկ մանկապարտեզը՝ Միության Նյու Յորքի Տիկնանց կենտրոնական եւ Դետրոյթի Տիկնանց հանձնախմբերի կողմից հատուկ այդ նպատակով հավաքված գումարներով: Եթէ 1957թ. աշակերտների թիվը չէր գերազանցում 200-ը, ապա 1961թ. հասավ 338-ի: Նույն թվականին ավարտվեց վարժարանի նոր, չորսհարկանի շենքի շինարարությունը, որը կահավորվեց Գ.Կիլիպէնկեան Հիմնարկության տրամադրած միջոցներով: Ծենքային նոր պայմանները հնարավոր դարձրին սաների թվաքանակի բարձրացումը հետագա տարիներին՝ 1963-ին նրանց թիվը հասավ 481-ի, եւ չորս տարի անց վարժարանում ուսանում էր 511 աշակերտ: Տեմիրճեան վարժարանի այդչափ արդյունավետ գործունեությունը չունե-

ցավ իր շարունակությունը: 1970-ական թթ. երկրում ծագած քաղաքացիական պատերազմի պատճառով մեծ թվով իբրևանահայեր հեռացան երկրից եւ կամ տեղափոխվեցին Բելյուրի այլ, առավել ապահով շրջաններ: Այս ամենի պատճառով վարժարանի աշակերտության թվաքանակը խիստ նվազեց: ՀԲԸ Միության Կենտրոնական Վարչական Ժողովի անդամ Պերճ Սեդրակյանի (2000թ. փետրվարից)՝ ՀԲԸ Միության նախագահ) խոսքերով՝ «Երբ հաստատություն մը տարիներ շարունակ 20-35 աշակերտով գոյատևել է երբ դասարան ըլլայ որ աշակերտ չունենայ, ո՞ր մանկավարժը կամ կրթական մշակը կրնայ պնդել թէ տուեալ հաստատությունը կրնայ կրթական մակարդակ ապահովել: Ահա այս եւ ցիւրքական պատճառներով մասնաճիւղը Կենտրոնական Վարչութեան հասանութեամբ ատենին դպրոցը փակելու որոշումը առած են»:⁸⁶

1961թ. Բելյուրի Սին էլ Ֆին արվարձանում սկսեց գործել ՀԵԸ պատկանող մարզադաշտի մի մասում կառուցված Լեոն Կ.Նազարեան վարժարանը: Այն ի հիշատակ ՀԲԸ Միության վետերան, հանգուցյալ Լ.Նազարյանի՝ կառուցեցին նրա այրին եւ զավակները: Մի քանի տարի անց, Սաթենիկ Նազարյանի նվիրատվության շնորհիվ կառուցվեց եւս մեկ հարկ, եւ վարժարանի սաների քանակը հասավ 590-ի: 1967թ. վարժարանում կային 650 աշակերտ, որոնցից 255-ը՝ մանկապարտեզում, իսկ 395-ը՝ նախակրթարանի վեց դասարաններում: 2002թ. Լեոն Կ.Նազարեան վարժարանի սաների թիվը 260 էր:

1964թ. Բելյուրի Յովակիմեան - Մանուկեան վարժարանի հատուկ հարկաբաժնում, ՀԲԸ Միության փոխնախագահ Երվանդ Հյուսիսյանի մեկենասությամբ բացվեց Երուանդ Հիւսիսեան Հայագիտական Ուսման Հիմնարկը: Իր տեսակի մեջ եզակի այս հաստատությունը նախատեսված էր տեղի համալսարանների հայ ուսանողների, Միության եւ այլ դպրոցների ուսուցիչների, ինչպես նաեւ ընդհանրապես երիտասարդ մտավորականների համար, որտեղ կարդացվում էին դասախոսություններ հայ ժողովրդի պատմության եւ մշակույթին վերաբերող տարբեր թեմաներով: Հիմնարկի առաջին տեսուչն էր անվանի գրող Վահե Վահյանը: Կենտրոնում տարբեր տարիներին նրանից բացի դասավանդել են՝ Հայաստանից հրավիրված պատմաբան Մորուս Հասարայանը, հայտնի հասարակական գործիչ, պատմաբան Գերասս Ահարոնյանը, երաժշտագետ Աշոտ Պատմագրյանը եւ այլք: 1993թ. հիմնարկը հրատարակեց «Հիւսիսեան հայագիտական հանդէս»-ի Ա. հատորը, որին աշխատակցեցին հայագի մասնագետներ ինչպես Լիբանանից, այնպես էլ Հայաստանից, Սիրիայից եւ ԱՄՆ-ից: Այն եղավ Լիբանանում հրատարակվող երրորդ մասնագիտա-

կան հանդէսը՝ «Հասկ հայագիտական տարեգիրք» եւ «Հայկազեան հայագիտական հանդէս»-ից հետո:

1980թ., թեպետ Լիբանանում շարունակում էր տիրել անկայուն, պայթյունավտանգ վիճակը, Միությունն իրագործեց իր վաղեմի ծրագիրը եւ Բելյուրում բացեց Առեւտրական վարժարանը: Վարժարանը տեղակայվեց Լեոն Նազարեան դպրոցի շենքում: Առաջին տարում այն ուներ 31 աշակերտ: Այս երկու հաստատությունների կանոնավոր գործունեությունը նույնպես անկարելի դարձավ երկարամյա քաղաքացիական պատերազմի պատճառով, որի հետեւանքները ընդհանրապես աղետալի եղան Լիբանանի հայության համար:

ՀԲԸ Միության վերոնշյալ վարժարանների պատմությունը անբաժանելիորեն կապված է վաստակավոր մանկավարժ, իբրևանահայ համայնքի ամենահեղինակավոր դեմքերից մեկի՝ Արա Թոփճյանի անվան հետ: Փարիզում կրթություն ստանալուց հետո, նա 1940-ից աշխատում է Մելգոնեան կրթական հաստատությունում՝ որպես ֆրանսերենի եւ անգլերենի ուսուցիչ, ապա՝ վեց տարի անց հաստատվում Բելյուրում: 1946թ. նա ստանձնեց Յովակիմեան-Մանուկեան վարժարանի տնօրենի պաշտոնը: «Հիմը դրած են, - ասում է նա իր մի հարցազրույցում, - ՀԲԸՄ-ի գաւազան վարժարաններու, եւ տնօրէն եղած են ՀԲԸՄ-ի Ե.Տեմիրճեան, Լ.Կ.Նազարեան, Դարուհի Յակոբեան վարժարաններու: Նաեւ հիմնած են ՀԲԸՄ-ի առեւտրական վարժարանը եւ համոզած Պրն. Երուանդ Հիւսիսեանը որ հայագիտական հիմնարկ հաստատէ Պրն. Սարգիս Ապտալեանի (Վահէ Վահեան) միջոցաւ»:⁸⁷ Նման կազմակերպական աշխատանքի հետ մեկտեղ, Արա Թոփճեանը մեծապես նպաստել է Միության վարժարանների կրթական մակարդակի բարձրացմանը՝ հմտորեն կիրառելով հայկական, ֆրանսիական եւ արաբական մանկավարժության ավանդույթները: «Ինքն էր որ 1960ական թուականներուն հայ վարժարանները հասցուցած էր կրթական կարեւոր անկիւնադարձի մը, կազմելով երկրորդական ուսման շատ մը ծրագիրներ ... Այսպէս՝ հայկական վարժարաններու մէջ ՀԲԸՄ-ի դպրոցները առաջին անգամ ըլլալով կարողացան մեծ յաջողութիւններ արձանագրել արաբական սերթիֆիքայի եւ պաքալորէայի պետական քննութիւններուն մէջ: Զուգահեռաբար, Պրն. Թօփճեան կազմած է նաեւ կրթական ծրագիր մը, յատուկ՝ ՀԲԸՄ-ի նախակրթարաններու եւ մանկապարտեզներու համար»:⁸⁸

Քաղաքացիական պատերազմի հետեւանքները

1972թ. Բեյրութում դոները բացեց Միության նախագահի մեծագույնը նվիրատվությամբ կառուցված ՀԵ Ընկերակցության Ալեք Մանուկեան Մշակութային Կեդրոնը: Կենտրոնի կառուցման հետ կապված տարբեր հարցերի արագ լուծմանը մեծապես նպաստեցին դեռևս 1957թ. հիմնված ՀԵ Ընկերակցության Ասպետներու Խմբի անդամների փորձառությունն ու կարողությունները: ՀԵԸ-ի Մշակութային Կեդրոնը իր մեծ թվով սենյակներով, սրահներով և այլ հարմարություններով որակապես նոր հնարավորություններ էր ստեղծում թե՛ Միության մասնաճյուղի և թե՛ ՀԵԸ-ի աշխատանքները առավել արդյունավետ դարձնելու համար: Սակայն մինչ ՀԵԸ կազմում էր նոր ծրագրեր, մինչ պատրաստվում էր Բեյրութում կայանալիք ՀԲԸ Միության Երիտասարդական առաջին համագումարին և Նավասարդյան 9-րդ մարզական-մշակութային փառատոնին, իրավիճակը երկրում կտրուկ փոխվեց:

1975թ. սկսված քաղաքացիական պատերազմի հետեւանքով Լիբանանը հայտնվեց խոր և երկարամյա ռազմաքաղաքական և տնտեսական ճգնաժամի մեջ: Դա անդառնալի և բացասական հետեւանքներ ունեցավ նաև տեղի հայության կենսագործունեության անխտիր բոլոր ոլորտների վրա: Լիբանանում գործող հայ քաղաքական կազմակերպությունները (Դաշակցություն, Հնչակյան, Ռամկավար Ազատական կուսակցությունները և Լիբանանի կոմունիստական կուսակցության մասնաճյուղը) հայերի անվտանգությունը ապահովելու նպատակով, սկզբից եւեթ որոշում կայացրին քաղաքացիական պատերազմին չմասնակցելու, հակամարտող քաղաքական ուժերից որեւէ մեկի հետ չհամագործակցելու վերաբերյալ և որդեգրեցին, այսպես կոչված, դրական չեզոքության քաղաքականությունը: Հայ համայնքի նման դիրքորոշումը կանխեց հայության պառակտումը, պայմանավորեց նրա համախմբված գործելը, և մի հայտնի չափով նվազագույնի հասցրեց անխուսափելի կորուստները:⁸⁹ Կորուստները, սակայն, մեծ էին՝ հարյուրավոր գոհվածներ, շատ ավելի վիրավորներ, քանդված և կողոպտված տներ, եկեղեցիներ ու դպրոցներ, գործարաններ ու խանութներ, համայնքային և անձնական այլ շինություններ ու հաստատություններ:

Այդ տարիներին ազգային բոլոր կազմակերպություններն ու հաստատությունները ստիպված եղան վերակազմավորել իրենց գործունեությունը, որի նպատակն էր դառնում հայության ֆիզիկական գոյության ապահովումը: ՀԲԸ Միության հերթական տարեգրքում այսպես էր ներկայացվում ՀԵ Ընկերակցության գործունեությունը այդ տարիներին.

«...ստեղծուած նոր պայմաններում բերմամբ ժողովրդային զանգուածները պէտք ունէին բարոյական քաջալերանքի և կազմակերպեալ հոգածութեան: Այս բախտորոշ կացութեան դիմաց՝ ՀԵԸ-ի ղեկավարութիւնը յաջողեցաւ վերակազմակերպուիլ ծառայութեան նոր ուղեգիծով մը - իր մարզական և մշակութային կեդրոններն ու ակումբները վերածեց եղբայրական օգնութեան կայաններու, պաշտպանութեան դիրքերու և ներքին դպրոցներու: ՀԲԸ Միութեան պարենաւորումի և արձանագրութիւններու նախապատրաստական աշխատանքներն ու անոնց յաջորդող նպաստաբաշխումը այդ յարկերուն տակ կատարուեցան: Բազմաթիւ հայ ընտանիքներու համար ՀԵԸ-ի ակումբները բարոյական քաջալերանք ներշնչող կեդրոններ եղան, ուր անոնք դիմեցին երկրին վարչական կազմալուծման հետեւանքով ստեղծուած դժուարութեանց լուծում և օրինազանցութեանց դէմ պաշտպանութիւն գտնելու համար: ՀԵԸ-ի Անդրանիկ-Սեւան և Անթիլիասի ակումբներն ու Մանուկեան Մշակութային Կեդրոնը տագնապի ամբողջ տեւողութեան նախախնամական դեր կատարեցին: Վերջինը, մանաւանդ, շնորհիւ Պէյրութի արեւմտեան շրջանի իսլամ կազմակերպութեանց պատասխանատուներուն հետ մշակուած բարեկամական յարաբերութեանց, համակարգիչ կեդրոն մը դարձաւ: Երիտասարդացի հեռատես և նուիրեալ ղեկավարները յաջողեցան հարիւրաւոր հայերու երթելնէն ապահովել շրջաններուն միջեւ, արգիլել հայ տուներու և հաստատութիւններու բռնագրաւումը, ինչպէս նաև ստոյգ մահէ փրկել առեւանգումի և կողոպուտի ենթարկուած տասնեակ մը հայ երիտասարդներ»:⁹⁰

ՀԵԸ-ի անդամները սեփական ուժերով կազմակերպեցին նաև բժշկական շտապ օգնության ծառայություն, վառելանյութի և հացի տագնապի շրջանում այդ ամենով ապահովում էին ժողովրդին՝ կապ հաստատելով տեղական նպաստաբաշխ կազմակերպությունների հետ: Այս և ուրիշ շատ գործերից զատ, ՀԵ Ընկերակցության անդամների համար պատվի հարց էր իրենց նորակառույց Կենտրոնի անվտանգությունը. նրանք «...գիշեր-ցերեկ պաշտպանեցին Մանուկեան կեդրոնը, որ կրնար զինուորական թե՛ ժողովրդային անսանձ տրամադրութեանց թիրախ ըլլալ և աւերակի վերածուիլ, եթէ իմաստուն վարիչները չշահէին կոտող կողմերու պատասխանատուներուն բարեկամութիւնը և զայն ճանչցուցած չըլլային իբրև յոյսի, օգնութեան և բարոյական քաջալերանքի յարգուած կեդրոն մը»:⁹¹

Լիբանանում ընթացող դեպքերը մեծ տագնապ առաջացրին թե՛ սփյուռում և թե՛ Հայաստանում: Արդեն երկար տարիներ, և հատկապես Երկրորդ Աշխարհամարտից հետո, Լիբանանի հայ համայնքը իրավամբ դիտվում էր որպես արտասահմանի հայության մշակութային և քաղա-

քական կենտրոն: Լիբանանում է, որ հայերը հնարավորություն էին ստացել անկաշկանդ ծավալել լիարժեք ազգային գործունեություն, ինչի վկայությունն էին բազմաթիվ հայկական վարժարանները, պարբերականները, ակումբները եւ այլ հաստատությունները: Այստեղ էին տեղակայված համասփյուռքյան կազմակերպությունների՝ կուսակցությունների եւ նրանց հովանու տակ գործող կրթամշակութային միությունների կենտրոնները: Դրա հետ մեկտեղ, տարեցտարի՝ երկրի զարգացմանը զուգընթաց, բարելավվում էր լիբանանահայերի տնտեսական վիճակը, ինչը հնարավոր էր դարձնում առավել հաջողությամբ լուծել ազգային ինքնության պահպանման եւ զարգացման հետ կապված տարաբնույթ խնդիրները: Եվ բնավ պատահական չէր, որ Ալեք Մանուկյանը, խոսելով Լիբանանի եւ Սիրիայի հայ համայնքների մասին, բնութագրում էր դրանք, որպես «արտասահմանյան Հայաստաններ»: Այս ամենի գիտակցությամբ սփյուռքը՝ անհատներն ու կազմակերպությունները շտապեցին օգնության հասնել Լիբանանի իրենց հայրենակիցներին: Այդ օգնությունը, ամեն բանից զատ, հետապնդում էր մեկ հիմնական նպատակ՝ պահպանել այդ համայնքը, կանխել նրա հնարավոր կազմալուծումը, հատկապես, հայության արտագաղթը Լիբանանից:

1976թ. հունվարի 5-ին հրապարակվեց ՀԲԸ Միության եւ Հայաստանյայց Առաքելական եկեղեցու Հյուսիսային Ամերիկայի Արեւելյան եւ Արեւմտյան թեմերի միացյալ կոչը, որը հրավիրում էր ամերիկահայությանը մասնակցել Լիբանանահայության Օգնության Հանգանակությանը: Միության Ամերիկայի Կենտրոնական Հանձնաժողովի ատենապետ Էդուարդ Մարտիկյանի գլխավորած երկու հանգանակությունների ընթացքում գոյացավ ավելի քան 1.000.000 դոլար, որը հանձնվեց Նպաստաբաշխ Հանձնախմբին՝ Լիբանանի հարյուրավոր հայ ընտանիքների կարիքները հոգալու համար:

1976թ. հոկտեմբերին Նյու Յորքում կայացած ՀԲԸ Միության 63-րդ Ընդհանուր ժողովում, նախագահ Ալեք Մանուկյանը, տեղեկացնելով այդ գումարի առաջին մասնաբաժինը Լիբանան ուղարկելու մասին, հատուկ շեշտում էր. «Համայն հայութեան համար ամենէն էական հարցը, սակայն, Լիբանանի կեդրոնական կարեւորութիւնն անրկայացնող հայ գաղութին կազմալուծման ամեն գնով արգելք հանդիսանալն է»: Այնուհետեւ, ընդգծելով, որ արտագաղթից հետո էլ դեռ 150.000 հայ շարունակում է մնալ Լիբանանում, Ալ. Մանուկեանը անում էր ուշագրավ մի նախազգուշացում. «Այս պայմաններում տակ հայկական բոլոր կազմակերպութեանց եւ բանհմաց ազգայիններու պարտականութիւնն է նախ խուսափիլ տարածել է շռուկներ եւ գրոյցներ կամ փորձել է քայլեր, որոնք հետա-

ւոր չափով նույնիսկ կրճան անտեսաց երկիրներու խոստումը պարզել անտեղեակներու: Կեանքի ասպահովութիւնը միայն մարմնի փրկութիւն չէ: Տարբեր է երբ անհատներ եւ ընտանիքներ կամովին, գիտակցաբար եւ քաջաբար կը հաստատուին նոր կայքեր, նոր կեանքի մը ի խնդիր, եւ հիմնովի՛ն տարբեր երբ զանգուածներ գաղթականի ցուպը ձեռք կ'առնեն մղուած հեռուներէն թեկուզ մարդասիրաբար օրորուած յոյսի աղօտ ճրագներէ»:92

Սակայն իրավիճակը Լիբանանում շարունակում էր մնալ լարված: Ավելին, 1978թ. հոկտեմբերին Բեյրութի հայահոծ թաղամասերը (Բուրջ Համուդ, Խալիլ Բադափի, Նոր Հաջըն, Էշրեֆիյե եւ այլն) թիրախ դարձան ուժեղ ունբակոծությունների եւ քրիստոնյա փաղանգավորների ու շամունականների մարտական ջոկատների հարձակման: Այդ ծանր օրերին ՀԲԸ Միության Լիբանանի Ծրջանակային Ժողովը շարունակեց անմիջական օժանդակություն հասցնել տեղի հայությանը՝ դրամական եւ նյութական նպաստների ձեւով: Այն իր գործոն մասնակցությունը բերեց նույն այդ նպատակով 15 կազմակերպություններից կազմված Միջ-Բարեսիրական Միության, ինչպես նաեւ Տնտեսական Բարեխալովմի Հայկական Հիմնադրամի (AFED) աշխատանքներին: Բեյրութի Ալեք Մանուկեան Կեդրոնը եւ դարմանատունը, Անթիլիասի եւ Թրիփոլիի ակումբները, Զահլեի Ալեք Մանուկեան Մշակութային Տունը հարյուրավոր հայ ընտանիքների համար դարձան ասպաստարան: Ստեղծված իրավիճակում ՀԲԸ Միությունը նորանոր դրամական նպաստներ էր հատկացնում առանց որեւէ խորության թե՛ անհատ մարդկանց եւ թե՛ ազգային հաստատություններին՝ Ազգային առաջնորդարանին, Հայ Կաթոլիկ եկեղեցու պատրիարքարանին, Ավետարանական միությանը, ինչպես նաեւ Թեքեան վարժարանին, Նշան Փալանճեան ճեմարանին եւ Սահակեան-Մկրտիչեան քոլեջին, մշակութային եւ բարեսիրական միություններին եւ այլն:

Բայց նույն այդ տարիներին՝ 1983-1984թթ., ՀԵ Ընկերակցության անդամները անգոր եղան պաշտպանելու իրենց Կեդրոնը, երբ այն դարձավ ունբակոծությունների թիրախ: Նրանք, սակայն, շենքը գերծ պահեցին գրավումից եւ հետամուտ եղան նրա հնարավորին չափ արագ վերանորոգմանը: ՀԵԸ-ի ղեկավարությունը, այնուամենայնիվ, ստիպված էր հաշվի առնել նրա հետագա օգտագործման հետ կապված դժվարությունները. «Իբր հետեւանք Արեւմտեան Պեյրութէն դէպի Արեւելեան բաժին բնակչութեան տեղաշարժին, Արեւմտեան շրջանին մէջ գտնուող Ալեք Մանուկեան Մշակութային Կեդրոնը անրկայիս սովորականէն նուազ չափով կ'օգտագործուի: Մասնաւոր յանձնախումբ մը կազմուած է

Արեւելեան Պեյրոսի մէջ գտնելու յարմար վայր մը՝ ապագայ նոր Կեդրոնի մը համար»:⁹³

Պատերազմի այդ ծանր օրերին մեծ վնասներ կրեցին նաեւ Միության Ալեյի մասնաճյուղի շենքը, Նահր շրջանի Անդրանիկ-Սեւան ակումբը եւ այլն: Չնայած այդ ամենին, ՀԵԸ-ն շարունակում էր գործել՝ օգտագործելով բոլոր հնարավոր միջոցները: Այսպէս, 1983թ. ամռանը ՀԵԸ-ի Անթիլիասի մասնաճյուղը կազմակերպեց 55 հոգիանոց սկաւտական խմբի բանակում-ստույտը Հունաստանում եւ Կիպրոսում, ուր նրանք վայելեցին տեղի հայության հատուկ ուշադրությունը: Երկու տարի անց նրա մարզիկները մասնակցեցին Ժնևում կայացած ՀԲԸ Միության 10-րդ Օղիմպիական Խաղերին: Նույն 1985թ. Ալեք Մանուկեան Մշակութային հիմնադրամի օժանդակությամբ եւ Թէքէեան Մշակութային միության հետ գործակցաբար կազմավորվեց յոթամասուն հոգանոց երգի եւ պարի համույթ: Պատերազմի ողջ ընթացքում ՀԵԸ-ի որդեգրած գործելակերպը արդարացնում էր ՀԲԸ Միության Ընդհանուր ժողովի գնահատականը, համաձայն որի Ընկերակցությունը «...միայն խաղաղութեան շրջանի համար հիմնուած կազմակերպութիւն մը չէ, այլ՝ վտանգատուր օրերուն իսկ պատրաստակամութիւն ու զոհաբերութեան ոգի ունեցող կազմակերպութիւն մը, որը չի զլանար իր նիւթաբարոյական աջակցութիւնը համայնքին»:⁹⁴

Լիբանանի քաղաքացիական պատերազմը, որ սկսվել էր 1975թ. ապրիլին, ավարտվեց 1991թ.: Նրա հետեւանքները աղետալի եղան երկրի եւ Լիբանանի ժողովրդի համար: 1991թ. հոկտեմբերին ՀԵԸ-ի Զապէլ Մովսիսեան Կեդրոնի սրահում կարդացած իր դասախոսության մէջ ՀԲԸ Միության Լիբանանի Օրջանակային Հաձնաժողովի ատենապետ, տնտեսագետ Հակոբ Ալթունյանը, անդրադառնալով այդ հարցին, բերում էր հետեւյալ թվերը. «Քաղաքացիական պատերազմի նախօրեակին, Լիբանանեան ճարտարարուեստը կը հաշուէր շուրջ 6.000 փոքր եւ միջակ գործատեղիներ, 150.000 գործաւորներով: 16 տարուան պատերազմը աղէտաբեր եղաւ երկրին ամբողջ տնտեսութեան, բայց ի մասնաւորի ճարտարարուեստին համար: Գործատուներուն կէտը, շուրջ 3.000, անյայտացան, որովհետեւ, կամ քանդուած էին, կամ կողոպտուած եւ այրած էին, եւ կամ լուծարքի ենթարկուած: Ատեն մը գործաւորներուն թիւը իջաւ մինչեւ 35.000-ի, բայց յետոյ կրկին բարձրացաւ մինչեւ 80.000-ի... շուրջ 500.000 լիբանանցիներ հեռացան իրենց երկրէն: Ընդհանրապէս երիտասարդ, աշխատելու եւ ստեղծագործելու ատակ, զարգացած ու ձեռներէց տարրն է որ մեկնեցաւ: Արաբական երկիրներ գացողները հոն արմատ չէին նետեր, այլ օր մը անպայման կը վերադառնան Լիբանան: Պարա-

գան նոյնը չէ Եվրոպա, Աւստրալիա եւ կամ Ամերիկա ու Գանատա մեկնողներուն: Գացողներէն շատերը գացած են հոն հաստատուելու մտադրութեամբ»:⁹⁵ Բոլոր բերված թվերը ուղակիորեն վերաբերվում էին նաեւ լիբանանահայությանը, քանզի նրանց մի զգալի մասը ավանդաբար զբաղված էր հենց ճարտարարվեստի տարբեր ճյուղերում: Լիբանանի տնտեսության նման համատարած անկման արդյունքը եղավ մեծ թվով հայերի սնանկացումը, ընդհանրապէս հայ համայնքի ֆինանսական ներուժի կրճատումը: Դա, իր հերթին, չէր կարող բացասաբար չանդրադառնալ լիբանանահայության, նրա տարբեր, այդ թվում նաեւ ՀԲԸ Միության եւ ՀԵԸ-ի գործունեության վրա:

Նույնն էր արտագաղթի պարագան: Նշված կէս միլիոն արտագաղթած լիբանանցիների թվում էին նաեւ տասնյակ հազարավոր հայեր, որոնց զգալի մասը բնակություն հաստատեց ԱՄՆ-ում, Կանադայում եւ Արեւմուտքի այլ երկրներում: Զանգվածային նման արտահոսքի հետեւանքները հայ համայնքի, նրա անխտիր բոլոր կազմակերպությունների կենսունակության համար եղան խիստ բացասական:

Այս ամենի հետ մեկտեղ, պատերազմը ունեցավ եւ այլ բացասական հետեւանքներ ՀԲԸ Միության եւ նրա հաստատությունների գործունեության համար: Դա հայ բնակչության տեղաշարժերն էին հենց Բեյրութի ներսում: «Պատերազմէն առաջ, աւելի քան քսոտասուն հազար հայութիւն կար այսպէս բնորոշուած արեւմտեան Պեյրոսի շրջաններուն մէջ: Այդ պատճառաւ, մեր գլխաւոր կրթական եւ երիտասարդական կառոյցները կը գտնուէին այդ շրջաններուն մէջ: Այժմ հայ զանգուածը տեղաւորուած է Նահր էլ Մօթէն մինչեւ Ըրիհի, եւ Անթիլիասէն մինչեւ Պէյթ Բոքոյի տարածութեան վրայ, ուր մենք շատ տկար ներկայութիւն ունինք»,- նշվում էր 1992թ. հոկտեմբերին Բեյրութում կայացած Լիբանանի ՀԲԸ Միության եւ ՀԵԸ վարչական մարմինների ընդհանուր ժողովում:⁹⁶

Պատերազմի անդառնալի հետեւանքները հատկապէս զգալի էին հայկական դպրոցների կյանքում: Այդ տարիներին շատ անգամներ անհնարին դարձավ նրանց գործունեությունը ընդհանրապէս: Այսպէս, 1975- 1976 ուսումնական տարում Բեյրութում Միության դպրոցները բաց էին ընդամենը մոտ մեկ ամիս: Հաջորդ տարիներին Յովակիմեան-Մանուկեան եւ Դարուհի Յակոբեան վարժարանները ապահովության նկատառումով ստիպված էին իրենց աշխատանքը կազմակերպել Միության այլ դպրոցներում: Այս երկու վարժարանների քաղաքի արեւելյան մասում բնակվող աշակերտները հաստատվեցին Լեւոն Կ. Նազարեան դպրոցում, իսկ արեւմտյան մասում բնակվող աշակերտները՝ Ե. Տեմիրճեան դպրոցում եւ Զապէլ Մովսիսեան կենտրոնում: 1980թ. Միության Կենտրոնա-

կան վարչությունը նույնիսկ ստիպված եղավ 125.000 դոլար տրամադրել՝ առավել ապահով վայրում գտնվող Անթիլիասի կարմիրեան վարժարանի շենքի վրա լրացուցիչ 8 դասարաններ՝ Դ.Յակոբեան վարժարանի սանուհիների համար, կառուցելու: Այս տեղաշարժերը նպատակահարմար դարձրին նաև, որ նշված երկու երկրորդական վարժարանները, սկսած 1984թ., ունենան միացյալ ուսուցչական կազմ: Սակայն նույնիսկ այդ պայմաններում, դասերի հաճախակի ընդհատումները հարցականի տակ էին դնում հիմնական ուսումնական ծրագրի կատարումը: Այդ պատճառով մի շարք դեպքերում դպրոցների տնօրինությունը ստիպված էր լինում հրաժարվել որոշ առարկաների՝ գծագրության, կրոնի, երաժշտության, մարզանքի դասավանդումից: Չնայած թե՛ Միության տեղի մասնաճյուղի եւ թե՛ դպրոցների տնօրինության բոլոր ջանքերի՝ «Աղջկանց եւ տղոց միացեալ ուսումնառութիւնը բազմաթիւ դժուարութիւններ պատճառեց, որովհետեւ չկային բաւարար թիւով դաստիարակներ, ինչպես նաեւ դպրոցական տարածութիւն եւ սարքաւորում: Աշակերտութիւնը չափազանց ազդուած էր Լիբանանի մէջ տիրող եղծանիչ վարք ու բարքէն»:⁹⁷

Ինչպես արդեն նշվեց, Լիբանանի հայության համար այդ տարիների ամենածանր հետեւանքներից էր նրա թվաքանակի կտրուկ նվազումը: Հայերի արտագաղթի արդյունքում, բնականաբար, նվազեց նաեւ Միության անդամների թիվը: Եթե մինչ պատերազմը Միության անդամների թիվը Լիբանանում աճում էր՝ 1973թ.՝ 4.271, 1975թ.՝ 4.750 անդամ, ապա արդեն 1979թ. այն կազմեց 3.757 անդամ: Այս թվերը ներառում են նաև Բեյրութի երկու երկրորդական վարժարանների սաներին, որոնք նույնպես Միության անդամներ էին: Ահավասիկ, քաղաքացիական պատերազմին նախորդած՝ 1974-1975 տարեշրջանում Յովակիմեան-Մանուկեան վարժարանում կար 351 եւ Դարուհի Յակոբեան վարժարանում՝ 347 աշակերտ, բայց արդեն 1978-1979 տարեշրջանում, համապատասխանաբար՝ 226 եւ 260 աշակերտ, 1984-1985թթ.՝ ընդամենը 195 եւ 209: Նույն տարիներին առավել մեծ չափով նվազեց աշակերտների թիվը Երուանդ Տեմիրճեան նախակրթարանում՝ 465-ից այն իջավ մինչեւ 126-ի: 1987թ. այս դպրոցի շենքը վաճառվեց, եւ դպրոցը հաստատվեց Ալեք Մանուկեան Կեդրոնում: Ամփոփելով այդ տարիներին լիբանանահայ դպրոցների քանակական կորուստների չափերը՝ Դարուհի Յակոբեան եւ Յովակիմեան-Մանուկեան միացյալ՝ Դարուհի-Յովակիմեան վարժարանի տնօրեն Ժիրայր Դանիելյանը գրում էր.

«1974-75 կրթական տարեշրջանին ...լիբանանահայ վարժարաններու թիւը կը գնահատուէր 51, ուր կ'ուսանէին շուրջ 21 հազար աշա-

կերտներ: Եթէ այս թիւին վրայ աւելցնելու ըլլանք այդ ժամանակ գործող հայագիտական ուսմանց բարձրագոյն հաստատութիւնները, դպրեւանքերն ու արհեստագիտական կարգ մը վարժարաններ, կ'ունենանք շուրջ 60ի հասնող ընդհանուր թիւ մը: 1987-88 տարեշրջանին համար կատարուած վիճակագրական հետազոտութեան մը կը պարզուի թէ լիբանանահայ վարժարաններու թիւը այդ տարի նուազած է եւ դարձած 44, իսկ կրթական հաստատութիւններու ընդհանուր թիւը եղած է՝ 54: Իսկ աշակերտութեան թիւը՝ 12.924...»: Այսինքն, վերջինների թիվը կրճատվել էր շուրջ 8 հազարով: Ծարունակելով համեմատությունները՝ Ժ.Դանիելյանը նշում է. «...1987-88 եւ 1990-91 տարեշրջաններուն միջեւ լիբանանահայ կրթական օջախներէն երկու ազգային վարժարաններ փակեր են իրենց դռները, իսկ նույն ժամանակաշրջանին, աշակերտութեան ընդհանուր թիւը արձանագրեր է 985 աշակերտի նուազում, որ կը ներկայացնէ 7.62 առ հարիւրի համեմատութիւն մը»:⁹⁸

Քաղաքացիական պատերազմի մեկ այլ բացասական հետեւանք էր նաև տեղական ոչ-հայկական վարժարաններ հաճախող հայ աշակերտների թվի աճը, ինչը, պայմանավորված էր նաև այլ պատճառներով: Այս երեւոյթը նկատելի էր դեռեւս 1960-ական թթ., իսկ 1990-ականներին դարձավ արդեն մտահոգության առարկա: Վերլուծելով այս երեւոյթը՝ Ժ.Դանիելյանը գրում է. «Հայութեան համախումբ ներկայութիւնը որոշ թաղամասերու եւ շրջաններու մէջ՝ ատենին կը ստեղծէր յարմար մթնոլորտ եւ միջավայր ի նպաստ թաղային հայկական վարժարաններու, որոնք գաղափարական, միութենական, հայրենակցական պատկանելիութեամբ եւ ուղղութեամբ՝ իրենց կը քաշէին գաղափարակից ու համակիր շրջանակներու ծնողներն ու հետեւաբար՝ աշակերտները:

16-ամեայ պատերազմէն առաջ ի՛նչ եւ անոր ընթացքի՛ն ալ հայկական թաղամասերու եւ շրջաններու դիմագիծն ու նկարագիրը զգալապէս լեղաշրջուեցան: Տնտեսական աւելի բարենպաստ պայմաններ, միացած աւելի ուշ ստեղծուած ապահովական եւ այլ ազդակներու, հայ համայնքի աշխարհագրա-ազգագրական կերպարանքը հիմնովին փոխեցին: Յատկապէս բարեկեցիկ կարգ մը շրջանակներու մօտ ստեղծուեցաւ մեծամտութեան եւ գերակայութեան բարոյոյթ՝ իրենց զաւակները ուղարկելու ծանօթ եւ հոչակ վայելող օտար, ոչ-հայկական կրթական հաստատութիւններ: Ասոնց օրինակին հետեւեցան նաեւ տնտեսական նուազ կարողութեան տէր ընտանիքներ ալ»:⁹⁹

Դրա հետ մեկտեղ, հեղինակը մատնանշում է նաև հետեւյալ կարեւոր գործոնը. «վերջին տարիներուն, երբ լիբանանեան պետութիւնն ու երկրին մակարդակ ունեցող գլխաւոր համալսարանները դարձած են շատ

աւելի պահանջկոտ եւ խստապահանջ, բազմաթիւ հայ ծնողներ սկսած են մտածել, թէ հայկական վարժարաններուն ուսումնա-կրթական մակար-դակը համապատասխան բարձրութեան վրայ չէ, եւ թէ հայերէն լեզուի, հայոց պատմութեան եւ ընդհանրապէս հայերէնով դասաւանդուող առարկաներու ուսուցումը անտեղիօրէն կը խճողէ հայ աշակերտին դասացուցակը, եւ հետեւաբար՝ պատճառ կը դառնայ որ ան պահանջուած եւ բաւարար կերպով չպատրաստուի պետական թէ համալսարանական հետզհետէ խստացող քննութիւններուն: ...Ինչ հարկ հայերէն լեզուի, հայոց պատմութեան եւ առ հասարակ հայերէն լեզուով դասաւանդուող առարկաներու ...մանաւանդ որ անոնք ոչ մէկ աղերս ունին պետական թէ համալսարանական քննութիւններուն եւ պահանջքներուն հետ: Այլ խօսքով,- եզրակացնում է Ժ.Դանիելյանը,- անոնք, կարգ մը ծնողներ, կը հանդիսանան ջատագովները այդ դասանիւթերուն հայկական վարժարաններու դասացուցակներէն ի սպառ վերացումին: Այլ խօսքով՝ անոնք կը մեղանչեն ու կը դաւադրեն, կամայ-ակամայ, գիտակցօրէն թէ անգիտակցօրէն, հայ դպրոցին հիմնական առաքելութեան եւ անգամ ֆիզիքական ողջ ոգեկան գոյութեան դէմ»:¹⁰⁰

Դեպի վերածնունդ

Նման պայմաններում, երբ ՀԲԸ Միությունը Լիբանանում հայտնվել էր տարբեր մարտահրավերների առջեւ, խիստ կարեւոր էր դառնում նրա բոլոր անդամների հավատը հայ համայնքի ապագայի հանդէպ: Նրանք կարիք ունեին որոշակի խրախուսիչ ազդակների, աջակցության եւ դրանք ի հայտ եկան շատ արագ: Դեռեւս պատերազմի տարիներին Միությունը Անթիլիասի շրջանում Պօղոս Կարմիրեան վարժարանի հանդիսակց կողմում գնել էր երկու հողատարածք՝ ապագայում այստեղ երիտասարդական նոր համալիր կառուցելու նպատակով: Պատերազմի հետեւանքով ստեղծված իրավիճակը, կարծես, հարցականի տակ էր դրել այդ ծրագրի իրագործումը ընդհանրապէս: Բայց ահա, արդեն 1992թ. վերոհիշյալ ժողովում հայտարարվեց այդ նոր շինության մոտալուտ հիմնարկեքի մասին:

Այս գործի հաջողությունը մի նոր ապացույց էր Միության այն հին եւ մշտապէս կենդանի ավանդույթի, երբ նրա անհատ անդամների եւ հատկապէս առաջնորդների կարողությունները ի սպաս են դրվում Միության, ողջ ժողովրդի կարիքները հոգալու համար: Տվյալ դեպքում այդ դերում հանդես եկան Տեմիրճյան եւ Մանուկյան ընտանիքները: Արդեն նշվել էր, որ տարիներ առաջ Երվանդ Տեմիրճյանի միջոցներով հիմնադրվել էր իր

անունը կրող դպրոց Բեյրութում: Իսկ այժմ Երվանդ Տեմիրճյանի զավակներն էին 500.000 դոլար նվիրաբերում Միության նոր կենտրոնի կառուցման համար: Նույն նպատակին (այդ թվում հողատարածքի գնման համար) տրամադրվեց նաեւ Տեմիրճեան վարժարանի շենքի վաճառքից գոյացած եւս 500.000 դոլարը: Հարկ է նշել, որ մինչ այդ Տեմիրճյանի զավակներից Սարգիս Տեմիրճյանը իր կնոջ՝ Սեդայի հետ 1.500.000 դոլար էին նվիրաբերել Միությանը, որից 250.000-ը հատկացվեց Լիբանանում Միության դպրոցների կարիքավոր աշակերտներին օժանդակելու հիմնադրամին:

Խոսելով Տեմիրճյան ընտանիքի մասին՝ Միության Լիբանանի Օրջանակային Հանձնաժողովի ատենապետ Հակոբ Ալթունյանը հատուկ կարեւորեց նաեւ ՀԲԸ Միության նախագահ Լուիզ Մանուկյան-Սիմոնի վերաբերմունքը Լիբանանի հայության հանդէպ. «Անոնք վարակեցին գոնէ մէկ հոգի: Տկն. Լուիզ Մանուկեան-Սիմոնը: Անվիճելիօրէն տպաւորուած Տեմիրճեաններու հաւատքէն Լիբանանահայ գաղութին հանդէպ, մեր նախագահուհին իր կարգին ինքնաբոխօրէն Երիտասարդական Կեդրոնի ծրագրին նուիրեց 300.000 տոլար: Երբ լուրը ստացանք, մեզի համար բոլորովին անսկսկալ մըն էր: Քաղաքականապէս տակաւին ոչ բոլորովին կայունացած Լիբանանի մէջ այս կարեւորութեամբ գումարի մը ներդրումը՝ անսպասելի էր: Երբ կը խորհրդածենք,- շարունակում էր Հ.Ալթունեանը,- կը յանգինք այն եզրակացութեան թէ մեր դէկավարութեան դիրքին մէջ փոխուած բան չկայ: Անտարակոյս, ժեսթը կրկին արդիւնքն է հաստատ հաւատքին մեր Միութեան առաքելութեանը ու մեր ժողովրդի յանրժականութեանը հանդէպ: Բայց այն արտայայտութիւնն է նաեւ վեհանձն հոգիի մը, որուն համար ամենամեծ զոհողութիւնները կը փոքրանան նպատակի մեծութեան առջեւ»:¹⁰¹

Արժեւորելով Տեմիրճյան ընտանիքի նվիրատվությունը՝ Անթիլիասի ՀԲԸ Միության նոր կենտրոնը անվանվեց Երուանդ Տեմիրճեան Կեդրոն:

Եվ հենց այս նորակառույց կենտրոնում էլ 1998թ. հոկտեմբեր ամսին գումարվեց ՀԲԸ Միության հերթական՝ 80-րդ Ընդհանուր ժողովը: Այդ ժողովը խորհրդանշական էր մի քանի առումներով: Նախ, այն վերջինն էր անցնող XX-րդ դարում, այն դարում, որի առաջին տարիներին ծնունդ առավ Միությունը եւ որի ողջ ընթացքում գործեց թե՛ Հայաստանում եւ թե՛ սփյուռքում: «Այս Ընդհանուր Ժողովին ընթացքին, չեմ կրնար մտահան ընել,- իր ճառում ասաց Միության նախագահ Լուիզ Մանուկյան-Սիմոնը,- թէ հոս հաւաքուած ենք 92 տարիներ ետք երբ նուիրեալներու փոքրաթիւ խումբ մը, առաջնորդութեամբ Պօղոս Նուպարի, հիմնեց Հայկական Բարեգործական Ընդհանուր Միութիւնը: Յաճախ ինքզինքս հարց

կու տամ թե արդեօք անոնք, իրենց ամենավառ տեսիլքով, կրնայի՞ն երեւակայել որ ՀԲԸ Միութիւնը, այսքան տարիներ ետք, պիտի մնար միացեալ, ուժական համաշխարհային կազմակերպութիւն մը, թէ ՀԲԸ Միութիւնը, 92 տարիներ ետք, կրկին անգամ պիտի ունենար ուրիշ սերունդ մը նուիրեալ դեկավարներու և անդամներու, որոնք 22 երկիրներու մէջ պիտի շարունակէին իրականացնել իրենց երազը»:¹⁰²

Այս ժողովը խորհրդանշական էր նաեւ այն առումով, որ առաջին անգամ՝ Միության Ընդհանուր ժողովը գումարվում էր Լիբանանում: Դրանով իսկ Միությունը, կարծես, իր հարգանքն էր արտահայտում այդչափ մեծ փորձություններին դիմագրաված իր տեղի մասնաճյուղին և միաժամանակ իր հավատն էր արտահայտում լիբանանահայության ապագայի, նրա կենսունակության հանդէպ: Այն, որ այդ հավատը անհիմն չէր, վկայում էին հենց իրենք՝ Միության տեղի անդամները: Ընդհանուր ժողովի օրերին Բեյրութում կազմակերպվեց ՀԲԸՄ-ՆԵԸ-ի Երիտասարդական Միավորների փառատունը, որին մասնակցեցին Միության Լիբանանի բոլոր խմբերը՝ Դարուհի Յակոբեան և Յովակիմեան-Մանուկեան, Պօղոս Գ.Կարմիրեան և Լեւոն Կ.Նազարեան վարժարանի սաները, ՆԵ Ընկերակցության փողային նվագախումբը, համալսարանականների խումբը, «Անդրանիկ» բասկետբոլի տղաների և աղջիկների թիմերը, սկաուտների տարբեր տարիքային խմբերը և այլք:

Ընդհանուր ժողովի օրերին Բեյրութում տեղի ունեցավ նաեւ ՀԲԸ Միության Նուպար Նազարեան շենքի բացումը, որին ներկա էին Միության Կենտրոնական Վարչության անդամները, Լիբանանի արտաքին գործերի նախարարը, ՀՀ դեսպանը և պաշտոնական այլ անձինք: Այդ գեղակերտ շենքը կառուցվել էր բարերարությամբ հայտնի Նազարյան ընտանիքի, որի ներկայացուցիչները՝ Կարպիս և Նազար Նազարյանները, թե՛ Լիբանանում և թե՛ ԱՄՆ-ում Միության դեկավարներներից են: Նազարյան ընտանիքը շենքը նվիրաբերել էր ՀԲԸ Միությանը, որն էլ այն տրամադրեց Հայաստանի Հանրապետությանը, որպէս ՀՀ դեսպանության և հյուպատոսության պաշտոնատեղ և բնակավայր: Այս արարողությունը, որին մասնակցեցին նաեւ ազգային երեք կուսակցությունների, լիբանանահայ տարբեր կազմակերպությունների ներկայացուցիչները, ամենակարեւոր իրադարձությունը եղավ ոչ միայն ՀԲԸ Միության, այլև ողջ Լիբանանի հայության կյանքում:

Եգիպտոսում

«Եթէ վաղը երիտասարդներն են որ պիտի շարունակեն սկսուած գործը, ներկայ պահանջներուն համաձայն և արդիական ըմբռնումով, պէտք է անոնք կազմեն առողջ հաւաքականութիւն մը, գիտակից իրենց կոչումին... Այդ կանխահոգութեամբ է որ ճամբայ ելանք, ջանադիր ըլլալով հետզհետէ գաղութներու մէջ Միութեանս հովանու ներքեւ համախմբելու և կամ կազմակերպելու հայ երիտասարդները, և մասնաւոր երեկի որբերը, որ, օտար հողերու վրայ աստանդական, օտարացումի և այլասերումի ենթակայ ըլլալով ազգային տաք հոգատարութեան պէտք ունին առաւել քան երբեք»:¹⁰³ ՀԲԸ Միության 1936թ. տարեգրքում ձեւակերպված այս նպատակի իրագործումը, անշուշտ, չէր կարող սահմանափակվել լոկ Սիրիայով և Լիբանանով: Ուստի և բնական է, որ գրեթե միաժամանակ Միությունը այդօրինակ գործունեություն ծավալեց Արեւելքի այլ երկրներում եւս: 1930-ականների վերջին - 1940-ականների սկզբին Երիտասարդական Ընկերակցություններ հիմնվեցին Եգիպտոսում, Իրաքում (Բաղդադ), Իրանում (Թեհրան), Պաղեստինում (Երուսաղեմ, Հայֆա, Յաֆա), որոնք աշխույժ գործունեություն ծավալեցին մշակութային և սպորտի ասպարեզում:

1934թ. Միությունը ձեռնամուխ եղավ Եգիպտոսում երիտասարդական կազմակերպության ստեղծմանը: Նկատի առնելով, սակայն, Եգիպտոսի Ծրջանակային Հանձնաժողովի կարծիքը, որ «...Գահիրէի մէջ չի բաւեր Բարեգործականի Տուն մը միայն հաստատել, այլ անհրաժեշտ է սեփական մարզադաշտ մը եւս ունենալ, տեղւոյն երիտասարդութիւնը Միութեանս հովանիին ներքեւ համախմբելու համար...»:¹⁰⁴ ՀԲԸ Միության Կենտրոնական Վարչությունը որոշեց հատուկ միջոցներ տրամադրել նաեւ այդ նպատակով: Դրա արդյունքը եղավ Կահիրէում Նուպար Մարզական Միութեան կազմավորումը, որի նպատակն էր՝ ըստ կանոնագրի, «Գահիրէի հայ երիտասարդութեան մարզական, մարմնակրթական և մշակութային զարգացման աստարել: Նուպար Մարզական Միութիւնը քաղաքական և կուսակցական որեւէ հանգամանք չունի»:¹⁰⁵ 1936թ. նրա մարզական տարբեր խմբերում (ֆուտբոլ, բասկետբոլ, թենիս և այլն) ընդգրկված էին շուրջ 300 երիտասարդ աղջիկներ և տղաներ:

1951թ. Ալեքսանդրիայում Միության Բարերար անդամ Կարապետ Հեքիմյանի տրամադրած միջոցներով հիմնվեց Հեքիմեան Մարզարանը՝ թենիսի, բասկետբոլի և այլ մարզադաշտերով, ինչպէս նաեւ հանրային գրադարան: Դուք տարի անց քաղաքի Քան տը Սեզար հայաշատ թաղա-

մասում երիտասարդությունը ունեցավ նոր հավաքավայր-մարզարան, որի շնորհիվ զարկ տրվեց արհմերի եւ արեւմուշների շարժմանը նույնպես:

Սկսած 1950-ից Նուպար Մարզական Միությունը՝ իր 200- 250 անդամներով, սերտորեն համագործակցեց Հեղինույիսի ՀՄԸՄ հետ: 1953թ. նրանց կողմից կազմակերպված Եգիպտահայ Օլիմպիական Տարին առաջին անգամ հնարավոր դարձրեց տեղի բոլոր հայկական մարզական միությունների համատեղ ելույթները: Նմանատիպ մի միջոցառում կազմակերպվեց նաև 1972-ին՝ բասկետբոլի մրցաշարը, որին մասնակցեցին տարբեր քաղաքների հայ մարզական միությունները: Ժամանակի ընթացքում Հեղինույիսի մարզադաշտը իր հայաշունչ մթնոլորտի շնորհիվ դարձավ համայնքի ազգային կյանքի կարեւոր կենտրոններից մեկը:

Թեև սպորտը շարունակում էր մնալ տեղի երիտասարդական միության գործունեության հիմնական ասպարեզը, Կահիրեի ՀԲԸ Միության մասնաժողովի նախաձեռնությամբ 1957թ. ստեղծվեց նաև Երիտասարդաց Մշակութային Մարմին: Այդ մարմնի առաջին ձեռնարկներից էր վեցամսյա հայագիտական դասընթացները, որը վարում էր հայտնի պատմաբան Արշակ Ալպոյաճյանը:

1980-ական թթ. Եգիպտոսի հայության թիվը շարունակվող արտագաղթի հետեւանքով զգալիորեն նվազեց: Եթե 1950-ականներին տեղի հայությունը հաշվվում էր շուրջ 45.000 մարդ, ապա երեք տասնամյակ անց կազմում էր շուրջ 10.000: Չնայած դրան, թե՛ Կահիրեի եւ Ալեքսանդրիայի հայ համայնքները եւ թե՛ այդ քաղաքների ՀԲԸ Միության մասնաճյուղերը եւ Նուպար երիտասարդական-մարզական կազմակերպությունները շարունակում էին իրենց աշխույժ գործունեությունը:

ՀԲԸ Միության Եգիպտոսի Ծրջանակային Հանձնաժողովի գործունեությունը նկատելիորեն աշխուժացավ 1990-ականների կեսերից, ինչը պայմանավորված էր Սաթենիկ Չաքրի նվիրատվությամբ: Սաթենիկ Չաքրը՝ Միության ակադեմիկոս գործիչ Ջանիկ Չաքրի (նրա մասին խոսվեց գրքի նախորդ գլուխներում) այրին, դեռեւս 1976թ. Միությանն էր նվիրաբերել իր մոտ 4 հազար մետր տարածքի վրա գտնվող առանձնատունը՝ Կահիրեի դեսպանատների թաղամասում, ուր ապրեց մինչեւ իր մահը: Նրա մահից հետո առանձնատան փոխանցումը Միությանը առաջացրեց որոշ իրավական բարդություններ, որոնք հաղթահարվեցին միայն 1996թ.: Միության տեղական եւ կենտրոնական մարմինների որոշմամբ նվիրաբերված տարածքի մի մասը, ուր գտնվում էր առանձնատունը, խորհրդանշական վարձով հատկացվեց Հայաստանի Հանրապետության դեսպանատանը: Ինչպես նշում էր Միության Եգիպտոսի Ծրջանակային Հանձնաժողովի ատենապետ Պերճ Թերզյանը, «Կարծեք թե նախախնամական

բան մը կար, որ նուիրատուութեան ձեւակերպումը այնքան ուշանար, որ համընկնէր Եգիպտոսի մէջ ՀՀ դեսպանատան հաստատումին հետ»:¹⁰⁶ Այս շենքը Եգիպտացի լրագրողների կարծիքով, որպես ճարտարապետական կոթող լավագույններից է Կահիրեում հաստատված արտասահմանյան դեսպանատների մեջ եւ իրավամբ կոչվում է «Կահիրեի գոհար»:

Նվիրաբերած տարածքի մյուս մասի վաճառքից գոյացած գումարով հիմնվեց Սաթենիկ Չաքրի հիմնադրամը, եւ հնարավոր դարձավ իրականացնել մի շարք նոր ծրագրեր: Կրթական ծրագրի շրջանակներում Միությունը մեծագումար կրթաթոշակներ է հատկացնում այդ երկրի տարբեր ուսումնական հաստատություններում սովորող հայ երիտասարդներին: Հատկապես կարեւոր է նրա օժանդակությունը մասնավոր համալսարանների ուսանողներին (շուրջ 40 հոգի), ուր ուսման վարձը շատ բարձր է: Պ.Թերզյանի խոսքերով «...կ'իրականացուի նաև կրթական համագործակցութիւն, մասամբ կը հոգանք Հայաստանի Համալսարանէն, Եգիպտոսի մէջ կատարելագործման շրջան մը անցնելու ժամանած ուսանողներուն ծախսերը, նաև... արդէն երեք տարիէ ի վեր կանոնաւոր կերպով Բարեգործականը յատկացումներ կը կատարէ Եգիպտոսի համալսարաններու կարիքաւոր ուսանողներու ֆոնտին, այդպիսով մեր մասնակցութիւնը կը բերենք մեզ հիւրանկալող երկրին իրագործումներուն»:¹⁰⁷

Երկրորդ՝ մարդասիրական բնույթի ծրագիրը իրագործվում է այդ նպատակով ստեղծված ընկերային օժանդակության բաժնի միջոցով: Այդ ծրագրի շրջանակներում ամսական դրամական նպաստներ են հատկացվում համայնքի անապահով տարեց մարդկանց, որոնք անվճար ապահովվում են նաև դեղորայքով, բժշկական խնամքով եւ այլն: Ի տարբերություն այս երկուսի, Եգիպտոսի Ծրջանակային Հանձնաժողովի հրատարակչական գործունեությունը ունի ոչ միայն տեղական, այլեւ համահայկական կարեւորություն: Այդ են վկայում արաբերենով հրատարակված հետեւյալ գրքերը. «Հայերը Եգիպտոսի մէջ 19րդ դարուն» մեկագրությունը, Եգիպտոսի արդի գեղանկարչության հիմնադիրներից մեկի՝ Երվանդ Տեմիրճյանի եւ ակադեմիկոս երգիծանկարիչ Ալեքսանդր Սարուխանի գործերի այլումները, «Հայ բանաստեղծութեան ծաղկաքաղ» ժողովածուն եւ այլ գրքեր: Հայ ժողովրդի արդի պատմության ուսումնասիրման առումով հատկապես կարեւորվում է 1915-1998թթ. լույս տեսած եգիպտահայ մամուլի ամբողջական հավաքածոների նկարահանումը մանրածապավեններին (միկրոֆիլմեր), որոնց մեկական օրինակը ուղարկվեց Հայաստան եւ Փարիզ՝ Նուպարեան Մատենադարան: Դրանով իսկ ոչ միայն ապահովվեց եգիպտահայ մամուլի պահպանումը, այլեւ հնարավոր դարձավ դրանց մասնագիտական օգտագործումը:

Նույն՝ Սաթենիկ Չաքըր հիմնադրամի մեկենասությամբ իրականացվում է նաև արաբ եւ հայ հեղինակների հայագիտական գործերի հրատարակությունը: Այդ ծրագրի շրջանակներում 1998թ. հունվարից Կահիրեի «Արեւ» օրաթերթը հրատարակում է արաբերեն լեզվով ամենամսյա «Յաւելուած»: Նրա խմբագիր՝ պատմաբան Մոհամմատ Ռեֆաաթի խոսքերով՝ «...այս պարբերականը պիտի ծառայէ եգիպտացիներուն ներկայացնելու հայ համայնքի կենցաղը, համայնք մը որ կը պահէ իր ինքնութիւնն ու լեզուն, թէև հայերը շատ շուտով եւ յաջողապէս կը վարժուին գիրենք շրջապատող ժողովուրդներուն»:¹⁰⁸ Հազար օրինակով հրատարակվող այս «Յաւելուած»-ը առաջին իսկ համարից «յափշտակուած» է եգիպտացի մտավորականների կողմից եւ արժանացել է Եգիպտոսի Պատմական Ուսումնասիրությունների Միության բարձր գնահատանքին:

Իրանում

Արեւելքի երկրներին այդչափ բնորոշ անկայուն ներքաղաքական իրավիճակը, նրանց մեծ մասում ամբողջատիրական վարչակարգերի հաստատումը անխուսափելիորեն բացասաբար հետեւանքներ են ունեցել տեղի հայ համայնքների կենսագործունեության վրա: Դրա ամենաթաքնված օրինակներից է Իրաքը, որը մինչև Առաջին Համաշխարհային պատերազմը մտնում էր Օսմանյան կայսրության կազմի մեջ: Այստեղ՝ Բաղդադում ՀԲԸ Միության մասնաճյուղը հիմնվել էր դեռևս 1911թ., սակայն պատերազմը սկսվելուն պես նրա ղեկավարները նահատակվեցին թուրքական իշխանությունների կողմից: Անգլիական գործերի կողմից Բաղդադը գրավելուց հետո, ՀԲԸ Միության վերակազմավորված մասնաճյուղը ծավալում է աշխույժ գործունեություն: Հատկապես կարեւոր եղավ նրա օգնությունը այստեղ հայտնված հայ տարագիրներին, մասնավորաբար վերը հիշատակած Նահր Էլ Օմարի որբանոց-մայրանոցը Պորտ Սայիթ տեղափոխելու գործում: Հետագայում եւ հատկապես Երկրորդ Աշխարհամարտից հետո, երկրի աստիճանաբար զարգացմանը զուգընթաց կայունացավ նաև տեղի հայ համայնքի կյանքը: Գործում էին տարբեր համայնքային կազմակերպություններ, այդ թվում նաև ՀԲԸ Միության մասնաճյուղը, մարզական ակումբը, Սայաթ-Նովա երգի-պարի եւ Մասիս աշուղական խմբերը, Հակոբ Պարոնեան թատերախումբը, սկսուտական եւ մարզական տարբեր խմբեր եւ այլն: Սակայն, սկսած 1980թ., համայնքը մեծապես տուժեց երկրում տիրող իրավիճակից: Իրաք-իրանյան պատերազմը (1980-1988), 1990թ. Պարսից ծոցի պատ-

երազմը, երկրում տիրող բռնատիրական կարգերն ու տնտեսական ծանր վիճակը, այս ամենը խթանեց իրաքահայերի արտագաղթը եւ սահմափակումների ենթարկեց նրանց համայնքային գործունեությունը: Իսկ արդեն XXI դ. Իրաքի ողջ ժողովրդին սպասում էին նոր փորձություններ՝ կապված Սադամ Հուսեյնի բռնատիրությունը տապալելու պատրվակով՝ 2003թ. անգլո-ամերիկյան զինված ներխուժման հետ: Անցնող 13 տարիների ընթացքում ՀԲԸ Միության կենտրոնը առաջին անգամ հնարավորություն ստացավ անմիջական կապ հաստատել Բաղդադում իր մասնաճյուղի հետ եւ տեղեկանալ տեղի հայության վիճակին: «Կենսքը ինքնին դժուար էր արդեն անցնող տասնամեակներում,- հայտնում էր իրաքահայ մի կին,- բայց, մենք մեզ կրցած էինք ձեռով մը հաշտեցնել տիրող պայմաններում հետ: Անցնող ռեժիմը ցանկալի չէր, անկասկած: Իսկ այս օրերում՝ մեր կենսքը տակնուվրայ եղած է: Անապահովութեան գագուտը ամենէն տագնապալիցն է բոլորիս համար: ...Որքան որ ալ անգործութիւնը, ելեկտրականութեան եւ ջուրի պակասը, տեղական հեռախօսային ցանցի չգոյութիւնը իրաքանչիւրը իր կարգին անպատեհութիւններ կը ստեղծէ, սակայն՝ վայրագութիւնն ու ոմբակոծումները մեր առօրեային գլխաւոր սարսափն են»:¹⁰⁹

Ստեղծված պայմաններում Միության մասնաճյուղը՝ կենտրոնի նյութական օժանդակությամբ կազմակերպեց նպաստների բաշխումը հարյուրավոր, առավել կարիքավոր ընտանիքներին: Միության անդամների ջանքերի շնորհիվ հնարավոր եղավ նրա գրասենյակը գերծ պահել կողոպտուից. ՀԲԸ Միության «...Կեդրոնը դարձած է կարեւոր հանդիպման վայր՝ գործէն ետք հաւաքուելու եւ իրարու վիճակէն տեղեկ մնալու»: Անտեսելով բոլոր տեսակի դժվարությունները՝ մասնաճյուղը կազմակերպեց Ուրբաթօրեայ Հայ Լեզուի դասընթացները, որին մասնակցեցին շուրջ 60 աշակերտներ, իսկ հոկտեմբեր ամսին՝ Մշակութային ամսվա առիթով նաև ավելի քան 300 հանդիսատեսներին ներկայացրեց հատուկ երաժշտական-գեղարվեստական հայտագիր: Ուշագրավ է, որ մեկնաբանելով թե՛ այս միջոցառումը եւ թե՛ Միության երիտասարդ համալսարանականների պատրաստած հոմորով լի «հայրց-պատասխանի ֆիլմը», մասնաճյուղի պատասխանատուներից Մ.Ծեհրանյանը գրում էր. «Կենսքը դժուար է այսօր Պաղտատի մէջ, մեր նպատակը մի քանի ժամուայ ինքնամոռաց խնդրքի պահեր ստեղծել է»: Բայց այս ամենի հետ մեկտեղ, Միության ՀԵ Ընկերակցության Օհան մարզական միության սկսուտական ավելի քան 150 հոգանոց խումբը նույն այդ ծանր եւ վտանգավոր օրերին մեկնեց Ջաքո՝ տեղի Ս.Աստվածածին եկեղեցին բարեկարգելու նպատակով. «Այցելութիւնը մեծ ազդեցութիւն թողուց

երեխաներուն վրայ, առիթ տալով օգտակար դառնալու այդ շրջանի հաշտում, որոնք թէև մեծ մասամբ արդեն քրտախօս դարձած են, սակայն՝ հաւատացեալ հայ քրիստոնէայ ըլլալով գօրատր հաւատքով կապ կը պահեն հայ եկեղեցւոյ հետ»:¹¹⁰

Իրանում

Թեև 1950-ական թթ. Միության գործունեությունը ազգային կրթության ասպարեզում հիմնականում ընթացավ Լիբանանում եւ Սիրիայում, նրա աշխարհագրությունը, այդուհանդերձ, շատ ավելի լայն էր: Ավելին, Միության սեփական չորրորդ վարժարանը բացվեց 1952թ. վերջին, Իրանում:

Իրանի համայնքը, լինելով հնագույնը հայ գաղթաշխարհում, վերջնականապես ձեւավորվել է XVII դ.՝ հայերի հերթական բռնագաղթի հետեւանքով, երբ ստեղծվեցին Նոր Զուղա կենտրոնով մնայուն թեմեր՝ իրենց ազգային եւ մշակութային կառույցներով: Պատմաբան Հովհաննէս Փահլեւանյանը իրանահայերի պատմությանը նվիրված իր մենագրությունում գրում է. «Իրանահայությունը հոգու զարմանալի տոկունությամբ եւ համատությանը կարողացել է գոյատևել՝ պահպանելով իր մայրենի լեզուն, մշակույթը, ազգային սովորություններն ու ավանդույթները՝ մոտ 400 տարի անընդհատ պայքարելով իր նկատմամբ կիրառվող ձուլման քաղաքականության, ճնշումների ու կեղեքումների դեմ»:¹¹¹ Այդ պայքարում ամենաազդու միջոցներից էր դպրոցը՝ առաջինը հիմնվել էր Նոր Զուղայում՝ 1833թ., իսկ 1835թ. Թավրիզում սկսեց գործել հայտնի Արամեան դպրոցը:

Իրանում ՀԲԸ Միության առաջին մասնաճյուղը հիմնվեց միայն 1932թ.՝ մայրաքաղաք Թեհրանում¹¹² (այնուհետեւ նաեւ Համադանում) եւ սկզբից եւեթ ձգտեց աշխույժ գործունեություն ծավալել ամենատարբեր եւ հատկապէս կրթամշակութային ասպարեզներում: Հարկ է նշել, որ Իրանի հայության կարեւոր առանձնահատկություններից էր Դաշնակցություն կուսակցության եւ նրա տարբեր կառույցների գրեթէ բացարձակ գերակայությունը ազգային կյանքում: Նման իրավիճակում, երբ բացակայում էին այլ գաղափարաբանություն, քաղաքական այլ կողմնորոշումներ ունեցող կազմակերպությունները, ՀԲԸ Միության գործունեությունը բնականաբար, կապված էր որոշակի դժվարությունների հետ: Այնուամենայնիվ, արդեն 1952թ. Թեհրանում Միության մասնաժողովին կից ստեղծվեց Երիտասարդական Յանձնախումբ, որը հետզհետեւ իր շուրջն էր հա-

մախմբում տեղի հայ երիտասարդության մի որոշ մասը: 1968-ին այստեղ սկիզբ առավ սկաուտական շարժումը, որում ընդգրկված էին շուրջ 260 պատանիներ: Տարբեր միջոցառումների ու ձեռնարկների արդյունքում գոյացած գումարները ՀԲԸ Միության երիտասարդները հաճախ օգտագործում էին հայրենակիցներին օժանդակելու համար: Այսպես, 1975թ. մի երեկույթի հասույթով նրանք հնարավորություն ընձեռեցին Թեհրանի 40 չքավոր աշակերտներին տասը օր կազդուրվել «Հայկաշեն» ծովափնյա ամառային ճամբարում:

Դրա հետ մեկտեղ, Միության մասնաճյուղը որոշ քայլեր էր ձեռնարկում նաեւ կրթական ոլորտում: Մասնավորապէս, Երկրորդ Աշխարհամարտի տարիներին, նկատելով հայերեն դասագրքերի պակասը եւ Հայաստանում ընդունված նոր ուղղագրության որդեգրման անհրաժեշտությունը, մասնաճյուղը հրատարակեց եւ ձրիաբար դպրոցներին տրամադրեց Հայաստանում հրատարակված դասագրքեր:¹¹³ Սակայն մասնաճյուղի հիմնական նպատակն էր սեփական դպրոցի հիմնումը:

«Թեհրանի մասնաճիւղը, կարդում ենք Միության 1953թ. տարեգրքում, կենսական պէտք մը նկատած ըլլալով Միութեան անունով դպրոց մը բանալ, մասնաւորաբար ներգաղթէն ետ մնացած եւ Իրանի մայրաքաղաքին մէջ տեղաւորուած բազմաթիւ չքաւոր ընտանիքներու զւսակներուն յատուկ, հսկայ աշխատանք կատարած է այդ նպատակով նախ հիմնադրամ մը գոյացնելու, վարժարանի յարմար շէնք մը գտնելու եւ անոր բացման վերաբերմամբ կառավարական արտօնութիւն ձեռք բերելու համար»:¹¹⁴ 1952թ. հիմնված դպրոցը Նուպար տղայոց դպրոցն էր, որը 1956թ. կոչվեց Նուպար տղայոց եւ աղջկանց դպրոց: Այդ տարիներին Թեհրանում բնակվում էր շուրջ 40.000 հայ, ինչն էլ պայմանավորեց դպրոցի աշակերտության թվի մշտական աճը: Եթէ 1952-1953 ուսումնական տարում դպրոցը ուներ 87 աշակերտ, ապա հաջորդ երկու տարիների ընթացքում այդ թիվը հասավ 415-ի: Համաձայն երկրում գործող օրենքների, դպրոցը պարտադրաբար որդեգրել էր պետական կրթական ծրագիրը, «...դասավանդումը կատարվում էր պարսկերենով, իսկ մայրենի լեզվի ուսուցումը դուրս էր ծրագրից եւ հիմնական դասացուցակից»:¹¹⁵ Նույն օրենքով, սակայն, շաբաթական 12 ժամ հատկացվում էր հայերենին, կրոնին եւ հայոց պատմությանը. «...եւ այս կերպով լիովին գոհացում կը տրուի տոհմիկ դաստիարակութեան պահանջներուն»:¹¹⁶ Հետագա տարիներին՝ այդ թաղամասի հայ բնակչության տեղափոխման հետեւանքով, աշակերտության թիվը աստիճանաբար սկսեց նվազել եւ 1977-1978թթ. կազմեց 54 հոգի, ինչն էլ պատճառ դարձավ այն փակելու համար (դպրոցի գույքը տեղափոխվեց Մարի Մանուկեան դպրոց):

1964թ. Գալուստ Կիլլախանյանի Հիմնարկությունը հայտնեց ՀԲԸ Միությանը, որ պատրաստ է տրամադրել 150.000 դոլար՝ Գ.Կիլլախանյանի հանգուցյալ կնոջ՝ Նվարդ Կիլլախանյանի անունով Թեհրանում դպրոց կառուցելու համար: Հիմնարկությունը տարեկան 15.000 դոլար պետք է հատկացներ դպրոցի այլեայլ կարիքների համար, միայն թե հողատարածքը պետք է գնվեր Միության կողմից: 1967թ. Նուարդ Կիլլախանյան վարժարանի նորակառույց չորսհարկանի շենքը ընդունեց իր առաջին, թվով 226 աշակերտները՝ մեկ նախապատրաստական եւ նախակրթարանի չորս դասարաններում:¹¹⁷

Իսկ 1972թ. սեպտեմբերին Թեհրանում ավարտվեց Մարի Մանուկյան Ուղեցույց Դպրոցի եւ Մշակութային Տան կառուցումը, որի ծախսերի կեսը հոգաց ՀԲԸ Միության Կենտրոնական Վարչությունը՝ ի դեմս Ալեք Մանուկյանի, իսկ մյուս կեսը՝ տեղի մասնաճյուղը: Երեք տարի անց դպրոցը ունեցավ իր երկրորդական բաժինը, ինչին նպաստեց աշակերտների թվի աճը:

1979թ. իսլամական հեղափոխությունից հետո Իրանի նոր իշխանությունները արգելեցին աղջիկների եւ տղաների համատեղ ուսուցումը: Դրա հետևանքով բոլոր հայ դպրոցները հայտնվեցին շատ ծանր կացության մեջ, քանզի եւս մեկ շենք ունենալը կասկած էր շատ մեծ ծախսերի հետ: Ստեղծված պայմաններում Միության տեղական մասնաճյուղը վերակազմավորեց իր դպրոցները՝ Նուարդ Կիլլախանյան Մանչերու նախակրթարան (630 աշակերտ) եւ Մարի Մանուկյան Աղջկանց երկրորդական վարժարան (730 աշակերտ):

1983թ. հոկտեմբերին Իրանի կառավարության եւս մեկ որոշումով ազգային-կրոնական փոքրամասնություններին պատկանող դպրոցների գործունեությունը ենթարկվեց նոր սահմանափակումների: Մասնավորապես, Թեհրանի հայկական դպրոցներում արգելվեց հայերեն լեզվի ուսուցումը դասապահերին, եւ հայազգի տնօրենները փոխարինվեցին պարսիկներով: ՀԲԸ Միության տեղի մասնաճյուղը մեծ ջանքեր թափեց, որպեսզի Նուարդ Կիլլախանյան եւ Մարի Մանուկյան դպրոցներում ապահովվի հայեցի կրթություն. «Ուսումնական ծրագրին մէջ բաւարար չափով հայերէն չըլլալուն պատճառաւ, 5 հայ ուսուցիչներ պահացոյցէն ետք հայերէն լեզու, հայոց պատմութիւն եւ այլ հայկական գիտելիքներ դասաւանդեցին»:¹¹⁸ 1998թ. Մարի Մանուկյան Աղջկանց երկրորդական վարժարանը ունեցավ 105 շրջանավարտ, որոնցից 50-ը դարձան տարբեր համալսարանների ուսանողներ: Նույն՝ 1998թ. 74 տղաներ ավարտեցին Նուարդ Կիլլախանյան վարժարանը:

ՀՈՐԴԱՆԱՆՈՒՄ հայկական համայնքներ ձեւավորվել են Առաջին Աշխարհամարտից հետո, երբ այստեղ հաստատվեց բռնագաղթված հայերի մի մասը: Մինչեւ 1940-ական թթ. կեսերը այստեղ բնակվում էր շուրջ 6 հազ. հայ: Սակայն 1948թ. սկիզբ առած արաբա-իսրայելական պատերազմների պատճառով նրանց զգալի մասը արտագաղթեց այլ երկրներ, եւ ներկայումս մայրաքաղաք Ամմանում ապրում է մոտ 3 հազ. հայ: Այսօր Ամմանի փոքրաթիվ հայ համայնքի միակ կրթական հաստատությունն է ՀԲԸ Միության կողմից հովանավորվող Իզաբաշեան - Կիլլախանյան նախակրթական վարժարանը իր մանկապարտեզով եւ շուրջ 130 աշակերտներով:

ԱՐԵՎՄՈՒՏՔԻ ԵՐԿՐՆԵՐ

Առաջին Աշխարհամարտից հետո Սիրիա - Լիբանանում կուտակված հայության մի մասը նախընտրեց մեկնել այլ երկրներ: Նրանց հիմնական զանգվածը, բնականաբար, հաստատվեց աշխարհագրորեն առավել մոտ գտնվող Ֆրանսիայում, Բուլղարիայում, Հունաստանում, Եվրոպայի այլ երկրներում, իսկ մի մասն էլ՝ հեռավոր Ամերիկայում՝ ԱՄՆ-ում, Կանադայում, Արգենտինայում և այլուր: Հետագա տարիներին այդ բոլոր երկրներում հայությունը հետզհետե սկսեց ապրել աշխույժ և կազմակերպված համայնքային կյանքով: Եվ եթե Ֆրանսիան՝ ի դեմս Փարիզի, ինչպես նշվեց նախորդ գլխում, դարձավ սփյուռքի մշակութային և քաղաքական վերնախավի կենտրոնը, ապա նույն այդ տարիներին սփյուռքի ֆինանսական ներուժը կենտրոնացվեց ԱՄՆ-ում: Նույնն էր վիճակը և ՀԲԸ Միության պարագայում: Ինչպես նշում էր Պողոս Նուպարը իր վերջին՝ Միության Ամերիկայի անդամներին ուղղած պատգամում (1929 թ. օգոստոս), «Ճշմարտություն մը միայն յայտարարած պիտի ըլլամ, եթէ հռչակեմ թէ մեր Ընկերակցությունը մեծ մասամբ ձեր ջանքերուն կը պարտի իր բարգաւաճումը, որ թոյլ տուած է իրեն հասնիլ մեր աղէտեպաններուն, տարագիրներուն, գաղթականներուն և որբերուն կարիքներուն, զարգացնել ազգային կրթութիւնը, օգնել գործաւորին և հողագործին, սատարել մեր հայրենիքին վերաշինութեան, Հայաստանի որուն պէտք է յառին մեր յուսալից աչքերը»:¹¹⁹

ՀԲԸ Միության գործունեությունը Արեւմուտքի երկրների հայության ազգային նկարագրի պահպանման և զարգացման ուղղությամբ, բովանդակությամբ և իրագործման ձեւով էապես տարբեր էր Արեւելքի մահմեդական երկրներից: Այդ տարբերությունները բնական էին և անխուսափելի, քանզի նախ և առաջ պայմանավորված էին Արեւելքի ու Արեւմուտքի երկրների սկզբունքորեն տարբեր բնութագրերով:

Ի տարբերություն Արեւելքի երկրների, Արեւմուտքի երկրներում հաստատված հայերի համար XX դ. առաջին տասնամյակում ընդհանուր էր նրանց հստակ և ընդգծված ստորադաս կարգավիճակը: Թե մինչ Առաջին Աշխարհամարտը և թե դրան անմիջապես հաջորդած տարիներին Արեւմուտքի արագ զարգացող արդյունաբերական երկրների հայությունը, չունենալով անհրաժեշտ մասնագիտական հմտություններ, ստիպված էր հիմնականում կատարել որակավորում չպահանջող, ծանր ու ցածր վարձատրվող աշխատանք մետաղագործական, շինարարական և այլ ոլորտներում: Նրանք չունեին իրական պատկերացում տեղի ժողովուրդների ապրելակերպի, բարոյական և մշակութային նորմերի մասին,

որոնք հաճախ խորթ և անընդունելի էին իրենց համար: Արեւմուտքի երկրների ժողովուրդները, իրենց հերթին, անծանոթ լինելով հայերին, ինքնաբերաբար նրանց վրա էին տարածում «ասիացիների» մասին ունեցած իրենց բացասական պատկերացումները:¹²⁰ Դրա ծայրահեղ դրսևորումներից էր 1920-ական թթ. հայերի բնակության վայրի և աշխատանքի ընտրության, հասարակական փոխադրամիջոցներից օգտվելու և քաղաքացիական այլ իրավունքների խիստ սահմանափակումները ԱՄՆ-ի Կալիֆորնիա նահանգում:¹²¹

Նման պայմաններում հայերը և հատկապես նրանց առաջին սերունդները, ցանկանալով հնարավորին չափ արագ ներգրավվել ընդունող հասարակությունում, ձգտեցին առավելագույնս որդեգրել բնիկ՝ նույնպես քրիստոնյա ժողովուրդների կենսաոճն ու սոցիալ-մշակութային արժեքները: Հանուն դրա, նրանք, միաժամանակ, հարկադրված էին սահմանափակել իրենց ազգային, ավանդական մշակույթի դրսևորումները:

Այդ առումով նշված երկրներում յուրահատուկ դեր էր վերապահված հայերի քրիստոնյա լինելու հանգամանքին: Այն զգալի չափով նպաստեց Արեւմուտքի՝ նույնպես քրիստոնյա ժողովուրդների կողմից հայերի մասին նպաստավոր կարծիքի ձեւավորմանը, իշխող միջավայրին հայերի արագ հարմարվելուն: Դրա հետ մեկտեղ, այն մեծ չափով դյուրացրեց նրանց ազգամշակութային ձուլումը, մասնավորապես, այլազգիների հետ հայերի ամուսնությունների շնորհիվ: Համաձայն որոշ ուսումնասիրությունների, Արեւմուտքի և Հարավային Ամերիկայի երկրների հայության մեջ նման ամուսնությունները 1980-ական թվականներին կազմում էին ընդհանուր քանակի շուրջ 60%-ը:¹²²

Հայազգի ամերիկյան պատմաբան Ռոբերտ Միրաքի ամերիկահայերի պատմությանը նվիրված արժեքավոր գրքում բերվում են տվյալներ, որոնց համաձայն 1907-1910թթ. 37 քաղաքների (Բոստոն, Լին, Նյու Յորք, Ֆիլադելֆիա, Ուստր և այլն) պետական դպրոցներում հաշվվում էր 1.031 հայազգի աշակերտ, որոնք սովորում էին 1-9-րդ դասարաններում: Ի.Միրաքը նշում է, որ կրթության նկատմամբ այդպիսի վերաբերմունքը բնորոշ էր ոչ բոլոր ազգային փոքրամասնություններին: Այսպես, Ֆրեզնոյում (Կալիֆորնիա) իտալացի, մեքսիկացի, պորտուգալացի երեխաները շատ հաճախ 2-3 տարի անց դադարեցնում էին իրենց ուսումը, որպեսզի աշխատեն և լրացուցիչ եկամուտ ապահովեն իրենց ընտանիքներին: Այդ տարիներին ամերիկահայերի տնտեսական վիճակը նույնպես բավական ծանր էր, սակայն նրանք, ղեկավարվելով «դպրոց գնա, որ մարդ ըլլաս» սկզբունքով, պատրաստ էին չընկրկել և գոհողությունների գնով առաջնությունը տալ կրթությանը: Պատահական չէ, որ նույն այդ տարի-

ներին Կալիֆորնիա նահանգի Ներգաղթողների գործերի հանձնախումբը հատուկ նշում էր, որ հայերը «...լիովին օգտագործում են պետական դպրոցների ընձեռած հնարավորությունները, եւ նրանց երեխաները սովորում են որքան հնարավոր է՝ երկար»:¹²³ Հետագայում, ամերիկահայերի տնտեսական վիճակի բարելավմանը գուզընթաց, նրանց երեխաները անպայման ստանում էին ոչ միայն լրիվ միջնակարգ, այլեւ հնարավորության դեպքում՝ նաեւ համալսարանական կրթություն: Այսպես, համաձայն «Գիր ու գիրք» ամսագրի տվյալների, 1970-ական թթ. կեսերին ԱՄՆ-ում հաշվվում էր մոտ 1.500 ամերիկահայ՝ գիտական աշխատողներ եւ համալսարանների դասախոսներ:¹²⁴ Հասկանալի է, որ մասնագետների նման քանակը հնարավոր էր միայն համալսարանավարտների մեծ թվի դեպքում:

Արեւմտյան հասարակություններում հնարավորին չափ արագ ինտեգրվելու հայերի մեծ ձգտումը, բնականաբար, չէր կարող չազդել ազգային կրթության ոլորտի վրա: Երկար տասնամյակների ընթացքում, մինչեւ XX դ. 60-ական թթ. կեսերը, այն սահմանափակվեց մեկօրյա հայկական վարժարաններով: Կալիֆորնիայում ՀԲԸ Միության գործունեությանը նվիրված մի գրքում կարդում ենք. «Կալիֆորնիոյ հայ նորահաս սերունդը կը ստանայ իր ուսումը ամերիկեան կառավարական դպրոցներու մէջ, եւ կը մեծնայ ամերիկեան իտէլայով եւ ամերիկեան պայմաններու ներքեւ: Հայ եկեղեցիներ թէեւ ունին շարքա միայն մի քանի ժամ Ծաբաթ օրուայ ազգային դպրոցներ՝ հայ մանուկներուն հայերէն լեզուն սորվեցնելու եւ զանոնք հայ արժէքներուն տեղեկացնելու համար, բայց անոնք հեռու են ծովածաւալ կարիքի մը գոհացում տուլու հանգամանքէն: ... Բացի այս Ծաբաթ օրուայ ազգային դպրոցներէ, կան նաեւ հայ եկեղեցիներու հովանաւորութեան ներքեւ կիրակնօրեայ դպրոցներ, ուր հայ նոր սերունդը կը ստանայ կիրակի օրեր կրօնական ազգային դաստիարակութիւն մը, եկեղեցական պաշտամունքէն առաջ, մեծ տարիքին մէջ եղողներ ընդհանրապէս հայերէն, իսկ փոքրիկներ անգլիերէն լեզուով»:¹²⁵

Գրեթէ նույնն էր պատկերը թե ԱՄՆ-ի արեւելյան, նույնպես հայաշատ նահանգներում եւ թե Արեւմուտքի այլ երկրներում՝ Ֆրանսիայում, Կանադայում եւ այլուր: Հիրավի, տեղի էր ունենում պարադոքսալ մի երեւոյթ: Իր իսկ աճող սերնդի ազգային կրթության մասին մի տեսակ անտարբեր ամերիկահայությունը միեւնում ժամանակ իր նյութական եւ ֆինանսական կարողությունները տարիներ շարունակ առատորեն ուղղում էր դեպի Մերձավոր Արեւելքի երկրներ՝ այնտեղ ապաստանած բազմահազար հայ գաղթականների տարբեր կարիքները հոգալու համար:

Նման գործելակերպ էր որդեգրել նաեւ ՀԲԸ Միությունը, ինչի վկայությունն էին նրա որբախնամ, դպրոցաշինական եւ մի շարք այլ, ներառյալ Խորհրդային Հայաստանում իրագործվող ծրագրերը: ՀԲԸ Միության ականավոր գործիչներից Պետրոս Նորհադը 1966թ. հրատարակած իր գրքում բերում է ուշագրավ մի աղյուսակ, որից պարզ է դառնում ԱՄՆ-ի մասնաճյուղերի մասնաբաժինը՝ Միության կողմից տարբեր տարիներին կազմակերպված հանգանակություններում:¹²⁶

Հանգանակություններ	Ընդհանուր գումարը	Ամերիկայում հանգանակված գումարը
Փրկության	\$ 500.000	\$ 500.000
Որբախնամ	\$ 376.000	\$ 376.000
Նուպարաշեն	\$ 333.000	\$ 333.000
Քառորդ միլիոն	\$ 331.291	\$ 308.858
Կես միլիոն	\$ 462.527	\$ 395.527
Ներգաղթի առաջին	\$ 1.413.041	\$ 1.073.809
Ներգաղթի երկրորդ	\$ 519.604	\$ 334.599
Դպրոցաշինություն	\$ 247.129	\$ 247.129
Ոսկե հորելյան	\$ 398.982	\$ 333.986

Բայց բոլոր այդ տարիներին (մինչեւ 1970-ական թթ.) Միությունը ԱՄՆ-ում այդպես էլ չհիմնեց սեփական ամենօրյա վարժարան: Ինչպես ԱՄՆ-ում, այնպես էլ Արեւմուտքի այլ երկրներում որեւէ ազգային փոքրամասնության (այդ թվում նաեւ հայերի) կողմից ամենօրյա դպրոցի հիմնումը կապված էր մեծ բարդությունների հետ: Որպեսզի նման դպրոցը ճանաչվեր պետության կողմից (հակառակ պարագայում նրա գոյությունը դառնում էր անիմաստ), պետք է համապատասխաներ մի շարք պահանջների, սկսած շենքային պայմաններից եւ վերջացած ուսուցիչների վարձատրության չափով եւ նրանց որակավորումով: Նշված երկրների ընդհանուր զարգացմանը գուզընթաց, մշտապես փոփոխվում էին նաեւ այդ պահանջները՝ դառնալով ավելի խիստ ու բազմատեսակ եւ, դրանով իսկ, գրեթե անլուծելի առանձին հայ համայնքների կամ կազմակերպությունների համար:

Չնայած այս եւ ուրիշ այլ դժվարություններին, ՀԲԸ Միությունը, այնուամենայնիվ, ի վիճակի էր հիմնել գոնե մեկ նման դպրոց: Բայց դա կնշանակեր, որ հանուն այդ գաղափարի, նա պարտավոր էր հրաժարվել Արեւելքի երկրներում իրականացվող իր որոշ ծրագրերից: Կշեռքի նժարի վրա էին դրված, մի կողմից, Արեւելքի երկրներում դժվարին պայմաններում:

րում ապրող հայ երեխաների ֆիզիկական գոյությունը, նրանց ազգային դաստիարակության և կրթության ապահովումը մահմեդական միջավայրում, իսկ մյուս կողմից՝ Արեւմուտքի քրիստոնյա երկրներում համեմատաբար բարեկեցիկ կյանքով ապրող հայ երեխաների ազգային ինքնության պահպանումը: Երկուսն էլ կարելու էին, երկուսն էլ պահանջում էին իրենց անհապաղ լուծումը, բայց եղած սահմանափակ հնարավորությունները պարտադրում էին նախապատվությունը տալ դրանցից մեկին: Եվ այդ նախապատվությունը տրվեց Արեւելքի հայությանը:

Սակայն շուտով ակնհայտ դարձավ արեւմտյան քաղաքակրթության, նրա առանձին մշակույթների ուժեղ ազդեցությունը տեղի հայության ազգային նկարագրի վրա՝ դրանով իսկ իրական դարձնելով նրանց հնարավոր ուժացումը: Ստեղծված կացությունը ամենայն սրությամբ դրեց աճող սերնդի ազգամշակութային կողմնորոշման հարցը, և ՀԲԸ Միությունը առաջիններից էր, որ դիմեց գործնական քայլերի՝ երիտասարդ սերնդի ազգային ինքնության պահպանման նպատակով:

Կրտսերների Լիգա

Դեռես 1926թ. նոյեմբերին Նյու Յորքում հրատարակվող ՀԲԸ Միության «Յուշարար» ամսագիրը հրատարակեց մի կարճ հաղորդագրություն, որը ուշադրություն էր հրավիրում երիտասարդական միությունների՝ Լիգաների կազմավորման կարեւորության վրա: Նման կազմակերպության հիմնումը դիտելով որպես ՀԲԸ Միության քսանամյա հոբելյանը նշելու լավագույն ձեւերից մեկը՝ հաղորդվում էր տարբեր քաղաքներում անդամագրական արշավի հաջող ընթացքի մասին: Դրանից մի քանի ամիս անց Երիտասարդաց Լիգայի մասնաճյուղերը արդեն գործում էին Նյու Յորքում, Պրովիդենսում, Կլիվլենդում, Ուոթերթաունում և այլ քաղաքներում: Եվս մի քանի ամիս անց հրատարակվեց հատուկ կոչ, որը պաշտոնապես հայտարարում էր Երիտասարդաց կամ Կրտսերների Լիգայի (Junior League) ստեղծման մասին: Այդ կոչում, պարզաբանելով նորաստեղծ կազմակերպության նպատակը, նշվում էր, «... այս շարժումին նպատակն է ամերիկահայ նոր սերունդին ճանաչել ՀԲԸ Միության նպատակն ու գործը, և անոր սիրտին մեջ արծարծել ծառայութեան և զոհողութեան ոգին: Այդ կերպով միայն կարելի պիտի ըլլայ ՀԲԸ Միության գոյութիւնը պահպանել այս երկրին մէջ: Կրտսերներուն Լիկան պատեհութիւն պիտի ընծայէ նաեւ որ մեր երկու սեռէ երիտասարդները պար-

բերաբար խմբուին ազնի գաղափարներու շուրջը և իրարու ծանօթանան»:¹²⁷ Բայց ոչ միայն դա:

«Ոսկեմատեան ՀԲԸ Միութեան. 1906-1931» գրքում կարդում ենք. «Ձեռնարկը... նոյն ատեն կը ձգտէր նաեւ, Միութեան հայրենասիրական գործունէութեան և հանրօգուտ նպատակներուն ձգողութեան շնորհիւ, ըստ կարելոյն ազգին կապել Ամերիկահայ երիտասարդ սերունդին այն մասը՝ որ իր միջավայրին, ստացած դաստիարակութեան, ընտանեկան պայմաններուն, զբաղմանց և յարաբերութեանց պատճառաւ, օր օրի կը հեռանար իր օրրանէն, կը խառնուէր Ամերիկեան կեանքին, կը կորսուէր ազգին համար»:¹²⁸

Հանուն այդ նպատակի Միության Ամերիկայի Ծրջանակային Հանձնաժողովը առաջին օրից իր հատուկ հոգածության տակ վերցրեց Կրտսերաց Լիգաները՝ խթանելով նրանց գործունէության տարածումը ԱՄՆ-ի տարբեր հայ համայնքներում:

Կրտսերների Լիգային կարող էին անդամակցել 16-25 տարեկան, բարոյական լավ նկարագիր ունեցող, երկսեռ բոլոր հայ երիտասարդները: 1931թ. տարբեր քաղաքներում գործում էին Լիգայի 37 մասնաճյուղ, որոնց անդամների թիվը մոտենում էր 1.000-ի: Այդ մասնաճյուղերը բաժանված էին չորս՝ Կալիֆորնիայի, Միչիգն Արեւմտյան նահանգների, Արեւելյան նահանգների և Մեծ Նյու Յորքի շրջանակների, որոնցից յուրաքանչյուրը ուներ իր Խորհրդակցական Համաժողովը: Կրտսերների Լիգայի գործունէությունը ղեկավարում էր ընդհանուր քարտուղարը, որը նշանակվում էր Միության Ամերիկայի Ծրջանակային Հանձնաժողովի կողմից: Լիգաների կարեւորության և հեղինակության մասին էր վկայում այն, որ Միության Ամերիկայի տարեկան խորհրդակցական համաժողովին նրանք մասնակցում էին նույն իրավասությամբ և ձայների նույն համամասնությամբ, ինչպես և երեցները՝ «մայր» մասնաճյուղերը:

Նկատի առնելով, որ նրա անդամները հիմնականում անգլիախոս հայազգի երիտասարդներն էին, հատկապես կարելու էր եղավ 1927թ. նոյեմբերից «Յուշարար» ամսագրի անգլերեն հավելվածի թողարկումը: Հայոց պատմությանն ու մշակութիւն, ՀԲԸ Միության գործունէությանը, Խորհրդային Հայաստանին և այլ հարցերին նվիրված նյութերից զատ, այստեղ մշտապես հրատարակվում էին նաեւ Կրտսերներու Լիգայի անդամների հոդվածները: Համագործակցաբար երեցների մասնաճյուղերի հետ՝ պարբերաբար կազմակերպվում էին դասախոսություններ, վիճաբանություններ, անգլերենով և հայերենով թատերախաղեր, ընկերային և մարզական հանդիպումներ և այլն: Հատկանշական է, որ որոշ մասնաճյուղեր հատուկ ուշադրություն էին դարձնում հայերենի ուսուցմանը:

«Սիրեքյուզի եւ Պրաքթընի Լիկաները հայերէն կը սորվին իրենց ժողովներուն մէջ, եւ Րիվէյրի, Հարթֆըրտի, Լօուէլի, Ուէսթ Փոլմէնի Լիկաներու անդամները որոշ տուգանքի կ'ենթարկուին՝ եթէ իրենց ընկերական ժամանցի պահերուն հայերէնի տեղ օտար լեզուով խօսին»:¹²⁹

Սակայն Երիտասարդաց Լիգաների ստեղծումից շուրջ տասը տարի անց պարզ դարձավ, որ նրանց անդամների որոշ մասը չի ցանկանում անդամագրվել երեցների մասնաճյուղերին: Ենթադրելով, որ ավագների շարքերը անցնելու երիտասարդների նման չկամությունը մեծապես պայմանավորված է նրանց միջեւ եղած լեզվի եւ, ինչպես իրենք էին գրում, «background»-ի տարբերություններով, Միության Ամերիկայի Համաձայն-ժողովը Ֆիլադելֆիայում կայացած իր տարեկան ժողովում ստեղծեց, այսպես կոչված, անգլիախոս մասնաճյուղեր, այն հույսով, որ Կրտսերների Լիգայի հասունացած անդամները եռանդով կստեղծափոխեն իրենց անդամակցությունը այդ նոր ստեղծված ավագների խումբը, որը կազմված էր մարդկանցից, որոնց լեզուն եւ background-ը չէին տարբերվում իրենցից:

Նման մասնաճյուղերը հիմնվեցին Միության հիմնական մասնաճյուղերի կողքին՝ որպես ինքնուրույն միավորներ: Այսպես, 1946թ. ՀԲԸ Միության համակարգում գործում էին Կրտսերների Լիգայի 15 մասնաճյուղ՝ Նյու Յորքում, Ուաշինգտոնում, Բոստոնում, Չիկագոյում, Ֆրեզնոյում, Օքլենտում եւ այլուր, ինչպես նաեւ 8 անգլիախոս մասնաճյուղ՝ Դետրոյթում, Նյու Յորքում, Նյուարք-Պետերսենում, Հելվերհիլում եւ այլ քաղաքներում: Ի տարբերություն այլ երկրներում գործող Միության նմանատիպ երիտասարդական կազմակերպությունների, Կրտսերների Լիգան եւ անգլիախոս մասնաճյուղերը ոչ միայն ինքնաբավ էին, այլեւ ամեն տարի որոշակի գումար էին փոխանցում Միության Ամերիկայի Կենտրոնական Համաձայն-ժողովին:

Սկզբնական շրջանում ԱՄՆ-ի մասնաճյուղերի ցուցակներում «անգլիախոս» մասնաճյուղերը, որպես բացառություն, նշվում էին առանձին տողով: Սակայն, ամերիկահայերի մեջ ուժեղ թափով ընթացող մշակույթի փոփոխությունը անիմաստ էր դարձնում մասնաճյուղերի լեզվական տարբերակումը, եւ արդեն 1948թ. նպատակահարմար համարվեց նույն վայրում գործող մասնաճյուղերի միավորումը: Այդ քայլին առաջինը դիմեցին Նյու Յորքի մասնաճյուղը եւ Նյու Յորքի կենտրոնական շրջանի՝ Մանհեթենի անգլիախոս մասնաճյուղը, որոնք միավորվեցին 1948թ.: Այդուհետ, լեզվական տարբերության դեպքում, որպես բացառություն, կարելի էր նշել հենց «հայախոս» մասնաճյուղերը:

1948թ. Վ.Մալեզյանը, անդրադառնալով սփյուռքահայ երիտասարդության ազգային եւ սոցիալական ընդհանուր վիճակին, գրում էր.

«...նոր սերունդին տրուած միակողմանի, ընդհանրապէս օտարտի դաստիարակութիւնը մէկ կողմէն, եւ մասնատրապէս գաղութահայ կեանքը յատկանշող տեղական ու հատուածական պատակտումները, անհատում վէճերը, միւս կողմէ, իրենց դաժան հակազդեցութեամբը վհատեցուցած եւ հայ կեանքէն հեռացուցած են անոր ստուար մէկ մասը»:¹³⁰

Այդ առումով հարկ է նկատի առնել նաեւ հատկապէս ԱՄՆ-ում Երկրորդ Աշխարհամարտի տարիներին սկիզբ առած որոշ զարգացումները: Նացիստական Գերմանիայի գաղափարաբանությունն ու ազդեցիկ քաղաքականությունը վերստին խթանեցին ամերիկացիներին՝ անդրադառնալ սեփական արժեքների գնահատմանը, վերաիմաստավորել ազատության, հավասարության եւ ամերիկյան ժողովրդավարության հիմնարար այլ սկզբունքները: Այս ամենը անխուսափելի էր դարձնում անդրադարձը նաեւ իրենց, որպէս ամերիկացիների, ազգային ինքնությանը. հարց, որը միշտ էլ այժմեական է եղել ներգաղթողների այդ երկրի համար: Նույն այդ տարիներին The Common Council for American Unity (նախապէս՝ Foreign Language Information Service) ամերիկյան հեղինակավոր եւ ազդեցիկ կազմակերպությունը ահա այսպէս էր տեսնում իր հիմնական նպատակները.

«Օգնել ստեղծելու ամերիկյան ժողովրդի մեջ միասնություն եւ փոխադարձ հասկացողություն՝ շնորհիվ ընդհանուր քաղաքացիության, ընդհանուր հավատի, դեմոկրատիայի եւ ազատության գաղափարների հանդէպ, հասարակական բարիքի նախապատվությանը առանձին խմբերի շահերին, եւ բոլոր քաղաքացիների ընկալումը՝ թէ գործնականում եւ թէ օրենքով, որպէս ամերիկյան հասարակությունում հավասար գործընկերների, անկախ նրանց ազգային կամ ռասայական պատկանելությունից»: Հայտարարությունը կոչ էր անում արժեւորել յուրաքանչյուր խմբի ներդրումը, հանդուրժողաբար վերաբերել բազմակերպությանը, դարձնել ամերիկյան մշակույթը «իրապէս ներկայացուցչական» ողջ ժողովրդի համար, վերջ դնել ռասայական եւ էթնիկական նախապաշարումներին եւ օժանդակել ներգաղթողներին ու նրանց երեխաներին, որոնք դժվարությամբ են հարմարվում ամերիկյան կյանքին»:¹³¹

Նման, ըստ էության, պետական գաղափարախոսությունը, որը լրացնելու եկավ ԱՄՆ-ի եւ նրա դաշնակիցների հաղթանակը պատերազմում եւ ժողովրդի կենսամակարդակի աննախադեպ աճը հետպատերազմյան շրջանում, մեծ ոգեւորությամբ ընկալվեց ամերիկացիների կողմից եւ գերիշխող դարձավ նրանց հասարակական գիտակցության մեջ: Այն խիստ ոգեւորիչ էր նաեւ ազգային փոքրամասնությունների, ներառյալ ամերիկահայերի համար, որոնք այնքան կարոտ էին դառնալու

«Ամերիկյան երազանքի» իրականացման լիարժեք եւ իրավահավասար մասնակիցներից մեկը: Ամերիկահայերի պարագայում կարեւոր էր նաեւ այն հանգամանքը, որ 1940-ական թթ. վերջից կցանքի ասպարեզ էր մտնում նրանց այն սերունդը, որ մեծացել, կրթություն էր ստացել եւ, ընդհանրապէս, որպէս անհատ ձեւավորվել էր այդ երկրում եւ որի իղձն էր դառնալ «իսկական ամերիկացի»: Նման իրավիճակում բնական է, որ իրենց, որպէս հայերի ինքնագիտակցությունը, հատկապէս դրա իրական դրսեւորումներն ու արտահայտությունները պետք է նվազեին եւ ավելի հաճախ խորհրդանշական ձեւ ընդունեին: Ուստի եւ օրինաչափ է, որ ՀԲԸ Միության Կրտսերների Լիգա երիտասարդական կազմակերպության գործունեությունը աստիճանաբար սկսեց մարել:

Սփյուռքահայերի ավագ սերնդի համար այս ամենը որքան անցանկալի, նույնքան էլ անխուսափելի էր թվում: Ծատերի, բայց ոչ բողոքի, ու նախ եւ առաջ Ալեք Մանուկյանի համար, որը, ինչպէս նշվեց, ՀԲԸ Միության նախագահ էր ընտրվել 1953թ.:

Ալեք Մանուկյան

Ալեք Մանուկյանի դերը իր կարեւորությամբ ՀԲԸ Միության պատմության մեջ բացառիկ էր: Նա դեկավարեց այդ կազմակերպությունը շուրջ 36 տարի, եւ այդ ընթացքում Միությունը ունեցավ այնպիսի արդյունավետ գործունեություն, որ իր նշանակությամբ համեմատելի էր հենց Միության հիմնադրման հետ: Ա.Մանուկյանը ծնվել էր 1901թ. Իզմիրի շրջանի Քասապա գյուղաքաղաքում՝ հացահատիկի առեւտրով զբաղվող, հայ համայնքի հարգված առաջնորդներից մեկի՝ Թագվոր Մանուկյանի ընտանիքում: 1920թ. նա հետանում է Թուրքիայից եւ մեկնում ԱՄՆ՝ մի քանի տասնյակ դուլար գրպանում: Իր հետագա կյանքը այդ երկրում, կարծես, իրականացումն էր այն երազանքի, որը այդ երկիր էր բերում բազում մարդկանց: Սկսելով որպէս բանվոր՝ նա 1924թ. վերջնակաճապէս հաստատվում է Դետրոյթում եւ հինգ տարի աշխատում մեքենաշինական մի ընկերությունում: 1929թ., հակառակ երկրում տիրող տնտեսական խոր ճգնաժամին, Ա. Մանուկյանը հիմնում է ավտոմեքենաների բաղադրամասեր արտադրող «Մասքո» («Masco») ընկերությունը: Վերհիշելով այդ տարիները՝ նա ասում էր. «1936թ. վնասուեց գործարանս, որն այնքան դժուարությամբ եւ զրկանքներով ուտքի էի կանգնեցրել, գործի անկում եղաւ, մրցակցութիւն սկսուեց, շատ դժուար էր երկար ժամերով աշխատել: Երկու գործընկերներ ունէի, յետոյ նրանք հետացան ...Որոշ

ժամանակ անց ցանկացայ ընդարձակել գործս եւ մէկ միջոց ունէի՝ գործիս բաժնէթղթերը ծախել հանրութեան, եւ ես առաջին հայ արդիւնաբերողն եմ ԱՄՆ-ում, որ սակարանում (Detroit Stock Exchange) ծախեց մեծ քանակութեամբ արժէթղթեր: Տղաս ծնուեց, եւ ես այնքան էի գործով զբաղուած, որ նրան կարողացայ տեսնել շաբաթուայ վերջում, 6 օր անց: Ահա այդպիսի դաժան մրցակցութիւն էր շուրջս»: ¹³² Երկրորդ Աշխարհամարտի տարիներին, երբ «Մասքո»-ն նույնպէս ծառայեց երկրի պաշտպանունակության ամրացմանը, նրա արտադրանքի վաճառքի ծավալները առաջին անգամ գերազանցեցին մէկ միլիոն դոլարը: Սակայն ձեռնարկության պատմության մեջ շրջադարձային եղավ 1954թ., երբ սկսվեց սկզբունքորեն նոր տեսակի «Դելտա» միաթել ծորակների (Single Handle Fauset) արտադրությունը, որոնց վաճառքը ԱՄՆ-ում եւ ուրիշ շատ երկրներում ընկերությանը բերեց հարյուրավոր միլիոն դոլարի շահույթ: «Մասքո» ընկերության գործունեության ծավալները էլ ավելի ընդլայնվեցին, երբ 1972թ. նրա գործադիր նախագահ դարձավ Ա. Մանուկյանի որդին՝ Ռիչարդ Մանուկյանը: Մեկ տարի անց «Մասքո» ընկերությունը ընդգրկվեց աշխարհի ամենախոշոր՝ Նյու Յորքի բորսայի ցանկում: Այսօր Ա.Մանուկյանի հիմնած ընկերությունը ընդգրկված է «Fortune 500» ԱՄՆ-ի ամենախոշոր ձեռնարկությունների ցուցակում, նրա մոտ 250 ձեռնարկությունները գործում են տարբեր երկրներում, որոնց արտադրանքի վաճառքը տարեկան կազմում է շուրջ 7 միլիարդ դոլար:

«Մասքո» ընկերությունը ինքնին ուշագրավ երեւոյթ է սփյուռքի պատմության մեջ. այն հայի կողմից հիմնված առաջին արդյունաբերական ձեռնարկությունն էր, որը ստացավ համաշխարհային ճանաչում: Ամենակարեւորը, սակայն, այն է, որ ընկերության այդչափ մեծ հաջողություններն ու ստացած շահույթները հնարավորություն տվեցին նրա հիմնադրին՝ Ալեք Մանուկյանին, իրականացնել բազմապիսի հայանպաստ ծրագրեր: «Ինձի համար, - ասում էր նա, - ոեւէ անձնական յաջողութիւն կամ բարօրութիւն թունաւոր բան մը կ'ունենայ իր մէջ, երբ ազգը անկէ իր բաժինը չ'ստանայ»: ¹³³ Դեռեւս 1954թ. նա հիմնեց Ալեք եւ Մարի Մանուկեան հիմնադրամը, իսկ 1968թ. Ալեք Մանուկեան Մշակութային հիմնադրամը, որոնց շնորհիվ աշխարհի տարբեր երկրներում հիմնվեցին մի քանի տասնյակ հայկական դպրոցներ, մշակութային եւ երիտասարդական կենտրոններ, եկեղեցիներ, թանգարաններ, հայագիտական ամբիոններ ու կենտրոններ եւ այլն:

Իր նմանօրինակ գործունեությամբ նա վարակեց բազմաթիվ սփյուռքահայերի, որոնք, հետեւելով իրեն, նույնպէս հիմնեցին մնայուն հիմնադրամներ, որի շնորհիվ Միությունը ոչ միայն հաստատեց իր առաջատար

դիրքը սփյուռքում, այլև դասվեց ԱՄՆ-ի ամենախոշոր եւ արդյունավետ գործող բարեգործական կազմակերպությունների շարքը: Այդ եւն վկայում հետեւյալ թվերը: 1952թ., Ա.Մանուկյանի, որպես Միության նախագահ ընտրվելու նախօրեին, Միության հիմնադրամները թվով 95 էին՝ 7.400.000 դոլար ընդհանուր արժեքով: 1989թ., երբ նա հետացավ իր պաշտոնից, հիմնադրամների թիվը արդեն 465 էր, իսկ նրանց արժեքը՝ 98. 500.000 դոլար: Նույն այդ տարիների ընթացքում ՀԲԸ Միության դրամագույնը 8 միլիոնից անց մինչեւ ավելի քան 112 միլիոն, իսկ տարեկան բյուջեն՝ կես միլիոնից մինչեւ 17 միլիոն:¹³⁴

Տասնյակ տարիներ ապրելով ԱՄՆ-ում, աշխատանքի բերումով մշտապես շրջապատված ամերիկացիներով, որդեգրած լինելով ամերիկյան կենսաձեւն ու հիմնարար արժեքները՝ Ա.Մանուկյանը, այնուամենայնիվ, շարունակում էր մնալ իրական հայ մարդ: Դրա ապացույցներն էին նրա ընդգծված ազգային ինքնագիտակցությունը, հայերենին ազատ տիրապետելը, հայ պատմության եւ մշակույթի իմացությունը, մեծագույն հարգանքը հայ եկեղեցու հանդեպ եւ ուրիշ շատ հատկանիշներ: Նման մարդու ու գործչի համար ցավալի էր տեսնել ամերիկահայերի եւ հատկապես երիտասարդության օտարումը ազգային արժեքներից, նրանց այդչափ արագ եւ անդառնալի թվացող ամերիկանացումը: Նրա՝ որպես Դեմոկրատի մասնաճյուղի ատենապետի եւ Միության Կենտրոնական Վարչության անդամի փորձառությունը հուշում էր, որ ստեղծված անմխիթար վիճակում անհրաժեշտ է թե աշխուժացնել երիտասարդության հետ տարվող աշխատանքը եւ թե մշակել նոր գործելակերպ:

Արդեն 1957թ. ՀԲԸ Միության Ամերիկայի Պատգամավորական ժողովի որոշմամբ ստեղծվեց Երիտասարդական գործունեության հանձնախումբ, որը հիմնականում կազմված էր Միության երիտասարդ անդամներից: Հանձնախումբը՝ իր աշխատանքները արդյունավետ կազմակերպելու նպատակով, նախապես հատուկ հարցարան ուղարկեց Կրտսերների Լիգայի բոլոր մասնաճյուղերին, պարզելու առավել հետաքրքրություններ կայացնող ձեռնարկները: Դրան հետեւեցին երկու խորհրդակցական ժողովներ՝ Նյու Յորքում եւ Բոստոնում, որոնց արդյունքում էլ հստակեցվեց հետագա գործունեության ծրագիրը: Այդ ծրագրի հիմնական կետերն էին. «ա) տասը թատերախաղեր բազմագրուելով դրկուեցան Կրտսերներու մասնաճիւղերուն՝ իրենց գործածութեան համար, բ) կազմուեցաւ ծանօթ մտաւորականներէ տասը բանախօսներու ցանկ մը, որոնք արդէն սկսան Երիտ. խումբերու խօսիլ, գ) ծրագրուեցաւ երաժշտական մրցում մը, մեր նորահաս տաղանդները քաջալերելու նպատակով, դ) հայերէն գրքոյկներու եւ երգապնակներու ծրագիր մը մշակուեցաւ, մեր մանուկներ-

րուն հայեցի կրթութեան համար, ե) օրակարգի վրայ է նաեւ անգլիերէն պարբերաթերթ մը հրատարակելու գաղափարը»:¹³⁵

Շատերի, այդ թվում նաեւ Միության անդամների որոշ մասի կողմից այս ծրագիրը ընդունվեց թերահավատությամբ: Սակայն, Միության եւ նրա ամերիկյան մասնաճյուղերի ղեկավարության ջանքերի շնորհիվ այն շատ արագ սկսեց իրագործվել՝ մեծ աշխուժություն առաջացնելով երիտասարդության մեջ. «Ամերիկային մէջ Միութեանս Կրտսերաց Լիկաները հետզհետէ աւելի կը զօրանան եւ իրենց ընկերային զանազան գործունեութեանց մէջ շատ աւելի հետաքրքրութիւն ցոյց կուտան ազգային կեանքի հանդէպ եւ կը ջանան մօտէն տեղեակ մնալ մեր պատմութեան եւ մշակոյթին, ի հարկին անգլիերէն լեզուով նման նիւթերու շուրջ դասախօսութիւններ կազմակերպելով»:¹³⁶ Երիտասարդական հանձնախմբի գործունեության շնորհիվ հայերեն հրատարակվեց մանկական երգերի «Բուրաստան» գրքույկը, անցկացվեց երաժշտական մրցույթ, Նյու Յորքի FM ռադիոկայաններից մեկով շաբաթը մեկ անգամ սկսեց հետարձակվել 45 րոպե տևողությամբ Միության Ռատիօ-Ժամ հաղորդումը եւ, վերջապես, սկսվեց «Ararat» անգլիալեզու եռամսյա գրական հանդեսի հրատարակումը: «Ararat» հանդեսը, շնորհիվ հմուտ խմբագիրների եւ հատկապես Լեո Համալյանի, հրապարակած հոդվածների բազմազանության (արձակ եւ բանաստեղծություններ, հուշագրություններ, սրտամական, արվեստագիտական, գրախոսական եւ այլ նյութեր) եւ հեղինակների վարպետության, շատ շուտով դարձավ իր տեսակի մեջ ամենակարդացվող եւ հեղինակավոր հրատարակությունը սփյուռքի անգլիախոս ստիւար զանգվածի համար:

1966թ. Կրտսերների Լիգա կազմավորվեց նաեւ Նյու Յորքում, որի 120 անդամները բարձրագույն դպրոցի եւ քոլեջների ուսանողներ էին:¹³⁷ Ըստ էության, վերջին անգամ էր, որ Միության տեղեկագրերում հիշատակվում էր Կրտսերների կամ Երիտասարդական Լիգա կազմակերպության մասին: Տարիներ անց ՀԲԸ Միության Ամերիկայի Կենտրոնական Հանձնաժողովի 1975-1976թթ. տեղեկագրի անգլերեն տարբերակում, երիտասարդական գործունեությանը անդադարոնալիս, որպես այդպիսին նշվում է AGBU National Youth Association կազմակերպությունը: Իր հերթին, 1975թ. ընդհանուր տեղեկագրում, ԱՄՆ-ին նվիրված բաժնում, նույն այդ կազմակերպությունը կոչվում է «Հայ Երիտասարդաց Ընկերակցութիւն (ԷԸ. Ռայ. Էյ.)»: Անգլերեն հապավումից պարզ է դառնում, որ խոսքը նույն կազմակերպության մասին է, միայն թե անգլերեն տարբերակում «Հայ» բառը փոխարինվել էր «National» բառով:

Այն, որ անվանման փոփոխումը կատարվել էր տարիներ անց, իհարկե, չէր նշանակում, որ այդ ընթացքում Միության երիտասարդական զանազան միությունները դադարել էին գործելուց: Հակառակը, ամերիկահայ երիտասարդության գործունեությունը նույն այդ տարիներին դառնում է ավելի ու ավելի ծավալուն եւ տարարմույթ: Հենց այդ ժամանակահատվածին են վերաբերում Ալեք Մանուկյանի հետեւյալ խոսքերը ԱՄՆ-ի հայության մասին. «Կարելի չէ չսքանչանալ երիտասարդ սերունդի խանդավառութեան վրայ: Հայ մնալու փափագը այդ սերունդին մէջ ակներեւ է. հիներուն կը մնայ քաջալերել զայն, տալով անոր իր ժառանգութիւնով հպարտ զգալու միջոցներն ու աղբիւրները»:¹³⁸

Արեւելքից ներգաղթածների դերը

Հատկանշական է, որ Միության նախագահը այս խոսքերն ասաց 1963թ., Բեյրութում, Մերձավոր Արեւելքի երկրներ կատարած այցի ընթացքում: Ա.Մանուկյանին՝ ԱՄՆ-ում իր ծրագրերը իրականացնելու համար պետք էին ոչ միայն համախոհներ, այլեւ իրական գործընկերներ՝ կազմակերպիչներ, օգնականներ: Մարդիկ, որոնք ամերիկահայության մէջ ընթացող մշակութափոխման երեսուցների օրինաչափ բնույթը հասկանալով հանդերձ, այնուամենայնիվ, պատրաստ էին դիմակայել դրանց՝ յորաքանչյորը իր տեղում: Նման անհատներ, անշուշտ, կային նույն ԱՄՆ-ում: Ակնհայտ էր, սակայն, նաեւ այն, որ ազգային գործիչների՝ եկեղեցականների, մտավորականների, խմբագիրների, ուսուցիչների ճնշող մասը Արեւելքի երկրներից ներգաղթածներն էին: Եվ հենց նման մարդկանց հետ էր կապում իր հույսերը Ա.Մանուկյանը՝ ձգտելով նոր որակ հաղորդել Միության գործունեությանը ԱՄՆ-ում. «Ամերիկահայութիւնը իր ազգապահպանման գործը առաջ տանելու համար պետք ունի Միջին Արեւելքի օգնութեան»:¹³⁹

Որպես խնդրի արագ լուծման եղանակ, Ա.Մանուկյանը Միության պաշտոնեության շարքերը սկսեց աստիճանաբար համալրել Արեւելքի երկրներից ներգաղթած հայ երիտասարդներով, որոնցից ոմանք գալիս էին ԱՄՆ իր իսկ հրավերով: Դրան մեծապես նպաստեց 1965թ. ամերիկյան կառավարության ընդունած ներգաղթի մասին նոր օրենքը, որի համաձայն, մասնավորապես, այդ երկիր ներգաղթելու իրավունք էին ստանում այնպիսի հայաշատ երկրների քաղաքացիներ, ինչպես, օրինակ, Լիբանանը, Սիրիան, Եգիպտոսը, Հունաստանը: Դա սկիզբն էր այդ տարածաշրջանից դեպի ԱՄՆ ներգաղթի, որը առավել մեծ չափերի հասավ

1970-ական թթ.: որպես հետեւանք Լիբանանի քաղաքացիական պատերազմի, Իրանում իսլամական հեղափոխության եւ քաղաքական այլ դեպքերի:

Ներգաղթողների այս ալիքը սկզբունքորեն տարբերվում էր մինչ այդ ԱՄՆ եկած իրենց ազգակիցներից: Նրանք գալիս էին ոչ թե իրենց հայրենի երկրից, այլ ժամանակին իրենց ապաստան տված տարբեր երկրներից: Գալիս էին ոչ թե որպես ընչազուրկ գաղթականներ, այլ որպես որոշակի ունեցվածքի եւ մասնագիտությունների տեր մարդիկ, որոնք բավական արագ եւ հաջողությամբ էին հարմարվում սոցիալ-մշակութային նոր միջավայրին: Այնուամենայնիվ, նրանց մի մասը սկզբնական շրջանում կարիք ուներ օժանդակության, որը եւ ապահովեցին հայկական եւ ամերիկյան կազմակերպությունները: ՀԲԸ Միությունը 1970-ական թթ. այդ նպատակով հիմնեց հատուկ Սոցիալական (Ընկերային) ծառայության բաժանմունքներ երկրի այն քաղաքներում, ուր հաստատվել էր ներգաղթողների հիմնական զանգվածը՝ Նյու Յորքում, Ուոթերթաունում եւ Լոս Անջելեսում: Այս բաժանմունքների կամ կենտրոնների մատուցած հիմնական ծառայություններն էին՝ աշխատանքի եւ բնակարանի հայթայթում, անգլերենի ուսուցում, իրավաբանական խորհրդատվություն եւ բժշկական խնամք: Միության այս կենտրոնների, որոնք քաջալերվում եւ օժանդակվում էին նաեւ պետության կողմից (օրինակ, 1978թ. Լոս Անջելեսի կենտրոնին քաղաքի իշխանությունները հատկացրել էին 66 հազ. դոլար¹⁴⁰), անհրաժեշտության մասին է վկայում նրանց դիմողների քանակը. 1984թ. միայն Նյու Յորքում ավելի քան 800 մարդ:¹⁴¹

Այս ամենի հետ մեկտեղ, կար մեկ կարեւոր հանգամանք եւս. ներգաղթողները, ընդհանուր առմամբ, անհամեմատելի էին «բնիկ» ամերիկահայերի հետ իրենց ազգային դիմագծով: Եվ դա գիտակցում էին իրենք՝ ամերիկահայերը: Վերապատվելի Կ.Չոպուրյանը ներգաղթած հայերին ուղղած իր «Բաց նամակում» գրում էր. «Ծատ հավանական է, որ ամերիկահայերի մոտ դուք չեք գտնի այն ուժեղ հայրենասիրական վերաբերմունքը հայկական խնդիրների հանդեպ, որը ունեք դուք եւ կքննադատեք նրանց»:¹⁴² Այս եւ նման կանխատեսումները արդարացվեցին լիովին: Սակայն, Արեւելքի երկրներից եկածները չբավարարվեցին գոտ բնահատությամբ, այլ սկզբից եւեթ աշխույժ գործունեություն ծավալեցին ազգային տարբեր կազմակերպություններում եւ անհրաժեշտության դեպքում ստեղծեցին նորերը:

Ներգաղթողների թվում էին, բնականաբար, նաեւ ՀԲԸ Միության անդամներ, որոնք, վերահաստատելով իրենց անդամակցությունը Միության ամերիկյան մասնաճյուղերում, մեծապես նպաստեցին նրա գործու-

նեության ծավալմանը: Ժամանակի ընթացքում նրանցից ոմանք աչքի ընկան մեծագույնար նվիրատվություններով, իսկ ոմանք էլ դարձան Միության տարբեր մակարդակի ղեկավար մարմինների անդամներ: Որպես օրինակ, նշեմ մի քանիսին այդ ստվար զանգվածից. Միության ընդհանուր տնօրեններ՝ Գ.Կիրակոսյան և Միսակ Հայկենց, «Յուզարար - Միութիւն» ամսագրի բազմամյա խմբագիր Անդրանիկ Փոլադյան, Կենտրոնական Վարչության անդամներ Նազար Նազարյան, Ալեք Մանուկեան Մշակութային Հիմնադրամի գործադիր տնօրեն Երվանդ Ազատյան, վերջ հիշատակված Ալլաեր Պոլադյանը և շատ ուրիշներ:

Լիբանանում, Սիրիայում և Եգիպտոսում նրանք իրենց անմիջական մասնակցությունն էին բերել նաև Միության երիտասարդական շարժմանը: Ուստի, բնական է, որ ամերիկահայ երիտասարդության հետ միասնաբար նրանք վերակազմակերպեցին նաև եղած միավորների աշխատանքը և կոչեցին դրանք իրենց համար այդչափ հարազատ Հայ Երիտասարդաց Ընկերակցություն անունով:

Մարզական և մշակութային ծրագրեր

1978թ. Հայ Երիտասարդաց Ընկերակցությունը մասնաճյուղեր ուներ Նյու Յորքում, Նյու Ջերսիում, Ֆիլադելֆիայում, Ռիչմոնդում, Բոստոնում, Դետրոյթում, Չիկագոյում, Կալիֆորնիայում (դեռևս 1969թ.) Լոս Անջելեսում, Ֆրեզնոյում, Պասադենայում և Գլենդեյլում: Սկզբից եւեթ նրանք գործեցին տարբեր ուղղություններով. կազմակերպեցին հանգստանակություն հոգուտ Լիբանանի հայության, օժանդակեցին Միության Ընկերային ծառայության բաժանմունքներին: Նյու Յորքում ՀԵԸ-ը, բացի շաբաթական հավաքույթներից, կազմակերպեց պարահանդեսներ, որոնցից յուրաքանչյուրին մասնակցեցին ավելի քան 600 երիտասարդներ,¹⁴³ իսկ Ֆրեզնոյում և Բոստոնում՝ հայկական արվեստների փառատոներ: Այդ տարիներին ՀԲԸ Միության Ընդհանուր ժողովներին առընթեր տեղի էին ունենում նաև ՀԵ Ընկերակցության համագումարները:¹⁴⁴

Միության երիտասարդական կազմակերպությունների երկարատև աշխույժ գործունեությունը սպորտի բնագավառում հնարավոր դարձրեց Միության Հյուսիսային Ամերիկայի Առաջին Օլիմպիական խաղերի անցկացումը: Խաղերը, որոնց մասնակիցներն էին ԱՄՆ-ի և Կանադայի տարբեր քաղաքներից ժամանած 300 մարզիկ-մարզուհիներ, տեղի ունեցան 1982թ. հունիսին Տորոնտոյում Ամերիկայի Կենտրոնական Հանձնաժողովի 68-րդ պատգամավորական ժողովի օրերին: Առաջին Օլիմպիա-

կան խաղերի հաջողությունը այնչափ տպավորիչ էր, որ որոշվեց այն դարձնել ամենամյա: Հաջորդ տարիներին Միության Հյուսիսային Ամերիկայի Օլիմպիական խաղերը կազմակերպվեցին Դետրոյթում, Բոստոնում, Մոնրեալում, Լոս Անջելեսում, Տորոնտոյում, Մայամիում և այլուր: Այս խաղերի հաջողության մասին էր վկայում նրանց մասնակիցների թվի մշտական աճը: 1984թ. Բոստոնում կայացած Երրորդ խաղերին մասնակցեցին արդեն ավելի քան 600 երիտասարդներ, մեկ տարի անց՝ Մոնրեալում նրանց թիվը հասավ 750-ի: Այս թիվը գրեթե կրկնապատկվեց Հինգերորդ խաղերի ժամանակ (1986թ., Լոս Անջելես), որին մասնակցեցին ավելի քան 1.300 մարզիկներ ԱՄՆ-ից, Կանադայից, Լիբանանից, Գերմանիայից և Անգլիայից: Մարզիկների և շուրջ 10.000 հանդիսատեսների համար ոգեարիչ պահերից էր փակման արարողությունը, երբ նրանց ողջույնի խոսքով դիմեցին Կալիֆորնիայի նահանգապետ Ջորջ Թյուքմեճյանը, Միության նախագահ Ալեք Մանուկյանը և Հայաստանից հրավիրված աշխարհահռչակ ծանրամարտիկ Յուրի Վարդանյանը: Դրա հետ մեկտեղ ԱՄՆ-ում և Եվրոպայի երկրներում (Ֆրանսիայում, Բելգիայում և այլուր) անցկացվեցին ավանդական դարձած Միության համասփյուռքյան և տարածաշրջանային Նավասարդյան մարզական խաղերը:

Ամերիկահայերի կրտսեր սերնդին հայ ազգային արժեքներին հարողակից դարձնելու առումով հատկապես հարկ է նշել 1964թ. գործող Քեմպ Նուպարը՝ ԱՄՆ-ում Միության առաջին աշակերտական ամսուային ճամբարը, որ նախատեսված է 8-15 տարեկան երկսեռ երեխաների համար: 1967թ. այս ճամբարի համար գնվեց մեծ տարածք Անդերսոն (Քեցքիլ), Նյու Յորքից երեք ժամ հեռավորության վրա: Յուրաքանչյուր ամսո ճամբար հանգստի են գալիս ավելի քան 250 երեխաներ, որոնց համար դա եզակի հնարավորություն է շփվել ազգակից հասակակիցների հետ, ապրել հայաշունչ հավաքական կյանքով: Մեծի մասամբ ամերիկածին այս երեխաներից շատերը Քեմպ Նուպարում է, որ առաջին անգամ ծանոթանում են հայ գրին ու խոսքին, հայ երգին ու պարին: Այստեղ ստեղծված են բոլոր հարմարությունները տարբեր մարզախաղերի համար՝ բասկետբոլ, բեյսբոլ, ձիավարժություն, լող և այլն: 1985թ. ամսանը Քեմպ Նուպարում կազմակերպվեց ՀԲԸ Միության Հյուսիսային Ամերիկայի Սկաուտական առաջին բանակումը, որի մասնակիցներն էին տարբեր քաղաքներ ներկայացնող 150 արիներ և արեճուշներ:

1997թ. ճամբարը հիմնովին վերանորոգվեց, և կառուցվեց Նազարեան Կեդրոնի երկհարկանի շենքը: Ծամբարի վերանորոգումը հնարավոր դարձավ հանգուցյալ Ալեք Մանուկյանի նախապես տրամադրած 400.000 դոլարով, իսկ այնուհետև՝ Միության Կենտրոնական Վարչա-

կան ժողովի փոխնախագահ Նազար Նազարյանի նվիրաբերած 500.000 դոլարի շնորհիվ: Հարկ է նշել, որ Ն.Նազարյանի եւ իր եղբայրներ՝ Կարախիսի եւ Նուպարի բարերարությամբ «...վարժարան եւ կեդրոններ կառուցուեցան Պեյրոսի, Պուէնոս Այրէսի, Սեւեղ Բրուքի (Նիւ Ծըրզի) ու Գանոկա Փարքի մէջ, Գալիֆորնիա: ...Նազար եւ Արտեմիս Նազարեաններ \$600.000 նուիրեցին Մայր Աթոռ Ս.Էջմիածնին, Երեւանի մէջ կառուցուող Ա.Գրիգոր Լուսաւորիչ Մայր Տաճարի Տրդատայ Մատուռին կնքահայրութիւնը ստանձնելով»:¹⁴⁵

1969թ. բացվեց Միության երկրորդ ամառային ճամբարը ԱՄՆ-ում Քէմպ Արարատը, Միջիգան նահանգում, ուր առաջին տարում իրենց ամառը անցկացրին 122 երեխա: Այս ճամբարը գործեց մինչեւ 1977թ.:

Ամերիկահայ երիտասարդության ազգային ինքնության պահպանման առումով կարեւոր էր գեղարվեստական զանազան խմբերի աշխույժ գործունեությունը: 1969թ. կազմավորվեցին Անդրանիկ (Նյու Յորք), Վահագն (Դետրոյթ), Արարատ (Ֆիլադելֆիա), իսկ մի քանի տարի անց՝ Տարոն (Բոստոն), Սարդարապատ (Լոս Անջելես), Սեւակ (Ռիչմոնդ) երգիչների երիտասարդական խմբեր: Այս, ինչպես նաեւ ԱՄՆ ներգաղթած հանրաճանաչ Համբարձում Պերպերյանի ղեկավարած Քնար (Ուոթերթաուն) եւ Հայաստան երգչախմբերի (Նյու Յորք) ելույթները ԱՄՆ-ի տարբեր քաղաքներում անցնում էին աննախադեպ հաջողությամբ եւ մեծ խանդավառություն էին առաջացնում ամերիկահայ տարբեր սերունդների մէջ: Այս առումով հատկապես մեծ արձագանք ունեցան Անդրանիկ պարախմբի (որը ուներ արդեն 100 անդամ) ելույթները Նյու Յորքի հանրաճանաչ Կարնեգի Հոլլ (1969թ.) եւ Լինքոլն Սենթեր (1980, 1990 եւ 1993թթ.) համերգասրահներում: Պարախմբի պատմության մէջ կարեւոր իրադարձություններից էին նաեւ նրա հյուրախաղերը Հայաստանում 1989 եւ 1990թթ.: 1970-ական թթ. կազմավորվեցին Բոստոնում՝ Յակոբ Պարոնեան, Նյու Յորքում՝ Արտաշատ, Ֆրեզնոյում՝ Ադամեան, Լոս Անջելեսում՝ Արտավազդ, Ֆիլադելֆիայում՝ Ռիլլամ Սարոյեան, Նյու Յորք- Նյու Ջերսիում Արտաշատ եւ այլ թատերախմբերը:

Այդ տարիներին կազմակերպված բազմաթիվ մշակութային միջոցառումներից հիշատակության են արժանի նաեւ գեղանկարչական ցուցահանդեսները: 1978թ. փետրվարին Նյու Յորքում Միությունը կազմակերպեց առաջին մեծ ցուցահանդես-վաճառքը, որին ներկայացված էին 17 ամերիկահայ նկարիչների գործերը, Լեոն Ժամկոչյանի նկարների, հնագույն ժամանակների հայկական մետաղային արվեստի Փոլ Պոուկյանի հավաքածուն եւ այլն: Աննախադեպ էր 1978թ. ՀԲԸ Միության եւ փարիզաբնակ հայտնի արվեստաբան Կարիկ Պասմաճյանի նախաձեռ-

նությամբ կազմակերպված Խորհրդային Հայաստանի ժամանակակից նկարիչների գործերի ցուցահանդես-վաճառքը: Մեծ հաջողություն ունեցավ նաեւ Միության Սեդլ Բրուկի կենտրոնում կազմակերպած Art Expo՝ 82 ցուցահանդեսը, ուր ներկայացված էին Եվրոպայում եւ Կանադայում բնակվող հանրաճանաչ արվեստագետներ՝ Գառզոյի, Ժանսեմի, Արտո Չաքմաքչյանի, Ռիշար Ժերանյանի, Ժան Գազազյանի եւ այլոց գործերը, որոնք մինչ այդ անձանոթ էին ամերիկահայերին: ԱՄՆ-ի արեւմտյան ափում՝ Ֆրեզնոյում 1978թ. սկսած տեղի ՀԵ Ընկերակցությունը կազմակերպում է կենտրոնական Կալիֆորնիայի Հայ արվեստի փառատոներ, ուր ներկայացվում են ամերիկահայ հեղինակների նկարչական, երաժշտական, գրական, լուսանկարչական եւ այլ գործերը:

Նյու Յորքում ՀԲԸ Միության աշխատանքների աշխուժացմանը մեծ չափով նպաստեց Մանհեթենում հինգհարկանի շենքի գնումը, որի բացումը տեղի ունեցավ 1964թ. դեկտեմբերին: Այստեղ տեղափոխվեցին ՀԲԸ Միության կենտրոնական վարչությունը եւ ԱՄՆ-ի կենտրոնական Հանձնաժողովի գրասենյակներն ու գրադարանը: Բացի այդ, շենքի հարմարությունները հնարավորություն տվեցին կազմակերպել զանազան դասախոսություններ, հավաքույթներ, ցուցահանդեսներ, հայոց լեզվի եւ պատմության դասընթացներ եւ այլն: Հենց այս շենքում 1968թ. Միությունը հյուրընկալեց ԱՄՆ առաջին անգամ ժամանած Ամենայն Հայոց կաթողիկոս Վազգեն Ա-ին եւ կոմսոզիտոր Արամ Խաչատրյանին: 1973թ. ՀԲԸ Միության այդ գույգ կենտրոնները ժամանակավորապես տեղափոխվեցին Հյուսիսային Ամերիկայի Արեւելյան թեմի Առաջնորդարանի Նյու Յորքի համալիրի մաս կազմող Կիլլասի Կիլպէնկետն շենքը: 1980թ. Միությունը ընդարձակ կալվածք գնեց Նյու Յորքին շատ մոտ գտնվող Սեդլ Բրուկում (Նյու Ջերսի): Բացի գրասենյակներից, այն օժտված էր տարբեր այլ հարմարություններով (մեծ թվով սրահներ, բեմ, արդիական խոհանոց եւ այլն), ինչի շնորհիվ էլ դարձավ Նյու Յորք - Նյու Ջերսիի շրջանի հայության մշակութային եւ ընկերային կյանքի կարեւոր կենտրոններից մեկը: Սակայն 1992թ. ՀԲԸ Միության ղեկավարությունը նպատակահարմար համարեց հրաժարվել այդ կալվածքից եւ վերստին հաստատվեց Նյու Յորքում:

Կրթական ծրագրերը. ամերիկահայերի արձագանքը

Ա.Մանուկյանի գլխավոր նպատակն էր հատկապես ամենօրյա հայկական դպրոցների հիմնումը ԱՄՆ-ում: Միեւնոյն ժամանակ, նա, երեւի

թե, առավել քան որեւէ մեկը, գիտակցում էր, որ ՀԲԸ Միությունը դեռ պատրաստ չէր դրան: Անհրաժեշտ էր մեծ եւ բարդ նախապատրաստական աշխատանք՝ միջոցների հայթայթում, որակյալ ուսուցչական կազմի ձեւավորում, բավարար թվով աշակերտների առկայություն, հայագիտական ծրագրերի ու դասագրքերի մշակում եւ այլն: Բայց այս ամենը ժամանակ էր պահանջում, իսկ մինչ այդ Միությունը 1954թ. սկսեց նպաստներ հատկացնել ԱՄՆ-ի տարբեր քաղաքներում արդեն գործող միօրյա հայկական վարժարաններին: Առաջին դրամական նպաստները հատկացվեցին Էզբերի Պարքի, Թրոյի, Բրոնքսի եւ այլ դպրոցներին: Հարկ է նշել, որ նույնիսկ նման, համեմատաբար ոչ մեծ գումարների հատկացումը կապված էր դժվարությունների հետ, քանզի այդ պահին Միությանը նվիրաբերած գումարները նախատեսված չէին ամերիկահայ դպրոցների համար: Որպես հարցի ժամանակավոր լուծում, որոշվեց միօրյա դպրոցներին հատկացնել «իոխան ծաղկեպսակի» ստացված գումարները:¹⁴⁶ Հետագա տարիներին հնարավոր դարձավ նպաստներ հատկացնել մի շարք քաղաքներում՝ Լինոն, Ուստրոն, Փրոյիդենսում, Դետրոյթում, Լոս Անջելեսում, Բոստոնում եւ այլն գործող միօրյա եւ ամենօրյա ազգային դպրոցներին: Միությունը սահմանեց նաեւ դպրոցական մրցանակներ եւ հոգաց տկարակազմ աշակերտների օդափոխության ծախսերի որոշ մասը:

Բացի այդ, Միությունը որոշ քաղաքներում սկսեց հիմնել սեփական միօրյա վարժարաններ: Այսօր շաբաթօրյա դպրոցներ են գործում Կոսա Մեսայում (Կալիֆորնիա), Կլիվլենդում, ինչպես նաեւ Չիկագոյում Միությանն նորակառույց կենտրոնում հաստատված Սիսակ Վարժապետեան վարժարանը:

Ամերիկահայերի պատմության մեջ ամենակարեւոր տարեթվերից են 1964 եւ 1965 տարիները, երբ Մեծ Լոս Անջելեսում՝ Էնսինոյում եւ Մոնտեբելոյում բացվեցին առաջին հայկական ամենօրյա դպրոցները ԱՄՆ-ում՝ Ֆերահեան եւ Մեսրոպեան վարժարանները: Դրանով իսկ սկիզբ առավ որակապես նոր փուլը ամերիկահայերի ազգամշակութային գործունեության մեջ: Այդուհետ տարբեր ազգային կազմակերպություններ եւ անհատ մարդիկ, ավելի մեծ եռանդով եւ հաստատակամությամբ ձեռնամուխ եղան հայկական ամենօրյա դպրոցների հիմնադրմանը:

1967թ. դեկտեմբերին Նյու Յորքում գումարվեց ՀԲԸ Միության հերթական 54-րդ Ընդհանուր ժողովը, ուր նախագահ Ա.Մանուկյանը հանդես եկավ մի ելույթով, որը ծրագրային նշանակություն ունեցավ Միության հետագա ողջ գործունեության համար: «Ի՞նչ ապագայ կը տպասէ Ամերիկայի եւ Եվրոպայի վաղուսան հայութեան: Մեծ եղեռնի վաղորդայինն այս

երկրամասերը ապաստան գտնող անձերուն հետզհետեւ անհետացումէն վերջ, ապագային ի՞նչ դիմագիծ պիտի ներկայացնեն հոն մեր համայնքները»,- հարց էր տալիս նա եւ պարզաբանում. «Բնաշխարհի այդ մնացորդներուն զաւակները գիտե՞նք թէ որոշ չափով իրենց ծնողներուն ազդեցութիւնը կը կրեն դեռ, եւ եթէ շատերը իրենց մայրենի լեզուն կ'անգիտանան, կը սիրեն հայ եկեղեցին եւ որոշ չափով կը պահեն իրենց ընտանեկան բարքերն ու արանդութիւնները: Բայց անոնք իրենց կարգին ծնողքներ են արդէն եւ անջրպետը սահմուկեցուցիչ կերպով լայն բացուած է անոնց զաւակներուն ու թոռներուն եւ հայութեան ինքնութիւնը յատկանշող ու պահպանող տարրերուն միջեւ: Այս զոյգ երկրամասերուն մէջ ունինք կէս միլիոնի մօտ ազգակիցներ եւ եթէ անոնց համար հայ անունը աննշան բառ մը պիտի դառնայ օր մը, հաւատարիմ, պարտաճանաչ ամերիկացիներ, ֆրանսացիներ, իտալացիներ, ելն. ըլլալով մէկտեղ, հայութեան հայրենիքը անտարբեր պիտի թողու զիրենք, անոր գոյութեամբ ու վերելքով հպարտ պիտի չզգան իրենք զիրենք եւ ոչ մէկ ներշնչում պիտի կրեն անկէ, ազգին համար ամէնէն եղերական կորուստը պիտի ըլլայ ասիկա»:

Իրադրության նման սթափ եւ իրապաշտ գնահատումից հետո Ա.Մանուկյանը, իրեն հատուկ ոճով առաջարկում էր հարցի արմատական լուծումը. «Որքան ահեղ ալ ըլլայ միջավայրին, մթնոլորտին ճնշումը Ամերիկայի ու Եվրոպայի մէջ, հաստատ համոզումս է թէ պետք է գործել... կը խորհիմ որ պետք է Ամերիկայի մէջ ամէնօրեայ հայ դպրոցներ ունենանք: Արդէն կան մէկ երկու հատ եւ հարկ է զանոնք շատցնենք: ...Այս հանդիսաւոր պահուն կը յայտարարեմ որ մեր Միութիւնը սիրով պիտի գործակցի ազգային իշխանութեան, զանազան կազմակերպուած հիմնադրամներու վարչութեանց հետ՝ այդ նուիրական նպատակին իրագործման համար»:¹⁴⁷

Կարելի էր ենթադրել, որ նախագահի նման հայտարարությանը անմիջապես կհետեւեն գործնական քայլեր, բայց անցնում է մեկ տարի եւ հաջորդ Ընդհանուր ժողովում նա նորից վերադառնում է այդ հարցին, մեկ անգամ եւս փաստարկելով ամենօրյա հայկական դպրոցի անհրաժեշտությունը: Անկասկած, Ա.Մանուկյանը ամենից լավ գիտեր, թե որքան դժվար է լինելու հաղթահարել ամերիկահայերի մի զգալի հատվածի մերժողական, բացասական վերաբերմունքը ազգային կրթության, ազգային դպրոցների հանդեպ ընդհանրապես:

Նման վերաբերմունքը հատուկ ուսումնասիրել է ամերիկահայ սոցիոլոգ Էնի Բակայանը: Իր արժեքավոր գրքում, հենվելով «խորհրդանշական էթնիկություն» (symbolic ethnicity) տեսության վրա, նա բացահայտում է վերլուծում է ամերիկահայերի ազգային ինքնագիտակցության

որոշակի առանձնահատկությունները:¹⁴⁸ Է.Բակալյանը նշում է, որ ի տարբերություն Արեւելքի երկրների, ԱՄՆ-ում ներգաղթողների ազգային պատկանելության եւ դրա արտահայտման կերպն ու ժամանակը՝ նրանցից յուրաքանչյուրի համար անձնական եւ կամավոր ընտրության հարց է: Եվ քանի որ այդ երկրում նրանց կյանքի գերակայող նպատակը, շարժիչ ուժը՝ սոցիալ-տնտեսական հաջողությունն է («ամերիկյան երազանքը»)՝ անհատապաշտության հետ մեկտեղ, ապա ազգայինը պահպանվում է այնքանով, որքանով չի հակասում նույն այդ նպատակին: Նման պայմաններում ազգայինը շատ հաճախ դուրս է մղվում նրանց առօրյա կյանքից եւ ընդունում է իրենց նախնիների, ազգային արմատների հանդեպ խորհրդանշական պարտավորության ձեւ: Դա նկատելի է ամենատարբեր ասպարեզներում, սակայն, առավել ցայտուն է դրսևորվում հայերեն լեզվի, ազգային կրթության պարագայում: «Հայերեն սովորելը ծանր գործ է», «ազգային դպրոցները չափից ավելի ազգային են, սահմանափակ եւ մեկուսացված», «չեմ հավատում ջոկողությանը (սեզրեզացիա), նույնիսկ եթե դա արվում է հանուն բարի նպատակի՝ հայերեն լեզու սովորելու», «ցանկանում եմ, որ երեխաներս սովորելիս շփվեն տարբեր ազգության աշակերտների հետ»՝ ահա այսպիսին էր եւ է ամերիկահայերի ճնշող մասի վերաբերմունքը հայկական դպրոցների հարցում:¹⁴⁹

Ազգամշակութային նման մթնոլորտում Միության նախագահից պահանջվում էր մեծ համառություն, վճռականություն իր գաղափարը իրականացնելու համար: Տիրող տրամադրությունները («...վճռած ենք հուսանքին դեմ իսկ թիավարելով դեպի մեր նպատակակետը երթալ»), գիտակցելով հանդերձ, նա այնուամենայնիվ, ազգային ինքնության պահպանման երաշխիքը տեսնում էր հայոց լեզվի մեջ. «...կարելի՞ է կ'ըսես, նույնիսկ հոս, որպէս ճշմարիտ ամերիկացի ապրելով եւ գործելով մեկտեղ, պահել մեր հայու հոգին, մեր աւանդութիւնները, ինքզինքնիս կապուած զգալ մեր ազգակիցներուն ովկիանոսներէն անդին, եւ հոգեկան սնունդ, ներշնչում ստանալ տոհմային կեանքի յաւերժական աղբիւրներէն. այսինքն մեր վերածնած հայրենիքէն, մեր եկեղեցիէն, մեր պատմութենէն, մեր մշակոյթէն: Այո, կարելի է, երբ ունինք այդ ամէնուն հրաշագործ ոսկի բանալին, հայ լեզուն: Սակայն, աւաղ, յայտնի իրողութիւն մըն է թէ այսօր ամերիկահայ նոր սերունդին մէջ իրենց մայրենի լեզուն նույնիսկ շատ անկատար կերպով խօսողները մասի վրայ կը համրուին: Պարագան նույնն է եվրոպական երկիրներու մէջ հասակ նետող երիտասարդութեան համար»:¹⁵⁰

Սակայն նույնիսկ այն ծնողները, որ դեմ չէին իրենց զավակներին ուղարկել հայկական ամենօրյա դպրոց, մտավախություն ունեին դրանց

կրթական մակարդակի վերաբերյալ: Միության նախագահը վստահեցնում էր. «...մեր հաստատուելիք դպրոցները ամբողջությամբ ու անթերի կերպով պիտի գործադրեն իրենց աստիճանին համապատասխան ամերիկեան վարժարաններու ծրագիրը, եւ հետեւաբար մեր տղաքը իրենց բնական շրջավայրէն զրկելու, երկրին կրթական դրութեան պահանջներէն շեղեցնելու կամ անոնց անգլիերէն լեզուին տիրապետումին խոչընդոտներ ստեղծելու խնդիր չկայ բնաւ: Ամերիկեան վարժարաններու ուսմանց առարկաներէն ոչ մէկը անտես պիտի առնուի եւ անոնց վրայ պիտի պատրաստուին հայերէնը, ազգային պատմութիւնը եւ անհրաժեշտ նկատուած տոհմային ուրիշ ուսումներ»:¹⁵¹

Բայց կար եւս մեկ բոլորովին այլ բնույթի խնդիր՝ կապված դպրոցների հիմնադրման եւ գործունեության համար անհրաժեշտ դրամական միջոցների հետ: Այստեղ հարկ է հատուկ ընդգծել, որ Միության նախագահի ծրագրերը շատ ավելի ընդարձակ էին եւ մեծ գումարներ էին պահանջում: Եվ քանի որ տվյալ դեպքում խնդրո առարկա էր դարձել ամերիկահայ դպրոցը, ապա որոշվեց նյութական միջոցների հարցը հանձնարարել ՀԲԸ Միության Ամերիկայի Կենտրոնական Հանձնաժողովին: Հանձնաժողովը հարցը քննելուց հետո որոշում է ամենօրյա հայկական դպրոցներ հիմնել ոչ միայն ԱՄՆ-ում, այլեւ Կանադայում, եւ այդ նպատակով ձեռնարկում է հանգանակություն՝ երկու միլիոն դոլարի նշանակետով: Այս պատասխանատու եւ դժվարին գործի ղեկավարումը Ա.Մանուկյանի առաջարկությամբ հանձնարարվեց Միության ակամավոր գործիչ, հայտնի բարերար Էդուարդ Մարտիկյանին, որը մեկ տարի անց (1970) ընտրվեց ԱՄՆ-ի ՀԲԸ Միության Կենտրոնական Հանձնաժողովի նախագահ: Նրա նախագահության երկար շրջանը՝ շուրջ 15 տարի, նշանավորվեց ԱՄՆ-ի բոլոր մասնաճյուղերի արդյունավետ եւ աշխույժ գործունեությամբ:

Վարժարաններ ԱՄՆ-ում

1969թ. սեպտեմբերին, Դետրոյթի մոտակայքում Սաութֆիլդում բացվեց ԱՄՆ-ում ՀԲԸ Միության առաջին ամենօրյա դպրոցը, որը մեկ տարի անց կոչվեց Ալեք Մանուկեան, իսկ ավելի ուշ՝ Ալեք եւ Մարի Մանուկեան վարժարան: Դետրոյթի ընտրությունը պատահական չէր. այն Ա.Մանուկյանի հարազատ քաղաքն էր, ուր նա ընտանիքով ապրում եւ աշխատում էր արդեն երկար տարիներ: Դպրոցի հիմնումը այդ քաղաքում պետք է երաշխավորեր Միության նախագահի մշտական հոգածությունը նրա կարիքների մասին, առավել վստահություն ներշնչեր նրա ապագա-

յի վերաբերյալ: Առաջին տարում վարժարանը ուներ միայն մանկապարտեզ՝ 10 աշակերտներով և 2 վկայյալ ուսուցչուհիներ: Բայց ընդամենը չորս տարի անց՝ 1973-74 ուսումնական տարում աշակերտների թիվը հասավ 153-ի և դպրոցը ունեցավ երկրորդական բաժնի առաջին դասարանը: Դպրոցի շենքը, որը կառուցվել էր Ա.Մանուկյանի նվիրատվությամբ, օժտված էր անհրաժեշտ բոլոր պայմաններով, և յուրաքանչյուր 15-16 աշակերտի դիմաց կար մեկ ուսուցիչ: Դպրոցում գործում էին երգչախումբ, պարախումբ, նվագախումբ, հրատարակվում էին «Էրեբունի» ամսաթերթը և «Vision» («Տեսիլք») տարեգիրքը: Ինչպես և ԱՄՆ-ի բոլոր այլ ազգային դպրոցները, այստեղ նույնպես կիրառվում էին նահանգի կողմից վավերացված կրթական ծրագրերը, որոնց զուգահեռ դասավանդվում էին նաև հայագիտական առարկաներ (հայոց լեզու, պատմություն և կրոն): Այս ամենի շնորհիվ Ալեք Մանուկեան երկրորդական վարժարանը պաշտոնապես ճանաչվեց Միջիգան նահանգի կրթական բաժանմունքի, Անկախ դպրոցների ընկերակցության և ամերիկյան այլ մասնագիտացված կազմակերպությունների կողմից: 1978թ. դպրոցը տվեց առաջին՝ թվով 10 շրջանավարտները, որոնք շարունակեցին իրենց ուսումը տարբեր համալսարաններում: Նույն 1978թ. դպրոցը դարձավ լրիվ երկրորդական՝ մանկապարտեզից մինչև 12-րդ դասարան, որոնցում աշակերտում էին 200 երեխա:¹⁵² Ծնորհիվ վարժարանի կրթական բարձր մակարդակի (դրա վկայությունն են նրա սաների մեծ հաջողությունները նահանգային և համաամերիկյան դպրոցական մրցույթներին) նկատվում է աշակերտների մշտական աճ՝ 2003թ. սաների թիվն էր 375:

Ուշագրավ է, ի դեպ, որ Ալեք և Մարի Մանուկեան վարժարանը մաս է կազմում Սատթֆիլդում տեղակայված լայնատարած կենտրոնի, որը ընդգրկում է նաև Ա.Հովհաննես եկեղեցին, Մանուկեան Հանգստեան Տունը և Ալեք և Մարի Մանուկեան թանգարանը: Այս կենտրոնի սեփականատերն է Դեորոյթի Հայ Առաքելական Եկեղեցու Ղնկերակցությունը, որի նախագահն է՝ հետեւելով իր հոր օրինակին՝ Ռիչարդ Մանուկյանը:

Ալեք Մանուկեան դպրոցի հետ գրեթե միաժամանակ ՀԲԸ Միությունը վարժարան հիմնեց նաև Բոստոնի մերձակա Ութթերթաուն հայաշատ քաղաքում: Այս քաղաքը ԱՄՆ-ի արեւելյան ափի հայկական ամենակարեւոր կենտրոններից է, ուր տեղակայված են տարբեր՝ կուսակցական, մշակութային, եկեղեցական և մի շարք այլ ազգային հիմնարկություններ: Սկզբնական շրջանում Ութթերթաունի դպրոցը նույնպես կազմված էր մանկամտուր-մանկապարտեզից, իսկ 1973-1974 տարեշրջանում ունեցավ նախակրթարանի առաջին դասարանը: Ուշագրավ է, որ 1976-ին նրա աշակերտների թվում էին նաև իռլանդացի, իտալացի, իսպանա-

ցի երեխաներ, որոնք հայազգի աշակերտների նման ուսանում էին հայերեն լեզու ու պատմություն: Հետագայում նման դեպքեր գրանցվել են ԱՄՆ-ի և Կանադայի հայկական որոշ այլ դպրոցներում ևս, ինչը պայմանավորված էր նրանց կրթական և կարգապահական բարձր մակարդակով: Եվ այնուամենայնիվ, անցնում էին տարիներ, բայց աշակերտների թվաքանակը Ութթերթաունի դպրոցում գրեթե չէր աճում, ինչն էլ հարցականի տակ էր դնում նրա գոյության անհրաժեշտությունը: Ի վերջո, ՀԲԸ Միության Ութթերթաունի ամենօրյա վարժարանը 1994թ. փակվեց:

Բնական է, որ որևէ հայկական դպրոցի փակումը սիյուռեթում միշտ էլ դիտվել է որպես խիստ անցանկալի երեւոյթ: Այս դեպքում, սակայն, հարցը ուներ նաև անձնային երանգ, քանի որ Ութթերթաունի դպրոցի փակումը տեղի ունեցավ Լուիզ Մանուկյան Սիմոնի՝ որպես ՀԲԸ Միության նախագահ ընտրվելուց մոտ երեք տարի անց: Նույնիսկ Միության շրջանակներում ոմանք այն կարծիքն էին հայտնում, որ նոր դեկավարությունը դավաճանում է ազգային կրթության հարցում Միության ավանդական քաղաքականությանը ընդհանրապես: Դրանով իսկ հարցը ստանում էր սկզբունքային նշանակություն, ինչն էլ անհրաժեշտ դարձրեց նրա պարզաբանումը Միության դեկավարների կողմից:

Նախագահ Լուիզ Մանուկյան Սիմոնը այս հարցին անդրադարձավ 1993թ. օգոստոսին, Նյու Յորքում կայացած Միության ԱՄՆ-ի մասնաճյուղերի առեւնապետների համաժողովում: «Երեք հայկական դպրոցներ կը գործէին Պոթսդեմի շրջանին մէջ,- նշում էր նա- և ոչ մէկը ուներ առաւել քան 125 աշակերտ, և քաղաքական ու կրօնական պատճառներով կարելիութիւն չկար համատեղելու անոնց միջոցներն ու ճիգերը: Մենք, նախ կը մրցէինք հանրային դպրոցներուն հիանալի համակարգի մը հետ, որ անշուշտ ձրիավարժ էր: Մեր պիտճէին բացը 5 տարուան ընթացքին \$100.000- էն բարձրացաւ 200.000 տոլար: Գրեթէ չկար համայնքին կողմէ որեւէ նիւթական մեցուկ: Կրթաթօշակներէն (ուսման վարձը-Էդ.Մ.) մուտքը շատ քիչ էր, և դպրոցը կը գտնուէր Ութթերթաունի Ս. Յակոբ եկեղեցու գետնայարկը: Եկեղեցին մեզմէ կ'առնէր տարեկան 65.000 տոլար վարձք: Ամէն տարուան յաւելումով շաքաթավերջուն ի՛նք կը գործածէր մեր դպրոցին դիրութիւնները, հետզհետէ նուազեցնելով մեր խաղաղալարն ու տարածքը: Մենք առաջարկեցինք եկեղեցիին որ ինք ստանձնէ դպրոցը, որու վարձքին փոխարէն ՀԲԸՄ-ը տարեկան յատկացում մը կատարէր: Բայց՝ հետաքրքրուած չէին: Մենք սկսանք մտածել նոր դպրոցի մը մասին, բարձրագոյն աշխատավարձով պաշտօնի կոչելու համար աւելի որակաւոր ուսուցիչներ, ընդլայնելով անհրաժեշտ դասանիւթեր, ձեռք ձգելու աւելի բարձր մակարդակ. սակայն յանգեցանք այն եզրակացու-

թեան որ մօտիկ ապագային պիտի ունենայինք կէս միլիոն տոլարի բաց մը 125 աշակերտի համար, որոնց 45% մասնկամուտի եւ մասնկապարտեզի մէջ պիտի ըլլային»։¹⁵³

Իր հերթին, Միության կենտրոնական Վարչական Ժողովի փոխնախագահ Պերճ Սեդրակյանը Բեյրութի «Զարթօնք» թերթին տված հարցազրույցում ասում էր. «Հարցը հետեւեալն է. ի գին բոլոր մակարդակներու գիշումի մենք պիտի շարունակէի՞նք դպրոցը պահել, միայն թէ ըստի որ հայկական դպրոցը կանգուն կը պահենք, եւ արդեօք այդ դպրոցին աշակերտները հայկական կրթական հաստատութիւն յաճախած ըլլալու գոհունակութիւնը պիտի ունենայի՞նք: Կրթական Յանձնախումբին եւ մասնագէտներուն հետ խորհրդակցելէ ետք կեդրոնական Վարչական Ժողովի որոշումով դպրոցը փակեցինք: Այս բոլորին մէջ Լուիզ Սիմոն պարզ անդամի մը դերը կատարեց եւ երբ որոշումը կ'առնէինք, ան կատակով ըսաւ որ վաղը պիտի ըսեն թէ հօրը տեղը առաւ, բայց սկսաւ դպրոցներ փակել»։¹⁵⁴

Հարցը, սակայն, ինչպէս նշվեց, չէր սահմանափակվում Ութերթաւունի դպրոցով. Միության ղեկավարությունը ուղղակի կամ անուղակի ձեռով քննադատվում էր ազգային կրթության հանդէպ իր որդեգրած կեցվածքի համար: Պատասխանելով մասն մեղադրանքներին՝ Պ.Սեդրակյանը նշում էր. «Ութերթաւունի դպրոցի փակումը ողբալով Միութեան կրթական ընդհանուր քաղաքականութիւնը կը դատեն եւ չեն ուզեր տեսնել նոյն շրջանին եւ նոյն ղեկավարութեան կողմէ Լոս Անճելէսի մէջ կրթական նպատակներով ՀԲԸՄ-ի հինգ միլիոն տոլարէ աւելի ներդրումը...»։¹⁵⁵ Խոսքը ԱՄՆ-ի արեւմտյան ափում Կալիֆորնիայում Միության առաջին դպրոցի մասին էր, որը հիմնվել էր դեռեւս 1976թ.:

Այս դպրոցի հիմնադրումը սպասելի էր եւ պայմանավորված էր այն փոփոխություններով, որ սկսեց կրել նոյն այդ նահանգում ապրող հայությունը սկսած 1960-ական թթ.: Արեւելքի երկրներից հայերի չդադարող ներգաղթը ոչ միայն զգալիորեն ստվարացրեց տեղի հայության թվաքանակը, այլեւ բերեց որոշակի որակական փոփոխությունների: Նախ՝ հարկ է նշել, որ ներգաղթողները, կամա թե ակամա, բերել էին իրենց հետ նաեւ եկեղեցական-կուսակցական հատվածականությունն ու առճակատումը, որը տարիների ընթացքում դարձել էր նրանց ազգային ինքնագիտակցության բաղկացուցիչ մասը: Դրա հետեւանքները շատ շուտով նկատվեցին տարբեր, այդ թվում նաեւ ազգային կրթության ոլորտում: Ինչպէս եւ Արեւելքի երկրներում, ԱՄՆ-ում նույնպէս եկեղեցական-կուսակցական երկու խմբավորումներին պատկանող հայերի համար անընդունելի էր, որ իրենց երեխաները հաճախեն ընդդիմադիր շրջանակին պատկանող դպրոցները:

Նման պայմաններում նշված երկու խմբավորումներից յուրաքանչյուրը հարկադրված էր ձեռնամուխ լինել սեփական դպրոցների հիմնադրման գործին: Խնդիրը պահանջում էր արագ լուծում, քանզի համապատասխան դպրոցների բացակայությունը էլ ավելի էր խթանում երեխաներին պետական անվճար դպրոցներ ուղարկելու ձգտումը:

Այսքանից հետո հասկանալի է դառնում այն հանգամանքը, որ ՀԲԸ Միության դպրոցը նախապէս տեղավորվեց ոչ թէ հատուկ այդ նպատակով գնված կամ վարձակալած շենքում, ինչը շատ ժամանակ էր պահանջում, այլ տեղի Ս.Պետրոս եկեղեցու տարածքում տեղադրված մեծ ավտոտնակներում (trailers): Դպրոցը տարեցտարի արձանագրում էր աշակերտների թվաքանակի զգալի աճ: Եթե առաջին տարում աշակերտների թիվը 19-ն էր, ապա 1979թ. այն կազմեց 135: 1980թ. Ս. Պետրոս ՀԲԸ Միութեան ամենօրյա դպրոցը (այսպէս էր այն կոչվում սկզբնական շրջանում) հաստատվեց Վեն Նայսում, իսկ 1984թ.՝ Կանոգա Պարքում վարձակալած պետական դպրոցի շենքում:¹⁵⁶ Բայց հարցի լուծման նման տարբերակը հղի էր անսպասելի բարդություններով, ուստի եւ անհրաժեշտ էր դպրոցը ապահովել սեփական շենքով: 1986թ. նոյն Կանոգա Պարքում գտնվեց վաճառքի հանված հարմարավետ դպրոցաշենք: Տեղեկանալով այդ մասին՝ Միության նախագահ Ա.Մանուկյանը խոստացավ իր օժանդակությունը, պայմանով, որ ապահովվի նաեւ տեղի համայնքի մասնակցությունը: Կարճ ժամանակում անհրաժեշտ գումարը հանգանակվեց, եւ վարժարանը 1986-1987 տարեշրջանը սկսեց նոր շենքում, ունենալով 415 աշակերտ՝ 40%-ով ավելի, քան նախորդ տարում: Մի քանի ամիս անց՝ 1987թ. փետրվարին դպրոցը պաշտոնապէս կոչվեց ՀԲԸՄ Մարի Մանուկեան վարժարան, ի պատիվ Միության նախագահի կնոջ, որը նույնպէս հայեցի կրթության քաջալերողներից էր: 1989թ. սկսվեցին դպրոցի ընդարձակման աշխատանքները: Այդ պահին դպրոցի աշակերտների թիվը կտրուկ աճել էր, եւ տնօրինությունը ստիպված էր դիմել արդեն փորձված միջոցի. «Իր 600 աշակերտներով եւ սպասողական ցանկի վրայ գտնուողներով՝ այս դպրոցը գնեց շարժական դասարաններ, կարենալ տեղ տալու աճող աշակերտութեան»։¹⁵⁷ Ծենքի ընդարձակման աշխատանքների ընդհանուր արժեքն էր 5 մլն դոլար, որից 1.250.000-ը նվիրաբերեցին տեր եւ տիկին Սարգիս Տեմիրճյանները, որոնց անունով էլ որոշվեց կոչել բարձրագույն դպրոցը: Իսկ Նազարյան եղբայրների նվիրատվության շնորհիվ կառուցվեց Նազարեան կենտրոնը՝ իր մարզադահլիճով եւ այլ հարմարություններով: Հայեպի Նաճարեան-Կիլպէնկեան դպրոցից հետո Կանոգա Պարքի ՀԲԸ Միության

Մանուկեան-Տեմիրճեան դպրոցը՝ իր շուրջ 1.000 սաներով այսօր ամենախոշորն է:

Դպրոցի հոգաբարձության ատենապետ Սինան Սինանյանի խոսքերով, «Տնօրէնութիւն եւ ուսուցչական կազմ ամէն ճիգ ի գործ կը դնեն... աշակերտներուն լրջօրէն պատրաստելու համար AP «Advanced Placement» դասապահերուն, որոնց մէջ յաջողած աշակերտները կը ստանան համալսարանական ուսմանց համապատասխան վարկանիշ: Ուրախ ենք որ մեր աշակերտներու յաջողութեան արդիւնքները զանազան մարզերու մէջ, շատ անգամ բարձր են քան Ամերիկայի ընդհանուր մակարդակը»:¹⁵⁸ Այս ամենի հետ մեկտեղ, դպրոցում մեծ ուշադրություն է դարձվում հայագիտական առարկաների դասավանդմանը. «Վերջապէս, վարժարանին գոյութեան իմաստը՝ ամերիկեան բարձրորակ ուսման կողքին, նոյն մակարդակով հայերէն լեզու, գրականութիւն, ազգային պատմութիւն ու մանաւանդ հայկական ոգի ջամբել է հայ աշակերտին»,- նշում էր Ս.Սինանյանը: Դրա վկայություններից են Մանուկեան-Տեմիրճեան դպրոցի աշակերտների կողմից տարիներ շարունակ հրատարակվող «Hye Times» եւ «Ողջոյն» անգլիալեզու եւ հայալեզու ամսաթերթերը:

Վերը արդեն նշվել էր, թե որքան ծախսատար գործ է անհրաժեշտ չափանիշներին համատասխանող հայկական դպրոցի գոյությունը ԱՄՆ-ում: Մանուկեան-Տեմիրճեան դպրոցը դրա վառ ապացույցն է. նրա տարեկան բյուջեն կազմում է մոտ 4,2 միլիոն դոլար, որի գրեթե 80%-ը հատկացվում է ուսուցիչների եւ պաշտոնյաների (նրանց ընդհանուր թիվը հասնում է 100-ի) աշխատավարձին: Այս գումարի մէջ չեն մտնում «կառուցային հիմնական կարիքները (Capital Improvements)», որոնք հոգում է Միության կենտրոնական Վարչությունը: 1996թ. դպրոցի շարունակական բարելավման նպատակով եւ Մանուկեան ընտանիքի նվիրաբերած 100 հազ. դոլարով ստեղծվեց Մնայուն հիմնադրամ, որը մեկ տարի անց արդեն եռապատկվել էր: Բյուջեի հավասարակշռման եւս մեկ աղբյուր է ուսման վարձը, որը կազմում է միջին հաշվով 3.800 դոլար: Այս գումարը, իհարկե, շատ ավելի է, քան սփյուռքի որեւէ այլ հայկական դպրոցում: Սակայն աշակերտության թվի մշտական աճը վկայությունն է նրա, որ ծնողները պատրաստ են վճարել այն, հավատացած լինելով, որ դրա դիմաց իրենց երեխաները ստանում են բարձրորակ ամերիկեան եւ հայեցի կրթություն: Դպրոցը, սակայն, հավատարիմ է նաեւ այն սկզբունքին, որ «...որեւէ հայ աշակերտ, որ տէր է իմացական կարողութեան, բայց զուրկ է նիւթական բաւարար միջոցներէ, պէտք է պատենթիւնը ունենայ հայ-ամերիկեան լասագոյն ուսումը ստանալու: Այս ուղղութեամբ,- ընդգծում

էր դպրոցի տնօրէնը,- մեր վարժարանը տարին 300.000 տոլար կը յատկացնէ նման ուսանողներու»:¹⁵⁹

Լոս Անջելէսը (ներառում է Գլենդէյլը, Պասադինան եւ շրջակա այլ փոքր քաղաքները) իր ավելի քան 400.000 հայ բնակչութեամբ պարտավորեցնում է ամերիկահայ տարբեր կազմակերպություններին ընդարձակել իրենց գործունեությունը այստեղ: Բացառություն չեղավ նաեւ ՀԲԸ Միությունը, որը Մանուկեան-Տեմիրճեան դպրոցից զատ 1990-ական թթ. սկզբին ձեռնամուխ եղավ Միության կենտրոնի հիմնադրմանը Պասադինայում: Կենտրոնի շենքի ձեռքբերման գումարի (4 միլիոն դոլար) հիմնական մասը ապահովվեց Ալէք Մանուկեանի եւ Միության կենտրոնական Վարչության անդամ Սուրեն Ֆեսճյանի նվիրատվությունների շնորհիվ: Մնացած մասը պետք է հանգանակվեր տեղում, ինչը ընթացավ մեծ դժվարությամբ: Միության նախագահը, ընդունելով, որ Հարավային Կալիֆորնիայում ԱՄՆ-ի այլ շրջանների համեմատ, տնտեսական պայմանները «անելի վատ են», այնուամենայնիվ, նշում էր. «սակայն, հարիւրաւոր մարդիկ որոնք պահանջեցին այս կեդրոնը, վերջապետութեան չաշխատեցան անոր նիւթականը ապահովելու: Ասիկա փորձառութիւն մըն է որ յաճախ կ'ունենանք եւ հիմա որոշած ենք որ ՀԲԸՄ-ի ոչ մէկ կեդրոն կրնայ գնուիլ առանց տեղական միջոցներով գումարին մեծամասնութիւնը գոյացնելու սրամանին»:¹⁶⁰ Ծենքի հարմարությունները հնարավորություն էր տալիս զանազան միջոցառումներ եւ ձեռնարկներ կազմակերպելու: Կարճ ժամանակում սկսեցին գործել սիմֆոնիկ նվագախումբը եւ երգչախումբը, մեծի մասամբ կազմված նախկինում Հայաստանի հայտնի երաժշտական խմբերի անդամներից:

Ֆրանսիայում

Եվրոպական երկրների շարքում ազգային ինքնության եւ ժառանգության պահպանման խնդրի լուծումը, նույն այդ տարիներին, առավել մեծ բարդությունների հետ էր կապված ամենատարբեր հայագրի բնակչություն ունեցող Ֆրանսիայում: Դրա հիմնական պատճառներից մեկը, եթե ոչ ամենահիմնականը, այդ երկրի ավանդական քաղաքականությունն է՝ սեփական հարուստ եւ բազմադարյա ֆրանսիական մշակույթը պահպանելու, այլ մշակույթների ներագդեցությունը նվազագույնի հասցնելու նպատակով եւ այդ նպատակին ծառայող գրված եւ չգրված օրենքների մի ամբողջ համակարգի գոյությունը: Այդուհանդերձ, այստեղ գործող հայկական կազմակերպություններից յուրաքանչյուրը նույնպէս ձգտում էր՝ իր հնա-

րավորությունների չափով եւ միջավայրին առավել համապատասխանող միջոցներով դիմակայել միջավայրի ուժեղ եւ մշտական ճնշմանը:

Դեռեւս 1935թ. ՀԲԸ Միությունը Փարիզում արդեն գործող իր վերոհիշյալ հաստատությունների կողքին կազմավորեց նաեւ Հայ Երիտասարդաց Միությունը, որը սերտորեն համագործակցեց Հայ Օրիորդաց Միության հետ: ՀԲԸ Միության այս երկու նոր կազմակերպությունների աշխույժ գործունեությանը մեծապես նպաստեց Բարեգործականի Տան հիմնումը, որտեղ եւ անց էին կացվում նրանց տարբեր միջոցառումները: Մասնավորապես, այստեղ պարբերաբար կազմակերպվող դասախոսությունները կարեւոր իրադարձություններ էին Փարիզի ողջ հայության կյանքում, քանզի զեկուցողները հաճախ այնպիսի հայտնի դեմքեր էին, ինչպես, օրինակ, ՀԲԸ Միության վարիչ-պատվիրակ Վահան Մալեգյանը, որը միաժամանակ հայտնի քանաստեղծ էր, Հրաչ Զարդարյանը, Արա Պարթեւյանը, Արշակ Չոպանյանը, Ա.Շահխաթունին եւ այլք: Որոշ ժամանակ անց ՀԵ Ընկերակցություն՝ իր ակումբ - գրադարանով, կազմավորվեց նաեւ Ֆրանսիայի մեկ այլ հայաշատ քաղաքում՝ Մարսելում:¹⁶¹

Եվրոպական ժողովուրդների համար Երկրորդ Աշխարհամարտի արհավիրքներով լի տարիները փոխարինվեցին, ինչպես հայտնի է, սոցիալ-տնտեսական եւ քաղաքական անկայուն, մինչեւ իսկ ճգնաժամային իրավիճակով: Տեղի հայության ազգային գոյավիճակի առումով հարկ է նկատի ունենալ նաեւ, որ պատերազմի հինգ տարիների ընթացքում հայ, ինչպես եւ այլ ազգային փոքրամասնությունների կազմակերպությունների գործունեությունը պարտադրաբար սառեցվել էր: Մեծ թվով հայ պատանիներ եւ երիտասարդներ, որ նոր պետք է անդամագրվեին երիտասարդական միություններին, զրկված մնացին համախմբվելու, ազգամշակութային միասնական գործունեություն ծավալելու հնարավորությունից: Մյուս կողմից, նույն այդ միությունների անդամների մի մասը պատերազմի ավարտից հետո հեռացավ նրանցից՝ իրենց տարիքին համապատասխան նոր հետաքրքրությունների ու նպատակների պատճառով: Այդպիսով, խախտվեց սիյուռքահայ երիտասարդության կազմակերպված գործունեության շարունակականությունը:

Պատերազմի ավարտից անմիջապես հետո ՀԲԸ Միությունը աստիճանաբար վերսկսեց իր գործունեությունը, նախ եւ առաջ երիտասարդության մեջ: 1950թ. Միությունը Բարեգործականի Տուն հաստատեց Մարսելում, ուր մինչ այդ գործող կենտրոնը, ինչպես նշվել է, ավերվել էր պատերազմի ընթացքում ուժեղացող հետեւանքով: Ավելի ուշ՝ 1967-1968թթ. Փարիզում Միության կենտրոնատեղիում իր աշխատանքները սկսեց նորաստեղծ Երիտասարդական Ակումբը՝ կազմակերպելով հայե-

րեն լեզվի եւ պատմության գիշերային դասընթացներ, դասախոսություններ, ինչպես նաեւ հավաքույթներ ու հանդեսներ: Սակայն Միության ջանքերը՝ երիտասարդական կայուն կազմակերպություն ստեղծելու ուղղությամբ, ընթանում էին մեծ դժվարությամբ եւ 1968թ. տեղեկագրում գգուշավորությամբ նշվում էր. «Ֆրանսայի միս մասնաճիւղերում կողքին երիտասարդական ակումբներ ստեղծելու ջանքեր եղան»:¹⁶² Այնուամենայնիվ, այդ ջանքերը, կարծես, տալիս էին իրենց արդյունքը: Մի քանի տարի անց հեթոթական անգամ իր գործունեությունը աշխուժացրեց Մարսելի Երիտասարդական Ակումբը, իսկ Վալանտում առաջին անգամ կազմավորվեց Երիտասարդական Մարմինը: Փարիզի Ակումբի նոր եւ կարեւոր ձեռնարկներից էր՝ սկսած 1972թ., իր անդամների այցելությունները Հայաստան: Ի տարբերություն այլ երկրների, Ֆրանսիայում Միության երիտասարդական կազմակերպությունները իրենց գործունեության մեջ նախապատվությունը միշտ էլ տալիս էին մշակութային եւ նման այլ ձեռնարկներին: Այդօրինակ գործունեության աշխուժացմանը մեծապես նպաստեց Ալեք Մանուկեան Մշակութային Կեդրոնի բացումը Փարիզում, ապա նաեւ 1985թ. նույնպես Միության նախագահի մեկ միլիոն ֆրանկի նվիրատվության շնորհիվ Միության Կեդրոնի ձեռքբերումը Լիոնում:

Անդրադառնալով Միության կենտրոնների գործունեությանը՝ նախագահ Լուիզ Մանուկյան Սիմոնը մի առիթով նկատել է. «Միայն դրամը չէ կարեւորը երբ հարցը կու գայ կեդրոնի մը սեփականացման, այլ՝ թե ինչպե՞ս ան պիտի գործածուի: Եթե տարիէ տարի նոյն անձերը պիտի վայելեն կեդրոնին ընծայած հնարաւորութիւնները այն ատեն ան կը վերածուի անհատական ակումբի մը եւ ոչ համայնքապատկան կեդրոնի մը: Եթե չկազմակերպուին զանազան տեսակի որակաւոր ծրագիրներ որոնք կը հրապարեն ընդարձակ խաւ մը համայնքէն, այն ատեն կեդրոնը կը վերածուի լճացած հաստատութեան մը՝ ափ մը վերապրողներու համար»: «Տարիներով նման կացութիւն մը ունէինք Փարիզի մէջ, շարունակում էր նա, մինչեւ որ գործունեայ ատենապետ մը ընդարձակեց կեդրոնին տարողութիւնը տարբեր համայնքներու ղեկավարները հրաւիրելով զանազան ընդունելութիւններու եւ բարձրորակ յայտագիրներու: Կեդրոնը, որ որոշ չափով փոքր է, այսօր դարձած է հանդիպման կէտը Փարիզի: Հարիւր վաթսուն աշակերտներ, 10-60 տարեկան, արձանագրուած են շաբաթօրեայ լեզուի, պատմութեան եւ սրբի դասերու. ամէն ականաւոր քաղաքական մարդ Ֆրանսայի մէջ ոչ միայն կ'ընդունուի կեդրոնին մէջ, այլ կը դիմէ ՀԲԸՄ-ի երբ կը հետաքրքրուի հայկական հարցերով. ամէն քաղաքական մարդ Հայաստանէն իր գլխաւոր ընդունելութիւնը կամ դասախօսութիւնը կ'ունենայ կեդրոնին մէջ»:¹⁶³

Դեռևս 1920-ական թթ., ՀԲԸ Միության փոխնախագահ Տիգրան Բելեկյանը Միությանն էր նվիրաբերել ընդարձակ մի շենք Փարիզի արվարձաններից մեկում՝ Լե Ռեյնսիում: 1928թ. այդ շենքը տրամադրվեց Դպրոցաւէր տիկնանց վարժարանին, որը հիմնվել էր 1879թ.՝ Կ.Պոլսում: Այդ օրվանից ՀԲԸ Միությունը դարձավ վարժարանի հիմնական հովանավորողը: 1985թ. Միության տրամադրած 350.000 ֆր. ֆրանկի շնորհիվ վարժարանը կարողացավ դուրս գալ խիստ ծանր ֆինանսական ճգնաժամից, որը հարցականի տակ էր դրել նրա գոյությունը: Դպրոցաւէր տիկնանց վարժարանը, որը մինչև 1960-ական թթ. իգական միակ գիշերօթիկ վարժարանն էր սփյուռքում (ներկայումս՝ երկսեռ), 1995թ. ուներ 220 աշակերտ:¹⁶⁴ Դրա հետ մեկտեղ Միությունը Մարսելում, Վալանսում եւ այլ քաղաքներում շարունակեց ֆինանսավորել հայերեն լեզվի շաբաթական դասընթացները: Փարիզում շարունակում է գործել Նուպարեան Մատենադարանը, որի հարուստ, մշտապես համալրվող հավաքածուներից օգտվում են հատկապես տեղի եւ այլ երկրների հայազգի ու օտար հայագետները:

1980-ական թթ. վերջից եվրոպական տարբեր քաղաքներում անցկացվում են ՀԲԸ Միության Եվրոպայի Երիտասարդական Մարզախաղերը: Այսպես, 1997 եւ 1998 թթ. դրանք հաջորդաբար տեղի ունեցան Գրենոբլում եւ Լիոնում, որոնց մասնակցեցին Անգլիայի, Գերմանիայի, Հոլանդիայի, Ծվեյցարիայի, Բելգիայի եւ Ֆրանսիայի տարբեր քաղաքներից ժամանած հարյուրավոր երիտասարդներ:

Ինչպես արդեն նշվել էր, Երկրորդ Աշխարհամարտի տարիներին դադարեց Միության անդրանիկ պաշտոնաթերթի՝ «Միութիւն» ամսագրի հրատարակումը Փարիզում: Պատերազմից հետո այդ բացը լրացնելու եկան Փարիզում հրատարակվող ՀԲԸ Միության Եվրոպայի շրջանակի «Շինարար» եւ ապա «Նոր Շինարար» ամսագրերը (1950 թվականից լույս է տեսել «Տեղեկատու» անունով): Նկատի առնելով ֆրանսահայերի եւ հատկապես երիտասարդության մեծամասնության ֆրանսախոս լինելու փաստը, շատ կարելի էր նախ «La Lettre de l'UGAB», ապա՝ 1993 թվականից ՀԲԸ Միության կենտրոնական վարչության անդամ, Ֆրանսիայի շրջանակի ղեկավար անդամներից Լեոն Բեպպալճյանի նախաձեռնությամբ ու տնօրինությամբ «UGAB Magazine» ամսագրերի հրատարակումը:

Հունաստանում

Հունաստանում ՀԲԸ Միությունը 1950-ական թթ. սկզբից սկսեց նյութապես աջակցել գործող որոշ երիտասարդական կազմակերպություններին, հատկապես Աթենքի Արարատ մշակութային եւ մարզական միությանը: Միության հովանավորությամբ գործելով՝ այն ուներ իր սեփական ակումբն ու գրադարանը, մարզական, սկաուտական եւ թատերական խմբերը եւ ծառայում էր ոչ միայն իր անդամներին, այլեւ Գոքիմիայի թաղամասի ողջ հայությանը: «Արարատ Միությունը, - նշվում էր Միության տարեգրքում, - որ ունի 250 գործոն եւ համակիր անդամներ, ատյի սերտօրէն կապուած է Բարեգործականին եւ իր ծառայութեան բաժինը կը բերէ անոր ազգապահպանման նպատակներուն իրագործման համար»:¹⁶⁵ 1998թ. Աթենքում բացվեց ՀԲԸ Միության Արարատ մշակութային-մարզական միության նոր կենտրոնը, որն օժտված է արդիական հարմարություններով:

1965թ. Աթենքում սկսեց գործել նաեւ ՀԲԸ Միության Հայ Երիտասարդաց Միությունը (Ընկերակցությունը կամ Ակումբը): Նրա անդամներն էին մեծ մասամբ Մեղգոնեան կրթական հաստատության եւ Գալփաքեան վարժարանի հին եւ նոր սաները, որոնք էլ մարզական տարբեր խմբերից զատ, կազմեցին նաեւ նվագախումբ: 1957թ. Սալոնիկում հիմնվեց Թատերական եւ Մշակութային միություն՝ շուրջ 80 անդամներով: Մինչ այդ (1947թ. սաների թվի նվազելու պատճառով փակվել էր երկար տարիներ գործող Ադաթօն կրթարանը:

ՀԲԸ Միությունը տարիներ շարունակ նյութապես հովանավորում էր նաեւ Աթենքի գլխավոր թաղամասերում՝ Ֆիքս-Տուրդութիում եւ Գոքիմիայում գտնվող Ազգային եւ հայ ավետարանական վարժարանները: Սակայն, 1958թ., որպես հետեւանք Հայ Առաքելական եկեղեցու պառակտման, Հունաստանի թեմը հրաժարվեց ընդունել Մայր Աթոռ Ս.Էջմիածնի գերագույն հոգեւոր եւ վարչական իշխանությունը եւ անցավ Մեծի Տանն Կիլիկիո կաթողիկոսության ենթակայության տակ: Հունահայ համայնքի մի մասը չհամաձայնվեց մեծամասնության հետ եւ հայտարարեց առանձին Էջմիածնական թեմական խորհուրդ ստեղծելու որոշման մասին: Եվ քանի որ Հունաստանի թեմը վերահսկում էր նշված ազգային դպրոցները, ապա եկեղեցական-քաղաքական հակամարտությունը դրսևորվեց նաեւ կրթական ոլորտում:

Անդրադառնալով համայնքում ստեղծված իրավիճակին՝ Միության 1958թ. տեղեկագրում նշվում էր. «Աթենքի մեր մասնաճիղը ամէն ջանք ըրաւ որպէսզի կրթական գործը զերծ պահուի եկեղեցական պայքարնե-

րու ազդեցությունները: Ծրագրեց դպրոցներու վերահսկողությունը յանձնել համայնքին ազգ. մարմիններէն անկախ հոգաբարձութեան մը եւ Կեդր. Վարչութիւնը լիովին համաձայն գտնուեցաւ այս կարգադրութեան: Դժբախտաբար, այս բարի նպատակով կատարուած երկար բանակցութիւնները բաղձալի արդիւնքը չունեցան, Ազգ. Առաջնորդարանը իրենց ձեռքը ունեցողներուն անզիջող կեցուածքին հետեւանքով: Անոնք առանց այլեւայլի կը պնդէին որ դպրոցներու յատկացումին 8.000 տոլարի գումարը իրենց պէտք է յանձնուի եւ հոգաբարձութիւնը իրենք միայն պետք է անուանեն:»¹⁶⁶ Մեծ թվով ծնողներ հրաժարվեցին իրենց երեխաներին ուղարկել այս երկու դպրոցներ, որոնք վերահսկվում էին Ա.Էջմիածնից անջատված թեմի կողմից: Ստեղծված իրավիճակում ՀԲԸ Միությունը պարտավորված եղավ սեփական դպրոցը բացել Աթենքում, «որպէսզի հարիւրէ աւելի անմեղ մանուկներ ուսումէ չզրկուին»: Դպրոցի համար, որը կոչվեց ՀԲԸ Միութեան Աթենքի վարժարան, քաղաքի գեղեցիկ արվարձաններից մեկում՝ Ամարուսիում վարձվեց հատուկ շէնք, ուր եւ 1958թ. սեպտեմբերին սկսեցին ուսանել 124 աշակերտներ: Տարիներ անց բարերար Արթաքի Գալփաքյանը Միությանը նվիրաբերեց հողատարածքներ, որպէսզի նրանց վաճառքից գոյացած գումարով կառուցվի նոր դպրոց: 1967թ. Աթենքի Ամֆիթեա (Ֆալիրո) թաղամասում սկսեց գործել նորակառուց Արթաքի Գալփաքեան նախակրթարանը, ուր եւ փոխադրվեցին Միության վարժարանի բոլոր աշակերտները: Այս վարժարանի կյանքից ուշագրավ մի փաստ. «Գալփաքեան վարժարանի մէջ կան գաւառներէն եկած 16 գիշերօթիկ աշակերտներ: Ասոնք պատասխարելու համար մասնաժողովը կրցավ Աթենքէն դուրս գտնուող Զուիցերական Բրիտոնէական հաստատութեան հետ կարգադրութիւն մը ընել եւ անցեալ տարուան նման՝ այս տարի եւս փոքրիկները գիշերները հոն անցուցին եւ ցերեկները դպրոց յաճախեցին»:»¹⁶⁷ 2002թ. Արթաքի Գալփաքեան վարժարանը ուներ 69 աշակերտ:

Բուլղարիայում

Երկրորդ Աշխարհամարտը եւ դրան հաջորդած տարիները առավել ծանր հետեւանքներ ունեցան Ռումինիայի եւ Բուլղարիայի հայության համար, որոնք դասվում էին Եվրոպայի ամենախոշոր եւ ամենագործունյա համայնքների շարքը: Բուլղարիայում, ուր 1930-ական թթ. բնակվում էր շուրջ 27 հազ. հայ, ՀԲԸ Միության առաջին մասնաճյուղերը կազմավորվել են դեռեւս 1910թ.: Սոֆիայում, Ֆիլիպետում (Պլովդիվ) եւ Ռուսուքում,

իսկ հետագայում նաեւ որոշ այլ քաղաքներում: Սկսած 1935թ. Միության տեղական մասնաճյուղերի ջանքերի շնորհիվ հնարավոր դարձավ համախմբել հայ երիտասարդությունը: Վառնայի Ադաթօն, Խաւքովոյի Պօղոս Նուպար եւ Արարատ Կրտսերաց Լիկայում, Յամբոլի Նաւասարտ Կրտսերաց Լիկայում, Ստարա-Զագորայի, Բուրգասի, Թաթար-Պազարճիգի, Պլովդիվի, Սլիվենի եւ այլ քաղաքների մասնատիպ միություններում ընդգրկված էին հարյուրավոր հայազգի երիտասարդներ: «Այս բոլոր ընկերակցութիւնները, որ ՀԲԸ Միութեան նոր եւ կենսունակ մէկ մարզը կը կազմեն, ընդհանուր համակրանքի առարկայ դարձած, կը հետապնդեն տոհմային դաստիարակութեան եւ ազգային ծառայութեան գործը վարժարաններէն դուրս»:»¹⁶⁸ Սակայն Երկրորդ Աշխարհամարտից հետո Ռումինիայում եւ Բուլղարիայում կոմունիստական վարչակարգի հաստատումը ոչ միայն կանխորոշեց տեղի հայերի մի զգալի մասի արտագաղթը երկրից, այլեւ անհնարին դարձրեց ազգային փոքրամասնությունների բնականոն ազգամշակութային գործունեությունը ընդհանրապէս: Մասնավորապէս, Բուլղարիայում արգելվեց գրեթե բոլոր հայ կազմակերպությունների, այդ թվում նաեւ ՀԲԸ Միության եւ նրա վերոնշած երիտասարդական տարբեր միությունների գործունեությունը:

Միայն տասնյակ տարիներ անց, 1990-ական թթ. սկզբին, երկրում ժողովրդավարական կարգերի հաստատումից հետո, վերստին հնարավոր դարձավ ազգային փոքրամասնությունների, այդ թվում նաեւ հայերի, անկաշկանդ այգային-մշակութային գործունեությունը: ՀԲԸ Միության գործիչ Վաչէ Ղազարյանի ջանքերի շնորհիվ մասնաճյուղեր հիմնվեցին նախ՝ 1990թ. մարտին Սոֆիայում, իսկ որոշ ժամանակ անց՝ նաեւ Պլովդիվում եւ Վառնայում: Սոֆիայի մասնաճյուղի հիմնադիրներից Սեւդա Սեւանը իր հարցազրույցներից մեկում ասում էր. «Բարեգործականը միակ (հայկական) միութիւնն է Սոֆիայի մէջ, որ ունի ծրագրուած ու կազմակերպուած ժամանակացոյց: Ամէն ամիս համերգ, ամէն ամիս ցուցահանդէս, դասախօսութիւններու շարք՝ աւելի հայկական մթնոլորտի համար ու մէկ նիւթի շուրջ: Մեր գաղութը իր արմատները մոռցած է ու կը փորձենք վերադառնալ հոն: Նաեւ կը քննարկենք հայ-պուլկար ժողովուրդին մշակութային եւ ազգային-ազատագրական պայքարին կապերը: Մեր բոլոր դասախօսութիւններուն ներկայ կ'ըլլան պուլկարներ եւ այդ տեղի կ'ունանայ պուլկարերէնով: Մեր նոր սերունդը հայերէն մոռցած է եւ քանի մը տարի պէտք է, որպէսզի կարենանք հայերէնով բոլորին հասկնալի դասախօսութիւններու ձեռնարկել...»:»¹⁶⁹

Բուլղարիայում Միության նորաստեղծ մասնաճյուղերի կարեւոր նպատակներից էր հայկական դպրոցների հիմնադրամի ստեղծումը, որի

իրականացումը, սակայն, մեծ դժվարությունների հետ էր կապված. «Դարձեալ օգնութեան հասան ՀԲԸ Միութեան մասնաճիւղերը՝ Հալէայի եւ Կիպրոսի մէջ: Բարեգործականի կեդրոնը մեզի օգնութեան հասաւ 10.000 տղարով, ուրիշ մըն ալ 3.000 տղարով: Իսկ մնացեալը տուաւ մեր ժողովուրդը ու կը շարունակէ տալ: Մեր գաղութը աղքատ գաղութ է, ժողովուրդը, միութիւնները, եկեղեցիները նիւթապէս հագի-հագ իրենք-զիրենք կը հոգան...»: ¹⁷⁰ Այսօր Միության շաբաթական դպրոցներ գործում են Յամբոլում, Հասքովոյում, Սիվեմում, Պլովդիվում եւ այլուր, իսկ Բուրգասում նաեւ ամառային ճամբար: Բուլղարիայի մասնաճյուղերի կազմակերպական մեծ կարողությունների մասին է վկայում արդեն 2002թ. Սոֆիայում XI Եվրոպական մարզական խաղերի անցկացման փաստը: Եվս երկու տարի անց՝ 2004թ. ծովափնյա Ալբինա քաղաքում կայացան Միության XVII Համահայկական մարզական խաղերը, որոնց մասնակիցներն էին Ամերիկայի, Եվրոպայի եւ Միջին Արեւելքի 12 երկրների երիտասարդներ: Ուշագրավ է, որ չնայած իր փոքր թվին (շուրջ 30 հազ.), տեղի հայությունը հաջողությամբ ներգրավվում է երկրի քաղաքական կյանքում: Այդ առումով ՀԲԸ Միության համար հատուկ կարեւորություն ստացավ Սոֆիայի մասնաճյուղի վարչության անդամ 25-ամյա իրավաբան օրիորդ Կատար Հ/Ն/աչիկյանի երկրի խորհրդարանի անդամ ընտրվելու փաստը: ¹⁷¹

Կանադայում

Վերը արդեն նշվել է Միության հիմնադիրներից Երվանդ Աղաթոնի մեծ դերը Արեւմտքի երկրներում եւ հատկապէս Ֆրանսիայում Միության մասնաճյուղերի կազմավորման գործում: Նրա ձգտումը՝ նորանոր մասնաճյուղեր հաստատել յուրաքանչյուր հայաբնակ քաղաքում, կարծես, ի գորտ էր հաղթահարել բոլոր տեսակի սահմանները: Դրա վկայություններից էր հետևյալ կարճ հաղորդագրությունը «Միութիւն» ամսագրի 1925թ. համարներից մեկում. «Թորոնթոյի մասնաճիւղ (Գանատա), կազմուած Տ. Ե.Աղաթօն Պէյի ջանքերով եւ տեղւոյն յայտնի ազգայիններէն Տ.Լ.Էտոն Պապայեանի նախաձեռնութեամբ»: ¹⁷²

Ինքը՝ Երվանդ Աղաթոնը, թե՛ այդ ժամանակ եւ թե՛ հետագայում երբեք էլ չեղավ Կանադայում, եւ նրա հանդիպումը Լեոն Պապայանի հետ տեղի էր ունեցել Ֆրանսիայում: Լեոն Պապայանը Կանադա էր եկել Թուրքիայի Պրուսա քաղաքից: Ժամանակի ընթացքում դառնալով այդ երկրի ամենախոշոր գորգավաճառներից մեկը՝ նա այդ գործունեությունը

դիտեց որպէս միջոց՝ հայ ժողովրդին ծառայելու համար: Մասնավորապէս, նրա նախաձեռնության եւ նվիրատվության շնորհիվ Սենտ Կետրինգ քաղաքում 1930թ. կառուցվեց Կանադայում առաջին Հայ Առաքելական Ս.Գրիգոր Լուսավորիչ եկեղեցին: ¹⁷³ Առաջին Աշխարհամարտից հետո նրա նախաձեռնությամբ Կանադայի Հայկական Նպաստամատույց (Armenian Relief Association of Canada) բարեսիրական կազմակերպությունը, սկսած 1923թ., այդ երկիր տեղափոխեց շուրջ հարյուր հայ որբեր, որոնք տեղավորվեցին Տորոնտոյի մերձակա Ջորջթաուն ագարակում: «Մորճթաունի տղոց» պատմությանը նվիրված են գրքեր եւ հոդվածներ, ¹⁷⁴ իսկ այստեղ նշեմ միայն մի դրվագ՝ կապված որբերի ազգային դաստիարակության հետ: Լեոն Պապայանը, գիտակցելով գյուղական պայմաններում նրանց սպառնացող արագ ապագայնացումը, կազմակերպեց հատուկ միջոցառումներ, այդ թվում նաեւ հայերենի դասընթացներ: «Բայց այս հսկողութիւնը դիր չէր գար Գանատայի Հայկական Նպաստամատույցին, որ միշտ աշխատեցաւ խոչընդոտներ յարուցանել, որուն վրայ, Միութեան ողբացեալ Հիմնադիրը, Պօղոս Նուպար փաշա, քանիցս դիմումներ կատարեց Գանատայի թե՛ նախարարապետին եւ թե՛ ուրիշ պաշտօնական անձերու, որպէսզի Տ.Պապայեան կարենայ իր հսկողութիւնը կատարել անարգել, մանաւանդ որ ժամանակին այդ պայմանով միայն, եւ Թօրօնթօ փոխադրուած որբերը իբր հայ մեծցնելու բացարձակ խոստման մը վրայ, որբերը յանձնուած էին վերոյիշեալ Գանատական կազմակերպութեան»: ¹⁷⁵

Պողոս Նուպարի եւ նրա գործընկերների հետ Լեոն Պապայանը ծանոթացել էր Ֆրանսիայում եղած ժամանակ եւ մեծապէս ներշնչվել էր նրանց ազգային գաղափարներից ու գործունեությունից: Վերադառնալով Տորոնտո՝ Լ.Պապայանը ձեռնամուխ եղավ Կանադայում ՀԲԸ Միության առաջին մասնաճյուղի կազմավորմանը: Հասկանալու համար նրան սպասող դժվարությունները, հարկ է նշել, որ այդ տարիներին դեռ շատ փոքր թվով հայեր էին հաստատվել Կանադայում, նախ եւ առաջ երկրի ներգաղթային խիստ օրենքների պատճառով: Կանադահայ պատմաբան Ջապել Կապրիելյան-Չերչիլի տվյալներով, մինչեւ 1914թ. նրանց թիվը շուրջ 2.000 էր, եւս մոտ 1.300 հայ ներգաղթել էին Կանադա 1920-ական թթ.: ¹⁷⁶ Այս մարդկանց ճնշող մեծամասնությունը բնակվում էր ոչ թե Տորոնտոյում կամ Մոնրեալում, այլ Օնտարիոյի հարավում՝ Համիլտոն, Սենտ Կետրինգ, Բրենթֆորդ քաղաքներում, ուր աշխատուժի մեծ պահանջարկ կար: Ինչ վերաբերում է Տորոնտոյին, ապա այստեղ, ըստ «Յուշարար» ամսագրի, նույնիսկ 1940-ական թթ. 40 տուն հայություն կար: ¹⁷⁷ Եվ, այնուամենայնիվ, Լ.Պապայանի համառ ջանքերի շնորհիվ 1925թ.

օգոստոսին կազմավորվեց ՀԲԸ Միության Տորոնտոյի մասնաճյուղը՝ իր իսկ ատենապետությամբ: Այդ տարիներին Տորոնտոյում գործող Կանադայի Հայ Միության (Armenian Union of Canada) հիմնադիրներից Օգսեն Դեղձունյանը վերհիշում էր. «1930-1940-ական թթ. ՀԲԸ Միությունը աստիճանաբար փոխարինեց Կանադայի Հայ Միությանը՝ օժանդակելով համայնքի մշակութային և բարեսիրական շատ ձեռնարկներ: 1920-ական թթ. վերջերից մինչև 1940-ականների կեսերը Տորոնտոյի ՀԲԸ Միությունը հանգանակեց ավելի քան \$ 37.000 ի նպաստ հայկական որբանոցներին, դպրոցներին և Կովկասի ու Միջին Արևելքի փախստականներին»:¹⁷⁸ Իսկ Լ. Պապայանը «... ոչ միայն դրամապետ անդադար մեծագումար նուրբներ ջրած է հայ որբանոցներու, եկեղեցիներու, հիւանդանոցներու, Հայաստանի մէջ թէ արտասահման, այլ նաեւ մինչեւ այսօր իր եօթանասուներորդ տարին ան առանց բացակայելու կ'երթայ Նիւ Եորք ամէն ամիս, մօտաորոպէս 550 մղոն ճամբայ, Կեդրոնական Վարչութեան ժողովներուն իր ներկայութիւնը ու աջակցութիւնը բերելու»:¹⁷⁹

Կանադայի հայության պատմության մեջ նոր փուլ սկսվեց 1960-ական թթ. սկզբին՝ Մերձավոր Արևելքի երկրների հայության ներգաղթի հետևանքով: Վերը արդեն նշվեց, թե որքան մեծ էր «արևելյան» այդ ներգաղթի ազդեցությունը ԱՄՆ-ի հայության ազգային կյանքում: Ընդհանուր առմամբ նույն պատկերն էր Կանադայում, որոշ առանձնահատկություններով: Այստեղ նորեկների ազդեցությունը առավել շոշափելի էր և ուժեղ, նկատի առնելով «հին» կանադահայերի համեմատաբար փոքր թվաքանակը և նրանց ցրված լինելը: Մինչդեռ, նորեկ հայերի ճնշող մասը բնակություն հաստատեց Կանադայի երկու ամենախոշոր քաղաքներում՝ Տորոնտոյում և Մոնրեալում, ուր մինչ այդ հայերի քանակը առավել աննշան էր՝ հարավային Օնտարիոյի վերոհիշյալ քաղաքների համեմատ: 1962թ. տվյալներով, կանադահայերի մոտ 75%-ը բնակվում էր Օնտարիո և մոտ 25%-ը Կվեբեկ նահանգներում: 1986թ. մարդահամարի տվյալներով, Օնտարիոն շարունակում էր դեռ քանակապես գերակշռել, բայց 1991թ. արդեն զիջում էր Կվեբեկին: Նույն 1991թ. Կվեբեկի հայության 98%-ը բնակվում էր Մոնրեալում, իսկ Օնտարիոյի հայության 73%-ը՝ Տորոնտոյում:¹⁸⁰ Դրանով իսկ հին և նոր կանադահայերի միջև հակասությունները, որոնց հիմքում ապրելաձևի և ազգային գործելակերպի առանձնահատկություններն էին, հասցվեցին նվազագույնի: Այն իմաստով, որ քանակապես գերակշռող նորեկները հնարավորություն էին ստանում կազմակերպել ազգային կյանքը՝ համաձայն Արևելքի երկրներում ձեռնարկված ավանդույթների և կենսափորձի:

Դրան նպաստող կարևոր հանգամանք էր նաև այն, որ նորեկ հա-

յերը ընդհանուր առմամբ կրթված, տեղական լեզուներին տիրապետող, ֆինանսապես ապահովված և տարբեր մասնագիտությունների տեր մարդիկ էին, ինչի շնորհիվ նրանք, մի կողմից, արագ հարմարվում էին ընդունող երկրի պայմաններին, իսկ մյուս կողմից՝ ի վիճակի էին իրագործել իրենց ազգամշակութային ծրագրերը:

Այդ առումով հատկապես կարևոր էր համախմբված բնակվելու նրանց ձգտումը՝ Հայեպի կամ Բեյրութի օրինակով, ինչի բազում առավելությունները իրենց քաջ հայտնի էին: Դրա իրականացումը, սակայն, այն էլ Տորոնտոյի և Մոնրեալի նման խոշոր քաղաքների դեպքում, կապված էր մեծ, առաջին հայացքից անհաղթահարելի դժվարությունների հետ: Այնուամենայնիվ, ժամանակի ընթացքում այն ինչ որ չափով իրագործվեց: Խիստ հատկանշական է, որ այս ձգտումը զուգորդվում էր ներհամայնքային քաղաքական-եկեղեցական բաժանումներով: Ջապել Կապրիելյան Չերչիլը նշում էր. «1979թ. ... դաշնակցականների խմբավորումը Տորոնտոյում հիմնեց կենտրոն Հայուեյ 401 և Դոն Վելի Պարկուեյի մոտակայքում ... Նոր շենքը հրապուրեց նորաբնակներին, որոնք հետագայում, նույն տարածքում կառուցեցին դպրոց (1982) և եկեղեցի (1990): Հայկական Բարեգործական Ընդհանուր Միությունը իր համալիրը կառուցեց հարեանությամբ»:¹⁸¹

Տորոնտոյում ՀԲԸ Միության համալիրի կառուցումը արդյունք էր տեղի մասնաճյուղի գործունեության ակնհայտ աշխուժացման, որը հնարավոր դարձավ նույն նորեկ հայերի շնորհիվ: Կարճ ժամանակում նրանց ջանքերով կազմավորվեցին Միության երիտասարդական, սկսնակական, մարզական և գեղարվեստական խմբեր: Այդ կազմակերպությունների արդյունավետությունը մեծապես պայմանավորված էր նաև նրանով, որ Տորոնտոյի հայության, ներառյալ Միության մասնաճյուղի անդամների մեծամասնությունը, կազմում էին 45 տարեկանից ցածր մարդիկ: Արդեն 1967թ. ՀԲԸ Միության Տորոնտոյի մասնաճյուղը պաշտոնապես ճանաչվեց կանադական իշխանությունների կողմից Արմեն-Օնտարիո անունով:

Տորոնտոյի մասնաճյուղի գործունեությունը ընդարձակելու նպատակով ՀԲԸ Միության նախագահ Ա. Մանուկյանի և մասնաճյուղի հիմնադիր Լ. Պապայանի այրի՝ Փիրուզ Պապայանի նվիրատվության շնորհիվ գնվեց հողամաս սեփական կենտրոնի կառուցման նպատակով: Հետագա մի քանի տարիների ընթացքում Միության անդամները իրենց հերթին նվիրաբերեցին կենտրոնի շինարարության համար անհրաժեշտ գումարը: 1981թ. սեպտեմբերին տեղի ունեցավ Միության կենտրոնի շենքի պաշտոնական բացումը, որի կառուցման գործում նշանակալից էր մասնաճյուղի ատենապետ Պետրոս Չիլիկիրյանի դերը: Բոլոր հարմարություն-

ներով օժտված այս կենտրոնի առկայությունը, ինչպես և ակնկալվում էր, նոր որակ հաղորդեց մասնաճյուղի երիտասարդ անդամների գործունեությանը: Արանց, կանանց և երիտասարդական բաժինների ջանքերով կազմավորվեցին Հրաչեայ Ներսիսյան թատերախումբը, Կոունկ պարախումբը, Անի երգչախումբը, սկաուտական և մարզական խմբերը: Մասնաճյուղը սկսեց հրատարակել «Խօսնակ Թորոնթոյի», որին փոխարինելու եկավ «Տեսիլք» պարբերականը և ունեցավ իր հետուստածամբ, շնորհիվ ինչի էլ ավելի ընդլայնվեց նրա անդամների ու համակիրների շարքերը (1987- ին նրանց թիվը 500- ից ավելի էր):

1985թ. Միության կենտրոնում սկսեց գործել նաև ամենօրյա վարժարանը՝ 7 աշակերտով: Աշակերտների թվի մշտական աճը (1986- 1987 տարեշրջանում նրանց թիվը արդեն 50 էր) անհրաժեշտաբար թելադրում էր հատուկ շենքի կառուցում: Այս դեպքում բարերարի դերում հանդես եկան Դանիել և Ալիս Ջարուկյանները, որոնց նվիրատվությամբ կենտրոնի անմիջական հարեանությունը կառուցվեց իրենց անունը կրող Միության ամենօրյա վարժարանի շենքը: Դ. և Ա. Ջարուկյան դպրոցի տարբեր բաժիններում 2003թ. սովորում էր շուրջ 150 աշակերտ: Նկատի առնելով, որ այդ նույն տարածքում գործում է նաև հայ եկեղեցին, կարելի է ասել, որ Տորոնտոյի ՀԲԸ Միության համալիրը ներկայանում է որպես համայնքային կենտրոններից մեկը:

Մոնրեալում, ուր հայերի թիվը աննշան էր նույնիսկ Տորոնտոյի համեմատ, Միության մասնաճյուղը հիմնվեց շատ ավելի ուշ՝ 1957թ.: Մասնաճյուղի կայացման գործում շատ կարևոր դեր էր վերապահված Քերովբե Պտուկյանին, որը աստենապետեց շուրջ 13 տարի՝ 1958- 1970թթ. և որի գործատեղի սենյակներից մեկը տարիներ շարունակ ծառայեց որպես մասնաճյուղի գրասենյակ: Այդ շրջանում մասնաճյուղի գործունեության հիմնական ասպարեզը օգնությունն էր Արեւելքի երկրներից ներգաղթած հայերին՝ աշխատանքի և բնակարանի որոնում և այլն: Ինչպես և Տորոնտոյում, այստեղ նույնպես նորեկ հայերի, այդ թվում նախապես Միության անդամների թվի մշտական աճը կանխորոշեց Մոնրեալի մասնաճյուղի գործունեության աշխուժացումը: Մարզական և սկաուտական խմբերի կողքին, 1971թ. հիմնվեց Նուպար պարախումբը, տիկնանց, երիտասարդական և այլ հանձնախմբեր: Ուշագրավ էր Ռսկեայ Տարիքի հանձնախմբի հիմնումը 1974թ., որի նպատակն էր նյութական և բարոյական օգնությունը համայնքի տարեցներին:

«Մկրտիչ Մայիսասեանին ատենապետութեան շրջանին,- նշվում էր ՀԲԸՄ Միության հերթական տարեգրքում,- կը նախաձեռնուի սեփական կեդրոնի շինութեան, շնորհիւ դրամատնային փոխառութեան և Նախա-

գահ Ալեք Մանուկեանին նուիրատութեան»:¹⁸² Մոնրեալի Միության Ալեք Մանուկեան կեդրոնը, որը առաջինն էր Կանադայում, դռները բացեց 1977թ.: Նույն այդ տարին նշանավորվեց ևս մեկ կարևոր իրադարձությամբ, այն է՝ ՀԲԸ Միության Արմեն Քեպեք - Ալեք Մանուկեան ամենօրյա վարժարանի նոր շենքի հիմնարկեքը: Վարժարանը, որը առաջինն էր Կանադայում, հիմնվել էր դեռևս 1970թ., և, սակայն, սեփական շենքի բացակայության պատճառով մեծ թվով երեխաներ տարեցտարի գրկված էին այնտեղ սովորելու հնարավորությունից: Այս անգամ ևս օգնության ձեռք մեկնեց Ալեք Մանուկյանը, որը ստանձնեց շենքի կառուցման բոլոր ծախսերը: 2003թ. դպրոցի տարբեր բաժիններում սովորում էին շուրջ 600 աշակերտ: Միության Ալեք Մանուկեան կեդրոնի շենքում է տեղակայված նաև Միության մասնաճյուղի «Նոր Հայք» պաշտոնաթերթի խմբագրությունը, որը հրատարակվում է 1978 թվականից:

Կարևոր է նշել, որ Միության այս երկու հաստատությունները (նաև Թեքեյան մշակութային միության շենքը) տեղակայված են մի փողոցի վրա, որը Սան Լորանի քաղաքապետարանի որոշմամբ կոչվել է Ալեք Մանուկեան փողոց՝ ի գնահատանք նրա բարերարության: Ալեք Մանուկեան փողոցը, իր հերթին, գտնվում է Մեծ Մոնրեալի ամենահայաշատ մի տարածքում, որը կանադահայ սոցիոլոգ Կարո Չիչեկյանը պատկերավոր ձևով անվանել է «Հայկական միջանցք»:¹⁸³ Այս տարածքում է տեղակայված նաև՝ նույն հեղինակի խոսքերով ասած, «դաշնակցական-անթիլիասական» կենտրոնը, որի բաղկացուցիչ մասերն են Ս.Հակոբ եկեղեցին, Համազգային մշակութային միությունը, Հայ կեդրոնը, հայկական վարժարանը: Դժվար չէ նկատել, որ թե Տորոնտոյում և թե Մոնրեալում հաստատված հայերին որոշակի չափով հաջողվել է իրականացնել համախումբ բնակվելու իրենց ձգտումը, ինչը մեծապես պայմանավորել է նրանց աշխույժ ազգային գործունեությունը:

Կանադայում ՀԲԸ Միության երրորդ մասնաճյուղը հիմնվեց 1970թ. Ատլանտյան օվկիանոսի ափին՝ Վանկուվեր քաղաքում: Այս քաղաքում հայության թիվը 1980-ական թթ. շուրջ երկու հազար էր, որոնցից մոտ 40-ը Միության մասնաճյուղի անդամ էր: Որպես կենտրոն նրանց համար ծառայում էր Ս. Վարդան եկեղեցու Արարատ սրահը, ուր և կազմակերպվում էին տարբեր ձեռնարկներ: Նույն սրահում է գործում նաև 1974թ. հիմնված Միության շաբաթօրյա հայկական դպրոցը: Չնայած փոքրաթվությանը՝ մասնաճյուղի անդամների ջանքերով կազմավորվել էր նաև Սեւան պարախումբը:

Արգենտինայում

Լատինական Ամերիկայում ՀԲԸ Միության առաջին մասնաճյուղը հիմնվեց Արգենտինայում: XX դ. սկզբին, մինչև Առաջին Աշխարհամարտը այս երկրի մայրաքաղաք Բուենոս Այրեսում կար շուրջ 200 հայ¹⁸⁴, որոնք եկել էին Կիլիկիայի տարբեր վայրերից, 1909թ. Ադանայում թուրքական իշխանությունների կողմից կազմակերպված հայերի զանգվածային սպանություններից հետո: Բացառությամբ մեծաքանակ առևտրով մի քանի գբաղվողների, թե նրանք եւ թե հետագա տարիներին ներգաղթողները հիմնականում մանր առևտրականներ, խանութպաններ էին: Երկրի զարգացման ցածր աստիճանը, նորեկ հայերի անծանոթ լինելը տեղի ժողովրդին, նրա մշակույթին, լեզվին եւ ուրիշ այլ հանգամանքներ դժվարացնում էին հայերի արագ ինքնահաստատումը ինչպես տնտեսական, այնպես էլ այլ ասպարեզներում: Պատահական չէ, որ միայն 1938թ. հնարավոր դարձավ առաջին հայկական եկեղեցու կառուցումը Բուենոս Այրեսում: Առաջին տարիներին հայերի համար որպես հավաքավայր էր ծառայում մի սրճարան, որի տերը Զմյուռնիայից եկած հրեա էր եւ որի հասցեով էլ նրանք նամակներ էին ստանում հայրենիքից:

ՀԲԸ Միության մասնաճյուղը Բուենոս Այրեսում հիմնվեց 1911թ. մայիսին եւ, ինչպես նշում է արգենտինահայ պատմաբան Նարսիսո Բինայան Կարմոնան, այն եղավ առաջին հայկական կազմակերպությունը այդ երկրում:¹⁸⁵ Հիմնադրման նախաձեռնողներն էին Հմայակ Հակոբյանը (նա էլ դարձավ մասնաճյուղի առաջին ատենապետը), Մ.Մեծատուրյանը եւ Ա.Բաշաճյանը, որոնց գործընկերներն էին Հայկ Մոսկոֆյանը, Յ.Պարգեւյանը եւ այլք: 1911թ. մայիսի 7-ին հիմնված կազմակերպությունը նախապես կոչվել է «Հայ գաղութի բարեգործական եւ լսարանական Միություն»: ...Նորակազմ Միությունն հետապնդած նպատակը պիտի ըլլար՝ նոր ժամանող հայրենակիցներուն օժանդակել ապահովելու իրենց ապրուստը, կապ ստեղծել գաղթական հայերու միջեւ ու վառ պահել անոնց մէջ ազգային զգացումները: Կը կազմուի ծրագիր- կանոնագիր մը, որուն 6-րդ յօդուածին մէջ ըսուած է.- «Եթէ ընկերությունը կազմալուծուելու հարկին տակ գտնուի, իր բոլոր գույքերը վաճառելով՝ իր ունեցած գումարին հետ միասին պիտի դրկէ ՀԲԸ Միության կեդրոնատեղին»:¹⁸⁶

Արգենտինահայ մեկ այլ պատմաբան՝ Վարդան Մատթեոսյանը (այժմ բնակվում է ԱՄՆ-ում) իր անտիպ աշխատության մեջ օգտագործելով նշված կազմակերպության 1911թ. արխիվային փաստաթղթերը, որոնք վերնագրված են «Տեսող արձանագրությանց Հայ Բարեգործական Ընկերության Արժեքների Հայոց (ՀԲԸՄ)», իր հերթին նույն կերպ է ան-

վանում այն:¹⁸⁷ Նույն կերպ էր որակում այդ կազմակերպությունը նրա հիմնադիրներից Հ.Մուսկոֆյանը իր 1933թ. հրատարակած հոդվածում:¹⁸⁸ Կազմակերպության երիտասարդ հիմնադիրները, նպատակ ունենալով ստեղծել ՀԲԸ Միության մասնաճյուղ, այնուամենայնիվ, իրենց իրավունք չեն վերապահել առաջին իսկ օրից օգտագործել «Հայկական Բարեգործական Ընդհանուր Միություն» անվանումը: Դա անկարելի էր անել առանց ՀԲԸ Միության համաձայնության, որը ստանալու համար պետք է փաստարկվեին նորաստեղծ կազմակերպության կայացումն ու կենսունակությունը: Եվ փաստարկները չուշացան. «...ամէն կիրակի տեղի կ'ունենան վիճաբանական ժողովներ, գիշերային դասախօսություններ, ընկերական հաւաքոյթներ, հայկական նուագ ու երգ, ինչպէս նաեւ ունեցանք մեր համեստ Գրադարան-ընթերցարանը»:¹⁸⁹ 1912թ. մարտ ամսից կազմակերպությունը կապ է հաստատում ՀԲԸ Միության Կենտրոնական Վարչության հետ, իսկ եւս մեկ տարի անց՝ 1913թ. ապրիլին իր անդամական ժողովում որոշում է վերանվանվել որպես ՀԲԸ Միության մասնաճյուղ: «58 անդամներու ստորագրութեամբ դիմումնագիր կը դրկուի ՀԲԸ Միութեան կեդրոնին, որով կը խոստանան հաւատարիմ մնալ Բարեգործականի ծրագրին եւ հպատակիլ կեդրոնական մարմիններու բոլոր հրահանգներուն»:¹⁹⁰

Միության մասնաճյուղը, լինելով միակ գործող կազմակերպությունը Բուենոս Այրեսում, կամա թե ակամա, պատասխանատվություն էր ստանձնում համայնքային կյանքի, նրա առանձին կառույցների ձեւավորման գործում: Դա առավել նկատելի եղավ տեղի հայության կրոնական կյանքի կազմակերպման ասպարեզում:

Դեռ վաղ ժամանակներից այս կամ այն երկիր գաղթած հայերի համար առաջնային խնդիրներից է եղել եկեղեցու, որպես, Մաղաքյա արք. Օրմանյանի բառերով ասած, «դադարեալ Հայրենիքի մարմնավորման», կառուցումը: Դա մի բարդ խնդիր էր, որի լուծումը պահանջում էր ժամանակ: Եվ բարդությունը ոչ միայն եւ ոչ այնքան սեփական եկեղեցի ունենալն էր, որքան հոգեւորականների բացակայությունը: Բուենոս Այրեսում հաստատված հայերը զուրկ էին թե՛ մեկից եւ թե՛ մյուսից, ուստի եւ իրենց կրոնական պետքերը բավարարելու համար հարկադրաբար դիմեցին ոչ սովորական միջոցների: Անհրաժեշտության դեպքում նրանք վարձում էին անգլիկան մի եկեղեցի, ուր անգլիացի հոգեւորականների քարոզները հայ հավատացյալների համար թարգմանում էր Հայկ Մոսկոֆյանը, իսկ Հովհաննես Պարգեւյանը երգում էր շարականներ: Կիմ Լեքիմյանի արտահայտությամբ՝ նման «հիբրիդ» ծառայությունը, որը ինչ-որ չափով պետք է լրացներ սեփական եկեղեցու բացը, այնուամենայնիվ առաջացրեց հա-

լերի դժգոհությունը: Նման անորոշ իրավիճակում է, որ քաղաքում հայտնվում է Հովհաննես քահանա Պարասադանյանը: Հայրենիքից՝ Արաբկիրից նա իր որդիների հետ անձնական պատճառներով արտագաղթել էր, նպատակ ունենալով հաստատվել ԱՄՆ-ում, սակայն, ստիպված էր եղել գալ Արգենտինա: Նրա հայտնվելը մեծ անակնկալ էր Բուենոս Այրեսի հայերի համար, նկատի առնելով, որ տեղ հայրը չունեի եւ ոչ մի պաշտոնական հանգամանք: Առավել անակնկալ էր Բարեգործական Ընկերության համար, երբ 1912թ. հունվարին տեղ հայրը դիմեց նրան՝ առաջարկելով իր՝ որպես հոգեւորականի, ծառայությունները: Բարեգործական Ընկերությունը, որպես այդպիսին, իրավասու չէր զբաղվել նման հարցով, եւ, սակայն, պարտավոր էր անել դա, լինելով այդ ժամանակ միակ հայկական կազմակերպությունը քաղաքում: Քահանայի ժամանումից մոտ երկու շաբաթ անց Ընկերությունը կազմակերպեց հատուկ մի հավաքույթ, որի ընթացքում հանգամանկա՞ծ գումարը հանձնեց նրան: Այս դեպքերը առիթ հանդիսացան, որպեսզի Բարեգործական Ընկերությունը նախաձեռնի «Արգենտինայի հայ եկեղեցասիրաց միության» հիմնումը: Եվ ձգտելով խթանել նորաստեղծ միության գործունեությունը՝ տրամադրեց իր սրահը՝ ժողովներ գումարելու համար, նշելով միաժամանակ, որ «...եկեղեցական արարողություն կատարելը արգիլուած է, քանզի հոս գրադարան եւ լսարան մ'է եւ եկեղեցական արարողություն կատարել՝ ըստ եկեղեցական կանոնի աններելի է»:¹⁹¹ Նույն տարվա ապրիլի 19-ին՝ Ս.Ջատիկի օրը իր տանը տեղ հայրը մատուցեց առաջին պատարագը Արգենտինայում, որին ներկա էին 85 հայ հավատացյալներ: Պատարագից հետո Եկեղեցասիրաց միության ժողովը ընտրեց իր վարչությունը, որն էլ այդուհետ պետք է զբաղվեր եկեղեցական կյանքի կազմակերպմամբ, այդ թվում նաեւ սեփական եկեղեցու կառուցման հարցերով:¹⁹²

Բարեգործական Ընկերությունը ձգտում էր զբաղվել իր կանոնագրով նախատեսված հարցերով: Այսպես, նշված դեպքերին զուգընթաց նա կազմեց մի հատուկ հանձնախումբ՝ գործազուրկներին աշխատանք հայթայթելու նպատակով: Որոշ ժամանակ անց Ընկերությունը բացեց նաեւ գիշերային դասընթացներ՝ իսպաներեն սովորելու համար, ինչը մեծապես կարեւորվեց տեղի հայության կողմից:

Երբ Բուենոս Այրեսում հայտնի դարձան Արենտոյան Հայաստանում տեղի ունեցած հայկական ջարդերի մասին, Ընկերությունը՝ Եկեղեցասիրաց միության եւ երկու այլ նորաստեղծ կազմակերպությունների մասնակցությամբ կազմակերպեց հանրահավաք-ցույց, որի ընթացքում հանգամանկա՞ծ գումարը ուղարկվեց Կ.Պոլսի Հայոց պատրիարքարան: Քաղաքական բնույթի նման ձեռնարկի պարագայում Բարեգործական Ընկե-

րության նախաձեռնողի եւ կազմակերպչի դերում հանդես գալը նույնպես թելադրված էր այդ պահին ազգային այլ կազմակերպությունների, նախ եւ առաջ ազգային կուսակցությունների չգոյությանը (Դաշնակցություն եւ Հնչակյան կուսակցությունների տեղական միավորները ստեղծվեցին միայն 1914թ.):¹⁹³

Բարեգործական Ընկերության հեղինակության վկայություններից էր նաեւ այն, որ նշված հանրահավաք-ցույցի մասնակիցները փախագ էին հայտնել, որ այն միավորվի եկեղեցական վարչությունների (բացի Եկեղեցասիրացից կազմվել էր նաեւ Հայ Քրիստոնեական միությունը) հետ: Նման գաղափարը, ըստ ամենայնի, թելադրված էր քաղաքի փոքրաթիվ հայությանը գոնե եկեղեցու պարագայում համախմբելու եւ միասնական հանդես գալու ցանկությամբ: Իսկ Բարեգործականը, որպես արդեն կայացած կազմակերպություն, պետք է ապահովեր այդ համախմբումը եւ որոշ իմաստով դեկավարեր այն, գոնե սկզբնական շրջանում: Առաջարկը անշուշտ պատվաբեր էր Բարեգործականի համար, սակայն այն չգայթակղվեց եւ սթափ գնահատեց դրա հետեւանքները: Ամենակարեւորն այն էր, որ միավորումը վաղ թե ոչ վտանգելու էր կազմակերպության ինքնուրույնությունը: Այդ իսկ պատճառով էլ Բարեգործականը համաձայնվեց երեք կազմակերպությունների միավորման գաղափարին, այն պայմանով, սակայն, որ «...իրաքանչիւր ընկերութիւն իւր զատ վարչական ժողովը եւ հաշուեկշիռը ունենայ»:¹⁹⁴ Հետագա դեպքերը հաստատեցին նման դիրքորոշման արդարացի լինելը: Դաշնակցության եւ Հնչակյան կուսակցությունների գործունեության աշխուժացումը Բուենոս Այրեսում, ինչպես եւ ամենուրեք, վերածվեց իշխանության պայքարի, այդ թվում նաեւ եկեղեցու հարցում: Բարեգործական Ընկերությունը, որը, ինչպես արդեն նշվեց, 1913թ. ապրիլից վերանվանվել էր ՀԲԸ Միության տեղական մասնաճյուղի, ոչ միայն հետո մնաց այդ պայքարից, այլեւ նույն եկեղեցական վարչության խնդրանքով փորձեց օժանդակել ծագած տարածայնությունների հարթեցմանը:¹⁹⁵

Հետագա տարիներին նույնպես Միության մասնաճյուղը շարունակեց իր գործն մասնակցությունը բերել համայնքի ազգային կյանքում: Այսպես, օրինակ, 1918թ. այն կարեւոր դեր խաղաց Ազգային Միության հիմնադրման գործում, որը միավորում էր տեղի ազգային կազմակերպությունները: Սակայն քաղաքական կազմակերպությունների իրարամերժ կեցվածքը, նրանց մեկնատիրական ձգտումները թելադրեցին Միության մասնաճյուղին էլ ավելի հավատարիմ մնալ իր՝ որպես ոչ քաղաքական կազմակերպության կարգավիճակին եւ դրանից բխող գործելակերպին:

Բուենոս Այրեսի ՀԲԸ Միության մասնաճյուղը դեռ նոր էր սկսել

գործել որպես այդպիսին, երբ 1915թ. առաջին լուրերը հասան Թուրքիայում սկիզբ առած հայերի ցեղասպանության մասին: Մասնաճյուղի համար առանձնակի կարեւորություն ուներ ՀԲԸ Միության նախագահ Պողոս Նուպարի նամակը, որում նա, տեղեկացնելով կատարվածի մասին, դիմում էր ի նպաստ արեւմտահայության հանգանակություն կազմակերպելու առաջարկով: Արդեն մայիսին մասնաճյուղը կազմակերպեց առաջին սզահանդեսը, իսկ որոշ ժամանակ անց նաեւ երկրորդը, որին մասնակցեց քաղաքի ողջ հայությունը: Մասնաճյուղը սզահանդեսներ կազմակերպեց նաեւ Արգենտինայի եւ Ուրուգվայի այլ հայաբնակ քաղաքներում: «Հուլիսին, հանգանակությունների արդյունքում,- նշում է Կիմ Հեքիմյանը,- հավաքվել էր ավելի քան 1311 պետ, ինչպես Բուենոս Այրեսում, այնպես էլ Կորդոբայում, Բահիա Բլանկայում, Մենդոզայում, Պունտա Ալտայում եւ Ուրուգվայում՝ Մոնտեվիդեոյում ապրող հայերի շնորհիվ»:¹⁹⁶ Ուշագրավ է, որ Միության մասնաճյուղը «նույն նպատակով եւ յատուկ յանձնախումբերու միջոցով հանգանակութիւն կատարած է արաբական շրջանակներու մէջ»:¹⁹⁷

Պատերազմի տարիներին այս հեռավոր երկրում նույնպես կազմվեցին կամավորական խմբեր (մոտ 150 հոգի), որոնք մեկնում էին Ֆրանսիա՝ համալրելու Արեւելյան (Հայկական) լեգեոնի շարքերը եւ որոնք դաշնակիցների զորքերի հետ պետք է տոնեին Արարայի հաղթանակը: Այդ խմբերի մեջ էին նաեւ Միության երիտասարդ անդամները, որոնց մեկնումը տեղի էր ունենում շատ հանդիսավոր պայմաններում: Այսպես, Միության մասնաճյուղը «կազմակերպած է ողջերթի հանդէս մը ի սրատի Բարեգործականի գործօն անդամներէն՝ օդաչու Միհրան Խաչեանի, որ իր ընկերներով որպէս կամաւոր Ֆրանսա մեկնած է»:¹⁹⁸

Առաջին Աշխարհամարտը մի նոր եւ անսպասելի խնդիր առաջացրեց արգենտինահայերի համար: Քանի որ Արգենտինան Անտանտի երկրների դաշնակիցն էր, տեղի հայերը, լինելով Թուրքիայի քաղաքացիներ, սկսեցին դիտվել որպէս թշնամի երկրի ներկայացուցիչներ: Այդ հանգամանքը, հայերի համար խիստ վիրավորական լինելուց զատ, ուներ եւ այլ անցանկալի հետեւանքներ: Արգենտինայում մեծ գործազրկության պայմաններում հայերի թրջահպատակ լինելը թե՛ էլ ավելի էր դժվարացնում աշխատանք գտնելը եւ թե՛ հարմար առիթ էր նրանց աշխատանքից ազատելու համար: Ստեղծված իրավիճակում մեծ թվով հայեր դիմեցին Միության մասնաճյուղին, որպեսզի իշխանությունների մոտ երաշխավորի իրենց ազգությամբ հայ, այլ ոչ թե արաբ կամ թուրք լինելը: Երկրի իշխանությունների հետ Միության մասնաճյուղի եւ Եկեղեցական հոգաբարձության բանակցությունների, նրանց խնդրանքով տարբեր երկրների

դեսպանատների միջնորդությունների արդյունքում տեղի հայերին տրվեցին նոր՝ նրանց հայ լինելը հաստատող փաստաթղթեր:¹⁹⁹

1920թ. սկիզբ առավ հայերի հետեղեռնյան շրջանի ներգաղթը Արգենտինա եւ Հարավային Ամերիկայի այլ երկրներ: Տեղի գործող հայկական կազմակերպությունների, այդ թվում նաեւ ՀԲԸ Միության մասնաճյուղի գործունեության հիմնական նպատակն է դառնում նրանց աշխատանքով եւ բնակարանով ապահովումը: Դրա հետ մեկտեղ զգալի աշխուժանում է ազգային-մշակութային գործունեությունը. Միության մասնաճյուղը կազմակերպում է թատերական հանդեսներ, կազմավորում է կանանց երգչախումբ եւ այլ ձեռնարկներ: 1920-ական թթ. սկզբին նման հանդեսներից գոյացած գումարները հատկացվում էին ի նպաստ հայ որբերին՝ որպես Ոսկեղեն Կիրակիի հանգանակություն: 1922թ. նույնպես, տեղեկանալով Չմյուռնիայի հայերի ողբերգության մասին, մասնաճյուղը կազմակերպեց հատուկ հանգանակություն:

Երիտասարդական Լիգան

1927թ., երբ Արգենտինայի Հայ Պատանեկան Միությունը կազմալուծվեց, իր գումարներն ու գույքը հանձնեց ՀԲԸ Միության մասնաճյուղին, որն էլ ստանձնեց նաեւ նրա գործառույթները: Բինայան-Կարոնայի կարծիքով, դրանով իսկ սկիզբ դրվեց Միության երիտասարդական կազմակերպությանը, որը տարիներ անց՝ 1940 թ. կոչվեց Երիտասարդական Լիգա:²⁰⁰ Այնուամենայնիվ, ավանդաբար համարվում է, որ Բուենոս Այրեսի Միության Երիտասարդական Լիգան հիմնվել է հենց 1940թ. նոյեմբերին: Կազմակերպության հիմնական նպատակներն էին.

«Մշակել հայ երիտասարդութեան ցեղային եւ ազգային գիտակցութիւնը եւ անոնց ընկերային համերաշխութիւնը,

Յարգել Արխեմթիւնեան պետութիւնը եւ հպատակել իր օրէնքներուն, Սատարել իր անդամներու բարոյական, մտաւորական եւ ֆիզիքական ինքնազարգացման, գլխաւորաբար գրական, գեղարուեստական եւ այլն մարզերու մէջ,

Ծանօթացնել մեր հայրենիքը, ազգային պատմութիւնը, գրականութիւնը եւ առհասարակ հայ տաղանդը անցեալին եւ ներկային մէջ,

Ջարգացնել նոր սերունդին մէջ ինքնագիտակցութեան, կարգապահութեան, ձեռներէցութեան, զոհողութեան եւ համագործակցութեան ոգին,

Հետապնդել ՀԲԸ Միութեան խողովակով անոր ծրագրած բարձր նպատակները»:²⁰¹

Լիգային կարող էին անդամակցել 12- 35 տարեկան երկսեռ երիտասարդներ, որոնք պարտավոր էին ստորագրել հատուկ խոստումնագիր: Այդ խոստումնագրում ուշագրավ են հետևյալ տողերը. «Կ'երդնում հոգեւին ծառայել ազգիս եւ հայրենիքիս, անկեղծօրէն սիրել ՀԲԸ Միութիւնը, վարքով եւ գործքով անձնաւորել անոր ուղղութիւնը, լիովի յարգել Երիտ. Լիկայի ծրագիրը, միշտ բարձր պահել հայ երիտասարդութեան եւ Երիտ. Լիկայի վարկը, իսպառ հրաժարիլ կուսակցական հակամարտ վեճերէ ...»:²⁰² Այս վերջին կետը խիստ այժմեական էր, քանզի այս երկրում նույնպէս ազգային կուսակցությունների հակամարտությունը ընդունել էր այնպիսի չափեր, որ Միության մասնաճյուղը այլեւս ի վիճակի չէր ստանձնել հաշտարարի դերը:

Հիմնադրման առաջին իսկ օրից Լիգան, նրա ենթահիմնադրամբերը («Հայթաթիչ եւ պրոպագանդայի, հանդէսի, գեղարուեստի, մշակութային եւ ուսանողական») ծավալեցին աշխույժ գործունեություն՝ դասախոսություններ, հանդես-պարահանդեսներ, խմբակային զբոսանքներ եւ այլն: Ընորհիվ այդ ամենի Լիգայի կազմավորումից երկու տարի անց նրա անդամների թիվը հասավ 421-ի, այդ թվում նաեւ 25 համալսարանական ուսանող:

1942թ. հուլիսին Բուենոս Այրեսում բացվեց Բարեգործական Տունը: Նման կենտրոն ունենալու անհրաժեշտությունը զգացվում էր վաղուց, իսկ Երիտասարդական Լիգայի կազմավորումը դարձրեց այն անհետաձգելի: Բոլոր հարմարություններով օժտված երկհարկանի շենքը (այն գնել եւ նպաստավոր պայմաններով Միության մասնաճյուղին վարձով էր տվել նրա վարչության ատենապետ Հայկազ Սարին) գտնվում էր Ս.Գրիգոր Լուսավորիչ եկեղեցու եւ Հայ Կեդրոնի հարեւանությամբ, ինչը մեծապէս նպաստեց նրա արդյունավետ օգտագործմանը: Արդեն մի քանի ամիս անց, Բարեգործականի Տան մեջ սկսեց գործել Երիտասարդական Լիգայի գրադարան-ընթերցասրահը: Առավել արդյունավետ ընթացան հայերենի երեկոյան դասընթացները, որոնցից ձրիաբար օգտվում էին թե նրա անդամները եւ թե բոլոր ցանկացողները:²⁰³ Համահամայնքային նշանակություն ունեին նաեւ դասախոսությունները, որոնցով հանդես էին գալիս հայտնի մտավորականները, ինչպէս, օրինակ, պատմաբաններ՝ Կորդովայի Միության մասնաճյուղի ատենապետ դոկտոր Հարություն Աստուրյանը եւ պրոֆ. Նարսիս Բինայանը:

Բուենոս Այրեսի Երիտասարդական Լիգայի կարեւոր ձեռնարկումներից էր հարեւան երկրների իրենց գործընկերների հետ հարաբերությունների հաստատումը: Այն սկիզբ առավ 1946թ., երբ նրանց պատվիրակու-

թյունը Մոնտեվիդեոյում մասնակցեց տեղի նոր կազմավորված Երիտասարդական Լիգայի առաջին հանդեսին:²⁰⁴

Կորդովայում

Արգենտինայում Միության երկրորդ մասնաճյուղը հիմնվեց ամենախոշոր քաղաքներից մեկում՝ Կորդովայում (Կորդոբայում): Այդ տարիներին Կորդովայում ապրում էր շուրջ 100 հայ՝ ծնունդով նույնպէս Հայկական Կիլիկիայից: Կորդովայում, ինչպէս եւ Բուենոս Այրեսում Միության մասնաճյուղը եղավ հայկական առաջին եւ որոշ ժամանակ՝ միակ կազմակերպությունը, որն իր շուրջն էր համախմբել տեղի բոլոր հայերին: Ըստ «Ոսկեմատեան»-ի, Կորդոբայի մասնաճյուղը «...հաստատուած է 1913ին, բայց մինչէ 1918 նշանակելի գործունէութիւն մը չէ ունեցած»:²⁰⁵ Ըստ երեւութին, այդ «անգործունէութեան» պատճառով էլ «Տարեցոյց»-ը որպէս հիմնադրման տարի, նշում է հենց 1918թ..²⁰⁶ Այդ թվականին մասնաճյուղը ուներ ընդամենը 43 անդամ եւ չնայած դրան՝ հաջողությամբ կազմակերպում է մի շարք հանգանակություններ՝ ի նպաստ հայ կամավորների, որբերի, Հայաստանի ներգաղթի եւ այլն: Մասնաճյուղի կարեւոր իրագործումներից էր Կորդովայի Գաղութային Միության կազմավորումը, որում միավորվեցին քաղաքի բոլոր անհատ հայերը եւ ազգային միությունները: Այստեղ նույնպէս մեծ խանդավառություն առաջացրին Առաջին Աշխարհամարտի ավարտը եւ Հայաստանի Առաջին Հանրապետության հիմնումը: «Զինադադարի առիթով,- գրում էր «Տարեցոյց»-ը,- երբ տեղական կառավարութիւնը ի պաշտօնէ կը հրաւիրէր գորտոպարնակ մեծ եւ փոքր յաղթական ժողովուրդները բերելու ազգային սեփական դրօշակներով իրենց մասնակցութիւնը կազմակերպուելիք տոհանցքին, հայերն ալ՝ հովանաւորութեամբ ՀԲԸ Միութեան Տեղական մասնաճիւղի, հանդիսաւոր թափօր կազմած կը հետեւէին շքեղագարդ բաց կարգի մը՝ ուր Մայր Հայաստան կը ներկայանար շղթայազերծ, ծաղիկներով թաթաւուն եւ Եռագոյն ի ձեռին»:²⁰⁷

Կորդովայի հայությունը՝ իր մեծամասնության մեջ արհեստավորներ եւ վաճառականներ, այդ տարիներին հասկանալի պատճառներով, չէր կարող պարծենալ մտավորականների առկայությամբ: Եվ եթե հայտնվում էին այդպիսիները, ապա հայտնի օրինաչափությամբ նրանք դառնում էին ՀԲԸ Միության հավատարիմ անդամներ: Դրա օրինակներից էր դոկտոր Հարություն Աստուրյանը: Նախնական ուսումը Մարաշում ստանալուց հետո, նա հետագայում շարունակեց այն վեճերիկում եւ Մյուն-

խենի համալսարանում (1912թ. նա հրատարակեց «Հայաստան եւ Հոռն» մեծածավալ մեմագրությունը): 1923թ. Հ.Աստուրյանը տեղափոխվում է Կորդովա, ուր հրավիրված էր տեղական դպրոցներից մեկում դասավանդելու ֆրանսերեն եւ լատիներեն: 1924թ. նա ընտրվեց ՀԲԸ Միության մասնաճյուղի ատենապետ եւ վերստին ստանձնեց այդ պաշտոնը 1940-ական թթ սկզբին:

Ուրուզվայ

Բուենոս Այրեսից հետո Մոնտեվիդեոն իր հայազգի բնակչությամբ եղել ու մնում է Հարավային Ամերիկայի երկրորդ քաղաքը: 1911-1915թթ. Ուրուզվայ ներգաղթել էր ընդամենը շուրջ 80 հայ, որոնք, ինչպես եւ Արգենտինայի դեպքում, հիմնականում Կիլիկիայից էին (մարաշցիներ, այնթապցիներ, քեսապցիներ եւ այլք): Նման թվաքանակը, իր հերթին, պայմանավորեց ազգային կյանքի կազմակերպման դանդաղ եւ դժվարին ընթացքը: Դրա վկայություններից է ՀԲԸ Միության Մոնտեվիդեոյի մասնաճյուղի հիմնադրման պատմությունը: Համաձայն «Ռակեմատեան ՀԲԸ Միութեան. 1906-1931»-ի, դա տեղի էր ունեցել 1924թ. օգոստոսին: «Դժբախտաբար, 1926-ին գաղութին մեջ գոյություն առած պառակտումներու հետեանքով, Մասնաժողովը կը կազմալուծուի եւ այլ եւս գործունեութեան ռեւէ նշան ցոյց չի տար, հակառակ յետագային Կեդրոնին կողմէ եղած դիմումներուն»:²⁰⁸

Ըստ ամենայնի, նման կարճատեւ գոյության պատճառով մասնաճյուղի գործունեությունը եղել է այնքան աննշան, որ նույնիսկ 1943թ. հրատարակած «Տարեցոյց Հարավային Ամերիկահայոց»-ում այն ընդհանրապես չի հիշատակվում: Համաձայն այս վերջինի, Միության մասնաճյուղը Մոնտեվիդեոյում հիմնվել է 1938թ.:

Պարզվում է, սակայն, որ դա դեռ ամբողջը չէ: Վարդան Մատթեոսյանը իր աշխատության մեջ, հենվելով մի շարք աղբյուրների վրա, բերում է նոր մանրամասներ: Նա գրում է. «Մայիս 28-ին 1915թ. Մոնթեվիդեոյի «Լա Ռասոն» օրաթերթը կը գրէր. «Այս առաւօտ մեզի այցելեց Հայկական Բարեգործական Ընդհանուր Միութեան պատուիրակութիւն մը, որ հոս ժամանած է իրենց ազգակիցներուն եւ այդ ժողովուրդին հետ համակրող անձերու միջեւ Կովկասի գաղթականներուն օգնութեան տրամադրելու լուծումները հաւաքելու համար: ...Նուիրատուութիւնները տեղական Յանձնախումբին կրնան առաքուիլ՝ փողոց Ինկլաթեոս 401...»: Վ.Մատթեոսյանը, ենթադրելով, որ նշված պատվիրակությունը ժամանել

էր Բուենոս Այրեսից, այն կարծիքն է հայտնում, որ «տեղական Յանձնախումբին» ակնարկությունը ՀԲԸ Միության մասնաճյուղի մը (Մոնտեվիդեոյում-Էդ.Մ.) մասին չի թուիր ըլլալ, այլ դրամահաւաքի նպատակով կազմակերպուած խումբի մը»: «Սակայն,- շարունակում է նա,- գոյութիւն ունէր ուրիշ խումբ մը, որ ըստ երեւոյթին կազմակերպական կառոյց մը ստեղծած էր»: Այդ կազմակերպությունը՝ «Հայ բնակիչներու կեդրոնը» Հարություն Չիլինկիրյանի գլխավորությամբ, նույն՝ 1915թ. հոկտեմբերին Բուենոս Այրեսի ՀԲԸՄ մասնաճյուղին հայտնում է իր կազմավորման մասին եւ խնդրում ճանաչել Մոնտեվիդեոյի մասնաճյուղ: Բուենոս Այրեսի մասնաճյուղը պատասխան նամակում, արժեւորելով Հ.Չիլինկիրյանի «ազգասիրական ձեռնարկը», այդուհանդերձ, ձեռնարահ է մնում ճանաչման հարցում, քանզի դա ՀԲԸ Միության Կենտրոնական Վարչության իրավասությունն էր:²⁰⁹ Հ.Չիլինկիրյանի ջանքերը, այնուամենայնիվ, ասպարոյուն չեղան. հենց նա էլ եղավ 1924թ. հիմնած Մոնտեվիդեոյի ՀԲԸ Միության մասնաճյուղի առաջին ատենապետը:²¹⁰

Այսպիսով, դեպքերի այլ ընթացքի դեպքում Մոնտեվիդեոյում նույնպես ՀԲԸ Միությունը կարող էր դառնալ առաջին ազգային կազմակերպությունը: Միության մասնաճյուղը կազմավորվեց 1924թ., սակայն, վերջնական հաջողությունը եկավ, ինչպես նշվեց, 1938թ., երբ ներգաղթի նոր ալիքի արդյունքում հայության թիվը Մոնտեվիդեոյում հասավ 5000-ի եւ երբ գիտակցվեց ՀԲԸ Միության՝ որպէս հատվածականությանը այլընտրանքային ուժի կարեւորությունը:

1946թ. կազմավորվեց Միության Մոնտեվիդեոյի մասնաճյուղի երիտասարդական բաժինը՝ Լիգան, որը հետագա տասնամյակներին հաջող գործունեություն ծավալեց մշակութային եւ մարզական ոլորտներում:

Բրազիլիայում

Թեւեւ Բրազիլիայի հայությունը իր թվաքանակով ի սկզբանե գիջել է Արգենտինային եւ Ուրուզվային, նրա զարգացումն ընթացել է գրեթե նույն ուղիով, միայն թե որոշ ուշացումով: Տեղի հայության պատմության սկզբնական շրջանը ներկայացված է Եզնիկ քահանա Վարդանյանի՝ 1948թ. հրատարակած սովորածավալ եւ արժեքավոր գրքում: Ե.Վարդանյանը հատուկ շեշտում է, որ դեռեւս 1917թ. Սան Պաուլոյում գործում էր Հայ Բարեգործական Միություն կազմակերպությունը, որը «...գուտ տեղական հանգամանք ունէր իր ուրոյն ծրագրով, եւ կազմուած էր պատերազմի առթիւ թշուառութեան մատնուած իր հայրենակիցներուն օգ-

նութեան հասնելու գնահատելի գաղափարներով, թէեւ հանգանակուած բոլոր գումարներն ալ ուղղակի հանգուցեալ Պօղոս Նուպար փաշային ղրկուած են իր նպատակին ծառայեցնելու համար, բայց ան բնաւ ՀԲԸ Միութեան պաշտօնական մասնաճիւղի հանգամանք չստացաւ»:²¹¹

Ինչ վերաբերում է ՀԲԸ Միության մասնաճյուղի հիմնադրմանը, ապա ըստ Ե.Վարդանյանի, այն տեղի է ունեցել հետեւյալ հանգամանքներում: 1931թ. այս երկրամաս կատարած ուղեւորությունից հետո Փարիզ վերադարձած մի վերապատվելի, ՀԲԸ Միության Ընդհանուր տնօրեն Վահան Մալեգյանին պատմում է Սան Պաուլոյում Գյուտ Մխիթարյանի հետ իր հանդիպման մասին: Վ.Մալեգյանը նախածանոթ էր վերջինին նրա եպիսկոպոսության եւ Ստամբուլում ժամանակից՝ ՀԲԸ Միությանը օժանդակելու առիթով: 1931թ. հուլիսի նամակով Վ.Մալեգյանը խնդրում է Գ.Մխիթարյանին, որ նա ստանձնի Սան Պաուլոյում Միության մասնաճյուղ հիմնելու նախաձեռնությունը: Պատասխան նամակում Գ.Մխիթարյանը, հայտնելով իր համաձայնությունը, բերում էր նաեւ ուշագրավ տեղեկություններ Սան Պաուլոյի հայության մասին: «Սօտաւորապէս 2500- 3000 բնակչութիւն ունեցող գաղութիս մէջ ոչինչ կայ մխիթարական,- գրում էր նա եւ շարունակում,- «տնտեսական տագնապի մասին գաղափար մը տալու համար պէտք է ըսել, որ Անգլիական ոսկին 40 միլ ռէյսէն (ներկայիս քրուզէյո) 79 միլ ռէյսի բարձրացած է, տոլարն ալ 8 միլ ռէյսէն 16 միլ ռէյսի. կրնաք երեսակայել ուրեմն, որ հասարակ արհեստատրներ կամ գործատրներ ի՛նչ դժուարութեամբ կրնան ապահովել իրենց ապրուստը: Այսպէս ըլլալով մէկտեղ, հպարտութեամբ պէտք է ըսեմ, որ մէկ հատ իսկ հայ մուրացիկ չունինք, մի՛նչդեռ ուրիշ ազգերէ հազարատրներ կան»:²¹²

Գ.Մխիթարյանի եւ Վ.Մալեգյանի նամակներից ակնհայտ է, որ նրանք երկուսն էլ մեծ հույսեր էին կապում Լեւոն Մոստիշյանի հետ: Լ.Մոստիշյանը 1924թ. Փարիզից ընտանիքով փոխադրվել էր Սան Պաուլո, սակայն, որպէս արեւելյան գորգերի վաճառական, հաճախ էր լինում Փարիզում, ուր եւ սերտ հարաբերություններ էր հաստատել Միության ղեկավարության հետ: Հենց նա էլ ստանձնեց մասնաճյուղի հիմնադրման աշխատանքները: 1932թ. փետրվարի 26-ին Սան Պաուլոյի հայ եկեղեցում կայացած ժողովը միաձայն որոշում է կազմավորել Միության մասնաճյուղ, որի առաջին նախագահ է ընտրվում Վահրամ Բեթթենեճյանը, իսկ առեւնապետ՝ Գյուտ Մխիթարյանը: Սկզբնական շրջանում մասնաճյուղը աչքի էր ընկնում աշխույժ գործունեությամբ՝ արձանագրվում են նոր անդամներ, կազմակերպվում են ժողովներ, անդամավճարներից գոյացած գումարը ուղարկվում է Միության կենտրոն՝ Փարիզ եւ այլն: Որոշ

ժամանակ անց, սակայն, «Միութիւնը դէպի անկում կ'երթայ, առանց ոսկեդար մը ունենալու: Վահրամ Բեթթենեճեան կը հրաժարի ու կը քաշուի Միութենէն առանց իր այդ քայլը արդարացնող սրտոճառ մը ունենալու: Գիտ Մխիթարեան իր հիւանդութիւնը պատրուակելով, գործօն մասնակցութենէ կը դադրի: Միւս անդամներն ալ, ասոնց օրինակին հետեւելով, կը դադրեցնեն իրենց ամսավճարները եւ ժողովներուն ներկայ չեն գտնուիր. Լեւոն Մոստիշեան եւ Ղազար Նազարեան կ'ստիպուին դռնէ դուր պտըտիլ, խնդրել որ կրկին քով քովի գան եւ Միութեան մասնաճիւղը քայքայումէ փրկեն, բայց անօգուտ կ'ըլլայ»:²¹³ Մի քանի տարի անց՝ 1937թ. նույն Լ.Մոստիշյանի ջանքերով կազմավորվում է մի նոր մասնաճյուղ Սան Պաուլոյի Սանտա Աննա արվարձանում, տեղի հայերի շրջանում, որը, սակայն, էլ ավելի կարճ կյանք ունեցավ:

Բրազիլիայում ՀԲԸ Միության գործունեության նոր շրջանը սկիզբ առավ Երկրորդ Աշխարհամարտից հետո միայն: Հատկանշական է, որ նոր մասնաճյուղի հիմնումը այս անգամ հետեւանք էր ՀԲԸ Միության կազմակերպած ներգաղթի հանգանակության: Այդ նպատակով Բրազիլիա ժամանած Հարավային Ամերիկայի կաթոլիկոսական պատվիրակ Գարեգին արք. Խաչատուրյանը 1946թ. սեպտեմբերին հրապարակային մեկ հավաքույթի ընթացքում հիմնում է Միության մասնաճյուղ, որին անդամակցում են 89 մարդ եւ որն էլ պէտք է կազմակերպեր հանգանակությունը: Եզնիկ Վարդանյանը գրում էր. «Բարեգործականի նորընտիր վարչութիւնը մինչեւ 1946 դեկտ. 31-ը տակաւին հանգանակութեան գործը վերջացուցած չըլլալուն, Միութեան կազմը զօրացնելու աշխատանքին ձեռնարկած չէր, ժամանակի չգոյութեան պատճառաւ, բայց իր ձեռներէցութիւնն ու ցուցահանած եռանդը յոյս կը ներշնչէին թէ, Պրազիլը այնքաւ ՀԲԸ Միութեան տեսական մասնաճիւղը պիտի ունենայ»:²¹⁴ Հետագա դեպքերը արդարացրին այդ հույսերը:

Զարթոնքի տարիներ

Ինչպէս եւ այլ երկրներում, Լատինական Ամերիկայի երկրներում նույնպէս հայերի ազգամշակութային կյանքում նոր շրջան սկսվեց 1960-ական թթ.: ՀԲԸ Միության մասնաճյուղերի պարագայում դրան նպաստեց նաեւ 1968թ. նախագահ Ա.Մանուկյանի տարածաշրջան կատարած այցը: Ծուրջ չորս շաբաթ նա եղավ բոլոր հայաշատ քաղաքներում, մամբամասն ծանոթացավ հայ համայնքների կյանքին՝ ուշադրության կենտրոնում ունենալով, իհարկե, Միության մասնաճյուղերի գործունեությունը:

Արդեն Նյու Յորքում նրա նախաձեռնությամբ Միության Կենտրոնական Վարչությունը որոշեց այդուհետ առավել մեծ չափով օժանդակել Արգենտինայի, Ուրուգվայի եւ Բրազիլիայի՝ մինչ այդ մի տեսակ անտեսված մասնաճյուղերին: Ծնորհիվ դրա տեղի մասնաճյուղերը էլ ավելի աշխուժացրին իրենց գործունեությունը նախ եւ առաջ կրթական եւ մշակութային ասպարեզում: Այդ իմաստով հատկապես նշանակալից եղան 1970-ական թթ.:

1972թ. Բուենոս Այրեսում տեղի ունեցավ Հարավային Ամերիկայի երկրների ՀԲԸ Միության Առաջին Պատգամավորական համագումարը, որին մասնակցեցին Կորդովայի, Մոնտեվիդեոյի, Սան Պաուլոյի եւ Բուենոս Այրեսի մասնաճյուղերի ներկայացուցիչները, ինչպես նաեւ Միության Ընդհանուր տնօրեն Մ.Հակեմը: Ժողովը մեծ դեր խաղաց երեք երկրների Միության մասնաճյուղերի միջեւ փորձի փոխանակման, համագործակցություն հաստատելու, համատեղ միջոցառումներ անցկացնելու գործում: Այսպես, համագումարի որոշմամբ Բուենոս Այրեսի մասնաճյուղի «Լուսաբաց» պարբերականը այդուհետ պետք է դառնար Միության տարածաշրջանային ամսագիր եւ ունենար նաեւ հատուկ բաժիններ՝ իսպաներեն եւ պորտուգալերեն լեզուներով: Ծուրջ երկու տասնամյակ անց նրան փոխարինելու եկավ Բուենոս Այրեսի երիտասարդ համալսարանավարտ մասնագետների կողմից հրատարակվող «Generacion 3» իսպանալեզու ամսագիրը, որը այսօր ամենակարգավոր պարբերականներից է եւ տպագրվում է 4.000 օրինակով:

1989թ. օգոստոսին Բուենոս Այրեսում առաջին անգամ տեղի ունեցան ՀԲԸ Միության 12-րդ Նավասարդյան խաղերը, որոնց մասնակցեցին շուրջ 400 երիտասարդներ Հայաստանից, Բելառուսից, Լոնդոնից, Լոս Անջելեսից, Սան Պաուլոյից, Մոնտեվիդեոյից եւ Կորդովայից: Խաղերը կայացան հատուկ այդ առիթով քաղաք ժամանած Ալեք Մանուկյանի նախագահությամբ եւ Բուենոս Այրեսի քաղաքապետի ներկայությամբ: Այդ առումով առավել կարեւոր եղավ 2000թ., երբ հերթական Նավասարդյան խաղերից զատ, Բուենոս Այրեսում հրավիրվեց ՀԲԸ Միության 81-րդ Ընդհանուր ժողովը: Իսկ մինչ այդ՝ 1997թ. հունիսին Բուենոս Այրեսում ՀԲԸՄ-ի Ալեք Մանուկյան կեդրոնում կայացավ Միության Հարավային Ամերիկայի մասնաճյուղերի երգչախմբերի երրորդ փառատունը, մասնակցությամբ Միության Բուենոս Այրեսի Ծնորհալի երգչախմբի, Մարի Մանուկյան Կրթական հաստատության Մանկական երգչախմբի եւ Մոնտեվիդեոյի Կոռնկ երգչախմբի ու Արմենիա պարախմբի: Ինչ վերաբերում է Կորդովային, ապա տեղի հայության կցանքում կարեւոր նշանակություն ունեցավ ՀԲԸ

Միության նորակառույց Կեդրոնի բացումը 1987թ., որի շնորհիվ հնարավոր դարձավ բազմապիսի միջոցառումների անցկացումը:

Խոսելով Մոնտեվիդեոյի Միության երիտասարդների մասին՝ ՀԲԸ Միության 1972թ. տարեգիրքը նշում էր. «Լիկան ...վերակազմեց 64 հոգինոց երկսեռ երգչախումբը, փառաշուք կերպով տօնեց իր հիմնադրութեան 25ամեակը, սարքեց 8 շատ յաջող պարահանդեսներ, կազմակերպեց մարզանքի շաբաթական դասեր, ազգային ու պատանեկան հարցերու վերաբերեալ ամսական դասախօսութիւններ, երկու տօնավաճառ՝ որոնց հասոյթով շինեց վոլեյբոլի եւ պէչայի ֆութբոլի դաշտը եւ մասնակցեցաւ Գորտոպայի մէջ կայացած միջ-մասնաճիւղային ողիմպիականին...»:215 Մոնտեվիդեոյում շարունակում էր գործել նաեւ սկաուտական կազմակերպությունը իր ավելի քան 200 անդամներով, որը սերտ կապերի մեջ էր տեղի նույնանման միությունների հետ: Հիշատակության արժանի է հետեւյալ փաստը. «Ամանորի առթիւ իրենց նիւթական միջոցներով անոնք գնեցին աւելի քան հինգ հարիւր կտոր խաղալիք զորս նուիրեցին պետական հիւանդանոցի խեղանդամ մանուկներուն ու երգերով, զանազան խաղերով եւ զաւեշտով մը զուարճացուցին փոքրիկները»:216 1990թ. հուլիսին Մոնտեվիդեոյում կայացան Հարավային Ամերիկայի Միության մասնաճյուղերի Երիտասարդական Լիգաների 18-րդ Ողիմպիական խաղերը, որոնց մասնակիցներն էին ավելի քան 200 երկսեռ մարզիկներ Արգենտինայի, Ուրուգվայի եւ Բրազիլիայի տարբեր քաղաքներից: 1995թ. Մոնտեվիդեոյում որոշ ընդմիջումից հետո գործունեությունը վերսկսեց Միության «Բարեգործականի Զայն» կիրակնօրյա ռադիոժամը, որը պատրաստում եւ վարում էին հայազգի երիտասարդները:

Սան Պաուլոյում գործող Երիտասարդական Լիգան, որը կրում էր «Արմենիկ» անունը, չնայած իր փոքրաթիվ լինելուն, նույնպես աչքի էր ընկնում մշակութային եւ մարզական միջոցառումներով: 1975թ. նա մեծ հաջողությամբ կազմակերպեց ՀԲԸ Միության Հարավային Ամերիկայի հերթական Օլիմպիական խաղերը, որոնք աննախադեպ իրադարձություն էին Սան Պաուլոյի ողջ հայության կյանքում: Երիտասարդական Լիգայի գործունեության ծավալմանը մեծապես նպաստեց ՀԲԸ Միության Կեդրոն-համալիրի կառուցումը 1985թ., որը ընդարձակվեց (մարզապահ, գրադարան եւ այլն) հետագա տարիներին:

Այս եւ նման այլ ծրագրեր իրագործելով հանդերձ, Հարավային Ամերիկայի Միության մասնաճյուղերի գերխնդիրն էր, սակայն, սեփական ազգային դպրոցների հիմնումը: Հարկ է նշել, որ ի տարբերություն ԱՄՆ-ի եւ Եվրոպայի երկրների, Արգենտինայում սկսած 1920-ական թթ., գործում էին մի շարք հայկական ամենօրյա վարժարաններ: Այսպես,

1960-ական թթ. Բուենոս Այրեսում արդեն կային երկրորդական եւ միջ-նակարգ ամենօրյա յոթ դպրոցներ (Արծրունի ազգային վարժարան, Խրիմեան կրթական հիմնարկություն, Վիսենտե Լոպեսի ազգային վարժարան եւ այլն), որոնք գործում են ցայսօր: Այլ էր պատկերը Ուրուգվայում եւ հատկապես Բրազիլիայում: Դեռեւս 1940-ական թթ. Ուրուգվայում կային վեց հայկական դպրոց՝ 430 աշակերտով, որոնք, սակայն, հետագա տարիներին աստիճանաբար դադարեցրին իրենց գոյությունը: Էլ ավելի անմխիթար էր վիճակը Բրազիլիայում:²¹⁷

Նման իրավիճակում հասկանալի է դառնում այն մեծ ոգեւորությունը, որ տիրում էր Մոնտեվիդեոյում 1972թ. հուլիսի 22-ին, երբ կատարվեց ՀԲԸ Միության Նուպարեան ազգային վարժարանի հիմնարկեքը: Նուպարեան նախակրթական վարժարանը, որը կառուցվեց Միսաք եւ Արփի Գույումճյանների բարերարությամբ, եղավ Միության առաջին հայկական դպրոցը Հարավային Ամերիկայում, որում ընդամենը երկու տարի անց կար արդեն 306 երկսեռ աշակերտ: Նման հաջողությունը ոգեւորիչ եղավ Միության համար, եւ 1974թ. նույն Մոնտեվիդեոյում, այս անգամ շնորհիվ Միության նախագահի նվիրատվության, դռները բացեց Ալեք Մանուկեան երկրորդական վարժարանը: Որոշ ժամանակ անց այս երկու դպրոցները միացվեցին, եւ կրթական հաստատությունը սկսեց կոչվել Նուպարեան-Ալեք Մանուկեան երկրորդական վարժարան: Այսօր այդ վարժարանը՝ մանկապարտեզի, նախակրթարանի եւ երկրորդական բաժիններով, Ուրուգվայում գործող երկու հայկական դպրոցներից ամենախոշորն է, ուր սովորում է շուրջ 300 աշակերտ: 1975թ. վարժարանը տեղափոխվեց նորակառույց շենք, որը Միսաք Գույումճեան Մարգարանի եւ Երիտասարդական կենտրոնի հետ ամբողջացնում է Մոնտեվիդեոյի Բարեգործականի կենտրոնը:

1974 թվականը Հարավային Ամերիկայի Միության մասնաճյուղերի պատմության մեջ, հիրավի, դպրոցաշինության տարի էր: Մոնտեվիդեոյի դպրոցի հետ գրեթե միաժամանակ առաջին աշակերտներին ընդունեց Մարի Մանուկեան երկրորդական վարժարանը Բուենոս Այրեսում: Հետագայում վարժարանը տեղակայվեց ՀԲԸ Միության նորակառույց Ալեք Մանուկեան յոթնարկանի կենտրոն-համալիրի մեջ, որը օժտված է նաեւ մարզադահլիճով, հանդիսասրահով եւ այլ հարմարություններով: Ալեք Մանուկեան Համալիրի արդյունավետ գործունեությանը մեծապես նպաստում է նաեւ տեղը՝ մայրաքաղաքի Արմենիա փողոցում, ուր նա շրջապատված է համայնքի այլ կազմակերպություններով, եկեղեցիներով ու խմբագրություններով:

Ծատ ավելի մեծ ժամանակ եւ ջանք պահանջեց հայկական դպրոցի հիմնումը Սան Պաուլոյում, ուր ազգամշակութային ուժացումը տեղի հայերի մեջ առավել նկատելի է: Այնուամենայնիվ, 1984թ. Միության մասնաճյուղի ջանքերի շնորհիվ հնարավոր դարձավ հիմնել Բրազիլիայում թվով երկրորդ եւ իր առաջին սեփական դպրոցը, որն ի պատիվ բարերարների կոչվեց Փառեն եւ Ռեճինա Պազարեան վարժարան: Ամենօրյա այս վարժարանը կազմված է մանկապարտեզից, նախաթանկան ու երկրորդական բաժիններից եւ 2002թ. ուներ շուրջ 100 աշակերտ:

Ավստրալիայում

Արդեն ճշվել էր, որ Միջին Արեւելքի երկրներում ընթացող քաղաքական դեպքերը հանգեցրին տեղի հայության մի մասի արտագաղթին այլ երկրներ: Վերջինների թվում էր նաեւ Ավստրալիան, որը, չնայած հեռավորությանը, մեծ հեռանկարներ էր խոստանում ներգաղթողներին: 1980-ական թթ. այս երկիր ներգաղթած հայերի թիվը կազմում էր շուրջ 16.000 մարդ, որոնց բացարձակ մեծամասնությունը հաստատվել էր Սիդնեյում: Նույն տարիներին տեղի Միության մասնաճյուղը ուներ 200-ից ավելի անդամ, որոնց ջանքերով սկիզբ առավ Հայ Երիտասարդաց Ընկերակցություն սկսուտական շարժումը: Ալեք Մանուկյան կենտրոնի բացումից հետո այստեղ նույնպես զգալիորեն աշխուժացավ ազգային-մշակութային կյանքը՝ սկսեցին գործել Ծակոբ Պարոնեան թատերախումբը, Անդրանիկ պարախումբը, Երեւան նվագախումբը, Գ.Կիլիպէնկեան գրադարանը եւ այլն: Այս ամենի հետ մեկտեղ մասնաճյուղը 1987թ. սկսեց հրատարակել «Միութիւն» անգլերեն-հայերեն ամսաթերթը, ապա նաեւ Էրեբունի ռադիոժամը:

Միությունը հիմնեց նաեւ երկու շաբաթօրյա հայկական վարժարան, սակայն, ակնհայտ էր ամենօրյա դպրոցի անհրաժեշտությունը: 1989թ. նախապատրաստական աշխատանքներից հետո սկսվեց հայկական դպրոցի շենքի կառուցումը, որի հովանավորներն էին նախագահ Ա.Մանուկյանը եւ համայնքի բարերարներից Ալեքսանդր ամուսինները: Սիդնեյի ՀԲԸ Միության Ալեքսանդր ամենօրյա նախակրթարանի բացումը տեղի ունեցավ 1990թ.: Ուշագրավ է, որ վարժարանի աշակերտությունը սրաշտոնապես մասնակցեց 2000թ. Սիդնեյի Համաշխարհային Օլիմպիական խաղերի բացման արարողությանը՝ որպէս հյուրընկալ Հայաստանի Հանրապետության մարզական թիմին: Ալեքսանդր վարժարանից բացի Սիդնեյում շարունակում է գործել նաեւ Ալեք Մանուկեան շաբաթօրյա դպրոցը:

Ավստրալիայի հայության ազգային կյանքի կարևոր ավանդույթներին և ՀԲԸ Միության Նավասարդյան Խաղերի մրցաշարքը, որը փոխն ի փոխ կազմակերպում են Սիդնեյի և Մելբուրնի Երիտասարդաց և Մարզական հանձնախմբերը: Իսկ 1998թ. Սիդնեյում կայացան ՀԲԸ Միության 15-րդ Համաշխարհային Նավասարդյան Խաղերը:

Ուսանողական ծրագրեր

Երկրորդ Աշխարհամարտից հետո ՀԲԸ Միության ամենախոշոր և ամենակարևոր ծրագրերից է կրթաթոշակների հատկացումը սփյուռքահայ ուսանողությանը: Եթե դպրոցական ծրագրի հիմնական նպատակն է հայագրի երեխաներին տալ ազգային դաստիարակություն, հաղորդակից դարձնել նրանց հայերենին, հայ պատմությանն ու մշակութային ավանդույթներին՝ իրենց հասակակիցների հետ մշտական շփման պայմաններում, ապա այլ է ուսանողության պարագան: Այս դեպքում առաջնահերթ նպատակն է՝ օժանդակել սփյուռքի մտավոր, ինտելեկտուալ ներուժի ձեւավորմանն ու զարգացմանը, և դրանով իսկ ապահովել սփյուռքահայերի կարևոր դերն ու նշանակությունը իրենց ապրած երկրներում:

Արդեն ասվեց, որ դեպքերի բերումով ազգային կրթության ծրագրի իրականացումը ընդհատվեց Առաջին Աշխարհամարտի տարիներին, բայց վերսկսվելուց հետո էլ այն ընթացավ մեծ դժվարություններով և սահմանափակ չափերով, քանզի ամենակարևոր հարցը՝ տասնյակ հազարավոր հայ որբ երեխաների ու զաղթականների փրկությունն ու խնամքն էր: Նման պայմաններում անիրատեսական էր խոսել հայ ուսանողության, նրա կարիքների մասին: Եվ այնուամենայնիվ, Միության ղեկավարները և անձամբ Պողոս Նուպարը քաջ գիտակցում էին, որ ազգի ապագան՝ Հայաստանում թե սփյուռքում, մեծապես կախում ունի նույն այդ հարցի արագ, թեկուզ և ոչ ամբողջական լուծումից: Ինչպես և պետք էր սպասել, նա գտավ հարցի այնպիսի մի լուծում, որը, ըստ երեսույթին, միակն էր ստեղծված իրավիճակում:

1924թ. Բելգիայի մայրաքաղաք՝ Բրյուսելի համալսարանական հաստատության մեջ (Foundation Universitaire) Պողոս Նուպարը հիմնեց հատուկ Ուսանողական հիմնադրամ (Oeuvre des Boursiers Armeniens), որը հայերենով հայտնի էր որպես Հիմնարկություն Նուպարեան Սաներու: Հիմնարկությունը մաս չէր կազմում ՀԲԸ Միության ծրագրերի և չէր ֆինանսավորվում Միության կողմից: Սակայն համաձայն կանոնագրի՝ Հիմնարկության վարչական մարմնի կազմում՝ Բրյուսելի համալսարանի և հիմնադրի ընտանիքի ներկայացուցիչների հետ մեկտեղ՝ ընդգրկված էին

նաև Միության երկու ներկայացուցիչներ: Ավելին, վարչական մարմինը՝ սաներին ընտրելիս, նկատի էր առնում ՀԲԸ Միության հանձնարարականները: Նուպարեան սաները ուսանեցին Բրյուսելի, Փարիզի, Լուվենի համալսարաններում, Բրյուսելի գեղարվեստի ակադեմիայում, Փարիզի հանրային շինությունների ինստիտուտում, Բելոյի Տեխնիկական ակադեմիայում և կրթական այլ հաստատություններում:

Հարկ է հատուկ նշել, որ ըստ Պողոս Նուպարի պայմանի, նախապատվությունը տրվում էր այն թեկնածուներին, որոնք հանձն էին առնում ուսումը ավարտելուց հետո մեկնել Հայաստան և աշխատել այնտեղ իրենց մասնագիտությամբ: Սակայն, շրջանավարտներն, ընդհանրապես, հրաժարվում էին մեկնել Հայաստան, չունենալով հստակ պատկերացում այնտեղ տիրող կացության և իրենց ապագա աշխատանքի մասին: Բայց շատ դեպքերում, նույնիսկ մեկնել ցանկացողները, երկար ժամանակ չստանալով Խորհրդային Հայաստան մուտք գործելու թույլտվություն, ցրվում էին տարբեր երկրներ: Այդուհանդերձ, 1927թ. տարեգրքում նշվում էր, որ երեք շրջանավարտներ՝ «...տեարք Ջրբաշեան, հանքաբան, ԹԷՐՂԵԱՆ և Մակարեան, էլեքտրագէտ, արդէն մեկնած են Հայաստան և կոչուած են իրենց մասնագիտութեան համապատասխան կարևոր պաշտօններու, առաջինը իբրև ուսուցիչ Պետ. Համալսարանի»:²¹⁸ Սորբոնի համալսարանի շրջանավարտ Տիգրան Ջրբաշեանը ոչ միայն մեծապես նպաստեց երկրաբանության զարգացմանը Հայաստանում, այլև հիմնեց և ղեկավարեց աշխարհագրական-երկրաբանական ֆակուլտետը Երևանի համալսարանում: Բայց 1937թ. պրոֆեսոր Տ.Ջրբաշեանը, չնայած իր բոլոր ծառայություններին նույնպես բռնադատվեց խորհրդային իշխանությունների կողմից՝ «ժողովրդի թշնամի», «ֆրանսիական լրտես» կեղծ մեղադրանքներով և մահացավ քանտում նույն 1937թ.:

Նուպարեան Սաների քանակը միշտ էլ պայմանավորված է եղել, մի կողմից, տրամադրելի միջոցների, իսկ մյուս կողմից՝ եվրոպական համալսարաններում ուսման վարձի չափերով: Երկրորդ Աշխարհամարտի տարիներին հիմնարկությունը, ընդհանրապես, ստիպված էր դադարեցնել իր գործունեությունը և վերսկսեց այն միայն 1947թ.՝ թոշակներ տրամադրելով 5 ուսանողների, այդ թվում նաև Անթիլիասի Դպրեվանքից Օահե վարդապետ Աճեմյանին, որը հետագայում դարձավ Հայ Եկեղեցու բարձրաստիճան հոգևորականներից մեկը: Ընդդեմ կես դար անց նա Երևանի համալսարանում հիմնադրեց աստվածաբանական ֆակուլտետը՝ դրանով իսկ, կարծես, ամբողջովին կատարելով իր պարտքը Նուպարեան Սաների Հիմնարկության, ինչպես նաև Պողոս Նուպարի առջև:

Հետպատերազմյան տարիներին փոփոխություն կրեցին նաև կրթաթոշակ հատկացնելու պայմանները. թեկնածուները պետք է ունենան մագիստրոսի կոչում եւ պատրաստեն դոկտորական ավարտաճառ Եվրոպայի համալսարաններից մեկում: 1994-1995 տարեշրջանում հիմնարկությունը հատկացրել էր երկու կրթաթոշակ, յուրաքանչյուրը մոտ 2 հազ. դոլար:

Պողոս Նուպարի այս նախաձեռնությունը անարձագանք չմնաց, եւ արդեն 1930թ. Միությանը նվիրաբերած գումարների մի մասը նախատեսված էր որպես կրթաթոշակ հայ ուսանողների համար (Ալլահվերդի, Գազազյան, Մարկոսյան սաներ): Սկսած 1940-ական թթ. վերջից կրթաթոշակների քանակը մշտապես աճում է: Այսպես, Վահրամ Յուզբաշյանի սահմանած կրթաթոշակների շնորհիվ 1950-ական թթ. համալսարանական ուսում ստացան այնպիսի՝ հետագայում հանրաճանաչ դեմքեր, ինչպես, օրինակ Անդրանիկ Փոլադյանը, Սոսի Պոյաճյանը, Մեսրոպ Գերմանիկյանը, Հարություն Սաղոյանը, Սեպուհ Աբգարյանը եւ այլք:

Հետագա տարիներին եւ հատկապես 1980թ. Միության կողմից կրթաթոշակներին հատկացվող գումարները սկսեցին կտրուկ աճել: Եթե 1956թ. դրանք կազմում էին 43.908 դոլար, ապա 1984-1985 կրթական տարեշրջանում Միությունը հատկացրեց արդեն 405.000 դոլար: 2002-2003թ. 30 երկրներից 1.119 ուսանողներին հատկացված կրթական նպաստը կազմեց մոտ մեկ միլիոն դոլար:

Նուպարեան Սաներու Հիմնարկության հիմնադրումից մի քանի տարի անց Պողոս Նուպարը տրամաբանական ավարտին է հասցնում իր «ուսանողական» ծրագիրը: ՀԲԸ Միության Եվրոպայի Կենտրոնական հանձնաժողովի ատենապետ Սարգիս Սաղոյանի պատմելով՝ «1928թ., երբ օր մը Փաշան կը գտնուէր Աքուար Ալպօնի, ՀԲԸ Միութեան կեդրոնատեղին, ժողովականներէն ... Լեւոն Կերտան, գովասանքով կը խօսի զանազան ազգերու կողմէ հիմնուած ուսանողական տուներու մասին: Փաշան չափազանց խանդավառուած, եւ իրեն յատուկ վճռական շեշտով մը կ'ըսէ.- Բայց մենք, հայերս, մե'նք ալ կրնանք ունենալ մեր Ուսանողական Տունը: Եվ ահա, խօսքէն գործի անցնելով, եւ այսօրուան (1950թ.-Էդ.Մ.) շանժով մօտաւորապէս 120 միլիոն ֆրանքի պատկառելի գումար մը տրամադրելով, կ'իրականացնէ իր փափագը»:²¹⁹ Չորս տարի անց, 1930թ. Փարիզի, այսպես կոչված, Համալսարանական համալիրում (Cite Universitaire) տեղի ունեցավ Մարի Նուպար Ուսանողական Տան հանդիսավոր բացումը՝ երկրի կրթության նախարարի մասնակցությամբ: Չորսհարկանի գեղեցիկ շենքի (ճարտարապետ Լ.Նաֆիլյան) 70 կահավորված սենյակների մեծ մասը նախատեսված էր Փարիզում ուսանող հայագրի ուսանողների եւ մասնագետների համար: Հետագայում՝ 1980-ական թթ.

Մարի Նուպար Ուսանողական Տունը հանձնվեց Փարիզի քաղաքապետարանի տնօրինությանը, որը ընդունում է տարբեր ազգերի ներկայացուցիչների, անհրաժեշտության դեպքում առաջնությունը տալով հայագրի ուսանողներին: 1988-1989 ուսումնական տարում այստեղ բնակվում էին 70 ուսանող տարբեր երկրներից:

Թե ուսման տարիներին եւ թե հետագայում, ապրելով եւ աշխատելով ընտանիքներից հեռու, տարբեր քաղաքներում, զուտ ամերիկյան, ֆրանսիական եւ այլ միջավայրում, համալսարանական երիտասարդները առավել արագ եւ ուժեղ չափով են օտարվում իրենց ազգային արմատներից: Այս դեպքում ազգային ինքնության պահպանման ավանդական միջոցների կիրառումը, որպես կանոն, անարդյունավետ է, եթե ոչ անհնար: Եվ ահա, սկսած 1980-ական թթ. ՀԲԸ Միությունը ձեռնամուխ եղավ իրենց տեսակի մեջ աննախադեպ ծրագրերի իրականացմանը: Դրանցից առաջինի նախաձեռնողը Նախագահական Ակումբն էր:

ՀԲԸ Միության Նախագահական Ակումբը ստեղծվել է դեռեւս 1977թ.: Միության հայտնի գործիչներ Վարդգես եւ Ռիտա Պալյան ամուսինների ջանքերով: Ակումբը միավորում է այն անդամներին, որոնք տարեկան 1.000 կամ ավելի դոլար են նվիրաբերում՝ հայ երիտասարդների ուսումնական, մշակութային եւ մասնագիտական առաջադիմությունը հովանավորելու համար: Սկսած 1987թ. Նյու Յորքում, ապա նաև Լոս Անջելեսում եւ Փարիզում, Նախագահական Ակումբը իրականացնում է ամենամյա Ամառնային Փորձառական (Վարժողական) Ծրագիրը, որի ընթացքում ԱՄՆ-ի եւ այլ երկրների տարբեր համալսարանների հայագրի ուսանողներ 6-8 շաբաթների ընթացքում աշխատանքային փորձառություն են ձեռք բերում ամերիկյան հայտնի հաստատություններում՝ ըստ իրենց մասնագիտությունների: Այս ծրագրի առանձնահատկություններից է այն, որ զուտ մասնագիտական պարապմունքներից զատ, երիտասարդների համար կարդացվում են հատուկ դասախոսություններ հայոց պատմության եւ մշակույթի վերաբերյալ, կազմակերպվում են հանդիպումներ տեղի հայ համայնքների հետ, եւ այս ամենը՝ իրենց իսկ մշտական եւ անմիջական շփումների պայմաններում:

Որոշ ժամանակ անց՝ 1990-ական թթ. վերջից, նախ Լոս Անջելեսում, իսկ հետագայում նաև Նյու Յորքում, Սան Ֆրանցիսկոյում, Ֆիլադելֆիայում, Մոնրեալում, Բեյրութում եւ Ժնևում, կազմավորվեցին «Երիտասարդ պրոֆեսիոնալների» (կամ, այսպես կոչված, «արհեստավարժների») կազմակերպությունները, որոնց անդամներն են 25-35 տարեկան համալսարանավարտ մասնագետներ: «Անոնք կազմակերպած են,-նշում էր Լուիզ Մանուկյան Սիմոնը,-բարձր որակով համերգներ, դասախօսու-

թիւններ, հաւաքներ, գիրքի ընթերցումներ, արուեստի ցուցադրութիւններ եւ դրամահաւաքի ձեռնարկներ Հայաստանի մեր ծրագիրներուն համար: ...Անոնք պիտի ըլլան մեր ապագայի գործիչներն ու ղեկավարները»:²²⁰

Նախագահական Ակումբը իր երկրորդ ծրագիրը նախաձեռնեց՝ Ալեք եւ Մարի Մանուկեան Հիմնարկության հետ: Նախ հարկ է նշել, որ թե՛ հիշյալ հիմնարկությունը եւ թե՛ Ալեք Մանուկեան Մշակութային հիմնադրամը (այս վերջինը լուծարվեց 1990-ականների կեսերին՝ Ա.Մանուկեանի մահից հետո) տարիներ շարունակ դրամական հատկացումներ են արել ԱՄՆ-ի տարբեր համալսարաններում եւ տարբեր տարիներին գործող հայագիտական ամբիոններին: Իսկ արդեն 1980թ., Միության նախագահի մեծագումար նվիրատվության շնորհիվ Միչիգանի համալսարանում (Էնն Արթոր) հիմնադրվեց նոր՝ իր անունը կրող Հայոց Արդի Պատմության ամբիոնը, որի առաջին վարիչը դարձավ պրոֆեսոր Ռոնալդ Այունին: Յոթը տարի անց, նույն համալսարանում հիմնվեց նաեւ Մարի Մանուկեան Հայոց Լեզվի եւ Գրականության ամբիոն: Այն այսօր էլ գլխավորում է պրոֆեսոր Գետրոգ Պարտագճյանը, որը նաեւ նույն համալսարանի Հայագիտական Ծրագրերի խորհրդի նախագահն է: Այս ամբիոնները՝ Կալիֆորնիայի Լոս Անջելեսի համալսարանի մեմորիալ ամբիոնների հետ մեկտեղ, այսօր ամենահեղինակավոր եւ ճանաչված հայագիտական կենտրոններն են ԱՄՆ-ում: 1989թ. Նախագահական Ակումբը գործակցաբար Ալեք եւ Մարի Մանուկեան Հիմնարկության հետ հիմնեց Միչիգանի համալսարանի Հայոց լեզվի Ամառնային Ինստիտուտը Երեւանում, որի տնօրենը նույնպես Գ.Պարտագճյանն է: Այս ծրագրի մասնակիցներն են վերոհիշյալ երկու ամբիոնների եւ այլ համալսարանների հայագի եւ ոչ հայ ուսանողներն ու մասնագետները, որոնք Երեւանում 8 շաբաթվա ընթացքում ուսանում են արեւմտահայերեն եւ արեւելահայերեն, ինչպես նաեւ հանդիպումներ ունենում իրենց գործընկերների հետ, անմիջականորեն ծանոթանում հայ իրականությանը:

Միության վերջին նախաձեռնություններից է ՀԲԸՄ FOCUS-ը, որը համախմբում է երիտասարդական տարբեր ծրագրերի մասնակիցներին: «Վերջին հաւաքը 2003 թուականին հիւրընկալեց Մոնթրէալ, ուր հայկական կամաւոր աշխատանքներու մասին քննարկում տեղի ունեցաւ...»:²²¹

Լուիզ Մանուկեան Սիմոնի՝ որպէս ՀԲԸ Միության նախագահի, առաջին ձեռնարկումներից էր «AGBU News Magazine» պարբերականի ստեղծումը, որի առաջին համարը լույս տեսավ 1991-ի հունիսին: Մինչ այդ Միությունը, «Յուշարար - Միութիւն» ամսագրից զատ, հրատարակում էր նաեւ անգլիալեզու «Hoosharar» ամսագիրը, որը մանրամասն լուսաբանում էր ամերիկայի մասնաճյուղերի գործունեությունը: Անդրադասու-

նալով նոր ամսագրի հրատարակման պատճառներին՝ Լուիզ Մանուկեան Սիմոնը գրում էր. «Հայաստանի երկրաշարժից մեկ տարի անց ուզեցինք հրապարակաւ շնորհակալություն հայտնել մեզ միացած բոլոր 35.000 անհատ նվիրատուներին, ...որոնք արձագանքեցին այդ աղետին, ինչպես նաեւ ցանկացանք տեղեկացնել նվիրատուներին մեր մարդասիրական ծրագրերի մասին: Այդ տխուր եւ հեքոտ շրջանում մշտապես լուրեր կատանայինք աշխարհատարած մեր անդամներից, որոնք տեղեկացնում էին իրենց բնակավայրի ժողովրդի կամ կառավարության կատարած նվերահավաքի կամ մարդասիրական օժանդակության մասին... Հանկարծ անդրադարձանք, շարունակում էր Միության նախագահը, որ որպէս աշխարհատարած կազմակերպություն եզակի հնարավորություն ունենք աւօրյա կապի մեջ մտնել աշխարհատարած հայության հետ: Թերեւս պատմություն ունենք պատմելու, ու թերեւս իրենք, որ (ազգային) պատկանելության կապը կորցնելու վրա էին, պետք է ուրախ լինեին իրենց տանը, հարմարավետ պայմաններում կարողալ մի հրատարակություն հայերի մասին...»:²²² «AGBU News Magazine»-ը այսօր առաքվում է շուրջ 80 հազար հասցեներով, ինչը աննախադէպ է սփյուռքահայ իրականության մեջ:

Նշված ծրագրերի՝ անկախ նրանց առանձնահատկությունների, հասցեատերը սփյուռքահայ երիտասարդության առավել ուսյալ հատվածն է, որը, որպէս կանոն, անմասն է հայ ազգային-համայնքային կյանքին: Նրանց պարբերական հանդիպումները, մասնագիտական եւ այլ ընդհանուր հետաքրքրություն ներկայացնող հարցերի քննարկումը, շփումները ամերիկահայության՝ հիմնարկությունների եւ անհատ մարդկանց հետ, ուղեորությունները Հայաստան որոշակիորեն նպաստում են նրանց մեջ ազգային ինքնության պահպանմանն ու զարգացմանը:

ՎԵՐՋԱԲԱՆ
ՀԲԸ ՄԻՈՒԹՅՈՒՆԸ ՀԱՅԱՍՏԱՆԻ
ԵՐՐՈՐԴ ՀԱՆՐԱՊԵՏՈՒԹՅՈՒՆՈՒՄ

Գրքի շարադրման տրամաբանությունը, կարծես, ենթադրում էր, որ հերթական գլուխը պետք է նվիրված լինի Միության գործունեությանը Հայաստանի Երրորդ Հանրապետությունում՝ վերջին տասնհինգ տարիների: Այդ տրամաբանությունը, սակայն, հակասում է պատմության՝ որպես գիտության, ճանաչողության ժամանակագրական սահմանափակումներին:

«Պատմություն է այն ամենը, ինչը կատարվել է նույնիսկ մեկ րոպե առաջ»: Այս ճշմարիտ մտքի հետ պատմաբանին, այնուամենայնիվ, դժվար է համաձայնվել:

Անշուշտ, պատմաբանի նպատակն է վերականգնել անցյալը, սակայն, նույն այդ անցյալը՝ երևույթներն ու իրադարձությունները նախ պետք ներկայանան իրենց ավարտուն տեսքով, պետք է, պատկերավոր ասած, «նստվածք» տան: Միայն դրանից հետո է, որ պատմաբանը կարող է սկսել նույն այդ երևույթներն ու իրադարձությունները վերականգնելու եւ արժեւորելու իր անվերջանալի փորձերը:

Պատմաբանը, անշուշտ, կարող է, իսկ երբեմն նույնիսկ պարտավոր է անդրադառնալ ընթացիկ երևույթներին ու դեպքերին: Բայց այդ պարագայում նա կամ մեկնաբանում է դրանք եւ կամ ճգնում կանխատեսել դեպքերի հետագա ընթացքն ու հետեւանքները՝ հենվելով պատմությունից իրեն ծանոթ նախադեպերի վրա: Սակայն, թե ընթացող իրադարձությունների անկանխատեսելիությունը, թե նրա, որպես ժամանակակցի, հնարավոր է՝ նաեւ մասնակցի կարգավիճակը, ուստի եւ՝ անձնավորված ընկա-

լումներն ու գնահատականները, ըստ էության, անհնարին են դարձնում երեւոյթների ամբողջական պատմագիտական ուսումնասիրությունը:

Տեսական բնույթի այս դրույթների հիմնավորվածության մեջ կարելի է համոզվել նաեւ ՀԲԸ Միության ժամանակակից գործունեությունը ներկայացնելու դեպքում: Այսպէս, 2004 թ. գարնանը Միության Կենտրոնական Վարչությունը հայտարարեց, որ մտադիր է փակել Մելգոնեան կրթական Հաստատությունը եւ փոխարենը՝ որոշ այլ երկրներում իրականացնել որակապէս նոր կրթական ծրագրեր:¹ Անշուշտ, գայթակղիչ է միանալ այդ որոշման կողմնակիցներին կամ հակառակորդներին, առավել եւս, որ երկու կողմերն էլ բերում են համոզիչ փաստարկներ: Այնհայտ է, սակայն, որ պատմաբանի տեսակետից, նշված որոշման, նրա իրականացման ձեւերի ու հետեւանքների իրապէս հիմնավորված վերլուծությունը ապագայի հարց է:

Նույնն է Հայաստանի Հանրապետությունում Միության գործունեության պարագան, առավել եւս նկատի առնելով երկրում մինչ այժմ տիրող հակասական իրավիճակը գրեթե բոլոր ոլորտներում: Վերոբերյալ պատճառներով այդ գործունեության ուսումնասիրումը նույնպէս պատմաբանների ապագայի գործն է, իսկ այստեղ հարկ է սահմանափակվել դրա առավել կարեւոր արդյունքների արձանագրումով:

1989 թ. օգոստոսի նամակով ՀԲԸ Միության 5-րդ նախագահ Ալեք Մանուկյանը Կենտրոնական Վարչությանը հայտնեց, որ տարիքի բերումով «...իր ուժերը չէին թոյլատրեր 21-րդ դարու պարտաւորութիւնները դիմագրաւելու ուստումը կատարելու»:² Արդեւ նշվեց Ալ. Մանուկյանի բացառիկ դերը Միության պատմության մեջ: Նրա գլխավորությամբ Միությունը դարձավ սիյուռքի ամենահեղինակավոր կազմակերպությունը, դասվեց աշխարհի խոշոր բարեսիրական հաստատությունների շարքը, ձեռք բերեց տարբեր երկրների իշխանությունների հարգանքը եւ աջակցությունը: Գիտակցելով ՀԲԸ Միության ֆինանսական հզորության առաջին անհրաժեշտությունը, Ալ. Մանուկյանը այդ նպատակին տրամադրեց իր անձնական միջոցները եւ, դրանով իսկ, օրինակ ծառայեց բազմաթիվ սիյուռքահայերի: Իր նախագահության 36 տարիների ընթացքում Միության դրամագլուխը ունեցավ աննախադէպ աճ՝ 8 միլիոնից հասնելով 112 միլիոնի, ինչի շնորհիվ էլ հնարավոր դարձավ բազմաթիվ հայանպաստ ծրագրերի իրագործումը աշխարհի տարբեր երկրներում: Կենտրոնական Վարչությունը, ընդունելով Ալ. Մանուկյանի հրաժարականը, նույն նիստում ՀԲԸ Միության 6-րդ նախագահ ընտրեց նրա դուստր Լուիզ Մանուկյան - Սիմոնին: Նա նոր մարդ չէր Միության ղեկավարության մեջ՝ 1981 թ. ընտրվել էր Կենտրոնական Վարչության ան-

դամ, իսկ 1987-ին՝ փոխնախագահ: Ծուրջ 13 տարի անց՝ 2002 թ. փետրվար ամսին, հրաժարական ներկայացրած Լ. Մանուկյան - Սիմոնին հաջորդեց նախկին փոխնախագահ Պերճ Սեդրակյանը: Լ. Մանուկյան - Սիմոնը պահպանեց, սակայն, իր ղեկավար դիրքը, ընտրվելով Միության գործադիր վերին մարմնի՝ Կենտրոնական Վարչության ատենապետ:

1989 թ. ընտրությունները խորհրդանշական իմաստ ունեին. առաջին անգամ Միության ղեկավար էր ընտրվում հետեղեռնյան, արդեն սիյուռքում ծնված եւ մեծացած սերնդի ներկայացուցիչը: Եւ որպէս այդպիսիք, թե Լ. Մանուկյան - Սիմոնը եւ թե Պ. Սեդրակյանը, բնականաբար, բնութագրվում են ոչ միայն այլ կենսափորձով, այլ կենսափիլիսոփայությամբ, այլեւ ազգային ինքնագիտակցության ու դրանից բխող գործելակերպի որոշակի առանձնահատկություններով:

Ինչպէս եւ մի շարք այլ արտասահմանյան կազմակերպություններ, ՀԲԸ Միությունը մուտք գործեց Հայաստան դեռ խորհրդային կարգերի օրոք՝ 1988 թ. դեկտեմբերի երկրաշարժից տուժած տասնյակ հազարավոր մարդկանց օժանդակելու նպատակով: Երկրաշարժից անմիջապէս հետո Միությունը կազմակերպեց պարենի, հագուստեղենի, դեղորայքի եւ կենսական այլ անհրաժեշտ ապրանքների տեղափոխումը աղետյալ շրջաններ: Արդեւ 1989 թ. մայիսին տուժածներից 49 հոգի տեղափոխվեցին ԱՄՆ՝ անհրաժեշտ բուժում ստանալու համար:

1937 թ. հետո ավելի քան 50 տարի անց՝ 1990-ին, Միությունը վերաբացեց իր գրասենյակը Երեւանում, որը վերջին ավելի քան 10 տարիներին գլխավորում է Աշոտ Ղազարյանը: Հատուկ կարեւորություն տալով իր գործունեությանը Հայաստանում, ՀԲԸ Միությունը հերթական՝ 79- եւ 83-րդ Ընդհանուր Ժողովները հրավիրեց Երեւանում՝ 1994 եւ 2004 թվականներին:

Վերսկսելով իր գործունեությունը Հայաստանում, ՀԲԸ Միությունը նախապատվությունը տալիս է ոչ թե գուտ մարդասիրական օգնությանը, այլ երկրի զարգացմանը նպաստող ծրագրերին, նախ եւ առաջ, մշակութի, առողջապահության, կրթության ոլորտներում: Նրա առաջին խոշոր իրագործումներից էր 10 հզ. տոննանոց սառցամթերանոցի կառուցումը Գյումրիում:

Նույն՝ 1992 թ. Երեւանում Միությունը հիմնեց /ԱՄՆ-ի Միջազգային զարգացման գործակալության եւ Հ. Գարսկեօզեան Հաստատության սկզբնական օժանդակությամբ/ Պլաստիկ Վերականգնողական Վիրաբուժության Կենտրոնը, ուր բուժում է ստացել մոտ 6000 մարդ: Ծարունակելով այս ծրագիրը, Միությունը 2001 թ. գնեց 120 մահճակալանոց նախկին Պրոկտոլոգիայի ինստիտուտի շենքը, որը վերանորոգումից հետո

վերանվանվեց Ս. Ներսես հիվանդանոց եւ փոխանցվեց Ա.Էջմիածնին: Պենսիլվանիայի Թոմաս Ջեֆերսոնի բժշկական համալսարանի օժանդակությամբ իրագործվեց Միության եւ մեկ առողջապահական ծրագիր՝ Գերձայնային Ախտորոշման բաժնի հիմնումը Էրեբունի հիվանդանոցում, ապա՝ Գերձայնային Ուսուցողական կենտրոնի ստեղծումը Երեւանի Բժշկական համալսարանում:

Կրթության բնագավառում Միության ամենախոշոր ծրագիրը՝ 1991-ին Հայաստանի Ամերիկյան Համալսարանի հիմնումն էր: Համալսարանի ութ բաժիններում տարեկան ուսանում է շուրջ 350 ուսանող, իսկ շրջանավարտների թիվը 1000-ից ավելի է: 1999 թ.՝ ԱՄՆ-ի կառավարության օժանդակությամբ Երեւանի Ալեք Մանուկյան փողոցում կառուցվեց նույն համալսարանի բիզնես-կենտրոնի շենքը: Գյումրիում ՀԲԸ Միությունը ֆինանսավորել է Արվեստի Ակադեմիայի շենքի նորոգումը, ուր գործում են Երեւանի Կոնսերվատորիայի, Գեղարվեստի ակադեմիայի եւ Թատերական ինստիտուտի մասնաճյուղերը: Բացի այդ, Միությունը

ֆինանսապես օժանդակում է Մատենադարանին, ԳԱԱ-ին, ԵՊՀ-ին, Բժշկական եւ Ճարտարագիտական համալսարաններին եւ որոշ այլ կրթական հաստատություններին: Երեւանի Մալաթիա, Արաբկիր եւ Նորք շրջաններում Միությունը հիմնել է Հայորդաց Տներ, որոնց շուրջ 3,5 հզ. սաների համար կազմակերպվել են արվեստի, երաժշտության, մարզական եւ այլ խմբակներ:

Մշակույթի ասպարեզում Միության առաջին եւ ամենակարեւոր իրագործումը եղավ Հայաստանի Ֆիլհարմոնիկ նվագախմբի ֆինանսավորումը՝ սկսած 1992 թ.: Դրա շնորհիվ նվագախումբը, որի առաջին ղեկավարն էր Լորիս Ծկնավորյանը, հնարավորություն ստացավ թե հանդես գալ շաբաթական համերգներով Երեւանում եւ թե հյուրախաղերի մեկնել Եվրոպայի, Ամերիկայի եւ Միջին Արեւելքի երկրներ:

Դեռեւս խորհրդային տարիներին Ալ. Մանուկյանը մեծապես օժանդակում էր Ա.Էջմիածնին. դրա վառ ասպացույցներից էր 1982 թ. կառուցված Ալեք եւ Մարի Մանուկեան Գանձատունը: Տարիներ անց՝ ընդառաջելով Ամենայն Հայոց Կաթողիկոս Վազգեն Ա-ի առաջարկին, նա հանձն առավ նվիրաբերել ավելի քան 5 միլիոն դոլար՝ Երեւանում Մայր եկեղեցու կառուցման համար: Ալ.Մանուկյանի մահից հետո այդ գաղափարի իրականացնողները եղան Ռիչարդ եւ Լուիզ Մանուկյանները. Ս. Գրիգոր Լուսավորիչ եկեղեցին իր դռները բացեց արդեն 2001 թ.: Հայաստանում քրիստոնեությունը որպես պետական կրոն հռչակելու 1700-ամյակի օրերին:

Բացի այդ, Միության օժանդակության շնորհիվ կառուցվել են այլ եկեղեցիներ՝ Ա.Երրորդության՝ Երեւանում, Ս.Հակոբ՝ Գյումրիում, Ս.Գրիգոր Նարեկացի՝ Վանաձորում, Բացօթյա Խորանը Ա.Էջմիածնում, ինչպես նաեւ Սեւանի Վազգենյան Հոգեւոր Դպրանոցը՝ իր 100-տեղանոց հանրակացարանով, գրադարանով ու մատուռով: Մայր Աթոռ Ս.Էջմիածնի հետ համագործակցաբար, Միությունը Երեւանում, Սեւանում, Հրազդանում եւ Էջմիածնում ծերերի եւ ծնողազուրկ երեխաների համար բացել է նաեւ բարեգործական վեց ճաշարաններ:

ՀԲԸ Միությունը մի շարք ծրագրեր է իրականացնում նաեւ Ղարաբաղում՝ վերակառուցում է 29 տուն Նորաշեն գյուղում եւ մեկ դպրոցի շենք՝ Ստեփանակերտում, կառուցում է բնակելի շենք պատերազմի վետերանների ու այրիների համար, հովանավորում է Ղարաբաղի նորաստեղծ կամերային նվագախումբը եւ այլն:

Անցած տարիների ընթացքում ՀԲԸ Միությունը Հայաստանում եւ Ղարաբաղում իրականացված ծրագրերին տրամադրել է շուրջ 60 միլիոն դոլար, ավելին, քան որեւէ այլ սփյուռքահայ կազմակերպություն: Նույն այդ տարիներին՝ 1991-2003 թթ., ՀԲԸ Միության դրամագլուխը հասավ 246 միլիոն դոլարի:

Հայկական Բարեգործական Ընդհանուր Միության պատմությունը, ըստ էության, հայ ժողովրդի XX դարի պատմությունն է. մինչեւ Առաջին Աշխարհամարտը նա գործեց Արեւմտյան Հայաստանում եւ Կիլիկիայում, 1915 թվականից մինչեւ 1930-ական թթ. կեսերը տարբեր երկրներում պահեց որբանոցներ եւ գաղթատներ, նույն այդ տարիներին՝ 1923-1937 թթ, գործեց Խորհրդային Հայաստանում, եւ սփյուռքի գոյատման պահից եւեթ միջոտ ձգտեց «պահպանել եւ տարածել հայ լեզուն, ինքնութիւնը եւ ժառանգութիւնը՝ կրթական, մշակութային եւ բարեսիրական ծրագրերով»: Եթե մի պահ փորձենք պատկերացնել հայ ժողովրդի նորագույն շրջանի պատմությունը առանց ՀԲԸ Միության, ապա կհամոզվենք, թե որքան ավելի զրկանքներ ու կորուստներ կունենար սփյուռքի հայությունը, որքան ավելի մեծ չափեր կընդուներ ուժացումը նրա մեջ, որքան ավելի ծանր կլիներ Հայաստանի ժողովրդի վիճակը ինչպես խորհրդային կարգերի օրոք, այնպես էլ այսօր: Հիրավի, ՀԲԸ Միության դերն ու նշանակությունը այնչափ մեծ էր եւ է, որ առանց նրա անկարելի է պատկերացնել հայ ժողովրդի XX դարի պատմությունը:

ԾԱՆՈԹԱԳՐՈՒԹՅՈՒՆՆԵՐ

Հապավումներ

- ՆՊ ԿՊԱ** ՀՀ Նորագույն պատմության կենտրոնական պետական արխիվ:
- ՀԶԿՓ ԿՊԱ** ՀՀ Հասարակական եւ քաղաքական կազմակերպությունների փաստաթղթերի կենտրոնական պետական արխիվ:
- ԱԱՆԱ ԿԳՖ** ՀՀ Ազգային անվտանգության նախարարության արխիվ, կարճված գործերի ֆոնդ:
- ՀԲԸՄ ԿՎԱ** Հայկական Բարեգործական Ընդհանուր Միության Կենտրոնական Վարչության արխիվ (Նյու Յորք, ԱՄՆ):
- ՀԲԸՄ- (տարեթիվ)** Հայկական Բարեգործական Ընդհանուր Միություն: Տեղեկագիր եւ հաշվեկշիռ (համապատասխան տարեշրջանի):
- Ոսկեմատեան. 1906-1913** Հայկական Բարեգործական Ընդհանուր Միութեան Ոսկեմատեանը, 1906-1913: Գահիրե, 1913:
- Ոսկեմատեան. 1906-1931** Ոսկեմատեան Հայկական Բարեգործական Ընդհանուր Միութեան, Արժաթեայ Յոբելեան, 1906-1931: Բարիզ, 1935:

1. Հիմնադիրները եւ նպատակները

- ¹ Дэвид Ллойд Джордж. Правда о мирных договорах, т. 2. М., 1957, с. 205-206.
- ² Ա. Գ. Գարտաշեան. Նիւթեր եզիպտոսի հայոց պատմութեան համար, Գ. հատոր: Վենետիկ - Ս. Ղազար, 1987, էջ 176-187: Երուանդ Օտեան. Պօղոս փաշա Նուպար: Կ. Պոլիս, 1913: Ջերտուշտ. Նուպար փաշա: 1920: Ա. Թերզիպաշեան. Նուպար: Բարիզ, 1939:
- ³ Վ. Սալէզեան. Բարեգործականի նախագահները (անձնական տպավորութիւններ եւ պատմական դրուագներ), (ձեռագիր, ՀԲԸՄ ԿՎԱ):
- ⁴ Վ. Սալէզեան. Խորհրդապահական յուշագրութիւն նախագահ Գալուստ Կիւլպէնկեանի մասին (ձեռագիր, ՀԲԸՄ ԿՎԱ):
- ⁵ Ոսկեմատեան. 1906-1913, էջ 27:
- ⁶ Վահան Ջարդարեան. Յիշատակարան (1812-1933), Գ. հատոր: Գահիրէ, 1934, էջ 26-64:
- ⁷ Թեօդիկ. Ամէնուն տարեցոյցը, 1929: Բարիզ, 1929, էջ 308:
- ⁸ Տիգրան Գեորգեան. Նուպար փաշա. Պետական մարդը եւ արդարութեան ռահիլրան: - «Արեւ», Գահիրէ, 1976, 5 ասորիլ:
- ⁹ Վահան Ջարդարեան. Յիշատակարան, էջ 21-61:
- ¹⁰ Ոսկեմատեան. 1906 - 1931, էջ 14:
- ¹¹ ՀԲԸՄ - 1907, էջ 11:
- ¹² Նույն տեղում, էջ 15:
- ¹³ Ոսկեմատեան. 1906-1913, էջ 10:
- ¹⁴ Վ. Սալէզեան. Ճամբուս ծայրը, Ա. հատոր: Բարիզ, 1954, էջ 304:
- ¹⁵ Ա. Գ. Գարտաշեան. Նիւթեր եզիպտոսի հայոց պատմութեան համար, Բ. հատոր: Վենետիկ - Ս. Ղազար, 1986, էջ 244:
- ¹⁶ Ոսկեմատեան. 1906-1913, էջ 41:
- ¹⁷ Նույն տեղում:
- ¹⁸ Վ. Սալէզեան. Ճամբուս ծայրը, էջ 307:
- ¹⁹ Ե. Գ. Աղաթօն. Գաղափարի նշխարներ: Մարտէլ, 1934, էջ 297-298:
- ²⁰ 75-րդ տարեդարձ Երուանդ ակն Աղաթօնի (1860-1934): Բարիզ, 1934, էջ 3:
- ²¹ Վ. Սալէզեան, Ճամբուս ծայրը, էջ 308:
- ²² Ոսկեմատեան. 1906-1913, էջ 72
- ²³ Վահան Ջարդարեան. Յիշատակարան, էջ 16-36, 17-37:
- ²⁴ Վահան Քիւրքճեան. Գրիգոր Եղիայեան, Եզիպտահայ կտակարարը: - «Կոչնակ», Նյու Յորք, 1911, օգոստոս 12, էջ 770:
- ²⁵ Ոսկեմատեան. 1906-1913, էջ 65:
- ²⁶ Նույն տեղում, էջ 55:
- ²⁷ Նույն տեղում:
- ²⁸ Նույն տեղում, էջ 92:

- ²⁹ Ա. Գ. Գարտաշեան. Նիւթեր եզիպտոսի հայոց պատմութեան համար, Բ. հատոր, էջ 253:
- ³⁰ Երուանդ Օտեան. Տասներկու տարի Պոլսէն դուրս, 1896-1908 (Անձնական յիշատակներ): Կ. Պոլիս, 1914, էջ 245-247:
- ³¹ Ոսկեմատեան. 1906-1931, էջ 451:
- ³² «Ջարթօնք» բացառիկ, նուիրուած ՈԱԿ 40-ամյակին եւ «Ջարթօնք» օրաթերթի 25-ամյակին: Պէյրուս, 1962, էջ 237:
- ³³ «Ապագայ», Բարիզ, 12 նոյեմբեր, 1927:
- ³⁴ Ե. Գ. Աղաթօն. Գաղափարի նշխարներ, էջ 166-167:
- ³⁵ Ոսկեմատեան. 1906-1913, էջ 10:
- ³⁶ Краткая Еврейская Энциклопедия. Иерусалим, т.1, с. 103; А.И. Солженицын. Двести лет вместе (1795 - 1995). Москва, Русский путь, 2004, с. 178 - 180.
- ³⁷ Ոսկեմատեան. 1906-1913, էջ 45:
- ³⁸ Ոսկեմատեան. 1906-1931, էջ 25:
- ³⁹ Նույն տեղում, էջ 18:
- ⁴⁰ Ոսկեմատեան. 1906-1913, էջ 45:
- ⁴¹ Լեւոն Սկրտիչեան. Պատրաստ դրամ: - «Միութիւն», 1915, № 45, էջ 170:

2. Արեւմտյան Հայաստանում եւ Կիլիկիայում

- ¹ Հայկական Բարեգործական Ընդհանուր Միութիւն. 75-ամեակ՝ 1906-1981: Բարիզ, 1981, էջ 22:
- ² «Յուշարար», 1941, № 220, էջ 161:
- ³ «Միութիւն», 1914, № 35, էջ 165:
- ⁴ Ոսկեմատեան. 1906-1913, էջ 69:
- ⁵ Նույն տեղում, էջ 64:
- ⁶ Նույն տեղում, էջ 65:
- ⁷ Մինաս Խապրիկ. Եթէ Չորք - Մարգպանը ինձի հետ խօսէր: Պէյրուս, 1983, էջ 36:
- ⁸ ՀԲԸՄ - 1911, էջ 25-26:
- ⁹ ՀԲԸՄ - 1912-1913, էջ 43:
- ¹⁰ Ե. Գ. Աղաթօն. Գաղափարի նշխարներ: Մարտէլ, 1934, էջ 59
- ¹¹ Նույն տեղում, էջ 60:
- ¹² Նույն տեղում, էջ 66:
- ¹³ Նույն տեղում, էջ 68:
- ¹⁴ «Միութիւն», 1914, № 35, էջ 167:
- ¹⁵ «Միութիւն», 1912, № 1, էջ 5:
- ¹⁶ ՀԲԸՄ - 1906-1909, էջ 8:

- ¹⁷ ՀԲԸՄ - 1910, էջ 173:
- ¹⁸ «Միութիւն», 1913, № 16, էջ 60:
- ¹⁹ ՀԲԸՄ - 1912-1913, էջ 26:
- ²⁰ Միջ.Նաթանեան. Գաւառի ցաւերէն. Միւս աղւտը: - «Միութիւն», 1913, № 17, էջ 108:
- ²¹ Նույն տեղում:
- ²² Ոսկեմատեան. 1906-1931, էջ 91:
- ²³ «Միութիւն», 1914, № 32, էջ 114:
- ²⁴ ՀԲԸՄ - 1914-1915, էջ 20:
- ²⁵ Լեւոն Չորմիսեան. Համապատկեր Արեւմտահայոց մէկ դարու պատմութեան, Գ. հատոր: Պէյրութ, 1975, էջ 12:
- ²⁶ Մաղ. արք. Օրմանեան. Ազգապատում, 3118 (Դարձեալ Ատանա):
- ²⁷ Վահան Մալեգեան. Ճամբուս ծայրը, Բ. հատոր: Բարիզ, 1955, էջ 22:
- ²⁸ ՀԲԸՄ - 1906-1909, էջ 89:
- ²⁹ ՀԲԸՄ Կեդր. Վարչ. Ժողով. ԺԱ շրջաբերական (Միութիւնը կուսակցութիւն մը չէ): - «Միութիւն», 1913, № 20, էջ 117:
- ³⁰ «Միութիւն», 1928, № 122, էջ 21:
- ³¹ ՀԲԸՄ - 1920-1921, էջ 34:
- ³² «Միութիւն», 1928, № 122, էջ 22-23:
- ³³ Վահան Մալեգեան. Ճամբուս ծայրը. Բ. հատոր: էջ 55:
- ³⁴ Ոսկեմատեան. 1906-1931, էջ 441:
- ³⁵ Յովհաննէս Յակոբեան. Միութիւնն եւ Միացեալը: - «Միութիւն», 1926, № 109-111, էջ 51:
- ³⁶ Նույն տեղում:
- ³⁷ Հայկական Բարեգործական Ընդհանուր Միութիւն. Տեղեկագիր 5-րդ շրջանի: Կ.Պոլիս (առանց տարեթվի), էջ 34:
- ³⁸ Նույն տեղում, էջ 36-37:
- ³⁹ Միջ. Նաթանեան. Գաւառի ցաւերէն: - «Միութիւն», 1912, № 10, էջ 157:
- ⁴⁰ Միջ.Նաթանեան. Գաւառի ցաւերէն: - «Միութիւն», 1912, № 11, էջ 172:
- ⁴¹ Միջ.Կիրճեան. Բարոյական դաստիարակութիւն: - «Միութիւն», 1913, № 21, էջ 131:
- ⁴² Նույն տեղում, էջ 132:
- ⁴³ Լեւոն Մկրտիչեան. Հայկական վերածնունդը եւ ՀԲԸ Միութեան վերապահուած դերը: - «Միութիւն», 1914, № 25, էջ 3-4:
- ⁴⁴ Նույն տեղում, էջ 3:
- ⁴⁵ ՀԲԸՄ - 1911, էջ 29-30:
- ⁴⁶ «Միութիւն», 1912, № 11, էջ 178:

- ⁴⁷ Միջ. Կիրճեան. Ինչ որ ունինք եւ ինչ որ կը պակսի մեզի: - «Միութիւն», 1912, № 7, էջ 102:
- ⁴⁸ ՀԲԸՄ Կեդր. Վարչ. Ժողով. ԺԱ շրջաբերական: - «Միութիւն», 1913, 20, էջ 117:
- ⁴⁹ Մաղաքիա արք. Օրմանեան. Հայոց եկեղեցին: Պէյրութ, 1960, էջ 194:
- ⁵⁰ Նույն տեղում, էջ 82, 83:
- ⁵¹ Ե. Աղաթօն. Երկու խօսք մեր այլադաւան եղբայրներուն: - «Միութիւն», 1912, № 5, էջ 66:
- ⁵² ՀԲԸՄ - 1912-1913, էջ 28, 32:
- ⁵³ Ե.Աղաթօն. Երկու խօսք մեր այլադաւան եղբայրներուն, էջ 66-67:
- ⁵⁴ Ոսկեմատեան. 1906-1931, էջ 66:
- ⁵⁵ Պօղոս Նուպար. «Միութիւնը»: - «Միութիւն», 1912, № 1, էջ 2:
- ⁵⁶ Միութիւնը հայ մտաւորականութեան հետ եւ ժողովուրդին համար: - «Միութիւն», 1912, № 1, էջ 3:
- ⁵⁷ Պօղոս Նուպար. Ըշվ. աշխ.:
- ⁵⁸ ՀԲԸՄ - 1914-1915, էջ 27:
- ⁵⁹ Լեւոն Չորմիսեան. Ըշված աշխ., էջ 161-162:
- ⁶⁰ Երուանդ Օտեան. Պօղոս փաշա Նուպար: Կ.Պոլիս, 1913, էջ 53:
- ⁶¹ Լեւոն Չորմիսեան, Ըշվ. աշխ., էջ 171:
- ⁶² Ջոն Կիրակոսյան. Առաջին համաշխարհային պատերազմը եւ արեւմտահայոց թյուրը: Երեւան, 1965, էջ 123:
- ⁶³ «Միութիւն», 1914, № 28, էջ 50:
- ⁶⁴ «Միութիւն», 1914, № 29, էջ 69:
- ⁶⁵ «Միութիւն», 1914, № 28, էջ 50-51:

3. Որբախնամ եւ զաղթախնամ գործունեությունը

- ¹ Իս.Տէրտէրեան. Հայկական գոյամարտը, հ.Վ: Թեհրան, 1957, էջ 223, 225:
- ² «Միութիւն», 1915, № 37, էջ 4:
- ³ «Միութիւն», 1914, № 36, էջ 179:
- ⁴ Նույն տեղում:
- ⁵ ՀԲԸՄ -1914-1915, էջ 23:
- ⁶ Ոսկեմատեան. 1906-1931, էջ 450:
- ⁷ Նույն տեղում, էջ 67:
- ⁸ Միութիւն, 1915, № 39, էջ 35:
- ⁹ Միութիւն, 1915, № 38, էջ 23:
- ¹⁰ Նույն տեղում:

- ¹¹ Ջոն Կիրակոսյան. Առաջին համաշխարհային պատերազմը եւ արեւմտահայու-
թյունը: Երեւան, 1967, էջ 122:
- ¹² Սանուկ Գ. Երկրորդ համաշխարհային պատերազմի շրջանակներում կուսակցու-
թեան (1890-1925): Ֆրոնտ, 1930, էջ 198-202:
- ¹³ Ջոն Կիրակոսյան. Երկր. աշխ., էջ 183:
- ¹⁴ «Միութիւն», 1920, № 75, էջ 44:
- ¹⁵ «Միութիւն», 1913, № 15, էջ 45:
- ¹⁶ «Միութիւն», 1915, № 39, էջ 35, 36:
- ¹⁷ ՊԿՊԱ, ֆ. 446, ց. 2, գ. 53, թ. 2:
- ¹⁸ Ոսկեմատեան. 1906-1931, էջ 88:
- ¹⁹ Լ. Թոգաթլեան. Սովետացիներու Բոլ-Սայիտ ժամանումը: - Տօքթ. Ա. Սալբի. Ալեակ-
ներ եւ խլեակներ. Հայ վրանաքաղաքին տարեգիրքը: Աղեքսանդրիա, 1919, էջ 22:
- ²⁰ Լույս տեղում, էջ 23:
- ²¹ Լեւոն Արիզեան. Սիսուան վարժարանը: - Տօքթ. Ա. Սալբի. Ալեակներ եւ խլեակներ,
էջ 182:
- ²² «Միութիւն», 1920, № 73, էջ 13:
- ²³ Լեւոն Արիզեան. Երկր. աշխ., էջ 189:
- ²⁴ «Միութիւն», 1918, № 65, էջ 73:
- ²⁵ Տիգրան Յ. Պոյաճեան. Հայկական Լեզունը. Պատմական յուշագրութիւն: Ուօթըր-
թաուն, Մտ., 1965, էջ 23:
- ²⁶ Լույս տեղում, էջ 20:
- ²⁷ Տօքթ. Ա. Սալբի. Ալեակներ եւ խլեակներ, էջ 280-281:
- ²⁸ Լույս տեղում, էջ 212:
- ²⁹ «Միութիւն», 1918, № 66, էջ 90:
- ³⁰ Հայկական Բարեգործական Ընդհանուր Միութեան գործապատումը. Գահիրէ,
1919, էջ 31:
- ³¹ «Միութիւն», 1918, № 65, էջ 74:
- ³² 900 տարագրեալներ եւս ազատուած Թաֆիլէի մէջ: - «Միութիւն», 1918, № 61,
էջ 5:
- ³³ ՊԿՊԱ, ֆ. 446, ց. 2, գ. 53, թ. 4:
- ³⁴ ՀԲԸՄ - 1916-1919, էջ 52:
- ³⁵ Լեւոն Չորմիսեան. Համապատկեր արեւմտահայոց մէկ դարու պատմութեան.
Գ. հատոր, էջ 527:
- ³⁶ Հ. Թովուզյան. Սիրիայի եւ Լիբանանի հայկական գաղթաբազմերի պատմութիւնը
(1841-1946): Երեւան, 1986, էջ 115:
- ³⁷ Լիպարիտ Ազատեան. Հայ դրբերը մեծ եղեռնի. Ա հատոր: Լոս Անճելըս, 1995,
էջ 140-146: Տես նաեւ Բ (1999թ.) եւ Գ (2002թ.) հատորները:

- ³⁸ Յ. Պողոսեան. Հայ ցեղը եւ հալածանքները հոգեբանութեան լոյսին տակ:
Պոստոն, 1919, էջ 135:
- ³⁹ Լեւոն Չորմիսեան. Երկր. աշխ., էջ 527:
- ⁴⁰ ՀԲԸՄ - 1916-1919, էջ 119:
- ⁴¹ Հ. Թովուզյան. Երկր. աշխ., էջ 159:
- ⁴² ՀԲԸՄ - 1920-1921, էջ 119:
- ⁴³ Լույս տեղում, էջ 120:
- ⁴⁴ «Միութիւն», 1919, № 70, էջ 59:
- ⁴⁵ Հ. Թովուզյան. Երկր. աշխ., էջ 162:
- ⁴⁶ Ոսկեմատեան. 1906-1931, էջ 127:
- ⁴⁷ «Միութիւն», 1921, № 83, էջ 74:
- ⁴⁸ Ոսկեմատեան. 1906-1931, էջ 161:
- ⁴⁹ Մինաս Խապրիկ. Եթէ Չորր-Մարգարանը ինձի հետ խօսէր: Պէյրութ, 1983,
էջ 117:
- ⁵⁰ «Միութիւն», 1920, № 76, էջ 57:
- ⁵¹ Մինաս Խապրիկ. Երկր. աշխ., էջ 130:
- ⁵² Ոսկեմատեան. 1906-1931, էջ 141:
- ⁵³ Дэвид Ллойд Джордж. Правда о мирных договорах, т. 2. Москва, 1957, с. 416.
- ⁵⁴ Հմայեակ Գրանեան. Սիսուան որբանոցը: - «Յուշարար-Միութիւն», 1976, № 8,
էջ 12:
- ⁵⁵ ՊԿՊԱ, ֆ. 430, ց. 1, գ. 332, թ. 6:
- ⁵⁶ Կիլիկիոյ պարպումը եւ Հայկ. Բարեգ. Ընդ. Միութեան որբանոցները: - «Միու-
թիւն», № 84, էջ 93:
- ⁵⁷ Հմայեակ Գրանեան. Սիսուան որբանոցը, էջ 13:
- ⁵⁸ «Միութիւն», 1921, № 83, էջ 76:
- ⁵⁹ ՀԲԸՄ - 1924, էջ 43:
- ⁶⁰ Ոսկեմատեան. 1906-1931, էջ 167:
- ⁶¹ Լույս տեղում, էջ 49:
- ⁶² «Միութիւն», 1928, № 123, էջ 33:
- ⁶³ «Միութիւն», 1929, № 135, էջ 238:
- ⁶⁴ Ջեկոյց Ընդի. տնօրէնութեան Կեսարիոյ որբերուն մասին: - «Միութիւն», 1929, №
131, էջ 168:
- ⁶⁵ Լույս տեղում:
- ⁶⁶ «Միութիւն», 1930, № 145, էջ 402; 1931, № 150, էջ 116:
- ⁶⁷ Յ. Պողոսեան. Հայ ցեղը եւ հալածանքները հոգեբանութեան լոյսին տակ, էջ 87:
- ⁶⁸ «Յուշարար», 1923, № 79/84, էջ 793:
- ⁶⁹ «Միութիւն», 1930, № 137, էջ 265:
- ⁷⁰ ՀԲԸՄ - 1932, էջ 71:

- 71 Հ.Թովուզյան. Եզվ. աշխ., էջ 111:
- 72 Ոսկեմատեան. 1906-1931, էջ 154-155:
- 73 Նույն տեղում, էջ 155:
- 74 Նույն տեղում, էջ 154:
- 75 «Միութիւն», 1918, № 66, էջ 88:
- 76 ՀԲԸՄ - 1931, էջ 90:
- 77 James L. Barton. Story of Near East Relief. New York, The Macmillan Co. 1930, p. 263.
- 78 Նահր էլ Օմարի գաղթականի մասին տես՝ Եղիշէ Վարդանեան. Անապատէ անապատ: Ս. Ղազար - Վենետիկ, 1923: Հ.Մելիքսեթյան. Հայրենիք-Սփյուռք առնչութիւնները եւ հայրենադարձութիւնը (1920-1980): Երևան, 1985, էջ 74-86:
- 79 «Խորհրդային Հայաստան», 1921, 16 հոկտեմբեր:
- 80 Եղիշէ Վարդանեան. Եզվ. աշխ., էջ 477:
- 81 ՀԲԸ Միութիւն, Կեդր. Վարչ. Ժողով, շրջաբերական թիւ 146, Փարիզ, 8 նոյեմբեր, 1921: - ՀԲԸՄ ԿԿԱ:
- 82 «Միութիւն», 1921, № 84, էջ 88:
- 83 «Միութիւն», 1921, № 82, էջ 52:
- 84 Եղիշէ Վարդանեան. Եզվ. աշխ., էջ 482:
- 85 Միջագետքի 816 որբերը ՀԲԸ Միութեան հովանիին տակ Երուսաղէմի մէջ: - «Միութիւն», 1922, № 85, էջ 6:
- 86 Նույն տեղում, էջ 8-9:
- 87 Նոյեմզար Վարդանյանի հուշագրութիւնները, ձեռագիր, էջ 12: Ընդհանրապէս լուսնու են հայտնում Մոնրեալում բնակվող Ակրտիչ Մալխասյանին, որը սիրահոծար տրամադրեց հորաքրոջ՝ Նոյեմզար Մալխասյան-Վարդանյանի եւ հոր՝ Հովհաննես Մալխասյանի հուշագրութիւնների պատճենները:
- 88 Միջագետքի 816 որբերը ՀԲԸ Միութեան հովանիին տակ Երուսաղէմի մէջ, էջ 7:
- 89 Միութեան Երուսաղէմի Արարատեան որբանոցը: - «Միութիւն», 1922, № 86, էջ 20:
- 90 Նոյեմզար Վարդանյանի հուշագրութիւնները, էջ 13:
- 91 «Միութիւն», 1923, № 94, էջ 52:
- 92 «Յուշարար», 1923, № 81/86, էջ. 851:
- 93 Նոյեմզար Վարդանյանի հուշագրութիւնները, էջ 13-14:
- 94 Հովհաննես Մալխասյանի հուշագրութիւնները, էջ 12-13:
- 95 «Միութիւն», 1924, № 101, էջ 78:
- 96 Հովհաննես Մալխասյանի հուշագրութիւնները, էջ 14:
- 97 «Միութիւն», 1925, 103, էջ 3:
- 98 ՀԲԸՄ - 1926, էջ 60:
- 99 ՀԲԸՄ - 1925, 32-33:

- 100 «Միութիւն», 1923, № 95, էջ 75:
- 101 ՆՊ ԿՊԱ, ֆ. 122, ց. 1, գ. 333, թ. 44: Գերգ Մեսրոպ. Հայերը եւ Հայաստանը. 1923 յունուար 1 - 1924 յուլիս 31: - Ամերիկահայոց տարեգիրք - 1925, կազմ. Յ. Խաչմանեան: Բոստոն, 1925, էջ 43-45:
- 102 «Միութիւն», 1923, № 93, էջ 34:
- 103 ՀԲԸՄ - 1925, էջ 28:
- 104 «Միութիւն», 1923, № 95, էջ 76:
- 105 Պ. Կոկինոս. Հունահայ գաղութի պատմութիւնից (1918-1927): Ե., 1965, էջ 43:
- 106 «Միութիւն», 1924, № 97, էջ 35:
- 107 «Միութիւն», 1925, № 105, էջ 35:
- 108 Նույն տեղում:
- 109 ՀԲԸՄ - 1930, էջ 70:
- 110 «Արեւ», 1923, 23 փետրվարի:
- 111 ՀԲԸՄ - 1924, էջ 31-32:
- 112 «Յուշարար», 1923, № 85/90, էջ 928:
- 113 Նոյեմզար Վարդանյանի հուշագրութիւնները, էջ 15:
- 114 «Յուշարար», 1923, № 81/91, էջ 850:
- 115 Ոսկեմատեան. 1906-1931, էջ 229:
- 116 «Հայաստանի Կոչնակ», 1925, № 2, էջ 54:
- 117 Պ. Կոկինոս. Եզվ. աշխ., էջ 29:
- 118 Ս.Աղասեան, Պտոյտ մը Ֆիքսի գաղթականին մէջ: - «Միութիւն», 1925, № 107, էջ 73-74:
- 119 ՊԿՊԱ, ֆ. 430, ց. 1, գ. 896, թ. 36-37:
- 120 Ս. Աղասեան, Եզվ. աշխ., էջ 74:
- 121 ՊԿՊԱ, ֆ. 430, ց. 1, գ. 896, թ. 43:
- 122 ՀԲԸՄ - 1923, էջ 37:
- 123 Լիպարիտ Ազատեան. Հայ որբերը մեծ եղեմնի, Ա գիրք, էջ 107:
- 124 Պ. Կոկինոս. Հունահայ գաղութի պատմութիւնից, էջ 46:
- 125 ՊԿՊԱ, ֆ. 430, ց. 1, գ. 241, թ. 9-11:
- 126 Պարծեալ Նիյո Իսթ Բիլիֆը եւ մեծը: - «Հայաստանի Կոչնակ», 1925, № 14, էջ 419:
- 127 ՀԲԸՄ - 1935, էջ 56:
- 128 ՀԲԸՄ - 1928, էջ 39-40: «Միութիւն», 1929, № 132, էջ 178:
- 129 James L. Barton. Story of Near East Relief, p. 306.
- 130 Նույն տեղում, էջ. 305-306:
- 131 ՀԲԸՄ - 1928, էջ 35:
- 132 Պ.Բարսեղեան. Հայ որբերը Ֆրանսայի մէջ: - Ֆրանսահայ տարեգիրք, 1927: Բարիզ, էջ 214:
- 133 Ամերիկեան Նպաստամատոյցը եւ մեր որբերը: - Նույն տեղում, էջ 210:

- ¹³⁴ James L. Barton. Story of Near East Relief, p. 4.
- ¹³⁵ Նույն տեղում:
- ¹³⁶ «Միութիւն», 1923, 11/12, էջ 91:
- ¹³⁷ Նույն տեղում:
- ¹³⁸ «Միութիւն», 1926, № 9/10, էջ 98:
- ¹³⁹ «Միութիւն», 1927, № 8/9, էջ 66:
- ¹⁴⁰ ՀԲԸՍ - 1927, էջ 41:
- ¹⁴¹ «Յուշարար», 1945, № 6, էջ 166:
- ¹⁴² ՀԲԸՍ - 1930, էջ 56:
- ¹⁴³ Ոսկեմատեան. 1906-1931, էջ 268:
- ¹⁴⁴ Robert Mirak. Torn between two Lands. Armenians in America, 1890 to World War I. Harvard Univ. Press, Cambridge, Mass., 1983, pp. 150-180.
- ¹⁴⁵ «Հայրենիք», Բոստոն, 1912, 23 հուլիս:
- ¹⁴⁶ Ոսկեմատեան. 1906-1931, էջ 269:
- ¹⁴⁷ Նույն տեղում:
- ¹⁴⁸ Գործապատում ՀԲԸ Միութեան Գալիֆորնիոյ շրջանակի (1910-1953). Պատրաստեց Գրիգոր Ա. Սարաֆեան: Ֆրեզնո, 1954, էջ 7:
- ¹⁴⁹ Ոսկեմատեան. 1906-1931, էջ 274:
- ¹⁵⁰ Կ. Ղալլաքյան. Ակնարկներ սփյուռքահայ հասարակական մտքի պատմության: Երեւան, 1994, էջ 3-38:
- ¹⁵¹ Նույն տեղում, էջ 39-45:
- ¹⁵² Д. Ллойд Джордж, Правда о мирных договорах, т. 2, с. 465.
- ¹⁵³ Նույն տեղում, էջ 461:
- ¹⁵⁴ Նույն տեղում, էջ 462:
- ¹⁵⁵ Ոսկեմատեան. 1906-1931, էջ 279:
- ¹⁵⁶ Historical Statistics of the United States. Colonial Times to 1970. Wash., 1975, p. 135.
- ¹⁵⁷ Գործապատում ՀԲԸ Միութեան Գալիֆորնիոյ շրջանակի (1910-1953), էջ 5:
- ¹⁵⁸ Նույն տեղում, էջ 208:
- ¹⁵⁹ Ոսկեմատեան. 1906-1931, էջ 275:
- ¹⁶⁰ ՊԿՊԱ, ֆ. 446, ց. 2, գ. 53, թ. 6-7:
- ¹⁶¹ «Միութիւն», 1933, № 160, էջ 27:
- ¹⁶² Գ. Թովուզյան. Սիրիայի եւ Լիբանանի հայկական գաղթօջախների պատմություն, էջ 172:
- ¹⁶³ Թ. Կրինչիլտս. Հայ գաղթականներու տեղադրումը Հայկաի մէջ (1920-1939): - Գեղարդ. Սուրիահայ տարեգիրք. Բ. գիրք: Հայկա, 1978, էջ 263:
- ¹⁶⁴ Գ. Թովուզյան, նշվ. աշխ., էջ 174; տես նաեւ՝ «Եփրատ» (Հայկա), 1933, 3 փետրվարի:

- ¹⁶⁵ Ռ. Ճեպեճեան. Կիրիմցիներու քերթը - Հայկա: - «Արարատ» (Բեյրութ), 1989, 24 հոկտեմբերի:
- ¹⁶⁶ Գ. Թովուզյան, նշվ. աշխ., էջ 175:
- ¹⁶⁷ «Միութիւն», 1930, № 145, էջ 402:
- ¹⁶⁸ ՀԲԸՍ - 1932, էջ 87:
- ¹⁶⁹ ՀԲԸՍ - 1931, էջ 85:
- ¹⁷⁰ ՀԲԸՍ - 1938, էջ 58:
- ¹⁷¹ «Միութիւն», 1927, № 117, էջ 33:
- ¹⁷² Նույն տեղում, էջ 34:
- ¹⁷³ Գեղարդ. Սուրիահայ տարեգիրք. Ե. գիրք. Պատ. խմբ. Ռուպերտ Ճեպեճեան: Հայկա, 1996, էջ 161:
- ¹⁷⁴ Պարգեւ Նազարեանի յուշերը Սանճակի տարածքին տեղադրուած հայութեան մասին. - նույն տեղում, էջ 118:
- ¹⁷⁵ «Եփրատ», 1931, 19 օգոստոսի:
- ¹⁷⁶ Գ. Թովուզյան, նշվ. աշխ., էջ 174-175:
- ¹⁷⁷ «Եփրատ», 1932, 15 հուլիսի:
- ¹⁷⁸ Գ. Թովուզյան. նշվ. աշխ., էջ 238:
- ¹⁷⁹ Canon C.T. Bridgeman. The new Armenian Trek. Exodus from Hatay. - "Hoosharar", 1940, № 3, p. 54.
- ¹⁸⁰ ՀԲԸՍ - 1940-1945, էջ 74:
- ¹⁸¹ Նույն տեղում, էջ 73:
- ¹⁸² D.A. Berberian. Report of Malaria Control Work in the Armenian Refugee Settlements in the Lebanon, in 1943. - "Hoosharar", 1944, № 10, p. 192.
- ¹⁸³ «Ձարթօնք», 1940, 24 հոկտեմբերի:
- ¹⁸⁴ ՀԲԸՍ - 1920-1921, էջ 56:
- ¹⁸⁵ Նույն տեղում, էջ 57:
- ¹⁸⁶ Նույն տեղում, էջ 58:

4. Խորհրդային Հայաստանում

- ¹ Տես Կ. Ղալլաքյան. Ակնարկներ սփյուռքահայ հասարակական մտքի պատմության: Երեւան, «Գիտություն», 1994, «Սփյուռքահայ հանրային մտքի ձեւավորման ակունքներում» ակնարկը:
- ² ՀԲԸՍ - 1920-1921, էջ 95:
- ³ Նույն տեղում:
- ⁴ «Միութիւն», 1922, № 86, էջ 17:
- ⁵ Ա. Թերզիպաշեան. Նուպար: Փարիզ, 1939, էջ 360-361:

- ⁶ ՆՊ ԿՊԱ, ֆ. 113, ց. 43, գ. 150, ք. 111:
- ⁷ Նույն տեղում, ք. 56:
- ⁸ Նույն տեղում, ք. 57:
- ⁹ Ս.Լուկաշին (Սրապիոնյան). Հողվածներ, զեկուցումներ, ճառեր: Երևան, «Հայաստան», 1986, էջ 163-164:
- ¹⁰ ՀԲԸՍ - 1922, էջ 26-27:
- ¹¹ «Միութիւն», 1924, № 98, էջ 24:
- ¹² Նույն տեղում, էջ 23:
- ¹³ ՀԲԸՍ - 1922, էջ 27-28:
- ¹⁴ ՆՊ ԿՊԱ, ֆ. 113, ց. 43, գ. 150, ք. 60:
- ¹⁵ Նույն տեղում, ք. 87:
- ¹⁶ Նույն տեղում, ք. 86:
- ¹⁷ ՆՊ ԿՊԱ, ֆ. 122, ց. 1, գ. 333, ք. 44:
- ¹⁸ Նույն տեղում, ք. 104:
- ¹⁹ Նույն տեղում, ք. 44:
- ²⁰ ՀԲԸՍ - 1923, էջ 26:
- ²¹ ՀԲԸՍ - 1924, էջ 28:
- ²² «Միութիւն», 1924, № 101, էջ 66:
- ²³ «Միութիւն», 1923, № 94, էջ 52-53:
- ²⁴ ՆՊ ԿՊԱ, ֆ. 122, ց. 1, գ. 333, ք. 98:
- ²⁵ «Միութիւն», 1925, № 103, էջ 11-12:
- ²⁶ «Միութիւն», 1929, № 132, էջ 178:
- ²⁷ «Միութիւն», 1934, № 170, էջ 83:
- ²⁸ «Միութիւն», 1934, № 168, էջ 59:
- ²⁹ «Միութիւն», 1937, № 185, էջ 35:
- ³⁰ «Միութիւն», 1925, № 103, էջ 10-11:
- ³¹ «Միութիւն», 1933, № 162, էջ 59:
- ³² «Միութիւն», 1929, № 135, էջ 232:
- ³³ ՀԲԸՍ - 1930, էջ 77:
- ³⁴ ՀԲԸՍ - 1931, էջ 59:
- ³⁵ «Միութիւն», 1933, № 163, էջ 67:
- ³⁶ ՀԲԸՍ ԿՎԱ:
- ³⁷ Նույն տեղում:
- ³⁸ Նույն տեղում:
- ³⁹ Նույն տեղում:
- ⁴⁰ Ա. Չոպանեան. Հայաստանի Համալսարանը: - «Միութիւն», 1928, № 121, էջ 9:
- ⁴¹ «Միութիւն», 1929, № 128, էջ 118:
- ⁴² «Միութիւն», 1928, № 122, էջ 26:

- ⁴³ ՀԲԸՍ - 1936, էջ 57:
- ⁴⁴ Նույն տեղում:
- ⁴⁵ ՆՊ ԿՊԱ, ֆ. 113, ց. 3, գ. 1698, ք. 3, 27:
- ⁴⁶ «Միութիւն», 1927, № 119, էջ 78:
- ⁴⁷ «Միութիւն», 1930, № 140, էջ 312:
- ⁴⁸ Հայկական Սովետական Հանրագիտարան, հ. 9, էջ 569-570:
- ⁴⁹ ՆՊ ԿՊԱ, ֆ. 40/113, ց. 3, գ. 1745, ք. 15:
- ⁵⁰ Նույն տեղում, ք. 11:
- ⁵¹ Նույն տեղում, ք. 9:
- ⁵² «Միութիւն», 1928, № 124, էջ 56: ՀԲԸՍ-1930, էջ 78:
- ⁵³ Ե. Աղաթօն. Ի՞նչ կը խորհին Հայկ. Բարեգ. Ընդհ. Միութեան հիմնադիրները: Փարիզ, 1925, էջ 7:
- ⁵⁴ «Միութիւն», 1932, № 154, էջ 26:
- ⁵⁵ Հայաստանի Կոչնակ, 1925 թ., № 15, էջ 467-468:
- ⁵⁶ «Միութիւն», 1928, № 122, էջ 19:
- ⁵⁷ «Միութիւն», 1929, № 131, էջ 166:
- ⁵⁸ Վ. Համազասպեան, Աւանը վերստացաւ իր նախկին անունը Նուպարաշէն: - «Յուշարար-Միութիւն», 1991, № 4, էջ 20:
- ⁵⁹ Ա. Թերզիպաշեան. Նուպար, էջ 371:
- ⁶⁰ ՆՊ ԿՊԱ, ֆ. 178, ց. 1, գ. 534, ք. 7-8:
- ⁶¹ ՀԲԸՍ - 1930, էջ 74:
- ⁶² ՀԲԸՍ - 1931, էջ 54:

5. 1920-1930թթ. ներգաղթը: Գ. Կյուլպենկյանի հրաժարականը

- ¹ Հայաստանի կոչնակ, 1924, № 5, էջ 151:
- ² Հայաստանի կոչնակ, 1925, № 8, էջ 232:
- ³ Նույն տեղում:
- ⁴ Հայաստանի կոչնակ, 1924, № 5, էջ 151:
- ⁵ ՀԲԸՍ - 1926, էջ 16:
- ⁶ ՀԲԸՍ - 1925, էջ 12:
- ⁷ ՀԲԸՍ - 1926, էջ 17:
- ⁸ ՀԲԸՍ - 1927, էջ 34:
- ⁹ «Խորհրդային Հայաստան», 20 օգոստոս, 1931թ.:
- ¹⁰ «Խորհրդային Հայաստան», 2 հուլիս, 1931թ.:
- ¹¹ «Խորհրդային Հայաստան», 26 սեպտեմբեր 1931թ.:
- ¹² «Միութիւն», 1931թ., № 152, էջ 164:

- ¹³ ՀԲԸՄ - 1932, էջ 55:
- ¹⁴ «Միութիւն», 1932, № 154, էջ 21-22:
- ¹⁵ «Միութիւն», 1932, № 155, էջ 39-40:
- ¹⁶ ՀԲԸՄ - 1932, էջ 55-56:
- ¹⁷ «Միութիւն», 1933, № 159, էջ 3:
- ¹⁸ ՀԲԸՄ - 1932, էջ 56:
- ¹⁹ ՀԲԸՄ - 1933, էջ 53:
- ²⁰ «Միութիւն», 1933, № 161, էջ 41:
- ²¹ «Միութիւն», 1932, № 155, էջ 40:
- ²² «Միութիւն», 1933, № 164, էջ 84:
- ²³ Հ.Մելիքսեթյան. Հայրենիք-սփյուռք առնչությունները եւ հայրենադարձությունը, (1920-1980թթ.): Երեւան, 1985, էջ 118:
- ²⁴ ՀԲԸՄ - 1934, էջ 44:
- ²⁵ ՀԲԸՄ ԿՎԱ:
- ²⁶ ՀԲԸՄ - 1936, էջ 45-47:
- ²⁷ ՀԶԿՓ ԿՊԱ, ֆ. 1, ց. 16, գ. 77, ք. 43:
- ²⁸ ՀԶԿՓ ԿՊԱ, ֆ. 1, ց. 16, գ. 71, ք. 39:
- ²⁹ «Միութիւն», 1927, № 120, էջ 84:
- ³⁰ Հ. Մելիքսեթյան. Հայրենիք - սփյուռք առնչությունները, էջ 160 - 161:
- ³¹ ՀԲԸՄ ԿՎԱ:
- ³² Նույն տեղում:
- ³³ ԱԱՆԱ ԿԳՖ, գ. 3058, ք. 10:
- ³⁴ ՀԶԿՓ ԿՊԱ, ֆ. 1, ց. 17, գ. 76, ք. 22:
- ³⁵ ՀԲԸՄ ԿՎԱ:
- ³⁶ ՆՊ ԿՊԱ, ֆ. 178, ց. 1, գ. 580, ք. 46:
- ³⁷ ՀԲԸՄ ԿՎԱ:
- ³⁸ Նույն տեղում:
- ³⁹ «Խորհրդային Հայաստան», 16 հոկտեմբեր 1931թ.:
- ⁴⁰ ՀԲԸՄ ԿՎԱ:
- ⁴¹ Նույն տեղում:
- ⁴² «Միութիւն», 1932, № 156, էջ 49-50:
- ⁴³ Նույն տեղում, էջ 51-52:
- ⁴⁴ Նույն տեղում, էջ 54:
- ⁴⁵ Նույն տեղում:
- ⁴⁶ Nubar Gulbenkian. Portrait in Oil. Simon and Schuster, New York, 1965, p. 12.
- ⁴⁷ Ralph Hewins. Mr Five Per Cent. The Story of Calouste Gulbenkian. Rinehart & Company, 1957, pp. 52-53.
- ⁴⁸ Նույն տեղում, էջ 53.

- ⁴⁹ Տեն Կ. Ղալաքյան. ՀԲԸ Միության նախագահ Գ. Կյուլպենկյանի հրաժարականի հարցի շուրջ: Երեւան, 1996, էջ 78-79:
- ⁵⁰ Նույն տեղում, էջ 83:
- ⁵¹ Նույն տեղում, էջ 87:
- ⁵² «Միութիւն», 1932, № 156, էջ 58; 1931, № 151, էջ 148:
- ⁵³ Կ. Ղալաքյան, նշվ. աշխ. էջ 85:
- ⁵⁴ «Միութիւն», 1932, № 156, էջ 58-59:
- ⁵⁵ Նույն տեղում, էջ 58:
- ⁵⁶ Վ.Մալեգեան. Գալուստ Կիւլպենկեանի Բարեգործականի նախագահութեան շրջանը եւ հրաժարման պատճառները: - Արեւ, 20 հունվար, 1960:
- ⁵⁷ ԱԱՆԱ ԿԳՖ, գործ 5407, հ.1, ք. 31:
- ⁵⁸ Մեջքերումը ըստ՝ Ա.Ամրիկյան. Անմեկնելի են Աստծո ճանապարհները: Երեւան, 1998, էջ 184, 186: Ա.Ամրիկյան՝ պատմաբան Ա. Մանուկյանի գրական անունն է, որի այս գրքի հիմքում դրված են արխիվային փաստաթղթեր: Այդ տարիների Հայաստանի ներքաղաքական իրավիճակի մասին տե՛ս Mary Kilbourne Matossian. The Impact of Soviet Policies in Armenia. Leiden, E.J.Brill, 1962; Այս գիրքը այսօր էլ անենահիմնավոր գիտական աշխատությունն է՝ Խորհրդային Հայաստանի 1920-1940թթ. պատմության մասին:
- ⁵⁹ Талейран. Мемуары. М., 1959, стр. 140.
- ⁶⁰ Mary Kilbourne Matossian. The Impact of Soviet Policies in Armenia, p.119
- ⁶¹ ՀԲԸՄ ԿՎԱ:
- ⁶² Նույն տեղում:
- ⁶³ «Միութիւն», 1930, № 145, էջ 404:
- ⁶⁴ «Միութիւն», 1930, № 144, էջ 391:
- ⁶⁵ ՀԲԸՄ ԿՎԱ:
- ⁶⁶ ՆՊ ԿՊԱ, ֆ. 178, ց. 1, գ. 518, ք. 5-6: Արխիվում պահպանվել է նամակի Երեւանում կատարված ռուսերեն պաշտոնական թարգմանությունը: Տե՛ս նաեւ Ս.Ստեփանյանց. Հայ Առաքելական եկեղեցին ստալինյան բռնապետության օրոք: Երեւան, 1994, էջ 201-202:
- ⁶⁷ ՆՊ ԿՊԱ, ֆ. 113, ց.3, գ. 1759, ք.44: Արխիվում պահպանվել է նամակի Փարիզում կատարված ռուսերեն ոչ այնքան հաջող թարգմանության պատճենը, որը ավելի ուշ Վ.Մալեգյանը ուղարկել էր Երեւան:
- ⁶⁸ Նույն տեղում, ք. 43:
- ⁶⁹ Նույն տեղում, ք. 42:
- ⁷⁰ Նույն տեղում, ք. 38:
- ⁷¹ Georges Agabekov. OGPU. The Russian Secret Terror. Brentano's, New York, 1931, p. 269:
- ⁷² «Միութիւն», 1947, № 204, էջ 17:

⁷³ ՀԲԸՄ ԿՎԱ:

⁷⁴ Նույն տեղում:

⁷⁵ Նույն տեղում:

⁷⁶ Nubar Gulbenkian. Portrait in Oil, p. 314.

6. Ներքաղաքական պայքարը եւ ՀԲԸՄ լուծարումը Հայաստանում

¹ ՀԶԿԹ ԿՊԱ, ֆ. 1, ց.15, գ.11, ք.104:

² ՆՊ ԿՊԱ, ֆ. 178, ց. 1, գ.535, ք. 32-35:

³ Մեջքերումը՝ ըստ Ա. Ամրիկյան. Անմեկնելի են Աստծո ճանապարհները, էջ185-186:

⁴ ՀԶԿԹ ԿՊԱ, ֆ. 1, ց. 15, գ. 3, ք. 25:

⁵ ՀԶԿԹ ԿՊԱ, ֆ.1, ց. 15, գ. 4, ք. 62:

⁶ Նույն տեղում, ք. 44:

⁷ Նույն տեղում, ք. 17:

⁸ ՀԶԿԹ ԿՊԱ, ֆ. 1, ց.15, գ. 12, ք. 44:

⁹ «Միութիւն», 1929, № 127, էջ 99-100:

¹⁰ ՀԶԿԹ ԿՊԱ, ֆ.1, ց. 16, գ. 77, ք. 7-10:

¹¹ ՆՊ ԿՊԱ, ֆ. 178, ց.1, գ. 284, ք. 7-12:

¹² ՆՊ ԿՊԱ, ֆ.113, ց. 3, գ. 1672, ք.8:

¹³ Նույն տեղում, ք. 7:

¹⁴ Նույն տեղում, ք.3:

¹⁵ ՆՊ ԿՊԱ, ֆ.178, ց.1, գ.254, ք. 31:

¹⁶ ՆՊ ԿՊԱ, ֆ. 113, ց. 3, գ. 1672, ք. 11-13:

¹⁷ ՀԶԿԹ ԿՊԱ, ֆ. 1, ց.16, գ. 77, ք. 11:

¹⁸ ՆՊ ԿՊԱ, ֆ.113, գ. 3, գ. 1672, ք. 33:

¹⁹ Նույն տեղում, ք. 32:

²⁰ Ա.Ամրիկյան, Ըշվ. աշխ., էջ 186:

²¹ Նույն տեղում:

²² ՆՊ ԿՊԱ, ֆ. 178, ց.1, գ. 263, ք.1:

²³ ՀԶԿԹ ԿՊԱ, ֆ. 1, ց.16, գ.70, ք.72:

²⁴ ՀԶԿԹ ԿՊԱ, ֆ.1, ց. 17, գ. 46, ք. 110 ա:

²⁵ ՆՊ ԿՊԱ, ֆ.178, ց.1, գ. 653, ք. 4:

²⁶ Ա. Սանուկյան. Գնդակահարված է երեսնականներին. ՀՕԿ-ի նախագահ Արսեն Եսայան: - «Ազգ», 9 մարտի 1996:

²⁷ ԱԱՆԱ ԿԳՖ, գ. 3058, ք. 125:

²⁸ Նույն տեղում, ք.11-13:

²⁹ Նույն տեղում, ք. 43-44:

³⁰ Նույն տեղում, ք. 50, 51:

³¹ ՆՊ ԿՊԱ, ֆ.178, ց.1, գ.254, ք.21:

³² Ա. Վիրաբյան. Սպանություն, թե՞ ինքնասպանություն: - «Երեկոյան Երեւան», 19 մայիս 1988:

³³ ՀԶԿԹ ԿՊԱ, ֆ.1, ց. 16, գ. 60, ք. 3:

³⁴ Նույն տեղում, ք. 10:

³⁵ Նույն տեղում, ք. 5:

³⁶ ՀԲԸՄ ԿՎԱ (թարգմ. ֆրանսերենից):

³⁷ ԱԱՆԱ ԿԳՖ, գ. 3058, ք. 87:

³⁸ «Միութիւն», 1936, № 180, էջ 53:

³⁹ ՆՊ ԿՊԱ, ֆ. 178, ց. 1, գ. 580, ք.1:

⁴⁰ ՀԶԿԹ ԿՊԱ, ֆ.1, ց. 16, գ. 68, ք. 1-7:

⁴¹ Նույն տեղում, ք. 9:

⁴² ԱԱՆԱ ԿԳՖ, գ. 3058, ք. 128:

⁴³ Ա.Սանուկյան. ՀՕԿ-ի առաջին նախագահ Արամայիս Երզնկյանը զոհ 1937թ. հալածանքների: - «Ազգ», 5 մարտ 1996:

⁴⁴ ՀԶԿԹ ԿՊԱ, ֆ. 1, ց. 17, գ. 76, ք. 14:

⁴⁵ ՀԶԿԹ ԿՊԱ, ֆ.1, ց.17, գ. 76, ք. 32:

⁴⁶ ՀԶԿԹ ԿՊԱ, ֆ.1, ց.17, գ. 83, ք. 1, 2:

⁴⁷ Процесс антисоветского троцкистского центра (23-30 января 1937 г.). Москва, Юридическое изд-во, 1937, стр. 210-211.

⁴⁸ Յու.Սոսվյան, Ա.Վիրաբյան. Հայաստան, 1937: - «Երեկոյան Երեւան», 9 սեպտեմբերի 1988:

⁴⁹ Նույն տեղում: Ю.Мравян. Зловещее письмо отца народов,- "Голос Армении", 9 октября 1991:

⁵⁰ «Խորհրդային Հայաստան», 26, 29 սեպտեմբերի 1937:

⁵¹ ՀԶԿԹ ԿՊԱ, ֆ.1, ց. 17, գ. 53, ք. 21:

⁵² Նույն տեղում, ք. 89-90:

⁵³ ՀԶԿԹ ԿՊԱ, ֆ.1, ց. 17, գ. 76, ք. 131:

⁵⁴ ԱԱՆԱ ԿԳՖ, գ. 4029, ք.140:

⁵⁵ ՆՊ ԿՊԱ, ֆ. 113, ց. 3, գ.1808, ք. 35:

⁵⁶ ՀԲԸՄ - 1938, էջ 39:

⁵⁷ Նույն տեղում, էջ 40-41:

⁵⁸ ՀԲԸՄ - 1939, էջ 16-17:

⁵⁹ ԱԱՆԱ ԿԳՖ, գ. 3058, ք. 9:

⁶⁰ Նույն տեղում, ք. 10:

⁶¹ Նույն տեղում:

- ⁶² Նույն տեղում, ք. 203:
⁶³ Նույն տեղում, ք. 20:
⁶⁴ Դ. Գասպարյան. Փակ դռների գաղտնիքը: Երեւան, «Ապոլոն», 1994, էջ 84, 90, 106, 107, 129:
⁶⁵ ԱԱՆԱ ԿԳՖ, գ. 3058, ք.23:
⁶⁶ Նույն տեղում, ք. 200:
⁶⁷ Նույն տեղում, ք.61:
⁶⁸ Նույն տեղում, ք.64:
⁶⁹ Նույն տեղում, ք. 66-67:
⁷⁰ Նույն տեղում, ք. 68:
⁷¹ Նույն տեղում, ք. 251:
⁷² Նույն տեղում, ք. 172:
⁷³ Նույն տեղում, ք.176:
⁷⁴ Նույն տեղում, ք. 177-178:
⁷⁵ Болингброк. Письма об изучении и пользе истории. Москва, Наука, 1978, стр. 199.

7. Երկրորդ Աշխարհամարտի տարիներին: Մեծ ներգաղթը

- ¹ ՀԲԸՄ - 1939, էջ 13-14:
² Ռաբո (Ռուբեն Թադեոսեան): Ֆրանսահայ գաղութը պատերազմի ընթացքում: - «Հայրենիք», Պոստոն, 1946, № 5, էջ 53:
³ Ксения Худзинская. Этапы эмигрантской жизни. - "Культура русской диаспоры: саморефлексия и самоидентификация". Тарту, 1997, с. 412-413.
⁴ Ա. Զօսպանեան. Հրամայական պարտականութիւն: - «Միութիւն», 1939, № 11/12, 200, էջ 96:
⁵ «Միութիւն», 1939, № 9-10, էջ 67:
⁶ W. Churchill. The Second World War, vol. II. Their finest hour. Boston, 1949, p. 42.
⁷ ՀԲԸՄ - 1940-1945, էջ 11-12:
⁸ Նույն տեղում, էջ 9-10:
⁹ Նույն տեղում, էջ 10:
¹⁰ Նույն տեղում, էջ 35:
¹¹ Նույն տեղում, էջ 43:
¹² Ա. Անտոնեան. ՀԲԸ Միութեան Բարիզի Նուպարեան Մատենադարանի գերման թալանը: - «Միութիւն», 1947, մայիս, էջ 72:
¹³ Նույն տեղում:

- ¹⁴ Ю. Коваленко. Москва - Париж. Очерки о русской эмиграции. М., 1991, с. 129.
¹⁵ Նազիստական Գերմանիայի հետ ՀՀ Դաշնակցության համագործակցության մասին տես: Ռ.Սարտիրոսյան. Դաշնակցության հակաժողովրդական գործունեությունը Երկրորդ համաշխարհային պատերազմի տարիներին: Երեւան, 1986: Эдуард Оганесян. Век борьбы. Очерк 100-летней истории дашнакской партии и национально-освободительной борьбы армянского народа. В 2-х т. Москва, 1991, т.2, стр. 394-404.
¹⁶ Պ Զօլօլեան. Նուպարեան Մատենադարանի կողոպուտը: - «Միութիւն», 1948, հուլիս 1, էջ 300:
¹⁷ Նույն տեղում:
¹⁸ Ա.Անտոնեան, նշվ. աշխ., էջ 74:
¹⁹ ՀՀ ՆՊԿՊԱ, ֆ. 326, ց. 1, գ. 186, ք.3:
²⁰ Gary A. Kulhanjian. The Historical and Sociological Aspects of Armenian Immigration to the United States 1890 to 1930. San Francisco, R and E Research Associates, 1975, p. 60-61.
²¹ ՀԲԸՄ - 1940-1945, էջ 15:
²² ՀԲԸՄ ԿԿԱ:
²³ ՀԲԸՄ, 1940-1945, էջ 105:
²⁴ ՀԲԸ Միութեան խօսքը Փարիզի պառակտիչ շարժումին մասին: Նիւ Եորք, 1963, էջ 7:
²⁵ Նույն տեղում, էջ 74: Restated Certificate of Incorporation of Armenian General Benevolent Union (A Non-Stock Membership Corporation), p. 4.
²⁶ Նույն տեղում, էջ 76-77:
²⁷ Ա.Թիրեաքեան. Օրուան մեծ պարտականութիւնը: - «Յուշարար», 1941, ապրիլ, էջ 51:
²⁸ «Յուշարար», 1941, նոյեմբեր, էջ 137:
²⁹ ՀԲԸՄ - 1940-1945, էջ 24:
³⁰ «Յուշարար», 1942, դեկտեմբեր, էջ 218:
³¹ «Էջմիածին», 1944, № 1, էջ 4:
³² Նույն տեղում, էջ 5:
³³ Նույն տեղում, էջ 10:
³⁴ «Յուշարար», 1943, ապրիլ 1, էջ 16:
³⁵ «Յուշարար», 1944, մարտ 1, էջ 73:
³⁶ «Յուշարար», 1944, փետրվար 15, էջ 51:
³⁷ ՀԲԸՄ - 1940-1945, էջ 91:
³⁸ «Յուշարար», 1943, փետրվար, էջ17-18: ·
³⁹ «Յուշարար», 1943, մարտ, էջ 34:

- ⁴⁰ «Յուշարար», 1943, դեկտեմբեր 18, էջ 275:
- ⁴¹ «Յուշարար», 1944, հունվար 2, էջ 19:
- ⁴² «Յուշարար», 1944, փետրվար 4, էջ 50:
- ⁴³ «Յուշարար», 1944, մարտ 15, էջ 83:
- ⁴⁴ «Յուշարար», 1944, մարտ 1, էջ 75:
- ⁴⁵ Ե.Մեսիանեան. ՀԲԸ Միութիւնը գլխիւնկ հաուգ: - «Յուշարար», 1944, օգոստոս 12, էջ 227:
- ⁴⁶ «Յուշարար», 1944, նոյեմբեր 15, էջ 331:
- ⁴⁷ Նույն տեղում, էջ 332-333:
- ⁴⁸ «Յուշարար», 1945, մայիս 1, էջ 131:
- ⁴⁹ «Յուշարար», 1946, ապրիլ 1, էջ 117:
- ⁵⁰ «Յուշարար», 1944, նոյեմբեր 15, էջ 332-333:
- ⁵¹ ՀԲԸՍ - 1940-1945, էջ 23:
- ⁵² «Յուշարար», 1944, հունվար 1, էջ 7-8:
- ⁵³ «Յուշարար», 1945, մայիս 1, էջ 139:
- ⁵⁴ История США. В 4-х т. М., "Наука", 1985, т. 3, с. 334-335.
- ⁵⁵ Переписка Председателя Совета Министров СССР с президентами США и премьер-министрами Великобритании во время Великой Отечественной войны 1941-1945 гг. В 2-х т. М., 1957, т. 2, с. 56-57.
- ⁵⁶ В.Костиков, Не будем проклинать изгнанье... Пути и судьбы русской эмиграции. М., 1990, с. 298-299.
- ⁵⁷ Эд. Мелконян. Между двумя мирами. Пути политической адаптации армянской диаспоры. - "Вертикали истории" (Тбилиси), 2003, №2, с. 78-80.
- ⁵⁸ «Յուշարար», 1944, մայիս 1, էջ 144:
- ⁵⁹ Р.Медведев. Они окружали Сталина. М., Изд-во политической литературы, 1990, с. 49.
- ⁶⁰ Ս.Ստեփանյանց. Հայ Առաքելական եկեղեցին ստալինյան բռնապետության օրոք: Երեւան, 1994, էջ 161-162:
- ⁶¹ ՀՀ ՆՊ ԿՊԱ, ֆ. 326, ց. 1, գ. 16, թ. 6:
- ⁶² Նույն տեղում, թ. 8:
- ⁶³ «Էջմիածին», 1945, № 6-7, էջ 7:
- ⁶⁴ Նույն տեղում, էջ 8:
- ⁶⁵ «Յուշարար», 1945, սեպտեմբեր 1, էջ 262:
- ⁶⁶ Նույն տեղում: ՀՀ ՆՊԿՊԱ, ֆ. 326, ց. 1, գ. 57, թ. 13:
- ⁶⁷ Նույն տեղում, թ. 27:
- ⁶⁸ Նույն տեղում, թ. 28 - 29:
- ⁶⁹ «Յուշարար», 1945, նոյեմբեր 1, էջ 326:
- ⁷⁰ Նույն տեղում, էջ 332-333:

- ⁷¹ ՀՀ ՆՊ ԿՊԱ, ֆ. 326, ց. 1, գ. 57, թ. 6:
- ⁷² «Յուշարար», 1945, նոյեմբեր 1, էջ 324:
- ⁷³ Արսրլեան Զաւէն. Արեւմտահայ բռնագրաւուած հողերու հարցը 1921-1971թթ.- «Հայկազեան հայագիտական հանդէս», խմբ. եր. Քասուհի: Պէյրուք, 1971, էջ 32:
- ⁷⁴ Советский Союз на международных конференциях периода Великой Отечественной войны (1941-1945 гг.), сб. документов, т. 6. М., 1980.
- ⁷⁵ ՀՀ ՆՊ ԿՊԱ, ֆ. 326, ց. 1, գ. 57, թ. 35-36:
- ⁷⁶ ՀՀ ՆՊ ԿՊԱ, ֆ. 326, ց. 1, գ. 74, թ. 1:
- ⁷⁷ «Սովետական Հայաստան», 1946, 3 փետրվարի:
- ⁷⁸ «Յուշարար», 1946, մարտ 1, էջ 67-68: Տես նաեւ: ՀՀ ՆՊ ԿՊԱ, ֆ. 326, ց. 2, գ. 30, թ. 2:
- ⁷⁹ ՀՀ ՆՊ ԿՊԱ, ֆ. 326, ց. 2, գ. 30, թ. 14:
- ⁸⁰ «Յուշարար», 1946, մարտ 15, էջ 100:
- ⁸¹ «Յուշարար», 1946, հոկտեմբեր 15, էջ 231:
- ⁸² ՀԲԸՍ - 1946-1949, էջ 46:
- ⁸³ Նույն տեղում, էջ 110:
- ⁸⁴ Հ. Մելիքսեթյան. Հայրենիք - սփյուռք առնչությունները եւ հայրենադարձությունը, էջ 241:
- ⁸⁵ «Միութիւն», 1947, ապրիլ, էջ 63:
- ⁸⁶ Գ.Ահարոնեան, Մեծ երազի ճամբուն վրայ: Պէյրուք, 1964, էջ 199:
- ⁸⁷ ՀՀ ՆՊ ԿՊԱ, ֆ. 326, ց. 1, գ. 156, թ. 74-75:
- ⁸⁸ W. Lippman. The Cold War. New York, 1947, p. 28.
- ⁸⁹ «Միութիւն», 1947, ապրիլ, էջ 63-64:
- ⁹⁰ «Միութիւն», 1947, հունիս, էջ 94:
- ⁹¹ ՀՀ ՆՊ ԿՊԱ, ֆ. 326, ց. 2, գ. 29, թ. 72:
- ⁹² ՀՀ ՆՊԿՊԱ, ֆ. 326, ց. 1, գ. 213, թ. 1-2:
- ⁹³ Charles A. Vertanes. The Case of the Cholakian Family. N.Y., 1950.
- ⁹⁴ «Միութիւն», 1947, դեկտեմբեր 1, էջ 255:
- ⁹⁵ ՀՀ ՆՊԿՊԱ, ֆ. 362, ց. 2, գ. 43, թ. 28:
- ⁹⁶ ՀՀ ՆՊԿՊԱ, ֆ. 362, ց. 2, գ. 43, թ. 35:
- ⁹⁷ «Հայրենիք», 23 հուլիսի, 1941:
- ⁹⁸ Ռ.Մարտիրոսյան, նշվ. աշխ., էջ 7-8:
- ⁹⁹ «Զարթօնք», 30 նոյեմբերի 1983:
- ¹⁰⁰ «Միութիւն», 1948, փետրվարի 1, էջ 64:
- ¹⁰¹ Հ.Մելիքսեթյան. նշվ. աշխ., էջ 241:
- ¹⁰² ՀՀ ՆՊԿՊԱ, ֆ. 362, ց. 1, գ. 8, թ. 21, 61:
- ¹⁰³ Մովսէս Բազարյան. Նամակներ սովետական «դրախտից»: Երեւան, 1996, էջ 64-65:

- ¹⁰⁴ Նույն տեղում, էջ 54:
- ¹⁰⁵ Արմենակ Մանուկյան. Քաղաքական բռնադատումները Հայաստանում 1920-1953 թթ.: Երևան, 1999, էջ 231:
- ¹⁰⁶ Մովսես Բազարյան, նշվ. աշխ., էջ 48:
- ¹⁰⁷ Н. Ф. Бугай, А.М. Гонов. Кавказ: народы в эшелонах (20-60-е годы). Москва, 1998, с. 127-128.
- ¹⁰⁸ Նույն տեղում, ր. 211:
- ¹⁰⁹ Նույն տեղում, ր. 213:
- ¹¹⁰ Նույն տեղում, ր. 221-222:
- ¹¹¹ Ա.Մանուկյան, նշվ. աշխ., էջ 230; Н. Ф. Бугай, А.М. Гонов, указ. соч., с. 222.
- ¹¹² Ա.Մանուկյան, նշվ. աշխ., էջ 230:
- ¹¹³ Նույն տեղում, էջ 238:
- ¹¹⁴ ՆՊ ԿՊԱ, ֆ. 326, ց. 1, գ. 156, ք. 23:
- ¹¹⁵ Նույն տեղում, ք. 18:
- ¹¹⁶ Նույն տեղում, ք. 19:
- ¹¹⁷ ՀՀ ՆՊԿՊԱ, ֆ. 362, ց. 2, գ. 29, ք.38:
- ¹¹⁸ Մովսես Բազարյան, նշվ. աշխ., էջ 129:
- ¹¹⁹ Նույն տեղում:
- ¹²⁰ Նույն տեղում, էջ 259:

8. Հայ ինքնության պահպանումը սփյուռքում

- ¹ Antranig Antreassian. The AGBU: A Mission in Service to the Armenian People. 1981, p. 25:

Արևելքի երկրներ

- ² James L. Barton. Story of Near East Relief (1915-1930). An Interpretation. New York, The Macmillan Company, p.292.
- ³ Խ. Գալուստեան. ՀԲԸ Միութեան Հե Ընկերակցութեան հիմնարկութեան 50-ամեակին առթիւ: - ՀԲԸ Միութեան Հայ Երիտասարդաց Ընկերակցութիւն. Ոսկեմատեան: Հալէպ, 1982, էջ 22:
- ⁴ Հայ Երիտասարդաց Ընկերակցութիւն: - Նույն տեղում, էջ 132:
- ⁵ Բարունակ Թովմասեան. Հայկական Ընդհանուր Միութիւն: - Նույն տեղում, էջ 128:
- ⁶ «Միութիւն», 1934, № 3-4, էջ 19:
- ⁷ Հայ Երիտասարդաց Ընկերակցութիւն: - էջ 132:
- ⁸ ՀԲԸՄ - 1934, էջ 66-67:
- ⁹ ՀԲԸՄ - 1935, էջ 63:

- ¹⁰ Խաչեր Գալուստեան. Լիկայի պատմականը - Գեղարդ. Սուրիահայ տարեգիրք, Գ. գիրք, խմբ. Հայկ Պարիկեան: Հալէպ, 1985, էջ 418:
- ¹¹ ՀԵԸ եւ մարզական շարժումը: - ՀԲԸ Միութեան Հայ Երիտասարդաց Ընկերակցութիւն. Ոսկեմատեան, էջ 90:
- ¹² ՀԲԸՄ - 1955, 1956 եւ 1957, էջ 75:
- ¹³ ՀԵԸ եւ մարզական շարժումը: - ՀԲԸ Միութեան Հայ Երիտասարդաց Ընկերակցութիւն. Ոսկեմատեան, էջ 92:
- ¹⁴ Վարդան Սվաճեան. Պատմութիւն Հալէպի ՀԵԸ-ի սկաուտական շարժման: - Նույն տեղում, էջ 67-68:
- ¹⁵ «Խօսմակ», Պէյրութ, սեպտեմբեր-հոկտեմբեր 1999, էջ 24:
- ¹⁶ Նույն տեղում, էջ 23:
- ¹⁷ Նույն տեղում, էջ 25:
- ¹⁸ Յակոբ Միքայէլեան. ՀԵԸ-ի թատերական շարժման պատմութիւնը: - ՀԲԸ Միութեան Հայ Երիտասարդաց Ընկերակցութիւն. Ոսկեմատեան, էջ 53:
- ¹⁹ Նույն տեղում, էջ 55:
- ²⁰ Նույն տեղում, էջ 56:
- ²¹ Նույն տեղում, էջ 58:
- ²² Վ.Ա. ՀԵԸ եւ նրա երաժշտական գործունէութիւնը: - Նույն տեղում, էջ 81:
- ²³ Նույն տեղում, էջ 82:
- ²⁴ Ռոպեր Ճեպեճեան. Պատմութիւն Հալէպի Ասլամազեան Քառեակի: - Գեղարդ. Սուրիահայ տարեգիրք, Ե. գիրք, խմբ. Ռ.Ճեպեճեան: Հալէպ, 1996, էջ 329:
- ²⁵ Նույն տեղում:
- ²⁶ Լեւոն Պերդուտեան. ՀԲԸ Միութեան Ընտանեկան ակումբը.-Նույն տեղում, էջ 337:
- ²⁷ Նույն տեղում, էջ 338:
- ²⁸ Կ.Ճուհարեան, Զ. Գուշեան. ՀԵԸ-ի ուսանողական շարժման համառօտ պատմութիւն: - ՀԲԸ Միութեան Հայ Երիտասարդաց Ընկերակցութիւն. Ոսկեմատեան, էջ 105:
- ²⁹ Նույն տեղում, էջ 107:
- ³⁰ Ատրունի Մատուռեան. Ինչո՞ւ, ե՞րբ եւ ի՞նչպէս ծնունդ առաւ «Խօսմակ»: - «Խօսմակ», սեպտեմբեր-հոկտեմբեր 1991, էջ 13:
- ³¹ «Խօսմակ», հունվար 1994, էջ 12:
- ³² Պարգեւ Յ. Օրջանեան. Հայ արեւմտահայկական համայնքը Գամիշլիի մէջ: - Գեղարդ. Սուրիահայ տարեգիրք, Բ. գիրք, խմբ. Հայկ Պարիկեան, Հալէպ: 1979, էջ 370-371:
- ³³ Նույն տեղում, էջ 371:
- ³⁴ AGBU Magazine, New York, March 2001, p 37.
- ³⁵ «Յուշարար-Միութիւն», 2001, № 3-4, էջ 12:

- ³⁶ Կեդր. վարչ. ժողովի յառաջիկայ ուղեգիծը. Ծրագիր ՀԲԸ Միութեան: Բարիզ, 1931, էջ 24-25:
- ³⁷ ՀԲԸՄ - 1924, էջ 83:
- ³⁸ ՀԲԸՄ - 1926, էջ 66:
- ³⁹ ՀԲԸՄ - 1931, էջ 74:
- ⁴⁰ Յովհ. Պողոսեան. Պայքարը ՀԲԸ Միութեան դէմ: Գահիրէ, 1934, էջ 15:
- ⁴¹ Կարլեն Դալլաքյան. Ռամկավար Ազատական կուսակցության պատմություն, (1921-1940): Երևան, 1999, էջ 183:
- ⁴² Նույն տեղում:
- ⁴³ Նույն տեղում, էջ 186:
- ⁴⁴ Նույն տեղում, էջ 166:
- ⁴⁵ Նույն տեղում, էջ 138-139:
- ⁴⁶ ՀՀ ՆՊԱ, ֆ. 326, ց. 1, գ. 167, ք. 6:
- ⁴⁷ Կ.Դալլաքյան. նշվ. աշխ., էջ 139:
- ⁴⁸ ՀԲԸՄ - 1926, էջ 12:
- ⁴⁹ ՀԲԸՄ - 1928, էջ 23:
- ⁵⁰ «Միութիւն», 1934, № 138, էջ 56:
- ⁵¹ ՀԲԸՄ - 1927, էջ 47:
- ⁵² ՀԲԸՄ - 1928, էջ 49:
- ⁵³ ՀԲԸՄ - 1928, էջ 48:
- ⁵⁴ ՀԲԸՄ - 1931, էջ 67:
- ⁵⁵ ՀԲԸՄ - 1936, էջ 61:
- ⁵⁶ Նույն տեղում:
- ⁵⁷ «Միութիւն», 1939, № 198, էջ 59:
- ⁵⁸ ՀԲԸՄ - 1938, էջ 42:
- ⁵⁹ ՀԲԸՄ - 1939, էջ 25:
- ⁶⁰ Տոքթ. Յ. Էսեկիւլեան. ՀԲԸ Միութեան վարժապետանոցը: - «Յուշարար-Միութիւն», 1987, № 4-5, էջ 55:
- ⁶¹ «Յուշարար-Միութիւն», 1986, № 10, էջ 8:
- ⁶² ՀԲԸՄ - 1985 (Ատենագրութիւն 72րդ ընդհանուր ժողովի), էջ 6-7:
- ⁶³ «Յուշարար-Միութիւն», 1986, № 10, էջ 10:
- ⁶⁴ AGBU Melkonian Educational Institute. Prospectus. Nicosia - Cyprus. 1999, p. 11.
- ⁶⁵ ՀԲԸՄ - 1940-1945, էջ 60:
- ⁶⁶ ՀԲԸՄ - 1958, 1959 եւ 1960, էջ 174:
- ⁶⁷ ՀԲԸՄ - 1961, 1962 եւ 1963, էջ 65:
- ⁶⁸ Նույն տեղում, էջ 66:
- ⁶⁹ ՀԲԸՄ - 1952, էջ 25-26:

- ⁷⁰ ՀԲԸ Միութիւնը Մերձաւոր Արեւելքի մէջ. Գնահատական ակնարկ: The AGBU in the Middle East. An Appreciation. By Miss Leila Karagheusian. New York, 1951, էջ 5-7:
- ⁷¹ Նույն տեղում, էջ 7-8:
- ⁷² Նույն տեղում, էջ 15-16:
- ⁷³ Միութիւն, 1955, մարտ, էջ 23:
- ⁷⁴ Նույն տեղում, էջ 23-24:
- ⁷⁵ Լեւոն Պերդուտեան. ՀԲԸ Միութեան Լազար Նաճարեան - Գալուստ Կիլաբեկեան կեդրոնական երկսեռ վարժարան: - Գեղարդ. Սուրիահայ տարեգիրք, Ե. գիրք, էջ 386:
- ⁷⁶ «Խօսնակ», 2001, յուլ.-օգոստ.-սեպտ., էջ 38:
- ⁷⁷ ՀԲԸՄ - 1966, էջ 241; AGBU. Annual Report of the Central Board of Directors for the year 1967, p. 27.
- ⁷⁸ ՀԲԸՄ - 1958, 1959, 1960, էջ 78:
- ⁷⁹ AGBU - 1967, p. 11:
- ⁸⁰ Ռ. Ճեպեճեան. Նախածեռնութիւն հայկական դպրոցներու գոյատեւման օգտին: - Գեղարդ. Սուրիահայ տարեգիրք, Ե. գիրք, էջ 405:
- ⁸¹ Эдуард Оганесян. Век борьбы. т. 2. М., 1991, с. 407, 446.
- ⁸² The Torch was passed. The Centennial History of the Armenian Church of America. Ed. by Christopher Hagop Zakian. New York, St. Vartan Press, 1998, p. 74-76.
- ⁸³ «Յուշարար», 1959, հունվար 15, էջ 26:
- ⁸⁴ «Ջահակիր» (Գահիրէ), 1959, 31 հուլիս:
- ⁸⁵ ՀԲԸՄ - 1964, էջ 61:
- ⁸⁶ «Չարթօնք», 30 նոյեմբեր, 1993:
- ⁸⁷ «Խօսնակ», մայիս-հունիս 2001, էջ 21:
- ⁸⁸ Նույն տեղում:
- ⁸⁹ Տես՝ Ն. Հովհաննիսյան. Լիբանանյան ճգնաժամը - Լիբանանի հայ համայնքի դիրքորոշումը: Եր., 1982: Ն. Չալըմյան. Լիբանանի հայ համայնքը երկրի սոցիալ-տնտեսական-քաղաքական կյանքում: Եր., 2002, էջ 53-61: Ռ. Կարապետյան. Արաբական երկրների մոր եւ նորագույն պատմություն: Եր., 2003, էջ 206-215:
- ⁹⁰ ՀԲԸՄ - 1976, էջ 42-43:
- ⁹¹ Նույն տեղում:
- ⁹² «Յուշարար - Միութիւն», 1976, № 18, էջ 9-10:
- ⁹³ ՀԲԸՄ - 1985, էջ 50:
- ⁹⁴ ՀԲԸՄ - 1978, էջ 51:
- ⁹⁵ Յակոբ Ալթունեան. Լիբանանի ճարտարարուեստի ներկայ գոյակիճակը եւ հեռանկարները. - «Խօսնակ», նոյեմբեր-դեկտեմբեր 1991, էջ 35-36:
- ⁹⁶ «Խօսնակ», հոկտեմբեր 1992, էջ 9:

- ⁹⁷ ՀԲԸՄ - 1977, էջ 38:
- ⁹⁸ Ժիրայր Դանիելեան. Լիբանանահայ դպրոցը-1991. Թիւեր եւ ստորումներ: - «Խօսնակ», նոյեմբեր-դեկտեմբեր 1991, էջ 15, 18:
- ⁹⁹ Ժիրայր Դանիելեան. Լիբանանահայ դպրոցը լուրջ մարտահրաւրի դէմ յանդիման: - «Խօսնակ», դեկտեմբեր 1993, էջ 12:
- ¹⁰⁰ Նույն տեղում, էջ 13:
- ¹⁰¹ Նույն տեղում, էջ 10-11:
- ¹⁰² «Յուշարար-Միութիւն», 1998, դեկտեմբեր, էջ 6:
- ¹⁰³ ՀԲԸՄ - 1936, էջ 75:
- ¹⁰⁴ «Միութիւն», 1934, № 167, էջ 58:
- ¹⁰⁵ Կանոնագիր «Նուպար» Մարզական Միութեան: Գահիրէ, 1936, էջ 3:
- ¹⁰⁶ «Խօսնակ», յունիս, 2000, էջ 17:
- ¹⁰⁷ Նույն տեղում, էջ 19:
- ¹⁰⁸ «Յուշարար-Միութիւն», 1998, № 2, էջ 14:
- ¹⁰⁹ «Յուշարար-Միութիւն», 2004, № 1, էջ 46:
- ¹¹⁰ Նույն տեղում:
- ¹¹¹ Է.Լ.Փահլեանյան. Իրանահայ համայնքը (1941-1979թթ.): Երեւան, 1989, էջ 17:
- ¹¹² ՀԲԸՄ - 1932, էջ 29: Է.Լ.Փահլեանյանի գրքում (էջ 140) որպէս հիմնադրման տարի նշված է 1936թ:
- ¹¹³ Տեղեկագիրներ ՀԲԸ Միութեան Թեհրանի մասնաճիւղի վարչութեան: - «Հուշարար», 1945, փետրվար 2, էջ 38:
- ¹¹⁴ ՀԲԸՄ - 1953 եւ 1954, էջ 52:
- ¹¹⁵ Տես՝ Է.Լ.Փահլեանյան, նշվ. աշխ., էջ 191: Է.Ֆախնազարյան, Հայագիտությունը Թեհրանի եւ Իսպահանի պետական համալսարանում: - «Պատմա-բանասիրական հանդես», 1969, № 3, էջ 262-263:
- ¹¹⁶ ՀԲԸՄ - 1955, էջ 59:
- ¹¹⁷ AGBU - 1967, p. 55.
- ¹¹⁸ ՀԲԸՄ - 1983, էջ 43:

Արեւմուտքի երկրներ

- ¹¹⁹ Ոսկեմատեան 1906-1931, էջ 278:
- ¹²⁰ Հայերը ամերիկացիներու ակնոցով դիտուած: - Մուշեղ եպիսկոպոս. Ամերիկահայ տարեցոյցը, Ա. տարի: Պոստոն, 1912, էջ 185-188:
- ¹²¹ Mirak, Robert. Torn between two Lands. Armenians in America, 1890 to World War I. Harvard University Press, Cambridge, Mass., 1983, pp. 144-147, 272-283; Bakalian, Anny. Armenian-Americans. From Being to Feeling Armenian. Transaction Publishers, New Brunswick, London, 1993, p. 20-21.

- ¹²² Boudjikian-Keuroghlian, Aida. Les Arméniens dans la Région Rhone-Alpes. Audin-Lyon, 1978, pp. 109-113; Bakalian, Anny. Op. cit., pp. 396 - 418; Мелконян Эд. Армянская семья в условиях диаспоры. - "Советская этнография", М., 1988, № 6.
- ¹²³ Mirak, Robert. Torn between two Lands. Armenians in America, 1890 to World War I, p.271- 272.
- ¹²⁴ «Գիր ու գիրք», 1976, № 21.
- ¹²⁵ Գործապատում ՀԲԸ Միութեան Գալիֆորնիոյ շրջանակի (1910-1953): Ֆրեզնօ, 1954, էջ 5:
- ¹²⁶ Norehad, Bedros. The Armenian General Benevolent Union, its History and Purpose. USA, Lydian Press, 1966, p. 57.
- ¹²⁷ ՀԲԸ Միութեան Ամերիկայի Շրջ. Յանձնաժողովի տարեկան տեղեկագիրը ներկայացուած ժե. կտրիկը. համաժողովին: Պոստոն, 29-30 մայիս, 1927-ին: ՀԲԸՄ ԿՎԱ
- ¹²⁸ Ոսկեմատեան. 1906-1931, էջ 428:
- ¹²⁹ Նույն տեղում, էջ 430:
- ¹³⁰ «Միութիւն», 1948, հունիս, էջ 253:
- ¹³¹ Philip Gleason. American Identity and Americanization. - "Harvard Encyclopedia of American Ethnic Groups". Stephan Thernstrom, editor. Harvard Univ. Press, Cambridge (Mass.), London, 1981, p. 48.
- ¹³² «Նոր օր» (Լուս Անջելես), 1994, դեկտեմբեր 31, էջ 20:
- ¹³³ «Միութիւն», 1955, մարտ, էջ 23:
- ¹³⁴ «Յուշարար - Միութիւն», 2001, հունիս, էջ 8:
- ¹³⁵ ՀԲԸՄ - 1958, 1959 եւ 1960, էջ 40:
- ¹³⁶ ՀԲԸՄ - 1955-1957, էջ 285:
- ¹³⁷ ՀԲԸՄ - 1966, էջ 210:
- ¹³⁸ «Յուշարար - Միութիւն», 1963, նոյեմբեր 15, էջ 27:
- ¹³⁹ Նույն տեղում:
- ¹⁴⁰ AGBU of America, Inc. Annual Report 1978/1979, p. 10.
- ¹⁴¹ Armenian General Benevolent Union. Central Committee of America. Annual Report 1984, p. 21.
- ¹⁴² G. H. Chopourian. "An Open Letter to newly arrived Armenian Immigrants" - "American Missionary Association of America News", November 1976, p 4.
- ¹⁴³ ՀԲԸՄ - 1976, էջ 45:
- ¹⁴⁴ «Զարթօնք», 19 մարտ, 1978:
- ¹⁴⁵ «Յուշարար - Միութիւն», սեպտեմբեր 1997, էջ 7:
- ¹⁴⁶ ՀԲԸՄ - 1953 եւ 1954, էջ 109-110:
- ¹⁴⁷ «Յուշարար - Միութիւն», 1968, փետրվար, էջ 11-12:
- ¹⁴⁸ Bakalian Anny. Armenian-Americans. From Being to Feeling Armenian, pp. 431-438.

- ¹⁴⁹ Ibid., pp. 274-275.
- ¹⁵⁰ «Յուշարար - Միութիւն», փետրվար 1969, էջ 11 - 12:
- ¹⁵¹ Նույն տեղում, էջ 13:
- ¹⁵² Armenian General Benevolent Union of America, Inc. Annual Report 1977-1978, p. 1.
- ¹⁵³ «Խօսնակ», հոկտեմբեր 1993, էջ 8:
- ¹⁵⁴ «Չարթօնք», 30 նոյեմբեր 1993:
- ¹⁵⁵ Նույն տեղում:
- ¹⁵⁶ Armenian General Benevolent Union. Central Committee of America. Annual Report 1983, p. 1.
- ¹⁵⁷ Armenian General Benevolent Union. 1988-1989 Annual Reports, p. 56.
- ¹⁵⁸ «Յուշարար - Միութիւն», դեկտեմբեր 1997, էջ 22:
- ¹⁵⁹ Նույն տեղում, էջ 24:
- ¹⁶⁰ «Խօսնակ», հոկտեմբեր 1993, էջ 8:
- ¹⁶¹ ՀԲԸՄ - 1937, էջ 79:
- ¹⁶² ՀԲԸՄ - 1968, էջ 69:
- ¹⁶³ «Խօսնակ», հոկտեմբեր 1993, էջ 9:
- ¹⁶⁴ Հայ սփյուռք. Հանրագիտարան: Եր., 2003, էջ 638:
- ¹⁶⁵ ՀԲԸՄ - 1953 եւ 1954, էջ 63:
- ¹⁶⁶ ՀԲԸՄ - 1958, 1959 եւ 1960, էջ 32:
- ¹⁶⁷ ՀԲԸՄ - 1968, էջ 60:
- ¹⁶⁸ ՀԲԸՄ - 1936, էջ 78:
- ¹⁶⁹ «Խօսնակ», դեկտեմբեր 1993, էջ 38:
- ¹⁷⁰ Նույն տեղում, էջ 39:
- ¹⁷¹ AGBU Magazine, march 2003, p. 21.
- ¹⁷² «Միութիւն», հոկտեմբեր-օգոստոս, 1925, էջ 50:
- ¹⁷³ St. Gregory Armenian Apostolic Church, Golden Jubilee 1930-1980. St. Catharines, Ontario, 1980, p. 13.
- ¹⁷⁴ J. Apramian. The Georgetown Boys. The Printing House, Hamilton, 1976.
- ¹⁷⁵ Ոսկեմատեան. 1906-1931, էջ 405:
- ¹⁷⁶ Izabel Kaprielian - Churchill. Armenians. - "Encyclopedia of Canada's Peoples", Paul Robert Magocsi, editor. University of Toronto Press, Toronto-Buffalo-London, 1999, p. 217.
- ¹⁷⁷ «Յուշարար», մարտ 1947, էջ 40:
- ¹⁷⁸ Oksen Teghtsoonian. Armenians in Toronto: the Early Years. - "Polyphony. The Bulletin of the Multicultural History Society of Ontario", 1982, vol. 4, no. 2, p.100.
- ¹⁷⁹ «Յուշարար», մարտ 1945, էջ 78:
- ¹⁸⁰ Izabel Kaprielian - Churchill. Armenians, p. 217.
- ¹⁸¹ Ibidem, p. 219.

- ¹⁸² ՀԲԸՄ - 1987, էջ 73:
- ¹⁸³ Garo Chichekian. The Armenian Community of Quebec. Montreal, 1989, p.58.
- ¹⁸⁴ Kim Hekimian. Armenians Immigration to Argentina: 1909-1938. - "Armenian Review", Watertown, Mass., 1990, vol. 43, no. 1/169, p. 88.
- ¹⁸⁵ Narciso Binayan Carmona. Entre el pasado y el futuro: Los Armenios en la Argentina. Buenos Aires, 1996, p. 76.
- ¹⁸⁶ Տարեցոյց Հար. Ամերիկահայոց. Պուլնոս Այրես, 1943, էջ 72:
- ¹⁸⁷ Վարդան Մատթոսեան, ծեռագիր, էջ 3:
- ¹⁸⁸ Հ. Սօսօֆեան. Պուլնոս Այրեսի գաղութին նախապատմականը - «Հայ Կեդրոն», հունվար 1933, № 3, էջ 6: Հոդվածի պատճենը հեղինակին տրամադրել է Վարդան Մատթոսյանը:
- ¹⁸⁹ Նույն տեղում:
- ¹⁹⁰ Նույն տեղում: Տե՛ս նաեւ՝ Ոսկեմատեան. 1906-1931, էջ 407:
- ¹⁹¹ Վարդան Մատթոսեան, ծեռագիր, էջ 3:
- ¹⁹² Kim Hekimian. Armenians Immigration to Argentina: 1909-1938, p.97: Տարեցոյց Հար. Ամերիկահայոց. Պուլնոս Այրես, 1943, էջ 13:
- ¹⁹³ Տարեցոյց Հար. Ամերիկահայոց, էջ 15:
- ¹⁹⁴ Վարդան Մատթոսեան, ծեռագիր, էջ 4-5:
- ¹⁹⁵ Kim Hekimian. Armenians Immigration to Argentina: 1909-1938, p.98.
- ¹⁹⁶ Ibid., p. 99.
- ¹⁹⁷ Տարեցոյց Հար. Ամերիկահայոց, էջ 75:
- ¹⁹⁸ Նույն տեղում:
- ¹⁹⁹ Kim Hekimian. Armenians Immigration to Argentina: 1909-1938, p. 98: Տարեցոյց Հար. Ամերիկահայոց, էջ 14:
- ²⁰⁰ Narciso Binayan Carmona. Entre el pasado y el futuro: Los Armenios en la Argentina, p.235.
- ²⁰¹ Տարեցոյց Հար. Ամերիկահայոց, էջ 98:
- ²⁰² Նույն տեղում, էջ 99-100:
- ²⁰³ Յուշարար, 1943 սեպտեմբեր, էջ 187:
- ²⁰⁴ Յուշարար, 1947, դեկտեմբեր էջ 247:
- ²⁰⁵ Ոսկեմատեան. 1906-1931, էջ 409:
- ²⁰⁶ Տարեցոյց Հար. Ամերիկահայոց, էջ 317:
- ²⁰⁷ Նույն տեղում, էջ 310:
- ²⁰⁸ Ոսկեմատեան. 1906-1931, էջ 410:
- ²⁰⁹ Վարդան Մատթոսեան, ծեռագիր, էջ 115-117:
- ²¹⁰ Ոսկեմատեան. 1906-1931, էջ 410
- ²¹¹ Եզնիկ քահանայ Վարդանեան. Պրագիլիոյ հայ գաղութը: Պուլնոս Այրես, 1948, էջ 291:

- 212 Նույն տեղում, էջ 292:
- 213 Նույն տեղում, էջ 294:
- 214 Նույն տեղում, էջ 295:
- 215 ՀԲԸՄ - 1972, էջ 40:
- 216 Նույն տեղում:
- 217 Հայ սփյուռք. Հանրագիտարան: էջ 121, 615:
- 218 ՀԲԸՄ - 1927, էջ 49:
- 219 ՀԲԸ Միութիւն. Տեղեկատու եվրոպայի Կեդր. Յանձնաժողովի: Բարիզ, 1950, №1, էջ 2:
- 220 «Յուշարար - Միութիւն», դեկտեմբեր 2000 - մարտ 2001, էջ 9:
- 221 ՀԲԸՄ - 2002-2003:
- 222 AGBU Magazine, june 1997, p. 2.

Վերջաբան. ՀԲԸ Միությունը Հայաստանի Երրորդ Հանրապետությունում

- 1 Մելգոնեան Կրթական Հաստատությունը փակվելու է 2005-ի հունիսին: - «Առավոտ» (Երեւան), 19 մարտի, 2004:
- 2 Տես, օրինակ, Հայկազեն Ուզունեան. Պիտի փակուի Մելգոնեան Կրթական Հաստատությունը. «Յետ դարձ չկայ»: - «Ազգ», 5 մարտի, 2005: Հ. Ուզունյանը, որը տարիներ շարունակ /մինչեւ 1995թ./ եղել է ՀԲԸ Միության Կենտրոնական Վարչության անդամ եւ փոխնախագահ, իր մեկ այլ հոդվածում գրում է. «Կեդրոնական Վարչութեան կազմէն ոչ ոք լաւ գիտէ Մելգոնեանի կարեւորութիւնը Միջին Արեւելքի, Սուրիա-Լիբանանի, Ծոցի երկիրներու, Պարսկաստանի, Արեւելեան Եւրոպայի, Պալէստինեան երկիրներու մեր հայրենակիցներուն համար: Մելգոնեանը այս երկիրներուն համար չափազանց այծծեական է ազգապահպանման իմաստով եւ ամէն գնահատումէ վեր: ... Կեդրոնական Վարչութեան կողմէ առնուած սխալ քայլ մը Հաստատութիւնը փակելու, ՀԲԸ Միութեան անենադժբախտ ու անենազգազմաս քայլը պիտի ըլլայ ...»: - «Ազգ», 13 մարտի, 2004:
- 3 «Յուշարար-Միութիւն», հոկտեմբեր 2002, էջ 17:

ԱՆՎԱՆԱՑԱԿ

- Ա**
- Ադանա՝ կոտորածը, 58
 - Ադիս Աբեբա, 50,
 - եւ Ֆանֆառի խումբը, 125 -126
 - Ազգային պատվիրակություն, 77, 137, 152,
 - եւ Ազգային հանգան., 88,
 - եւ ՀԲԸՄ, 88, 110, 117, 135, 138,
 - Պ.Նուպարը՝ նախագահ, 77- 80. 86, 88, 89, 165
 - Ազգանվեր հայուիյաց ընկերություն, 76
 - Ազգերի Լիգա -ՀԲԸՄ, 157, 159 -160, 215, 231,
 - Նանսենյան գրասենյակ, 158 -159, 209 - 210, 216, 231, 233 - 234
 - Ալեքսանդրեւոյից՝ գաղթականները (1939), 161,
 - Այնճարում, 163,
 - արտագաղթ, 162,
 - Բեյրութում, 163,
 - Համազգային հանգան., 162,
 - Նպաստից Կենտ. հանձն., 163,
 - Ռաս էլ Այնում, 163,
 - Ֆրանս-թուրք. համաձայնագիր, 161-162
 - Ալիանս Իսրայելիթ, 34 - 37, 65
 - Ամերիկահայ Ազգային խորհուրդ եւ ՀԲԸՄ, 336 - 337
 - Ամերիկահայ Առաջադիմական միություն, 336, 369
 - Ամերիկյան Նպաստամատույց, 101, 135, 142 -143, 159, 207, 385 - 386,
 - եւ ապազգային կրթությունը, 137-138,
 - եւ ՀԲԸՄ, 110, 120, 144-147, 169,
 - եւ որբանոցները, 127, 137, որբերի արծակում, 129 -131, 141,
 - Որբերի կիրակի, 143 -147:
 - Տես նաեւ՝ Որբեր, Որբանոցներ, Գաղթատներ
 - ԱՄՆ-ում՝ ՀԲԸՄ, 86, 147-149, 328 - 330, 345 - 346, 462 - 465,
 - «ամերիկյան երազանք», 469 - 470,
 - անգլիախոս մասնաճյուղեր, 468 - 469,
 - «Ամերիկա» պարախումբ, 478,
 - Ամառնային Փորձառական Ծրագիր, 521,
 - «Արարատ» քենպ, 478, երիտասարդական հանձն., 472, երիտասարդ պրոֆեսիոնալներ, 521, Լիբանանահայության օգնության հանգան., 444, Կեդրոն (Պասադինա), 489, Կրկնապատիկի կոչ, 150-151, Կրտսերների լիգա, 345, 388, 466 - 467, 473, «Հայ», 150, Հայ երիտասարդաց ընկերակցություն, 473, 476, Հայագիտական ամբիոններ, 522 - 523, Հայոց լեզվի ամառնային ինստիտուտ, 522, հանգան., 151, 465, Մեծ ճգնաժամ, 153 -154, միօրյա վարժ., 464 - 465, 480, մշակութային, 478-479, մշակութափոխում, 463, 482 - 483, «Յուշարար», 150, Նախագահական ակումբ, 521, Ներգաղթ Արեւելքից, 474 - 476, 486 - 487, «Նուպար» քենպ, 477- 478, սոցիալական կենտրոններ, 475, տիկնանց մասնաճյուղեր, 345, 431, 439, «Hoosharar», 522, Focus, 522: *Տես նաեւ՝* Երկրորդ Աշխարհամարտ, Մարզախաղեր, Վարժարաններ Անգլիական հայնպաստ կոմիտե, 159 Անդրֆեդերացիա, 251 - 252, 279, եւ Խորհրդային Հայաստան, 238, 253 - 254, 262 - 264, 267 - 269, 272, 277 - 280, 284 - 285
 - Աճի Հայ արվեստագետների խմբակցություն, 310
 - Առաջադիմական Հայ ճակատ (Սիրիա), 435
 - Ավստրալիայում՝ ՀԲԸՄ, 517, Անդրանիկ պարախումբ, 517, Երեւան նվազախումբ, 517, երիտ. համաժողով, 518, Էրեբունի ռադիոժամ, 517, Գ. Կիւկեյնկեան գրադարան, 517,

մարզ. հանձնաժողով, 518,
 Ա.Մանուկեան կենտրոն, 517,
 Ա.Մանուկեան միօրյա վարժարան, 517:
 «Միութիւն» 517,
 3. Պարոնեան թատերախումբ 517:
Տես նաեւ՝ Վարժարաններ, Մարզախա-
 ղեր
 Արգենտինայում՝ ՀԲԸՄ, 502,
 եւ Ազգային միությունը, 505,
 եւ Արգենտինայի հայ եկեղեցասիրաց
 Միությունը, 504,
 Բարեգործականի տուն, 508,
 եւ Գաղութային միությունը (Կորդովա),
 509,
 Երիտասարդական լիգա, 507- 509,
 «Լուսաբաց», 514,
 Կեդրոն (Կորդովա), 515,
 Կորդովայում, 405, 509,
 եւ կուսակցությունները, 506-507,
 Հայ գաղութի բարեգործական եւ լսա-
 րանական միություն, 502,
 եւ Հայ պատանեկան միություն, 507,
 հանգանակություններ, 506 - 507,
 եւ Հայ քրիստոնեական միությունը,
 505,
 Հար. Ամերիկայի պատգամավորական
 ժողով, 514,
 Հար.Ամերիկայի երգչախմբերի փառա-
 տուն, 514,
 Ա. Մանուկեան կեդրոն (Բուենոս Այ-
 րես), 514, 516,
 մասնաճյուղերը, 345, 502 - 504,
 «Generacion 3», 514:
Տես նաեւ՝ Վարժարաններ, Մարզախա-
 ղեր
 Արեւելյան (Հայկական) Լեզեոն, 93-94,
 334-335
 Արեւելյան Հայաստանում՝ ՀԲԸՄ, 14,
 գաղթականներ, 81-82,
 Ընդհանուր Հանգանակություն, 83, 85,
 89,
 եւ կամավորական ջոկատները, 85-86,
 մասնաճյուղի հարցը, 83-85,
 նպաստ Կովկասի հայության, 51,
 Ստիպողական Կոչ ..., 82-83
 Արեւմտյան Հայաստանում եւ Կիլիկիա-
 յում՝ ՀԲԸՄ (1906-1914), 37- 39,
 «Արտագաղթի դեմ», 54 - 55,

դպրոցներ, 62, 64 - 67, 76,
 մանաճյուղեր, 51, 58,
 նպաստներ, 50 - 53, 76,
 Վանի վարժապետանոցը, 66 - 68,
 Քելկեան որբանոցը, 47- 48:
Տես նաեւ՝ Թուրքիայում՝ հայերը
 Արժրունի վարժ. (Բուենոս Այրես), 516
Բ
 Բաքվի Հայոց մարդասիրական ընկերու-
 թյուն, 14, 83
 Բեյրութի Ամերիկյան համալսարան, 164,
 423, 425, 427
 Բրազիլիայում՝ ՀԲԸՄ, 511 - 513,
 Արմենիկ, 515,
 Կեդրոն-համալիր, 515:
Տես նաեւ՝ Վարժարաններ, Մարզախա-
 ղեր
 Բեռլինի վեհաժողով, 13,
 եւ Նուպար փաշա, 18-20
 Բուլղարիայում՝ ՀԲԸՄ, 494 - 495,
 Կրտսերների Լիկա, 495,
 վերահիմնում, 495,
 միօրյա դպրոցներ, 496,
 ամառային ճամբար, 496:
Տես նաեւ՝ Մարզախաղեր
Գ
 Գաղթատներ սփյուռքում՝ ՀԲԸՄ, 102,
 113,
 Աղջկանց Կայան (Ալեքսանդրիա), 139,
 Աղջկանց Կայան (Կահիրե), 139,
 Աշխատանոց (Աթենք), 135-136,
 Աշխատավոր սաներու կայան (Հա-
 լեպ), 130-131,
 Աշխատանոց (Սալոնիկ), 136,
 Ապաստարան (Բեյրութ), 158,
 Գաղթատուն (Հալեպ), 114,
 Ինքնօգնության հանգանակություն,
 129 - 130,
 կանանց ազատագրում, 98 - 100,
 կանանց Ապաստարան (Հալեպ), 100-
 101,
 Հայ աղետյալներու հիմնադրամ, 114,
 Մանչերու կայան (Հալեպ), 131,
 Պատասպարան - աշխատանոց (Բեյ-
 րութ), 130 - 132:
Տես նաեւ՝ Որբանոցներ, Կիլիկիայում՝
 ՀԲԸՄ (1918-1921), Պորտ Սալիդ

Դ
 Դպրոցասեր Տիկնանց ընկերություն, 76
Ե
 Եգիպտահայ Նպաստամատույցի Հանձ-
 նաժողով, 96
 Եգիպտոսի Հայ Կարմիր խաչ, 91
 Եգիպտոսում՝ ՀԲԸՄ, 15-16, 453-454,
 Գնմանց եւ Առաքմանց Հանձնախումբ,
 96, 121,
 Երիտասարդական մշակութային մար-
 մին, 454,
 Հանդերձարանի տիկնանց հանձնա-
 խումբ, 95 - 96, 121,
 Հեքիմեան մարզարան, 453, ՀՄԸՄ,
 392, 454,
 Մշակույթի կիրակի, 147,
 Նուպար միություն, 392, 453,
 Ս. Չաքըր հիմնադրամ, 454 - 456,
 Օլիմպիական տարին, 454:
Տես նաեւ՝ Վարժարաններ, Գաղթատ-
 ներ, Մարզախաղեր, Պորտ Սալիդ
 Երկրորդ Աշխարհամարտ, 309, 314 - 315,
 347- 348,
 եւ կուսակցությունները, 335 - 336,
 եւ Համազգային հանգան., 332 - 333,
 եւ սփյուռքը, 312 - 313, 314, 330 - 331,
 349 - 350,
 եւ Հայկական հանձնախումբը, 332,
 եւ ռուս գաղթաշխարհը, 312 - 313,
 321, 348 - 349,
 եւ Ռուսական նպաստամատույցը, 333,
 Սասունցի Դավիթ հանգան., 334-335
 Երկրորդ Աշխարհամարտ՝ ՀԲԸՄ, 314,
 315, 331 - 332, 334 - 335, 336 - 337,
 արժեթղթերի փոխադրումը, 315 - 316,
 կենտրոնի փոխադրումը, 317,
 Կես միլիոնի հանգան., 344 - 346,
 «Մեր զինվորների համար», 313,
 Պատերազմի հայ աղետյալներու օգ-
 նության հանգան., 332,
 Քառորդ միլիոնի հանգան., 339 -344,
 Ֆրանսիական բանակի հայ զինվորնե-
 ռի օգնության հանգան., 313
 Երուսաղեմի Հայոց Պատրարիքարան,
 120 - 124, 413:
Տես նաեւ՝ Որբանոցներ

Թ
 Թաֆիլեի վերապրողները, 96
 Թեքեան մշակութային միութիւն, 446,
 501
 Թեքեան վարժարան (Բեյրութ), 445
 Թիֆլիսի Կենտրոնական Նպաստից
 Հանձնաժողով, 82
 Թոկատի կրթ. ըկերակցություն, 182
 Թուրքիա, 12-14, 61- 62
 Թուրքիայում հայերը, 2-14, 61- 62,
 արտագաղթը, 53-54,
 եւ Բարենորոգումները, 77- 80,
 եւ երիտթուրքերը, 56-57,
 հայկական դպրոցները, 62,
 «միլլեթ», 71,
 մշակութափոխումը, 65-66, 403-404,
 եւ 1908-ի սահմանադրությունը, 57-59,
 1894 - 96-ի ցեղասպանությունը, 13,
 1915-ի ցեղասպանությունը, 80-82, 89-
 90, 96, 105-106, 134:
Տես նաեւ՝ Արեւմտյան Հայաստանում
 եւ Կիլիկիայում՝ ՀԲԸՄ (1906-1915)
Ժ
 Ժնեւ՝ Երիտասարդ պրոֆեսիոնալներ,
 521
Ի
 Իրանում՝ ՀԲԸՄ, 458,
 Երիտասարդական հանձն, 458-459,
 սահմանափակումները, 460,
 սկաւառները, 459:
Տես նաեւ՝ Վարժարաններ
 Իրաքում՝ ՀԲԸՄ, 456 - 457,
 հայ լեզվի դասընթացներ, 457,
 մշակութային, 456 - 458,
 Օհան մարզական միություն, 457:
Տես նաեւ՝ Նահր էլ Օմար
Լ
 Լիբանան՝ հայ համայնքը, 443 - 444,
 գաղթականները, 108-109, 296, 427,
 քեմալերը, 146, 156 -157, 209, 233 -
 234, 427
 Լիբանան՝ քաղաքացիական պատերազ-
 մը, 442- 446,
 արտագաղթը, 444 - 457,
 եւ դպրոցները, 447- 450,

հետեւանքները, 446 - 448,
Միջ-բարեսիրական միութիւն, 445,
Տնտեսական Բարելավումի Հայկական
Հիմնադրամ (AFED), 445
Լիբանանում՝ ՀԲԸՄ, 108-109,
Ալ. Մանուկեան Կեդրոն, 442, 445-446,
448,
Ալ. Մանուկեան մշակութային տուն
(Չահլե), 445,
Բարեշեն, 158,
Երիտասարդ պրոֆեսիոնալներ, 521,
Ջ. Սովսիսեան Կեդրոն, 446, 447,
«Խօսնակ», 402 - 403,
Կիւլլապաշեն, 158,
Հայ երիտասարդաց Ընկերակցություն,
390 - 391, 393 - 394, 425, 446, 452,
«Հիւսիսեան Հայագիտական Հանդես»,
440,
Հե՛Ը Ասպետներու խումբ, 442,
Մամլթեյնի սամաթօրիում, 158,
մշակութային, 396, 446,
Ն. Նազարեան Շենք, 452,
Եր. Տեմիրճեան Կեդրոն, 450-451,
Ուսանողաց միություն, 402, 442,
Վ. Փափազեան թատերախումբ, 396,
«The Khosnag Supplement», 403:
Տես նաեւ Գաղթատներ, Մարգախա-
ղեր, Որբանոցներ, Վարժարաններ
Լիբանանի կոմկուսի մասնաճյուղ, 442
Լոզանի խորհրդաժողով, 152,153

Խ

խորհրդային Հայաստան, 167-168,
եւ «ազգ. օջախը», 223, 230 - 232, 234
- 235,
եւ «դաշնակցական - ռամկավարական
կենտրոն», 287-288, 302-305,
եւ Կյուլպենկյանի նվիրատվություննե-
րը, 247 - 249,
ներքաղաքական պայքարը, 236 - 238,
253 - 256,
որբանոցները, 172, 176 -177,
եւ սփյուռքը, 168, 172, 204 - 205, 436 -
437,
1937 թ. բռնադատումները, 284 - 290:
Տես նաեւ խորհրդային Հայաստանում՝
ՀԲԸՄ, Ներգաղթ

խորհրդային Հայաստանում՝ ՀԲԸՄ, 168 -
169, 172, 174, 258 - 262,
Բարեգործականի Տուն, 186 -189, 259,
Հ.Գարակյոզյանը, 297- 307,
Գյուղ. ծրագրեր, 175,
գործելու արտոնությունը, 171-172,
Ղարոցներ, 194, 259, 260,
Երկրագործական բանկ, 196,
Երկրաշարժ (1926), 206,
Երկրաշարժ (1988), 527,
լուծարման արժազանքը, 294 -296,
356,
լուծարումը, 291- 292,
կապերի վերականգնում, 338 - 339,
Կյուլպենկյանի հրաժարականը, 223 -
228, 231 - 237, 239 - 242,
Հանրային գրադարան, 190-191,
Սելզոնյան ֆոնդ, 190-192, 259, 274,
277, 291 - 292, 413,
մեղադրանքները, 195 - 197,
Դ. Յակոբեան Մայրանոց, 26, 182-184,
186, 259, 296, 339,
Նոր եվրոկիա, 180 - 182, 218,
Մ.Նուպար Ալկաբուժարան, 184 -185,
218, 259, 339,
Նուպարաշեն, 197- 201, 256 - 257, 259
- 260, 266 - 267, 269 - 270, 273 -276,
283,
Նուպարեան մրցանակ, 192-193, 296,
որբերի տեղափոխումը, 170, 172 -173,
176 -180,
Չաքըրի եւ Գավուկչյանի այցը, 354-
358,
համալսարան, 189 -191, 193, 243, 296,
339, 413,
Ա.Սարգիս կայան, 185 -186:
Տես նաեւ խորհրդային Հայաստան,
Ներգաղթ
խորհրդային Միություն, 167-168, 349,
բռնադատումները, 287 - 289, 304 -
306,
Ա.Եսայանը Մոսկվայում, 272 - 276,
եւ Կյուլպենյանը, 242 - 247,
եւ ՀԲԸՄ-ի նամակները, 281 - 283,
Ստալինի եւ Մոլոտովի որոշումը, 269-
271, 291 - 292
խորհրդային Վրաստանում՝ հայերը, 278 -
279

խրիսեան կրթարան (Բուենոս Այրես), 516

Կ

Կալկաթայի երիտասարդաց միություն,
50
Կանադայում՝ ՀԲԸՄ, 496 - 497,
Ալ.Մանուկեան Կեդրոն, 500,
Ալ.Մանուկեան փողոց, 501,
Արմեն-Օնտարիո, 499,
Երիտասարդ պրոֆեսիոնալներ, 521,
«Խօսնակ», 500,
մշակութային, 500,
Մոնրեալում, 498, 500,
Ներգաղթ Արեւելքից, 498 - 499, 501,
«Նոր Հայք», 501, «Տեսիլք», 500,
Տորոնտոյում, 498-500:
Տես նաեւ Մարգախաղեր, Վարժարան-
ներ
Կանադայի Հայ Միութիւն, 498
Կանադայի Հայկական Նպաստամա-
տույց՝ «Ճորճառունի տղաքը», 497
Կենտրոնական վարչություն՝ ՀԲԸՄ, 29-
30,
անձեռնմխելի ֆոնդ, 39-41, 196 - 197,
472, 526, 529,
Երդումնագիր, 44, 195,
կանոնագիր, 37,
մասնաճյուղեր, 43, 73-74, 76,
«Միութիւն», 69-70, 74-75, 492,
«Յուշարար - Միութիւն», 522,
նպատակները, 37-39,
ոչ քաղաքական, 41, 59 - 61, 87,
պատակտման վտանգը, 329-330,
«AGBU News», 522-523
Կենտրոնատեղի՝ Կահիրե, 15, 22,
Փարիզ, 311,
Նյու Յորք, 316 - 317, 324, 326, 479,
Սեդլ Բրուկ - 479
Կիլիկիայում՝ ՀԲԸՄ (1918-1921), 97- 98,
102,
այրիանոց (Աղանա), 101,
դարմանատուն (Ալեքսանդրետ), 103 -
104,
դարմանատուն (Տյորթ Յոլ), 104,
դպրոց (Մերսին), 103,
հիվանդանոց (Հաճըն), 105,
հիվանդանոց (Մերսին), 102,
հիվանդանոց (Տյորթ Յոլ), 104,

մանկապարտեզ (Մերսին), 103,
Նուպարեան վարժարան (Ալեքսանդր-
ետ), 103,
որբանոց (Հաճըն), 105,
որբանոց (Մերսին), 103, 128,
Միտուան որբանոց (Տյորթ Յոլ), 104,
106 -108,
Միտուան վարժարաններ (Սուեդիա),
103,
վերջին ելքը, 106-108,
Քէլկեան որբանոց (Տյորթ Յոլ), 104,
107-108
Կիւլպենկեան Գալուստ Հիմնարկութիւն,
431, 432, 439, 460
Կիւլպենկեան Կիւլլապի Հիմնարկութիւն,
432, 158
Կոմիտասի աճյունի փոխադրումը, 216 -
217
Կովկասի Հայոց Բարեգործական Ընկե-
րություն, 14, 83
Կ.Պոլսի Հայոց Պատրիարքարան, 296,
410 - 413, 505

Հ

Հաճըն՝ կոտորածը, 105-106
Հայ Առաքելական Եկեղեցի, 20, 70, 352,
404,
Ազգային եկեղեցական ժողով (1945),
352 - 354, 357,
Արեւմտեքի երկրներում, 310, 313,
332, 341, 444, 463, 497,
եւ ՀԲԸՄ, 22-23, 72-73, 112,148 -149,
162, 248 - 249, 341, 438, 445, 528 -
529,
Կիլիկիո կաթողիկոսություն, 162, 387-
389, 437, 439,
Պառակտումը (1956 թ.), 436 - 438, 493
Հայ Ավետարանական եկեղեցի, 70-71,
73, 403, 404, 463,
եւ ՀԲԸՄ, 71-72, 148-149, 341, 430, 445
Հայ բժշկական միություն (Փարիզ), 310
Հայ Գաղթականաց կենտրոնական հանձ-
նաժողով, 310, 313
Հայ գրողներու միություն (Փարիզ), 323
Հայ Երիտասարդաց Ընկերակցութիւն
(Հե՛Ը), 386-387,
եւ ՀԲԸՄ, 388 - 390:

Sbu Gmbi: Մերձավոր Արեւելքի Ընկերակցություն
 Հայ Կաթոլիկ եկեղեցի, 70 -71, 73, 404, 435, 469,
 եւ ՀԲԸՄ, 71-72, 162, 430, 445,
 Վենետիկի Մխթարյան միաբանություն, 319,
 Վիեննայի Մխթարյան միաբանություն, 319
 Հայ կեդրոն (Մոնրեալ), 501
 ՀՀ Ղաշնակցություն, 58-59, 86, 89, 387, 442, 458,
 եւ Խորհրդային Հայաստան, 204, 223 - 225, 230, 291, 336, 367, 370 - 371, 436 - 437,
 եւ ՀԲԸՄ, 86, 89, 148, 168, 220, 223-225, 240-241,
 եւ նացիստական Գերմանիա, 321-323, 371, 376 - 377
 Հայ Սարմնակրթական Ընդհանուր Միություն, 387, 394
 Հայ Սարմնամարզական Միություն, 387, 392, 394
 Հայ Նպաստի Հանձնախումբ (ԱՄՆ)
 Հայաստանի երկրորդ Հանրապետություն, տես՝ Խորհրդային Հայաստանում՝ ՀԲԸՄ
 Հայաստանի երրորդ Հանրապետությունում եւ Ղարաբաղում՝ ՀԲԸՄ, 527-529
 Հայաստանի Օգնության Կոմիտե (ՀՕԿ), 171, 217, 381,
 Հայաստանում, 187, 216, 256, 258, 264-265, 272, 277, 286,
 արտասահմանում, 217-218, 220, 287, 293,
 եւ ՀԲԸՄ, 174, 188, 218 - 223,
 Ներգաղթի ֆոնդի կենտրոնական մարմին, 219 - 220,
 լուծարումը, 290 - 293
 Հայկական Համաշխարհային Կոնգրես, 366-368,
 եւ ՀԲԸՄ, 367- 368, եւ ԱՄՆ, 366-367, եւ կուսակցությունները, 367
 Հայկական հարց, 13, 351, 358-360
 Հայրենակցական միությունները եւ ՀԲԸՄ, 200, 259-260

Հաուարդ Գարակյոզյան հիմնարկություն, 164, 325, 527
 Հորդանանում՝ ՀԲԸՄ, 461
 Հունաստանում՝ ՀԲԸՄ, 133-134,
 Արարատ միություն (Աթենք), 493,
 գաղթականներ, 134-135,
 Դարմանատներ, 137,
 Թատերական եւ Մշակութային միություն (Սալոնիկ), 493,
 Հայ երիտասարդաց միություն - 493,
 Տիկնանց հանձնախումբ (Աթենք), 136,
Sbu Gmbi: Գաղթատներ, Վարժարաններ

Ծ

ճապոնիա, 49

Ս

Սանուկեան Ալեք եւ Մարի. թանգարան, 484
 Սանուկեան հանգստեան տուն, 484
 Սանուկեան Ալեք եւ Մարի, հիմնադրամ, 471, 521 - 522
 Սանուկեան Ալեք, Մշակութային հիմնադրամ, 446, 471, 522
 «Մասքո», 470 - 471
 Մարաշ՝ կոտորածը, 105
 Մարզախաղեր՝ ՀԲԸՄ, Եվրոպայի, 492, 496,
 Ամերիկայի, 476 - 477, 515,
 Նավասարդյան, 391, 394, 446, 477, 496, 514, 517-518,
 Համահայկական, 394-395
 Մելգոնեան եղբայրների նվիրատվությունը, 189, 410, 413,
 փոխանցումը ՀԲԸՄ, 411-413,
 եւ ՀՕԿ-ը, 411-412:
Sbu Gmbi: Մելգոնեան կրթական հաստատություն
 Մելգոնեան կրթ. հաստատութիւն, 126, 296, 413, 441,
 հիմնումը, 413-414,
 կրթական ծրագրերը, 414-416, 418-419,
 Վարժապետանոցը, 416-418,
 «չքավորության» չափանիշը, 417,
 շրջանավարտները, 388, 419, 493,
 ընդլայնումը, 420 - 421
 փակելու որոշումը, 526

Մեսրոպեան վարժարան (Լոս Անջելես), 480
 Մերձավոր Արեւելքի Ընկերակցութիւն, 385 - 387, 391:
Sbu Gmbi Հայ Երիտասարդաց Ընկերակցություն
 Մերձավոր Արեւելքի հիմնադրամ, 164, 389
 Միացյալ Ազգերի Կազմակերպություն, 366
 Միացյալ Ընկերություն (Կ.Պոլիս), 62 - 65, 76, 274
 Մխթարեան վարժարան (Բեյրութ), 296
 Միջազեքի տարագրելոց նպաստամատոյց, 121
 Միջազգային Կարմիր Խաչ, 210 - 211
 Մուսա լեռ՝ ինքնապաշտպանություն, 90, 162:
Sbu Gmbi: Պորտ Սայիդ
Ն
 Նահատակ գրողներու մատենաշար (Փարիզ), 323
 Նահր էլ Օմար, գաղթական, 116 -118,
 եւ Ամերիկյան նպաստամատույցը, 120,
 եւ ՀԲԸՄ-ի շրջաբերականը, 118 -120,
 եւ որբերի տեղափոխումը, 118, 121-122
 Ներգաղթ Հայաստան (1920-30), 206-207, 210-211, 215 - 217, 255 - 256,
 եւ Ա.Եսայանի զեկուցագրերը, 252, 258 - 262,
 եւ իշխանությունները, 203 -205, 207-208, 212,
 Դեպի Հայաստան ներգաղթի հանգան., 206,
 եւ Կյուլպենկյանի կոչը, 209,
 եւ ՀԲԸՄ, 206 - 210, 212 - 216,
 ներգաղթածների վիճակը, 213 - 214, 216, 255, 267:
Sbu Gmbi: Խորհրդային Հայաստան, ՀՕԿ
 Ներգաղթ Հայաստան (1946-49), 231, 360-361, 365, 372, 381-382,
 եւ ԱՄՆ, 366-367, 369, 371-372,
 Երկրորդ միլիոնի հանգան., 365 - 366,
 եւ Իրանը, 369-370,
 Մեկ միլիոնի հանգան., 362,

Ներգաղթի կոմիտե, 362-363, 365,
 ներգաղթածների վիճակը, 372-374,
 եւ Ստալինի ծրագիրը, 350-354, 358-360,
 1949թ. արտաքսումը, 374-377:
Sbu Gmbi, Խորհրդային Հայաստան Նշան Փալանճեան ճեմարան, 445
 Նոր Գլխեա, 50
 Նուպարեան սամերու հիմնարկություն (Բրյուսել), 193, 296, 518

Ո

Որբախնամ (Միացյալ) ընկերություն (Կահիրե), 76,110
 Որբեր, 97- 98, 127-128,
 ազատագրում, 99,
 Ազատագրումի հիմնադրամ, 99 - 100,
 ազգ.-հոգեբանական նկարագիրը, 111, 115-116, 140-141,
 թրքացում, 98, քանակը, 127:
Sbu Gmbi: Գաղթատներ, Ամերիկյան նպաստամատույց, Որբանոցներ
 Որբանոցներ սփյուռքում՝ ՀԲԸՄ, Արարատեան (Երուսաղեմ), 110, 122-123, 126-128, 132, 178,
 Արիեստանոցներ, 131-132,
 Կեսարիայի որբերը, 110 -111,
 Կիլիկեան Արիեստանոց-որբանոց (Հալեպ), 178-179, 178,
 Ղընիեյի որբերը, 54,
 ճունիեյի որբերը, 110-111,
 Որբ ընդ Որբուհի, 133,
 Որբանոց (Մոսուլ), 121,
 Որբանոց (Սալոնիկ), 136-137,
 Որբանոց - կայաններ (Գավալա), 137,
 Վասպուրական (Երուսաղեմ), 110, 123-124, 126-128, 133,
 ուսուցումը ու դաստիարակումը, 92, 112-115, 123, 127-129, 131-133,
 Քելեկեան - Սիսուան (Բեյրութ), 109-113, 126-128, 132-133, 137,157, 178:
Sbu Gmbi: Աղիս Արեթա, Ամերիկյան նպաստամատույց, Գաղթատներ, Որբեր, Պորտ Սայիդ
 Որբերի պաշտպանության կոմիտե (Փարիզ), 141

Պ
 Պոտսդամի կոնֆերանս, 359
 Պորտ Սալիդ, 90 - 91, 95,
 այրիանոց, 95,
 պոյ-սքաուք, 93,
 դրբանոց, 94-95.

Ս
 Սիսուան վարժարան, 91- 92, 94,
 վրանավան, 91

Ռ
 Ռամկավար Ազատական կուսակցու-
 քյուն, և Խորհրդային Հայաստան,
 336, 436, 437,
 և ՀԲԸՄ, 168, 274, 335, 408 - 409,
 Սահմանադրական Ռամկավար, 86, 89,
 240
 Ռուս ուղղափառ եկեղեցի, 333
 Ռուսահայ կանանց միություն, 310
 Ռուսաստան, 12, 14, 349

Ս
 Սահակեան-Ալրտիչեան կոլեջ, 445
 Սիրիայում ՀԲԸՄ, 113-114, 405 - 406,
 Ադամեան թատերախումբ, 396 - 397,
 Ասլամազեան քառյակ, 398,
 գաղթականներ, 113, 296, 427,
 Գամիշլի, 160, 403-405,
 «Գեղարդ. Սուրիահայ տարեգիրք»,
 403,
 Գ. Եազուպեան կեդրոն (Զամիշլի), 405,
 Ն. Եազուպեան կեդրոն (Դամասկոս),
 406,
 Ընտանեկան Ակումբ, 399 - 401,
 թատերական, 396,
 Կազդուրման կայան (Զեսապ), 402,
 Հայ Օրիորդաց միություն, 100-101,
 Հայաշեն, 159 -160,
 ՀԲԸՄ -ՀԵԸ կեդրոն, 431,
 ՀԵԸ, 390 - 393,
 մարզական, 390 - 392,
 Մեսրոպաշեն, 160,
 մշակութային, 397, 400,
 Նորաշեն, 159-160,
 «Ջահ», 392,
 Սահակաշեն, 160,
 Սարեան Ակադեմիա, 401,
 սկաուտական, 393 - 394,

Սպենդիարեան երգչախումբ, 397-398,
 վերաբնակեցումը, 157,
 Տիդ Եանկ Սթարզ, 399,
 Ուսանողական բաժին, 401- 402,
 քննակրթ, 146, 156, 209, 233 - 234,
 427:
Տես նաև՝ Որբանոցներ, Վարժարան-
 ներ, Գաղթատներ, Մարզախաղեր
 Ս.Դ. Հնչակյան կուսակցություն, 387, 442,
 և Խորհրդային Հայաստանը, 336, 436
 - 437,
 և ՀԲԸՄ, 148, 335,
 Վերակազմյալ Հնչակյան, 86-87
 Սուեդիա, 54, 90

Վ
 Վասպուրական մարզական միություն,
 392
 Վարժարաններ Արեւելքում (ամենօրյա)
 ՀԲԸՄ, 434 - 435,
 Առևտրական (Բեյրութ), 441,
 Արմենեան (Հալեպ, Ամուրլուք), 432-
 433,
 Լ. Գարակյոզյանի զեկույցը, 425 - 429,
 431,
 Դարուհի - Յովակիմեան (Բեյրութ),
 448, 452,
 Կարմիրեան (Անթիլիաս), 439, 448,
 450, 452,
 Կիլիկեան (Տերապեսի), 433,
 Կ.Կիլպենկեան (Դամասկոս), 432,
 Ն. Կիլպենկեան (Թեհրան), 460,
 Հանգան. Մերձավոր Արեւելքի վարժա-
 րանների համար, 429-430,
 Հյուսիսեան Հայագիտական Հիմնարկ
 (Բեյրութ), 440,
 Մ. Մանուկեան (Թեհրան), 460,
 Մեսրոպեան (Հալեպ, Շեյխ Մաքսուտ),
 433,
 Յովակիմեան - Մանուկեան (Բեյրութ),
 392, 424-425, 428, 441, 447-448,
 Նազարեան (Բեյրութ), 440 - 441, 447,
 452,
 Նախակրթարան (Անթիլիաս), 439,
 Նաճարեան -Կիլպենկեան (Հալեպ),
 398, 401, 431- 432,
 Նուպար (Թեհրան), 459,

Նուպարեան վարժարան (Հելիոպոլիս),
 296,
 Սարաֆեան Ա. (Այն էլ Արաբ) 433-434,
 Տեմիրճեան (Բեյրութ), 439 - 441, 447-
 448, 451:
Տես նաև՝ Մելգոնեան կրթական հաս-
 տատուրին, Պորտ Սալիդ
 Վարժարաններ Արեւելքում (նպաստըն-
 կալ), 406 - 410, 428 - 429, 432,
 Իզապաշեան - Կիլպենկեան (Ամման),
 461,
 Յազուպիեի Վերածնունդ, 434,
 Վ. Պետրոսեան (Մեսրոպեան) Գարա-
 տուրան, 434,
 Վարդանեան (ճարապուս), 434, Զե-
 սապի ազգային, 434
 Վարժարաններ Արեւմուտքում (ամեն
 օրյա) ՀԲԸՄ, 463, 465 - 466, 480 - 483,
 Ալեքսանդր (Սիդնեյ), 517,
 Աղաթօն (Սալոնիկ), 493,
 Արմեն-Զեպեք - Մանուկեան (Մոնրեալ),
 501,
 Գալիպեան (Աթենք), 493 - 494,
 Դպրոցասեր Տիկնանց (Ռեյնսի), 76,
 311, 492,
 Զարուկեան (Տորոնտո), 500,
 Մանուկեան (Սաութֆիլդ), 483-484,
 Մանուկեան (Մոնտեվիդեո), 516,
 Մանուկեան (Բուենոս Այրես), 516,
 Մանուկեան - Տեմիրճեան (Կանոկա
 Պարք), 486 - 489,
 Նուպարեան (Մոնտեվիդեո), 516,
 Պազարեան (Սան Պաուլո), 517,
 Ուոքըրթաունի, 484 - 486
 Վիսենտե Լոպեսի վարժարան, 76

Տ
 Տյորթ Յու, 104 - 105,
 ինքնապաշտպանությունը, 47
 Տուրգենեյան գրադարան (Փարիզ), 321
 Ուսանողական կրթաթոշակներ ՀԲԸՄ, 520
 Ուրուգվայում ՀԲԸՄ, 510,
 Բարեգործականի կեդրոն, 516,
 Բարեգործականի Չայն, 515,
 Գույումեան մարզարան, 516,
 Երիտասարդական Լիգա, 509, 511, 515,
 և Հայ բնակիչներու կեդրոն, 511,
 սկաուտներ, 515:

Տես նաև՝ Վարժարաններ, Մարզախա-
 ղեր

Փ
 Փարիզի Հայ տիկնանց միություն, 310, 313
 Փարիզի ուսումնասիրաց ընկերություն,
 76
 Փարիզում ՀԲԸՄ, 310 - 311, 462 - 463,
 490,
 Ամառնային ծրագրեր, 521,
 Բարեգործականի Տուն, 490,
 գերեզմանատուն, 319,
 Երիտասարդական Ակումբ, 490,
 ՀԵԸ, 318,
 Հայ Օրիորդաց միություն, 490,
 Մանուկեան կեդրոն, 491,
 Մելգոնեան մատենաշար, 318,
 «Նոր Շինարար», 492,
 Մ.Նուպար Ուսանողական տուն, 311,
 520,
 Նուպարեան մատենադարան, 311,
 455, 492,
 և նրա կողպուտը, 319-324,
 «Շինարար», 492,
 «Տեղեկատու», 492,
 Փարիզի Կեդրոնական ժողով, 317-
 319,
 «La lettre de l'UGAB», 492,
 «l'UGAB Magazine», 492:
Տես նաև՝ Վարժարաններ, Մարզախա-
 ղեր, Ֆրանսիայում ՀԲԸՄ
 Փրկության հանգանակություն, 151

Ֆ
 Ֆերահեան վարժարան (Լոս Անջելես),
 480
 Ֆրանսահայ Կապույտ խաչ, 310 - 313
 Ֆրանսիայում ՀԲԸՄ, 311- 312, 462 - 463,
 490,
 Բարեգործականի Տուն (Մարսել), 315,
 490,
 գաղթականներ, 310-311,
 Երիտասարդական Ակումբ (Մարսել),
 490-491,
 Երիտասարդական Սարմին (Վալանս),
 491,
 Կեդրոն (Լիոն), 491,
 ՀԵԸ (Մարսել), 319,

Հայ Երիտասարդաց Միություն, 490,
միության վարժարաններ, 492, 464 - 465,
չափահաս որբեր, 141-142:
Sbu Gmbi՝ Փարիզում ՀԲԸՍ

Նրանսիայի Հայ Ազգային Ճակատ, 354
Նրանսիան՝ Կիլիկիայում, 105 -107, 161-
162

Ա

Աբբաս փաշա, 16
Աբգարյան, Սեպուհ, 520
Աբդուլ Համիդ, 56
Աբեդյան, Արտաշես, 321-323
Աբեդյան, Մանուկ, 190
Աբրահամյան, Աշոտ, 351
Ազնիաշվիլի, Պ., 263
Ադոնց, Նիկողայոս, 138, 318, 319
Ադոյան, Ադո, 284
Ազատյան, Երվանդ, 476
Աթաթուրք, Քենալ, 105,106
Աթթարյան, Ալեքսան, 431
Ալեքսանդր ամուսիններ, 517
Ալթունյան, Հակոբ, 446-447, 451
Ալխազյան, Հովհաննես, 310
Ալպոյաճյան, Արշակ, 454
Ախաբուրյան, Ալեքսանդր, 248
Ակոբյան, Երանուհի, 182
Ակոբյան, Թազվոր, 182
Ակոբյան, Լեւոն, 182, 311
Ակոպով, Աթանես, 236
Ակոպով, Ստեփան, 251-253, 269, 280,
290
Ախարոնյան, Աշոտ, 184
Ախարոնյան, Ավետիս, 152, 240
Ախարոնյան, Գերսամ, 419, 440
Աղաբեկով, Գեորգի, 247
Աղաթոն, Գեորգ, 25
Աղաթոն, Երվանդ, 22, 25-27, 32-34, 49,
64, 72, 146, 171, 182, 195, 311,496
Աղաջանյան, Կարապետ,310
Աղասյան, Մ., 134
Աղեկյան, Մարտիրոս, 286
Աղապաշյան, Պարույր, 403
Աճառյան, Հրաչյա, 190
Ամատունի, Ամատուն, 216, 236, 258, 264,
268-269, 278, 280, 287-291, 293, 299
Անդրանիկ, գորավ., 101, 151
Անդրանիկյան, Մկրտիչ, 22, 29-30, 32,
34-35, 64

Անդրեասյան, Անդրանիկ, 384
Անժուր (Չեքոսլավիայում), Հարություն, 191
Անտոնյան, Արամ, 313, 320-323, 407
Ապտուլյան, Դանիել, 419
Ապրեսյան, Ստեփան, 341
Առաքելյան, Համբարձում, 84
Առաքելյան, Սեդրակ, 188
Ասատուր, Գ., 171, 179
Ասատուրյան, Մեսրոպ, 354
Աստվածատրյան, Բաբկեն, 363, 368, 370,
379
Աստուրյան, Հարություն, 508, 510
Արեշյան, Գրիգոր, 184
Արմուսյան, Կարո, 419
Արփիարյան, Արփիար, 33

Բ

Բաբկեն Ա., Կիլիկիո կաթողիկոս, 59, 87,
112, 149-150, 387-388
Բագրեւանդյան, Վահան, 379-380
Բաղամյանց, Գեորգի, 306
Բազարյան, Մովսես, 374, 379-380
Բալֆուր, Արտուր Ջեյմս, 13
Բակալյան, Ենի, 481-482
Բանայան, Հովհաննես, 236
Բաշալյան, Լեւոն, 146, 171, 210, 318
Բաչաճյան, Ա., 502
Բարթիկյան, Հրաչ, 379
Բարթիկյան, Միքայել, 378-379
Բարսեղյան, Պ., 141-142
Բարտոլոմեոս, Ջեյմս, 115, 140-142, 385
Բեկզարյան, Տ., 138
Բերիա, Լավրենտի, 217, 238-239, 252-
254, 256, 262, 264, 267-268, 272,
279-280, 285, 289-290, 293, 375
Բերինգ, Իվլին, 229
Բիլլըսըն, զնդ., 91
Բինայան Կարմոնա, Նարսիսիո, 502,
507-508
Բիսմարկ, Օտտո ֆոն, 19
Բիքնար, 216

Բոգոմոլով, Ալեքսանդր, 349
Բոքեմքին (Պոստոմկին), Վլադիմիր, 211
Բուխնեբրոկ, Լորդ, 308
Բրիքմըն, Քենդըն, 162
Բուզայ, Նիկոլայ, 375

Գ

Գազազյան, Ժան, 478
Գալայճյան, Արա, 419
Գալճյան, Հ., 220
Գալոյան, Աղասի, 284
Գալուստյան, Խաչեր, 386
Գալփաքյան, Արթաքի, 494
Գառզու, 479
Գասպարյան, Հարություն, 393
Գավուկչյան, Հայկ, 354-358
Գարակոչյան, Արշակ, 44, 119, 149, 162,
249, 317, 325-327, 344, 354-355, 357,
362-363, 371, 429-430
Գարակոչյան (Կարազոյոյան), Լեւոն,
306
Գարակոչյան, Լիլա, 425-431
Գարակոչյան, Հայկազ, 183, 188, 194,
219, 221-222, 224, 244-245, 256,
272-275, 292, 297-307
Գարակոչյան, Միհրան, 44, 119, 146,
149, 162, 198, 325-327, 345, 364, 426
Գարդաշյան, Մկրտիչ, 183, 211
Գարեգին Ա., Կիլիկիո կաթողիկոս, 332,
334, 340, 400, 437
Գարեգին Բ., Կիլիկիո կաթողիկոս, 419
Գարեգին արքեպիսկոպոս, Խաչատրյան,
513
Գափամաճյան, Նոյեմի, 119, 162, 311
Գափամաճյան, Պետրոս, 68
Գափլյան, Ջարեհ, 400
Գերմանիկյան, Մեսրոպ, 520
Գեւորգ Ե., Ամենայն Հայոց կաթողիկոս,
77, 84
Գեւորգ Չ., Ամենայն Հայոց կաթողիկոս,
247-248, 333-334, 351-353
Գեւորկով, Իվան, 280, 293
Գըլլճյան, Յովհաննես, 99
Գյուրջյան, Հակոբ, 310
Գոգլիձե, Ս., 267
Գոնով, Ասկարի, 375
Գրանյան, Համայեակ, 106-108
Գրինշիլդս, Թոմաս, 157

Գրոմիկո, Անդրեյ, 339
Գուլոյան, Աբրահամ, 192-193, 215, 242-
243, 245-247, 251, 254, 258, 265,
268-269, 276, 290-291, 293
Գումեդին (Մելիք-Ղաղայան), Գուրգեն,
178
Գույումճյան, Մարտիրոս, 121
Գույումճյան, Սիսաք, 516
Գուրույան, Վարդգես, 419

Դ

Դալարյե, Էդուարդ, 314
Դալլաքյան, Կարլեն, 230-231, 233, 237,
408-409
Դանիելյան, Ժիրայր, 403, 448-450
Դանիելյան, Մուշեղ, 253
Դաջ, Բայարդ, 164
Դաջ, Քիլվլընտ, 142
Դավիթ Բեկ (Սարգիս Սարգիսյան), 138,
407
Դեղձունյան, Օգեսեն, 498
Դրամբյան, Ռուբեն, 188
Դրո (Դրաստամատ Կանայան), 371
Դուայթ, Ադելաիդա, 110

Ե

Եզնիկ, քահանա, Վարդանյան, 511, 513
Եկավյան, Ջավեն, 432
Եղիազարյան, Արտավազդ, 187, 258,
272-273, 282, 285, 298, 307
Եղիայան, Բյուզանդ, 387, 400, 423
Եղիայան, Գրիգոր, 22, 27-28
Եղիշե Դուրյան, պատրիարք Հայոց Երու-
սաղեմի, 121-122, 124
Եղիշե եպիսկոպոս, Կարոյան, 387
Ենիգոմուշյան, Հ., 164
Եսայան, Արսեն, 216, 222, 245, 251-254,
256-258, 262-264, 272-277, 279-280,
282-283, 285-287, 292-293, 298-299,
301-302, 305
Եսայան, Ջապել, 107, 188, 301, 303
Եսայան, Միքայել, 432
Յոթնեղբայրյան (Եօթնեղբայրեան),
Լեւոն, 99
Երեմյան, Վահան, 262-263
Երզնկյան, Արամայիս, 171, 175, 180,
185, 204-205, 207, 235, 238, 245,
253-256, 285-287, 298, 302, 304, 306

Զ
Զավեն Տեր-Եղիայան, պատրիարք Հայոց
Կ.Պոլսի, 410

Զարդարյան, Հրաչ, 490
Զարեհ Ժ.Վարդապետ, Փայասլյան, 393
Զարուկյաններ, 500
Զենյան Լեւոն, 387
Զինովեւ, Գրիգորի, 238
Զորյան, Ստեփան, 181

Է
Էզնայան, Աբազիմ, 310, 311
Էզնայան, Վահե, 310
Էչիսըն, Պին, 366-367
Էսեկյուլյան, Հարություն, 418-419
Էսմերյան, Զարուհի, 425
Էսմերյան, Պողոս, 200, 313, 317

Թ
Թադեոսյան, Օննիկ, 210, 211
Թալեաթ փաշա, 98
Թալեյրան, Շառլ Մորիս, դուքս, 237
Թահմիզյան, Նիկողայոս, 220, 235, 419
Թամանյան, Ալեքսանդր, 183, 191
Թերզիպաշյան, Ավետիս, 170, 199
Թերզյան, Պերճ, 454-455
Թերզյան, 519
Թերլենմեզյան, Փանոս, 188
Թեննքեճյան, Նիկողայոս, 72
Թեքեյան, Վահան, 137, 407, 417-418
Թիրյաքյան, Աշոտ, 331
Թյոքմեճյան, Ջորջ, 477
Թոթովենց, Վահան, 188, 301
Թովմասյան, Բարունակ, 387
Թորամանյան, Թորոս, 190
Թորանյան, Թորոս, 419
Թորգոմ Գուշակյան, պատրիարք Հայոց
Երուսաղեմի, 118, 119, 242
Թորգոմյան, Վահրամ, 319, 407
Թովեճյան, Արա, 441
Թովեճյան, Հակոբ, 138, 387
Թովուզյան, Հովհաննես, 100, 113, 160
Թոքմաշյան, Արմենակ, 307
Թրումըն, Հերի, 367
Թուրսարզիսյան, Պողոս, 402

Ժ
Ժամկոչյան, Լեւոն, 478

Ժամկոչյան, Ս., 94
Ժանսեմ, 479
Ժերանյան, Ռիշար, 479

Ի
Իբրահիմ Հիլմի, 24
Իդեն, Էնտոնի, 359
Իզվուկի, Ալեքսանդր, 86
Ինճիճյան, Արամ, 407
Իսահակյան, Ավետիք, 220, 235
Իսկենյան, Ժիրայր, 397
Իսմայիլ փաշա, 24

Լ
Լալայան, Երվանդ, 190
Լեկ, Ժորժ, 310
Լիտվինով, Մակսիմ, 246-247, 338-339
Լիմոնճեւլի, Կատարինե, 119
Լիպման, Ռուբըր, 366
Լևոյ Ջորջ, Պեյվիդ, 101, 106, 152
Լոթի, Պյեր, 78
Լոնակին, Յակով, 366
Լոմինաձե, Վիսարիոն, 236
Լորիս-Մելիքով, Միքայել, 19
Լուկաշին (Սրապիոնյան), Սարգիս, 172

Խ
Խաղ արք., 391
Խազոյան, Հ., 149
Խանջյան, Աղասի, 217, 223, 230, 232-
239, 245, 253-256, 262, 264-265, 268,
272, 276-279, 302
Խայան, Միհրան, 506
Խանգատյան, Զատիկ, 310
Խանոյան, Սարգիս, 200
Խաչատրյան, Արամ, 345, 479
Խաչիկյան, Մարտիրոս, 220
Խապրիկ, Մինաս, 104
Խառատյան, Ալբերտ, 71
Խատիսյան, Ալեքսանդր, 240
Խրուշչով, Նիկոլայ, 306

Ճ
Ճատուրով, Գեորգի, 253, 280

Կ
Կամենեւ, Լեւ, 238
Կամսարական, Սպանդարատ, 187

Կամսարական, Տիգրան, 311
Կապրիելյան, Զապել, 497, 499
Կասյան, Սարգիս, 236, 238, 256
Կասսել, Էնստ, 229
Կարախան, Լեոն, 242-244, 246-247, 306
Կարախանյան, 290
Կարապետյան, Սահակ, 354-359, 365
Կարիկյան, Եսայի, 171, 175-176, 196,
297
Կերտան (Կլումուշկերտան), Լեւոն, 119,
180, 187, 200, 220, 248, 301-302,
306, 311, 324, 338, 342-343, 364, 367,
520
Կեռքկոյան (Կեռքեօզեան), Ենովք, 387
Կելբեկ, Ատոկ, 320
Կիպրիանու, Սպիրոս, 419
Կիսելյով, Եզենի, 341
Կիրակոզով, 300-301, 303
Կիրակոսյան, Գրիգոր, 414, 426, 476
Կիրով, Սեբգեյ, 238
Կլեմանտ, Ժորժ, 78
Կյուլպենկյան, Գալուստ, 17-18, 44, 111,
158, 187, 208, 223-232, 234-237,
239-249, 311, 406, 460
Կյուլպենկյան, Կիլլապի, 158
Կյուլպենկյան, Հարություն, 317, 327
Կյուլպենկյան, Նվարդ, 229, 244, 460
Կյուլպենկյան, Նուպար, 44, 229
Կյուլպենկյան, Պատրիկ, 11, 198
Կյունցլեր Յակոբ Կոնրադ
Կյուրի, Մարիա, 191
Կյուրճյան, Միքայել, 67, 69
Կոզով, 304
Կոլպակով, 304
Կոմիտաս, 216
Կոնդակով, 303
Կոստանոյան, 307
Կոստանյան, Հայկազ, 236
Կրաֆտ-Քոննար, Էնտոնի, 112
Կուրյուպցեւ, Սեբգեյ, 253, 278, 284

Հ
Հալաբյան, Կարո, 344
Հակոբյան, Երվանդ, 48-50
Հակոբյան, Հակոբ, 419
Հակոբյան, Հմայակ, 502
Հակոբյան, Հովհաննես (հիմնադ.անդամ),
22, 31

Հակոբյան, Հովհաննես, 63, 272-275, 305
Համազասպյան, Վարդգես, 199
Համայան, Լեոն, 473
Հայլե Սելասիլե, 125-126
Հայկենց, Միսաք, 476, 514
Հանչեր, Հրանտ, 310
Հանսոն, 216
Հ/հ/աչիկյան, Կատար, 496
Հասրճյան, Լեւոն, 394
Հասրաթյան, Էդրաս, 192
Հասրաթյան, Մորուս, 440
Հարությունյան, Գրիգոր, 264, 292,
361-362, 378
Հարությունյան, Հմայակ, 190
Հեքիմյան, Խոսրով, 297
Հեքիմյան, Կարապետ, 453
Հեքիմյան, Կիմ, 504, 506
Հեքիմյան, Մկրտիչ, 199-200
Հերյան, Ռուբեն, 100
Հիտլեր, Ադոլֆ, 348
Հյուլինս, Ռալֆ, 229
Հյուսիսյան, Երվանդ, 441
Հյուրմուզ, Արտաշես, 72
Հոլաս, Վիչեն, 319
Հովհաննես, Ալան, 341
Հովհաննիսյան, Աբգար, 192
Հովհաննիսյան, Հակոբ, 189
Հովսեփյան, Արմենակ, 258
Հովսեփյան, Մաքրուհի, 426
Հրաչ Երվանդ, 301-302, 306
Հուաթ, 138
Հուսեյն Ա., 17
Հուսեյն իբն Ալի, 100

Ղ
Ղազարյան, Աշոտ, 527
Ղազարյան, Վաչե, 495
Ղափանցյան, Գրիգոր, 188
Ղեւոնդ արքեպիսկոպոս, Ղուրյան, 437

Ճ
Ճեպեճյան, Ռոպերտ, 398, 403, 435
Ճեսըփ, Ստյոբոք, 387
Ճգնավորյան, Լորիս, 528

Ս
Սազլումյան, Արմեն, 113-114
Սազլումյան Օննիկ, 109, 113-114

Մազմանյան, Միքայել, 188, 303, 307
 Մաթոսյան Կիրոս, Մերի, 238
 Մալեզյան, Վահան, 17, 27, 107, 120, 159, 187-189, 193, 199-200, 210, 218-224, 234, 240-245, 248-249, 257-258, 281-283, 294, 314-315, 317, 326, 363, 367, 379, 408, 468, 490, 512
 Մալենկով, Գեորգի, 284, 289-290
 Մալինով, Ալեքսանդր, 210
 Մալխասյան, Դովհաննես, 125
 Մալխասյան, Սկրտիչ, 501
 Մախարաձե, Ֆիլիպ, 264
 Մախոխյան, Վարդան, 310
 Մակարյան, 519
 Մակինցյան, Պետրոս, 301
 Մակլակով, Վասիլի, 349
 Մաղաքիա արքեպիսկոպոս, Օրմանյան, 70, 71, 319, 503
 Մամբրե վարդապետ, Սիրունյան, 94
 Մանանդյան, Դակոբ, 190
 Մանդալյան, Թադեոս, 236
 Մանթաշյան, Ալեքսանդր, 83
 Մանուկյան, Ալեք, 44, 328, 330, 340-341, 343-344, 364, 405, 419-420, 429-430, 438-439, 444, 460, 470-472, 474, 477, 479-481, 483, 487-489, 491, 499, 501, 513-514, 522, 526, 528
 Մանուկյան, Արմենակ, 376
 Մանուկյան Թազվիր, 470
 Մանուկյան, Դրաչ, 394
 Մանուկյան, Սեդրուպե, 425
 Մանուկյան, Ռիչարդ, 471, 484, 528
 Մանուկյան-Սիմոն, Լուիզ, 44, 405, 451-452, 485, 491, 521, 522-523, 526-528
 Մանուչարյան, Արամ, 286, 291-292
 Մատթոսյան, Վահան, 72
 Մատթոսյան, Վարդան, 502, 510-511
 Մարգարյան, Պարթև, 184
 Մարկոսյան, Ռաֆայել, 259, 311
 Մարկոսոֆ, Սկրտիչ, 22, 31, 48
 Մարմարյան, Անրի, 354
 Մարտիկյան, Էդուարդ, 444, 483
 Մարտիկյան, Սերգո, 307
 Մեծլաուկ, Վլադիմիր, 273-275, 282-283, 306
 Մելզոնյան, Գրիգոր, 189, 291, 410

Մելզոնեան, Կարապետ, 189, 291, 410-413
 Մելիք-Ազարյան, Ալեքսանդր, 83
 Մելիք-Մուսայան, Բաբկեն, 185
 Մելիք-Շահնազարյան, Աշոտ, 394
 Մելիքյան, Սպիրիդոն, 190
 Մելիքսեթ-Բեկ, Լեւոն, 190
 Մելիքսեթյան, Դովիկ, 213, 218
 Մելքոնյան, Գրիգոր, 396
 Մելքոնյան, Զարեհ, 419
 Մեծատուրյան, Մեծատուր, 502
 Մենեվիչյան, վարդապետ, 72
 Մեոթեմետյան, Գրիգոր, 180
 Մեսիայան, Երվանդ, 342
 Միկոյան, Անաստաս, 289-290
 Միհրդատյան, Մակսուդ, 302
 Մինասյան, Աբել, 310
 Միրաք, Ռոբերտ, 463
 Միրզախ, Ժիրայր, 174
 Միքայելյան, Կարեն, 187
 Միքայելյան, Դակոբ, 396-397
 Մխիթարյան, Գյուլտ, 512-513
 Մկրյան, Սկրտիչ, 190
 Մկրտիչ Ա., Ամենայն Դայոց կաթողիկոս, 19, 22
 Մկրտիչյան, Լեւոն, 34, 40
 Մյասնիկյան, Ալեքսանդր, 203
 Մոլոտով, Վյաչեսլավ, 265, 269, 283, 359, 366
 Մոստիչյան, Լեւոն, 512-513
 Մորզենթաու, Դենրի, 142
 Մոսկոֆյան, Դայկ, 502-504
 Մոավյան, Ասկանազ, 171, 175, 183, 238
 Մուհամեդ Ալի, 15
 Մուհամմատ Ռեֆաաթի, 456
 Մուդղուսի, Խաչիկ, 280, 287, 289-290, 293, 298, 300
 Մուշեղ եպիսկոպոս, Սերոբյան, 149, 410
 Մուսաբեկով, Գազանֆար, 262

Ց

Յագուպ (Եագուպ) Արթին, 22-25, 34, 44, 71-72, 78, 97
 Յագուպյան, Գառնիկ, 405-406
 Յափուճյան, Ազատ, 419
 Յուսուֆյան, Պողոս, 16

Ն
 Նազարյան, Լեւոն, 440
 Նազարյան, Կարապիս, 452, 487
 Նազարյան, Ղազար, 513
 Նազարյան, Նազար, 452, 476, 477, 487
 Նազարյան, Նուպար, 452
 Նազարյան Սաթենիկ, 440
 Նաթանյան, Միքայել, 53, 65-66, 107, 137, 387
 Նաճարյան, Լազար, 431
 Նանսեն, Ֆրիտյոֆ, 198
 Նասիպյան, Ազապի, 419
 Նաֆիլյան, Լեւոն, 310
 Ներսես Վարժապետյան, պատրիարք Դայոց Կ.Պոլսի, 19, 21
 Նետուրյան, Մաքրուհի, 94
 Նեւզիզ Առաքել Նուպար, 95
 Նշկյան Գայանե
 Նովիկով, Կիրիլ, 248, 378
 Նորատունկյան, Գաբրիել, 152, 227, 311
 Նորհադ, Պետրոս, 465
 Նուպար, Առաքել, 22, 31, 44, 117, 119-120, 162, 227, 317
 Նուպար, Զարեհ, 44, 187-188, 215, 220, 227, 311-312, 315, 324
 Նուպար, Մարի, 184
 Նուպար, Պողոս, 16-18, 21-22, 25-26, 33-36, 63, 77-80, 84-89, 100-101, 107, 111, 118-119, 144-145, 164-165, 168, 170, 173-174, 177, 180, 184, 187, 192, 196-197, 199, 206, 225, 229, 239, 241, 257, 274, 291, 311, 319, 327, 342, 411-413, 462, 497, 506, 518-520
 Նուպար, Վահրամ, 162
 Նուպար փաշա, 16, 18-21, 229, 319
 Նուրիխան, Խուան, 405

Շ

Շախտուվարյան, Ալեքսանդր, 261, 293
 Շահազիզ, Երվանդ, 190
 Շահե ծ.վրդ, Աճեմյան, 519
 Շահե եպ., Գասպարյան, 387
 Շահին, Էդգար, 310
 Շահխաթունի, Արշավիր, 490
 Շահվերդյան, Դանուշ, 206, 210-211, 215, 217, 221-222, 245, 285-286, 290, 292, 306
 Շահվերտյան, պատվելի, 72

Շապանյան, Արսեն, 310
 Շեիրանյան, Մ., 457
 Շերիտճյան, Կարապետ, 22, 28, 34, 48
 Շմավոնյան, դոկտ., 72
 Շուլց-Անն, 303
 Շյուքրի բեյ Թուաթլի, 393

Չ

Չալյան, Մուշեղ, 236
 Չաքմաքչյան, Արթուր, 479
 Չանգալեան, Զիմ, 334
 Չաքր, Սաթենիկ, 454
 Չաքր, Զանիկ, 354-358, 454
 Չեսնիխ, 360
 Չերազ, Մինաս, 19-20, 260
 Չերչիլ, Ուինստըն, 315
 Չիթունի, Վահրամ, 300
 Չիլինկիրյան, Դարուբյուր, 511
 Չիլինկիրյան, Պետրոս, 500
 Չիլինկիրյան Մ., 318
 Չիչեկյան, Կարո, 501
 Չոլակյան, Դամբարձում, 369
 Չոպանյան, Արշակ, 21, 33, 87, 141-142, 189, 281-282, 301-302, 306, 312, 318, 322-323, 407, 490
 Չորմիսյան, Լեւոն, 77, 98
 Չոպուրյան, Կիրակոս, 475
 Չրաքյան, Արթին, 23

Պ

Պալյան, Սկրտիչ, 260, 296
 Պալյան, Ռիտա, 521
 Պալյան, Վարդգես, 521
 Պալիոզյան, Մարտիք, 338
 Պաղտիկյան, Գ., 105
 Պապայան, Լեւոն, 198, 496-499
 Պապայան, Փիրուզ, 499
 Պապաջանյան, Միքայել, 302-303, 306
 Պասմաճյան, Կարիկ, 478
 Պատմագրյան, Աշոտ, 440
 Պարասաղանյան, Դովհաննես, 504
 Պարզեյան, Դովհաննես, 502, 504
 Պարզյան, Գագիկ, 274
 Պարզյան, Յուլակ, 292
 Պարթեւյան, Արա, 490
 Պարթեւեան, Սուրեն, 71
 Պարիկյան, Դայկ, 403
 Պարտազճյան, Գեորգ, 522

Պարտազմյան, Գրանդ, 394
 Պեյլերյան, Նուրել, 419
 Պեռառ, Վիքթոր, 78
 Պետեն, Գանրի Ֆիլիպ, 317
 Պետիկյան, Սոսի, 419
 Պետրոս եպիսկոպոս, Սարաճյան, 105
 Պերկամալի, Արմեն, 345
 Պերդուտյան, Լեւոն, 400
 Պերպերյան, Գամբարձում, 397, 423, 478
 Պերպերյան, Շավարշ, 407
 Պերպերյան, Տ., 164
 Պիրալով Ա., 170
 Պիքընսֆիլդ (Բիքոնսֆիլդ), Լորդ, 19
 Պյուր, Գաբրիել, 162
 Պողոս Արիս հայր, 387
 Պողոսյան Գ., 111
 Պողոսյան, Սերոբ, 190
 Պոյաճյան, Ալպեր, 394-395, 476
 Պոյաճյան, Սոսի, 520
 Պտուկյան, Պուլ, 478
 Պտուկյան, Քերովբե, 500
 Պուանկարե, Ռայմոն, 78

Ջ

Ջամալյան, Արշակ, 240
 Ջավախիշվիլի, Իվան, 190
 Ջիվիլեզով, Ալեքսեյ, 359
 Ջրբաշյան, Տիգրան, 519

Ռ

Ռախմանով, Ուս., 264
 Ռեյնո, Պուլ, 313-315
 Ռոզենբերգ, Ալֆրեդ, 321
 Ռոտշիլդ, 229
 Ռուզվելտ, Ֆրանկլին Դելանո, 347-348

Ս

Սազրզյան, Ա., 318
 Սադդամ Գուսեյն, 457
 Սալբի, Մ., 94
 Սալցվալդի (Սուլզբերի), Լորդ, 19
 Սաղըրյան, Սարգիս, 318, 520
 Սաղըրյան, Գարություն, 520
 Սամվելյան, Խաչիկ, 190
 Սամվելյան, Միքայել, 260
 Սարաֆյան, Գրիգոր, 433
 Սարգիս, Ավետ, 185
 Սարգիս, Վերգինե, 185

Սարգիսյան, Օննիկ, 419
 Սարգսյան, Արա, 300, 307
 Սարգսյան, Գեւորգ, 260
 Սարի, Գայկազ, 508
 Սարյան, Կարապետ, 260, 291
 Սարրո, Ալբեր, 216
 Սարոյան, Արամ, 345
 Սարուխան, Ալեքսանդր, 455
 Սաֆարյան, Սամվել, 186
 Սեդրակյան, Պերճ, 486
 Սեւոյան, Մարտիրոս, 260
 Սեզա, Սիրան, 400
 Սեւան, Սեւդա, 495
 Սեյան, Պատրիկ, 354-355
 Սիմոնյան, Սիմոն, 423
 Սինանյան, Սինան, 488-489
 Սինապյան, Գրիգոր, 118, 180
 Սյունի, Ռոմալդ, 522
 Սվաճյան, Վարդան, 393
 Սվաճյան, Սերովբե, 311
 Ստալին, Իոսիֆ, 238, 247, 253, 268-269, 272, 279, 281-282, 285, 288-289, 333-334, 348, 350-353, 358, 361, 367, 375, 377

Ստելմախովիչ, 304
 Ստեփանյան, Գարո, 188
 Ստեփանյան, Ներսիկ, 277-278, 284-285
 Սունդուկյան, Գաբրիել, 83
 Սուրենյան, Կարապիս, 419

Վ

Վազգեն Ա., Ամենայն Հայոց կաթողիկոս, 419, 479, 528
 Վահե Վահյան, 418, 423, 440, 441
 Վահրամ եպիսկոպոս, Մանկունի, 319
 Վայս, Գեյմուտ, 321
 Վարդանյան, Գրիգոր, 219-220, 292
 Վարդանյան, Յուրի, 477
 Վարդանյան, Նոյեմզար, 122-124, 133
 Վարսյան, Շաքե, 419
 Վեյնբաում, 274
 Վենիգելուս, Ելեֆտերիոս, 210
 Վիլսոն, Վուդրո, 152, 366
 Վինոգրեբո, Ռոզա, 235, 238, 253, 288
 Վինոգրադով, Սերգեյ, 359
 Վիշինսկի, Անդրեյ, 288-289
 Վիքրի, Զարլզ, 123-124, 143, 146, 179
 Վորոնցով-Դաշկով, Կոնս, 77, 84

Տ
 Տաղավարյան, Նազարեթ, 22, 30-33, 58, 84, 90
 Տամատյան, Միհրան, 387
 Տարախչյան, Վարդուշ, 286, 292
 Տարոնցի, Գալոբ, 272
 Տաֆա, Գ., 179
 Տեմիրճյան, Երվանդ, 455
 Տեմիրճյան, Երվանդ (բարերար), 439, 451
 Տեմիրճյան, Սարգիս, 451, 487
 Տեր-Գաբրիելյան, Սահակ, 207-209, 213-214, 223-227, 232-238, 245, 256, 282, 285, 287-291, 302-303
 Տեր-Կարապետյան, Մկրտիչ, 310
 Տեր-Ներսիսյան, Սիրարփի, 318
 Տեր-Սիմոնյան, Դրաստամատ, 284, 287, 304
 Տերտերյան, Արսեն, 188
 Տերտերյան, Իսահակ, 81
 Տիգրան Զավեն (Չուգասզյան), 272-275, 292, 305
 Տիրայր ծ.վարդապետ, Սարգսյան, 260
 Տիրան եպիսկոպոս, Ներսոյեան, 313, 366, 400
 Տիրատուրյան, Տիգրան, 370
 Տյովլետյան, Վարուժան, 419
 Տոպանյան քույրեր, 121
 Տրոցկի, Լեւ, 238

ՌԻ

Ռուզմեյան, Գայկաչեն, 458
 Ռուբեդ Գաչեն Ֆանսա, 398
 Ռուբինյան, Լ., 179
 Ռ
 Ռահիբանյան, Հովհաննես, 458
 Ռափազյան, Լեւոն, 105

Փափազյան, Ստեփան, 121
 Փիլիպոսյան, Տիգրան, 72
 Փիրունյան, Սիմոնիկ, 206
 Փուլադյան, Անդրանիկ, 419, 476, 520
 Փորթուզալ, Միքայել, 319
 Փուլչման, Հովսեփ, 310

Ք

Քալաշյան, Գուրգեն, 236
 Քասունի, Եղիա, 400
 Քելեկյան, Տիգրան, 44, 46-48, 111, 119, 136, 198, 227, 311, 324, 492
 Քելեշյան, Պետրոս, 396
 Քելեշյան, Գրիգոր, 397
 Քեշիշյան, Գրիգոր, 419
 Քեթենենճյան, Վահրամ, 512-513
 Քեչեկ, Գամբարձում, 188
 Քեպապճյան, Լեւոն, 492
 Քերյան, Սեդրակ, 135-136
 Քրքյաշարյան, Գալոբ, 105
 Քյուրքճյան, Վահան, 28, 33, 89, 146-147
 Քոլոլյան, Պողոս, 318, 320, 322
 Քոթեղիկոֆ, Մ., 210
 Քոչար, Գեւորգ, 188

Օ

Օշական, Գալոբ, 418
 Օտյան, Երվանդ, 33
 Օրլով, 304
 Օրջանյան, Պարգե, 403

Ֆ

Ֆեյսալ, էմիր, 100
 Ֆեսճյան, Սուրեն, 489
 Ֆրենկլան, Վահե, 317
 Ֆուադ Ա., 16, 24

Edward L. Melkonian

The History of the Armenian General Benevolent Union

Yerevan, "Moughni" Publishers, 2005

Summary

The volume presents the results of the first attempt ever made to study the history of the Armenian General Benevolent Union (AGBU) since its establishment in 1906.

The largest Armenian charity organization ever, the AGBU was founded in Cairo by prominent Armenian activist Poghos Nubar with the aim to support cultural, spiritual and economic development of Armenians. Before World War 1, the AGBU was active on the territory of the Ottoman Empire – in Western Armenia and Cilicia – where it founded over 40 Armenian village schools and provided villagers with supplies and funds. In 1912, it began to publish the Miutyun (Unity) magazine.

After the 1915 Armenian Genocide in the Ottoman Empire, the AGBU focused its activities on helping Armenian refugees. It built orphanages, schools, retirement homes for widows, clinics and similar facilities in Syria, Lebanon, Palestine, Greece, Egypt and other countries that hosted the refugees.

The AGBU was the only organization of the Armenian Diaspora that got the permission to be active in Soviet Armenia in 1923-1937. In those years, amongst other things, it founded the Nubarashen village, built hospitals, a five-storey residence for university professors and village schools. The Melkonian Fund, which was part of the AGBU structure, sponsored the publication of Armenian studies, awarded scholarships to students of the Yerevan State University. AGBU aided the repatriation of over 40 thousand ethnic Armenians to Soviet Armenia. In 1937, the AGBU was banned from the USSR on a false charge of "anti-Soviet activities"; the Union's representative in Soviet Armenia was sentenced to death and shot.

During World War 2, the AGBU could no longer implement its activities in European countries occupied by Germany, and had to move its headquarters to New York. From its new base, the Union sent aid to Soviet Armenia and the Red Army. Immediately after the war, the AGBU sponsored the repatriation of over 90 thousand Armenians from Europe and the Middle East to Soviet Armenia.

Starting in the 1930s, the main goal pursued by the AGBU has been the preservation of the ethnic and cultural identity of Diaspora Armenians. In over 70 cities in Europe, Middle East, the Americas and Australia, there are numerous Armenian youth organizations, around 20 Armenian primary and secondary schools, and over 30 culture, sports and leisure centers founded by the AGBU. The Union conducts regional and worldwide Armenian Diaspora sports competitions, awards scholarships, and publishes books and periodicals in many languages. The Union spends over 25 million US dollars a year on its activities.

The AGBU resumed its activities in Armenia after it became independent in 1991. The Union founded the American University of Armenia, built hospitals, churches, children's cultural centers, charity refectories etc. It supports the Armenian Philharmonic Orchestra and other organizations.

In the present volume, the history of the AGBU is told against the background of the history of Armenia and the Armenian Diaspora. The study relies on a large number of sources, including newly discovered material from Armenian archives and AGBU files.

Preface

1. The Founders and the Purposes
2. AGBU in Western Armenia and Cilicia
3. Orphan and Refugee Care Activity
4. Programs in Soviet Armenia. 1923-1937
5. The Repatriation of 1920-1930's. Calouste Gulbenkian's Resignation
6. Domestic Political Struggle in Armenia and Prohibition of the AGBU
7. The Years of the Second World War. The Repatriation of 1946-1949
8. Preserving of Armenian Identity in Diaspora
 - In Eastern Countries
 - In Western Countries

Conclusion: AGBU in the Third Republic of Armenia

References

Index

Эдуард Л. Мелконян

История Армянского Всеобщего Благотворительного Союза

Ереван, "Мугни", 2005

Резюме

В книге впервые предпринята попытка целостного изучения истории деятельности Армянского Всеобщего Благотворительного Союза (АВБС) - крупнейшей армянской филантропической организации.

АВБС был основан в 1906 г. в Каире известным национальным деятелем Погосом Нубаром в целях содействия культурному, духовному и экономическому развитию армянского народа. В период до Первой Мировой войны в Западной Армении и Киликии, входящих в состав Османской империи, АВБС основал свыше 40 армянских сельских школ, оказывал материальную и финансовую помощь крестьянам. В 1912 г. начал издаваться журнал "Миутюн" ("Союз").

После геноцида армян в Османской империи в 1915 г. основной сферой деятельности АВБС становится оказание помощи изгнанным со своей родины армянам - создание приютов-школ для сирот, домов призрения для вдов, больниц и поликлиник в Сирии, Ливане, Палестине, Греции, Египте и в других странах.

АВБС - единственная организация диаспоры, которой было разрешено действовать в Советской Армении в 1923-1937 гг. В эти годы был основан поселок Нубарашен, построены больницы, жилой дом для профессуры, сельские школы и др. Фонд Мелконян финансировал издание научных трудов по арменоведению, выделял стипендии студентам Ереванского университета, а также содействовал репатриации более 40 тыс. армян в Советскую Армению. В 1937 г. деятельность АВБС была запрещена по ложному обвинению в "антисоветской деятельности", а его представитель - расстрелян.

В годы Второй Мировой войны деятельность АВБС в оккупированных нацистами странах Европы была сведена на нет, и его Центральное Правление было переведено в Нью-Йорк. Именно отсюда направлялась помощь народу Советской Армении и Красной Армии. Сразу после войны АВБС фи-

нансировал репатриацию более 90 тыс. армян из стран Европы и Среднего Востока в Советскую Армению.

Начиная с 1930-х гг. главной целью АВБС является сохранение этнокультурной идентичности армян диаспоры. Сегодня в более чем 70 городах различных стран Европы, Среднего Востока, Америки, Австралии действуют основанные им молодежные организации, около 20 армянских средних и начальных школ, более 30 культурных и спортивно-оздоровительных центров, проводятся региональные и пандиаспоральные спортивные олимпиады, предоставляются стипендии студентам, на разных языках издаются журналы, книги и др. На все эти программы ежегодно выделяется более 25 млн долларов.

После обретения Арменией независимости в 1991 г. АВБС возобновил свою деятельность в стране - основание Американского университета, больниц, церквей, детских культурных центров, благотворительных столовых, финансирование Филармонического оркестра и др.

Изложение истории АВБС проводится на фоне истории армянской диаспоры и Армении, с привлечением большого числа разных источников, в том числе ранее неизвестных материалов из архивов Армении и АВБС.

Содержание

Предисловие

1. Основатели и цели
2. АВБС в Западной Армении и Киликии
3. Защита сирот и беженцев
4. АВБС в Советской Армении в 1923-1937 гг.
5. Репатриация 1920-1930 гг. Отставка Г. Гюльбенкяна
6. Внутриполитическая борьба в Армении и запрет АВБС
7. В годы Второй Мировой войны. Репатриация 1946-1949 гг.
8. Сохранение армянской идентичности в диаспоре
 - В странах Востока
 - В странах Запада

Заключение: АВБС в Третьей Республике Армения

Примечания

Указатель

ԷԴՈՒՐՈՂ Լ. ՄԵԼՔՈՆՅԱՆ

ՀԱՅԿԱԿԱՆ ԲԱՐԵԳՈՐԾԱԿԱՆ ԸՆԴՀԱՆՈՒՐ ՄԻՈՒԹՅԱՆ ՊԱՏՈՒԹՅՈՒՆ